

SC. SUP. 23. PL. 5.









R. P. Fr. VINCENTII  
CONTENSON,  
ORDINIS PRÆDICATORUM  
Sacrae Theologiae Professoris;  
THEOLOGIA MENTIS  
ET CORDIS:

SEV

Speculatio universae Sacrae Doctrinae,  
pietate temperata; è Patribus, Doctore  
potissimum Angelico derivata.

TOMUS VIII.

In quo de Sanctissimo Eucharistia Sacra-  
mento, & sacra Communione agitur.

Lucere vanum, ardere parum: lucere & ardere  
perfectum. Bern. serm. de nat. Ioan. Bapt.

*ex libro  
van  
postoris*



*per me  
Breslau  
an 22. April 1781*

LUGDUNI,  
Sumpt. LAUR. ARNAUD, PETRI BORDE,  
JOANNIS, & PETRI ARNAUD.

M. D C. L X X X I.  
Cum Approbat. & Privilegio Regis.

COPIED FROM THE  
ORIGINAL MANUSCRIPT  
OF THE  
HISTORY OF THE  
CITY OF  
NEW YORK  
BY  
JOHN B. HENRY  
PUBLISHED BY  
J. B. HENRY  
NEW YORK

THE  
HISTORY OF THE  
CITY OF  
NEW YORK  
BY  
JOHN B. HENRY  
PUBLISHED BY  
J. B. HENRY  
NEW YORK

NEW YORK  
J. B. HENRY  
PUBLISHED BY  
J. B. HENRY  
NEW YORK

NEW YORK  
J. B. HENRY  
PUBLISHED BY  
J. B. HENRY  
NEW YORK





# I N D E X

## DISSERTATIONVM,

Capitum , Speculationum , &  
Reflexionum , quas comple-  
ctitur Tomus VIII. Theologiæ  
Mentis & Cordis.

---

## LIBRI XI.

De Deo Salvatore,

P A R S   A L T E R A.

*De divinissimo Eucharistiæ Sacramento.*  
*pag. 1*

PRÆLOQVIUM : ubi de variis Eucha-  
ristiæ nominibus. ibid.

## DISSERTATIO I.

*Realis Corporis & Sanguinis Christi in  
Eucharistia præsentia : necnon panis*

*Index Dissertationum,  
& vini in Corpus & Sanguinem ejus-  
dem transubstantiatio adversum nos-  
tras Hæreticos propugnantur. p. 12*

CAP. I.



ERA, realis, & substantia-  
lis corporis & sanguinis  
Christi in Eucharistia  
præsentia omni argu-  
mentorum illorum ge-  
nere stabilitur, quibus certissima fidei dog-  
mata, & apud ipsos hæreticos indubitata de-  
monstrari solent. 16

SPECVLATIO I. Christus Dominus nobis cor-  
pus suum in cibum, & sanguinem suum in po-  
tum realiter daturum promisit. Promissionem  
verò illam in institutione Eucharistiæ imple-  
vit. Ergo Christum realiter in Eucharistia  
possidemus. 18

Promissa sua Christus in institutione Euchar-  
istiæ implevit. 29

Calvinistarum cavilli eliduntur. 36

REFLEXIO, & apostrophe ad Calvinistas. 53

SPECVL. II. Realis corporis & sanguinis Chri-  
sti in Eucharistia præsentia fidem à Christo  
acceperunt Apostoli, ab Apostolis Sancti Pa-  
tres, & sacra Concilia acceptam servaverunt,  
atque in nos perenni traditione corrivave-  
runt. 57

Sanctus Paulus, ibid.

Liturgiæ Apostolorum, & acta S. Andreæ. 60

Sanctus Dionysius. 64

Sanctus Ignatius Martyr. 65

Sanctus Justinus. 67

Sanctus Irenæus. 70

Tertul

## Capitulum, & Speculationum.

<u>Tertullianus.</u>	73
<u>S. Cyprianus, necnon Author libri de operibus</u>	
<u>Cardinalibus Christi.</u>	78
<u>S. Hilarius Pictaviensis.</u>	80
<u>S. Cyrillus Hierosolymitanus: Optatus Milevi-</u>	
<u>tanus: S. Basilus: S. Gregorius Theologus:</u>	
<u>S. Ephrem Syrus: S. Epiphanius.</u>	82
<u>S. Gregorius Nyssenus.</u>	86
<u>Sanctus Ambrosius.</u>	88
<u>S. Ioannes Chrysostomus.</u>	95
<u>Sanctus Hieronymus.</u>	98
<u>Sanctus Augustinus.</u>	99
<u>Alii Patres, Cyrillus Alexandrinus, Leo Ma-</u>	
<u>gnus, Gregorius Magnus, Joannes Damai-</u>	
<u>cenus.</u>	110
<u>Sacra Concilia eidem veritati suffragata sunt.</u>	
<u>115</u>	
<u>Ponderantur Patrum autoritates &amp; objectio-</u>	
<u>nes occupantur.</u>	116
<u>Petita ab humana Philosophia hæreticorum so-</u>	
<u>phismata convelluntur.</u>	138
<u>Demonstrationem à Patribus petitam confirmat</u>	
<u>longè præclarissimum septimæ Synodi Gene-</u>	
<u>ralis testimonium.</u>	145
<u>REFLEXIO, &amp; apostrophe ad nostrates hære-</u>	
<u>ticos.</u>	147
<u>SPECVL. III. Unanimis Ecclesiarum omnium</u>	
<u>Christianarum consensus ante ortos Calvi-</u>	
<u>nianos realem Christi Corporis in Euchari-</u>	
<u>stia præsentiam confitebatur, quæ proinde</u>	
<u>non potest non esse dogma Catholicum. In-</u>	
<u>flexibilis Ministri Claudii in mentiendo per-</u>	
<u>tinacia repræsentatur.</u>	151
<u>Ejusdem demonstrationis prior confirmatio.</u>	
<u>156</u>	



*Index Dissertationum,*

Posterior ejusdem demonstrationis confirmatio.	158
Ministri Claudii mendacia ob oculos posita.	164
Ministri Claudii imposturæ sub sensum cadentis utilitas à Deo provisa.	176
Vis demonstrationis instaurata.	182
Postrema perpetuitatis convictio à novissimis totius Orientis Christiani testimoniis omni exceptione majoribus.	184
Unica ad salutem, una ad honorem recuperandum via Ministro Claudio superest, si publicos errores publicè recantet.	194
REFLEXIO, & apostrophe ad Calvinistas.	200
CAPVT II. Vera transsubstantiatio adversus Lutheranos stabilitur.	207
SPECVL. I. Divinæ Eucharistiæ hostes & hostilitates ordine recensentur.	208
REFLEXIO.	229
SPECVL. II. Substantia panis & vini in corpus & sanguinem Christi Domini secundum se totam convertitur; unde & vera datur transsubstantiatio.	237
REFLEXIO.	243
SPECVLATIO III. Inter solvenda argumenta à ratione petita, Catholica transsubstantiationis doctrina magis magisque explicatur.	249
Quæres, quænam actio sit transsubstantiatio Eucharistica?	269
Corollaria derivata.	278
REFLEXIO.	280

DISSERTATIO II.

*De existentia & essentia Sacramenti Eucharistia , necnon materia & forma illius.* 283

CAPVT I. **D**E existentia & essentia Sacramenti Eucharistia : ubi de necessitate, veritate, & institutione illius. 284

SPECVL. I. Eucharistia Sacramentum à Christo Domino institutum est lunâ decimaquartâ primi mensis, illud subinde in azymo conficiens : quod Sacramentum omnibus est necessarium necessitate medii, sin re , certè voto suscepti. 285

Necessitas Eucharistia. 297

Solvuntur objectiones. Mens S. Augustini circa Communionem parvulorum accuratè indagatur & exponitur. 302

REFLEXIO. 317

SPECVL. II Eucharistia est Sacramentum corporis & sanguinis Christi sub speciebus panis & vini realiter contentum, ad spiritalem animæ refectionem institutum : quod licèt duplici elemento, pane scilicet & vino constet, non plura tamen, sed unicum est Sacramentum. 323

Unitas Sacramenti Eucharistia. 330

SPECVL. III. Momentosa de permanentia & adoratione Eucharistia corollaria derivantur. 338

*Index Dissertationum,*

Corollarium alterum de adoratione Eucharistiae. 348

REFLEXIO. 366

CAPVT II. De materia & forma Sacramenti Eucharistiae, atque de modo quo Christus in Eucharistia existit. 369

SPECVL. I. Panis & vinum vera sunt, & sola Sacramenti Eucharistiae materia. 370

Observanda circa materiam Eucharistiae scitu necessaria. Et primum quis & qualis panis? 375

Panis Eucharistiae quomodo coagmentandus? Præclara Ordinis S. Benedicti cautela. Figura hostiae. 377

Convenientiae panis azymi. Schismaticorum & hæreticorum calumniae elisæ. 380

Materia Calicis consecrandi vinum, & quale? 388

Vino aqua permiscenda, quo jure, & quanta? 390

Quæres primum, quid fiat de aqua vino infusa post consecrationem; & in quid evadat, aut transmutetur? 397

Fit satis objectis. 403

Quæres secundò, utrum una species possit sine altera consecrari in extremæ saltem necessitatis articulo, & accedente Summi Pontificis dispensatione? 408

Quæres tertio, utrum ad materiam hujus Sacramenti determinata panis & vini præsentia, determinata etiam quantitas desideretur. 414

REFLEXIO. 418

SPECVLATIO II. Legitima & essentialis Sacramenti Eucharistiae forma his verbis continetur: Hoc est corpus meum, Hic est sanguis meus; vel quod idem est, Hic est Calix sanguinis mei. 423

Quæres,

*Capitulum, & Speculationum.*

Quæres, utrum sola verba adducta sint essen-  
tialia & necessaria, ut corpus Christi confi-  
ciatur; num verò illa etiam pro consecratio-  
ne panis, Qui pridie quàm pateretur, &c.  
vel ista, Quid pro vobis tradetur, deside-  
rentur? 440

Quæres secundò, an verba illa quæ inter con-  
secrandum calicem proferuntur, sint de es-  
sentia formæ: Novi & æterni Testamenti,  
mysterium fidei, qui pro vobis, & pro mul-  
tis effundetur in remissionem peccatorum?

443

Mens D. Thomæ ob oculos posita: ejus ratio-  
nis efficacia. 456

REFLEXIO. 471

SPECVLATIO III. Modus quo Christus in  
Eucharistia existit, paucis quæsitis exponi-  
tur. 477

Quæres primò, quid vi verborum, quid con-  
comitanter sub utraque specie contineatur. 478

Quæres secundò, utrum Pater & Filius per con-  
comitantiam in Eucharistia præsentés spe-  
ciali aliquâ ratione sint? 482

Quæres tertio, quomodo Christus sub specie-  
bus existat? 483

Quæres quarto, an corpus Christi per se, vel  
per accidens hoc in Sacramento moveri pos-  
sit? 488

Quæres quinto, utrum corpus Christi in hoc  
Sacramento realiter existens ab oculo corpo-  
reo, saltem glorioso & divinitus videri pos-  
sit? 492

REFLEXIO. 498

DISSER

DISSERTATIO III.

*De causis & effectibus Eucharistia. p. 501*

CAPVT I. **D**E causis & motivis Eucharistia. ibid.

SPECVL. I. Specialia divinæ Eucharistia motiva expenduntur. 502

REFLEXIO. 507

SPECVL. II. In Eucharistia efficienda adeo potentia, sapientia & dilectio Dei eminent, ut dicere aulam, quod cum Deus sit omnipotens, plus dare non potuit; cum sit sapientissimus, plus dare nescivit; cum sit ditissimus, plus dare non habuit. 511

Eucharistia divinæ omnipotentia non plus ultra, sed ultima meta. 513

Eucharistia divinæ adinventionum sapientia ultimus conatus. 516

Eucharistia divini amoris effusionum coronis. 524

REFLEXIO. 530

SPECVL. III. Minister Eucharistia conficiendæ solus est Sacerdos proprie dictus, ad quem etiam eam dispensare jure divino pertinet, quanvis illam Diaconi potestate delegata ministrare possint. 533

Minister dispensandæ Eucharistia. 550

CAPVT II. Eucharistia utilitates & fructus immensi perstringuntur. 573

SPECVL. I. Viri Eucharistia effectus ordine recensentur. 574

Primus Eucharistia effectus: Gratia & vitæ spiritalis augmentum. ibid.

Secundus

## *Capitulum , & Speculationum.*

Secundus Eucharistiæ effectus : Specialior cum Christo unio. Tertius : Unio Fidelium inter se.

577

Quartus Eucharistiæ effectus : Pinguedo spiritus, seu victrix gratiæ delectatio.

581

Quintus Eucharistiæ effectus : Spiritualis vigor, quo tentationibus obistimus, & à peccati mortiferi veneno præservamur.

585

Sextus Eucharistiæ effectus : Venialium remissio peccatorum.

588

Septimus Eucharistiæ effectus : Remissio pœnæ, vel penitus, vel partim, pro modo & ratione fervoris suscipientis condonata?

592

Octavus Eucharistiæ effectus : Cordis castimonia in appetitum diffusa.

595

Nonus Eucharistiæ effectus : Semen immortalitatis, & beatæ resurrectionis in corpus derivatum.

600

Decimus Eucharistiæ religiosè frequentatæ effectus : Perseverantia finalis, cui æterna felicitas succedit.

609

REFLEXIO.

619

SPECVL. II. Variæ circa Eucharistiam dubitationes appendices resolvuntur.

624

Quæres primò, utrum Eucharistiæ Sacramento prima interdum gratia producat, quâ peccata mortalia deleantur.

623

Quæres secundò, utrum saltem per accidens primam gratiam peccati lethalis remissivam Eucharistia interdum operetur.

626

Quæres tertio, quonam tempore, vel momento Sacramentum Eucharistiæ rectè dignèque susceptum ordinarios suos effectus largiatur?

631

REFLEXIO.

637

SPECVLAT. III. Aliis à suscipiente Sacramentum

tum



*Index Dissertationum,*

tum Eucharistiæ directè non prodest quidem;  
at indirectè tamen. Piissimus communionis  
pro mortuis ritus, & sacrae de ea Congrega-  
tionis iudicium explicatur & defenditur. 641

REFLEXIO.

648

DISSERTATIO IV.

*De usu Sacramenti Eucharistiæ : ubi de  
frequenti commuione.* 652

CAPVT I. **D**E obligatione usurpandæ Eu-  
charistiæ, & de idonea animi  
ac corporis ad Eucharistiam adeundam com-  
positione. p.660

SPECVL. I. Christianis omnibus adultis non  
solum Ecclesiæ mandato, sed Christi etiam  
præcepto impositum est, ut Eucharistiam  
identidem usurpent. 661

REFLEXIO.

669

SPECVL. II. Nullo divino præcepto Laici &  
Clerici non conficientes ad Eucharistiæ Sa-  
cramentum sub utraque specie sumendum  
obligantur; sed alterius speciei communio  
ad salutem sufficit: Justissimis, gravissimisque  
de causis Ecclesia divinitus inspirata usu cali-  
cis laicis interdixit, speciei solius panis com-  
munionem permittit. 673

Communio sub utraque specie non est præcepto  
divino omnibus imperata & necessaria. 676

Eadem veritas ex variis primitivæ Ecclesiæ riti-  
bus comprobatur. 682

Alia pro una specie probatio ex Scripturis, acce-  
dente Patrum interpretatione de promittitur. 694

Ratione theologicâ idem Ecclesiæ Catholicæ  
usus



*Capitulum, & Speculationum.*

usus confirmatur.	701
Solutis Sectariorum objectis, quid sit communio laïca explicatur.	707
<u>Quæres, quid sit communio laïca, de qua fit mentio in vetustissimis Patribus &amp; Conciliis, Syricio Papa epist. 11. cap. 11. Cypriano lib. 4. epist. 2. Concilio Eliberino can. 76. Sardicensi can. 1. &amp; 2. Agathensi can. 33. Toletano I. can. 4. Bracharensi I. can. 31. aliisque.</u>	723
<u>REFLEXIO.</u>	729
<u>SPECVL. III. Necessarius ad Eucharistiam percipiendam mentis, cordis, &amp; corporis apparatus exponitur.</u>	733
Mentis ad communionem præparatio.	735
Devota mentis attentio ad consequendum Eucharistiæ effectum necessaria.	739
Cordis ad Eucharistiam præparatio.	754
Corollaria derivata.	762
Corporis ad Eucharistiam præparatio.	778
Jeiunium ad sacram Communionem, exceptis paucis extremæ necessitatis articulis, semper necessarium.	784
Nonnulla confectaria paucis derivantur.	797
<u>REFLEXIO.</u>	806
<u>CAPVT II. De frequenti Communionem: ubi de Eucharistia usurpanda traditæ à Patribus regulæ præscribuntur.</u>	809
<u>Prima regula.</u> Innocentes Eucharistiam frequenter usurpare oportet.	810
<u>SPECVL. II. Christiani post amissam Baptismatis innocentiam, si præsertim qui in peccata mortalia iteratis lapsibus recidunt, non debent ante actos dignos laboriosæ pœnitentiæ fructus ad Communionem accedere.</u>	817
Mens Dionysii, Basilii & Cypriani aperitur.	818
Ambrosii,	

*Index Dissertationum , &c.*


Ambrosii , Augustini , & Chrysostomi luculenta proferuntur testimonia.	822
Celebris Gennadii locus producitur.	830
Eadem regula Hieronymi , Theodoretii , & ma- gni Gregorii testimoniis communicur.	834
Beati Bernardi autoritate eadem regula firma- tur.	836
Eandem Regulam S. Bonaventura clarissimè do- cuit & probavit.	839
Sacri Tridentini Concilii doctrina eidem regu- læ apertissimè favet.	841
S. Francisci Salesii & Magistri Avilæ apertis testi- ficationibus eadem regula stabilitur.	843
Senonensis & Bituricensis Synodi decretis ca- dem regula consentanea est.	846
Testimonium Mariani Victorii adducitur.	847
Egregiis S. Thomæ testimoniis , ejusdemque ra- tionibus eadem regula confirmatur.	848
Fundamentalis hujus regulæ ratio.	856
Solvitur objectio à Patribus auctoritate petita.	860
<i>Tertia regula.</i> Negotiorum honestorum multi- tudo bonos Christianos à frequenti commu- nionè non submover.	864
<i>Quarta regula.</i> Peccata venialia justorum fre- quentem Communionem non prohibent: eorum tamen affectus Communionis dila- tionem exigit.	866
Solvuntur objectiones à ratione depromptæ.	871
Regulas hæcenus constitutas illustriores S. Tho- mæ discipuli religiosè sectati sunt. Illustria P. Granatensis testimonia.	886
P. Emerici de Bonis longè præclarissima profer- tur sententia de abusibus , qui in usu sacre Communionis admittuntur.	899
<b>REFLEXIO.</b>	909



# LIBRI XI.

De Deo Salvatore ,  
PARS SECVNDA.

*De divinissimo Eucharistiae  
Sacramento.*



## PRÆLOQUIUM.

*Ubi de variis agitur Eucharistiae  
nominibus.*

**Q**UANTVM fanè, illo me in præ-  
senti zelo & ardore succendi, qui  
tanto Christi amorì enarrando  
non esset impar. Utinam succen-  
sus esset calamus carbone illo ig-  
nito & seraphico, quo purgata sunt labia Isaiaë,  
ut immensæ Christi in humanum genus dile-  
ctionis inæstimabiles divitias, & singulare illud,  
ac planè infinitâ Dei sapientiâ dignum consi-  
lium exponerem, quo effecit, ut divinitate

unctæ Christi carni agglutinati , spiritu Christi , & ipsa divinitate viveremus. Quis enim , cæsi hominum linguis loquatur , aut Angelorum , verbis exprimere possit infinitam illam benignitatem , quâ subministrato nobis in terra eodem cibo , quo Beati in cælo regnantes pascuntur , sempiternam Paradisi felicitatem in Ecclesia exscribere , & antevertere clementissimus Dominus dignatus est ? Obstupescit meritò Chrysostomus , & totâ , quâ ad miraculum valebat , eloquentiæ magnificentiam incredibilem illam Servatoris nostri munificentiam extollit , quâ ut ait hom. 83. in Matth. *Nos secum velut in unam massam redigit ; nec solum fide , sed & re ipsa corpus unum efficit.* Addit hom. 45. in Joannem , *sacrum hunc sanguinem ( nobis in Eucharistia realiter propinatum ) vivam ac spirantem in nobis Regis nostri effigiem reparare : hunc sanguinem perennibus undis animam irrigare ac fovere , cujus eximiam pulchritudinem ac nobilitatem marcescere ac degenerare non sinit. Hunc sanguinem dignè gustatum demones fugare , & longè à nobis profligare ; Angelos verò , & Angelorum Dominum ad nos allicere. Hunc sanguinem animarumstrarum salutem esse ; hoc recreari animum , hoc ornari , hoc inflammari , atque ipso igne clariorem reddi , & auro splendidior.* Ab hac mensa salire fontem fluvios spirituales diffundentem , juxta quem non steriles salices adnascuntur , sed arbores , quæ cælum ipsum attingunt , ac tempestivos semper , & nunquam marcescentes fructus afferunt.

Consideravi opus tuum , & expavi. Regum Rex summus , & verus ipse Deus , Salvator hominum.

minum Christus Jesus , ad eximiam , & inauditam ,  
atque omnia non solum merita , sed & vota  
excedentis benignitatis specimen , , incredibili-  
lisque in fideles servos amoris argumentum  
singulare , non eos modò mensâ suâ dignatur ,  
sed & corpore suo pascit , *idem conviva & con-*  
*vivium* , ut à B. Hieronymo dictum est. Nul-  
lum divinius ab eò præmium charissimis ami-  
cis suis , suavissimisque filiis hac in vita confer-  
ri ; nullum æternæ , quod iis in futuro sæculo  
parat , felicitatis dulcius pignus præberi potest.  
In hoc divinissimo mysterio amor divinus , ut  
verbis Tertulliani *lib. adversus Iudæos , cap. 14.*  
utar , est *sublimatus in consummationem* ; un-  
de & de illo intelligit Cyprianus illud Da-  
vidicum : *Omnis consummationis vidi finem.*  
Consummatur planè divina omnipotentia , me-  
moriam faciens mirabilium suorum , quan-  
do misericors , & miserator Dominus escam  
dedit timentibus se. Consummatur sapientia  
totum claudens in exiguo , quando ædificans  
sibi domum , miscuit vivum , & posuit men-  
sam. Consummatur amor , *non plus ultra*  
progredi valens ; nam cùm dilexisset suos ,  
qui erant in mundo , in finem dilexit  
eos.

Hac de causa variis nominibus insigniri so-  
let augustissimum hocce Sacramentum , quippe  
cujus tanta est præcellentia , virtus , & plenitudo  
gratiarum , ut uno nequeat nomine exprimi  
ineffabilis misericordiæ Dei dignatio. Cùm  
enim inter innumerabilia beneficia , quibus fi-  
bi humanum genus Christus promeruit , Eu-  
charistiæ operæpretium principem obtineat lo-  
cum ; & sive rei contentæ majestas , sive modi

existendi prodigia, sive sese immolantis pretium, sive cibi cœlestis delitiæ fructus uberissimi perpendantur, totum divinum, & omni admiratione majus splendeat; plura oportuit nomina excogitare, quibus infinitum donum quadantenus adumbraretur: de quibus in limine paucis agendum est.

In primis nomenclatura celebrior, & juxta usitatio est *Eucharistia* vocabulum, quod verbum vel bonam gratiam, vel gratiarum actionem significat. Dicitur porro bona gratia, quia in hoc sacramento gratia Dei largiùs effunditur, vel quia gratiarum omnium fontem Christum continet, vel quia vitam æternam, de qua scriptum est, *Gratia Dei vita æterna*, præsignificat. Appositè etiam gratiarum actio hoc sacramentum dicitur, tum quòd in ejus institutione Christus gratias egit: tum quòd ad gratias Deo pro universis beneficiis referendas nihil hac purissima hostia Deo acceptius offerre possumus. Unde & in illo immensi redemptionis beneficii gratias agere, seu in commemorationem Christi facere, & mortem Domini annunciare jubemur. Hinc Chrysostomus hom. 25. in cap. 8. Matthæi: *Optima*, inquit, *beneficiorum custos est ipsa memoria beneficiorum, & perpetua gratiarum actio. Propterea & tremenda, ac salutaria illa mysteria, qua in omni synaxi celebramus, Eucharistica nuncupamus; sunt enim beneficiorum recordatio plurimorum, caputque ipsum divina erga nos providentia ostendunt, neque faciunt debitas semper gratias exsolvere.* Sed de Eucharistia ut sacrificio, & perenni illa Agni immaculati hostia usque ad consummationem sæculi, ringentibus



## Præloquium.

ringentibus licet Lutheranis , & Calvinistis, hæreticorum omnium , si dogmata spectes , ab orbe condito impiissimis , duraturâ ultimo loco dicemus.

Secundò appellatur *Communio* , seu *Synaxis* : tum quia communicatione corporis & sanguinis Christi Salvatori copulamur , & cum aliis Christi fidelibus in unum Ecclesiæ corpus coagmentamur ; imò & cor unum charitate efficimur , juxta illud 1. Cor. 10. *Vnus panis , & unum corpus multi sumus omnes , qui de uno pane & de uno calice participamus.* Qua de causa *Sacramentum pacis* , & *charitatis* frequenter nominatur. Tum quia in unum convenire locum Christiani solent , ut huic sacramento & sacrificio intersint. Quanta autem debet esse Christianorum animorum concordia , quantum in domo Dei ambulare cum consensu , qui simul , ut phrasi Prophetæ utar , dulces capiunt cibos , mensæ eidem accumbunt , eadem Christi carne pasti , eodem sanguine potati ! O *sacramentum pietatis* , exclamat August. tract. 26. in Joan. *ô signum veritatis ! ô vinculum charitatis !* Litigabant utique ad invicem *Judei* , quoniam panem concordie non intelligebant , nec sumere volebant : nam qui manducant talem panem , non litigant ad invicem , quoniam unus panis. Conjunctio enim fidelium inter se ex Christi conjunctione consequitur : nam quæ sunt eadem uni tertio , sunt eadem inter se.

Tertiò appellatur *Viaticum* ; tum quia ejus sacri cibi solatio in hujus æruminosæ vitæ peregrinatione reficimur , sustentamur , recreamur. Tum quia hoc sacramento ad æternam felici-



tatem via sternitur , & munitur. Tum quia Christianis in periculo mortis constitutis sacramentum istud ministratur , quo cursum piè consumment , & arctam viam , quæ ducit ad vitam , in extremis momentis infinitis periculis septam , inoffenso pede percurrant. Unde dicitur in Concilio Nicæno , canone 16. *De iis qui ad exitum veniunt , etiam nunc lex antiqua , regularisque servabitur , ita ut si quis egreditur è corpore , ultimo & necessario viatico minimè privetur.*

Quartò appellatur *Panis* , & *Fractio panis*. Joan. 6. *Panis , quem ego dabo , caro mea est pro mundi vita.* 1. Cor. 10. *Panis quem frangimus , nonne communicatio corporis Christi est ?* Nominatur autem panis , tum propter materiam præcedentem , ex qua conficitur ; tum propter accidentia panis post consecrationem permanentia , ratione quorum extrinsecam panis formam , & figuram præfert. Tum demùm , quia sicut pane hominis corpus vescitur , & saginatur ; ita Christus se in convivio Eucharistiæ manducantibus dat Spiritus pinguedinem. Dicitur verò fractio panis , quia fidelibus distribuitur ; idem enim est frangere , & dividere , seu distribuere ; quia non frangitur panis , nisi ut divisus multis porrigatur. Nec obest , quod non remaneat substantia panis ; sicut enim Angeli humanam speciem assumentes , homines dicuntur , Genes. 18. & 19. ita frangi dicitur panis , quando sensibilibus specierum fit fractura. Maximè quia Eucharistia vocatur panis , non qualiscumque , sed *panis vivus* , *panis qui de cælo descendit* , quem qui manducaverit , *vivet in æternum* , ut patet Ioan. 6. Quæ omnia  
pani

pani materiali non posse convenire , manifestissimum est. Unde & passim , *Panis vite* , *Panis supersubstantialis* , *Panis Angelorum* dicitur.

Quintò appellatur *Corpus & sanguis Christi Domini* ; quia nimirum in hoc Sacramento realiter continentur. Hinc Tertull. lib. de resurrectione carn. cap. 8. *Caro corpore , & sanguine Christi vescitur , ut & anima de Deo saginetur*. Et August. lib. 1. de Trinit. cap. 4. *Corpus Christi , & sanguinem dicimus illud tantum , quod ex fructibus terra acceptum , & prece mystica consecratum sumimus ad salutem spiritalem , in memoriam pro nobis Dominica passionis*.

Sextò appellatur *Sacramentum corporis , & sanguinis Christi* , *Sacramentum altaris* , *Sacramentum Fidelium*. Dicitur Sacramentum corporis & sanguinis Christi ab Augustino lib. 1. de peccat. merit. cap. 24. *Optimè Punici Christiani baptismum nihil aliud , quàm salutem , & sacramentum corporis Christi nihil aliud , quàm vitam vocant*. Dicitur Sacramentum Altaris ab eodem Augustino epist. 50. *Convivium Domini unitas est corporis , non solum in Sacramento Altaris , sed etiam in vinculo pacis*. Dicitur etiam Sacramentum Fidelium ab eodem Augustino *serm. 2. de verbis Apost. cap. 10*. tum quia in illo , veluti centro , unitur Fidelium religio : tum quia soli fideles sunt ad illud suscipiendum idonei : tum quia solis fidelibus , id est in fide stabilibus , patefiebat , & in primitiva Ecclesia de eo coram catechumenis non nisi subobscurè , & cum magna cautela verba fiebant. Unde sæpe Augustinus Eucharistiam non aliter significat , quàm per sacramentum , vel sacrificium , quod norunt fideles,



ut patet loco citato , & in *Psalm.* 39. Porro quàm insulsè inde inferant Calvinistæ , in Eucharistia esse tantùm signum corporis Christi, non verò ipsum corpus , quia sacramentum signum est, suo loco patebit. Et certè eadem asylogistiâ inferent , Ecclesiam Romanam , & omnes realis præsentia Catholicos defensores , solum in Eucharistia corporis Christi signum agnoscere , cùm Eucharistiam passim , & vulgò sanctissimum sacramentum , sacramentum altaris , & clam , & coram , & in familiaribus colloquiis , & in solennioribus officiis appellent, atque cum Dionysio dicant , illud esse *Sacramentum sacramentorum , mysterium mysteriorum*; quia quæ in reliquis sacramentis peraguntur, eminentissimè complectitur.

Septimò à multis hoc sacramentum *Cœna* appellatur , quia in novissima cœna à Christo Domino pridie quàm pateretur , institutum est. Quod nomen modernis hæreticis Lutheranis , & Calvinistis mirè placet , ut Eucharistia exosum sibi nomen repudient , utque ( quæ summa erroris ineptia est ) inferre inde, & suadere ignorantibus possint , sacramentum hoc non esse aliquid permanens , sed in usu, cœnandique actu situm esse, nec ritè fieri , nisi pluribus accumbentibus, nec ad infirmos esse deferendum. Fundamentum etiam hujus nominis desumunt nonnulli ex illis Apostoli 1. *Cor. 11.* verbis : *Cœnantibus vobis in unum , jam non est dominicam cœnam manducare.* Locum enim de Eucharistia intelligendum docuerunt S. Augustinus *epist.* 118. S. Eligius *hom.* 15. & D. Thomas , præsertim cùm de adorandæ Eucharistia institutione , & necessaria ad eam reci

recipiendam dispositione in eodem contextu  
Apostolus sermonem habeat. Quavis enim  
non pauci existiment, Apostolum eò loci de  
cœna Dominica & Eucharistica non esse lo-  
quutum, sed de cœna, seu convivio communi,  
quo primitivæ Ecclesiæ Fideles unà reficieban-  
tur, senes cum junioribus, simul in unum di-  
ves & pauper; idque ad imitationem Christi,  
in cuius ultima cœna tres comestiones factæ  
sunt; prima legalis, in qua Agnus Paschalis  
comedebatur; altera communis, in qua ordi-  
narii cibi sumebantur; tertia sacramentalis, in  
qua sacramentum corporis & sanguinis sui  
Christus instituit: ad imitationem ergo Chri-  
sti, & mutux dilectionis significationem in  
communi Christiani convivabantur; successu  
tamen temporis repudiatis pauperibus ditio-  
res oppiparè epulabantur, quem gliscentem  
abusum reprehendit Apostolus, verbis præfa-  
tis statim subnectens: *Vnusquisque enim suam  
cœnam presumit ad manducandum; & alius  
quidem esurit, alius autem ebrius est. Nunquid  
domos non habetis ad manducandum, aut Ec-  
clesiam Dei contemnitis, aut confunditis eos  
qui non habent?* Constat autem in perceptione  
Eucharistiæ neminem inebriari, neminem esu-  
rire; constat Eucharistiam vulgò, & oppor-  
tuniùs domi non sumi; constat pauperes æquè  
cile atque divites Eucharistiam usurpare. Lo-  
quitur ergo Apostolus non de Eucharistia, sed  
de agapis, hoc est convivio charitatis in Ec-  
clesiis festis solennioribus frequentato, in quo  
divites inebriabantur; quod poterat quisque  
volentus domi peragere, quodque sibi pau-  
eres parare nequibant. Verùm quominus

locum illum de Eucharistia intelligamus , præfata non impediunt. Cùm enim in convivio illo cibi statim à perceptione corporis Domini gustarentur , per cœnam Dominicam Eucharistiam rectè potuit intelligere. Apostolus , cui prophana convivia per abusum admiscebantur. Unde sensus apostolicus iste est : Sic admiscere convivia prophana , vino sordida & pauperibus injuriosa , non est Eucharistiam , quæ Dominica cœna est , eâ quâ Christus instituit , dilectione , eâ quam præcepit , cordis castimoniâ manducare.


Nec est , quod inde aliquid in patrocinium suorum errorum dirivent nostrates hæretici : omnes quippe ritus , quos Christus pro loco & tempore servavit , Ecclesiæ servandos non præcepit. Sed si ita scrupulosi sunt Calvinistæ , cur non agnum in sua cœna comedunt ? Cur non eam serotino tempore cœnati usurpant ? Curstantium prius pedes non lavant ? Sed homines , si Superis placet , religiosissimi , eas caeremonias aucupantur , quas Ecclesia Catholica Spiritu sancto gubernata prætermittit ; eas prætermittunt , quas illa traditionum paternarum tenax custodit. Quia nimirum summa Calvinistarum religio , summa regula est Ecclesiæ Christi astversari , & omnibus sacris ritibus contulcatis , eas affectare caeremonias , quas Patres non necessarias judicaverunt , suas ut Calvinistæ novitates obtrudant.

Denique ut aliorum nominum vim intelligas , quibus hoc augustum Sacramentum sacri Doctores celebrarunt , illiusque immensam dignitatem , & præcellentiam uno vocabulo minime comprehensibilem , variis , & variis nomi-

num titulis exprimere conati sunt, præ oculis habenda est doctrina S. Thomæ *quæst. 73. art. 4.* ubi ostendit, quod quia hoc Sacramentum tria potissimum significat, & præteritam Christi passionem, & præsentem gratiarum effusionem, unde fidelium inter se, & cum Christo communio profluit; & futuræ gloriæ felicitatem, nihil mirum, si tot proprietatibus, & effectibus designandis idem sacramentum diversis nominibus insigniatur. Hinc *Redemptionis memoriale* à multis, *Holocaustum salutis* à Ruperto, *Sacrificium divinissimum* à Dionysio, *Sanctum sanctorum*, *Sacramentum sacramentorum*, *Amer amorum*, *Dulcedo omnium dulcedinum* à Bernardo; *Verbum nutritorium animarum* ab Origene, *Panis beatitudinis* ab Athanasio, *Æterna vite cibarium* à Chrysologo, *Poculum immortalitatis* à Prospero, *Alimonia immortalitatis*, & *vita aterna portio* à Cypriano, denique *Omnium novitatum novitas* à Hieronymo, & *Officina omnium miraculorum* à Damasceno appellatur. Ut autem in hoc Sacramento, quod Germanus Constantinopolitanus *arcam luminum* vocat, dilucidè procedamus, faciliora, & magis certa more nostro præmittemus; difficiliora deinde prosequuturi. Verùm quia toto harum dissertationum decursu realem corporis & sanguinis Christi in hoc sacramento præsentiam, & panis & vini in corpus & sanguinem ejusdem transubstantiationem supponere opus est; & vix, ac ne vix quidem stabilire quidpiam orthodoxum possumus, nisi cardinalibus illis veritatibus superstructum sit, operæpretium est prius constantem Ecclesiæ Catholicæ fidem omni argumentorum genere



adversùs hæreticos moderniores communire,  
quàm ut explorata de hoc Sacramento Ecclesiæ  
dògmata exponamus.



## DISSERTATIO I.

*Realis Corporis, & Sanguinis Chri-  
sti in Eucharistia præsentia, nec-  
non panis & vini in Corpus &  
Sanguinem ejusdem transubstan-  
tiatio adversum nostrates hæreti-  
cos propugnantur.*

**D**E Eucharistiæ Sacramento primùm no-  
bis cum hæreticis modernis agendum est,  
ut illustratâ Ecclesiæ Catholicæ, & Romanæ  
veritate, omniumque errorum tenebris depul-  
sis, difficultates deinde à Catholicis ventilatas  
planiùs explicemus. Hoc argumentum innu-  
meri viri Catholici præclarè prosequuti sunt,  
ostenderuntque Lutheranorum, & Calvinista-  
rum, quæ ipsis maxima videntur argumenta,  
frivola esse sophismata, ac commentitia, & ut  
alicubi ait disertus Cano, vix digna lucubra-  
tione & ingenio anicularum; taliaque certè,  
propter quæ non modò ab Ecclesiæ Catholicæ  
sensu, & omnium Christianorum toto quàm  
latè patet orbe ante natos istos apostatas degen-  
tium,



tium, unanimi consensione, sed nec ab amici  
unius probi, & sinceri esset necessitudine sen-  
tentiaque discedendum. Quare post aureas Car-  
dinalium Perronii, Bellarmini, Richelii, Epis-  
copi Coëffetæi, aliorumque lucubrationes,  
quibus omnia à clarissimis ingeniis præoccu-  
pata sunt, nihil fermè dicendum superesset, nisi  
argumenti: fecundissimi dignitas immensa,  
veritatis Catholicæ splendor in dies magis ma-  
gisque sese explicans, & hæreticorum vanilo-  
quia novam semper fandi materiam, & copiam  
subministrarent.

Verùm ut ingenuè fatear, nullus faciliùs,  
expeditiùs, efficaciùs, & (absit verbo invi-  
dia) eruditiùs, & juxta feliciùs catholicam rea-  
lis corporis Christi in Eucharistia præsentiam,  
quod præcipuum adversùs nostrates heterodo-  
xos controversiarum caput est, eximio Docto-  
re Sorbonico Domino Antonio Arnaldo *libro*  
*de perpetuitate fidei Eucharistia*, demonstravit.  
Et quanvis illud operæpretium & Religionis  
armamentarium quidam mendacii Minister  
Claudius nomine, conquisitis nonnullis oratio-  
nis flosculis, pigmentis muliebribus, fucis pue-  
rilibus, & perpetuis fallaciarum antitheseon pug-  
nis, in speciem titillantibus aggredi molitus  
sit; attamen idem Arnaldus hæretici librum  
sic dispunxit, eo robore criminationes ejus  
discussit, eo lumine sophismatum offutias dis-  
pulsit, eo rationum pondere, & gravitate inanif-  
imarum figurarum levitatem & cantilenam  
oppressit, eo nervo Catholicam veritatem de-  
fendit, ut adversarium floridum illum quidem,  
b omni soliditate tamen desertum, nullo in  
oco consistere sinat, sed eum prorsùs exar-  
marum

matum non fodiat, usque ad hæresis internecionem; denique convincat sic cavenda esse verba hæretici Claudii, ceu poculum venefici, quod prius dulciter mulcet, ut postmodum lethaliter necet.

Et certè non sine speciali æterni Numinis providentia virum talem, tot olim modis divexatum abscondit diu Deus in abscondito faciei suæ à contradictione linguarum, ut cum tempore deinceps opportuno excitaret, & in defensionem Christi Dei verè absconditi, id est sub speciebus panis & vini latentis adversus hæreticorum impetus armaret. Decebat sanè, & Eucharistiæ mysterii propugnatori planè congruebat, ipsum instar grani frumenti in terram cadere & mori, ut multum postea fructum in universam Ecclesiam redundaturum afferret; omnibusque calumniatoribus palam faceret, quid sentiret de illò cibo, quem frumentum electorum, & vinum germinans virgines docti à Domino Prophetæ nominarunt.

Fuerunt quidem nonnulli (eorum nominibus parco, parcat utinam & eorum iniquitati Deus) qui absque ulla veri vel tenuissima specie per summam, & ante hæc tempora inauditam calumniam Doctorem illum negatæ transubstantiationis, & realis Christi in Eucharistia præsentia insimulare non erubuerunt, quanvis infandam illam suspicionem tot à se scriptis luculentissimis ante accusationis illius atrocitatem exaratis depulisset; ubi Catholicæ fidei articulum, qui sibi semper præcipuo amori fuit & venerationi, his expressionibus, ea perspicuitate extulerat, quibus accuratiores & forma

formaliores nec Patres, nec sacra Concilia, nec Theologorum Princeps S. Thomas, nec Scholastici ulli Scriptores ad exponendum Ecclesiæ sensum germanissimum unquam invenerunt. Porro quid in illo accusationis monstro magis eminuerit, an calumnia, an stultitia; & utra utram vincat, prorsus ignoro; adeo enim insulsis & fatuis conjecturis tam indignam in præfatum Magistrum suspensionem conferre conati sunt, ut non solum refellere, sed nec referre etiam sine fatuitatis nota ipse auderem, & meminisse puderet, nisi ipse Claudius præteritorum argumentorum vi obrutus, & futura subodoratus, ut ad silentium importabilem adversarium adigeret; eandem calumniam minitabundus regessisset. Dolus, an virtus: quis in hoste requirat? At enim hæreticorum fraudes facile floccifacimus, & de recta Domini Arnaldi in Deum fide nemo dubitabit, nisi fuerit improbis calumniatoribus improbitate non impar. Nam in opere novissimo, quod Clementi IX. nuncupavit, tam strenuè causam Ecclesiæ agit, ut armis lucis destruat opera tenebrarum adeò fortiter & juxta splendide, ut nulla supersit Calvinistis nostris excusatio, si ad avitam Ecclesiæ Catholicæ fidem non revertantur.

Hæc in commendationem viri Theologi, de Ecclesia Romana & Catholica tam bene meriti, innocentiae ipsius veritate, impactarumque calumniarum falsitate convictus libenter scripserim, qui nihil possum adversum veritatem, sed pro veritate. Elogiis quæ ipsi panxerunt Episcopi & Doctores quamplurimi nihil tenuitas mea adjiciet; hæc tantum Salvian

viniani ad Eucherium verba veridicus usurpabo. *Legi libros de perpetuitate fidei Eucharistiae, doctrinā uberes, lectione expeditos, instructione perfectos, menti Authoris, ac pietati pares.* Ex his etiam totam hanc dissertationem locupletabimus.

## C A P V T I.

*Vera, realis, & substantialis corporis & sanguinis Christi in Eucharistia praesentia omni argumentorum illorum genere stabilitur, quibus certissima fidei dogmata, & apud ipsos haereticos indubitata demonstrari solent.*

**P**Ræsentiam corporis & sanguinis Christi in Eucharistia dixi *veram, realem, & substantialem.* *Veram* contra Zuinglianos, qui Christum non nisi ut in signo & figura volunt esse in Eucharistia præsentem. *Realem*, contra Calvinum fingentem Christum esse tantum objectivè in Eucharistia præsentem per solam fidei apprehensionem. Quanvis enim vaserimus Hæresiarcha, ob motas præsertim Lutherum inter & Zuinglium acerbissimas contentiones variè de Christi præsentia scripserit, & Christum nobis exhiberi, carnem ejus nobis porrigi

porrigi non semel dixerit, ut Lutheranorum invidiam declinaret; reverà tamen realem præsentiam corporis, & sanguinis Christi inficiatus est. Denique *substantialem*, contra quosdam cavillantes Calvini discipulos, quos sequitur Claudius Minister Charentonensis, qui non substantiam, sed virtutem duntaxat corporis Christi esse in Eucharistia præsentem, quæ panem ac vinum inundet, comminiscuntur. Nos autem Catholici verum Christi Domini corpus, illudque idem quod natum ex Virgine in cælis sedet, in hoc sacramento verè, realiter, & substantialiter contineri sine ulla dubitatione credimus, incunctanter confitemur, & sequentibus speculationibus suademus. Varios porrò de Eucharistia errores capite sequenti recensēbimus.



## SPECVLATIO I.

*Christus Dominus nobis corpus suum in cibum, & sanguinem suum in potum realiter daturum promisit. Promissionem verò illam in institutione Eucharistiae implevit. Ergo Christum realiter in Eucharistia possidemus.*

**B**Revi argumento totum probationum è Scripturis depromendarum momentum speculatio ista complectitur quàm efficacissimè. Cùm enim Christus, qui ipsa veritas est, nec falli, nec fallere, vel frangere fidem suam possit, si corpus & sanguinem suum realiter daturum promiserit, nec promissionem illam alibi quàm in Eucharistiae institutione impleverit, procul dubio Christum realiter in Eucharistia præsentem habemus. Duæ igitur speculationis partes diligenter comprobandæ sunt, ut ex illis veritas catholica certissimè, & juxtà limpidissimè derivetur.

In primis, quod Christus nobis verum corpus suum in cibum, & sanguinem suum in potum promiserit, clarissimè patet ex verbis illis, Joan. 6. *Panis quem ego dabo, caro mea est pro mundi vita. Caro mea verè est cibus, & sanguis*

*quis meus verè est potus.* Nec clarissima illa Veritatis verba ullis hæreticorum nebulis obscurari possunt, sive dicant Salvatorem de spiritali tantum manducatione fuisse loquutum, sive de carne non realiter & substantialiter, sed per figuram duntaxat panis danda verba illa interpretentur. Non, inquam, possunt his subterfugiorum vitilitigationibus tam aperta verba eludi. Tum quia cum præfata Redemptoris verba Judæis litigio fuerint & scandalosæ Litigabant enim ad invicem dicentes, quomodo potest hic nobis carnem suam dare ad manducandum. Nec Judæis tantum, sed etiam quibusdam discipulis, nulla invidiâ, nulla in Christum similitate actis fuerunt verba illa offensioni, unde & dixerunt: *Durus est hic sermo, quis potest illum audire?* Ergo tam Judæi Capharnaïtæ, quàm discipuli illi conturbati verba Servatoris de reali & substantiali carnis ejus in cibum dandæ promissione interpretati sunt: neque enim litigii, scandali, vel offensionis causam ullam vel tenuissimam habuissent, si Christum de spiritali manducatione, vel de signo corporis sui instituendo loquutum existimassent. Et tamen existimationem eorum nec removet Christus, nec illorum scrupulos, æstusque facillimo illo spiritalis, vel figurativæ manducationis interpretatione, quo omnes difficultates spontè evanuiscent, Christus sedavit, sed eam magis magisque firmavit: *Amen amen dico vobis, inquit, nisi manducaveritis carnem Filii hominis, & biberitis ejus sanguinem, non habebitis vitam in vobis.* Quin, discipulis, quibus obscura à se populis proposita opponere consueverat,


rat, ob eam existimationem abire permisit aliosque, num vellent abire, interrogavit, ne quidpiam de veritatis rigore remitteret. Quis autem credat Christum Dominum, totum ad clementiam, pietatem, & misericordiam comparatum, qui verbulo uno Capharnaïtas ab errore, discipulos à queritandi imbecillitate liberasset, ambosque citò persanasset, illorum tamen intelligentiam, quamlibet rationi duram, & reipsa, si vera est Calvinistarum sententia, falsam confirmare voluisse, aut potuisse, subindeque errorum tenebras non depulisse, sed auxisse & addensasse, atque exemplo futura corporis sui ascensionis stabilivisse. *Hoc vos scandalizat?* inquit: *Si ergo videritis Filium hominis ascendentem ubi erat priùs, &c.* Accedit, quod verbis illis tam seriò expressis, tam crebrò in eodem contextu inculcatis, aliquid speciale & eximium fidelibus suis Christus promisit, quod Judæis nondum fuerat datum, cùm clarissimè attestetur: *Non sicut manducaverunt Patres vestri manna, & mortui sunt*; id est, donum vobis mannâ longè præstantiùs polliceor. Patet verò spiritalem Christi per fidem manducationem jam pridem fuisse à Patribus fide grandibus usurpatam, & manna perfectiorem fuisse Christi figuram, quàm sit simplex panis. Ergo nihil singulare, nihil eximium Christus Ecclesiæ suæ tribuisset, si panem duntaxat usualement in figuram corporis sui, & præterea nihil se daturum spondidisset.

Ergo corpus suum in cibum, & sanguinem suum in potum se verè, & non figurâ tenus daturum Christus pollicitus est, cùm dixerit:

*Caro*

*Caro mea verè est cibus, & sanguis meus verè est potus.* Unde verba illa de vera Christi carne in cibum dandà, & ore sumenda intellexit Concilium Ephesinum in approbatione epistolæ Cyrilli ad Nestorium, ubi S. Doctor ex eo Joannis loco carnem Christi esse verè, realiter, & substantialiter unitam Verbo Divino confirmat, quia ab eo haurit, ut in sacramento accedentes vivificet. *Confitemur*, inquit, *incrumentum in Ecclesia sacrificium nos celebrare, atque ad mysticas benedictiones accedere, eaque ratione sanctificari, utpote sanctæ carnis, & pretiosi sanguinis Christi omnium nostrum Salvatoris participes effecti.* Neque enim illam ut carnem communem suscipimus, absit hoc; aut rursus tanquam viri cuiuspiam sanctificati, aut dignitatis tantum aequalitate Verbo consociati, aut divinam inhabitationem sortiti; sed tanquam verè vivificati, ipsiusque Verbi propriam. Nam cum vita sit, ut Deus secundum naturam, simul atque unum quoddam cum ipsa carne effectus est, mox vivificandi virtutem illi contulit. *Quavis ergo ad nos dicat, Amen amen dico vobis, nisi manducaveritis carnem Filii hominis; neutiquam tamen illam communem, hoc est hominis cuiuspiam nostra conditionis carnem existimare esse debemus.* Quomodo enim hominis caro secundum suam ipsius naturam vivifica esse queat? Sed verè illius propriam, qui nostri causâ Filius hominis & factus, & appellatus est.

Eodem modo locum illum de reali carnis Christi præsentia intelligit Concilium Nicænum II. act. 6. *Nullus*, inquit, *incrumentum sacrificium*





*crificium nostrum dixit imaginem corporis ejus ; sed audiunt evangelicè , dicente eo : Nisi manduca- veritis carnem filii hominis. Sed de hoc longè præclarissimo testimonio fusiùs infrà.*

*In eundem sensum locum illum SS. Pa- tres interpretati sunt. Cyrillus enim Ale- xandrinus in Joannem , ad hæc verba , Qui manducat meam carnem , &c. Quemadmo- dum , inquit , si quis ceram cera conjunxerit , utique alteram in altera esse videbit : eodem quoque ( opinor ) modo , qui Salvatoris nostri carnem suscipit , & bibit pretiosum ejus sangui- nem , ut ipse ait , unum quiddam cum eo repe- ritur , commixtus quodammodo , & immixtus ei per illam participationem : ita ut in Christo quidem ille reperiatur , & vicissim Christus in ipso.*

*Id ipsum clarissimè docet Hilarius lib. 8. de Trinit. ubi ex verbis illis probat , Patrem & Filium unum esse , non solùm effectu & con- sensu , sed etiam naturâ , quia Christus nobiscum in Eucharistia non solùm charitate & fide , sed verè etiam , & realiter unitur. Eos nunc , inquit , qui inter Patrem , & Filium voluntatis ingerunt unitatem , interrogo , utrumne per natura uni- tatem hodie Christus in nobis sit , an per concor- diam voluntatis ? Si enim verè Verbum caro fa- ctum est , & nos verè Verbum carnem cibo do- minico sumimus , quomodo non naturaliter ma- nere in nobis existimandus est , qui & naturam carnis nostræ tam inseparabilem sibi natus homo assumpsit. Et post plura in hanc rem perop- portuna , sic habet : Qua scripta sunt legamus , & qua legimus intelligamus , & tunc perfectæ fi- dei officio fungemur. De naturali enim in no- bis*



*his Christi veritate quæ discimus, nisi ab eo discimus, stultè atque impiè discimus. Ipse enim ait, Caro mea verè est cibus: de veritate carnis & sanguinis non relictus est ambigendi locus.*

Eodem modo locum illum interpretati sunt Irenæus lib. 4. cap. 34. Origenes hom. 16. in Num. Cyprianus lib. de Orat. Dominica, Basilii in regulis moralibus, regul. 21. Ambros. lib. 4. de Sacramentis cap. 5. & lib. 5. cap. 1. & libro 6. cap. 1. Augustinus locis postea referendis, Leo Magnus serm. 6. de jejunio 7. mensis, Bernardus serm. 3. in Psal. Qui habitat. Et certè incredibile est, Joannem discipulum amoris de præcipuo Christi dilectionis pignore Eucharistia, mentionem nullam in Evangelio fecisse: & tamen id dici necesse est, si verba capituli sexti de Eucharistia non intelligantur. Hinc Augustinus lib. 3. de consensu Evangelistarum, cap. 1. Joannes, inquit, de corpore & sanguine Domini hoc loco nihil dixit, sed planè alibi multò uberius, scilicet cap. 6. cùm alibi nusquam de eo meminerit. Sed clarissimè Chrysostomus hom. 45. in Joannem, in hæc verba, Panis quem ego dabo, &c. Ut autem, inquit, non solum per dilectionem, sed reipsa in illam carnem convertamur, per cibum id efficitur, quem nobis largitus est. Cùm enim suum in nos amorem indicare vellet, per corpus suum se nobis commisit, & in unum nobiscum redegit, ut corpus cum capite uniretur. Hoc enim amantium maximè est.

Dices: Christus ipse Capharnaïtarum murmurantium, & offensorum discipulorum intelligentiam correxit, dicens: Spiritus est qui vivit

*vivificat, caro non prodest quidquam. Verba quæ ego loquor vobis, spiritus & vita sunt.* Id est, prolata à me verba spiritaliter intelligenda sunt, nec de manducatione corporali, sed spiritali, quæ per fidem est accipienda.

Respondeo Capharnaïtas duo in verbis Christi apprehendisse, & realem carnis Christi præsentiam, & carnalem comedendi modum, quo caro in frustra dividitur, dentibus premitur, in stomachum trajecta concoquitur, & in substantiam convertitur comedentis. Priorem intelligentiam non correxit, sed firmavit Salvator, ut supra ostendimus; posteriorem verò emendavit. Ita docet, & locum illum interpretatur Augustinus tractat. 27. in Joannem. *Non prodest quidquam*, inquit, *sed quomodo illi intellexerunt, quomodo in cadavere dilaniatur, aut in macello venditur, non quomodo spiritu vegetatur.* Proinde sic dictum est, *Caro non prodest quicquam; quomodo dictum est, Scientia inflat.* Iam ergo debemus odisse scientiam? Absit. Et quid est, *Scientia inflat?* Sola sine charitate; & idèò adjungit, *Charitas verò edificat.* Adde ergo & scientia charitatem, & utilis erit scientia, non per se, sed per charitatem. Sic etiam nunc: *Caro non prodest quicquam.* Accedat spiritus ad carnem, quomodo accedit charitas ad scientiam, & prodest plurimum. Nam si caro nihil prederet, verbum caro non fieret, ut inhabitaret in nobis.

Ex his præclaris Augustini verbis liquet, & Christum nobis carnem suam veram in Eucharistia daturum eò loci promississe, & eatenus Capharnaïtas errasse, quatenus carnem illam  
carnali

carnali more comedendam intellexerunt, quem errorem ut corrigeret, dixit: *Caro non prodest quicquam, spiritus est qui vivificat.* Id est, caro ore præmenda, ac dentibus mandenda & commolienda vobis non porrigitur, quæ sic comesta nihil proderet, sed horrorem potius ingeneraret. Attamen caro mea verè vobis dabitur, quæ modo spiritali corporibus gloriosis eximio, in Sacramento, realiter tamen & substantialiter tota in toto, tota in qualibet parte, quo modo spiritus est in corpore, existet. Ad quem cibum dignè accipiendum spiritu gratiæ & pietatis singularis opus est; caro enim mea ab indigno accepta non prodest quicquam, sed obest plurimum iudicium sibi manducanti, & non dijudicanti corpus Domini. Verba ergo quæ loquor vobis *spiritus sunt*; quia licet caro mea verè sit cibus vester, in Sacramento tamen non apparebit modo corporeo, extenso, visibili, contrectabili; sed dotes, & modum spirituum in loco imitabitur. *Spiritus sunt*, quia illis ut credamus, ab imaginatione abstrahendum, à sensibus secedendum, ad spiritum non quidem merè humanum, sed fide divina illustratum, tanquam ad veritatis portum & asylum confugiendum est. *Spiritus sunt*, quia nisi spiritu ambulerimus, nisi Spiritum Christi habuerimus, nisi fide, spe, charitate, humilitate, reverentiâ, aliisque spiritus sanctis affectibus ad cibum illum comedendum accedamus, ipsâ divinitate unctâ Christi caro non prodest quicquam, quia mors est malis, vita bonis. Denique *vita sunt*, quia qui verbis à me prolatis sincerè credit, & his permotus ad Eucharistiam piè usurpandam accedit, vitâ gratiæ in

hoc mundo , vitâ gloriæ in futuro potietur.

Instabis : Augustinus *lib. 8. de doctrina Christiana , cap. 16.* tradendo regulam , quâ discernatur , quandonam loci alicujus Scripturæ loquutio figurata censenda sit , sic habet : *Si præceptiva loquutio est , aut flagitium , aut facinus vetans , aut utilitatem , aut beneficentiam jubens , non est figurata : si autem flagitium , aut facinus videtur jubere , aut utilitatem ac beneficentiam vetare , figurata est.* Nisi manduca veritis carnem filii hominis , & sanguinem biberitis , non habebitis vitam in vobis ; facinus vel flagitium videtur jubere , figura est. Ergo præcipiens passioni Domini esse communicandum , & suaviter atque utiliter recolendum , quod pro nobis caro ejus crucifixæ , & vulnerata sit. Igitur Christus Dominus *Ioan. 6.* per carnem suam non intelligit carnem ipsam suam realiter & substantialiter , sed figurativè donandam. Idem docet in *Psal. 98.* ubi Christum Capharnaïtas alloquentem sic inducit : *Spiritualiter intelligite , quod loquutus sum. Non hoc corpus , quod videtis , manducaturi estis , & bibaturi illum sanguinem , quem fusi sunt qui me crucifigunt. Sacramentum aliquod commendavi vobis : spiritualiter intellectum vivificabit vos , caro autem non prodest quicquam.*

Respondeo priorem locum non esse ad rem ; Sanctus enim Augustinus ait ibi , Eucharistiam esse figuram crucifixionis Christi , cui præcipimur communicare ; non verò ait esse figuram corporis Christi. Respectu ergo falsæ illius , & rudis existimationis , quâ credi posset carnem Christi visibili & cruento modo esse comedendam ,



dam, quæve hoc sensu præciperetur flagitium, figurata sunt Christi verba: sed sicut non est flagitium carnem Christi incruento, invisibili, & spiritali modo, realiter tamen porrectam comedere; ita respectu illius existimationis non sunt figurata verba Christi. *Quæ quasi flagitiosa*, inquit idem Sanctus Doctor cap. 10. *imperitis videntur, sive tantum dicta, sive etiam tacta sint, vel ex Dei persona, vel ex hominum, quorum nobis sanctitas commendatur, tota figurata sunt.* In exemplum hujusmodi figuratorum profert unctionem pedum Christi à Magdalena factam, quia in aliis vulgi hominibus luxui deputeretur, quæ in Magdalena magnæ cujusdam rei signum fuit. Affert etiam conjunctionem Ozeæ Prophetæ cum meretrice, Deo jubente initam, in perditis hominibus flagitiosam, in Ozeæ grandis mysterii figurativam, cum quibus figuris stat & veritas unctionis, & veritas etiam conjunctionis. In verbis ergo illis Salvatoris, quæ imperitis flagitium præ se ferre videntur, cum veritate carnis suæ consistit figura passionis Christi, cui communicare præcipimur, & *suaviter, atque utiliter recolere, quod pro nobis caro ejus crucifixa, & vulnerata sit.* Sunt ergo Augustino authore quædam verba figurata res ipsas significantia; quæ tamen res aliud verbis non expressum significant. Sicut, teste eodem Patre *epist. 119. cap. 10.* sabbathum Judæis præceptum est in otio corporaliter celebrandum, ut figura esset mentis in Spiritu Sancto futuræ quietis; & tamen præceptum illud ad otium corporale Judæos obligabat. Sicut etiam ex eodem Augustino *lib. cont. mendac. cap. 13.* figura fuit, quando Christus inter-



rogavit : Quis me tetigit ? Ubi posuistis eum ? & quando finxit se longiùs ire : & tamen & verè interrogavit , & verè se longiùs ire finxit. Ergo verba illa *Ioan. 6.* non eo sensu figurativa sunt , quòd non significaverint quod exprimebant ; sed quia aliud minimè expressum figurabant.

Hac responsione ab Augustino sui interprete depromptâ , absque negotio quæ accumulanti hæretici ejusdem S. Patris testimonia , explicare est. Ad locum tamen ex Psalmo 98. ad doctrinæ ubertatem dicendum , veridicè monuisse Augustinum verba Christi spiritualiter esse intelligenda ; spirituali namque intelligentiâ opus est , ut credamus Christum non carnali modo , sicut existimabant Capharnaitæ , se præbere edendum ; sed spiritalem , tametsi realem , ibi corporis sui præsentiam omnipotentissima sua potestate nobis exhibere. Unde subjunxit : *Non hoc corpus , quod videtis , manducaturi estis ;* id est , illud visibile & palpabile carnali modo nequaquam comedetis. Pater id ex Augustiniano contextu ; exponit enim ibi Augustinus illud Psalmi , *Adorate scabellum pedum ejus ;* quæritque quæ sit hæc terra , quæ adoranda præcipitur tanquam scabellum pedum Dei ? Respondet verò hanc terram esse carnem Christi , subditque : *Et quia in ipsa carne hic ambulavit , & ipsam carnem nobis manducandam ad salutem dedit ; nemo autem illam carnem manducat , nisi priùs adoraverit , inventum est quemadmodum adoretur tale scabellum pedum Domini , & non solum non peccemus adorando , sed peccemus non adorando.* Manifestè ergo sensit Augustinus , carnem Christi verè , & realiter porrigi nobis  
in

in Eucharistia manducandam, cum illa sola sit scabellum pedum Dei, in qua assumptâ carne ambulavit, & sola digna est, quæ adoretur. Quando ergo ait: *Non hoc corpus, quod videtis, manducaturi estis*, loquitur de corpore quoad modum palpabilem & visibilem, non quoad substantiam illius. Nec mirum id videri debet, familiare enim est Augustino de corporibus gloriosis loqui, ac si essent carne exuta; quia nimirum spirituum conditionem beatis immortalitatis dotibus consequuntur. Hinc lib. de fide & symbolo, cap. 10. *Illo tempore immutationis angelica non jam caro erit & sanguis, sed tantum corpus. In cælestibus verò nulla est caro, sed corpora simplicia & lucida, quæ appellat Apostolus spiritualia.* Et lib. contra Adimantum, cap. 12. *Cum induerit incorruptionem & immortalitatem, jam non caro & sanguis erit, sed in corpus cæleste mutabitur.* Itaque non hoc corpus, quod viderunt Judæi manducamus; quia non aspectabiliter, sed invisibile, immortale, & cæleste nobis porrigitur.

*Promissa sua Christus in institutione  
Eucharistia implevit.*

Altera speculationis pars affirmans solennem illam carnis suæ realiter & substantialiter nobis dandæ promissionem Christum in institutione Eucharistiæ implevisse, tam aperta est, quam quod maximè. *Accipite & comedite*, inquit Veritas promissis stans, & fidem suam liberans: *Hoc est corpus meum, quod pro vobis tradetur.*

*Bibite ex hoc omnes : Hic est sanguis meus , qui pro vobis & pro multis effundetur in remissionem peccatorum.* Matth. 26. Marc. 14. Luc. 22. Figuras autem , vel tropologicas loquutiones in tam perspicuis verbis comminisci , insanire est , vel certè hæreticorum more cavillari , tenebras lucem , lucem tenebras dicere. Ponderant , nec abs re quidem , Interpretes verba Servatoris ; aiuntque verba amphibologica & obscura , nec candori testatoris , nec amantis sinceritati congruere ; obscura enim testamentorum verbarum occasio sunt & litium seges inexhausta ; amantium verò , & maximè propè exitum corda pendentium sermones postremi ab omni sunt ambiguitatis nota remotissimi. Si enim imminente morte eò loci ponuntur homines , ubi sicut major verborum fides , & ab omni mendicii , vel fraudis , aut ambiguitatis suspitione remotior est , cum vera voces , ut ille ait , tum demùm pectore ab imo ejiciuntur , & eripitur persona , manet res ; quanto potius de ipsa Veritate Christo id credere possumus , & debemus. Christus autem in institutione Eucharistiæ testamentum condebat , juxta illud Luc. 22. *Hic calix novum testamentum est in meo sanguine.* Hinc Tertullianus libro 4. contra Marcion. cap. 40. *In calicis mentione testamentum constituens sanguine suo obsignatum , substantiam corporis confirmavit.* Et certè si secundùm Jurisperitos verba testamentorum in rigore sumenda sunt , & intentio testatoris talis præsumenda , qualem verborum proprietas præfert , quidni idem de testamento Salvatoris judicium feremus ? Præclarè Augustinus lib. de unit. Eccles. cap. 11. *Cum verba novissima hominis morientis*  
audi

audiuntur ituri ad inferos, nemo eum dicit esse mentitum; & impius judicatur hæres, qui fortè illa contempsit. Quomodo ergo effugiemus iram Dei, si vel non credentes, vel contemnentes repulerimus verba novissima & unici Filii Dei, & Domini nostri ac Salvatoris, & ituri ad coelum, & inde prospecturi; quis ea negligat, quis observet: & inde venturi, ut de omnibus judicet? Tunc etiam ultima paterni divinique amoris argumenta præbere, & divitias effundere satagebat. Cùm enim dilexisset suos, in finem dilexit eos. Scilicet excurrerat divinus amor, sed ultimam metam, extremumque limitem in hoc dilectionis sacramento attigit, & totius benevolentiae coronamentum posuit, plus ultra progredi non valens, nisi aliquid daret post omnia.

Ponderant alii, tunc Christum quidpiam instituisse in Ecclesia sua perpetuis temporibus usque ad consummationem sæculi faciendum. Hoc, inquit, facite in meam commemorationem. Ergo id instituit, quod clarè cognosci, & perspicuè sciri à fidelibus posset. Quomodo namque exequutioni mandari potest quod non nisi obscure percipitur esse faciendum, & ad perpetuam rei memoriam celebrandum, & religiosè habendum imperatur? Certè illud accuratè servari nequaquam potest, quod metaphoricè, & sub dubio propositum est. Unde Legislatores præcepta sua non nisi perspicuis & apertis verbis edicunt.

Expendunt alii unanimem Evangelistarum consensum; incredibile enim esset, verba illa, si non in germano & naturali, quem præ-



ferunt; sed figurativo sensu intelligenda. Christus voluisset, Evangelistarum neminem Salvatoris mentem in re tam gravi, tam seria, tamque scitu necessaria exposuisse, qui in aliis minoris momenti rebus adeo fuere solliciti subobscura Servatoris verba accommodato benignæ interpretationis lenirento temperare, sicut cum Christus dixit: *Solvite templum hoc*; &, *Attendite à fermento Phariseorum*: primum de templo corporis sui, alterum de hypocrisi pharisaica intelligendum esse declararunt. Joannem etiam Baptistam, quem Eliam Matthæus nuncupaverat, talem spiritu & virtute fuisse, Lucas exposuit. Joseph quoque non semel Christi pater sine additamento vocatus, qualis fuerit, Lucas admonuit, cum verba illa, *ut putabatur*, adjecit. Quod & aliis passim obviiis locis claret. Præsertim cum id Christo solenne fuisse sciamus, illud idem, quod turbis & populis justis reconditæ suæ providentiæ judiciis proposuerat, apertè deinde, dilucidèque explanare, quia nempe illis datum erat nosse mysteria Regni, nec illos dicebat servos, sed amicos, quæcumque à Patre acceperat nota factururus: quod & experti ipsi discipuli *Ioan. 16.* confessi sunt: *Ecce, inquebant, nunc palam loqueris, & proverbium nullum dicis.* Ergo non est verisimile in ultimis illis amoris indicibus & omnigenæ charitatis significationibus solito eos orbasse privilegio, qui desiderio desiderabat hoc pascha manducare cum discipulis, extrema ut benevolentiae argumenta, ultimumque sinceræ amicitiae conatum demonstraret, atque omnes teneritudinis notas fusissimo sermone non:



non tam daret, quàm profunderet. *Fortè, ut verbis Hilarii lib. 8. de Trinit. utar, qui Verbum est, & qui veritas est, loqui vera nesciuit? Et qui sapientia est, in stultiloquio erravit? Et qui virtus est, in ea fuit infirmitate, ne posset eloqui quæ vellet intelligi?* Nullâ ergo tum figurâ usus est, cùm illud implendum erat, quod *Ioan. 16. spononderat: Venit hora, cùm jam non in proverbii loquar vobiscum.* Hæc, & alia multa alii rectissimè, & juxtâ verissimè; tantus enim est, tam emicans verborum Christi, tametsi simplicissimorum splendor, tot ex eis scaturiunt luminum rivi, ut infinita suppedient ad discutiendas hæreticorum tenebras rationum momenta.

Sed iis omiſſis, hoc unum, ut verum fatear, dilemma non suadet modò, sed cogit planè. Vel Christus Dominus ad Ecclesiæ suæ solatium, ad significandumque divini erga nos amoris sui ignem immortalem non potuit nobis corpus suum realiter & substantialiter in Eucharistia tradere; vel tametsi potuit, noluit tamen. Si primum dicant hæretici Calvinistæ, ruit penitus divina potentia, & virtutem illam, quæ aquam convertit in vinum, quæ septem panibus plura hominum millia refecit, quæve ex nihilo eduxit orbem terrarum, juxta novam Calvinistarum mathesim metiri opus est, illique præfigere metas, quem tamen omnipotentem hætenus credidimus, hætenus in ipso Christianæ professionis exordio confessi sumus. Si dicant Calvinistæ, hoc singularis amoris singulare pignus exhibere quidem potuisse Christum, at noluisse tamen dicant, quæso, an possint apertiora bonæ il-

lius Christi voluntatis indicia non modò inveniri , sed cogitari quidem ? Respondeant, amabò , si Christus eo nos decrevisset amore dignari , verbane clariora , ad significandamque suam voluntatem magis idonea , minùsve incredulorum calumniis obvia seligere potuisset ? Sanè cùm ad Trinitatem adversùs Arianos demonstrandam , vel ad Incarnationem contra Marcionem , Nestorium , Eutycheren , aliasque pestes stabiliendam nihil verbis illis expressius habeamus , quibus contra Calvinistarum novitatem realem corporis Christi in Eucharistia præsentiam comprobamus , vel Scripturas omnes funditus evertere , vel eas hæreticorum depravationibus , & corruptelis permittere , proindeque omnem Religionem abolere oportebit , si de humano arbitrato limpidissima testimonia ad sensus figurativos violentis detorsionibus inflectantur. Suntne clariora verba hæc : *Ego & Pater unum sumus : Verbum caro factum est ;* istis : *Hoc est corpus meum : Hic est sanguis meus : Caro mea verè est cibus , & sanguis meus verè est potus ?* Si postremis sensum figurativum asingere liceat Calvinianis , cur priora per unionem amoris & voluntatis interpretari non licebit Ario , non licebit Nestorio ? Sed fortè deerant Arianis , deerant & Incarnationis hostibus scripturarum in speciem sibi faventium fuci , quibus venena sua oblinirent. Inò verò , ut rectè ait Vincentius Lininensis , utebantur planè , & vehementer quidem sacrarum literarum testimoniis. Vidisses eos volare per singula quæque sanctarum paginarum volumina , per Moyses , per Regum libros , per Psalmos , per Apo-

Colos.

stolos, per Evangelia, per Prophetas, ut Trinitatis & Incarnationis impossibilitatem demonstrarent. Sive enim apud suos, sive alienos; sive privatim, sive publicè; sive in sermonibus, sive in libris; sive in conviviis, sive in plateis, nihil unquam penè de suo proferebant, quod non etiam Scripturæ verbis adumbrare conarentur. *Lege, inquit, Pauli Samosatensis opuscula, Priscilliani, Eunomii, reliquarumque pestium: cernas infinitam exemplorum congeriem, prope nullam omitti paginam, qua non novi, aut veteris Testamenti sententiis fucata & colorata sit.* Omnes ad unum Calvinistas provoco, ut locum nobis aliquem scripturarum figuratis suis interpretamentis peræquè faventem proferant, atque erat ille Arianis favorabilis: *Rogo Pater, ut unum sint, sicut & nos unum sumus.* Unde inferebant voluntatum dumtaxat Patrem inter & Filium esse consensionem, qualem pro Discipulis Patrem Christus rogabat. Proferant si possint, speciosum aliquem textum illi similem, quem adducebant Incarnationis inimici: *In similitudinem hominum factus, habitu inventus ut homo.* Quā ergo prærogativā planissima verba institutionis Eucharisticæ ad tropos detorquebunt, quæ non fuerit veteribus hæreticis communis? Quæ vel tenuissima tandem disparitas afferri aliquo verè colore oblita potest ab homine benè cordato? Nullam cerè exceptionem afferent unquam, quā probent proprietatem verborum adversus Arianos, Nestorianosque esse retinendam, in verbis verò Eucharisticæ institutionis eliminandam. Fateantur ergo Calvinistæ, se hæretico spiritui regi, quia ut ait Augustinus lib. 3. de doctrina

Christiana: Si animum occupaverit alicujus erroris opinio, quidquid assererit Scriptura, figuratum arbitrantur. Quia nimirum, ut addit Irenæus lib. 4. adversus hæreses, cap. 35. coguntur hi tales semper typos typorum, & imagines imaginum adinvenire, & nunquam figere animum suum in uno & vero Deo. Quos idem Pater comparat Æsopi cani, qui panem quidem reliquit, in umbram autem ejus impetum fecit, & perdidit escam.

### *Calvinistarum cavilli eliduntur.*

Omissis quorundam Calvinistarum, non tam rationibus, quàm næniis, aientium verba illa, *Hoc est corpus meum*, hunc facere sensum, *hic sedet corpus meum*; vel, *hic panis est corpus meum*, id est à me creatum: omissis, inquam, his quisquiliis, quibus à gravi Theologo respondeatur indignissimis, alia in medium producenda sunt, quibus tropos suos hæretici nostrates suadere nituntur.

Probant ergo in Eucharistia solùm inveniri panem & meram corporis Christi figuram: tum primò, quia illud tantùm in Eucharistia invenitur, quod Christus præ manibus accepit, fregit, deditque discipulis suis: Christus autem non proprium corpus, sed panem accepit, fregit, deditque discipulis suis; corpus autem figuratè duntaxat fregit. Tum secundò, quia si propositio hæc demonstrativa, *Hoc est corpus meum*, non esset figurata, significaret illud, quod Christus demonstrat, scilicet panem, vel accidentia panis, esse corpus Christi; ly enim *hec*, significat vel panem, vel accidentia panis,



panis , de quibus proinde prædicaretur corpus Christi. Difficile enim assignatu' est, quid aliud pronomine *hoc* , significetur. Tum tertio, quia particula *est* , in utraque forma adhibita æquivalet verbo *significat* , sicut & in aliis multis Scripturæ locis. Genes. 41. *Septem spica plene septem anni ubertatis sunt* ; id est significant. Exodi 12. de Agno Paschali : *Esi enim phase* , id est *transitus Domini* ; id est, Phase transitum Domini significat. Luc. 9. *Semen est verbum Dei* ; id est, significat verbum Dei. 1. Cor. 10. *Petra autem erat Christus* ; id est , significabat Christum. Tum quarto, quia verba consecrationis calicis non possunt nisi figuratè accipi; eam enim sic refert S. Lucas : *Hic est calix novum testamentum in meo sanguine, qui pro vobis effundetur* ; vel ut habetur in textu Græco, *effunditur*. Calix autem figuratè per metonymiam exprimentem continens pro contento, accipi debet ; neque enim calix effunditur, sed liquor. Calix etiam sanguinis non est nisi figuratè testamentum , seu signum & tessera fœderis hominum cum Deo. Sanguis etiam non fuit in ultima cœna realiter fusus , sed solùm figuratè. Tum quinto, quia Eucharistiam in sui commemorationem faciendam Christus præcepit : memoria autem est tantùm signum, & species rei absentis, non verò significatio præsentis.

His ferè argumentis splendentia institutionis Christi verba obscurare moliuntur Calvinistæ, quibus illud congruit Augustini lib. 22. de Civit. cap. 11. *Ecce quibus argumentis omnipotentia Dei humana contradicit infirmitas, quam possidet vanitas.* Et sanè si quid efficeret hæc  
sophisma



sophismatum nubes, peræquè mysterium Trinitatis & Incarnationis de medio tolleret, ut consideranti patebit. Etenim iisdem argumentis probabunt Ariani in hac propositione: *Ego & Pater unum sumus: Hi tres unum sunt; ly sumus, & ly sunt*, figurativè esse accipienda, siquidem in eodem contextu figura admiscetur; postquàm enim Joan. cap. 5. *sua* 1. dixit: *Tres sunt, qui testimonium dant in cælo, Pater, Verbum, & Spiritus sanctus; & hi tres unum sunt*; subjecit: *Tres sunt qui testimonium dant in terra.*

Ad primum ergo dicendum, illud in Eucharistia inveniri, quod Christus verbis illis expressit, *hoc est corpus meum*; & certè si illud esset tantum in Eucharistia, quod Christus ante verba illa prolata accepit, fregitque; sicut tunc erat tantum panis usualis, non verò sacramentum; ita post verba illa non esset sacramentum: quod non fatentur Adversarii. Ergo manifesta est sophismatis illius inanitas, quæ tamen hæretico Molinæo in suo Clypeo tantoperè placuit, non consideranti id quod Christus discipulis tradidit, fuisse non eodem instanti, sed successivè panem, & corpus Christi; panem quando accepit, corpus Christi postquàm sacra verba Christus protulit. Dicitur etiam corpus Christi in Eucharistia frangi in multiplici vero sensu, & non figurato. Primò quia reverà distribuitur multis per fractionem specierum; sicut enim substantia verè, & non figuratè dicitur visibilis ratione coloris quo obducitur; ita corpus Christi fractis speciebus distributum verè dicitur frangi. Secundò dicitur corpus Christi frangi, id est immolari; ex vi enim verborum

corpus

corpus Christi in sacrificio Eucharistiæ à sanguine separatur, & Deo immolatur, ut alibi dicemus. Et quia poterat esse difficultas in hac voce *frangitur*, quam habet textus Apostoli 1. Cor. 11. ideo in Evangelio habetur, *quod pro vobis traditur*, vel *tradetur*. Dedit autem Christus corpus quod traditur in sacrificio Altaris, vel tradetur in sacrificio crucis. Denique quavis Christus non con fractus, non divisus, sed integer in Eucharistia accipiatur à singulis, frangi tamen quadantenus dici verè potest, quatenus cum sit totus sub qualibet specierum particula, & continuam habeat sub illis præsentiam, dissoluta per fractionem specierum continuatione, Christus prout sub una parte à seipso ut sub alia parte existit, sejungi intelligitur, fractione non sub partes, sed sub totum Christum cadente. Unde semper verum est, quod nulla rei fit scissura, sed signi tantum sit fractura, quâ nec status, nec statura signati minuitur.

Ad secundum dicendum, pronomen *hoc*, vel *hic*, in formis Eucharistiæ usurpatum, & à Christo prolatum, non supponere pro speciebus, nec pro substantia panis; cum manifestum sit, neque species accidentales, neque substantiam panis esse corpus Christi Domini. Non est etiam sensus hujus pronominis, & particulae sequentis *est*, hæc substantia panis transit, seu convertitur in corpus meum; quia particula *est*, non transitum significat, sed permanentiam. Quare pronomen *hoc*, ut docet D. Thomas *quest. 78. art. 5.* demonstrat aliquid commune substantiæ panis & corpori Christi, nempe contentum sub speciebus panis. Nam in sacramentis

cramentis verba illud significant, quod efficiunt; faciunt autem verba, ut contentum sub speciebus, quod prius erat panis, sit corpus Christi. Unde pronomen illud demonstrat substantiam absque determinatione, & significat substantiam sub accidentibus contentam, quæ primum panis fuit, & postea est corpus Christi. Ad depellendas autem Dialecticæ tricas, quibus Calvinistarum sophistæ argutari solent, notandum nos non velle substantiam in communi, id est genericè, vel specificè consideratam, esse corpus Christi; sed sensus est: Substantia, quæ sub illis accidentibus continetur est corpus meum; & quia substantia, quæ sub his accidentibus continetur, ante consecrationem est panis, post consecrationem est corpus Christi; ideo diximus pronomen *hoc*, demonstrare aliquid commune substantiæ panis & corpori Christi, quæ sibi in Eucharistia succedunt. Sicut cum Christus aquam in vinum in nuptiis convertit, miraculum illud patrando, hydriasque præ manibus habendo, dicere utique sine figura poterat, *hoc est vinum*, id est substantia in illis hydriis inclusa, quæ ante miraculum erat aqua, est modò per miraculum vinum: & tamen contra hanc propositionem, tametsi clarissimam, eodem modo cavillari quis posset, & quid per *hoc* significetur, vitiligare, sicut de verbis Eucharisticis captiosè arguunt adversarii. Ergo argumentum illud Calvinistarum merus est cavillus ad impugnandam perspicuam veritatem institutus.

Ad tertium dicendum, quod licet particula *est*, figuratè interdum in Scripturis accipiatur, non tamen semper metaphoricè usurpatur, ut  
cūm

cum dicitur : *Hic est filius meus dilectus : Verbum caro factum est : Hi tres unum sunt ;* & alijs sexcentis locis. Unde regula Augustini hic locum habet , verba nimirum Scripturæ in proprio semper sensu esse accipienda , nisi evidenter tropum esse constet , vel ex contextu ipso , vel alijs Scripturæ locis appareat. Multa etiam falsa in adductis exemplis hæretici supponunt. Cum enim dicitur , *Agnus Paschalis est phase, id est transitus Domini*, *ly est*, in proprio accipitur sensu ; agnus quippe paschalis reverà erat victima à Deo instituta in recognitionem præservationis primogenitorum Israël ab illa strage , quâ Angelus omnia primogenita Ægypti interficiebat. Familiare namque est Scripturæ, ut quando de sacrificio, vel victima loquitur, nomen sacrificii , vel victimæ retineat , solumque nomen , propter quod sacrificium offertur, & victima immolatur , exprimat. Sic Sacerdotes dicuntur *comedere peccata populi*, id est oblationes pro peccatis à populis Deo exhibitas. Sic Christus 1. Cor. 5. dicitur *pro nobis factum peccatum*, id est sacrificium & Hostia pro peccato. Agnus ergo Paschalis est phase, id est victima Phase ; quod & illo eodem capite Moses exposuit, dicens : *Victima transitus Domini est*. Unde stupendum & deplorandum est, Zuin-  
glium propter illum Exodi locum, inter dormi-  
tiones, exerrationes & deliria à quodam moni-  
tore ( ut ipsemet in libello de subsidio Eucha-  
ristiæ narrat, ater fuerit , an albus oblitus , ut ipse addit ) sibi propositum consilium de abo-  
lenda Missa, & abroganda adoratione Eucha-  
ristiæ, per summam impietatem & ignorantiam  
suscepisse. Verba autem illa Apostolica, *Petra*  
autem



*autem erat Christus*, accipienda esse in sensu spiritali, declarat ipse Paulus: tum quia ibi ait, *Omnia in figuris contingebant eis*. Tum quia de petra spiritali se loqui immediata illa verba testificantur: *Bibebant autem de spiritali, consequente eos petra*. Verba quoque illa, *Semen est verbum Dei*, spiritaliter & figuratè esse accipienda, declarat ipsa parabola, quam Christus interpretatur. Idem etiam in aliis Scripturæ locis conspicuum est, ex antecedentibus enim vel consequentibus sensus allegoricus absque negotio deprehenditur.

Ad quartum respondeo, in ea propositione, *Hic calix novum testamentum est in meo sanguine*, nullum esse tropum: sponte enim sua, & naturaliter significat hæc propositio, calicem illum esse Christi sanguine plenum, & potui hominum accommodatum; & ideò mentio calicis, quo propinatur, fieri debuit, ut rectè observavit S. Thomas. Adde, quod etsi daremus, verbis illis aliquid figuratum efferri, adeò tamen eorum sensus conspicuus est, ut ultrò se ingerat intelligendum animis errorum & studiorum rixandi præjudiciis minimè occupatis. Adde rursum, obscuritatem, si quæ inesset, nitentissimis Matthæi, & Marci verbis, *Hic est sanguis meus*, illustrari. Falsissimum etiam est, quod dicunt hæretici, sanguinem Christi non esse propriè testamentum, seu fœdus: sicut enim victimis, & sanguine animalium sancitum fuit vetus Testamentum; ita novum pretioso Christi sanguine sancitum est. Unde hinc potius adversus hæreticos instauratur argumentum: Christus juxta illum sacrum textum in Eucharistia bibendum illud dedit, quo tanquam victimâ novum Testa-  
mentum



mentum sancitum est. Atqui novum Testamentum nonnisi vero, & substantiali Christi sanguine sancitum est. Ergo verum, & substantialem sanguinem suum in Eucharistia bibendum propinavit, quo fideles obtinendæ futuræ beatitudinis jure ex voluntate testatoris nostri Christi donati sunt. Verba etiam illa, *qui pro vobis funditur, vel fundetur*, propriissimum habent sensum, sive intelligantur de proximè futura in passione Christi cruoris effusione, sive de præsentī; fundi enim propriissimè sanguis dicitur, quando libatur: calicem ergo sanguinis Christus in Eucharistia fudit, quia divinissimum hoc mysterium sacramentum simul est, & sacrificium, ut alibi contra Missæ, & Liturgiarum hostes, Deo benè vertente demonstrabimus.

Ad ultimum respondeo, futilissimum esse sophisma; tum quia verè & propriè in memoriam Christi, beneficiorum ejus, & præcipui, quo nos dignatus est, amoris Eucharistiam conficere possumus & debemus. Imò, ut rectè observavit Chrysostomus, tam immensa est Servatoris nostri beneficentia, ut illi grates persolvere non possimus, & ideo seipsum reliquit, ut tanti oblatione mysterii par pari referre valeamus. *Quemadmodum*, inquit Os aureum hom. 25. in cap. 8. *Matth. adversus Judæos se gessit, locis, temporibus, ac festivitatis variis in memoriam suorum beneficiorum reducens; ita etiam adversus nos se gessit, ipso genere sacrificii ad jugem nos pro beneficiis suis gratiarum incitans actionem.* Tum quia verbis illis, Apostolo ipso I. Cor. II. interprete, celebrare Eucharistiam in memoriam passionis Christi jubemur: *Quotiescumque enim*, inquit,

inquit, *manducabitis hunc panem, & calicem bibetis, mortem Domini annunciabitis.* Non ergo in memoriam Christi absentis, sed passionis præteritæ Eucharistiam facere jubemur. Potest etiam Eucharistia in memoriam ipsius Christi celebrari, quia etsi realiter præsens sit, à sensibus tamen nostris abest; unde sacramentum visibile in notitiam illius, utpote invisibilis, manducare potest. Sicut Dei memoriam habere homines, Scripturæ & Patres hortantur, non quod Deus longè sit ab unoquoque nostrum, sed quia licet in ipso vivamus, moveamur, & finis, occulta tamen est immensi numinis præsentia.

Instant Calvinistæ, & videntes splendidissimam institutionis Eucharistiæ verba, nullis conquisitis troporum perfugiis posse elevari, addunt ex aliis Scripturæ locis eorum verum intellectum erui. Verba autem institutionis non posse de reali Christi præsentia exponi, colligere satagunt: tum primò ex locis illis, in quibus asseritur, Christum non esse amplius in mundo, ascendisse in cælum, inde non nisi ad judicandum orbem terrarum reversurum. Joan. 12. *Pau- peres semper vobiscum habebitis.* Joan. 16. *Ego relinquo mundum.* Et Act. 3. S. Petrus ait, cælum Christum Dominum ad tempus usque Resurrectionis continere. Tum secundò, quia Christus Matth. 26. calicem consecratum vocat genimen vitis. *Non bibam,* inquit, *am dñ de hoc genimine vitis.* Tum quia Apostolus 1. Cor. 10. *Patres nostri,* inquit, *eandem escam spiritalem inducaverunt, & eundem potum spiritalem biberunt.* Patres autem carnem Christi sola fide, vel figurâ tenus manducaverunt.

Respon-

Respondeo, nullo tandem Scripturæ loco in aliqua verisimilitudinis specie probari potest, Christum non esse realiter in Eucharistia præsentem. Non quidem illis testimoniis, quibus asseritur Christum ascendisse in cælum, ibique mansurum usque ad diem iudicii, & tunc remum, & non ante ad inferiora hæc loca rediturum; perspicuum enim est, textibus illis sermonem haberi de præsentia aspectabili, & humana cum hominibus conversatione. Patet id, tum ex primo loco; pauperes enim ob oculos positos visibiliter cernimus. Patet ex secundo, subdit enim Veritas: *Et non videbitis me*. Patet ex tertio; ascendit enim Christus in cælum, ibique manet usque in diem iudicii, visibili nimirum modo, quo ad nos in die iudicii generalis reverteretur. Cæterum modo invisibili nobiscum futurum usque ad consummationem sæculi, ipsemet promissit.

Malè etiam idem ex secundo loco colligitur; eodem enim modo calix post consecrationem dicitur genimen vitis, quo caro Christi in Eucharistia vocatur panis. Solent autem Scripturæ quaslibet res eorum nominibus appellare, ex quibus factæ sunt, vel quorum similitudinem efferunt. Sic serpens Moïsis virga vocabatur, utpote ex virga factus: sic homo ex terra plasmatus, terra, pulvis & lutum dicitur: sic Angeli in specie humana apparentes, homines nuncupantur. Ad eundem modum Eucharistia dicitur panis & vinum, utpotè ex utroque confecta, & quia intuentium oculis, ratione permanentium accidentium, panis & vinum esse videtur, eorumque similitudinem servat. Denum quia sicut visibilia panis & vinum huma-

nam



nam carnem nutriunt, & sustentant, sic invisibilia Christi caro & sanguis dignè suscipientium animos pascunt, vegetant, & spiritualium charismatum beatissimâ copiâ saginant. Adde secundùm nonnullos, verba illa Christum de calice consecrato, & discipulis in institutione Eucharistiæ porrecto minimè protulisse, sed de alio in cœna paschali usitato, solito Judæorum more. Lucas enim *cap. 22.* apertè duos calices distinguit, quos non ita ut Lucas, Matthæus & Marcus explicuerunt. De priore qui in cœna legali Agni Paschalis à patrefamilias distribuebatur, ante consecratam Eucharistiam dixit Christus: *Accipite & dividite inter vos; dico enim vobis, quod non bibam de genimine vitis, donec Dei regnum veniat;* id est, post resurrectionem, quando ad illam, & corporis sui veritatem comprobendam cum discipulis suis manducavit & bibit. Posterior erat calix Eucharisticus, de quo postea dixit: *Hic est calix novum Testamentum in meo sanguine, qui pro vobis effundetur.* Quem posteriorem non vocat genimen vitis, sed à priore omninò præfatis verbis distinxit. Si tamen contendas unicum fuisse calicem, de quo tamen Lucas ante consecrationem panis per anticipationem loquutus sit, quia ita videntur sensisse Cyprianus *epist. 63.* & Augustinus *lib. 3. de consensu Evangelistarum, cap. 1.* prior tibi responsio abundè sufficiet.

Perperam etiam ex tertio loco errorem suum eruere Calvinistæ nituntur. Non enim dixit Apostolus, Patres eandem nobiscum spiritalem escam manducasse, eundemque potum spiritalem bibisse; sed eandem inter se escam comedis-  
 disse, quod non est ad rem. Unde Augustinus  
 lib. 2.

lib. 2. contra litteras Petiliani, cap. 37. Aliud est  
Pascha, inquit, quod illi in ovis colebantur;  
aliud autem, quod nos in corpore & sanguine  
Domini accipimus. Et certè cum ipse Christus  
apertissimè attestetur Joan. 6. Non Moyses de-  
dit vobis panem de cælo, sed Pater meus dat  
vobis panem de cælo verum. Patres vestri man-  
ducaverunt manna in deserto, & mortui sunt.  
Hic est panis de cælo descendens, ut si quis ex  
ipso manducaverit, non moriatur: verbis illis  
non repugnavit Apostolus; nam, ut Grego-  
rii verbis utar, quod Veritas affirmat, Apo-  
stolus veritatis non negat. Nunquid aliud  
Iudex nuntiat, & aliud præco clamat? Ergo  
cùm contestante Veritate longè melior, &  
præcellentior sit Christianorum, quàm vete-  
rum Patrum conditio, ut subsistat illa Judæo-  
rum, Christianorumque disparitas, non ean-  
dem Judæi nobiscum escam comederunt, sed  
immensum inferiorem. Spiritalem tamen es-  
cam comedisse, & spiritalem potum bibisse di-  
cuntur, quia non humanâ operâ suppeditaba-  
tur manna per naturam, sed divino miraculo  
per gratiam specialem. Vel quia typus erat, &  
figura spiritualium futurorum, quibus in Eccle-  
sia potimur. Loqui autem Apostolum de solis  
Hebræis, patet ex contextu, cùm de iis sermo-  
nem habeat, qui mare transierunt, & sub nube  
fuerunt. Hinc Salvianus lib. 2. ad Ecclesiam:  
Iudæi, inquit, habebant quendam umbram, nos  
veritatem: Iudæi manna manducaverunt, nos  
Christum: Iudæi carnes avium, nos corpus Dei:  
Iudæi pruinam cæli, nos Deum cæli. Et Ambro-  
sius lib. de iis, qui initiantur, cap. 9. Considera  
ut præstantior sit, panis Angelorum, an caro  
Christi,



*Christi, quæ utique est corpus vitæ? Manna illud  
 è cælo, hoc supra cælum: illud cæli, hoc Domini  
 cælorum: illud corruptioni obnoxium, si in diem  
 alterum servaretur; hoc alienum ab omni cor-  
 ruptione, quod quicumque religiose gustaverit,  
 corruptionem sentire non poterit. Illis aqua de pe-  
 tra fluxit, tibi sanguis è Christo. Illos ad horam  
 aqua satiavit, te sanguis diluit in æternum. Iu-  
 deus bibit, & sitit; tu cum biberis, sitire non  
 poteris; & illud in umbra, hoc in veritate. Et  
 lib. 4. de Sacramentis, cap. 9. Magnum quidem,  
 & venerabile, quod manna ludæis pluit de cælo:  
 sed intellige quid est amplius, manna de cælo,  
 an corpus Christi, utique qui est author cæli?  
 Deinde manna qui manducavit, mortuus est;  
 qui manducaverit hoc corpus, fiet ei remissio pec-  
 catorum; & non morietur in æternum. Adde  
 quod dato, Apostolum velle, Patres & nos ean-  
 dem spiritalem escam manducare, ut docere vi-  
 detur Augustinus; eam tamen non eodem mo-  
 do manducarunt, ut idem Augustinus in Psal. 77.  
 tradit: idem fuit alimentum significatione, sed  
 non specie: illi in figura Christum comederunt,  
 quia omnia in figura contingebant eis; nos  
 in veritate: illis erat imago veritatis & umbra  
 corporis; nunc autem mysterium impletæ ve-  
 ritatis.*

Tam apertis institutionis Eucharisticæ verbis,  
 veluti totidem fullonibus obrutus Calvinus, ali-  
 quam realem corporis & sanguinis Christi præ-  
 sentiam admittere se finxit hæreticorum vafer-  
 rimus; quatenus Christi realiter sumus hoc  
 sacramento participes, ut quam in carnem suam  
 transfundit, vitæ in nos communicatio proma-  
 net; quod fieri non potest, nisi nobiscum  
 Christus

Christus verè in unum coalescat, nosque reficiat carnis suæ esu, & sanguinis potu. Si autem incredibile videtur, inquit, in tanta locorum distantia penetrare ad nos Christi carnem, ut nobis sit in cibum; meminimus quantum supra sensus omnes nostros emineat arcana Spiritus Sancti virtus, & quàm stultum sit ejus immensitatem modo nostro velle metiri. Quod ergo mens nostra non comprehendit, concipiat fides, spiritum ad ea pervenire, quæ locis disjuncta sunt; & carnis ac sanguinis sui communicationem, non secus ac si in ossa & medullas penetraret, in cœna Christum obsignare, & quidem non objecto inani aut vacuo signo, sed efficaciam spiritus sui illic præferens, quâ impleat quod promittit. Nisi enim quis fallacem vocare Deum volet, inane ab ipso symbolum proponi unquam dicere audeat. Eatenus ergo Christus realiter præsens in Eucharistia dicitur, non quòd ibi corpus ejus existat, vel ad nos descendat, sed quatenus nos ad se evehit; non quòd sub panis lateat integumento, sed quia animum realiter pascit, Christoque Christianus fide conjungitur, & unitur, ut alimentum percipiat animæ & carnis Christi, atque inde reficiatur ad vitæ spiritualis conservationem. Quia nimirum quotiescumque signum aliquod videmus à Domino institutum, illic rei significatæ veritatem adesse certò est cogitandum, ne signa vacua præbeantur & inania.

Confirmant autem & colorant suos dolos Calvinus ejusque discipuli. Tum primò, quia tota præsentia Christi Domini est in ordine ad communicantem, & non in ordine ad signa,

quibus nihil, sed solis discipulis Christus promisit: præsentia autem Christi in ordine ad communicantem est per fidem applicantem sibi virtutem sacrificii crucis, ejus mysteria meditantem, tam immensam charitatem degustantem, eaque dulcedine se reficientem. Secundò, quia Patres non impios, sed solos fideles manducare Christi corpus asseverant, quod proinde sola fide comeditur, sicut Scripturæ aiunt, inhabitare Christum in cordibus nostris per fidem. Tertiò quia, ut dicitur Matthæi 15. & Marci 7. *Omne quod in os intrat, in ventrem vadit, & in secessum emititur.* Ergo cum corpus Christi in secessum non mittatur, non ore corporis, sed solius ore fidei percipitur.

Respondeo, manifestas esse malas Hæresiarum artes; implicat enim contradictionem, Christum esse realiter in Eucharistia præsentem si substantia corporis Christi in Eucharistia reapse non sit. Potest quidem concipi actus fidei realis in Christum absentem, sed propterea Christus non erit realiter præsens, si substantia corporis & sanguinis absit. Nomen ergo præsentis realis fraudulentissimus hæreticus usurpavit, tum ut ignorantes deciperet, tum ut Lutheranorum sibi repugnantium invidiam quadantenus declinaret, tum ut evidentissima Scripturæ & Patrum adversa impietati suæ loca cluderet. Et sanè si sola fides redderet objectum suum realiter præsens, Christo realiter præsentem uniti veteres Patres in Christum nondum conceptum credentes ab origine mundi fuissent, qui Christum tamen neque viderunt, neque audierunt, tametsi vide-

re & audire eum voluerunt, ut dicitur *Luc. 10.* Resurrectione futurâ pariter potirentur, qui eam credunt & sperant, essentque juxta illam fatuitatem redivivi prius, quàm mortui. Non esset etiam ad præsentiam Christi Eucharistia necessaria; Salvatori enim extra Eucharistiam fide conjungi, spe & charitate copulari possumus, eique etiam & in aliis sacramentis & oratione unimur. Quid est, si non hoc ignorantia est? Fides est argumentum non apparentium: Spes est rerum absentium; spes enim quæ videtur, non est spes; nam quod videt quis, quid sperat. Ergo repugnat substantiam Christi realiter absentem sola fide, sola spe fieri realiter præsentem. Certè falsidica, & mendax esset illa fides, quæ Christum realiter præsentem fingeret, quem certò crederet esse absentem. Unde illa realis Calvini præsentia ab intellectu conficta, non hæresis solum est, sed merum ens rationis, & figmentum inanissimum. Denique & in veteri Ecclesia pueris Sacramentum Eucharistiæ porrigebatur, & eam modò indigni sæpè usurpant judicium sibi manducantes & bibentes, utpotè corpus Domini non dijudicantes: & tamen nec in pueris est fidei usus, nec in impiis bonus usus. Ergo ut Christus in Eucharistia sit modo sacramentali præsens, non est necessaria communicantis fides.

Fundamenta Calvini sunt ejusdem cum dogmate futilitatis. Primum quidem, promissit enim Christus suam realem præsentiam communicantibus sub signis sacramentalibus à se institutis; unde qui signa illa consecrata accipiunt, vero Christi corpore fruuntur, quia



caro ejus verè est cibus , & discipulis cœnanti-  
 bus dixit , *Hoc est corpus meum*. Patres verò , ut  
 evellatur secundum fundamentum , non ne-  
 gant impios Eucharistiam usurpantes corpus  
 Christi accipere ; sed illud asserunt , non uti-  
 liter , & cum fructu manducare. Habitat etiam  
 Christus objectivè per fidem in cordibus no-  
 stris , sed non realiter & substantialiter. Per fi-  
 dem etiam dilectione formatam habitat Chri-  
 stus ut Deus in cordibus nostris , quia scriptum  
 est : *Si quis diligit me , diligetur à Patre , & ad  
 eum veniemus , & mansionem apud eum facie-  
 mus*. At per sacramentum Eucharistiæ reali-  
 ter Christus inhabitat , quia scriptum est : *Qui  
 manducat meam carnem , & bibit meum sangui-  
 nem , in me manet , & ego in eo*. Denique ter-  
 tia ratio nihilo mèlior est , de cibis enim com-  
 muni- bus , & carnaliter comestis Veritas loquu-  
 ta est , cum dixit : *Omne quod intrat in os , in  
 ventrem vadit , & in secessum emittitur*. Re-  
 spondebat enim Phariseis conquerentibus dis-  
 cipulos illotis manibus manducare. Quia sa-  
 tisfacit dicens , in hoc nullum esse peccatum ,  
 quia cibi illi communes non coinquinant homi-  
 nem , utpote attingentes non mentem , sed ven-  
 trem , & in secessum deinde missi. At cibus  
 cœlestis Christus nobis in Eucharistia realiter  
 porrectus non aliorum more ciborum carna-  
 liter commolitur dentibus , nec nativæ actione  
 caloris excoquitur , quia immortale & impassi-  
 bile Christi corpus spirituales dotes adeptum ,  
 angelicum præsentia modum æmulatur. Et  
 valde mirum est , istos ( si Superis placet ) refor-  
 matos , qui spirituales audire tantopere avent ,  
 adeò sensibus & imaginationi esse addictos , ut  
 beatas



beatas gloriosi Christi corporis dotes apprehendere non valeant, carnis & sanguinis revelationes semper sequuti.

## R E F L E X I O,

*Et apostrophe ad Calvinistas.*

Mitte quæso humanæ rationis argutias, & Sectarie: puram verborum Christi lucem inspice. Ipse dixit, *Hoc est corpus meum*, qui ex nihilo omnia verbo fecit: *dixit enim, & facta sunt: mandavit, & creata sunt*. Nullus locus dubietati relinquitur, quando ille ipse, qui author est muneris, testis est veritatis, ut Fulbertus Episcopus Carnotensis *epist. 1.* scripsit. Ergo ut verbis te S. Gaudentii *tract. 2. in Exodum*, conveniam: *Quod annuntiatum est credas, quia quod accipis corpus est panis illius coelestis, & sanguis est illius sacra vitis. Nam eum panem consecratum, & vinum discipulis suis porrigeret, sic ait: Hoc est corpus meum. Hic est sanguis meus. Credamus quæso cui credidimus. Nescit mendacium veritas. Et præclare, ac juxta opportunè Chrysostomus hom. 83. in Matth. Credamus ubique Deo, nec repugnemus ei, etiamsi sensui nostro, & cogitationi absurdum esse videatur quod dicit. Nam verbis ejus defraudari non possumus, sensus vero noster deceptu facilis est: illi falsa esse non possunt, hic sapius ac sapius fallitur. Quoniam ergo ille dixit, *Hoc est corpus meum*, nullâ teneamur ambiguitate, sed credamus, & oculis intellectus id perspiciamus. Et homil. 60. ad Populum*

*Antiochenum : Ipsius sermo infallibilis est , sensus autem noster seduci facilis : ille nunquam decedit , hic autem ut plurimum errat. Quoniam igitur Verbum dicit , Hoc est corpus meum , & pareamus , & credamus , & oculis intellectualibus ipsum intueamur.*

Sed verborum Christi luci, intercedit sensus, intercedit ratio, inquires; & ebullientibus hinc inde difficultatibus obruor. Sed ad excusandas excusationes in peccatis hæc frustra ob- tendis. Nonne cætera Christianæ Religionis arcana difficultatibus longè gravissimis, & insuperabilibus plena sunt? Fortè Trinitatis, Incarnationis, Passionis, Resurrectionis Christi mysteria plana sunt, & intellectu facilia? Fortè peccati originalis in posteros omnes diffusa contagio à difficultatibus immunis est? Fortè prædestinationis, & gratiæ arcana, & reprobationis iudicia nullam patiuntur difficultatem? Si nihil non planum, nihil non clarum, nihil non expeditum expectas: ergo sine causa dixit Apostolus, captivandum esse intellectum in obsequium fidei. Religionem Christianam ab imis fundamentis subruere nititur, qui persuasibilibus humanæ sapientiæ verbis omnes fidei articulos complanare, & veluti lævigare connititur. Si Christianismus assertionum suarum evidentiam, & summam facilitatem sponderet, aliquid efficeres, Calviniane, objectâ nobis coacervatarum difficultatum congerie, & veritatis lucem his oppositionum nebulis obscuratum iri facile tibi, facile etiam nobis suaderes. Ille verò tantum abest, ut has voces usurpet, hisque pollicitationibus candidatos suos lactet; quin contrâ obscura propo- nit,

nit, ardua præcipit, indivulsam à suis mysteriis difficultatem esse contestatur.

Et sanè solennis est divinæ gubernationis in rebus humanis dispensandis, atque consiliis suis detegendis mos mirabilis quidem, & venerabilis; sed terribilis tamen, quo judiciis suis, quæ abyssus multa sunt, videmus veritates cælestes sacris tenebris circumfusas sapientibus abscondi, parvulis revelari, ut sapientiā sapientum perdatur, prudentia prudentum reprobetur; ut videntes non videant, & audientes non audiant; ut denique electi hac salutari caligine humiliati divinis amplius splendoribus illustrentur. Hac de causa cùm mentem suam nigrissimè aperire potuisset, obscura tamen verborum involucra, & tenebricosam caliginem sacris litteris, & Prophetarum oraculis obducere voluit. Quas uno verbulo eludere, & formalibus definitionibus nascituras hæreses præfocare potuit, Ecclesiam interturbare suam fuit, nec tot ambiguas expressiones suppressit, quibus errantes tot erant aliquandorum perversissimè abusuri. Cur, quæso, non omnibus, sed *testibus* duntaxat *praordinatis*, uti Scriptura loquitur, resurgens Christus conspicuus apparuit, innumeras aspectabili conversatione sua, de divinitate sua dubitationes sopiturus? Cur è verbis vitæ, quæ innumerabilia protulit, quibusve mundum libris implere potuisset, paucula colligi disposuit? Cur verisimiles Evangelistarum discordias, tot unde successu temporum turbas fore nascituras præviderat, permisit? Cur Apostolorum Symbolum Symbolo, quod vulgò Athanasii dicitur, contractius esse decrevit, nec iis verbis efferendum voluit, quibus



tot adversum Trinitatem & Incarnationem  
 hæreses in antecessum truncatæ fuissent, nec  
 suis oraculis eam claritatem, quâ Conciliorum  
 definitiones nitent, conciliavit? Potuerat sanè,  
 sed ille noluit, cujus infinita est altitudo sapien-  
 tiæ & scientiæ; cujus inscrutabilia iudicia sunt,  
 & investigabiles viæ; cujus denique nullus  
 consiliarius fuit. Eadem columna nubis, te-  
 stante sacro eloquio Exodi 14. *erat tenebrosa,*  
*& illuminans noctem:* super Ægyptios asper-  
 gens tenebras, filiis Israël affundens lucem. Ut  
 Deum, ita divina mysteria non hymnus solùm,  
 sed silentium decet. Hoc silentio usi Patres, ut  
 notat Basilii *lib. de Spiritu Sancto, cap. 27.* usi  
 sunt & sacri Scriptores, ne divina arcana usu  
 trita & undecumque parabilia exposita essent  
 contemptui, rati ei quod sepositum est, quodque  
 rarum est, huic naturâ conjunctam esse summam  
 admirationem. Ad eundem profectò modum Apo-  
 stoli & Patres in occulto silentioque mysteriis  
 suam servare vere dignitatem. Neque enim omninò  
 mysterium est, quod ad populares ac vulgares au-  
 res effertur. Est autem silentii species etiam obscu-  
 ritas, quâ utitur Scriptura, intellectu difficilem  
 reddens dogmatum sententiam, idque ad utilita-  
 tem in Scripturis versantium. Ergo difficultates  
 ne causeris: non esset mysterium Eucharistia,  
 nisi difficultatibus abundaret.



## SPECVLATIO II.

*Realis corporis & sanguinis Christi in Eucharistia præsentia fidem à Christo acceperunt Apostoli, ab Apostolis Sancti Patres, & sacra Concilia acceptam servaverunt, atque in nos perenni traditione corroborarunt.*

**H**æc est tertia veritatis Catholicæ demonstratio à perpetua traditione Ecclesiæ, atque Patrum & Conciliorum antiquitate, universitate, consensione. Ne autem in immensum excreseat oratio, selecta Patrum testimonia ordine referemus.

*S. Paulus.*

In primis divinus Apostolus hanc fidem à Christo se accepisse testatur 1. Cor. II. *Quod accepi à Domino, inquit, hoc & tradidi vobis, quoniam Dominus Iesus in qua nocte tradebatur accepit panem, &c.* Post relata verò Christi institutionis verba, ad dignam tanti mysterii suspensionem hortaturus, admonet panem hunc cœlestem, vel calicem indignè usurpantes iudicium sibi manducare & bibere, eosque esse corporis & sanguinis Domini, utpote non dijudi-

cantes corpus Domini. Ex quibus sic formatur argumentum. Si in pane Eucharistico nihil nisi figura Dominici corporis haberetur, profectò non idcirco peccaret qui comederet, quòd non discerneret, dijudicaretque corpus Domini; nam potius judicare debebat, ibi non esse corpus Domini. Ergo juxta doctum à Domino Apostolum ingenti gravantur sacrilegio qui indignè accedunt, quia non judicant ibi esse corpus Christi, quia cibum illum divinum Christi corpus realiter exhibentem eadem mentis compositione atque alios cibos accipiunt, quia Christo præsenti injurii sunt, quia corpus Domini temerario accessu floccificant, quia corpori Domini vim inferentes, immundis illud accipiunt animis, & in pollutum os immittunt. Certè si sola corporis Christi figura indignè haberetur, rei etiam fuissent corporis Domini, qui cum conscientia peccati ad agnum paschalem comedendum accessissent, nihilque specialis sacrilegii indigna Eucharistia communio contineret. Et mirum est, Calvinistas sacrarum imaginum juratos hostes infinito sacrilegio gravare eos, qui Eucharistiam, quam solam esse Christi imaginem contestantur, imparati usurpant. Injuriam irrogari Christi nudæ, nec conspicuæ imagini novi Iconoclastæ verentur, qui aspectabiles Servatoris imagines diffringunt, discerpunt, comminuunt, demoliuntur. Hæc nimirum illorum pietas & religio retentas ab Ecclesia imagines abominari, & novas comminisci, quas venerentur. Verùm enim verò non irreverenter habitæ Christi imaginis damnat, sed reos corporis Christi indignè communicantes appellat Apostolus,

stolus. Ergo solas ibi fingere imagines, hæreticorum imaginatio est.

Accedit, quod si vera foret Calvinistarum omnia ad tropos, vel spiritalem duntaxat manducationem revocantium assertio, nunquam contingere posset, quod tantoperè formidat Apostolus, indignam nimirum communionem mortem sumentibus parere, & anticipatam condemnationem accersere. Quicumque enim panem cœlestem manducat, vel fidem habet, vel fide caret. Si fidem habet, dignè suscipit, quàmlibet infandis sceleribus sit inquinatus: tum quia juxta vulgatissimum Calvinistarum dogma, sola fides est quæ justificat: tum quia juxta Calvinum lib. 4. instit. cap. 17. § 41. & 42. dignam manducationem, quam Catholici à peccatoribus factorum reposita ratione, contritione, confessione, satisfactione, aliisque pœnitentiæ operibus indignitatem expiaturis exigunt, conscientiarum torturam & divexationem hominum vir ( si Superis placet ) reformatissimus appellat, concluditque: *Ea est dignitas, quam unam, & optimam offerre Deo possumus, si nostram ei vilitatem, & ut ita loquar, indignitatem offeramus.* Quam impuræ doctrinæ iniquitatem à corruptissimo morum depravatore Martino Luthero hauserat, qui sermone de præparatione ad Eucharistiam: *Optima, inquit, dispositio est non nisi ea, quæ pessimè est dispositur.* Et ideo pœnitentia potius post, quàm ante Sacramentum dignè peragitur. Si verò ad Eucharistiam accedens fide caret, Christum nullatenus suscipit, quia secundum Calvinistas sola Christus fide manducatur. Ergo sacrilegè non manducat, qui nec manducat quidem: nec

reus est corporis Domini, cui nec realiter, nec per fidem communicat. Ergo juxta Catholicam duntaxat Orthodoxorum fidem dictum Apostoli verum esse probatur. Cibus enim ille divinus Christum reapse continens, impuro corde susceptus mortem infert comedenti, qui hoc ipso fit reus corporis Domini; quod corpus Domini non dijudicans, præsentem non reveretur majestatem, nec mundum offert tanto hospiti hospitium. Quid ergo mirum, si Christum in mortem & condemnationem summat, qui Christum quantum in ipso est, in semetipso crucifigit? Nam sicut per arcam fœderis innumerabilia Israëlitis beneficia Dominus contulit, à Philistæis verò ablata summam istis pestem & calamitatem aeterno cum dedecore junctam importavit: sic Christus in Eucharistia præsens optimè affectos & comparatos amplissimis gratiæ muneribus ornat, imparatis verò & sacrilegis corpus Christi in Eucharistia latens ab alio ciborum genere non distinguentibus, detrimenta gravissima, & mortem affert sempiternam.

*Liturgia Apostolorum, & Acta  
S. Andrea.*

Abstinent nonnulli à probatione desumpta à Liturgiis Jacobi, Petri, & Marci; quia cum illis inquirunt, multa sint ab hæreticis inserta, dijudicatu difficile est quæ pars Apostolos habeat authores. Nihilominus non esse omnino negligendum hoc probationis genus reor. Nam quod in illis liturgiis de Eucharistia dicitur,



citur, vel fuit à Sanctis illis Ecclesiarum fundatoribus, aut certè ab eorum successoribus juxta doctrinam ab Apostolis traditam assertum; vel ab hæreticis insertum. Si primum, permagnum est illorum testimoniorum autoritatis pondus: si secundum, cùm illæ liturgiæ sint vetustissimæ, fuisse consequenter olim debuit aliqua hæresis circa Eucharistiam, quâ imbutæ liturgiæ hæretici corrupissent. Et tamen illius hæresis Patres indices hæreseon accuratissimè texentes nunquam meminerunt. Ergo quod de veritate Eucharistiæ in illis liturgiis dicitur, Catholicæ Ecclesiæ sensum exprimit orthodoxum.

Sic autem habetur in liturgia S. Jacobi fratris Domini: *Sileat omnis humana ac mortalis caro, stetque cum metu & tremore, ac nihil terreste apud seipsam cogitet: Rex enim regnantium, ac Dominus dominantium Christus Deus noster progreditur ut imoletur ac detur in cibum fidelibus: ipsum autem antecedunt Angelorum chori cum omni imperio & potentia. Ibi etiam oblatio appellatur venerandum & incruentum sacrificium. Dicitur etiam quod Christus in partes distributus, ac non divisus, & fidelibus impertitus in ora fidelium est.* Catholicus etiam de Eucharistia sensus in liturgia S. Marci per Eminentissimi Cardinalis Sirleti opera ex vetustissimo codice Abbatiae S. Mariae in Calabria; Ordinis S. Basilii descripta apertissimè liquet. Idem etiam peræquè constat ex liturgia S. Petri, in cujus exordio orat Sacerdos: *Domine Deus noster, qui te ipse obtulisti pro hujus mundi vita, inspice in nos, & super panem istum, & calicem super hunc, & fac leum immaculatum*

*latum corpus tuum, & preciosum sanguinem.*

Catholica etiam Christi realiter in Eucharistia præsentis fides in actis Passionis S. Andrea: à presbyteris Achaia: oculatis testibus conscriptis perspicuè continetur. Ibi enim Apostolum Ægeæ, ut Diis immolaret hortanti, divino spiritu afflatum respondisse narratur: *Ego omnipotenti Deo, qui verus & vivus est, immaculatum Agnum quotidie sacrifico; non taurorum carnes, nec hircorum sanguinem, sed immaculatum agnum in Alinari, cujus carnes postquam omnis populus manducaverit, Agnus qui sacrificatus est, integer perseverat & vivus.*

Scio Aubertinum Calvinistam acta illa ut apocrypha rejicere: tum quia, inquit, Eusebius lib. 3. historiarum enumerat acta Andrea: & Joannis inter libros ab hæreticis conscriptos sub nomine Apostolorum. Tum quia Epiphanius docet Encratitas, Apostolicos, & Origenistas uti maximè solitos fuisse actorum Andrea:, Joannis, & Thomæ testimonio. Tum quia Philastrius *hæresi* 40. ubi de Manichæis, tradit quod habent apocrypha B. Andrea: Apostoli, id est actus quos fecit veniens de Ponto in Græciam, quos tunc discipuli Apostolum sequentes conscripserunt: tum ex Innocentio I. *epist.* 3. *ad Exuperium*, quæ à quibusdam Philosophis, & sub nomine Thomæ, & si quæ sunt alia, non solum repudianda, sed etiam damnanda declarat. Tum quia acta illa approbasse Manichæos refert Augustinus lib. 1. *de fide contra Manichæos*, cap. 4. & 38. & lib. 1. *contra Adversarium legis*, cap. 20. Tum quia Gelasius Papa in suo de apocryphis libris decreto acta  
illa

illa libris apocryphis accenset. Denique Cardinalis ipse Baronius *de ann. 69. num. 34.* de passione Andreæ verba factururus, cunctabundam hæsisse ait orationem suam apocryphorum præpeditam timore, quia cum passionis Andreæ acta à Manichæis corrupta sint, dubia eorum in Ecclesia fides remansit.

Verum hæc Actorum præfatorum à Presbyteris Achaïæ editorum auctoritatem non elevant; cum enim Ecclesia ab hæreticorum fabulis & interpolationibus abhorrens verba illa Presbyterorum Achaïæ divinis in officiis recitet, cum epistolam illam laudet Bernardus *serm. 2. de S. Andrea, & serm. 16. de diversis,* & Petrus Damiani *serm. 2. de eodem Apostolo,* & Ivo Carnotensis *lib. de convenientia veteris & novi Sacrificii,* verborum illorum cum laude meminerit; & Lanfrancus *lib. de Eucharistia,* & ipse author libri *de vera & falsa pœnitentia,* qui habetur inter opera Augustini, verba capituli 8. referat, quæ non nisi in illa epistola extant, non parvam acta illa obtinent auctoritatem. Nec obsunt Aubertini objectiones, vel potius fraudes; quæ enim producit testimonia, vel loquuntur de illis actis, quorum author Andreas circumferebatur, vel de actis peregrinationis & prædicationis ejus; non verò de epistola Presbyterorum Achaïæ, in qua passio B. Andreæ enarratur. Maximè quia nihil in epistola illa invenitur, quod à stylo, & Apostolorum dicendi consuetudine discrepet, quale in libris actorum, qui ab Apostolis scripti circumferebantur, teste Eusebio probabat: nihil quod Encratitis, Origenistis, vel Apostolicis faveat continetur: nihil quod Manichæorum causam



causam juvet habetur : nihil quod eas nugas sapiat, quarum loco citato Augustinus meminit. Gelasius verò apocryphum declarat librum Actorum, qui Andreae auctori assereretur ; sicut & Evangelium, quod ejusdem Apostoli nomen præferebat ; epistolam verò præfatam intactam relinquit. Cardinalis demùm Baronius de aliis ab hac epistola actis omninò loquutus est, cùm relatis in objectione verbis immediatè subnectat quæ de Andreae martyrio in epistola Presbyterorum Achaia habentur expressa, digna existimata esse quæ in Ecclesia Catholica recitarentur.

### *S. Dionysius.*

Catholicam etiam veritatem disertè expressit Dionysius Apostolorum discipulus *lib. Eccl. Hierarch. cap. 3.* verbis adèd luculentis, ut virum cordatum iis convictum iri certissimum sit : *O divinissimum, inquit, & Sanctum Sacramentum, obducta tibi symbolicè operaimenta anigmatum revelans dilucidè nobis aperi, ac spirituales nostros oculos singulari apertoque lumine imple.* Ubi Christum sub signorum operimento latentem invocat, ibique proinde adesse profitetur : Stulta enim foret, & impia hæc oratio ad solum panem relata.

Nec obest, quod Dionysius Eucharistiam appellet *venerabilia symbola*. Non obest, inquam ; seipsum enim apertissimè interpretatur Dionysius, dum ait talia esse symbola, quibus Christus monstratur & sumitur. Est ergo Eucharistia symbolum Christi præsentis ; species enim consecrata præter cognitionem sui quam ingerunt,



gerunt, faciunt fideles in Christi realiter præsentis cognitionem venire. Ex hoc autem miserè decipiuntur hæretici Calviniani, quòd vel præ ignorantia nesciant, vel nescire præ perversitate nolint, dari signa, symbola, & indicia rei præsentis, præsertim quando res præfens est latens; quæ non nisi indiciiis dignosci potest. *Et hoc vobis signum* (aiebat Angelus Pastoribus Luc. 2.) *Invenietis infantem panis involutum, & positum in præsepio.* Sicut ergo panis involventes signum erant Christi infantis, ita species panis & vini sunt signum corporis & sanguinis in Eucharistia præsentis; & non essent verum signum demonstrativum, nisi Christus adesset. Sed de his plura postea.

*S. Martyr Ignatius.*

Luculenta sunt hæc in favorem Catholicæ sententiæ B. Ignatii primo & secundo sæculo florentis verba *epist. ad Smirnenses*, quæ quin Ignatii sunt, dubitari nequaquam potest, cum verba illa referat Theodoret. *dialogo 3.* Loquens enim de Saturnianis & Simoniacis Dionysius ait: *Eucharistiam & oblationes non admittunt, quòd non confiteantur Eucharistiam esse carnem Salvatoris Domini nostri Iesu Christi, qua pro peccatis nostris passa est, quam pater sua benignitate suscitavit.* Ecce graphice descriptam Calvinistarum nostratum hæresim, qui ideò Eucharistiam oblationem & sacrificium esse negant, quia Eucharistiam esse carnem Salvatoris nostri inficiantur.

Confegit Aubertinus ad solitas figurarum  
&

& troporum umbras inanissimas. Verùm non solum voluntariè & verbis ipsis vi illatâ Ignatium interpretatur; sed quis credat etiam, vel quomodo probabit Saturnianos ita fuisse insanos, ut Eucharistiam carnis Christi figuram esse negaverint. Si ita fas sit planissima Patrum testimonia voluntariis unâ & violentis glossis detorquere, si quæ ab eis perspicuè dicta sunt, in quamlibet partem interpretari, alienumque eis affingere sensum, nihil in traditione ratum fixumque habebimus, quod non hominum sophismatis, & hæreticorum argutiis pateat.

Sed ipse Ignatius, inquires, epistola ad Philadelphenses, figuratæ intelligentiæ locum & fundamentum tum præbet cum ait: *Moneo ut unâ fide, unâ predicatione, unâ Eucharistiâ utamini; una enim est caro Domini nostri Iesu Christi, unus sanguis qui pro nobis effusus est; unus item panis omnibus confractus, & unus calix pro omnibus distributus.* Ubi distinguere videtur carnem Christi à pane & calice Eucharistico. At enim mirum est, eam nobis opponere epistolam Calvinistas, quæ ipsis spuria, vel certè suspectæ fidei est, ut patet ex Perkenso *in demonstratione problematis*; & Riveto *in Critico*. Sed utut sit, carnem crucifixam & sanguinem in cruce effusum à pane & calice Eucharistico distinguit Ignatius, quia in cruce modo visibili, extenso, & sensibili passus est; in Eucharistia verò sub signis panis & vini modo invisibili, inextenso, & sensibus impervio, realiter tamen existit.

## S. Iustinus.

Illius veritatis testem locupletem habemus S. Iustinum Martyrem in Apologia 2. pro Christianis, ubi ita de Eucharistia loquitur: Non enim ut communem panem, neque communem potum ista sumimus, sed quemadmodum per Verbum Dei caro factus Iesus Christus Servator noster, & carnem, & sanguinem salutis nostræ causâ habuit; ad eundem modum etiam eam, in qua per preces Verbi ejus ab ipso profecti gratia sunt acta alimoniam, unde sanguis, & caro nostræ per mutationem aluntur, incarnati illius Iesu carnem & sanguinem esse docti sumus. Nam Apostoli in commentariis à se scriptis, quæ Evangelia vocantur, ita tradiderunt præcepisse sibi Iesum; eum enim pane accepto, eum gratias egisset, dixisse, Hoc facite in mei recordationem, hoc est corpus meum: & poculo similiter accepto, & gratias actis dixisse, Hic est sanguis meus. Observa non esse panem communem, sed carnem & sanguinem Christi, eodem modo, quo in Incarnatione est vera caro Christi.

Infuscare connititur hujus loci splendorem solitis suis troporum umbris Aubertinus Calvinista. Tum quia, inquit, protestatus antea fuerat Iustinus manducationem humanæ carnis, de qua Christiani diffamabantur, fabulam esse. Tum quia dixerat Christum in cælos ascendisse, duplicemque duntaxat distinxerat Christi præsentiam, præteritam alteram in humilitate; futuram alteram in gloria. Tum quia alioquin contra Catholicos sequeretur panem non converti in corpus Christi, sicut

neq.

nec in carnem divinitas in Incarnatione conversa est. Tum demùm, quia ait panem & vinum Eucharisticum esse corporum nostrorum alimoniam, quod vera si sunt Christi caro & sanguis, verum esse non potest. Idque ex eo confirmari potest, quod in dialogo cum Triphone scripsit præcepisse Christum, ut Eucharistia in commemorationem passionis suæ fieret; & tradidisse nobis panem in commemorationem corporationis, propter credentes in eum, quorum causâ partibilis factus est.

Sed hæc nugæ nugarum sunt; quid enim impacta Christianis de comedendis carnibus humanis calumnia fabulosa cum reali, qualem admittimus, admittitque præfatis verbis Justinus, in Eucharistia Christi præsentia commune habet? Non debuit Justinus Eucharistiæ reconditum mysterium propalare, sed eos impudentissimè mentiri contestari, cum nulla in cœtibus Christianis infantis cujuscpiam, vel hominis caro, uti imponebant, unquam comesta sit. Quin hac conjecturâ confirmatur potius vera sententia; non enim ob comestam Christi figuram Christiani infanticidæ & anthropophagi, & infantis farinâ recti occisores apud Ethnicos audivissent, ut refert Tertullianus in *Apologetico*, cap. 7. & Minutius Felix in *Octavio*. Calumniam enim illam depulsur facillimam citò suæ fidei expositione Christiani amoliri fuissent, & unius signi à se admissi declaratione os loquentium mendacia oclusissent.

Secunda etiam conjectura puerilis est; veritas enim Ascensionis, & duplex Christi conspicua præsentia sacramentali præsentia, tamen  
reali,



reali, non obest; quasi ve. ò Ascensio, Judicium futurum, Incarnatio præterita, & Eucharistia non sint distincta mysteria? Eodem argumento probarent hæretici Catholicos ipsos realem Christi in Eucharistia præsentiam non agnoscere, quia præsentiam præteritæ humilitatis, & futurum in gloria adventum sollicitè distinguunt.

Tertia quoque ratio nihilo melior est: non enim comparat Justinus modum unionis hypostaticæ humanitatis cum verbo cum modo quo panis in carnem Christi transubstantiatione convertitur: sed carnis assumptæ veritatem ejusdem carnis realiter præsentis veritate illustrat, ut sicut in Incarnatione vera, & non figurata caro assumpta est; ita eadem vera Christi caro in Eucharistia realiter in sacra mensa porrigitur.

Denique cum Justinus ait, panem & vinum Eucharisticum esse corporum nostrorum alimoniam, vel intelligitur de pane & vino ante consecrationem, ut sensus sit, id quod in corporum alimoniam institutum est, fit consecratione caro & sanguis Salvatoris, quibus animæ reficiuntur. Vel si de pane & vino consecratis loquitur, significat hoc divinissimo & vivifico cibo corporibus nostris semen immortalitatis & gloriosæ resurrectionis indi; unde à Patribus *pharmacum immortalitatis* appellatur. Unde dixit Veritas: *Qui manducat meam carnem, & bibit meum sanguinem, habet vitam æternam, & ego resuscitabo eum in novissimo die.* Præbere etiam dicitur corporibus nostris spiritalem alimoniam, quia castitatem illi imprimit, fomitem mitigat, virtutem infundit  
contra

contra incentiva vitiarum. Vino vitis, in quo est luxuria, corrumpitur castitas; vino Eucharistico, in quo Christus realiter continetur, virginitas mentisque castimonia instillantur, ut dicetur infra, & mox patebit testimonio Irenæi statim referendo. Unde dicitur Zachariæ 9. *Quid est bonum ejus, & quid pulchrum ejus, nisi frumentum electorum, & vinum germinans virgines?* Quod verò in confirmatione adjicitur, tam futile est, quàm quod maximè; quid enim vetat sacratissimam Eucharistiam corpus Domini realiter continere, & simul in commemorationem Dominicæ passionis fieri tamen?

### *S. Irenæus.*

Astipulatur S. Episcopus & Martyr Irenæus *lib. 4. cap. 34.* qui floruit secundo & tertio sæculo; loquens enim de Valentinianis docentibus non esse unum, eundemque Deum creatorem cum Patre Christi Domini; & insuper negantibus resurrectionem carnis: *Quomodo, inquit, constabit eis eum panem, in quo gratia acta sunt, corpus esse Domini sui, & calicem sanguinis ejus, si non ipsum fabricatorem mundi Filium dicant, id est Verbum ejus, per quod lignum fructificat & defluunt frondes, terra dat primum quidem scænum, post spicam, deinde plenum triticum in spica? Quomodo autem rursus dicam carnem in corruptionem devenire, & non percipere vitam, quæ à corpore & sanguine Domini alitur? Ergo aut sententiam mutant, aut abstineant offerendo quæ prædicta sunt. Nostra autem consonans est sententia Eucharistia, & Eucharistia rursus*

rurſus confirmat ſententiã noſtram. Et paulò poſt : Quomodo enim qui eſt à terra panis percipiens invocationem Dei, jam non communis panis eſt, ſed Euchariftia ex duabus rebus conſtans, terrenã & cæleſti : ſic & corpora noſtra percipientia Euchariftiam jam non ſunt corruptibilia, ſpẽm reſurrectionis habentia. Et lib. 5. cap. 2. Quando ergo & mixtus calix, & fractus panis percipit verbum Dei, fit Euchariftia ſanguinis & corporis Chriſti, ex quibus augetur & conſiſtit carnis noſtra ſubſtantia. Quomodo carnem negant eſſe capacem donationis Dei, qua eſt vita æterna, qua ſanguine & corpore nutritur ut membrum ejus ? Quomodo lignum vitis depoſitum in terra ſuo fructificat tempore, & granum tritici decidens in terram, & diſſolutum multiplex ſurgit per ſpiritum Dei, qui continet omnia, qua deinde per ſapientiam in uſum hominibus veniunt, & percipientia verbum Dei Euchariftia ſiunt, quod eſt corpus & ſanguis Chriſti : ſic & noſtra corpora ex ea nutrita, & reſoſita in terram, & reſoluta in eam reſurgent in ſuo tempore, verbo Dei reſurrectionem eis donante in gloriam Dei Patris.

Præclariffimã hac oratione multa nos docet Irenæus, quibus allifa Calviniſtarum nefanda hæreſis confringatur necesse eſt, ut enim probet Chriſtum eſſe verum Dei filium, & mundi fabricatorem, id ſuadet, quia omnipotentiffimis verbis ſuis panem efficit verum corpus ſuum, & vinum in ſanguinem proprium convertit : ut confirmet poſſibilem eſſe futuram carnis reſurrectionem, miraculum conversionis panis in corpus Chriſti in argumentum proferret, quia ſi verbis Domini panis fit vera  
Chriſti

Christi caro, quidni corpus Eucharistiâ pastum divinâ virtute haustum à vivifico illo cibo immortalitatem divinâ potentiâ consequetur? Usque adeò in primitiva Ecclesia realis Christi in Eucharistia præsentia supponebatur, ut illâ constantissimâ, & à nemine in dubium vocatâ veritate ceteros fideli articulos confirmarent.

Cavillantur Calvinistæ, & in pura locorum illorum luce tenebras comminiscuntur. Cùm enim, inquit, Eucharistia Irenæo autore duabus rebus constet, alterâ terrenâ, quâ designatur substantia panis; & alterâ cœlesti, quâ corpus ipsum Christi significatur, de figura corporis Christi loquutus est, quandoquidem substantia panis permanet. Cùm etiam dicat, addunt, carnem nostram corpore & sanguine Domini nutriri atque augeri, procul dubio de pane, qui figura Christi sit, sermonem habet.

Verùm adeò extortæ & violentæ, & juxta frivolæ sunt hujusmodi Novatorum interpretationes, ut ipsis, si aliquod rationis intervalum habent, pudendæ sint. Nam Eucharistiam constare terrenâ simul & cœlesti substantiâ, quis Catholicorum negaverit? Nonne visibiles panis vinique species terrenæ sunt, corpus verò Christi cœleste, id est eximiam cœli incorruptibilitatem assequutum? Nonne ipse Christus terrenâ substantiâ, id est humanâ è terra oriunda; & cœlesti, id est spiritu immortali, & verbo Deo cœli constat? Quum verò addunt hæretici, carnem nostram corpore Christi nutriri, manifestè malam fidem produnt suam, cùm Irenæum habeant luculentum verbo.



verborum suorum interpretem. Nutriuntur planè vivifico cibo corpora nostra, non conversione alimenti in rem alitam, sicut cibis solitis dum pascuntur, sed cœlestis incorruptionis communicatione inseminatâ. Cibus quippe ille grandium non in comedentes mutatur, sed eos in se mutat, dotes illis suas effusus.

## Tertullianus.

Subscribit Tertullianus lib. de resurrect. carnis, cap. 8. *Caro, inquit, corpore & sanguine Christi vescitur, ut & anima de Deo saginetur.* Cui consonat illud libri de pudicit. capite 9. *Opimitate Domini corporis vescitur.* Et lib. de orat. cap. 14. *Accepto corpore Domini, & reservato, utrumque saluum est, & participatio sacrificii, & exequutio officii.* Exponens etiam illud orationis Dominicæ, *Panem nostrum quotidianum da nobis hodie*, tripliciter ait posse intelligi. Primum de necessitatibus corporis. Secundò spiritaliter de Christo, quæ est verus credentium panis. Tertiò de corpore Christi, quod est in Eucharistia: *Tum quòd, inquit, & corpus ejus in pane censetur.* Ubi Tertullianus distinguit Christum quæ fideles credentes nutrit, & eundem Christum quatenus in Eucharistia existit. Quæ distinctio vana prorsus foret atque superflua, si Christus in Eucharistia solâ fide sumeretur, quemadmodum ab iis sola fide accipitur, qui in eum, ejusque Evangelium credunt. Nec possunt hæretici in illa voce *censetur*, vitiligare, quippe quæ & apud Jurisperitos, & apud ipsum Tertullia-

num libro de patientia , & libro de præscriptionibus intimam rei præsentis conjunctionem significat.

Dices : Idem ipse Tertullianus lib. 4. contra Marcionem , cap. 40. *Acceptum* , inquit , *panem & distributum discipulis corpus suum illum fecit* , *Hoc est corpus meum dicendo , id est figura corporis mei*. Ergo corpus Christi , auctore Tertulliano , non nisi figura tenus in Eucharistia existit.

Respondeo , locum illum in lectione Tertulliani versatis explicatu facillimum esse ; vox enim *figura* , non applicatur corpori , sed particulæ *hoc* , quæ ex mente Tertulliani supponit pro pane ; ita ut sensus sit : Christus acceptum panem , qui erat figura corporis sui , corpus suum fecit dicendo : *Hoc* , id est *figura corporis mei* , est corpus meum. Unde Tertullianus transpositione usus est , ne ordinem verborum Christi Domini expositione particulæ *hoc* , interromperet. Sicut lib. contra Praxeam cap. 29. explicans quâ ratione Christus , cum sit Deus , potuerit mori , illud Apostoli 1. Cor. 15. refert : *Quoniam Christus mortuus est* , atque : *Dicendo , Christus mortuus est , id est unctus ; id quod unctum est , mortuum ostendit , id est carnem*. Ubi particulam , *id est unctus* , immediatè post ly *Christus* , non subiecit , ne verborum Apostoli series interromperetur.

Ad horum evidentiam & apertissimam Tertulliani mentem , antequam locum integrum referamus observandum est , Marcionem duplici potissimum errore laborasse ; nam & Christo spectrum & figuram corporis affluxit ,

&c

& legem veterem à malo Deo mundi hujus opifice fuisse conditam, à Christo tandem abolitam fuisse somniavit : & hoc libro suo antitheseon Legis & Evangelii suadere conatus est. Priorem errorem tribus libris confutavit Tertullianus ; posteriorem quarto libro adoritur, probans non venisse Christum ut legem solveret, sed adimpleret ; exhibuisseque Servatorem in novo Testamento eorum veritatem, quorum figuræ in veteri habebantur. Hoc præmissis audiamus Tertullianum.

*Professus itaque, inquit, se concupiscentia concupisse edere pascha, ut suum ( indignum enim ut quid alienum concupisceret Deus ) acceptum panem & distributum discipulis corpus suum illum fecit, Hoc est corpus meum dicendo, id est figura corporis mei. Figura autem non fuisset nisi veritatis esset corpus. Caterum vacua res, quod est phantasma, figuram capere non posset. Aut si propterea panem corpus sibi finxit, quia corporis carebat veritate : ergo panem debuit tradere pro nobis. Faciebat ad veritatem Marcionis, ut panis crucifigeretur. Cur autem panem corpus suum appellat, & non magis peponem, quem Marcion cordis loco habuit, non intelligens veterem fuisse istam figuram corporis Christi, dicentis per Ieremiam : Adversus me cogitaverunt cogitatum dicentes : Venite comedamus lignum in panem ejus, scilicet crucem in corpus ejus. Itaque illuminator antiquitatum, quod tunc voluerit significasse panem, satis declaravit, corpus suum vocans panem. Sic & in Calicis mentione testamentum constituens sanguine suo obsignatum substantiam corporis, confirmavit. Nullius enim corporis sanguis esse potest, nisi carnis. Nam et si*

*qua corporis qualitas non carnea opponetur nobis, certè sanguinem nisi carnea non habebit. Ita consistit probatio corporis de testimonio carnis, probatio carnis de testimonio sanguinis. Ut autem & sanguinis veterem figuram in vino recognoscas, aderit Esaias. Quis, inquit, qui advenit ex Edom, rubor vestimentorum ejus ex Bosor, sed decorus in stola violenta cum fortitudine? Quare rubra vestimenta tua & indumenta sicut de foro torcularis pleno conculcato? :: Multò manifestius in benedictione Iudæ, ex cujus tribu carnis census Christi processurus, jam tunc Christum in Iudæa delineabat: Lavabit, inquit, in vino stolam suam, & in sanguine uve amictum suum: stolam & amictum carnem demonstrans, & vinum sanguinem. Ita & nunc sanguinem suum in vino consecravit, qui tunc vinum in sanguine figuravit.*

Quibus verbis docet Tertullianus, Christum habuisse verum corpus, quia figuris præsignatum est, nec est figura nisi alicujus veritatis. Docet etiam panem in veteri lege fuisse figuram corporis Christi, & vinum sanguinis ejus, ut probat Jeremiæ, Isaia, & Genesis testimoniis. Unde planus ejus sensus est, panem & vinum, quæ erant corporis & sanguinis Christi figuræ legales, verbis suis fecisse corpus suum verum, & verum item sanguinem. Quia ergo figura verum corpus significat, verum corpus & verum sanguinem suum in Eucharistia fecit, quorum panis & vini in veteri lege figuræ erant. Quod confirmat argumento ex vino petito in hunc modum. Verus sanguis non est nisi veræ carnis, figura verò non est nisi ejus rei, cujus est veritas. Sed Christus in Eucharistia



ristia vinum , quod figura erat sanguinis sui , fecit sanguinem suum : ergo cum Christi verus sit sanguis , vera & caro est. Unde ex hoc loco invictè astruitur Catholica sententia ; manifestè enim loquitur Tertullianus de pane qui erat in veteri lege figura corporis sui , quam fecit corpus suum , ut veritas figuræ succederet. Subdit enim : *Figura autem non fuisset* ( utique in veteri lege , si enim de pane Eucharistico loqueretur , diceret , figura non esset ) *nisi veritatis esset corpus.* Eodem sensu lib. 5. dixit idem Tertullianus : *Panis & calicis sacramento jam in Evangelio probavimus corporis & sanguinis Domini veritatem adversus phantasma Marcionis.* Id est probavimus veritatem carnis Christi ex eo , quod in sacramento panem , qui erat figura corporis sui , corpus suum fecit , & vinum similiter sanguinem suum. Verum ergo corpus Christus habet , -cujus panis olim figura erat , cui in novo Testamento veritas successit. Unde panem corpus suum appellavit , ut significaret panem fuisse figuram corporis sui : quem panem corpus suum fecit , quia illum in corpus suum convertit. Figuræ verò corporis sui nomen pani dedit , ut ratum haberet id quod in veteri Testamento habetur , scilicet panem esse figuram corporis sui. Ex quibus omnia Auber-  
tini Calvinistæ sophismata absque negotio elides.

*S. Cyprianus , necnon Author libri de operibus Cardinalibus Christi.*

Orthodoxam nostram fidem perspicuè , & juxta eleganter exposuit tertio sæculo florens S. Martyr Cyprianus epist. 54. *Viventibus* , inquit , *communicatio à nobis danda est* , ut quos excitamus & hortamur ad prælium , non inermes , & nudos relinquamus , sed protectione sanguinis & corporis Christi muniamus : & cum ad id fiat Eucharistia , ut possit accipientibus esse tutela , quos tutos esse contra adversarium volumus , munimento Dominica saturitatis armemus. Nam quomodo docemus , aut provocamus eos in confessione nominis sanguinem suum fundere , si ei militaturis Christi sanguinem denegamus. Cui affine est quod habet epist. 56. *Considerantes idcirco se quotidie calicem sanguinis Christi bibere* , ut possint & ipsi propter Christum sanguinem fundere. Quæ verba ponderatione non egent.

Et sermone de lapsis : *Alius* , inquit , qui & ipse maculatus , sacrificio à Sacerdote celebrato partem cum ceteris ausus est latenter accipere. Sanctum Domini edere & contrectare non potuit. Cinerem ferre se apertis manibus invenit. Documento unius ostensum , Dominum recedere cum negatur , nec immerentibus ad salutem prodesse quod sumitur , quando gratia salutaris in cinerem sanctitate fugiente mutetur. Ubi & Eucharistiam Sacrificium apertè appellat , & Christum utique præsentem ab illo indigno miraculosè recessisse testatur.

Traçtatu etiam de oratione Dominica : Sic  
 & panem nostrum vocamus, inquit, quia Christus  
 noster, qui ejus corpus contingimus, panis est. Hunc  
 autem panem dari nobis quotidie postulamus, ne  
 qui in Christo sumus, & Eucharistiam quotidie  
 ad cibum salutis accipimus, intercedente aliquo  
 graviore delicto, dum abstenti & non communi-  
 cantes à cœlesti pane prohibemur, à Christi cor-  
 pore separemur.

Nec obest quod idem Sanctus epist. 63. & 76.  
 ait, Dominum corpus suum panem vocare  
 & calicem Domini esse vinum. Nam idè pa-  
 nem corpus suum Christus appellavit & vinum  
 sanguinem, quia sic appellando panem in cor-  
 pus, vinum in sanguinem convertit. Verbo  
 enim omnipotenti, operatorio, & efficaci dixit  
 & facta sunt, efficitque ut quod erat naturâ  
 panis & vinum, consecratione panis & vinum  
 esse desinat, evadatque caro & sanguis Salvato-  
 ris. Non obest etiam, quod eadem epist. 63.  
 hæc dicat : *Nec potest videri sanguis ejus, quo  
 redempti sumus & vivificati, esse in calice, quan-  
 do vinum desit calici, quo Christi sanguis osten-  
 ditur.* Non obest, inquam; ibi enim de mate-  
 ria hujus sacramenti agit duntaxat Cyprianus,  
 quam non aquam, sed vinum esse ait, ad indi-  
 candum sanguinem Christi sub eo latentem  
 convenienter institutum.

Non debet etiam contemni testimonium  
 authoris operum Cardinalium Christi, inter  
 opera Cypriani. Tum quia authorem illum  
 ab ipso Cypriano non distinguunt Paschasius &  
 Sixtus Senensis, nec dissentit ex hæreticis Cal-  
 vius, & Petrus Martyr. Quia nimirum vo-  
 ces, phrascs, & schemata operi illi interjecta

Cypriani stylo consentanea esse putant. Tum quia authorem saltem antiquum & gravem esse constat, cum Novatianos acriter impugnet: unde vel Cypriano & Cornelio coætaneum fuisse censet Pamelius, ut ex præfatione satis colligitur. Et quanvis aliqui posteriorem Augustino censeant, quia non solum nomen consubstantialis adhibet, sed etiam quia de peccato originali clarissime loquitur, nec tamen ab Augustino adversum Pelagianos producit: attamen authorem esse antiquum patet, quia à Paschasio qui sæculo nono floruit, epistola ad Freudegardum sub nomine Cypriani laudatur. Sic autem habet Author ille *f. rm. 6.* qui est de cœna Domini: *Panis iste communis in carnem & sanguinem mutatus procurat vitam & incrementum corporibus. Panis iste, quem Dominus discipulis porrigebat, non effigie, sed naturâ mutatus, omnipotentis Verbi fit caro. Et sicut in persona Christi humanitas videbatur & latebat divinitas; ita sacramento visibili ineffabiliter divina se infundit essentia.* Quibus verbis nihil apertius:

### *S. Hilarius Pictaviensis.*

S. Hilarii quarto sæculo florentis verba *lib. 8. de Trinitate*, speculatione superiori retulimus, quibus disertè Catholicam sententiam tradit, eamque ad probandam adversum Arianos naturalem, quæ Patrem inter & Filium intercedit unitatem, supponit. Quibus hæc illius verba adde: *Verè cibo dominico Verbum carnem sumimus, naturamque carnis suæ sub sacramento nobis admiscuit. :: Hæc à nobis ideo commemorata sunt, quia voluntatis tantum unitate hæretici*



hæretici personas divinas unitas esse interpretantur, & ad id exemplo unitatis nostræ cum Deo utuntur : quasi nobis ad Filium voluntate tantum religionis unius, nulla per sacramentam carnis naturalis communionis proprietas indulgeatur.

His non tam verbis, quàm fulminibus opponunt hæretici aliquot Hilarii locos quàm futilissimè. Primò, inquit, quia *canone 30. in Matth.* tradit quod Christus *accepto calice, & fracto pane* pascha confecit; & quia Apostolos *vitis fructum* bibisse ait. Ergo non corpus & sanguineum, sed panem & vinum Christus porrexit. Deinde quia *in Psalm. 124.* Deum ait eodem instanti diversis esse in locis, *quia incorporeus est.* Ergo Christus, quia corporeus est, in diversis eodem momento altaribus esse non potest. Demùm *in Psalm. 137.* docet Christum post resurrectionem carnis suæ veritatem his verbis demonstrasse, *palpate & videte.* Ergo cum Christus in Eucharistia nec palpari possit, nec videri, ibi realiter non invenitur.

Sed has consequutiones detortas, & per vias raptas esse, quis non videt? In primis quod primum obijcitur, præsentia reali nihil obest, & si quid faceret locus ille ( nihil autem efficere jam patebit ) soli transubstantiationi adverteretur. Sed sæpè diximus, Eucharistiam panem & vinum à Catholicis catholicè dici. Tum quia panis & vinum huic præbent sacramento materiam; tum propter sensibiles panis & vini species remanentes. Secunda conjectura infirmior est; fatemur enim corpus Christi per suam naturam pluribus esse in locis min.

82 *Lib. XI. Pars II. Dissert. I. Cap. I.*

mè posse, idque naturaliter naturis incorporeis convenire: sed per miraculum corpus gloriosum, & conditionem quadantenus spiritalem assequutum pluribus non posse esse in locis, nunquam dixit Hilarius. Tertia etiam ratiuncula frigidissima est. Probavit quidem Christus veritatem corporis sui dum palpandum illud, contrectandum, videndumque præbuit: sed omne corpus actu palpari & videri oportere malè inde colligitur. Sicut ignis veritatem calor intensus demonstrat; ignem tamen Babylonicum non fuisse verum ignem, quia calorem Deus miraculo impedivit, asyllogistia est puerilis.

*S. Cyrillus Ierosolymitanus : Optatus Milevitanus : S. Basilus : S. Gregorius Theologus : S. Ephrem Syrus : S. Epiphanius.*

Luculenter Catholicam sententiam expressit S. Cyrillus Ierosolymitanus quarto sæculo florens Catechesi 4. mystagogica, his verbis: *Cum igitur Christus ipse sic affirmet, atque dicat de pano, Hoc est corpus meum; quis deinceps audeat dubitare? Ac eodem quoque confirmante ac dicente, Hic est sanguis meus; quis, inquam, dubitet ac dicat non esse illius sanguinem. Aquam aliquando mutavit in vinum, quod est sanguinis propinquum, in Cana Galilæe solâ voluntate; & non erit dignus cui credamus, quod vinum in sanguinem transmutasset? Quare cum omni certitudine corpus & sanguinem Christi sumamus: nam sub specie panis datur tibi corpus, & sub specie*

*Specie vini datur sanguis, ut sumpto corpore, & sanguine Christi, efficiaris ei comparticeps corporis & sanguinis. Sic Christophori erimus, hoc est Christum ferentes, cum ejus corpus & sanguinem in membra nostra receperimus. Quid verbis illis apertius, nervosius, significantius? Nihil planè, nisi fortè hæc ejusdem Cyrilli verba præcedentibus subnexa: Quamobrem non sic hæc attendas velim, tanquam sint nudus & simplex panis; nudum & simplex vinum; corpus enim sunt, & sanguis Christi. Nam etiamsi sensus illud tibi renuntiat, fides tamen te confirmet. Ne judices rem ex gustu: sed te citra ullam dubitationem fides certum reddat, quod sis dignus factus, qui corporis & sanguinis Christi particeps fieres. Confugiant ad sua umbrosorum troporum latibula Calviniani: oleum certè & operam perdent, & si quid in illis sinceritatis reliquum sit, fatebuntur nec in Aquinate, nec in Bellarmino, aliisque Catholicis scriptoribus, clariora verba inveniri, quibus suam sententiam significaverint.*

*Præclara etiam sunt, quæ tradit Catechesi 5. ubi ait subjiciendam esse manum, quæ tantum Regem susceptura est. Additque, ut post communionem corporis accedat Christianus & ad calicem sanguinis illius, non extendens manus, sed pronus adorationis in modum & venerationis, dicens Amen: ut sanctificetur eo sanguine, quem assumit. His luculentissimis testimoniis nihil habent quod respondeant Calvinistæ, nisi Catecheses mystagogicas falsò attribui Cyrillo, cum differant stylo à Catechesibus Illuminatorum, quarum Cyrillum fatentur esse authorem, cum aliqua ex illis referat Theodoretus dialo-*

84 *Lib. XI. Pars II. Dissert. I. Cap. I.*

go 2. & S. Damascenus *orat. 3. de imaginibus*.  
Verum cum Cyrillus postrema Catechesi Illuminatorum Mystagógicas Catecheses promittat, & unicujusque earum præmittat in antecessum argumenta, planum est, omnium Catecheseon eundem esse authorem. Nec mirum esse debet, distinctum esse utrarumque stylum, cum Catecheses Illuminatorum pro baptizandis; Catecheses Mystagógicas pro baptizatis elaborarit. Constat autem pro diversitate personarum, temporum, & argumentorum nunc fusiori, nunc strictiori sermone eisdem authoribus scribere solenne esse.

Subscribit Optatus Milevitanus, qui quarto etiam sæculo floruit. Nam *lib. 6. contra Parmenianum*, ubi reprehendit Donatistas, quod altaria frangerent, raderent, & removerent, (quorum furorem Reformati nostri initio sui Schismatis imitati sunt: ) In quibus, inquit, vota populi portata sunt, quod Deus omnipotens invocatus sit, quod postulatus descendit Spiritus Sanctus; unde à multis pignus vita aeterna, & tutela fidei, & spes resurrectionis accepta est. Quid enim est altare, nisi sedes corporis & sanguinis Christi? Quid vos offenderat Christus, cujus illic per certa momenta corpus & sanguis habitabat? :: Hoc tamen immane facinus geminatum est, dum fregisset etiam calicem Christi sanguinis portatorem. Unde eorum crimen Judæorum Christicidio par esse ait: Hoc modo Iudeos estis imitati; illi injecerunt manus Christo in cruce, à vobis percussus est in altari.

Idem docet S. Basilii *lib. 2. de baptis. q. 3.*  
*Quanta majus aliquid est templo secundum Dominum*



Domini vocem, & tantò gravius & terribilius in anima impuritate constitutum corpus Christi temerè contingere, quàm sit accedere ad arietes & tauros. :: Quod si in immunditia tantum constitutus, tam terribile iudicium habet, tantò magis qui cum in peccato sit, corpus Domini contingere audet, gravius sibi accersit iudicium. Et quæst. 289. Singulis certè diebus communicare & participare sancti corporis & sanguinis Christi, bonum & fructuosum est. Nec est quod opponant hæretici, Eucharistiam appellari à Basilio memoriale ejus, qui pro nobis mortuus est; vocari etiam antitypa; hæc enim quàm catholice dicta sint, infra exponemus. Hanc eandem fuisse mentem S. Gregorii Nazianzeni, ex historia S. Gorgonia, quam ipse refert, & ex ipso dum de adoratione Eucharistiæ agitur, referemus, clarissimum est. Ejus mentem assequutus est Elias Cretensis in commentario primæ illius orationis, ubi ait quod in sacra mensa proposita per ineffabilem quandam omnipotentis Dei vim & facultatem, in Christi corpus & sanguinem verè commutantur.

Eandem etiam fidem quarto sæculo attestatus est S. Ephrem Syrus lib. de natura Dei minime scrutanda, his verbis: Esto fidelis atque innocens; participa immaculatum corpus & sanguinem Domini tui fide plenissimâ, certus quod Agnum ipsum integrè comedas. Ignis immortalis sunt mysterium Christi; cave ea temerè scruteris, ne in ipsorum participatione comburaris. Abraham Patriarcha cœlestibus Angelis terrenos cibos apposuit, illique eos comederunt. Ingenè sanè miraculum est cernere spiritus; incorporeos in terra carniùm cibos manducantes; sed hoc profectò

*profecto omnem excedit admirationem, omnem mentem, omnemque sermonem, quod nobis fecit unigenitus Filius Christus Salvator noster. Ignem quippe & spiritum manducandum atque bibendum praestitit nobis carne vestiris, corpus videlicet suum, ac sanguinem. Scio haereticos adscritos tropos confugete, sed eadem facilitate tenebras in meridie solem infuscantes comminiscuntur. Neque omnem admirationem, omnem mentem, omnemque sermonem excederet miraculum Eucharistiae, nec prodigium Angelorum comedentium humanos cibos superaret, si figuram tantum Christi comedendam contineret. Subscribit etiam S. Epiphanius Episcopus Salaminis quarto saeculo florens; in Anco-rato enim, num. 97. sic ait: Ecclesia tranquillus pacis portus est, & suavitas quadam, necnon & praesentissimum illud abstergendo mereri potum, merum scilicet ac verum Christi sanguinem quotidie largiens.*

### *S. Gregorius Nyssenus.*

Constantem Catholicæ Religionis fidem nostram disertè etiam tradidit S. Gregorius Nyssenus saeculo quarto florens oratione sua catechetica, quam esse legitimum illius factum constat tum ex Photio in Bibliotheca, Codice 233. qui pro illo opere apologiam texiit: tum ex Theodoro dialogo 2. part. 3. & Leontio Maximo, qui plures ex ea Nysseni oratione textus referunt. Tum quia ab Euthymio part. 2. Pano-plia; titulo 21. sub nomine Gregorii Nysseni memoratur. Sic autem in illo opere, cap. 37. habet Nyssenus: *Quoniam homo est duplex, ut qui sit*

sic compositus & temperatus ex anima, & corpore, necesse est ut qui servantur, per utrumque attingant qui ducit ad vitam. Ergo anima quidem cum ipso temperata per fidem hinc salutis habet occasionem: nam unio cum vita vita habet societatem. Corpus autem alio modo venit ad participationem & temperationem ejus quod dat salutem. Quomodo enim qui venenum sumpserunt dolo & insidiis, alio medicamento extinguunt vim, quæ affert interitum? Oportet autem sicut exitiale, ita etiam salutare medicamentum admitti intra viscera, ut per illa distribuatur in universum corpus virtus ejus, quod fert odem. Ita cum id gustaverimus, quod nostram dissolvit naturam, rursus necesse est ut opus habeamus eo, quod cegit ac conciliat id quod erat dissolutum, ut cum intra nos fuerit hoc salutare medicamentum, veneni damnum quod corpori fuerat inditum, per contrariam repellat affectionem. Quid ergo est? Nihil aliud quam illud corpus, quod & morte ostensum fuit esse potentius, & nostra vita fuit initium. Quomodo enim parum fermenti, ut dicit Apostolus, sibi assimilat totam consersionem: ita corpus à Deo morte affectum, cum fuerit intra nostrum, totum ad se transmutat & transfert. Sed fieri non potest, ut sit aliquid aliter intra corpus, nisi per esum & potionem misceatur visceribus. Cum autem solum illud corpus, quo Deum suscepit homo hanc gratiam acceperit, oportet considerare quomodo fieri potuerit, ut unum illud corpus, quod tam multis fidelium millibus in universo orbe terrarum semper distribuitur, totum per partem sit in unoquoque, & ipsum in se totum maneat. Et infra: Recte ergo nunc quoque Dei verbo sanctifica.

*Etificatum panem in Dei Verbi corpus credo transmutari. : : Hæc autem dat virtute benedictionis in illud transelementata eorum quæ apparent natura.*

Ecce Calvinismum manifestissimè jugulatum. Elevent quantum voluerint hæretici, Nysseni auctoritatem Catholicis omnibus pervenerabilem; novos in illo Sancto Doctore fingentes quærant; addant Gregorium conjecturis egisse, & exercitationis gratia loquutum; denique ad desperatum troporum & præsentia virtutis asylum confugiant; non tamen ultrò sese ingerentem nitentissimorum verborum splendorem obscurabunt, nec fulminis ictum effugient, nec suæ impediunt nefandæ impietatis condemnationem.

### *S. Ambrosius.*

Quod si hæretici tantis laudatorum Patrum molibus non succumbant, tantis ponderibus non fatiscant, tantis malleis non conquassentur, tantis postremò fulminibus non conterantur, suavissimis fortassis Ambrosii quarto sæculo florentis mellibus concedent. Ille enim libro de initiandis, capite 9. sic scribit: *Quomodo tu mihi asseris quod Christi corpus accipiam? Et hoc nobis adhuc superest, ut probeamus, non hoc esse quod natura formavit, sed quod benedictio consecravit: majorem vim esse benedictionis quàm natura, quia benedictionibus etiam natura ipsa mutatur. Virgam tenebat Moyses, projecit eam, & facta est serpens. Rursum apprehendit caudam serpentis, & in virga naturam revertit. Vides igitur prophetica gratia*

*his*



his mutatam esse naturam & serpentis & virga. Et productis in medium variis conversionum & transmutationum divinitus effectarum exemplis, subdit: *Advertimus igitur majoris esse virtutis gratiam quàm naturam, & adhuc tamen Prophetica benedictionis numeramus gratiam. Quod si tantum valuit humana benedictio, ut naturam converteret, quid dicimus de ipsa consecratione divina, ubi verba ipsa Domini Salvatoris operantur? Nam sacramentum illud quod accipis, Christi sermone conficitur. :: In incarnationis exemplo astruamus mysterii veritatem. Nunquid natura usus præcessit, cum Dominus Iesus ex Maria nasceretur? Si ordinem querimus, viro mixta fœmina generare consuevit: liquet ergo quod præter naturæ ordinem Virgo generavit; & hoc quod conficimus corpus, ex Virgine est. Quid hic quaris natura ordinem in Christi corpore, cum præter naturam sit ipse Dominus Iesus partus ex Virgine? Vera utique caro Christi, qua crucifixa est, qua sepulta est: vera ergo illius carnis sacramentum est. Ipse clamat Dominus Iesus: Hoc est corpus meum. Ante benedictionem verberum cœlestium species vocatur; post consecrationem corpus Christi significatur. Ipse dicit sanguinem suum: ante consecrationem aliud dicitur, post consecrationem sanguis nuncupatur, & tu dicis panem. Hoc est, verum est.*

Verbis illis non solum sententiam Catholicam exposuit Ambrosius apertissimè, sed invictissimè illam hæreticorum sophismatis præfocatis confirmavit. Idem præstitit lib. 4. de Sacramentis, cap. 5. his verbis: *Antequam ergo consecretur, panis est: ubi autem verba Christi*  
*acces-*

acceſſerint , corpus eſt Chriſti. Et ante verba Chriſti calix eſt vini & aqua plenus : ubi verba Chriſti operata fuerint , ibi ſanguis efficitur , qui plebem redemit. Ergo videte quantis generibus potens eſt ſermo Chriſti univerſa convertere. Deinde Dominus Jeſus teſtificatur nobis , quod corpus ſuum accipiamus ac ſanguinem ; nunquid debemus de ejus fide ac teſtificatione dubitare ? Magnum quiddam & venerabile , quod manna Judæis pluit è cælo ; ſed intellige , quid eſt amplius , manna de cælo , an corpus Chriſti ? Corpus Chriſti utique , qui auctor eſt cæli. Quid clarius dici potuit , quàm illud , quod ante conſecrationem panis eſt , conſecratione fieri & eſſe corpus Chriſti , & vinum fieri ſanguinem , qui plebem redemit , & hanc conversionem eſſe miraculum omnipotentia Dei , & alio modo Euchariftiam eſſe corpus Chriſti , quàm manna , quæ tamen ſignum erat corporis Salvatoris ?

Sed & capite 4. antecedenti omne Calvinistarum effugium præcluſerat S. Ambroſius his verbis : Panis iſte panis eſt ante verba Sacramentorum ; ubi acceſſerit conſecratio , de pane fit caro Chriſti. : : : Quomodo poteſt qui panis eſt eſſe corpus Chriſti ? Conſecratione. Conſecratio igitur quibus verbis eſt , & cujus ſermonibus ? Domini Jeſu ; nam reliqua omnia quæ dicuntur , laudem Deo deferunt : Oratio præmittitur pro populo , pro Regibus , pro cæteris : ubi venit ut conficiatur venerabile Sacramentum , jam non ſuis ſermonibus Sacerdos , ſed utitur Chriſti ſermonibus. Ergo ſermo Chriſti hoc conficit Sacramentum. Quis ſermo Chriſti ? Nempe iſ , quæ facta ſunt omnia. Iuſſit Dominus , & factum eſt cælum.

cælum. Iussit Dominus, & facta est terra. Iussit Dominus, & facta sunt maria. Iussit Dominus, & omnis creatura generata est. Vides ergo quàm operatorius sit sermo Christi. Si ergo tanta vis est in sermone Domini Iesu, ut inciperent esse quæ non erant; quantò magis operatorius est, ut quæ erant, in aliud commutentur? Cælum non erat, mare non erat, terra non erat, sed audi dicentem: Ipse dixit, & facta sunt; ipse mandavit, & creata sunt. Ergo tibi ut respondeam, non erat corpus Christi ante consecrationem, sed post consecrationem dico tibi, quod jam corpus est Christi. Observa, de pane fit Christi caro sermonibus Christi, qui sermo est is, quo facta sunt omnia. Verbis illis quid luculentius, & unà efficacius?

His oppressa testimoniis hæresis in omne latūs se vertit. Aubertinus, Faucherus, Blondellus, Rivetus contendunt, Magnum Ambrosium non esse operis de Sacramentis adeo suis hæresibus adversi authorem. Non redolent, inquiunt, elegantem Ambrosii stylum phrasēs multæ in opere illo obviæ, humiles, rudes, & ferè barbaræ. Sed non adverterunt hæretici quod observat Augustinus lib. 4. de doctrina Christiana, cap. 21. Ambrosium submisso dicendi genere tum esse usum, cùm de Fidei dogmatibus ageret, quæ non ornamenta verborum, sed rerum documenta desiderant. Quem etiam stylum cernere est in sermonibus Ambrosii, unde nihil mirum, si in libris de Sacramentis, quos pro concionibus ad populum habuit, solitam orationis sublimitatem deprimat vir Apostolicus omnibus omnia factus, sapientibus & insipientibus debitor. Varias etiam operis

operis illius propositiones morosissime vellicat Aubertinus, à quibus nisi fallor, censuris & contempnitionibus abstinuisset, nisi ignorasset sententias illas in aliis Ambrosii constantissimis operibus, cæterorumque Patrum lucubrationibus extare, ut si per otium vacaret, facillimum esset demonstratu. Quod verò addit Aubertinus, falsa nonnulla eo in opere venditari, ut cùm meminit ritus lotionis pedum baptizandorum, qui vix in usu fuit tempore Ambrosii: cùm asserit, Christum non dixisse, *Et ne nos inducas in tentationem*; sed, *Ne patiaris nos induci in tentationem*, manifestè refellitur primum quidem ex Augustino *epist. 118. & 119.* ubi ritus illius mentionem facit; secundum etiam ex eodem Augustino *lib. de deno peeseverant. cap. 6.* confutatur: *Quod itaque, inquit, dicimus Deo, ne nos inferas in tentationem, quid dicimus, nisi ne nos inferri sinas? Unde sic orant nonnulli, & legitur in codicibus pluribus, & hoc sic posuit B. Cyprianus, ne patiaris nos induci in tentationem.* Ex quibus patet ita legere potuisse Ambrosium secundum fidem plurium codicum, & morem multorum eo tempore sic orantium. Non est etiam validius quod aiunt, ridiculam esse allatam ab illius operis auctore rationem, quàm *lib. 6. cap. 4.* probat secretò nos, & non cum vociferatione orare oportere. *Qui ergo clamat, inquit, putat quod aliter Deus non posset, nisi clamantem audire.* Sed ridiculus est planè cavillus; eandem enim rationem adhibet idem Ambrosius in operibus indubitatis: *Cubiculum tuum*, inquit *lib. 1. de Abel & Cain, cap. 9. mentis arcanum, animique secretum; nam is hoc cubiculum tuum intra.*

Hoc



Hoc est egredere de corporis tui exteriori vestibulo, & totus intra in alta præcordia cordis tui, & claudes ostium tuum. Quid sit ostium tuum, discere. ::: Clament operæ tuæ, clament fides, clament affectus, clament passiones tuæ, clament sanguis tuus: audit enim in occultis, qui mundat in occultis. Non nisi loquentem audire non possumus; apud Deum loquuntur non verba, sed cogitationes. Quibus nihil similius iis quæ habet objecto illo cap. 4. Qui ergo clamat, putat quod aliter Deus non possit nisi clamantem audire: & qui cum clamore rogat eum, ejus derogat potestati: qui autem in silentio orat, fidem profert.

Ex his speciminibus liquere puto, vanas esse hæreticorum conjecturas, quibus permoti libros de Sacramentis sibi tantoperè invisos è carologo operum Ambrosii expungunt. Quare cum omnes editiones, & codices manuscripti, & omnes ab octo & amplius sæculis Scriptores libros illos Ambrosio asserant, non est à communi consensione propter levissimas hæreticorum suspiciones recedendum.

Dices: Ambrosius loco à nobis memorato comparat mutationem quæ fit in Eucharistia per consecrationem, ei mutationi quæ in homine per baptismum contingit, dum verus homo in novam mutatur creaturam: atqui in baptismo non contingit mutatio substantialis; ergo nec in Eucharistia. Item *lib. 6. cap. 1.* ait: *In similitudinem quidem accipis sacramentum, sed vera natura gratiam virtutemque consequeris.* Si autem in similitudinem, ergo non propriè & substantialiter. Et *lib. 4. cap. 5.* sic habet: *Dicit Sacerdos, Fac nobis hanc oblationem*

*nem ascriptam, rationabilem, acceptabilem; quod est figura corporis & sanguinis Domini.*

Respondeo Ambrosium non solum exemplo mutationis veteris in novum hominem, sed etiam multarum physicarum conversionum transubstantiationem panis in corpus Christi, quæ operatorio Christi verbo in Eucharistia fit, illustrare & confirmare. Adde etiam, exemplum illud non esse ad realem Christi in Eucharistia præsentiam stabiliendam impertinens. Sicut enim in baptismo, dum vetus in novam creatura mutatur, vera & realis gratia destruens peccatum, & beatissima virtutum copia infunditur, ut spiritalis homo generetur: ita in Eucharistia verum Christi corpus, verusque sanguis accedentibus porrigitur, ita ut Christi caro succedat substantiæ panis, sicut in baptismo sufficitur gratia peccato.

Secunda objectio magis nobis favet, quàm obsit, si inspiciatur integer Ambrosii textus; sic enim habet: *Vera ejus caro est, sicut ipse dixit, quam accipimus: verus ejus sanguis est, quem potamus. Quomodo vera caro? Quomodo verus sanguis? Qui similitudinem video, non video sanguinis veritatem. Ne igitur plures hoc dicerent, veluti quidam esset horror cruoris, sed maneret gratia redemptionis; idè in similitudinem quidem accipis Sacramentum, sed vera natura gratiam, virtutemque consequeris. Quibus verbis apertissimè significat veram nobis Christi carnem, verumque sanguinem porrigi, sed pani & vini speciebus involvi, ne sumentibus Christi cruor esset horrori. Et idè similitudines in Sacramento visibiliter accipimus,*  
veræ

veræ tamen Christi naturæ beneficio & virtute reficimur.

Tertia quoque instantia nihilo validior est; fatentur enim Catholici, species panis & vini esse figuram corporis & sanguinis Christi: fatentur etiam, panem & vinum in altari apposita, oratione Sacerdotis accedente fieri signa carnis & sanguinis Redemptoris; sed hæc signa orat Sacerdos ut consecratione in verum Christi corpus, verumque sanguinem convertantur.

### *S. Ioannes Chrysostomus.*

Si aureum Chrysostomi os cæteris Patribus facundiâ antecellit, seipsum in exponenda Catholica de Eucharistia assertionem superare visum est. Sic autem sanctus ille Pater quarto & quinto sæculo florens habet hom. 51. in Matthæum: *Non vestis solum, sed corpus ipsius nobis propositum est: non ut tangamus solummodo, sed ut comedamus & saturemur. Qui enim majus, id est seipsum pro te posuit, quare dedignabitur suum tibi tradere corpus? ... Carnes suas nobis tradidit, seipsum immolatum proposuit: quam igitur satisfactionem offeremus, qui tali pabulo nutriti talia peccemus? Et hom. 83. Quoniam ergo ille dixit, Hoc est corpus meum, nulla teneamur ambiguitate, sed credamus, & oculis intellectus id perspiciamus. :: Si tu incorporeus esses, nudè ipsa dona incorporea tradidisset tibi; quoniam verò corpori conjuncta est anima tua, insensibilia intelligenda tibi traduntur. Quomodo dicunt, vellem formam & speciem ejus, vellem vestimenta ipsa, vellem coloramenta*  
*videre*

videre. Ipsum igitur vides, ipsum tangis, ipsum comedis. Vestimenta ejus desideras videre, ipse verò seipsum tibi tradit, non ut videas solùm ipsum, verùm etiam ut tangas, & in te habeas. :: Veniat in mentem tibi quo sis honore honoratus, qua mensa fruaris: ea namque res nos alimur, quam Angeli videntes tremunt, nec absque pavore, propter fulgorem qui inde resilit, aspicere possunt. :: Quis loquetur potentias Domini, auditas faciet omnes laudes ejus? Quis pastor oves proprio pascit cruore. Et quid dico Pastor? Multa matres post partum aliis nutricibus infantes dederunt, quod ipse facere non voluit, sed proprio corpore nos alit, sed & sibi conjungit, atque adglutinat. Ibidem etiam ait: Neque illi satis fuit hominem fieri, colaphis cadi, & crucifigi; verùm & semetipsum nobis commiscet, & non fide tantum, verùm & ipsa re suum efficit corpus.

Et hom. 45. in Joan. Ut autem non solùm per dilectionem, sed reipsa in illam carnem convertamur, per cibum id efficitur, quem nobis largitus est. Cum enim suum in nos amorem vellet indicare, per corpus suum se nobis commiscuit, & in unum nobiscum redegit, ut corpus suum cum capite uniretur; hoc enim amantium maximè est. Hoc Job indicavit de servis, à quibus maximè amabatur, qui suum amorem pra se ferentes dicebant, quis daret nobis ut ejus carnibus impleremur? Quod Christus fecit ut majori nos charitate astringeret, & ut suum in nos ostenderet desiderium, non se tantùm videri permittens desiderantibus, sed ut tangi, & manducari, & dentes carni suae insigi, & desiderio sui omnes impleri. :: Parentes saepe numero liberos



liberos suos alius alendos dederunt: ego autem mea carne alo.

Et hom. 24. in 1. ad Corint. Id quod est in calice est id quod fluxit è latere, & illius sumus participes.::: Quamobrem si sanguinem cupis, non aram idolorum brutorum cade, sed meum ad altare meo cruentum sanguine. Quid est hoc horribilius? Quid autem amabilius quaeso dic? Hoc faciunt etiam qui amant. Cum viderint eos quos amant aliena concupiscere, & propria despiciere, sua dantes persuadent ut abstineant ab iis quæ sunt illorum: sed qui amant quidem, in possessionibus, pecuniis, & vestibis suam ostendunt liberalitatem & magnificentiam, in sanguine autem nullus unquam. Christus autem etiam in eo suam nobis ostendit curam, & ardentem in nos charitatem. Et in veteri quidem, quoniam affecti erant imperfectius, quem idolis offerebant sanguinem, eum ipse sustinuit suscipere, ut ab illis abduceret, quod ipsum quoque erat amoris ineffabilis. Hic autem in eo quod est longè horribilius & magnificentius sacram constituit operationem, ut qui & ipsum mutarit sacrificium, & pro cade brutorum seipsum iussit offerri.::: Hoc corpus etiam jacens in præsepi reveriti sunt Magi, & cum multo metu & tremore adorarunt. Tu autem non in præsepi vide, sed in altari; non fœminam eum tenentem, sed Sacerdotem astantem.::: Hic enim terram tibi cælum facit hoc mysterium. Et hom. 27. Hac facis Christi mensa exceptus illo die, quo dignus es habitus, qui ejus carnes linguâ tangeres. Quicumque sis ergo ne hæc fiant, manum tuam expurga, & castiga linguam tuam & labia, qua ingressi Christi fuerunt vestibula.

Exscribendæ essent integræ Chrysostomi homiliæ; tanta enim luce, tantaque copia ubivis Catholicæ nostræ assertionis veritatem inculcat & illustrat, ut quas tanto splendori effugiorum nebulas Calviniani offundant, non habeant.

*S. Hieronymus.*

Orthodoxam etiam nostram fidem luculenter quarto & quinto sæculo significavit Hieronymus epist. 1. ad Heliodorum: *Absit ut de iis quidquam sinistrum loquar, qui Apostolico gradui succedentes, Christi corpus sacro ore conficiunt.* Et epist. 85. ad Evagrium: *Quis patrator mensurum & viduarum minister, ut supra eos se tumidus efferat, ad quorum preces Christi corpus sanguisque conficitur?* Et epist. 128. ad Fabiolam, Episcopum vocat *sequestrem Dei & hominum, & carnes Agni sacro ore conficientem.* Et in Psalm. 145. *Qui dicit, inquit, panem nostrum quotidianum, & utique esuriens loquitur, dat escam esurientibus. Putat aliquis quod panem cœlestem de mysteriis dicat. Et hoc quidem accipimus, quia vera caro Christi est.*

Nec est quod nobis opponant hæretici, quod de quibusdam virginibus intemperantibus epist. 22. ad Eustochium scribit Hieronymus his verbis: *Vbi se mero ingurgitaverint, ebrietati sacrilegium copulantes, absit ut ego me Christi sanguine abstineam. Et si quam viderint pallentem atque tristem, miseram monacham atque Manichæam vocant.* Non est, inquam, quod id opponant; fatuarum enim virginum sacra mysteria inter pocula irridentium impie-

tas sacrilegii à Hieronymo damnata impiè nobis objicitur, nec officit veritati tantæ iniquitatis testimonium.

Nec dicas etiam S. Hieronymum lib. 2. contra Jovinianum asserere Christum *in typum sanguinis sui non obtulisse aquam, sed vinum*. Et in cap. 26. Matth. addere: *ut quomodo in præfiguratione ejus Melchisedech summi Dei Sacerdos panem & vinum offerens fuerat, ipse quoque veritatem sui corporis & sanguinis repræsenteret*. Non, inquam, id dicas; priori enim loco de vino consecrando, qui est materia Eucharistiæ, & non aqua, manifestè loquitur Hieronymus. Quomodo etiam vinum consecratum typus & figura Christi catholicè dici possit, infra elucidabitur. Ex quo posterius solum manet. Addi tamen potest, quod sicut inter referenda Tertulliani testimonia diximus, verbum *repræsenteret* idem non significat ac figurare, sed idem sonat ac præsentem veram Christi carnem efficere.

### S. Augustinus.

Calvinus lib. 4. instit. cap. 17. §. 28. insolenter asseverat sine controversia Augustinum totum esse suum. Eodem modo, authore Guitmundo lib. 2. gloriabatur Berengarius. Ut ergo à tanto Patre quarto & quinto sæculo florente tantam defendamus injuriam, & Calvinistarum calumnias clarissimè revincamus, placet selecta S. Patris proferre testimonia, quibus Catholicam fidem luculenter expressit. In primis lib. 9. Confess. cap. 3. de matre sua S. Monica loquens ait: *Memoriam sui ad altare tuum fieri*

*desideravit, unde sciret dispensari victimam sanctam, qua deletum est chirographum quod erat contrarium nobis, qua triumphatus est hostis; ad cuius pretii nostri sacramentum ligavit ancilla tua animam suam vinculo fidei.* Quibus verbis multiplex Calvinianorum error conteritur; nam & orationes & sacrificium altaris pro mortuis offerri, & ibi victimam pro peccatis nostris semel mactatam, Christum videlicet jugiter immolari astruxit. Vocat verò Eucharistiam Sacramentum pretii nostri, & quia sacramentum est pretium redemptionis nostræ continens, & quia est memoriale mortis Christi, quæ pretium est redemptionis humanæ.

Idem colligitur ex epistola 43. ubi Maxima Madorensis à B. Augustino quærit, quis est iste Deus quem vobis Christiani quasi proprium vindicatis, & in locis abditis præsentem vos videre componitis? Cui per sequentem epistolam 44. respondens S. Pater, non negat rem ita se habere, nihilque scribit quo existimationem illam Maximæ removeat; quod tamen non omisisset, nisi verum esset Christianos Christum in locis abditis præsentem adorare, & quasi proprium sibi vindicare. Idem etiam habetur ex epistola 86. ubi de quodam Romano sic scribit: *Dicit cessisse pani pectus, tanquam nesciens & tunc in Domini mensa panem propositionis poni solere, & nunc se de immaculati Agni corpore partem sumere. Dicit cessisse poculo sanguinem, non cogitans etiam nunc accipere in poculo sanguinem.* Ubi clarè docet & Agnum immaculatum nos comedere, & sanguinem ejus in poculo bibere. Nec obstat vox illa *partem*. Nam  
pars



pars dicitur de corpore Christi in Eucharistia accepto, non quòd accipiatur pars corporis, sed quia distribuitur portio specierum panis & vini continentium corpus Christi. Idem docet epist. 118. cap. 6. *Placuit, inquit, Spiritui Sancto, ut in honorem tanti sacramenti in os Christiani prius Dominicum corpus intraret, quàm ceteri cibi.*

Et lib. 3. de Trinit. cap. 10. *Illas etiam nubes & ignem, inquit, quomodo fecerint vel assumpserint Angeli ad significandum quod annuntiabant, etiamsi Dominus vel Spiritus sanctus illis corporalibus formis ostendebatur, quis novit hominum? Sicut infantes non noverunt quod in altari ponitur, & peracta pietatis celebratione consumitur, unde vel quomodo conficiatur, unde in usum religionis assumatur, etsi nunquam discant experimento suo vel aliorum, & nunquam speciem illam rerum videant nisi inter celebrationes sacramentorum, cum offertur & datur, dicaturque illis autoritate gravissima, cujus corpus & sanguis sit; nihil aliud credent nisi omnino in illa specie Dominum oculis apparuisse mortaliū, & de latere tali percusso liquorem illum omnino fluxisse. Ubi fidem Ecclesiæ Catholicæ egregiè expressit, & Christum aliena specie occultatum nobis exhiberi declaravit, non secus ac Angeli sub specie nubium realiter apparebant, tametsi ipsi non viderentur.*

Et lib. quæst. in Levit. q. 57. sic habet: *Cum Dominus dicat, nisi manducaveritis carnem meam, & biberitis meum sanguinem, non habebitis vitam in vobis, quid sibi vult quod à sanguine sacrificiorum qua pro peccatis offerebantur, tantoperè populus prohibetur, si illis sacrificiis*

unum hoc sacrificium significabatur, in quo veræ sit remissio peccatorum; à cuius tamen sacrificiî sanguine in alimentum sumendo non solum nemo prohibetur, sed ad bibendum potius omnes exhortantur qui volunt habere vitam? Ubi Sanctus Pater sanguinem animalium cum sanguine Christi utique verò & non figurato, ut antithesis sit ad propositum, confert.

Et lib. 17. de Civit. cap. 20. expendens verba illa Ecclesiastis, Non est bonum homini nisi quia manducabit & bibit, sic habet: Credibilius dicere intelligitur, quia quod ad participationem mensæ huius pertinet, quam Sacerdos ipse mediator Testamenti novi exhibet secundum ordinem Melchisedech de corpore & sanguine suo. Id tamen sacrificium successit omnibus sacrificiis veteris Testamenti, quæ immolabantur in umbra futuri. Propter quod etiam vocem illam in Psalmo 38. ejusdem mediatoris per prophetiam loquentis agnoscimus: Sacrificium & oblationem noluisti, corpus autem perfecisti mihi; Quia pro illis omnibus sacrificiis & oblationibus corpus ejus offertur, & participantibus ministratur. Ubi clarissimè docet corpus illud in Eucharistia in sacrificium offerri, & participantibus ministrari, de quo scriptum est, corpus autem perfecisti mihi, quod utique de vero & naturali Christi corpore intelligitur.

Et libro contra Adversarium legis, capite 9: Mediatorem Dei & hominum hominem Christum Iesum carnem suam nobis manducandam, bibendumque sanguinem dantem fideli corde atque ore suscipimus: quanvis horribilius videatur humanam carnem manducare quàm perimere, & humanum sanguinem potare quàm fundere.

Ubi

Ubi Doctor Sanctissimus Christi carnem non solum corde, sed ore etiam manducari clarissime tradit: cumque compareret manducationem occisioni reali, de manducatione etiam reali, & orali manifestè loquitur, quæ etiam sola horrorem ingenerare videtur.

Libris etiam contra Faustum Catholicam assertionem non obscure expressit. Nam *lib. 12. cap. 10.* sic scribit: *Habet magnam vocem Christi sanguis in terra, cum eo accepto ab omnibus gentibus respondetur Amen. Hæc est clara vox sanguinis, quam sanguis ipse exprimit ex ore fidelium eodem sanguine redemptorum. Ubi eundem sanguinem ore fidelium suscipi docet, quo fideles redempti sunt. Et lib. 20. cap. 18. Hebrei in victimis pecorum quas Deo offerebant, multis & variis modis, sicut tanta re dignum erat, prophetiam celebrabant futura victimæ, quam in cruce Christus obtulit. Unde jam Christiani peracti hujus sacrificii memoriam celebrant sacrosancta oblatione & participatione corporis & sanguinis Domini. Quæ verba ponderatione non egent.*

Non minus perspicuè eandem veritatem in expositione Psalmorum Augustinus exposuit. Etenim concione 1. in Psalm. 33. ubi inter explicandum illud quod habetur *1. Reg. 21. vers. 13.* quod David juxta lectionem Septuaginta seipsum manibus suis portabat, quærit quomodo seipsum David manibus suis portare potuerit: *Hoc verò Fratres, inquit, quomodo fieri potuerit in homine quis intelligat? Quis enim portatur in manibus suis? Manibus aliorum potest portari homo, manibus suis nemo portatur. Quomodo intelligatur in ipso David secundum litteram,*

*non invenimus: in Christo autem invenimus; ferebatur enim Christus in manibus suis, quando commendans ipsum corpus suum ait: Hoc est corpus meum; ferebatur enim illud corpus in manibus suis. Ubi manifestè præsentiam realem corporis Christi in Eucharistia Augustinus stabilivit; ait enim Christum secundum litteram corpus suum portasse in manibus suis, eo modo quo nullus hominum corpus suum portare potest. Patet verò hominem signum & figuram corporis sui in manibus suis portare posse: ergo modus ille Christo eximius, cæteris verò impossibilis est, quod proprium corpus realiter & substantialiter in divinæ institutione Eucharistiæ portarit manibus suis. Nec obest quod concione sequenti dicat: Quodammodo ferebatur in manibus suis. Quia cum commendaret ipsum corpus, & sanguinem suum, accepit in manus suas, quod norunt fideles, & ipse se portabat quodammodo cum diceret, hoc est corpus meum. Non obest, inquam; vox enim illa quodammodo, non negat veritatem corporis Christi in Eucharistia, sed declarat Christum esse in Eucharistia certo quodam modo sensibus impervio, & solis fidelibus noto.*

*Idem tradit in Psalm. 39. his verbis: Sacrificia illa tanquam verba promissiva sunt ablata; quid est quod datum est completivum? Corpus quod nollis, quod non omnes nollis, quod utinam qui nollis omnes non ad iudicium novetis.*

*Idem docet tract. 47. in Joan. Mensa potentis, inquit, quæ sit nollis, ubi est corpus & sanguis Christi. Et tract. 84. Quæ est mensa potentis, nisi unde sumitur corpus & sanguis ejus,*



*ejus , qui animam suam posuit pro nobis ?*

Et serm. 2. de verbis Apostoli : *Audivimus*, inquit, *veracem Magistrum, divinum Redemptorem, humanum Salvatorem, commendantem nobis pretium nostrum sanguinem suum : loquutus est enim nobis de corpore suo, quando corpus dicit escam, sanguinem potum. Sacramentum fidelium cognoscunt fideles. Denique apud Paschasium, Lanfrancum, & Ivonem illud Augustini ex sermone ad Neophytos refertur : Hoc accipite in pane quod pependit in cruce : hoc accipite in calice quod fluxit è latere.*

Dices : Augustinus contra Adimantum Manichæum cap. 10. sic fatur : *Non enim dubitavit Dominus dicere, Hoc est corpus meum, cum signum daret corporis sui. Et in Psalm. 3. Iudam adhibuit ad convivium, in quo corporis & sanguinis sui figuram discipulis commendavit & tradidit.*

Respondeo priori loco Augustinum loqui ad hominem, ut dicunt, seu ex mente Manichæorum quibuscum disputabat, putantium Eucharistiam non consecratione, sed natura sua esse signum corporis Christi apparentis, quod secundum speciem carnis simulatam in cruce passum fuerat, ut patet ex Augustino lib. de hæresibus, hæres. 36. Præter illum autem Christum in phantasmate sub Pontio Pilato crucifixum, duplicem adhuc Christum delirantes Manichæi fingebant, ut constat ex eodem Augustino lib. 20. contra Faustum, cap. 11. alium quem terræ concipiens patibilem gignit, omni non solum suspensum ex ligno, sed etiam jacentem in herba-

ba : *Vobis autem*, inquit, *per fabulam vestram in escis omnibus Christus ligatus apponitur.* Et lib. de fide contra Manichæos, cap. 34. *Dicitis magno errore, sed tamen dicitis, Christum quotidie nasci, quotidie pati, quotidie mori. Nunquid fortè in iis qui credunt, & pro nomine ipsius tribulationes mortemque patiuntur? Non, inquiunt, sed in cucurbitis, & in porris, & in portulaca, & in ceteris hujusmodi rebus. Magna ridicula, magna cecitas: superiùs passionibus demonum, hic passionibus olerum homines liberantur à peccatis.* Alium verò Christum impassibilem admittebant, per solem lunamque distinctum, ut ait idem Augustinus. Porro corpus Christi patibilis (quod erat quilibet fructus, & olus, ac proinde panis) secundum Manichæos erat tantum signum corporis phantastici, in quo impassibilis Christus simulatè passus & mortuus est. Etenim panis non fiebat consecratione corpus Christi patibilis, cum esset corpus Christi patibilis naturâ suâ: non fiebat etiam verum Christi impassibilis corpus, alioquin Christus impassibilis in pane passibilis evasisset; nam in ejusmodi escis Christus secundum Manichæos quotidie patiebatur, quotidie moriebatur. Unde juxta Manichæos panis erat tantum figura corporis phantastici Christi in cruce passi. Quare Augustinus juxta principia Manichæorum loquutus est cum dixit: *Non dubitavit Dominus dicere, Hoc est corpus meum, cum signum daret corporis sui.* Id est, non dubitavit Dominus dicere, hoc est corpus meum, cum illud daret quod secundum vos est tantum signum corporis sui. Loco enim illo contra

Adiman



Adimantum respondet hæretico illi vetus Testamentum calumnianti ex eo quod Deuteronomii 12. cavetur ne sanguis animalium comedatur, sanguis enim eorum pro anima est, nec debet comedi anima cum carnibus. Hoc autem testimonium impugnabat Adimantus, quia in novo Testamento Dominus dicit, non esse timendos eos qui occidunt corpus, animæ autem nocere non possunt; quæ duo, inquiebat, pugnantia sunt si anima sit sanguis, isti enim homines nocere possunt. Cui objectio- ni respondet Augustinus, primò in Deuteronomio sermonem esse de anima brutorum, in Evangelio de anima hominum: nullibi enim veteris Testamenti scriptum est animam humanam esse sanguinem. Secundò respondet illud præceptum in signo positum esse, hoc est sanguinem appellari animam, non quòd sit anima propriè, sed quia est signum animæ. In hujus autem responsionis confirmationem addit quòd Dominus non dubitavit dicere corpus suum, cum illud daret quod secundum vos, ò Manichæi, est tantum signum corporis sui: ergo sanguis qui est signum animæ, potuit anima appellari. Postquam verò ex Manichæis ipsis ostendit figuram nomine rei cujus est figura nuncupari, illud ipsum confirmat, quia in veteri lege omnia erant figuris plena, utiturque exemplo petra quæ Christus dicitur figurativè non solum ex adversariorum, sed ex propria etiam sententia.

Si instes, Augustinum lib. 20. contra Faust. capite 11. Manichæorum fabulas irridentem ita loqui: *Ore aperto expectatis quis inferat Christum tanquam optimam sepultura faucibus vestris.*

At illud non objecisset Augustinus si Christum in Eucharistia realiter manducari sensisset, facile enim idem in Augustinum Manichæi re-  
torfissent. Respondebo Augustinum non irri-  
sisse Manichæos, quòd sentirent Christum in  
Eucharistia realiter suscipi, sed quòd fabula-  
rentur omnes arbores crucem Christi esse, de  
eisque deponi Christum & in sepulchrum trans-  
ferri, cum fructus ex arbore decerpti in ore  
conduntur. Quare has nánias supra somnian-  
tium exerrationes absurdas meritò irridet Au-  
gustinus. Cæterùm Catholica de Eucharistia as-  
sertio, è Manichæorum commentis immensùm  
distat. Etenim Manichæi delirabant volentes  
omnes fructus terræ & herbas esse corpus na-  
turale Christi patibilis. Catholici credunt cor-  
pus Christi esse verum corpus humanum, &  
modo ineffabili sub speciebus duntaxat panis  
& vini realiter contineri. Manichæi somnia-  
bant poni Christum in Eucharistia nascendo:  
Catholici consecratione ibi tantùm poni cor-  
pus Christi consistitur. Manichæi fingebant  
corpus Christi in omnibus escis inclusum esse  
alimentum refectionis: Catholici contendunt  
esse sacramentum & vinculum religionis. Ma-  
nichæi corpus illud esse passibile comminisce-  
bantur: Catholici impassibile & gloriosum ado-  
rant. Manichæi putabant corpus illud come-  
stum deficere ad modum aliorum ciborum: Ca-  
tholici corpus Christi nunquam deficere cen-  
sent, sed desinentibus speciebus, ejus duntaxat  
præsentiam desinere affirmant.

Ad posteriorem Augustini locum è Psalmo  
tertio depromptum respondeo, velle ibi ad lit-  
teram S. Patrem, Eucharistiam esse figuram  
corpo,



corporis sui mystici, quod est Ecclesia. Intendit enim inibi probare Christum supra Davidem mitem pacem voluisse cum Juda proditore suo perpetuò retinere, quod ostendit quia & osculum pacis ab eo benignè accepit, & Eucharistiam figuram corporis sui, id est figuram & symbolum unitatis corporis Ecclesiæ ei porrexerit. Familiare namque erat Augustino, præsertim dum ad catechumenos & infideles convenientes loqueretur, de Eucharistia prout dicit habitudinem ad corpus mysticum quod est Ecclesia, sermonem habere; ne iis tantum mysterium propalaretur, qui parum erant ad illud intelligendum idonei. Quod patet etiam ex tract. 26. in Joan. Hunc itaque cibum & potum, inquit, societatem vult intelligi corporis & membrorum suorum, quod est Sancta Ecclesia in prædestinatis, & vocatis, & justificatis, & glorificatis Sanctis & fidelibus ejus. :: Hujus rei sacramentum, id est unitatis corporis & sanguinis Christi, alicubi quotidie, alicubi certis intervallis dierum in Dominica mensa preparatur. Et iterum: Exponens nobis Apostolus Paulus hunc panem: Unus panis, inquit, unum corpus multi sumus. O sacramentum pietatis! ô signum unitatis! ô vinculum charitatis! Qui vult vitam, habet ubi vivat, habet unde vivat: accedat, credat, incorporetur, ut vivificetur. Non abhorreat à compage membrorum, non sit putrum membrum quod refecari mereatur; non sit distortum, de quo erubescatur: sit pulchrum, sit appetitum, sit sanum: hæreat corpori, vivat Deo de Deo. Et rursum: Cum cibo & potu id appetant homines, ut neque esuriant, neque sitiant: hoc veraciter non præstat nisi iste cibus & potus, qui

eos, à quibus sumitur, immortales & incorruptibiles facit, idest societas ipsa Sanctorum, ubi pax erat, & unitas plena atque perfecta. Propterea quippe, sicut etiam ante nos hoc intellexerunt homines Dei, Dominus noster Iesus Christus corpus & sanguinem suum in eis rebus commendavit, qua ad unum aliquid rediguntur: ex multis namque granis unus panis efficitur, & ex multis racemis vinum confluit. Et sermone ad infantem: Sicut enim, inquit, ut sit species visibilis panis multa grana in unum consperguntur tanquam in pluvia, quod de fidelibus ait, facta erat illis anima & cor unum in Deum; sic & de vino fratres recolite unde sit vinum: grana multa pendunt ad botrum, sed liquor granorum in unitate confunditur. Ita Dominus noster Iesus Christus nos significavit, nos ad se pertinere voluit: mysterium pacis & unitatis nostra in sua mensa consecravit. Eucharistia ergo est figura corporis Christi mystici, quia est symbolum unitatis, signum pacis, vinculum charitatis fidelium.

*Alii Patres, Cyrillus Alexandrinus,  
Leo Magnus, Gregorius Magnus,  
Ioannes Damascenus.*

Nihil apertius & validius pro fidei Orthodoxæ defensione proferri potest, quàm quod habet Cyrillus Alexandrinus, qui 4. & 5. sæculo floruit, anathematismo undecimo, & libro quarto in Joannem: Priori enim loco confutatur calumniam Theodoretæ Cyrillo imponentis quod carnem unitam Verbo dixerit inanima:

inanimatam, quia dixerat Domini carnem vivificam Verbi propriam esse, ait se per carnem intelligere eam de qua Joannes ait, *Verbum caro factum est*, & de qua ipse Christus dixit: *Qui manducat meam carnem, & bibit meum sanguinem, in me manet, & ego in eo: Et panis quem ego dabo, caro mea est, quam ego dabo pro mundi vita.* Et subjungit: *Reprehende si videtur hac verba.* Carnem enim nominat solam, & nullam penitus in his anima intelligentis mentionem fecit. Atqui si sapiens & ingenio acuto fuisset, non ignorasset quod interdum sola carne animal ex anima & corpore constans, id est homo significatur. Ergo manifestè sensit Cyrill. Christum nobis carnem suam physicam, id est compositam ex corpore & anima porrigere, cum illam carnem loco illo Joannis dari velit, quam ipse unitam Verbo affirmavit. Si autem Eucharistia esset caro Christi figurativa tantum, non modò inefficax, sed ineptissima fuisset Cyrilli argumentatio. Sed longè apertius loco posteriori, cap. 2. exponens versum 51. Joannis Catholicæ Ecclesiæ fidem tradidit, & omnia Calvinistarum figurativa effugia præoccupavit his verbis: *Sape Salvator eundem sermonem Judæis inculcans variè propenit, modò quidem anigmate & obscuritate multà involutum, modò rejecta tunica nudum & apertum; ut nisi crediderint, condemnationem non effugiant, sed mali malè pereant, in suam ipsi perniciem gladium stringentes.* Nihil igitur occultans demum Christus ait: *Ego sum panis vivus qui de coelo descendit. Illud manna typus erat, inquit, & umbra, & imago. Audite palam nunc & apertè: Ego sum panis vivus. Si quis mandu-*

*caverit:*

caverit ex hoc pane vivet in aeternum. Qui ex illo manducaverunt, mortui sunt, non erat enim vivificus. Qui autem manducat hunc panem, id est me, sive carnem meam, vivet in aeternum. In illis ergo verbis Salvatoris assentientis Eucharistiam esse panem vivum & carnem Christi, nullus datur typis, umbris, & imagini locus, nisi quis in suam perniciem verbis velit Salvatoris abuti, & ut continuo addit, sermonibus pietatis obsurdescere. Nunquam sanè S. Thomas Aquinas, nunquam Per-ronius, nunquam Bellarminus apertius loquuti sunt.

Sed & Apostolicus Magni Leonis rugitus. omnes Calvinistarum confundit, opprimitque: argutias: Dicente Domino, inquit serm. 6. de jejunio 7. mensis, nisi manducaveritis, sic sacramenta communicare debetis, ut nihil prorsus de veritate corporis Christi & sanguinis ambigatis: hoc enim ore sumitur, quod fide creditur; & frustra ab illis Amen respondetur, à quibus contra id quod accipitur disputatur.

Succinit Magnus Gregorius homil. 14. in Evangelia: Bonus, inquit, Pastor animam suam posuit, ut in sacramento nostro corpus suum & sanguinem verteret, & omnes quos redemerat, carnis suae alimento satiaret. Et homil. 22. Quid namque sit sanguis Agni, non jam audiendo, sed bibendo didicistis. Qui sanguis supra utrumque postem ponitur, quando non solum ore corporis, sed etiam ore cordis hauritur.

Quæ fuerit etiam Magni Gregorii de Eucharistia mens, ex iis patet quæ in vita Gregorii



gorii Petrus Diaconus lib. 2. cap. 4. his verbis refert : *Matrona quadam Beato Gregorio per stationes publicas Missarum solennia celebranti solitas oblationes obtulerat. Cui post mysteria traditurus cum diceret, Corpus Domini nostri Jesu Christi conservet animam tuam, lasciva subrist. Ille continuo dexteram ab ejus ore convertens, partem illam Dominici corporis super altare deposuit. Expletis verb Missarum solenniis, matronam coram populo inquisivit, quamobrem corpus dominicum sumptura ridere præsumperit? At illa diu mussitans tandem prorupit : Quia panem, inquit, quem propriis manibus me fecisse cognoveram, tu corpus Dominicum perhibebas. Tunc Gregorius pro incredulitate mulieris cum tota plebe se in orationem prostravit : & post paululum surgens, particulam panis, quam super altare posuerat, carnem factam reperit : quam coram cunctis incredula matrone demonstrans, ad credulitatis gratiam tam illam revocare potuit, quam totum populum confirmare curavit. Rursus itaque in orationem cum eisdem prostratus, carnis frustum in panis primordia reformavit. Audiant Calvinistæ Missarum solennia ; audiant Eucharistiam esse corpus Domini nostri Jesu Christi ; videant in matrona suæ incredulitatis exemplum, & sequuti errantem sequantur pœnitentem.*

S. quoque Joannes Damascenus eandem veritatem nitentissimis verbis docuit & exposuit libro quarto, capite quatuordecimo, his verbis : *Quæsit Virgo, quomodo fiet mihi istud ? Respondit Gabriel Angelus : Spiritus Sanctus superveniet in te.*

Tu quoque nunc quæris, quomodo panis nunc fiat corpus Christi, & vinum aquâ mixtum fiat sanguis Christi? Tibi quoque respondeo, Spiritus Sanctus supervenit, eaque efficit quæ orationis facultatem, & mentis intelligentiam excedunt. ::: Quod si quæras quo pacto id fiat, satis tibi sit audire, quod per Spiritum Sanctum id fiat. Quemadmodum ex sancta Dei matre per Spiritum sanctum Dominus sibi ipsi carnem condidit: nec quicquam amplius nobis perspectum & exploratum est, quàm quod verbum Dei est verum, & efficax, atque omnipotens, ut ea efficiat quæ nulla ratio humana queat indagare. Quin ne hoc quoque alienum fuerit dicere, quod quemadmodum naturaliter panis per manducationem, & vinum & aqua in bibentis ac comedentis corpus & sanguinem immutantur: Sic panis & vinum, quæ proponuntur in altari, per sancti Spiritus invocationem & adventum mirabili modo in Christi corpus & sanguinem vertuntur.

Plura Patrum testimonia dum de cultu & usu Eucharistiæ differemus, inferiùs referemus, quæ realem Christi præsentiam omninò supponunt. Non enim adorandum esse hoc sacramentum Patres docerent, nisi Christum ibi adesse censuissent. Eximiam etiam quam ad communionem desiderant purgati animi compositionem uni Christi præsentia superstruunt, suo ut loco clarebit.

*Sacra Concilia eidem veritati  
suffragata sunt.*

Realem quoque corporis & sanguinis Christi in Eucharistia præsentiam sacra Concilia, ubi occasio tulit, perspicuè docuerunt. *In hac sacra mensa*, inquit Concilium Nicænum I. editionis Pisanæ, lib. 3. cap. de sacra mensa, *ne humiliter intenti simus ad præpositum panem & calicem; sed attolentes mentem fide, intelligamus situm in ista sacra mensa Agnum illum Dei tollentem peccata mundi, incruentè à Sacerdotibus immolatum; & pretiosum ejus corpus & sanguinem verè nos sumentes credamus hac esse nostra redemptionis symbola.* Ergo in Eucharistia Agnus immaculatus Christus verè à Sacerdotibus immolatur, verè à fidelibus recipitur.

*Ad mysticas benedictiones accedimus*, addit in epistola ad Nestorium à Concilio Ephesino probata Cyrillus Alexandrinus, *eaque ratione sanctificamur, utpote sacra carnis & pretiosi sanguinis Christi omnium nostri Salvatoris participes effecti. Neque enim illam ut carnem communem suscipimus, sed tanquam verè vivificant, ipsiusque Verbi propriam.* Quibus verbis nihil apertius.

*Nemo unquam Sanctorum Apostolorum* (verba sunt septimæ Synodi Generalis, seu Concilii Nicæni II. cujus supra meminimus) *qui tuba sunt Spiritus sancti, aut gloriosorum Patrum nostrorum incruentum nostrum sacrificium in memoriam Passionis Domini nostri Iesu Christi*

✠

116 *Lib. XI. Pars II. Dissert. I. Cap. I.*

*& totius sua dispensationis factum, imaginem corporis illius dixerit: Nam is qui accipit à Domino, sic non dicit aut confretur, sed audiunt sic dicentem evangelicè, Nisi comederitis carnem filii hominis. Integrum locum in fine referemus.*

Enatâ etiam Berengarii hæresi, accurrunt statim Sacra Concilia exortam hæresim proscriptura, Vercellense sub Leone IX. Turonense sub Victore I. Romanum sub Nicolao II. & aliud Romanum sub Gregorio VII. in quo utroque hæreticus Berengarius semel & iterum relapsus impietatem suam revocavit, uti fusiùs cap. sequenti referemus. Supervacaneum foret œcumenici Concilii Lateranensis sub Innocentio III. celebrati, Viennensis sub Clemente V. Constantiensis sub Martino V. Florentini sub Eugenio IV. Trident. *sess. 13. cap. 1.* manifestas definitiones referre, quas ultrò fatentur Calviniani sibi esse adversas, quanvis apud veros Christi Ecclesiæ filios unius Catholici Concilii autoritas omnibus Calvinistarum & cæterorum quorumvis hæreticorum opinionationibus præstet & immensum præponderet.

*Ponderantur Patrum autoritates, & objectiones occupantur.*

Ad majorem SS. Patrum intelligentiam & hujusce veritatis evidentiam notandum est, & diligenter retinendum, Patres difficultates sibi & objectiones adversus à se traditam de Eucharistia doctrinam militantes proposuisse, simul:



simulque confessos fuisse prædicatam à se veritatem justam esse difficultatum longè gravissimarum sponte nascentium originem. Talia contra Eucharistiæ fidem objecta legere est apud Hilarium *lib. 8. de Trinit.* Cyrillum Jerosolymitanum *catech. 4.* Gregorium Nyssenum *orat. catech.* Ambrosium *lib. pro iniitiandis, cap. 9. & lib. 4. de Sacrament. cap. 5.* Gaudentium *tractat. 19. in Exodum*, Chrysostomum *homil. 88. in Matth.* Hesychium *lib. 6. in Leviticum*, Eucherium *homil. 5. Paschatis.* Ad sedanda portò hujusmodi dubia nunquam & nusquam Patres geminam illam novellæ Calvinianorum editionis clavem, sen distinctionem figuræ & virtutis adhibuere, nunquam dixerunt solam Christi figuram, solam Christi virtutem in Sacramento Eucharistiæ reperiri, sed illas fortiùs & apertius expressiones imaginarunt, inculcaruntque, quæ fuerant dubitationum ansæ, ad easque tutandas confirmandasque omnia ex autoritate & infinita Dei potentia petita argumenta urgent, ut humana ratio quamlibet dubitationum & difficultatum mole vexata intellectum in obsequium fidei captivet; atque ad similia divinæ virtutis in creatione, in incarnatione, in miraculis quæ nos fugiunt, operantis exempla confugiunt, ut difficultates è fide Eucharistiæ ultro pullulantes explanent, Christique præsentiam tot indissolubilibus humanæ rationi nodis implicatam, tot spinis circumseptam credibilem reddant.

Si autem vera esset Calvinistarum sententia, inepta planè fuisset tot dubitationum  
 obje

objectio, ineptior illa Patrum responsio. Quænam enim dubitandi ratio adeò gravis, quænam ingentis difficultatis tam stupenda moles in Calviniano dogmate invenitur, ut ad eam complanandam & explicandam, atque reluctantibus rationi & sensibus suadendam unicuique divinæ virtutis ea quæ humanum captum excedunt operari valentis asylum supersit quò confugiamus? Immo quis Christianus infinitas in re omni difficultate vacua difficultates invenire meritò potuit? Quis in dubium revocare potest, hæderam appensam vinum vendibile significare, olivam pacis esse signum, & laurum ac palmas symbolum victoriæ? Quis ergo in hoc difficultatem poterant comminisci, quod panis ex Christi institutione corpus Redemptoris significet, vinum sanguinem figuret? Quomodo dubitare poterant virtutem Christi in panem posse Dei potestate transfundi, qui eam aquis baptismatis communicari non negabant?

Sed esto tam absurdas dubitationes, tam ineptas objectiobes in Christianis antiquis, tametsi splendente recentis Evangelii luce perfusis, & Sanctorum Patrum doctrinæ radiis circumfusus, repugnante ratione fuisse Calvinistis permittamus: verumtamen fatuas, insulas, & insensatas ad huiusmodi dubia responsiones à Patribus non semel, sed passim, sed ubivis de hoc argumento fuisse prolatas, agnoscere impium est, sacrilegum est, Atheo dignum, non Christiano. Etenim si sacri illi Doctores dubitationes sibi propositas intellexerunt (non intellexisse autem quis dicat nisi impius vel fatuus,) quomodo difficultatem,  
ubi

ubi nulla erat, summam esse confessi sunt tamen? Quomodo, vel qua sinceritate ad eam explicandam & obsequium fidei desiderarunt, & mysteria quæque longè difficillima captu in subsidium advocarunt.

Enimverò videbant Patres difficultates illas rationi humanæ inseparabiles, vel à reali corporis Christi præsentia proficisci, vel uni duntaxat præsentia figurativæ & virtuali esse innixas. Si primum, non remove difficultatem, sed augere; non sedare dubia, sed justa esse confirmare debuissent. Dubitatis (sic fari tenebantur) quomodo panis corpus Christi realiter evadat: jure dubitatis, & meritò difficile esse creditis, quod impossibile sine dubitatione tenendum est. Si secundum, id est si dubitationes illæ præsentia figurativæ vel virtuali superstructæ erant, non difficultatem singularem faceri, vel eam difficilioribus Christianismi mysteriis adæquare, sed ridere & stoccifacere poterant & debebant. Nam panem posse ex institutione Christi signum esse corporis Christi, & posse sicut aquam esse instrumentum virtutis Christi, quis impossibile judicaverit qui baptismo crediderit?

Ergo cum Patres contra suam de Eucharistia sententiam eas sibi difficultates opponant, & unius auxilio fidei dissolvere aggrediantur, quas olim Capharnaïtæ Christo opposuere, nobis Calviniani opportunè importunè obijciunt, dubio procul pro ea quam propugnamus thesi ipsi pugnarunt; & cum ut hujusmodi apparentes repugnantias conciliarent, ad distinctionem præsentia figurativæ & virtualis nunquam confugerint, qua tamen adhibita  
omnia



omnia objecta in fumum abibant & sponte dissiliebant, manifesto argumento est hanc de figurativa & virtuali duntaxat præsentia novitatem, commentum esse diaboli solis hæreticis inspiratum. Quid enim tam promptum, tam facile, tam expeditum, tam denique naturale erat, quàm fidem de Eucharistia expandere, cujus solius expositione (si fuisset Calvinianæ sententiæ consentanea) omnes omnino difficultates sine negotio momento evanuis-  
sent?

Observandum rursus, Eucharistiam Catholico sensu dici posse figuram corporis Christi, quia ut rectè ait Paschasius *cap. 4.* figura est, vel character veritatis quod exterius sentitur; veritas verò est quidquid de illo mysterio interius rectè intelligitur, & creditur. Non enim omnis figura umbra est vel falsitas: unde Paulus de unico Dei filio ad Hebræos loquens: *Qui cum sit splendor gloria*, inquit, *& figura substantia ejus*. Non etiam repugnat signo continere id cujus est signum: nam sanguis significat animam quam continet; & columba, quæ super Christum baptizatum descendit, signum erat Spiritus Sancti realiter præsentis; & Ecclesia materialis est signum congregationis fidelium, qui in ipsa realiter congregantur; & linguæ igneæ figuræ erant præsentis & in Apostolos illapsi Spiritus sancti. Absurdè ergo supponunt Calvinistæ figuram, imaginem, & antitypum rei esse semper absentis repræsentationem. Addit Lanfrancus eandem Christi carnem, eundemque sanguinem sui ipsorum esse figuram secundum aliud atque aliud accepta. Nam ipse Christus post suam resurrectionem  
sui



sui ipsius pro diversa temporum ratione typum  
 & figuram gessit, ut cum duobus discipulis  
 euntibus in castellum Emaus apparuit, finxit-  
 que se longius ire, significans, ut Augustinus  
 ait, se post paucos dies ad cælum ascensurum  
 esse, quod iter à communi hominum vita lon-  
 gè remotum est. Ita similiter Christus prout  
 in Eucharistia invisibilis est, figura & signum  
 est corporis Christi, illius videlicet quod visi-  
 bile, mortale, palpabile in cruce suspensum est.  
 Unde, ut observat Guitmundus *lib. 2.* Christus  
 ipse in sacris litteris sæpe signum appellatur, in  
 Evangelio enim dicitur positus in signum cui  
 contradiceretur, & apud Isaiam dicitur stare in  
 signum populorum. Et certè cum Christus in  
 Eucharistia seipsum pro nobis jugiter offerat,  
 perpetuum etiam est redemptionis nostræ sig-  
 num; omne enim pretium signum est transla-  
 tionis ejus rei, cujus est pretium. Denique  
 Eucharistia figura & signum est, tum unitatis  
 corporis mystici quod est Ecclesia, tum futuræ  
 beatitudinis, cujus suavitas in hoc sacro con-  
 vivio ab animabus castis in antecessum prægu-  
 statur. Ita apertè profitetur Ecclesia in Missa  
 de sanctissimo Sacramento, Eucharistiam enim  
 esse signum unitatis fidelium, asserit in oratione  
 secreta Missæ de Sanctissimo Sacramento, ubi  
 sic Ecclesia deprecatur: *Ecclesia tua, quasumus*  
*Domine, unitatis & pacis propitius dona concede,*  
*quæ sub oblatis muneribus mysticè designantur.*  
 Esse verò futuræ felicitatis figuram disertè testa-  
 tur in Postcommunione his verbis: *Fac nos,*  
*quasumus Domine, divinitatis tuæ sempiterna*  
*fruitione repleri, quam pretiosi corporis & san-*  
*guinis tui temporalis perceptio præfigurat.*

Facile ergo jam intelligis quo sensu Patres & Doctores Catholici Eucharistiam figuram appellarint. Quod magis adhuc percipies, si consideres in veteri Testamento dedisse Deum figurarum umbras; in novo veritatem dare cum figura; daturus in futuro absque figura manifestam veritatem. Quia nimirum vetus Testamentum veritatem promisit, & non dedit; novum Testamentum veritatem dat, sed non ostendit; beatitudo tandem latentem veritatem manifestissime videndam revelabit. Ineptè ergo & frustra laborant Calviniani cum Patrum testimonia Eucharistiam signum vel sacramentum appellantium studiosè colligunt; hac enim ratione & S. Thomas Aquinas, & ipsa Romana Ecclesia passim & ubique Eucharistiam *sanctissimum sacramentum, tantum sacramentum* nuncupantes à Calvinianis starent. Itaque cum Eucharistia interdum sacramentum & signum dicitur, interdum corpus Christi nominatur, nihil à veritate alienum profertur, sed diversa ratione Eucharistia consideratur. Sicut enim idem homo mortalis quandoque, immortalis nonnunquam, rursus mortalis simul & immortalis ratione diversorum rectè dicitur; mortalis propter corpus, immortalis propter animam, propter utrumque mortalis unà & immortalis: ita dum in Eucharistia corpus Christi attendimus, corpus Christi; dum species sacramentales vel alias significationes consideramus, signum, figuram, & sacramentum; dum utrumque meditamur, corpus unà & signum verè & catholicè eam nominamus. Unde etiam sequitur non esse mirum si propter varios sensus verba Christi spiritali sensu

sensu morum informandorum gratiâ Sancti interpretati sunt, cum & id Catholici quotidie præstent, & ipse Bernardus veritatis corporis Christi sine ulla dubitatione propugnator, & Calvinianorum in persona Henrici & sequacium acerrimus insectator conc.3. in Psalm. *Qui habitat*, scripserit: *Quid est manducare ejus carnem & bibere ejus sanguinem, nisi communicare passionibus ejus, & eam conversationem imitari, quam gessit in carne?*

Facile etiam interpretaberis testimonia illa Patrum, in quibus Eucharistia imago, similitudo, repræsentatio, & antitypus Christi dicitur. Imago enim & similitudo dici potest, tum habita ratione specierum, quæ ejus rei quam continent signum sunt; tum ratione rei contentæ, scilicet corporis Christi, quod prout est in Eucharistia, imago & signum est *rememorativum* præteritæ passionis Christi, unde ab August. lib.20. contra Faustum, cap. 21. appellatur *sacramentum memoria demonstrativum* præsentis corporis Ecclesiæ, *prognosticum* futuræ gloriæ. Nullus porro Patrum dixit Eucharistiam esse nudam Christi imaginem veritate quam significat vacuum, & in hoc sensu in 7. Synodo veridicè scriptum est, neque à Christo, neque ab Apostolis, neque à Patribus Eucharistiam imaginem appellari, quæ nimirum præsentiam corporis Christi excludat.

Et in hoc etiam sensu Eucharistia repræsentatio eorum dici potest quorum imago est. Veritas tamen est vocem *repræsentare* apud Latinos idem sonare ac præsentem exhibere, ut superius observatum est. Uade Horatius: *Virtutem repræsentet, moresque Catonis.* In qua

etiam acceptione vocem illam Tullius usurpavit. Juris quoque periti tunc aiunt pretium agni vel mercis repræsentari, quando in præsentia solvitur. Qua ratione Eucharistiam antitypum nonnulli appellant, id est signum non nudum, sed rei quam significat conjunctum, seu totum ex signo & re significata compositum.

Objiciunt præterea hæretici Calvinistæ primo quædam Augustini loca, tum illud epist. 23. ad Bonifacium, ubi sic scribit: *Sicut ergo secundum quemdam modum sacramentum corporis Christi corpus Christi est, Sacramentum sanguinis Christi sanguis Christi est; ita Sacramentum fidei fides est.* Quæ particula, *secundum quemdam modum*, cum sit diminuens, subindicat Eucharistiam non continere verè & substantia-liter corpus Christi. Maxime quia dicit Eucharistiam esse corpus Christi, quemadmodum baptisma dicitur fides, quod tamen non nisi significativè fides dicitur. Tum quia sermone de sacramento altaris ad infantes, authoribus Fulgentio & Beda, docet panem esse corpus Christi, & calicem ejus sanguinem, quia in eis aliud videtur, aliud intelligitur: additque Eucharistiam esse corpus Christi sicut nos sumus corpus Christi, quia per panem, qui ex multis granis coalescit, unitas fidelium repræsentatur. Tum denique, quia multis in locis docet corpus Christi non esse amplius in terra, sed in cælo; quia corpus intulit cælo, majestatem non abstulit mundo.

Respondeo sacramentum corporis Christi invisibiliter, & spiritaliter, realiter tamen præsentis esse corpus Christi quod fuit in cruce  
visi



visibile, palpabile; quia dum frangitur sacramentum, & in populum dividitur, dumve sanguis ejus ab ore fidelium sumitur, mors ejus in cruce, & sanguinis de latere emanatio figuratur. Sacramentum etiam corporis Christi est quodammodo corpus Christi mysticum, quod est Ecclesia, ut suprâ ex Augustino diximus. Sacramentum etiam corporis & sanguinis Christi, id est species panis & vini sunt quodammodo corpus Christi quod significant, quodve continent, sicut sacramentum fidei est ipsa fides: sacramentum enim Eucharistiæ, ut postea dicemus, formaliter & essentialiter in solis speciebus situm est. Quod si contendas sacramentum Eucharistiæ quâ tale includere corpus Christi, dicendum particulam *secundum aliquem modum* usurpari ab Augustino non ad imminuendum, sed ad modificandum sensum propositionis. Sic epist. 28. *Anima humana*, inquit, *immortalis est secundum aliquem modum*. Et epist. 3. *Ut hominem (Verbum) suscipere dignaretur, & cum illo uniretur quodammodo*. Et tamen anima humana verè immortalis est, humanitas verè & realiter cum Verbo unita. Ita sacramentum altaris est secundum quemdam modum corpus Christi, licet ipsum realiter contineat, quia nimirum non est corpus Christi omni modo, visibili, palpabili, extenso in ordine ad locum. Adde etiam particulam illam *secundum aliquem modum* ab Augustino positam esse, ut significaret paritatem aliquam inter Sacramentum corporis Christi & Sacramentum fidei, in hoc consistentem quod Sacramentum dici potest res cujus est Sacramentum; sed maximam etiam interesse

disparitatem , quia Sacramentum corporis Christi rem significatam continet , non verò Sacramentum fidei.

Ad secundum dico , panem esse corpus Christi , quia id , quod secundum speciem exteriorem & accidentia sensibilia panis est , revera tamen corpus Christi est ; in tanto enim mysterio aliud videtur , aliud intelligitur. Nihil autem verius quàm Eucharistiam esse corpus Christi naturale , sicut nos sumus corpus ejus mysticum : nihil etiam verius quàm panem illum secundum speciem externam consideratum unitatem corporis Ecclesiæ significare. Quæ quia sæpius repetita sunt , & ex Patribus exposita , ampliori explicatione non indigent.

Illæ denique testimonia quibus affirmat B. Augustinus corpus Christi non esse amplius in terra , de aspectabili illius præsentia , non de invisibili & miraculosa intelligenda veniunt. Noluit autem Christus visibilem & sensibilem in Eucharistia præsentiam retinere , ut Christianus animus terrenis vacuus , quæ sursum sunt quæreret , cœlestibus inhiaret , & ad Dominum cœli & terræ realiter quidem præsentem , sed ab amore rerum præsentium avocantem suspiraret. Unde *sursum corda* canit Sacerdos , quæ se habere ad Dominum veri fideles respondent : cujus sacræ cæremoniæ sæpius meminit Augustinus , ut lib. de dono persever. cap. 13. & lib. 83. quæstionum , quæst. 29.

Objiciunt 2. Calviniani auctoritatem Ruperti Abbatis Tuiticænsis Cœnobii Ordinis S. Benedicti , qui libro de divinis Officiis docet Eucharistiam esse nudam corporis Christi figuram

sam. Unde opus illud Wiclefus ejusque sectatores maximè commendarunt. Thomas etiam Waldensis tom. 2. cap. 19. scripsit authorem de divinis officiis serpere ut cancerum. Hac etiam de causa S. Anselmus epistolam ad Rupertum scripsit, qua monuit illius libri de Eucharistia doctrinam fuisse in Berengario damnatam, quæ quidem epistola initio tractatus de Sacramento altaris ab eodem Anselmo elucubrati habetur.

Respondeo Catholicam de Eucharistia doctrinam, & realem corporis Christi in Sacramento Altaris præsentiam apertissimis vocibus non semel, sed pluries Rupertum significasse. Tum in epistola nuncupatoria Commentariorum in Joannem, quæ in editione Colonienfi 1526. extat, ubi quorundam in se calumnias referens sic habet: *Illi autem quid dicant, quid pro argumento asserant, non habent, nisi quod aliqui ex eis, dum volunt Sacramentum corporis & sanguinis Domini solummodo signum esse sacra rei juxta errorem quondam Berengarii Turonensis, etiam dictum Beatum Augustinum ita sentire putant, quod omnino falsum est. Ego autem verum corpus Christi quod pro nobis traditum est, & verum esse decerto sanguinem qui pro nobis effusus est, sicut Catholica Ecclesia tenet. Hac quia probare conati sunt Beato derogare Augustino contra illum sentiendo, quem in sui erroris patrocinium Berengarius citare consueverat, dicta ejus malo sensu diripiendo. Verum hac jam ferè nemo palam proficere aut defendere audet, universâ sentiente Ecclesiâ Catholicâ, quia verum corpus & verus sanguis Christi est. Et in fine: Credamus fideli Sal-*

vatori Deo in eo quod non videmus , scilicet panem & vinum in veram corporis & sanguinis Domini transisse substantiam. Quibus verbis nihil luculentius.

Libro etiam sexto in Joannem innumera habet huic confirmandæ veritati peropportuna; hæc tamen limpidissima verba referre satis erit: *Veritas dicit , Hoc est corpus meum , & addit, quod pro vobis tradetur. Et tu dicis , non est idem corpus : nempe si non est idem corpus , si non est idem qui de cælo descendit panis vivus, non est hoc corpus quod pro vobis traditur. :: Cunctis figurarum vel similitudinum nebulis amoris , non corpus quodlibet , non corpus Christi quod est Ecclesia , sed illud corpus Domini quod pro nobis traditum est , nos manducare , & sanguinem illum qui pro nobis fusus est in remissionem peccatorum , nos bibere indubitanter credimus.*

Confirmatur id ipsum , quia Rupertus existimavit corpus Christi ab indignis comedi, non quidem ore fidei , sed ore corporis. Etenim lib. 6. in Joannem : *Panis , inquit , semel consecratus nunquam postea virtutem sanctificationis amittit , aut Christi caro esse desinit , sed non prodest quicquam indigno , cujus fides sine operibus mortua est. :: Quò ergo devenit , quod indignus manducat & bibit ? Hoc certè pium sit & salutare credere per membra diffundi , ita ut non sit obnoxium secessui : sed hoc plus habet dignus ab indigno , quia huic ad salutem , illi proficit ad iudicium. Et lib. 1. in regulam S. Benedicti , sub finem : Habueram , inquit , cum aliquo magni nominis magnaque æstimationis scholastico sive Monacho certamen permolestum de*  
*Sacra*



sacramento corporis & sanguinis Domini, qui inter cetera quibus deprimere conabatur majestatem tanti sacramenti, illud mihi objecerat, quia sacramentum illud Iuda quoque traditori suo Dominus dedit sicut ceteris Apostolis: hoc nimirum intendens, quod nequaquam illi dedisset, si vera esset substantia corporis, & sanguinis sui.

Quin & in libro de divinis officiis doctrina de reali corporis Christi in Eucharistia præsentia non obscure continetur. Libro enim 2. cap. 2. Panis & vinum, inquit, in verum corpus & sanguinem Domini transferuntur. Multi fidei oculos non habentes in sancto sacrificio præter panem & vinum nihil amplius intuentes, cum diceretur eis, corpus & sanguis Domini est, murmuraverunt dicentes, quomodo est? :::: Verum Dei Verbum, verum Dei Filium sancta Ecclesia Catholica offert Creatori suo, credens corde & ore confitens, pariterque manibus panem & vinum sicut sibi tradidit ipse Salvator, offerens: nam pro quota suorum parte beneficiorum gratias ageret Ecclesia Creatori, Salvatori, & illuminatori suo, si nihil aliud ei quam panem & vinum offerret? :::: Non ergo solum panem & vinum quæ corporaliter videntur, sed & quod non nisi fidei oculis aspicitur Verbum Dei, Filium Dei offert sancta Ecclesia, novum & verum immolans sacrificium. :::: Si hujus verbi flumen super panem & vinum effuderis, & ordine, qui ab ipso statutus est, veritatem hujus verbi protuleris, statim de sancto altari panem ipsum & vinum in corpus & sanguinem suum transfereundo suscipis, eadem virtute, eadem potentia vel gratia, qua nostram de MARIA Virgine

*carnem suscipere potuit, quomodo voluit. ... Unum corpus est & quod de MARIA genitum in cruce pependit, & in sancto Altari oblatum quotidie nobis ipsum innovat passionem Domini. Nihil certè dici potuit doctrinæ Ecclesiæ Catholicæ, quam propugnamus, magis consentaneum.*

Quare omninò falsum est, & mera Wicleff calumnia, librum illum de divinis officiis purè figuralem corporis Christi in Eucharistia præsentiam docuisse, cum ab eo errore sit tam alienus Rupertus quàm quod maximè. Nec mirum est si Ruperto mortuo hæreticus ille imposuerit, quia etiam eximius ille Abbas multos dum viveret calumniatores habuit, ut ex ejus vita atque ex apologiis quas pro se edere coactus est, clarissimè liquet. Quod verò Thomas Valdensis librum de divinis officiis acriter perstrinxerit, ideo est, quia impanationem admisisse Rupertum arbitratus est, quibusdam locis deceptus, quæ & benignis interpretationibus exponi, & aliorum clarissimorum testimoniorum collatione explicari sine negotio possunt & debent. Epistola autem tractatui de Sacramento Altaris præfixa, sicut & ipse tractatus incertum habet authorem; nam in quibusdam codicibus manuscriptis sine authore legitur, in aliis Guillelmo Abbati S. Theodorici ad quemdam Monachum, qui de corpore & sanguine Domini librum ediderat, scribenti asseritur. Utut sit, in illa epistola non redarguitur Rupertus, quòd merè figuralem præsentiam admisserit, sed quòd scripserit aliquid quod molestiam facere posset nonnullam, quod abuti possent, qui carpere amant aliorum etiam  
benè

benè dicta, putà cum dixit in corpore sacrificiū altaris non esse vitam animale, sed spiritalem. Quæ tamen objectio levissima & nullius momenti est: nam per vitam animale intelligit Rupertus vitam sensibilem, quæ sensibus percipitur & modo corporeo conspicitur; unde & eam vocat carnalem, quæ quinque sensibus, visu, gustu, tactu, auditu, odoratu fungitur. *Hæc vita, inquit, animalis est, carnalis est, caro est: Dominus autem dicit, quod caro non prodest quidquam.* Hanc porro vitam Christus in Eucharistia visibiliter non exercet, quia sub speciebus modo spiritali, realiter tamen & substantialiter continetur. Unde tandem author epistolæ illius fatetur se de recta Rupertī fide non dubitare.

Nec valet si dicas Rupertum lib. 2. de divinis officiis, cap. 9. docere, *in illum in quo fides non est, præter visibiles species nihil de sacrificio pervenire.* Non, inquam, valet: sensus enim ejus est, nihil in indignè communicantem præter visibiles species pervenire, quod sit utile percipienti, quippe quī cœlestem cibum sub speciebus visibilibus latentem ad judicium, non ad salutem comedit; quemadmodum, inquit, asinus ad lyram, cū irracionales aures arripit, sonum quidem audit, sed modum cantilenæ non percipit; quia etsi aures ejus realiter feriant sonus & cantilenæ modus, harmoniæ tamen modum & suavitatem non distinguit.

Objiciunt 3. hæretici auctoritatem Gregorii VII. quem dicunt suæ sententiæ adhæsisse, quia Conventus apud Brixiam coactus illum Berengariani erroris insinulavit decreto quod



his verbis refert Conradus Vispergensis : Nos contra eundem Hildebrandum ( qui ad regendam Petri navim vocatus Gregorius VII. dictus est ) procacissimum , sacrilegia & incendia pradicantem , perjuriam & homicidia defendentem , Catholicam & Apostolicam fidem de corpore & sanguine Domini in questionem ponentem , hæretici Berengarii antiquum discipulum , divinationum ac somniorum cultorem , manifestum necromanticum , pythionico spiritu laborentem , & idcirco à vera fide exorbitantem judicamus canoniciè deponendum & expellendum. 2. Quia Benno Cardinalis in vita Gregorii refert Pontificem illum jejunium indixisse Cardinalibus , ut Deus ostenderet , quis rectius de Corpore Domini sentiret , Ecclesiæ Romanæ , aut Berengarius ; & de corpore Domini signum quæsiuisse , quod petente Magno Gregorio ad firmandam infidelis mulieris fidem contigit : quod tamen Gregorius VII. post multas preces , & jejunia non impetravit ; aliæque fecisse , quibus se de veritate Eucharistiæ dubitasse monstravit , per hoc manifestè probatus infidelis ; cum in Nicæno Concilio scriptum sit , dubium in fide infidelem esse.

Respondeo sanctissimum Pontificem Gregorium VII. ab omni perversa circa Eucharistiæ doctrinam suspitione esse alienissimum : tum quia illo Præfide , & Victoris II. Legato Berengarius in Concilio Turonensi damnatus est , qui & promisit se in posterum cum Ecclesiâ Romanâ velle sentire. Tum quia , cum propositi parum tenax Berengarius pactam sponsonem sacrilegè violasset , Romæ novum Conciliū Gregorius coëgit , in quo hæreticus errorem suum



suum ejuravit, & paterna charitate tandiu apud se hæresiarcham Papa detinuit, donec cum non amplius esse in fide dubium constaret. Unde historici magnificè de Gregorio VII. loquuti sunt, quem virum eruditione clarum, pietate & zelo insignem, multis pro justitia persecutionibus & calumniis divexatum, miraculis denique in vita & post obitum conspicuum celebrarunt. Testatur enim Lambertus Scaphnaburgensis, ad annum 1073. Pontificem illum tam eximiè, tam Apostolicè vitam instituisse, ut nec minimam sinistri rumoris maculam conversationis ejus sublimitas admitteret: signa etiam & prodigia quæ per orationes ejus frequenter fiebant, & zelus ejus ferventissimus pro Deo ac pro Ecclesiasticis legibus satis eum contra venenatas detractorum linguas communiebant. Scribit quoque Marianus Scotus ad annum 1081. Henricum Imperatorem cum magno exercitu Romam profectum urbem obsedisse, & Gregorium advertentem Romanorum plures schismaticis favere, cum paucis Salernum abiisse, & ad obitum usque mansisse. Videns autem Henricus Pontificem aufugisse, congregatis triginta Episcopis fautoribus suis, in ipsa Romæ obsidione Synodum haberi iussit, in qua Gregorius falsis & inauditis criminationibus ab Henrici fautoribus fictè compositis absens accusatur, & alius in ejus Sedem obtruditur, quem Gregorius anathematis mucrone multavit, Henricum quoque cum fautoribus communione privavit. Eadem elogia alii historici Gregorio panxerunt, quem virum sanctum, à multis persecutiones pro justitia perpassum, justitiæ rigoris tenacem, statuitis

tutis contra simoniacos & Clericos concubina-  
rios, ac pro totius vigore disciplinæ editis com-  
mendabilem, denique formam gregis factum,  
quod verbo docuit exemplo probasse, ac for-  
tem per omnia athletam murum se pro domo  
Domini ponere non timuisse prædicant.

Objecta verò in contrarium nullius mo-  
menti sunt. Etenim decretum illud Brixienfis  
conventiculi à schismaticis odio in sanctum  
Papam percitis, procurante Henrico Impera-  
tore à Summo Pontifice anathemate percusso  
editum est, mendaciis, calumniis, & inauditis  
accusationibus, ut loquuntur historici, factum.  
Contemnendum etiam est Bennonis testimo-  
nium, qui fautor Henrici Imperatoris & Gil-  
berti Ravennatis in Antipapam obtrusi partium  
sectator, non tam Gregorii historiam texuit  
quàm satyram falsitatibus, fabulis & calumniis  
confarcinatam. Unde Papyrius Masso opere  
de Episcopis Urbis, in Gregorio VII. librum  
Bennonis, utpote plenum maledictis, odii spi-  
rantem, schismaticæ factionis furore dictatum  
respuendum omninò esse exerte proficitur.  
Quod autem Gregorius signum à Deo ad fir-  
mandam veritatem Eucharistiæ poposcerit,  
dubiam ejus fidem non efficit; sicut nec dubius  
fuit in fide Magnus Gregorius, cum miraculum  
ad persanandam mulieris infidelitatem postu-  
lavit. Denique non advertunt Calvinistæ seip-  
sos proprio mucrone jugulare, si enim conven-  
tus Brixienfis de Pontificis depositione pro-  
nuntiavit, quòd de veritate realis Christi in  
Eucharistia præsentia contra Romanæ & Ca-  
tholicæ Ecclesiæ sensum dubitarit: Ergo fides  
Ecclesiæ Catholicæ Calvinianæ impietati Christi  
realem

realem præsentiam hæreticè inficianti semper aduersata est.

Obijciunt, 4. hæretici Calviniani auctoritatem Facundi Hermanensis lib. 9. cap. ultimo, qui excusaturus Theodorum Mopsuestenum asserentem Christum Dominum assumpsisse adoptionem filiorum, sic habet: *Adoptionem quoque filiorum suscepisse Christum etsi antiqui Patres docuisse monstrarentur, nec ipsi, nec omnia Ecclesia, quales Doctores habuit, iudicari debent hæretici: nam Sacramentum adoptionis suscipere dignatus est Christus, quando circumcissus est & baptizatus: & potest sacramentum adoptionis adoptio nuncupari, sicut sacramentum corporis & sanguinis ejus, quod est in pane & poculo consecrato, corpus ejus & sanguis dicitur, non quod propriè corpus ejus sit panis, & poculum sanguis: sed quod in se mysterium corporis ejus sanguinisque contineant. Hinc & ipse Dominus benedictum panem & calicem, quem discipulis tradidit, corpus & sanguinem vocavit. Quocirca sicut Christi fideles sacramentum corporis & sanguinis Christi rectè dicuntur suscepisse: sic & ipse Christus sacramentum adoptionis filiorum cum suscepisset, potuit rectè dici adoptionem filiorum suscepisse.*

Respondet ex illo Facundi opere nihil erui posse quod veritati Catholicæ aduersetur: tum quia libri illi ex uno codice manuscripto anno 1629. in lucem editi sunt, qui codex à Berengarianis scribi potuit & facillè corrumpi. Tum quia admissa sinceritate exscriptionis, levis momenti & tenuis auctoritatis Scriptor Facundus censendus est, utpote qui animo schismatico trisum capitulorum defensionem pertinaciter

circæ

citer suscepit, animo adversus Vigilium & Pelagium Pontifices infenso, ut ex aliis ejus operibus constat; de veritatis autem desertione merito suspectus est, qui unitatem Ecclesiæ in aliqua causa manifestè scindere non reformidat. Tum quia etsi schismatico animo libros illos non scripsisse Facundum concedamus, nobis non adversatur; quia per sacramentum corporis Christi solas species panis & vini, quæ formaliter & essentialiter sacramentum sunt, intelligit; de quibus utique speciebus dicere verum est, non esse propriè corpus Domini: unde in hoc sensu comparat sacramentum adoptionis cum sacramento corporis & sanguinis Domini, nec tamen propterea negat species illas corpus Christi realiter continere. Itaque comparatio ejus in hoc consistit, quod sicut species quæ sunt signum & sacramentum corporis Domini, dicuntur denominativè corpus Domini, eo modo quo signa nominæ rerum quæ significant appellari solent: ita quia Christus baptizatus & circumcissus sacramentum adoptionis suscipere dignatus est, adoptionem quoque filiorum suscepisse dici potest: quia si species quæ sunt signum & sacramentum corporis Domini dici possunt corpus Domini, ita circumcisio & baptismus, quæ sunt sacramenta & signa adoptionis, adoptio pariter appellari possunt. Tum demùm, quia etiam dato quod Facundus per sacramentum corporis Domini totum ex signo continente & re contenta coalescens intellexerit, verè dixit ad mentem adversariorum quos impugnabat, sacramentum corporis Domini non esse corpus Domini, licet ad mentem Ecclesiæ verum ejus corpus.



fit. Etenim Facundus opere illo trium capitulorum adversus Eutychianos defensionem suscipit, unde in defendendis Iba, Theodoro, & Theodoro, atque tuenda Concilii Chalcedonenfis autoritate totus est. Quare, exculaturus Theodorum ait scribere potuisse eum, Christum adoptionem filiorum suscepisse, quatenus suscepit sacramentum adoptionis: potuit namque sacramentum adoptionis adoptio nuncupari, sicut sacramentum corporis & sanguinis Domini, quod est in pane & poculo consecratis, corpus ejus & sanguis dicitur; quanvis secundum vos, ô Eutychiani, corpus ejus propriè non sit. Vos enim censeis duas quidem in Christo fuisse naturas ante adunationem mysterii Incarnationis, post adunationem verò ita in unam coaluisse substantiam utramque naturam existimatis, ut post adunationem non corpus verum, sed tantum apparens & similitudinarium agnoscat, & quod formam servi gessit, quod nostri similis fuit atque conformis (ut ait Magnus Leo epist. ad Pulcheriam Augustam exponens Eutychetis dogma) quædam nostre nature fuerit imago, non veritas. Si ergo secundum vos, qui humane in Christo carnis negatis veritatem, qui in divinis humana evacuatis, qui censeis solam divinitatem Virginis utero esse natam, & per ludificatoriam solum speciem subisse nutrimenta & incrementa corporea, solam illam esse crucifixam, mortuam, & sepultam; si, inquam secundum vos sacramentum corporis Christi corpus Christi dicitur, tamen si verum Christi corpus non sit, quia Christus solum apparens & similitudinarius habuit: quidni sacramentum adoptionis

adoptio

*Petita ab humana Philosophia hæreticorum Sophismata convelluntur.*

Objiciunt demùm Calvinistæ plura argumenta, vel potiùs sophismata à sensibus & humana ratione petita, quibus, assertionem Catholicam involvere & implicare contradictionem hominibus carnalibus suadere moliuntur. Quomodò, inquiunt, inveniri potest in Eucharistia substantiale corpus Christi, de cujus ratione est quod sit palpabile; unde Christus resurrectionem suam probaturus, ait: *Palpare & videre, quia Spiritus carnem & ossa non habet?* In Eucharistia autem corpus Christi nec oculis videtur, nec manibus palpatur, aut contrahi potest. Quomodo ibi corpus adest, ubi modo extenso & quantitativo non subsistit, quod tamen à corporis notione inseparabile est? Quomodo substantia corporea spiritali modo locum occupare est, cum tam sit impossibile corpus spiritalem præsentiam obtinere, quàm spiritum ad præsentiam corporeæ modum deprimi? Quis intelligere potest idem numero corpus diversis esse posse simul in locis, à seipso dividi, extra præscriptos terminos absque ullius additamento quantitatis dilatari, diversis & contrariis modis qualitatibusque affici, & immensitate ipsâ donari, eum non magis repugnet ipsum in infinitis locis, quàm in pluribus distinctisque collocari? Quis capiat acciden-

accidentia existere sine subiecto, cum totum esse accidentis sit inesse? Denique admittâ præsentia reali corporis Christi in Eucharistia, absurdissima quædam inconvenientia devoranda sunt: quid enim Christi majestate indignius, quàm Christum in Eucharistia in terram interdum, atque etiam in sordes dejici, dentibus atteri, à muribus edi, corrumpi in putrefactione panis, accescere in corruptione vini, comedi, & in stomachum trajectum in ventrem & seccisum ire, aliisque tandem injuriis & contumeliis subjici, quæ gloriosum ejus corpus non decent?

Respondeo mysteria fidei facilè posse populariter accusari, ut observat Augustinus 1. de utilitate credendi, cap. 2. nec tamen ab eorum propterea defensione esse recedendum; quia fides non esset argumentum non apparentium, si plausibilia duntaxat sensibus, rationique perspicua proponeret: fides namque non habet meritum, ubi humana ratio præbet experimentum. Certè si inconvenientibus ab humana Philosophia peritis mysteria fidei dimittemur, nec Incarnationi, nec Trinitati, nec corporum post tot sæcula in cineres redactorum, vel in alia corpora innumeris vicibus transmutatorum resurrectioni crederemus. *In Christum non crederemus*, inquit Augustinus epistol. 49. *si fides Christianorum merueret caschinnos Paganorum.* Quid enim indignius, quàm unigenitum Dei filium per omnes naturæ infirmitates volutari, tot calamitatibus & probrosissimæ tandem morti supponi? Unde & mysterium illud Judæis scandalum, Gentibus stulticia visum est. Quid in speciem implicanti-

cantius, quàm unius Dei simplicissimam singularitatem cum trium distinctione personarum conciliare? Quid tandem humanis experimentis magis incredibile, quàm hominem ab alio comestum, & in varias deinde substantias innumeris generationibus & corruptionibus conversum, in eadem carne resurrecturum tamen? Captivandus est ergo intellectus in obsequium fidei, nec inde Dei potentiam, majestatem, sapientiam, & immensum amorem omnes difficultates evincen-tem, & ut ait Isaias vincentem scientiam nostram calumniari, unde & mirari eum amplius, & diligere intensius astringimur: *Nam tantò Deus ab hominibus dignius honorandus est*, inquit Magnus Gregor. hom. 6. in Evangelia, *quantò pro hominibus & indigna suscepit*. Et Tertullianus lib. 2. contra Marcionem ait, *Assumpsisse Deum quadam sibi indigna, nobis autem necessaria, & ideo jam Deo digna, quia nihil tam Deo dignum, quàm salus hominis*.

His præjudiciis munitus Catholicus animus hæreticorum sophismata faciliè contemnet. Nec Calvinistarum fallaciæ adeò implicatæ sunt, ut eas absque multo negotio quilibet mediocriter eruditus non dissolvat. Radix enim deceptionis adversariorum ea una est, quod corporis Christi in Eucharistia præsentiam imaginatione considerant, nec attendunt corpus illud gloriosum modo invisibili, & miraculoso præsens esse. Nihil autem mirum si corpus insolito & extraordinario modo præsens factum, nec tactu palpari, nec oculis videri possit. Nihil mirum si corpus extensione locali per miraculum privatum, spatium non exeat: posse



posse autem divinitus corpus ab extensione locali liberari, & partes alias partes penetrare patet, tum quia extensio localis est effectus secundarius quantitatis, qui tam bene potest impediri quam gravitas, quæ tamen impedita fuit, cum corpus Christi super aquas ambulavit. Tum quia penetratio corporum juxta Patres sæpè divinitus contingit, putà quando Christi corpus virginali fufum est partu; tunc enim, ut ait Ambrosius lib. de instit. Virginum, cap. 9. *Mansit intemeratum septum pudoris, & inviolata integritatis duravere signacula, cum exiret ex Virgine.* Corpus etiam Christi gloriosum cœnaculum januis clausis & penetratis intravit: *Ille quippe,* inquit Augustinus serm. 159. de tempore, *non eis (ostiis) apertis intrare potuit, quo nascente virginitas matris inviolata permansit.* Idem docet Hilarius lib. 3. de Trin. & Cyrillus lib. 12. in Joannem. Nec mirum dotem illam corpori Christi comperere, quæ Patribus authoribus, corporibus omnibus gloriosis post resurrectionem communis erit. *Corpus Sanctorum resurget spirituale,* inquit Author libri de cognitione veræ vitæ, cap. 45. inter opera Augustini, *quæ velocitate, levitate, perspicuitate spiritibus erit æquale, & omne solidum erit ei penetrabile, sicut & corpus Domini lapide clauso surrexit, & januis clausis intravit.* Nec est simile de substantia spiritali, quæ cum non habeat partes, non potest præsentiam & extensionem habere corpoream & localem; corpus verò retentâ distinctione partium in ordine ad se, extensione extrinseca in ordine ad locum privari potest.

Cum verò additur intelligi non posse, quomodo

modo idem corpus in diversis distictisque simul locis esse possit, respondent nostri Thomistæ id esse inintelligibile, si corpus idem duplicem præsentiam extensivam & circumscriptivam haberet: nihil tamen inter se pugnare, ut ait Tridentinum *sess. 13. cap. 1.* ut ipse Salvator noster semper ad dexteram Patris assideat in cælis juxta modum existendi naturalem, & in multis nihilominus aliis locis sacramentaliter præsens substantialiter nobis adsit. Implicat quidem corpus idem plura spatia modo extenso occupare, quia non potest multiplicari extensio nisi multiplicetur quantitas; multiplicari enim nequit effectus formalis, sive primarius, sive secundarius, immultiplicatâ formâ, cum effectus formalis, tam primarius quàm secundarius sit ipsa forma primariò, vel secundariò communicata. Si autem multiplicetur quantitas non est idem corpus. At verò præsentia Sacramentalis à quantitate minimè pendens, sed à conversione substantiæ panis in corpus Christi desumpta divinitus multiplicari potest, nec ex illa profluunt illa inconvenientia, quæ ex multiplici præsentia extensiva proficiscerentur; præsentia enim sacramentalis ut multiplicetur, nec divisionem corporis causat, nec immensitatem infert, nec variis motibus & qualitatibus contrariis obnoxium corpus reddit, quibus multiplex præsentia extensiva subjaceret, ut demonstrant in Philosophia nostri Thomistæ, meritò rati se facilius Calvinianos impugnatos, si præsentiam extensivâ multiplici tanquam impossibili rejectâ, solius præsentia sacramentalis possibilem multiplicationem astruant, inde se ab infinitis incommodis eximentes,

eximenter, quæ ex multiplici præsentia circumscriptiva sponte fluunt. Unde tantum abest veritatem Catholicam ab illa opinione, quæ idem corpus plura loca modo extenso occupare posse asserit, pendere vel juvari, vel faciliorem reddi, quod potius sententia illa plus nocet quàm prosit ad Calviniana sophismata refellenda: præsentia enim circumscriptiva multiplex nihil commune habet cum modo illo singulari quo Christus est, in sacramento. Unde rectè Valques 3. *part. disp.* 189. *cap.* 4. observat magn's & intricatis sese implicare difficultatibus, qui multiplicem ejusdem corporis extensivam præsentiam admittunt, quibus veritas fidei Catholicæ non juvatur, sed obscuratur: quia, inquit, ea docent quæ *cum sensui multò difficiliora sint quàm mysterium ipsum, ac proinde argumenta hereticorum contra ea vulgo magis plausibilia; efficitur ut dum heretici magnam probabilitatem ea impugnant, magnificentissimè se jactent, quod & mysterium quoque ipsum eadem probabilitate refellant.* Quare opposita sententia causam Ecclesiæ non tam juvat, quàm novis & plausibilioribus incommodis implicat.

Quod autem obijcitur, accidentia non posse à subjecto divelli, si sermo sit de facultate naturali, verum est: Dei tamen potestate omnia verbo virtutis suæ portante, sine subjecto subsistere valere non minus verum & certum esse debet. Si enim substantia creata subsistentiâ propriâ in incarnatione privari potuit; si lux ipsa, teste B. Basilio hom. 6. in Hexaëmer. à corpore solis separata subsistit; quia, inquit, *quæ mentis sola agitatione cogitationeque disparari à se possunt,*

*ea rē ipsa sejungit facultate Creatoris possunt; certe qui corpus, ne gravitaret, super aquas portavit, qui res omnes è nihilo produxit, nec subiecto eguit ut efficeret, subiecto non egebat ea ut conservet. Exigit quidem accidens, ut subiecto inhæreat, ut habitudinem ad subiectum semper retineat; quod verò semper & essentialiter inhæreat, non est de essentia illius. Porro illud sophisma non tam contra præsentiam realem, quàm contra transsubstantiationem militat.*

*Illa verò inconvenientia, quæ in fine objectionis acervantur pueriliter proferuntur, atque ex fidei nostræ ignorance, vel dissimulatione proficiscuntur. Si enim considerarent adversarii his nugis mulieres deterrentes Christum esse in Eucharistia modo impassibili, & omnem alterationem solis panis speciebus obvenire, solas illas atteri dentibus, solas corrumpi, solas digeri, & in secessum ire, solas putrescere, acescere & moveri, desinerent doctrinam nostram calumniari, nec iis mutationibus corpus Christi in Eucharistia obnoxium esse confingerent. Sicut autem Dei non dedecet maiestatem, ut loca omnia quamlibet sordida immensitate sua pervadat; sicut Solis radii paludum & fimorum sordibus non sordescunt: sic gloriosum Christi corpus nullis specierum sacramentalium qualitatibus, vel injuriis afficitur vel mutatur.*



*Demonstrationem à Patribus petitam confirmat longè præclarissimum septimæ Synodi Generalis testimonium.*

Denique quid Apostoli, quid Patres omnes de Eucharistiæ veritate senserint, discere potest quilibet non oculis orbus ex septima Synodo œcumenica, Nicæna secunda, aët. 6. tom. 3. circa finem, ubi Calvinianæ impietatis hæreticæ distinctiones præfocatae sunt. Sic autem habetur: Nullus aliquando Tubarum spiritus, Sanctorum videlicet Apostolorum, aut illustrum Patrum nostrorum incruentum sacrificium nostrum, quod in commemorationem Christi Dei nostri ac omnis dispensationis ejus efficitur, dixit imaginem corporis ejus. Neque enim acceperunt à Domino sic dicere vel confiteri, sed audiunt evangelicè, dicente eo: Nisi manducaveritis carnem filii hominis, & biberitis ejus sanguinem, non intrabitis in regnum cœlorum. Et qui manducat meam carnem, & bibit sanguinem meum, in me manet & ego in eo. Et accepto pane gratias agens fregit, & dedit discipulis suis, & ait: Accipite & comedite, Hoc est corpus meum. Et accipiens calicem, gratias egit, & dedit illis dicens: Bibite ex hoc omnes, hic est enim sanguis meus, qui pro multis effundetur in remissionem peccatorum. Et non dixit: Accipite, & comedite imaginem corporis mei. Sed & Paulus divinus Apostolus ex divinis Domini vocibus hauriens, ait: Ego accepi à Domino quod & tradidi vobis, quoniam in qua nocte tradebatur, accepit

panem, & gratias agens fregit & dixit: *Accipite & comedite, hoc est corpus meum quod pro vobis frangitur; hoc facite in meam commemorationem.* Similiter & calicem postquam cœnavit, dicens: *Hic calix novum Testamentum est in meo sanguine, hoc facite in meam commemorationem.* Ergo liquidò demonstratum est, quod nusquam Dominus vel Apostoli aut Patres imaginem dixerunt sacrificium sine sanguine, quod per Sacerdotem offertur, sed ipsum corpus, ipsum sanguinem. Quid formalius, quid luculentius desiderare potes, Catholice Lector? Non egent ponderatione vel commentario splendidiora sole meridiano verba. Dic sodes, *Claudi Charentonensis*, ubi tunc *Paschasius*, quem præfentix realis autorem tam ignoranter, tam fraudulenter comminisceris? Si fingere velis, speciosius finge. Mendacia quæ venditas, crede mihi, compone meliùs.

Et ante sanctificationis quidem celebrationem (pergit *S. Synodus* nondum, si *Claudio* benè placuerit, nato *Paschasio*) *typos* (seu ut alii legunt *antitypa*) quibusdam Sanctorum Patrum hac piè visum est nominare, quorum est *Eustathius* propugnator orthodoxa fidei, & *Ariana* destructor vesania; & *Basilii* ejusdem infelicitis superstitionis depositor, qui omne quod sub Sole est planam rectorum dogmatum basim edocuit. Recensitis autem utriusque Patris testimoniis sic concludit: *Quod deinceps infertur certiorum Patris hujus (Basilii) perfecit intellectum, qualiter antequam sanctificata fuerint, vocata sint typhi; post sanctificationem autem corpus propriè ac sanguis Christi dicuntur, sunt, & creduntur.*

Nec est quod opponas, Græcos Patres jam sanctificata non rarò vocare antitypa, ut Nazianzenus *orat. funeb. in sorore*, & *apologia* I. & Cyrillus Jerosolymitanus *catech. 5. mystagog.* Non, inquam, hæc opponas: tum quia suprâ exposita sunt: tum quia quidquid tandem sit de illa quæstione facti, hoc unum tamen evidens manet, Concilium Nicænum II. absente Paschasio Romanæ Ecclesiæ de Eucharistia fidem luculentissimè tradidisse. Tum demùm, quia hæc optimè conveniunt, & Patres nunquam dixisse sanctificata esse typos hæreticorum sensu; & esse antitypa bonæ aliquo sensu catholico. Nunquam enim dixerunt Patres sanctificata esse typos & imaginem excludentem corporis Christi realiter præsentis veritatem: & quia ordinariè dicimus tum adesse imaginem cùm res abest, ideò in hoc sensu nullus dixit Eucharistiam esse imaginem. Cæterùm quia in Eucharistia est simul signum & res significata, nec imago à re repræsentata disjungitur, ideò sanctificata typi à Patribus nonnullis dicta leguntur.

## R E F L E X I O,

*Et apostrophe ad nostrates hæreticos.*

**P**atrum doctrinam in medium attuli, ô Sectarii, pluribus silentio, ne opus in immensum excreceret, prætermisissis. Si filii estis, audite Patres, quos qui audit, Christum audit;

quos qui spernit, Christum, Christo ipso attestante, spernit. Ne transferatis, quæso, terminos quos posuerunt Patres nostri, & super judicantes nos ne judicate. Eò ne rapiamini quo Calvinianæ novitatis ventus impulerit; incerti quâ sine duce eatis, quâ redeatis, quid appeteris, quid fugiatis, quid teneatis, quid dimittatis. Intra fidissimam traditionis Patrum stationem vosmetipsos reducite & tenete, atque amaros illos turbulentosque errorum fluctus primitus removete, ut possitis deinde vivæ & salientis aquæ fluentia potare. Patrum auctoritate inconcussa fulti dediscite benè quod didicistis non benè. Nova ac nova cum vestro Ministro Claudio impostore jurato in dies ne quarite, qui semper aliquid gessit Religioni addere, mutare, detrudere; sed traditâ semel, & à Patribus omnibus acceptâ credendi regulâ contenti estote. Nam si vitanda, authore Apostolo, novitas est, tenenda utique est antiquitas: & si prophana est novitas, sacrata est vetustas.

Nihil tota hac speculatione de meo exprompsi; summos illos viros, quos Deus pro Ecclesiasticorum temporum ratione variis regionibus & ætatibus produxit, loquentes exhibui, atque in hunc librum quasi in Concilium quoddam, ut Augustinus *lib. 2. cont. Julian. capite 10.* ait, coactos adduxi, eorum ut verbis splendidissimis veram Ecclesiæ de Eucharistia mentem ac sententiam doceremini. Quod à clarissimis illis Ecclesiæ luminibus accepi, id vobis tradere aggressus sum: eos mihi duces ac præsides adoptavi, eorum vestigia sequutus sum, eorum usus oculis, eorum ratione intellexi,



lexi, eorum verbis eloquutus. Eos tandem auctate, quos Pastores amantissimos, Magistros optimos Ecclesia agnoscit & colit.

In Eucharistia esse corpus Christi, ipse Christus dixit, iterum dixit post Christum Apostolus, post Apostolum nemo Patrum contradixit, solus illi veritati post quindecim possessionis sæcula maledictus Calvinus maledixit: illine turbam magnam Patrum & Sanctorum, quam dinumerare nemo potest, postponetis?

Hæc cum ita sint, Ecclesiæ Christianæ felicitati & dignitati in possessione reali Christi litæ ne imposterum invidete, cujus si libuerit participes esse potestis. Attendite quanta sit Religionis nostræ perfectio, cui datum est id reipsa habere, quod signis tantum & figuris Mosaicæ legis tempore adumbratum fuerat. Quare à Dionysio de Eccles. Hierarch. cap. 5. divinitus dictum est, Ecclesiam nostram mediam esse inter Synagogam & supremam Jerusalem, ac propterea utriusque participem. Ac profectò, ut benè inquit Catechismus Romanus part. 2. titulo de Eucharistia, num. 30. *satis mirari fideles nunquam poterunt sancta Ecclesia perfectionem, ejusque gloria altitudinem: cum inter eam & cœlestem beatitudinem unus tantum gradus interesse videatur. Hoc enim cum Cœlestibus com nune est, ut utrique Christum Deum & hominem præsentem habeamus; sed quo uno gradu ab eis distamus, illi præsentem, beatâ visione perfruuntur; nos præsentem, & tamen ab oculorum sensu remotum, sacrorum mysteriorum admirabilî integumento se occultantem firmâ & constanti fide veneramur.*

Hanc nostram beatissimam sortem , quam tantò vobis optamus , quantò nobis eam eripere nitimini , expresserat etiam sacrum Tridentinum Concilium sess. 13. cap. 8. ubi ait , *Panem Angelorum modò sub sacris velaminibus edi , in cœlo absque ullo velamine manducatum iri*. Qua de causa verè catholicèque à Doctore Arnaldo eximio Eucharistiæ defensore , à Deo ad contundendas Ministri Claudii imposturas Ecclesiæ his temporibus proviso , scriptum alicubi est : *Eodem cibo nos Deum in Eucharistia pascere , quo Sanctos in cœlo ; nec aliud interesse , nisi quod nobis hîc aspectum ac sensibilem adimens suavitatem , utrumque cœlo servat*.

Cernite tandem , & ad discutiendas objectionum vestrarum offutias consideratè discrimen illud præclarum , quod Christianorum statum in hac vîa à Beatorum in Patria statu sejungit. Status Christianorum , ut à Cardinali Perronio notatum est , inter Judæos ac Beatos interjectus est. Christum Beati possident nullis figuris , nullis velaminibus obtectum. Judæi contrà non ipsum Christum habuerunt , sed Christi tantùm figuras atque velamina , ut agnum paschalem , & delapsum cœlitus manna. Christiani verò Christum quidem in Eucharistia verè ac realiter possident , sed adhuc sub figuris & velaminibus latentem , sub specierum nimirum Eucharisticarum involucris occultatum. *Tria* , inquit Eucherius , *sibi Deus tabernacula fecit : Synagogam , qua umbras habuit sine veritate : Ecclesiam , qua veritatem & umbras habet : Cœlum ubi nulla sunt umbra , sed nuda veritas*. At vos.

vos ex Ecclesiæ Christi statu exceditis , quem tum legi , tum gloriæ Paulus opponit , qui sine Christo solas figuras habetis. Legis enim est umbram habere futurorum , non ipsam substantiam rerum. Cavete ne quia vos ad sortem Judæorum dejicitis , & Ecclesiam ad Synagogam detruditis , à Beatorum item gloriosa sorte dejiciamini , qua Christus plenè & conspicuè æternùm possidetur.

### SPECVLATIO III.

*Vnanimis Ecclesiarum omnium Christianarum consensus ante ortos Calvinianos realem Christi corporis in Eucharistia præsentiam confitebatur , quæ proinde non potest non esse dogma catholicum. Inflexibilis Ministri Claudii in mentiendo pertinacia representatur.*

**H**Æc est tertia Catholicæ veritatis demonstratio theologica : cùm enim universa Christi Ecclesia , quæ est firmamentum & columna veritatis , in re tam gravi errare non possit , si tota Christi Ecclesia in hujus articuli fidem conspirarit , si ea fide ad se traditione derivata pacificè fruita sit , si hujus possessionis



nullum initium in historia Ecclesiastica monimentis adverti possit, si positionis illius nullum assignari possit exordium, nullus progressus, nullus author, nulli qui novitatem hæc in parte invexerint, si indigitari nequeat sæculum, annus, locus, quando & ubi hæc doctrina nata sit; si nulli proferri possint Catholici qui serpentis doctrinæ fautores impugnarint, nulla Concilia quæ se in illam armarint, manifestum est realem corporis Christi præsentiam dogma esse catholicum ubique & semper in Ecclesia retentum. Nam ut rectè arguit Tertullianus de præscriptionibus cap. 28. *Ecquid verisimile est, ut tot & tanta Ecclesia in unam fidem erraverint? Nullus inter multos eventus, unus est exitus. Variasse debuerat error doctrina Ecclesiarum. Quod apud multos (imò apud omnes ante fuscitatos ab erebo Calvinianos) unum invenitur, non est erratum, sed traditum.* At, fidem realis Christi in Eucharistia præsentia cum Ecclesia ortam esse, cum illa adolevisse, cum illa tranquillâ perpetuâque possessione viguisse inde manifestum est, quod assertio illa nullum agnoscit authorem præter Christum, nullos sectatores præter totum orbem quàm latè patet Christianum, Latinum pariter & Græcum; nullus illius architectus, nullum initium, nullus locus ubi exorta sit proferri potest: nulli Episcopi, nulli Pastores, nulli Doctores, nulla Concilia in illius sese novitatis exterminium instruxerunt. Ergo præsentia realis Christi in Eucharistia non nisi ab hæreticis erroris insimulari potest; neque enim de illa hæresi, si hæresis esset, aliter quàm de aliarum hæreseon ingressu



gressu & progressu judicare nemo prudenter potest.

Dicere verò cum Calvinianis, tanta universæ Ecclesiæ conspiratione novitatem suam opprimi sentientibus, & novissimè cum Claudio Charentonensi universam Ecclesiam per totum terrarum orbem diffusam insensibili fuisse depravatione corruptam, & Monachum Paschasium totum orbem Latinum unà & Græcum vel momento, vel sensim sine sensu fefellisse, atque mysterium captu difficillimum & juxtà falsissimum nullo repugnante persuasisse, hoc, inquam, dicere est ipsa absurditate absurdius, & omnibus non solum Christianis de divina erga Ecclesiam providentia sensibus injurium, sed etiam solitis communis prudentiæ notionibus & elementis adversum, ut egregiè aureo de perpetuitate fidei opere Dominus Arnaldus prosequitur.

Scimus equidem Apostolos rudes, pauperes, & ab omni prorsus humano subsidio ac solatio desertos de mundo infideli triumphasse, & Crucifixi cultum Judæis scandalum, Gentibus stultitiam, & religionem à se satam propagasse. At tantæ molis opus non sine sensu, non cum stupore & somno orbis, non per irrepentem nullo advertente mutationem; sed miraculis, sed prædicatione, sed concertationibus, sed passionibus & pressuris infinitis, ac demùm sanguine fuso compleverunt. Et quanvis veritati tandem mundus concesserit, illi tamen initio obstitit universus iis armis, iisque clamoribus, quæ tractatu de Fide, dissertatione speciali recensuimus. At verò quis mentis compos credat vel credere possit Monachum in Gallia

reclusum totam Rempubicam Christianam  
 ubique gentium diffusam, nullo observante,  
 omnibus ad unum dormientibus corrupisse; &  
 feliciter Cæsare, qui simul venit, vidit, vicit,  
 omnes fideles suis erroribus imbutos in obse-  
 quium falsitatis captivasse? Et quomodo tan-  
 dem? Non miraculis, ut Apostoli; non san-  
 guine, ut Martyres; non facundia, ut Ora-  
 tores; non argumentis, ut Philosophi; non  
 armis, ut Turcæ; non plausibilis doctrinæ  
 propositione, ut alii seductores; sed languore,  
 sed incuria, sed inactione oscitantes oves si-  
 mul & Pastores subjugasse. Præsertim quia Pas-  
 chasius ipse tum libro de corpore Domini,  
 tum epist. ad Frudegærdum, & in commenta-  
 riis in Matth. testatur doctrinam suam univer-  
 salis esse Ecclesiæ de Eucharistia sensum. *Quar-  
 vis*, inquit, *ex hoc quidam de ignorantia er-  
 rent, nemo tamen est adhuc in aperto, qui hoc  
 ita esse contradicat, quod totus orbis credit &  
 confitetur. Videat ergo qui contra hoc venire vo-  
 luerit, quid agat contra ipsum Dominum, &  
 contra omnem Christi Ecclesiam. Nefarium ergo  
 scelus est orare cum omnibus, & non credere quod  
 Veritas ipsa testatur, & ubique omnes univer-  
 saliter verum esse fatentur. Quomodo autem  
 sine amentia hanc fidem totius orbis doctri-  
 nam pronuntiasset, cujus ipse author fuisset,  
 cuive mendacii probum totus orbis in os in-  
 jecisset.*

Dices cum Calvinistis, totam quidem Eccle-  
 siam visibilem & aspectabilem in errorem pro-  
 lapsam impegisse, Ecclesiam tamen invisibi-  
 lem orbi ignotam, avitam fidem retinuisse.  
 O ridiculum sic respondentium caput; nisi  
maius

maius deplorandum ! Quasi verò figmenta figmentis addere, & mentem Christianorum pacere chimæris satis sit ut communibus notionibus renuntiemus, præfatæque demonstrationis vim invincibilem eludamus? Itaque scilicet Ecclesiâ Christi totâ sædè collapsâ veram fidem soli invisibiles in montibus inaccessis & inviis solitudinibus illibatam servarunt, ibique pro sua summa pietate omne Eucharistiæ sacrificium veluti abominationem repudiaverunt, pro sua summa pœnitentia omnes ab Ecclesia visibili indictas abstinentias, præscriptaque jejunia de medio sustulerunt, pro sua summa in visibiles præpositos & animarum ductores observantia omnem hierarchiam uni Capiti veluti centro innixam, per Episcopos inferioresque ministros distinctam susque deque miscuerunt & perfunderunt ? Certè Homeri commentis, ipsis Æsopi fabulis prudentius quàm adeò portentosis Calvinianorum ultrò sese occæcantium deliramentis crederemus.

Videsis quæ dissertationibus præambulis secundi & tertii voluminis latè persequuti sumus, ubi Fidei Christianæ Religionisque Catholicæ, cunctaque proinde ejus mysteria non methodo discussionis, quâ singula quæque probantur, sed methodo præscriptionis, quâ capitalis aliqua controversia, unde cæteræ definiri possunt, stabilitur, breviter atque summatim demonstravimus. Quæ enim ibi de antiquitate, universalitate, & consensione Ecclesiæ diximus, veritatem realis Christi in Eucharistia præsentia omnino methodo illa præscriptionis convin-

*Ejusdem demonstrationis prior confirmatio.*

Confirmatur : Supponamus aliquem esse sincerum veritatis amatorem, qui post accuratè perpenſa Catholicorum & Calvinistarum hinc inde argumenta pendulus hæreat, neutriusque partis rationum momentis perſuaſus anceps fluctuet & ſuſpenſus. Nullum enim arbitror adeo iniquum æſtimatorẽ, ut ſibi perſuadeat, Patres nihil Catholicorum aſſertioni favere, cùm ipſe Occolampadius, referente Lavatero *hiſtor. ſacra de cœna Domini p. 9.* difficultatum nodos non lectione & testimoniis Patrum, ſed *ſemota hominum authoritate* diſſolvere potuerit; cùm Magdeburgenſes antiquiores Patres admiſſæ tranſubſtantiationis accuſent; cùm Scaliger, ut in ſua Scaligeriana, pag. 78. videre eſt, omnes Patres ſacrificiũ Eucharistiæ agnoviſſe & confeſſos fuiſſe miretur; cùm Caſaubonus nulli Proteſtantium doctrinâ ſecundus, epiſt. ad Wittemgobardum ultro fateatur ſe ob tantam diſcrepantiã & immane diſcrimen quod interſt inter doctrinã Proteſtantium & veteris Eccleſiæ de Euchariftia eodem conturbari; cùm Socinius epiſt. ad Radecium, pag. 113. veritate coactus profiteatur, Calvinianis & Lutheranis, ſi Patrum authoritate difficultas hæc definienda ſit, cauſã cadendum eſſe; cùm Miniſter Daillæus lib. de vero Patrum uſu, cap. 2. Patres ambiguas explicatuque difficillimas protuliſſe ſententias attesteſtur,

Hoc



Hoc ergo supposito, sincerus ille veritatis quæsitō dubitantis ut animi motus sedet, si Christianarum omnium Ecclesiarum realis Christi præsentia fidei adhærentium consensu concedat, profectò à christianæ prudentiæ regulis haud recedet, continuò nisi cedat recessurus. Etenim in hoc interiori mentis certamine sic apud se discurrere tenetur: Si Scripturas consulo, implicor dubiis, nec expeditior; si difficultates assiduâ Patrum lectione vincere studeo, occurrunt tenebræ densiores, quas inter lux nulla affulget; sonos diversos audio varias in partes vocantes; hinc apertas pro Romanæ Ecclesiæ fide sententias lego, istic propositiones Lutheranorum causam juvantes adverto, illic assertiones Calvinistis in speciem faventes observo, veritatem cujus uno amore teneor non invenio; si Theologorum lucubrationes evolvo, ubique argumenta fortissima plena manu cerpo, solutiones infirmas; strenuos cerno aggressores, imbelles defensores. Quid ergo in illis jactatæ mentis fluctibus opus est facto? Abigenda mihi est singularis argumentorum discussio quâ angor, & ad Ecclesiæ universalis antiquitatem, universitatem, consensionem veluti ad tutissimum portum superest confugiendum. Reali corporis Christi præsentia adhæsisse totum orbem Christianum ante transfugam Calvinum scio, illi asserto assensam esse Ecclesiam Latinam universam cerno, nec assensus illius inîmum invenio; illi Ecclesiam Græcam in aliis ei infensissimam consentire video, in eam quoque sententiam alias Christianas societates Latine per æquè atque Græcæ Ecclesiæ hostes inisse com-

pertam

pertum est; nullam hujus Catholicæ fidei mutationem, vel vicissitudinis obumbrationem, aut vestigium ullum in Ecclesiasticis monumentis cerno: quam verò insensibilem variationem Calvinistæ, & eorum nomine Minister Claudius comminiscuntur, chimæricam esse sensus ipse communis per se convincit. Quid ergo vel Deo gratius, vel rectæ rationi conformius agendum superesse potest, quàm ut sepositis infirmitatis meæ dubitationibus ex offusa humanæ menti caligine enatis, affulgenti Catholicæ veritatì concedam; quàm ut credam quod universa credit, universa semper & ubique credidit Ecclesia, quodve neque crederet, neque cum tanta conspiratione credidisset, nisi fidem illam perpetua traditione veluti canali perenni recepisset? Ita me gerens si erro, prudenter erro, tutò erro, inculpabiliter erro. Absit autem ut ita credens in errorem abripiar, cùm Sanctis Augustino & Paulino authoribus, *Vacare non potest quod universa facit, orat, aut adorat Ecclesia. Et si quid universaliter per orbem frequentat Ecclesia, quin ita faciendum sit disputare, insolentissima est insania.*

*Posterior ejusdem demonstrationis confirmatio.*

Confirmatur & illustratur ampliùs ex Domino Arnaldo? Quævis sola Catholicæ Ecclesiæ authoritas ad convincendam damnandamque Calvinistarum sententiam per se sufficeret, tantumque absit ut benè inferant Protestantes

ab ea se discedere oportere, quia in errorem prolapsa est, ut potius, iustiusque inferendum sit, in grandes ipsos cecidisse errores; quia cum errorum maximus sit schisma & separatio ab Ecclesia Catholica, profectò non amore veritatis, sed spiritu erroris ab ea recedunt quotquot recedunt: arbor enim bona non potest malos fructus facere, nec veritas immanissimum schismatis crimen parere. Quare non possunt Calviniani in secessionis suæ speciem Ecclesiæ Catholicæ errores obtendere, sed in errorum suorum manifestissimum argumentum suam ab Ecclesia Catholica fugam assumere, nec suppositionibus obscuris claram veritatem, sed clarâ veritate incertas & obscuras suppositiones evertere debent.

Quavis, inquam, hoc ita sit, illud saltem nullus quâlibet perversax vel morosus inficiari poterit vel audebit, Ecclesiam Catholicam non esse erroris insinuandam aut damnandam, nisi ob certas & evidentes prolapsiones, nec novam sectam erigendam amplectendamve, nisi cogente veritatis luce, quæ Ecclesiæ sit authoritati anteponenda. Si enim temeritate non vacat iudicium quò persona privata absque manifesta ratione damnatur, quæ æquitate totius Ecclesiæ consensus, imò & Christianarum omnium ante exortum Calvinismum societarum conspirans præsentia realis Christi in Eucharistia fides erroris, subindeque iustæ ab ea secedendi datæ occasionis accusabitur atque damnabitur? Accedit quod cum Calvinistæ sint origine Catholici, ex Romanaque Ecclesia, unde exierunt, oriundi; cum ab ea Ecclesia Scripturas sacras mutuati sint, articulos fidei

didice-

didicerint, quæ retinent sacramenta susceperint, nisi omnes naturæ & honestatis sensus exuerint, nisi adamantinam vel brutalem indolem induerint, optare veluti connaturaliter tenentur Ecclesiam illam matricem, originalem, & radicalem esse, si fieri posset, in doctrina sanam, labisque puram. Unde nec possunt, nec debent repugnante insita viris honestis & liberalibus propensione, illam erroris nisi aperitissimis coacti rationibus insinulare, multoque minus matris suæ errores nefandi more Chami propalare & ridere, nisi ob manifestam fidei in discrimen vocatæ vitandam iacturam. Maxime quia cum Ecclesia Catholica doctibus quamplurimis, iisque aspectabilibus præstet cæteris omnibus sectis, illisque prærogativis alumnos suos & doctrinæ suæ professores veluti artissimis sibi vinculis colligatos teneat, antiquitate nimirum, consensione, Pastorum successione, doctrinæ possessione & præscriptione, professorum sanctimonia, miraculis, aliisque alibi operosè memoratis, non debemus nisi errorum evidentiam persuasi ab ea Ecclesia secedere, nec ad novam sectam nisi aperta veritate allekti transvolare: quin & in dubio societatem antiquiorem, universaliorem, & veræ Ecclesiæ notis insigniorem novæ recentique cæteris paribus anteponeere jure possumus & debemus. Ergo sive doctus sis, sive ignarus, non potes in controversia Eucharistiæ ab Ecclesiæ Catholicæ sensibus recedere, & ad Calvinianas partes transire: quia doctus in singularem examine probationum non evidentiam fidei catholicæ adversam invenit, sed ad summum difficultatem sentit; indoctus verò eas in exam-

men



men vocare nec scit, nec valet. Ergo utique sola superest Ecclesiæ universalis, autoritas & Christianarum omnium societatum consensus, qua difficultatum omnium nodos dissolvere, dubia omnia sopire & prudenter debet, & facile potest.

Certè si in dubiis tutior pars est eligenda, eaque sententia cæteris præferenda, quæ magis rationi consentanea, magisque à cupiditatis laqueis aliena est, ille nec peccat, nec puniri à Deo proinde potest, qui in materia Religionis viam illam ingressus fuerit, quæ tutior, probabilior, & à cupiditate remotior apparuerit: neque enim divina Providentia sivit, finit, vel sinere unquam potest, tam innoxium rationis usum ad errorem viam sternere & munire. Atqui in controversia Eucharistiæ Ecclesiæ Catholicæ indivalsè adhæret, viam tutiorem, probabiliorem, atque à concupiscentiæ insidiis immuniorem insistit. Etenim qui attentè considerat omnes Christiani orbis fideles realem Christi corporis in Eucharistia præsentiam adversus paucos Calvinistas firmiter credere, omnes ante Berengarium continuò damnatum semper & ubique credidisse; generalem verò fidei mutationem insensibilem commentum esse ipsis dormientium exerrationibus intolerabilius; videt pariter, nisi concupiscentiæ nebulis occæcetur, tutius esse mentem suam toti Ecclesiæ supponere; minùs quoque periculosum esse universæ Christianarum omnium societatum consensioni, quàm privato spiritui credere; probabiliusque esse se potius quàm omnes Christianos falli. Profectò hominis sic comparati iudicium rationis unius partus est,

NON

G4D

B

G1B

G1

D

G4D

G4

non concupiscentiæ; humilitatis fructus, non superbiæ: sicut è contra oppositum iudicium privatos sensus Ecclesiæ consensioni antepo-  
nens non nisi à cupiditate & superbia extol-  
lente se adversus omne quod dicitur doctum  
& sanctum, derivatur. Quis autem nisi com-  
munibus pietatis notionibus renuntiaverit, cre-  
dat rationem, & humilitatem fidei & promif-  
sionibus divinis innixam viam esse quæ ducat  
ad perditionem, temeritatem verò & superbiam  
ad veritatem & vitam iter aperire? Si ita sit,  
de providentia divina, de religione, de Chri-  
stianismo, de sensu communi actum esse con-  
tendo. Si ita sit, ratio fallet, prudentia pecca-  
bit, virtus in malum propellet, religio apostata-  
re faciet, & quod horribile dictu est, Deus  
ipse decipiet.

Nec possunt Calviniani conscientia sola-  
men aliquod, vel dubitationum quietem in suæ  
authoritate Ecclesiæ invenire. Cum enim unum  
ex præcipuis Calvinianæ doctrinæ capitibus sit  
infallibilitatem nulli esse Ecclesiæ asserendam,  
quæ proinde communioni ipsorum eximia esse  
non potest, planum est Calvinistam non posse  
suborta dubia suæ authoritate Ecclesiæ com-  
pescere, nec Pastorum Ministrorumve suorum  
voci juxta sua etiam principia cedere. Unde  
Calvini discipulis illud veridicè regerere, quod  
Manichæis olim Augustinus, licet: *Vos tam  
pauci, & tam turbulenti, & tam novi, nemini  
dubium est, quin nihil dignum authoritate pro-  
feratis.* Præsertim cum juxta Calvinistas nulli  
homini, vel Pastori, vel Concilio, sed soli Scri-  
pturæ determinandorum de fide dubiorum fa-  
cultas asserta sit. Quid ergo ille faciet, cui  
lectio.

lectio Scripturarum difficultates & dubia non remover, sed auger? An transibit ad novas Calvinianæ partes? Sed enim id non licet, nisi veritatis evidentiâ cogatur. Atqui nullam apud Calvinianos inveniri evidentiâ sibi evidens est; hinc enim tot dubitationum æstus proficiscuntur. An neuter & pendulus nulli sectæ determinatè adhærebit, vel cuique pro loco & tempore occurrenti inserviet? At teste Apostolo sicut unus Deus, ita una fides; & pluralitas Religionum, nullitas Religionum. Ergo cùm Calvinista esse non possit sine evidentiâ quæ sibi deest, neuter esse sine impietate nequeat, catholicus humilitate evadat necesse est. Quia sola catholica Ecclesia evidentiæ defectum auctoritatis sibi eximiat, sibi à Deo promissâ, sibi ab Apostolo columnam & firmamentum veritatis ipsam nuncupante, assertæ pondere & lites decidere, & controversias definire, & dubia sedare, & tranquillam securitatem præstare potest.

Hactenus expositam invincibilis demonstrationis vim variis artibus eludere Calviniani conati sunt. Aliqui, in quibus nonnullæ bonæ fidei reliquiæ supersunt, illud ultrò fatentur, quod sine effronde audacia negari non posse arbitrati sunt, Græcos nimirum realem corporis Christi in Eucharistia præsentiam, veramque transubstantiationem confiteri, ac proinde Catholicam nostram assertionem ante Lutheranos & Calvinianos ab omnibus omnino Christianis unanimi fuisse consensione receptam. Ita sponte sua fatetur Crusius linguarum Græcæ & Latinæ apud Lutheranos Tubingenses Professor. Ita Sandus Anglus *lib. de Religionum*

*gionum statu*, cap. 42. Ita Frobenius Scotus *consider. modest. de Eucharistia*, cap. 4: Ita Donauverus *lib. de Ecclesia Græcanica hodierna*, pag. 46. Alii hanc quæstionem veluti scopulum fugientes ad sibi tutius silentii asylum confugiunt. Sed alii generosiores, rati licitum esse negare quidquid sibi obesse vident, unanimem illam, tametsi patentem utriusque Ecclesiæ consensionem, reclamante scientiâ, repugnante conscientiâ, asseueranter inficiari non dubitarunt.

*Ministri Claudii mendacia ob  
oculos posita.*

Sed nulli post hominum memoriam hæretico aut impostori mentiendi licentiâ & contumaciâ, atque inter mentiendum affectatâ securitate cedit novissimus Minister Claudius. Subodoratus enim Ecclesiæ Græcæ cum Latina circa Eucharistiam consensione sectæ suæ apostasiam manifestissimè revinci, & Ecclesiam Romanam ab omni innovationis labe purgari, semoto omni pudore, depositaque fronte, palam, apertè, asseueranter scribere non erubuit Græcos aliâve Orientales Christiani nominis societates in articulo Eucharistiæ ab Ecclesia Romana dissidere. Et quanvis valeat, ut loquitur Augustinus, ad seipsam persuadendam ipsa evidentia, hanc tamen ultrò se ingentem nihil veritus, ea pernegare obfirmatè decrevit, quæ antecessores veritate coacti ultrò confessi fuerant, vel ne confiterentur, silentio prætermiserant. Sed nihil mirum: illud enim innatum est



est hæreticis omnibus ingenium in infestam sibi veritatem furere, & eâ dum opprimuntur sese simul jactare. Homines etiam bonos & Catholicos interdum falli, atque intricatis quæstionibus implicari humanum est: sed affulgentem veritatis splendorem repellere, & verum falsum, falsum verum audacter pronuntiare, hæreticorum character est singularis.

Ut autem eo spiritu Ministrum Claudium agi liquidò constet, unâque clareat & quantum veritatem sibi notam odio habeat, & adversus illam nihil possit, legendus est integer Domini Arnaldi liber, ubi hanc facti quæstionem tantâ diligentia tantâque accuratatione oculis subjicit, indeque conclusiones adeo necessarias deducit, ut illam utriusque Ecclesiæ consensionem sensibilem & palpabilem efficiat, ejusque consensionis negationem non minus iniquam demonstrat, vel absurdam, quàm si quis contenderet Ecclesiam Romanam de præsentia corporis Christi in Eucharistia dubitare, vel S. Thomam Aquinatem, vel Cardinales Bellarminum aut Perronium nunquam de Eucharistia nisi in sensu Calvinii aut Lutheri scripsisse.

Quis enim nisi voluntariis tenebris exoculatus credat Michaëlem Cerularium aliosque Orientales, qui omnem infamandæ Latinæ Ecclesiæ vel levissimam occasionem & prætextum avidissimè nanciſcebantur, quive in sui schismatis speciem usum panis azymi, omissionem Alleluia tempore Quadragesimæ, aliâque minutissima obtendebant, prætermisso gravissimum præsentia realis & transubstantiationis caput, si figurativam tantum Christi præsen

præsentiam ipsi credidissent ; prætermittendos ,  
inquam , anno 1053. quo recens erat & ubique  
nota Berengarii circa Eucharistiam sententiæ  
damnatio?

Quis crederet Cardinalem Humbertum , &  
Monachum Nicetam causam Græcorum agen-  
tem in illa concertatione gravissima , quam Ba-  
ronius sub finem tomi undecimi refert , nihil  
sibi de Eucharistiæ veritate objecisse , sed potius  
utrumque hanc communem fidem supposuisse ,  
ex eaque argumenta ad juvandam suam causam  
deprompsisse.

Quis crederet Berengarianos vel totius Ec-  
clesiæ Græcæ fidem ignorasse , vel sibi notâ  
contra adversarios sibi novitatem & sectato-  
rum paucitatem exprobrantes non usos esse.  
Quin potius Lanfrancus *lib. de corpore Chri-  
sti , capite 22.* ipsis opponit Romanæ Ecclesiæ  
de Eucharistia fidem esse communi Latino-  
rum , Græcorum , Armenorum , & omnium  
cujusvis nationis Christianorum calculo pro-  
batam.

Quis crederet Theophilaetum Archiepisco-  
pum celebrem in speciali de erroribus Latino-  
rum libro solam additionem termini *FILIOQUE*  
in Symbolo reprehendisse , & realem Christi  
præsentiam non objecisse ? At quomodo fidem  
illam calumniaretur , quam verbis ipsâ luce cla-  
rioribus *in cap. 26. Matth.* ipse docet : *Porrò di-  
cens , Hoc est corpus meum , ostendit quod ipsum  
corpus Domini est panis qui sanctificatur in al-  
tario , & non respondens figura. Non enim dixit ,  
Hoc est figura , sed hoc est corpus meum. Ineffa-  
bili enim operatione transformatur , etiamsi nobis  
videatur panis ; quoniam infirmi sumus , &  
abhorre*

abhorremus crudas carnes comedere, maximè hominis carnem: & ideo panis quidem apparet, sed reverè caro est. Et in cap. 14. Marci: Hoc est corpus meum, hoc inquam quod sumitis. Non enim figura & exemplar quoddam Dominici corporis panis est, sed in illud ipsum convertitur corpus Christi. Dominus enim dicit, Panis quem ego dabo, caro mea est: non dixit, Figura est carnis mea, sed caro mea est. Et iterum: Nisi ederitis carnem filii hominis. Et quomodo caro non videtur? O homo, propter nostram infirmitatem istud fit. Quia enim panis quidem & vinum ex his sunt quibus assuevimus, ea non abhorremus: sanguinem vero propositum & carnem videntes, non ferremus, sed abhorreremus; idcirco misericors Deus nostra infirmitati condescendens, speciem quidem panis & vini servat, in virtutem autem carnis & sanguinis transelementat.

Quis non nisi post exutum sensum communem effutire præsumat, duodecimo sæculo, in quo pro expeditione Jerosolymitana Orientis Provinciæ Latinis hominibus refertæ sunt, nec commercio solum & armis, sed & matrimonii vinculo Latini cum Græcis conjuncti sunt; Græcani tamen Ecclesiam Latinæ de Eucharistia fidem ignorasse, vel cognitam non impugnasse, improbasse, exprobrasse, vel certè obiectisse? Latinos etiam Græcorum apud quos convivebant, communem de figurativa duntaxat corporis Christi præsentia sententiam ignorasse, & ita ignorasse, ut omniscius & oculatissimus Bernardus ad Eugenium scribens dicere potuerit, Græcos nobiscum esse & non esse, junctos nempe fide, pace divisos; & Petrus Cluniacensis, qui Berengarianos ex professo confuta

confutaverat, Imperatori & Patriarchæ Constantinopolitano precum communionem obtulerit, ut *lib. 4. epistol. 39. & 40.* videre est.

In cujus mentem non omninò à rationis lumine desertam venire potest, Ecclesiæ utriusque innumeros Scriptores dimensionum capita & dissidiorum causas ex professo tractantes nunquam de Eucharistia meminisse? Certè nisi una omnium fuisset concorsque sententia, tantì momenti discrimen minimè tacuissent, qui alia minutiora & latentiora, putà usum azymorum, & Spiritus Sancti à Filio processionem noverunt & acerrimè refutarunt. Quis aliqua veri specie dicat, Euthymium in sua Panoplinia hærescon catalogum texentem nullam præsentia realis, transubstantiationisque mentionem fecisse, sed potiùs Paulinianos realem Christi præsentiam inficientes iisdem Gregorii Nysseni, & Joannis Damasceni micantissimis testimoniis, quibus Catholici adversum Calvinianos pugnamus, confutasse? Quis porrò credat, nisi in insulstatis extremum prolapsus fuerit, ea testimonia produxisse Euthymium vel producere potuisse, si Calvinianæ sententiæ adhæsisset? Dicant sodes Calviniani, num ea ipsi loca libenter adhiberent, si quis ab eis fidei suæ expositionem sciscitaretur? Accedit Euthymium Catholicam nostram assertionem in Matthæum cap. 64. limpidissimè docuisse: *Quemadmodum, inquit, supernaturaliter assumptam carnem deificavit, & hæc ineffabiliter transmutat in ipsum vivificum corpus, & in ipsum pretiosum sanguinem suum.*

Mitto



Mitto alia clarissima illius ætatis Authorum testimonia sole ipso lucidiora, quibus Ecclesiæ Catholicæ de Eucharistia fidem iisdem verbis efferunt, adversus eam eadem sibi difficultatum momenta objiciunt, illaque iisdem responsionibus explicant, quæ à Catholicis passim usurpantur. Qui sanè agendi modus absurdus, ridiculus, fatuus, propriæ causæ proditorius, prævaricatione fraudeque plenissimus foret, si unam figuræ aut virtutis Calvinianorum præsentiam credidissent. Mitto Nicolai Methonensis Episcopi librum, in cujus principio, medio, fine præsentiam realem & transubstantiationem affirmat, probat, in negantesque indignatur. Et tamen Minister Claudius eiuratâ omni bonâ fide, & solitâ suâ in erroribus etiam conspicuis & sibi notis defendendis contumaciâ Authorem illum in suas partes repugnantem inflectit. Expecto donec S. Thomam Aquinatem, Bellarminum, & Coëffetæum suæ sectæ defensoribus accenseat.

Mitto professionem fidei *tomo 2. Bibliotheca Patrum Græcolatin.* relatam, è Bibliotheca non Vaticana, sed Principis Calviniani erutam, quam Sarraceni ad fidem conversi emittebant, in eaque panem in corpus Christi, vinum in sanguinem ejus secundum veritatem converti confitebantur. Hæc, inquam, mitto; quia Ecclesiæ Græcæ & silentium & voces, & scripta & disputationes, & amicitia & odia, & bellum & pax, & omnes demùm hujus ætatis circumstantiæ communem totius Christianismi mentem significantissimè vel stupidissimis demonstrant.

Eandem Orientalium Ecclesiarum cum Latina fidei consensionem evidentissimè declarat sequentium sæculorum ad nos usque non interrupta Græcorum de Eucharistia sententia. Etenim sæculo 13. in quo ob bellorum frequentiam & Latinorum victorias Græcia Latinis referta erat, nunquam Græci circa Eucharistiæ substantiam ullo unquam vel minimo erroris rumore aspersi sunt, nullaque illis mota lis, nisi ob celebrem illam de azymis controversiam. Græci etiam nullam calumniandæ Latinæ Ecclesiæ, cujus infensissimi erant, occasionem ex Eucharistiæ fide nacti sunt, tam commodam, tam ultrò oblatam & simul justissimam non prætermisuri, si Latini in articulo Eucharistiæ aberrassent.

Nec poterant Orientales Occidentis de Eucharistia sensum ignorare, quem in Magno Lateranensi Concilio Innocentius III. non paucis Græcis Palæstinisque Præsulibus luculenter expressit; quémve in formula fidei ad Imperatorem, & Græcos transmissa Urbanus IV. referente Raynaldo sic exposuit: *Sacramentum Eucharistia ex azymo conficit Romana Ecclesia, tenens & docens, quod in ipso Sacramento panis verè transubstantiatur in corpus, & vinum in sanguinem Domini nostri Iesu Christi.*

Quare tota utramque inter Ecclesiam rixarum, dissensionum, & nefandæ schismatis origo unus erat de processione Spiritus sancti à Filio articulus. Quod etiam ex opusculis à S. Thoma contra Græcos elaboratis manifestum est. Cùm enim S. Doctor esset ex una parte  
Catho

Catholica de Eucharistia fidei zelantissimus, & ex alia Græcorum dogmatum callentissimus, utpote ad ea examinanda ab Urbano IV. electus, & ab ipsis Græcis in dubiis rogatus & consultus, ut patet ex ejus Opusculo sic inscripto: *Declaratio quorundam dubiorum contra Græcos, Armenos, & Sarracenos*; & à Confratribus Ordinis sui, vel saltem à Generali Ordinis Magistro, qui Græcorum errorum per Dominicanos ibi degentes vel crebris litteris, vel in Comitibus Generalibus, ad quæ singulis annis Provinciarum Præpositi eo tempore in Ordine nostro conveniebant, conscius erat, plenissime eruditus. Et tamen S. Thomas nullibi Græcos negatæ transubstantiationis vel præsentia realis accusat. Maxime quia cum S. Thomas opusculo citato referat *Sarracenos impropere Christianis*, quod in Altari comedunt Deum suum; Christianis, inquam, Orientis, cum de hoc à Cantore Antiocheno moneatur, non potuit D. Thomas, non potuit universa Ecclesia Latina Græcæ Ecclesiæ fidem ignorare, quibus ipsa Sarracenorum dubia non erant ignota: non potuit etiam Ecclesia Græca omnium Latinorum etiam secum conviventium fidem ignorare, quæ Sarracenorum scrupulos & impropria dignoscebat.

Idem consensus claruit in Concilio Lugdunensi Oecumenico, ubi formulam supra positam juramento firmavit Imperatoris nomine Georgius Legatus, necnon & Nuncius ab Ephesino Metropolitano aliisque Græcis Episcopis ad Concilium directus.

Eadem fidei ejusdem conspiratio sæculo de-

cimoquarto radiis fulsit ipsa meridiana luce splendidioribus. Tunc enim Christus in Eucharistia præsens propalam nullo Græco reclamante à Latinis adorabatur. Et cùm hujus ætatis Scriptores dissertationibus variis ferverent, scriptisque fermè infinitis utriusque Ecclesiæ discrimina notare & indigitare ex professo satagerent, in nullius tamen mentem venit vel Græcos negatæ transubstantiationis accusare, vel Latinos ob assertam transubstantiationem erroris insimulare. Tunc Dominicani & Franciscani, id est totidem transubstantiationis defensores docti, oculati, & eorum nonnulli fidei Quæsitores Græciam frequentabant. Itane verò credibile est, Doctores illos, qui minimos nævos detegebant, qui pulveres & festucas in examen vocabant, errorum palpabiles trabes non advertisse? Itane Græci adeò occæcati credendi sunt, ut publicas Christi realiter in Eucharistia præsentis confessiones, & solennissimas in apertis supplicationibus, in Ecclesiis, in infirmorum Viaticis deferendis adorationes non viderint planè; vel ita maligni, ut eam potuerint hæresim in omnibus libris suis contra Latinos editis (& sunt sanè multi, quorum indicem dat Docteur Arnaldus *lib. 3. cap. 7.*) silentio supra pisces taciturniore præterire?

Sed quid opus est conjecturis & argumentis negativis, tametsi hac in parte invictissimis, & hujus nostræ fidei præscriptionem demonstrantibus, cùm veritas per se luceat, & Græci calamo Nicolai Cazabilæ Episcopi Thessalonicensis suos & suorum de Eucharistia sensus Ecclesiæ



clēsia Romanæ planè, consentaneos ob oculos in suæ Liturgiæ expositione ita expandant, ut D. Thomæ Aquinatis, quem in articulo Processionis Spiritus sancti à Filio datâ operâ refellit, verborum proprietatem & nitorem quoad punctum præsentia realis & transubstantiationis adæquet, eandemque fidem non semel & iterum, non obiter, strictim, & defunctoriè; sed fusè, sed ex professo, sed cum iisdem fidei, reverentiæ, & pietatis igniculis, quos apud Granatensem legere est, exprimat? Videsis prælaudatum Arnaldum *lib. 3. cap. 8.* ubi & Claudii futilissimas, & quæ à nobis referantur indignissimas responsiones summâ patientiâ recenset, & majori evidentiâ confutat.

Eadem quoque fidei concordia sæculo decimoquinto nituit, tum in scriptis Simeonis Archiepiscopi Thessalonicensis à Patre Goar in sua Euchologia relatis; tum ex unione Ecclesiæ Græcæ cum Latina in Concilio Florentino inita. Dicere verò Episcopos utriusque Ecclesiæ per biennium congregatos, & minima quæque doctrinæ dissidia ventilantes, quid circa Eucharistiæ substantiam utraque Ecclesia crederet, quidve sentiret ignorasse, vel scientes nefariè omnes dissimulasse, vel dissimulantium neminem finito Concilio fallaciam retexisse, est ultimum possibilis fatuitatis extremum, desperatæ causæ desperata defensio, immò & manifesta agnitæ veritatis repudiatio. Etenim *sess. 25.* Græci panem fieri corpus Christi Latinis confessi sunt, omnesque uno excepto Maroo Ephesino huic articulo subscripserunt: *In azymo sive fermentato corpus Christi veraciter conficitur.* Sed ad vomitum, inquires, reversi

in patriam Græci haud multò post redierunt. Scio equidem, sed nullum inde causæ meæ detrimentum, imò potius compendium ingens accerferetur. Etenim Græci in patrium solum reversi, proindeque liberi, nullo præsentis Pontificiæ obice vel timore præpediti, & ob antiquas in Ecclesiam Latinam similitudines inuitæ unionis dissolvendæ cupidissimi, si Romanam sibi invisam Ecclesiam in substantia Eucharistiæ errasse advertissent ( non potuerant autem non advertere post continuum familiaris convictus biennium, post quotidiana, quibus intererant Missarum solennia, post frequentissima & in oculos incurrentia erga Eucharistiæ Sacramentum publicæ pietatis officia ) nullum sanè vel speciosiore rescindendæ retractandæque unionis colorem, vel Latinæ Ecclesiæ accusandæ justiore causam, vel commodiorem votis suis satisfaciendi opportunitatem habuissent, ut schismatis objectum sibi nomen & crimen à se deprecarentur, in solamque Romanam Ecclesiam refunderent. Sed tantum abest, ut fovendi inde schismatis occasionem nacti fuerint, ut in ipsis potius, quas contra Romanam Ecclesiam ediderunt, iratissimis lubricationibus, transubstantiationis fidem disertissimè expresserint, ut ex Marci Ephesini Ecclesiæ Latinæ hostium infensissimi opusculo de forma Eucharistiæ perspicuum est; ibi enim asseveranter pronuntiat, verba Sacerdotis *re-ipsa transmutare jam dona in ipsum prototypum illud corpus, & sanguinem dominicum.* Quod ex aliis quoque Græcorum libris posteris relictis liquidò constat, in quibus transubstantiationis doctrina passim supponitur, passim iisdem

iisdem quibus Catholici utuntur verbis, eadem, & interdum majori energiâ exponitur. Videatur Dominus Arnaldus *lib. 4. cap. 3.*

Consensus verò mutuus sæculi decimisexti visus est tum in litteris Jeremiæ Patriarchæ Constantinopolitani ad Lutheranos & Lutheranorum ad ipsum reciprocis; ubi Græcos non solum realem corporis Christi in Eucharistia præsentiam, sed & transubstantiationem sincerè confiteri apertè expressit, nec dubitarunt Lutherani, ultrò professi se in puncto transubstantiationis à Græcis dissidere. Et jam post centum fluxos annos Ministro Claudio dicere licebit, nec Jeremiam præsentiam realem & transubstantiationem significare voluisse, solamque virtutis & efficacitatis præsentiam agnovisse; nec Lutheranos Patriarchæ mentem limpidissimis verbis expressam assequutos esse, atque diuturnum litterarum commercium perpetua æquivocatione, perpetua cæcitate, perpetua hallucinatione laborasse; & reclamante sensu, reclamantibus oculis, repugnante omni probi hominis honestate & sinceritate illi asseverare & jurare licebit, Jeremiam à suis partibus stetisse; Jeremiam, inquam, à quo Lutherani Witembergenses non alia de causa se discedere professi sunt, nisi quia præter præsentiam realem etiam transubstantiationem in ejus litteris, & ejusdem fidei confirmationem in sequentibus epistolis, responsionibus, & replicis adverterunt. Si ita sit, bonum malum, verum falsum, totum orbem brutescere, totum cæcutire, sine pudore effutire licitum erit, solida & ridicula proferre perinde erit, insanire peræquè ac sapere indifferens. Lege



caput 4. libri 4. Perpetuitatis Fidei , & Domini Arnaldi patientiam demirare , ab ea non dissimilem , quâ eruditus Philosophus Solem esse lucidum & ignem calidum pertinaci suadere satageret , & suadendo desudaret.

*Ministri Claudii impostura sub sensum  
cadentis utilitas à Deo  
provisa.*

Ab sit tamen ut sapientissimi eximique Theologi patientissimum laborem sugillum; nam præter quod ubique effundit Ecclesiasticæ scientiæ lucem , ubique pietatem & in Ecclesiam Catholicam profundam reverentiam spirat & inspirat , hoc etiam tanto labore suo evincit , quàm sit in verbis obscuris explicandis Claudii suspecta fides , qui ipsi evidentiæ repugnare , & ut Scriptura loquitur , lumini rebellis esse non erubuit. Etenim si authores Calvinismum Lutheranismumque ex professo damnantes , & selectis verbis idoneis & accuratis damnationem suam confirmantes , omni vi & extorsione suas in partes Claudius trahit , & trahendo sese jactat , atque non secus ac si victoriam insignem reportasset nobis insultat; qua sinceritate Patres subobscurè interdum loquutos interpretabitur ? Quid mirum si suos prædicet qui non ita clarè loquuti sunt , qui suos venditat apertissimos sententiæ suæ impugnatores.

Oportebat , oportebat planè , ô Claudii , te in tam manifestos & palpabiles errores prolabi , ut in aliis minùs manifestis cognoscere. Te in explicandis



explicandis primorum sæculorum Patribus excutire humanum est, miseratione dignum: at te sic insanire, ut Authores tibi repugnantes & repugnantiam suam pro virili parte significantes tibi favere dicas, ad extremum non dicam hæresis, sed dementiæ cumulum pervenisse est. Adeone lædi non potest fides, quin continuo lædatur ratio & humana mens, quia nimirum fides & ratio unius ejusdemque divini luminis expressiones & radii sunt. Necesse est enim, sicut veridicè Augustinus scripsit, ut aliter quàm oportet humana æstimer, qui divina contemnit. Nisi spiritu hæretico agerere, res tam fictas & tam inauditas venditare nequivisses. Quis credidisset ausum te fuisse merum ludibrium, meram impotentis ingenii lasciviam in medium proferre, ut totius orbis testificationibus in quaestione facti repugnares, meris ut phantasiis tuis summa Religionis mysteria involveres, illos perversè imitatus, de quibus Augustinus ait lib. 6. Musicæ, cap. 11. *Sequuntur nonnulli sua phantasmata tam præcipites, ut nulla sit materies falsarum opinionum quàm habere phantasias.* Quia decrevisti veritati bellum indicere, facta evidentissima pernegasti: sed sicut hæreseon magistris verè olim B. Hieronymus regerebat, *Ecclesia victoria est vos aperitè dicere quod sentitis:* ita victoriæ nostræ pars maxima est, inania figmenta tua submotis ambagibus, reductoque velamine ob animos oculosque legentium statuere, ut eos gravius percutiant, non ad vulnus, sed ad vulneris cautionem, & fraudium tuarum averfationem. Ipse non credis, quæ aliis suadere moliris, & quæ homo, quàm potissimè: è Francis indole ingenuis oriundus.

ea inficiaris, quæ quæ Calvinista obrudis: ita videlicet, ut verbis Magni Gregorii 3. *part. Past. cap. I.* utar, mentem tuam impellit hæresis fervor quò naturalis indolis non trahit desiderium, & ageris commotus velut nesciens, unde postea doleas sciens.

Sed illud non sine singulari Dei in Ecclesiam & in ipsos etiam Calvinianos providentia contigisse credendum est. Difficiles sunt nonnullæ veterum Patrum expressiones, de quibus Calvinistas inter & Catholicos jamdudum certatur. A tot sententiarum discussione & collatione abhorret popularis intelligentia, & in controversiis hinc inde impeditis facilè imperitis illuditur, quibus quippe ea in examen vocare nec per otium vacat, nec per ingenium licet. Unde Ministris Patres sibi in controversiis nostris favere asseveranter & summa confidentia (tametsi falsò) prædicantibus fidem adhibere imperitos, id est majorem suæ sectæ partem, proclive est. Quamobrem clarum & manifestum in Christianismo monumentum extare voluit Deus, ut possent vel simplicissimi (quibus potissimum consulit Deus, volens omnem errorum ipsorum excusationem præcludere) cognoscere & sensibus ipsis contrectare penes quam Ecclesiam veritas & sinceritas esset. Afferunt Calviniani Ecclesiam Romanam venerabilis Eucharistiæ antiquam fidem corrupisse. Negant Catholici, & se traditam à Christo doctrinam per Apostolos & Patres perpetua traditione retentam & ad nos derivatam, nunquam in Christianismo inceptam, in Berengarii damnatione firmatam, & ab omnibus omnino Christiani nominis professoribus ante

exortos Lutheranos & Calvinianos per univ-  
ersum terrarum orbem Latinum & Græcum una-  
nimi consensione acceptam, prædicatam in re-  
ctis, expositam in pulpitis, exaratam in libris,  
celebratam in templis, solenni cultu expres-  
sam in plateis, in factis ipsis impressam ample-  
cti, & tanquam sacrum depositum custodire re-  
ponunt.

Hæc hic simplices, dubitare ignaros ne-  
cesse est; quia varii illi distinctionum fuci, qui-  
bus verba Christi & Patrum antiquorum sen-  
tentias Ministri præcolorant, quive populorum  
captum fugiunt, locum hic non habent. Dum  
enim Calvinistæ Claudii calamo negari à Græ-  
cis Eucharistiæ veritatem, seu realem corpo-  
ris Christi præsentiam & veram transubstantia-  
tionem omni securitate affirmant, jam nihil  
hic reconditum, nihil abstrusum producant,  
nihil quod non possit à videntibus & audienti-  
bus solo sensuum adjutorio judicari. Et cum  
aliunde omni habenti oculos, aures, sensum-  
que communem, nec passionum astu, aut præ-  
judiciis exæcato compertum sit Græcos hujus  
mysterii fidem iis effetre verbis quibus accura-  
tiora apud tractatores nostros Catholicos in-  
venire non est, in eosque graviter indignari,  
qui solam Christi figuram in Eucharistia agnos-  
cunt, quin & libros omnes contra Ecclesiæ  
Romanæ de azymis ritum scriptos reali Christi  
præsentia esse superstructos asserant; cum, in-  
quam, hæc ita sint, & omnibus pateant, jam  
Claudii in mentiendo pertinacia claret & erumpit,  
atque de oculis controversiis ex aper-  
tis imposturis simplices quilibet judicare sine  
negotio possunt; & cum Claudium ceterosque

Ministros teneant tam manifestæ falsitatis reos, hinc discere possunt ipsis nihilo magis esse credendum dum alia latentiora producant. Hic est fructus certè non pœnitendus ex Domini Arnaldi demonstrationibus consequutus.

Ex his igitur perspicuè liquet Græcam Ecclesiam à tempore Berengarii usque ad Calvinum, & à Calvini ætate ad nostra vsque tempora eodem cum Latina Ecclesia modo sensisse, eodemque modo loquutam fuisse, subindeque Calvinianos adversus antiquitatem, universitatem, doctrinæ consensionem insurrexisse, in easque veræ Ecclesiæ tesseræ peccasse, atque prophanæ novitatis reos esse.

Scio quidem Adversarios quemdam Cyrillum Patriarcham Constantinopolitanum producere sensuum suorum astipulatorem: sed illis talem authorem, tamque apertum apostatam non invidemus. Digni sanè Calvinistæ qui Cyrillum illum laudent; dignus Cyrillus qui à Calvinistis laudetur. Hoc unum stupendum; Calvinistas illum in Ecclesiæ Græcæ fidei testem proferre, qui in epistola quadam ab Hottingero relata, se non minùs à Græcorum superstitionibus quàm à Papistarum erroribus abhorreere attestetur. Privata Cyrilli scelera, simoniam qua Patriarchatum emit, sacrilegium quo Calvinismum sub Græcorum ritibus & professione texit, prætermitto. Sed cùm apertè constet Cyrillum illum ob illam cum Calvinistis doctrinæ communionem fuisse ter à Sede pulsum, & post obitum duplicis Synodi anathematis perculsum, planè relinquitur nullum Ministro Claudio superesse pudorem, qui tam nefarium hominem laudet, & quasi locuple-

tem



tem Græcorum fidei testem producat. Nam si quis unquam Ecclesiæ Græcæ cum Latina perpetuam de Eucharistiæ substantia fidei consensionem sensibilem effecerit, is certè Cyrillus est à Calvinistis tantoperè commendatus.

Plures hujus concordiaë testes oculatos etiamnum viventes Dominus Arnaldus recenset, quibus detrectare fidem insolentissimæ insania est. Sed quid opus est Calvinismi suspensionem ab Ecclesia Græca pluribus depellere, quæ suos legitimos de Eucharistia sensus in suis Liturgiis, Horologiis, & Triodis ( id est libris illis non minùs apud Græcos pervulgatis, quàm sit apud Catholicos Missale vel Breviarium, vel apud Calvinistas Gallos liber Psalmorum Marot, ) clarè, apertè, adeoque distinctè exprimit, ut qui legerit, sponte sua & veritate persuasus judicaturus sit, quantum distat ortus ab occidente, tantum à Calvinianis Græcos differre, nec magis convenire, quàm consentiat Roma cum Geneva. Quod idem de aliis nationibus Christianis, à Romana tamen communione sejunctis, putà Moscovitis, Armenis, Nestorianis, Jacobitis, Maronitis, Coptis, Æthiopibus clarissimis testificationibus & omni exceptione majoribus Dominus Arnaldus demonstrat.

*Vis demonstrationis instaurata.*

Ex quibus omnibus instauratur demonstratio theologica, & speculatio suprà posita suadetur. Ante Berengarium totus ubique terrarum diffusus Christianismus in utraque Ecclesia Latina & Græca sub diversis ritibus realem corporis Christi in Ecclesia præsentiam & transubstantiationem unanimi concordia agnoscebat. Hæc eadem una fides post extinctum Berengarii errorem in utraque Ecclesia, aliisque Christiani nominis societatibus omnibus & singulis perseveravit, vixit, regnavit, dominata est, prædicata in pulpitis, exposita populis, declarata in liturgiis, in Communionibus quotidianis expresso Domini Corporis nomine indigitata.

Nec potest ulla assignari causa, ullus tam universalis mutationis author. Tum quia totam simul Ecclesiam in re tanti momenti in errorem prolapsam esse asserere, est omnes Christi promissiones, omnem Dei erga Ecclesiam providentiam ad nihilum redigere. Tum quia generalis hujus corruptionis author & causa vel occasio nec potest esse Romanus Pontifex Græcis invisus, à quo erant schismate sejuncti: nec Monachus Paschasius, ut Claudio delirare placuit; libro enim latinè edito non potuit Monachus orbem sub cælo totum Græcum pariter & Latinum, nullo reclamante corrumpere: nec ignorantia sæculi; nam præter quod nunquam vel nusquam Ecclesiæ viri docti defuerunt, insuper cùm Eucharistiæ mysterium

tale



tale sit cui quotidie adsunt fideles , cujusve sæpe fiunt participes , nullum est cujus distincta notitia difficilius obliterari possit : nec incuria & sopor totius Ecclesiæ , omniumque ejus Prælatorum , Sacerdotum , Religiosorum , & plebis Christianæ ; neque enim adeo stupenda tam difficilis mysterii novitas potuisset vel sine suscipientium admiratione , vel sine resistentium fremitu & clamoribus , vel sine omnium strepitu invehi & induci.

Etenim quis sibi persuadeat omnes adeo fuisse mente oculisque captos , omnes gravi adeo somno sepultos , aut fascinosos , ut extinctis omnibus fidei , rationis , sensuumque luminibus , omnes & singulæ Ecclesiæ , omnia Regna & Provinciæ , omnia Monasteria , omnes familiæ , nullo advertente , nullo reclamante , in hæresim corruerint , nec prolapsionem ullus observavit , nec eam ulli Sacerdotes accusarint , nulli Religiosi deplorarint , nulli Episcopi damnarint , nulli concionatores arguerint , nulli scriptores reprehenderint vel meminere , nulli historici memoriæ prodiderint , & ad sensus suos veros proferendos , ad avitamque fidem retinendam , nec charitate , nec religionis zelo , nec prudentia , nec cupiditate induci potuerint ?

Certè de hac hæresis nativitate nemo prudentius quàm de aliarum ortu discurrere potest. At nulla hæctenus hæresis Ecclesiam suam novitate vexavit , quin continuò excitati à Deo fideles intrepidi novatoribus pro virili obstiterint : quomodo ergo illa sola totum orbem , nullo cogitante , nullo repugnante corripuit ? Ergo fides præsentia realis corporis Christi in Eucharistia perpetuitate semper in Ecclesia  
gavisa

gavisa est, illique jure merito asseruntur tres illæ orthodoxæ doctrinæ tesserae à Lirinensi celebratae, antiquitas, universalitas, consensus; quia nimirum fides nostra ante hæreticos Berengarium & Calvinum ab Ecclesia in qua innutriti fuerant, & de qua exierunt damnatos, & semper, & ubique, & ab omnibus credita est.

*Postrema perpetuitatis convictio à novissimis totius Orientis Christiani testimoniis omni exceptione majoribus.*

Dum huic speculationi finem imponerem; venit in manus nostras tomus tertius perpetuitatis Ecclesiæ Catholicæ de Eucharistia fidei, in eadem eximii Doctoris Domini Arnaldi officina elaboratus, id est numeris omnibus absolutus. Exhaustisse videbantur hanc materiam superiores tomi: sed quia Ministri Claudii in mentiendo inflexibilitas, stupente orbe terrarum in neganda Societatum Orientalium cum Romana circa Eucharistiam consensione persistebat, fuit necessitas copiosius dicendi res claras, ut eas non spectantibus intuendas (ut loquitur Augustinus *lib. 2. de Civit. cap. 1.*) sed quodammodo tangendas palpatibus & non conniventibus liber ille offerret. Id autem adedò feliciter efficit, ut quanvis Claudii loquax vanitas & vana loquacitas possit plus clamare: quam veritas, nullus tamen, nisi oculis & sensu



sui communi renuntiaverit, jam de illa consensione dubitaturus sit. Etenim libro operis illius octavo non tam probationes quam hujus consensionis manifestas decisiones profert, dum ipsius Ecclesiæ Orientalis judicia post istam Domini Arnaldi & Ministri Claudii controversiam causâ cognitâ lata, & sole meridiano clariora in medium producit.

Relata fuerant superioribus voluminibus tum liber Agapii, montis Athos Monachi; tum integra Synodus in insula Cypri coacta, tum Catechismus Ecclesiæ Constantinopolitanæ Veneriis 1635; typis mandatus; tum Confessio orthodoxa, cui quatuor Patriarchæ & varii Orientales Episcopi subscribere; tum Confessio Methodii Patriarchæ Constantinopolitani, & Hilarionis Cicada majoris Ecclesiæ Theologi; tum octo Monachorum montis Athos, & Michaëlis Chortacii Cretensis Presbyteri testificationes, aliaque permulta eam consensionem demonstrantia.

His addunt septem Orientalium Metropolitānorum testimonium datum Peræ 18: Julii 1671. ubi asserunt, *Calvinistas Gallos Ecclesiam Orientalem impudenter calumniari, quanvis absurda & eorum de Eucharistia sententia variis Constantinopoli coactis Conciliis contrita & reprobata sit.* Ibidem se corporis Christi realem præsentiam, & panis & vini transsubstantiationem solis remanentibus accidentibus agnoscere contestantur, ac oppositum sentientes perniciosi erroris damnant, & Calvinistas Ecclesiæ Græcæ imponentes, *impudentes, furiosos, insolentes* appellant. Idem testantur Ecclesiæ Archipelagi, ubi Calvinistas Ecclesiam Græ-

cam negatæ præsentiaæ realis & transubstantiationis accusantes, *superbos hæreticos, stultè opinantes, perversè sentientes, injustis suspicionibus Ecclesiam Græcam infamantes, iniquos impostores, Ecclesia Orientalis calumniatores, impudentes extraordinarios, sine timore Dei calumniantes, stultos reprimendos, falsorum rumorum seminatores, mendaces pleno ore appellant, & publicis testificationibus, atque Episcoporum, Abbatum, Sacerdotum, ac Monachorum subscriptionibus confirmant.*

Idem testimonium dederunt Abbas & Monachi Monasterii Mauromolani, 14. Octobris anni 1671. Idem etiam Panajotta Nicusius literis scriptis Adrianopoli, 20. Decembris 1671. ad Excellentissimum Dominum Carolum Franciscum Olier, Marchionem de Nointel, sacrae Majestatis Christianissimæ ad Portam Ottomanam Legatum missis attestatus est. In quibus hæreticorum *contra Ecclesiam Orientalem*, ut ipse ait, *blasphemias confutaturus* sic ait: *Mirum sanè est, Vir Excellentissime, cur non pudeat Calviniana hæreseos sectatores, post tot Ecclesia Orientalis contra eos factas demonstrationes, post tot actus Synodales typis evulgatos, post Cyrilliana confessionis damnationem, post Meletii Sirigii Doctoris Ecclesia Orientalis prolixam ejusdem refutationem, post denique sæpe memorata Ecclesia fidei sua confessionem omnium ferè Antistitum suorum unanimi consensu & confirmatione nuperrimè publicatam, tam impudenter & pertinaciter hanc Ecclesiam in consortium perditionis hæreseon suarum advocare! Si enim Græcorum Ecclesia fidei confessionem scire cupiunt, quare eam solummodo à Cyrilli quater ob suspi-*  
*cionem*

cionem hæreseos Sede Patriarchali à Gracis expulsi, post occisi, ac ulimò publico anathemati traditi confessione petunt? Si querunt quid de vera & substantiali Jesu-Christi Servatoris in divino Eucharistia mysterio præsentia Graci credant, inspiciant paulisper libros officiorum Sacerdotalium, quos ἀγαγία vocant, & perlegant orationes, quas quilibet Sacerdos ante & post Sacramentorum assumptionem tenetur absolvere. Et enumeratis libris variis quibus quid de intercessione Sanctorum aliisque controversiarum capitibus sentiendum sit patet, quive Venetiis impressi levi pretio cõmì possunt, subiungit: Hæc scrutentur Calvinistæ, & invenient veram Orientalis Ecclesiæ confessionem, & non à Cyrillo ob perversa sua dogmata Sede expulso, occiso & damnato. Nec fingant sibi miserissimi Ecclesiam Gracam chimericam esse, & non alibi quàm in ipsorum cerebris existere, more moderatorum Hebræorum, qui sibi regnum à nullo visum, nec auditum in qua mundi plaga situm sit constituunt.

Eandem cum Ecclesia Romana consensionem Abbates & Monachi in insulis Principum commorantes Domino præfato de Nointel candidissimè testati sunt, & verbis, factis, picturis, omnibusque possibilibus significationibus demonstrarunt. Sed nihil magis authenticum, nihil certioris autoritatis proferri potest testimonio Patriarchæ Constantinopolitani, trium Expatriarcharum Constantinopolitanorum, Patriarchæ Alexandrini, & quinque supra triginta Metropolitanorum, quo non solum omnes fermè articulos Catholicos inter & Calvinistas controversos se credere confirmarunt, sed



sed suam de Eucharistia fidem his vocibus subscriptionibus suis munitis Constantinopoli in domo Patriarchali, indictione vigesima mensis Januarii anni 1672. luculentissimè expresse-  
runt: *Quoad terribile Eucharistia Sacramentum credimus & sine dubitatione confitemur vivum Domini nostri Iesu-Christi corpus esse invisibiliter præsens præsentiâ reali in sacramento. Nam operatione sanctissimi Spiritus modo supernaturali & ineffabili panis in proprium Iesu Christi corpus, & vinum in vivum ejusdem sanguinem realiter, verè, & propriè commutatur. Credimus etiam integrum Christum offerri, & seipsum offerre, ipsum integrum à recipientibus modo impassibiliter manducari. ::: Sacramentum hoc verâ adoratione dignum est, in eo enim non minori venerationis cultu corpus Iesu Christi Salvatoris à divinitate assumptum prosequimur, quàm ipsam divinitatem adoremus. Pro omnibus Christianis Orthodoxis cum vivis tum vita functis in sacrificium offertur.*

Eandem præsentiam realem & veram transubstantiationem Episcopi Orientales Colchidis & Iberiæ se credere testati sunt, quorum testificationem Pater Joseph Maria Zampio Clericus Regularis, Hilarionis præcipui Episcopi Catholici dicti syngraphe munitam ad præfatum Regis Christianissimi Oratorem misit. Ecclesiam præterea Græcam nihil à Romana in articulis Eucharistiæ aliisque permultis doctrinæ capitibus à Calvinistis inficiatis dissentire, tabulis publicis variarum ditionum Oratores Residentes appellati post multa cum Ecclesiæ Græcæ Episcopis colloquia habita, post ejusdem Ecclesiæ fidem magnâ accuratione, & annorum multorum



multorum experientiâ perquisitam testati sunt. Ita legere est in litteris Andreæ Ridolphi Episcopi Calaminæ & Vicarii Apostolici, datis Kalendaris Augusti anni 1671. & Francisci Casimiri de Visocha Regis Poloniæ ad Portam Otthomanam Legati, datis Constantinopoli die 7. Septembris 1671. & Finibaldi Fieschi pro Republica Genuensi Residentis datis Constantinopoli 13. Augusti 1672. & Marini Bernardi de Caboga, ac Georgii Secundi Brucchia Reipublicæ Ragusinæ ad Portam Otthomanam Legatorum, datis Adrianopoli 14. Octobris 1671. necnon totius Communitatis Perotarum, quibus novendecim subscripserunt, datis Peræ 2. Novembris 1671. Quis autem mentis compos suspicari posset publicas & illustres personas cum manifesto honoris sui periculo falsitatis sine negotio convincendæ testes esse voluisse? Et sanè id ipsum farentur Calviniani, præsertim verò Legati Angli & Batavi Constantinopoli commorantes, & pertinaciam Claudii demirantes; propriis enim oculis vident tam uniformem esse Græcorum cum Catholicis Romanis de Sacramentis, & nominatim de Eucharistia sensum, ut Orientales suorum dissidiorum oblití solos Catholicos ad sua Sacramenta & sepulturam admittant, Lutheranis & Calvinianis prorsus eliminatis, ut manifestissimis relationibus Author operis de Perpetuitate Eucharistiæ, *tom. 3. lib. 8. cap. 9.* demonstrat.

Eandem fidei consensionem cum Lutheranorum & Calvinianorum dogmatum execratione testatur Nectarius Patriarcha Jerosolymitanus litteris ad Páissium Patriarcham Alexandrinum

drinum mense Martio , anno 1671. scriptis. Eandem fidei consonantiam testantur responsa Patriarchæ Constantinopolitani ad consulta Moscovitarum, in quibus habetur: *Mutatur panis in perfectum verè Corpus Christi, & vinum in perfectum verè sanguinem Christi, ut nuda relinquantur species panis, & nuda species vini sine eorum substantia.* Nihil etiam evidentius afferri potest autoritate libri *Confessionis Orthodoxæ*, Dionysii Patriarchæ Constantinopolitani studio secundò editi, cujus archetypus manuscriptus ad Regem nostrum Christianissimum mensibus præteritis delatus est, in quo hæc habentur: *Animadvertendum est, ut Sacerdos talem habeat intentionem, quod ipsa vera substantia panis & substantia vini transsubstantientur in verum corpus & sanguinem Christi.::: Et transsubstantiantur panis in verum corpus Christi, & vinum in verum sanguinem Christi, remanentibus solum speciebus visibilibus.* Quod multis ibi confirmatur, additurque huic mysterio exhibendum esse honorem qui debetur ipsi Christo. Nihil præterea manifestius produci potest processu Synodali à Dositheo Patriarcha Jerosolymitano in ipsa Synodi celebratione die 20. Martii 1672. edito, cui & ipse Dositheus Patriarcha, & Nectarius Ex-patriarcha, & sex Metropolitanæ, & Archimandritæ, Presbyteri, Diaconi & Monachi tres supra quinquaginta subscripserunt. Titulus hujusmodi tractatus hic est: *Clypeus Fidei Orthodoxæ, seu Apologia adversus hæreticos Calvinistas, Ecclesiam Orientalem secum idem de Deo rebusque divinis sentire accusantes: editus à Synodo Jerosolymitana sub Patriarcha Dositheo.*

*theo.* In eo autem opere indignanti & ægro animo conqueruntur, quòd Calvinistæ ( quos *vaniloquos, Novatores, Hæreticos, mendacii architectos, apostatas, artificiosos Scriptura & Patrum, hæreticorum more, expostores,* ) post tot Græcorum Patriarcharum declarationes, post typis editam Confessionem Orthodoxam, post reprobatas & anathemate percussas Cyrilli Lucari, vel saltem illi attributas impias responsiones, post solennes Iconomachorum & præsentiam corporis Christi in Eucharistia, & veram panis & vini in ejusdem corpus & sanguinem transubstantiationem negantium singulis annis bis iteratas excommunicationes; post Gabrielis Archiepiscopi Philadelphienfis, Gregorii Protosyncelli, Theophani Patriarchæ Jerosolymitani clarissimas lucubrationes, Ecclesiam Græcam calumniari non cessent. Fidem autem præsentia realis & transubstantiationis articulo 17. tam clarè exponunt, ut nihil in Tridentino habeatur apertius. Definitiones verbatim referre brevitatis gratiâ prætermittimus, Lectorem ad prælaudatum nunquam satis laudibus efferendi operis de perpetuitate Fidei tomi tertii librum octavum, tanquam ad fontem remittentes. Ibi etiam legere erit splendidissimum Georgii Patriarchæ Maronitarum testimonium datum die 12. Junii anni 1673. & Macharii Patriarchæ Antiocheni 20. Octobris 1671. & iterum 15. Novembris ejusdem anni, & rursus die 3. Maii 1673. Quibus Calvinistarum sensus non solùm circa Eucharistiam, sed circa alia etiam omnia ferè doctrinæ capita, quibus à Catholicis Romanis dissentiunt, gravissimis censuris proscribuntur, eorumque calumniæ Ecclesiam



Ecclesiam Græcam in suarum consortium hæreseon advocantes depelluntur, quæ quamplures Episcopi, Sacerdotes, & laici chirographo suo consignarunt: & Gregorii Patriarchæ Syriæ testimonium, cui omnes Presbyteri Syri subscripsere: & Matthæi Patriarchæ Cophorum Jacobitarum testificationem, quâ asserit se nihil à Latinis Romanis circa realem corporis Christi in Eucharistia præsentiam & transubstantiationem dissentire: & Cruciadoris Patriarchæ Armenorum testimonium authenticum datum in civitate Sisenli anno 1672. quo hæreticorum Lutheranorum hæreses detestatus ait: *Faxit Deus ut natio nostra tantum distet à talibus & similibus erroribus Calvinistarum & Lutheranorum, quantum cælum à terris. :: Dicunt corpus Christi non esse realiter in Eucharistia, sed panem tantummodo & vinum, figuras & signa corporis & sanguinis Iesu Christi, quæ vim & virtutem eorum recipientibus communicant. :: Dicunt substantiam panis & vini non converti in corpus & sanguinem Christi, sed panem & vinum manere post consecrationem. Missam non esse verum sacrificium propitiationis, nec debere offerri pro vivis & defunctis. Incongruum esse adorare Christum in Eucharistia, imò nec posse adorari sine idololatria.* Enumeratis deinde aliis huiusmodi hæreticorum erroribus, sic concludit: *Nos igitur superscriptus Cruciador Patriarcha, unà cum nostris Ecclesiasticis, Episcopis, Doctoribus, & Presbyteris mox ut audivimus has suprà allatas propositiones mendacis refertas, horrendas, ac totaliter, penitusque contrarias Ecclesiæ Catholicae & Apostolicæ, ejusdemque sectatoribus, uti patet singulis,*  
*pro*



pro viribus conati sumus è medio tollere ejusmodi errores ac spurcicias huc usque auribus vestris inauditas. Imò absit ut talium hæresium sola cogitatio in mentem nostram incidat ; quin potiùs ab ipsis toto animo abhorremus , tanquam à mortifero veneno , & adeo detestamur eas , ut ne quidem de ipsis aliquid audire velimus. Cui censure quatuor Archiepiscopi variique Sacerdotes subscripserunt. Et testimonium Davidis Archiepiscopi Civitatis Regis Spaham , ad Regem Christianissimum à Natione Armena quæ versatur in Persia missum , datum in conventu Episcoporum & Doctorum 10. Decembris anni 1671. in quo Calvinistas Novatores , ponentes falsam imposturam fingendo Armenos esse communicantes eorum malitia , appellant. Adduntque: Credimus & dicimus Christum habere corpus & naturam humanam , quod largitur pretiosè omnibus dignè accipientibus ; & habemus firmum fundamentum in verbo Domini Matth. 26. Hoc est corpus meum & sanguis meus , & non signum. Unde indubitatè adoramus Christum in illo sacramento ; & ille qui talia non credit , sit ipsi idololatria , nobis verò fidelibus est salutaris , atque optimus cultus. Pariter credimus esse veram propitiationem vivis & defunctis. :: Tales sunt intentiones , Potentissimè Rex , Episcoporum , & Doctorum Ecclesia Armena , quibus breviter ostendimus Veracitati vestra quod non sumus tales , ut diffamarunt nos recipientes talia enormia.

*Vnica ad salutem , una ad honorem recuperandum via Ministro Claudio superest , si publicos errores publicè recantet.*

Hæc & alia multa leges libro illo octavo tomi tertii Perpetuitatis. Quid dicturus est jam Claudius Charontonensis Minister ? Sempérne mendacium tanta à se pertinacia asseritum , quanti-quanti constet , propugnabit ? Nunquámne veritati etiam visæ concedet ? Nunquámne communem sensum consulat , ne orbi terrarum mendacium in os ingerat. Ubi pudor mentis , ubi rubor frontis , ô Claudie ? Si mala causa vana te loqui coëgit , agnosce tandem publicum scelus tuum , & publicam injuriam in Ecclesiam Græcam à te intentatam publicâ satisfactione sarciri. Incipe mendacissimis calumniis tuis modum aliquando imponere , & innocentissimos totius Orientis Christiani de Eucharistia sensus tuis scriptiunculis crudelissimè lacerare. Si ullus in te prudentiæ radius supersit , si hæresi nondum tuâ omnes conscientiæ stimuli extincti sint , manifesto te hæctenus tentum fuisse flagitio fatere. Nullus jam tibi tergiversandi locus , prorsusque recusare non potes quin manifestus calumniator audias : diutiùs quàm par erat credulis tecum errantium mentibus imposuisti , Claudie ; diutiùs universæ Galliæ mendaciis tuis illusisti. Nunc est ut Græcis restitui famam oporteat , quibus eam maledictis tuis eripuisti , dum in eos falsa dogmata contulisti. Si nulla salutis propriæ

priæ cura te angit, nulla te benè suscepta cogitatio ciet, sollicitet te certè tot simplicium & incautè tibi credulorum salus, qui hæreseos & calumniæ venenum à te haustum in alios peræquè credulos cum animæ suæ exitio diffundunt.

Itane summam tibi potestatem, summum in hominū fidem jus arrogasti, ut totum mundum brutescere, totum mundum insanire, totum mundum oculis orbū, te solum illuminatum esse persuadere connitaris? O te stultum si hominibus ratione præditis hæc suadere speras! O te scelestum, sive illa tibi persuasisti, sive quod verius est, aliis quæ falsa nosti, persuadere coneris tamen! Divino quidem supremi Numinis nutu provisum est, ut furiosa illa mentiendi & manifestissimi facti negandi contumacia secum afferret veneni sui medicinam, cū ea petulanter protuleris quæ falsi nomine inscripto arcessit orbis sub oriente Sole totus; sed nunquam dimittetur tibi peccatum, nisi restitueris ablatum, & publica mendacia publicè recantes.

Perfugium in mendacio quæсивisti, posuisti mendacium spem tuam, mendacio veluti scuto, non veritate circumdatus es; sperasti in calumnia & in tumultu, locasti in imposturis fiduciam tuam: & erit tibi, ut minatur per Prophetam Deus, *iniquitas hæc sicut irruptio cadens, & requisita in muro excelso. Veniet contritio tua, & comminuetur sicut comminuitur lagena figuli contritione pervalida; & non invenietur de fragmentis ejus testa, in qua portetur igniculus de incendio, aut hauriatur parum aquæ de fovea.* Pro eo (inquit Ezechiel) quod mœrore fecisti cer

*justi mendaciter, & confortasti manus impii, ut non reverteretur à viâ sua mala, & viveret: propterea vana non videbis, & divinationes non divinabis amplius. Si veritas à te staret, ad mendacium non confugisses; si ipsi pugnasses, tibi ipsa pugnasset, tibi vicisset: sed contra te vicit, quia tibi semper infesta fuit. Humânium quidem fuit te falli, sed notum tibi mendacium palam, àpertè, asseveranter inspectante & stupente orbe Christiano confirmare, sicut inusitatum & horrendum, ita ad extremum sceleris cumulum venisse est. Hæc tua sors, ô Claudî, qui pondere veritatis oppressus, & adversus eam tibi perspectam, furens rabidis & irritis motibus in tuis te vinculis jactas, simulque prodis & quantum veritatem oderis, & quantum adversus eam nihil possis.*

*Si tot testimoniis fidem adhuc detrectet Claudius, fortè de mendacio ineruditionis suæ confundetur visis Marci Doni Cretensis ad Claudii consulta respondentis litteris datis in Arce Zacynhi die 21. Maii anni 1672. ex quibus hæc pauca excerpo. Arrige aures Claudî: Cum ad me delati fuissent articuli quidam descripti ut fertur ex latere Dominationis tuæ illustrissima, in quibus quaritur, quid sancta Mater nostra Orientalis Ecclesia sentiat de Transubstantiatione panis & vini in sacramento Eucharistia, operapretium duxi ejus sententiam patefacere.*

*Notum sit itaque tibi, prestantissime vir, quod totus Oriens consentientem habens & Occidentem credidit semper & credit à primis Ecclesia inæunabulis, panem & vinum verè & physicè transubstantiari in corpus & sanguinem Christi,*  
*deposita*



depositâ primâ substantiâ , & hanc transubstantiationem tenet inter articulos fidei necessarios, adeo ut nemini liceat eam ignorare , aut in dubium revocare , aut penitus rejicere. Hanc autem fidem habuit à Christo , & post successionem ab Apostolis & à Patribus primitiva Ecclesiæ, qui columna fuerunt & fundamentum orthodoxiæ Græcicæ. Et quod hoc fatetur , patet ex facto. Quemcunque enim de hoc sacramento interrogaveris , statim tibi affirmabit hanc confessionem ; in quo edoceri potes à cardinibus & Sacerdotibus sanctæ nostræ Ecclesiæ , qui neminem permittunt participem fieri sanctissimi corporis & pretiosissimi sanguinis , nisi prius hanc edat confessionem. :: Ex quibus clarè constat sanctam nostram Ecclesiam hanc transubstantiationem firmiter credere.

Quod verò sic semper crediderit , probatur inexplicabili conjecturâ , quia hæc fides non fuit de novo introducta in Ecclesia Dei. Omnes enim novitates , quæ sanctam turbaverunt Ecclesiam, habuerunt proprios authores , ut nos docet historia. At hujus fidei nullus è neotericis fuit author. Ergo hanc novit ab antiquitate. Quod si quem habetis hujus vos authorem , ostendite , & in pristinam orthodoxiam redibimus. Nec fas est calumniari quemquam Patriarcharum nostrorum , vel Romanorum Pontificum , cùm talis calumnia nulla constare possit probatio. Extant enim integra monumenta antiquitatis ; extant historiarum Annales , in quibus tale quid nec legimus unquam , nec vidimus. :: Romana enim Ecclesia nunquam à nostra discrepavit in hoc articulo. Ergo sic ipsa quoque ab initio credidit.

Confirmatâ deinde eadem fide authoritatē  
 Scripturæ , Apostolorum , Concilii Ephesini,  
 Chrysostomi *hom. 45. in Ioan.* Nysseni *orat. catechet. cap. 37.* Damasceni *lib. 4.* Ambrosii *lib. de Sacramentis* , exemplis creationis rerum ex nihilo , conversionum physicarum quas natura operatur , solutione objectionum quas ab inconvenientibus & à sensibus petere Calvinistæ assolent , subjungit : *Nostra sancta Ecclesia adorat corpus in Eucharistia adoratione latræ , deificum enim est. Non est in usu apud nos circumferre corpus sanctissimum per plateas & vias , magnâ sequente populorum catervâ : non damnamus tamen quod pietate fit in honorem & gloriam Dei.* Et sic tandem concludit : *Abhorret Ecclesia nostra ab illa doctrina quam docent Reformati , nempe illud idem quod secundum naturam panis est , mysticè & secundum gratiam sanctificationis esse corpus. Credit enim corpus esse non mysticè , sed verè & physicè , adeo ut per transmutationem substantia panis esse desinat. Transmutationem enim pro transubstantiatione accipimus. Qui habet aures audiendi audiat.*

Hæc autem quæcumque dixi , non à personæ tuæ mihi prorsus ignotæ , ô Claudi , odio vel animi in te malignitate ulla profecta putes. Nihil à proposito meo , nihil ab indole mea alienius. Vehementiam tam justam illam , tam necessariam illam in mendacia evidentissima tua , quibus totum Christianismum Græcum per summam injuriam infamasti , à me extorsit perfectum odium à Davide commendatum , quo vitia insectari , personas diligere jubemur. Si quid acerbè , si quid acriter in te dictum

dictum putes, totum in librorum tuorum mendacia luculenta & sub sensum cadentia scias esse conjectum, nihil in te, quem non Christiana solum charitas, sed ejusdem etiam regni, & provinciæ, ut quidam testati sunt, communio sincerè diligere præcipit. Hoc tibi persuadeas iterum atque iterum rogo, me talem animi induisse habitum, quem omnibus alibi laudatus præcipit Augustinus: *Diligite homines, interficite errores; sine superbia de veritate præsumite, sine savitia pro veritate certate. Orate pro eis quos redarguitis atque convincitis.* Acriora illa verba mea res ipsæ & sensibilis veritas obfirmatè à te negata rapuerunt.

Si superiores tomos meos vidisti, omni me humanitate & urbanitate Calvinianos tuos convenisse deprehendere potuisti; quia ut ab Augustino didici & alibi monui, scio cum quo labore verum invenitur, quàm difficile caveantur errores, quàm rarum & arduum sit haustas cum lacte hæreses sanato mentis oculo superare. Quare ergo, inquires, stilum in me tuum acerbasti nihil tale à te promeritum? Respondeo breviter ob triplicem rationem oppositam, quia verum sine labore inventum impugnasti, quia errores non cautu difficiles, sed palpabiles defendisti, quia falsitatem non cum lacte haustam, sed repugnante etiam natura & bona fide, quæ viros ingenuos decet, à te assertam inflexibiliter venditare, suffulcire, propugnare, disseminare, & ignaris incautisque instillare molitus es, & contrectabilem falsitatem toti Orienti injuriosam super tecta præsticasti, in libris publici juris factis sparsisti, in aulas Principum, in familias privatorum, in Curias Magistratum

omni quâ vales & abuteris arte rebellis lumin-  
ni, & ut ait Scriptura, *erecto collo* invexisti, ut  
frontem non tam durasse, quàm perdidisse  
videaris. Hanc ergo acrimoniam in publica  
peccata tua publicè ex Apostoli mandato arguenda latam ab assertionum tuarum pravitate  
& in noto errore tuo defendendo pertinacia  
profectam certissimè credas. Unum consilium  
meum fuit, & Latinæ Ecclesiæ fidei perpetui-  
tatem defendere, & Græcam à tuarum calum-  
niarum dedecore vindicare. Vituperia in lau-  
des lubentiùs commutabo, si errores tuos  
christiana sinceritate fateare. Hac justitiâ &  
læsis Græcis satisfacies, & conscientiæ tuæ,  
atque etiam vero honori consules. Quia ve-  
rum & unum dedecus in suscipienda falsitate,  
in fovendis erroribus situm: contrà, nefarias  
& apertè falsas opiniones abjicere, gloriosum  
& prædicandum est. Hoc verissimum decus,  
quod in manibus habes, si benè velis, tibi  
opto & popularis amore, & Christiani chari-  
tate.

## R E F L E X I O,

### *Et apostrophe ad Calvinistas.*

**N**ON dubito, ô Calviniani, quin tanta  
tam splendentis Christiani orbis in ag-  
noscenda reali Christi in Eucharistia præsentia  
consensionis lux in oculos ultrò incurrens  
aciem vestram perstringat, mentemque non-  
dum penitus à Deo desertam commoveat.  
Cur ergo ad Catholicam, unde discessistis, re-  
dire.



dire cunctamini, sub cuius nido tuti plumescunt parvuli, adolescunt grandiores, firmantur viri, pascuntur omnes? Considerate Patres vestros, primos inquam Sacramentarios, schismatis & errorum vestrorum architectos, origine fuisse Catholicos, ex Ecclesia Romana oriundos, à qua quos retinent articulos fidei didicerunt, Sacramenta acceperunt, Scripturas mutuati sunt: cur igitur Ecclesiam illam originalem, matricem, radicalem eo in articulo deseritis, cui subscribit orbis terrarum? Scilicet toto mundo obscurato vobis unis veritas fulgidior affulsit, ut illi vestrum præferatis iudicium, de qua Christus quod nunquam deficeret præbuit testimonium? Qui estis vos & tam novi & tam pauci, quos nihil dignum auctoritate proferentes Ecclesiae fidei perpetuitati & sexdecim sæculorum confessioni antepo-  
namus? Audite tandem venerandum Christianorum omnium, vobis unis exceptis, non tantorum quàm turbam magnam, quam dinumerare nemo potest, ore vobis Paulini & Augustini dicentem: *Vacare non potest quod universa facit, orat, & adorat Ecclesia.* Et iterum: *Si quid universaliter per orbem frequentat Ecclesia, quin ita faciendum sit disputare insolentissima est insania.*

Siccine tam absurdè creditis universam ante vos Ecclesiam insensibili & generali errore corruptam, ut & in capite & in membris, & ubique & semper, & in omnibus & in singulis, nullo advertente, nullo fuerit Catholico repugnante prolapsa; Christique sponsam idolum divinis honoribus unanimi consensione coluisse, & tam infandâ idololatriâ sponsi sui iram perpetuò

provocasse? Siccine omnes Martyres idololatriæ testes, Patres idololatriæ doctores, Episcopos & Presbyteros idoli & superstitionis Sacerdotes, Ecclesiam sub cœlo totam idololatriarum societatem extitisse, subindeque Christum Ecclesiam deseruisse universam, & consummatorem fidei defectionem fidei universalem contra sponfiones suas permisisse? Siccine verba iniquorum prævaluerunt super omnes Catholicos? Siccine verè mendacium coluerunt Patres nostri, & vanitatem quæ eis non profuit? Quomodo, quæso, tantus error greges simul invasit & Pastores, ut nullus errorem senserit vel illusionem tam crassam in articulo quotidiana praxis & cultûs agnoverit?

Berengarium quidem proferre potestis hæresis vestræ præcursores: sed in illum continuo Pontifices, Doctores, Concilia, & Ecclesia universa insurrexerunt. Ejus doctrinam *fidei Catholica contrariam, universalem Ecclesiam scandalizare*, Adelmanus condiscipulus, & Hugo Lingoniensis scriptis ad eum litteris contestati sunt. Ei confestim exprobravit Lanfrancus, *superbia fastu plenum contra orbem sentire cœpisse: contra Catholicam veritatem, & contra omnium Ecclesiarum opinionem scriptum condidisse. Hanc fidem (inquit cap. 22.) tenuit priscis temporibus, & nunc tenet Ecclesia, quæ per totum diffusa orbem Catholica nominatur. Omnes enim qui Christianos se & esse & dici lætantiur, veram Christi carnem, verumque ejus sanguinem, utraque sumpta de Virgine, in hoc sacramento se percipere gloriantur. Interrogam universos, qui Latina lingua nostrarumve litterarum notitiam perceperunt. Interroga Græcos,*  
*Arme*

*Armenos, seu cujuslibet nationis quoscunque Christianos homines: uno ore hanc fidem se testantur habere. Porro si universalis Ecclesia fides falsa existit, aut nunquam fuit Catholica Ecclesia, aut periit. Nihil namque efficacius ad interitum animarum quam perniciosus error. Sed non fuisse aut periisse Ecclesiam Catholicam nemo consenserit. Illi objecit Guitmundus Episcopus Aversanus, ejus errori neque vel unam civitatem, vel etiam unam villulam concessisse. Et iterum: Si quis qualitatem vel flagitiosam vitam eorum per quos utcumque pullulavit; si quis nullum sinceram vitam hominem, nullum penitus sapientem; si demum non solum Concilia, sed etiam totum orbem terrarum contradicentem penset, tacente nostra disputatione quid magis tenendum sit, satis ut arbitror judicabit. Et rursum: Notissimum est, hoc tempore, priusquam Berengarius insaniisset, hujusmodi vesinias nunquam fuisse. Impanari vel invinari Christum nulla sicut ostendimus expetit ratio, nec Prophetæ prædixerunt, nec Christus ostendit, nec Apostoli prædicaverunt, nec mundus, exceptis his paucissimis hæreticis, credidit. Quâ facti evidentiâ ipse Berengarius palinodiam cecinit, ad Ecclesiamque, quam suâ interturbare novitate molitus fuerat, tandem aliquando, ut postea clarebit, reversus est.*

Secuti estis errantem, sequimini pœnitentem. Ergo revertimini ad unam, sanctam, Catholicamque matrem inter dolores Crucifixi parturientis natam, ab Apostolis satam propagatamque, à Patribus depositum custodientibus defensam, miraculis infinitis illustratam, Sanctis omne genus decoratam. Cur illi præ-



fertis sectam novellam ab errabundis schismaticis confectam, à furiosis non virtute ex alto indutis, sed armis communis invecram; à Christianorum tortoribus, non à Christi Martyribus; à monaculis & sacrificulis desertoribus & sacrarum virginum corruptoribus prædicatam? Itane perpetuæ Ecclesiæ traditioni & orbis universi consensui deplorandam vestram & miserabilem Petrobusianorum, Henricianorum, Vvaldensium, Albigenium, Hussitarumque, aliorumque infamium hominum traditionem & tantoperè interruptam atque in Ecclesiam invisibilem à vobis ipsis ablegatam consensionem antepontis, & Civitati sanctæ supra montem positæ & aspectabili præfertis? Itane sanctos Bernardum, Ludovicum, Dominicum, Franciscum, aliosque sine fine anteriores & posteriores viros pietate & eruditione insignes Luthero Augustiniani Ordinis apostata, Calvino Ecclesiæ Noviodunensis excanónico postponitis? Si difficultates Eucharistiæ opponitis, cur non potius intellectum in obsequium fidei tutò captivatis, quàm Ecclesiæ universalis splendorem & micantem credibilitatem abjicitis, rati quod fides non habet meritum ubi humana ratio præbet experimentum, memores etiam illius ab Hilario veridicè lib. 10. de Trinitate scripti: *Nec per difficiles nos Deus ad beatam vitam questiones vocat, nec multiplici eloquentis facundia genere sollicitat: in absoluto nobis & facili* ( id est per fidem à difficultatibus absolutam, easque autoritate Dei floccifacientem ) *est æternitas.* Quia ut ait lib. 7. *Non est relictus hominum eloquiis de Dei rebus alius quàm Dei sermo?* Difficulta-



tum tenebras objicitis & perpetuæ fidei confessiones non videtis? An nescitis quod *sicut tenebra ejus, ita & lumen ejus?* id est fidem esse difficultatibus tenebrosam & evidenti credibilitate luminosam, quippe quæ lucerna est lucens in caliginoso loco, & lux in tenebris lucet, & tenebræ eam non comprehendunt?

Venite itaque ad Ecclesiam, cujus de vobis reportata victoria felicitas vestra erit. Extendet brachia materna redeuntibus ad sinum, quia non vult nisi veritate vincere, charitate superare. *Non enim*, ut Augustinus scripsit, *vincit nisi veritas, victoria veritatis est charitas.* Veritati cedite volentes, à qua etiam inviti superabimini; cedite libenter, quia cedit victoria victis, & conversos latificabit lumine Deus, qui aversos punit, cæcitare.

Legite si placet eximium & invincibile Domini Arnaldi opus; jam enim nulla vobis superest vestræ de Eucharistia hæreseos excusatio. Sufficit communis pietatis & rationis sensus, sufficiunt communes fidei religionisque notiones, ut ejus lectione veritas pateat, exterminentur errores, & voluntarios vos victos fateamini. Desinite post desertam Religionem & exutam in matrem Ecclesiam pietatem, centrum religionis & cor pietatis invadere. Desinite post scissam Ecclesiæ unitatem mysterium illud evertere moliri, quod unitatis Ecclesiæ symbolum & sacratissimum fidelium omnium vinculum à Patribus jure merito appellatum est. Desinite Ecclesiam donorum omnium pretiosissimo orbare eniti, & figuram  
suffice

sufficere veritati. Cernite orbem terrarum Latinum pariter & Græcum, qui sedulus & cautus divini Eucharistiæ depositi custos, nihil in eo unquam permutavit. Cernite sophismatum vestrorum vanitatem, quibus cum vestro Ministro Claudio agnitæ & palpabilis Christianismi totius (vobis unis demptis) consensionis impugnatore, dum Ecclesiam Romanam infamare cum Chamo nitimini, Christum efficitis nec sincerum in verbis, nec fidelem in promissis, nec magnificum in donis. Cernite tandem vestram de Eucharistia hæresim esse manifestam: & cum summa rerum agatur, cum falsam partem sempiterna mors devoret, veram autem vita æterna coronet, suscipite divinæ Eucharistiæ antiquitatem, universitatem, consensionem: suscipite quod semper, quod ubique, quod ab omnibus Catholicis susceptum est. Convictis Claudii mendaciis assensum ne præbete, ne vos fallite, ne vobis frustra blandimini. Timete, ne sicut maledici Claudii linguæ diabolus insedit vos ut falleret, ita auribus vestris maledicum illum audientibus infideat, ut fallamini. Cavete ne velociter currens mendax sermo ejus rabe vos malitiæ suæ inficiat, quia sicut maledici regnum Dei non possidebunt, ita qui mendaciis præsertim deprehensis aures præbent, Dei regno æternum excident.

## CAPVT II.

*Vera transubstantiatio adversus  
Lutheranos stabilitur.*

**D**Emonstratâ rationibus theologicis ad-  
versus Calvinianos reali corporis Christi  
in Eucharistia præsentia, nobis cum Luthera-  
nis pugnandum est. Etsi enim Lutherus Chri-  
stum ab Eucharistia tollere, & realem corpo-  
ris sanguinisque præsentiam inficiari peropta-  
ret, veritate tamen coactus talem invehere er-  
rorem non ausus est. *Vellem* (verba sunt Hære-  
siarchæ epist. ad Argentinenses) *quod posset mi-*  
*hi aliquis persuadere, nihil esse in Eucharistia*  
*præter panem & vinum, magno ille beneficio me*  
*devinceret. Jam sæpe gravibus curis in hac*  
*materia desudavi: verum ego me captum vi-*  
*deo, nulla elabendi via relicta est, textus Evan-*  
*gelii nimis est apertus. Quare corpus Christi*  
in Eucharistia realiter præsens agnovit, at si-  
mul substantiam panis permanere contendit,  
unde ejus sectatores *Impanatores*, seu *Panista*  
vocati sunt. Catholicæ autem Ecclesiæ do-  
ctrina asserit, non solum post panis & vini  
consecrationem Christum Dominum Deum &  
hominem verè, realiter, & substantialiter sub  
illarum rerum sensibilibus specie contineri, sed  
etiam fieri conversionem totius substantiæ  
panis

panis in substantiam corporis Christi Domini nostri, & totius substantiæ vini in substantiam sanguinis ejus; quæ conversio ab Ecclesia Catholica Transubstantiatio nominatur. Antequam verò hæc orthodoxa fides stabilietur, non inutile erit si varios, qui in Eucharistiam insurrexerunt, hæreticorum errores in medium proferamus, magis ut veritatis Catholicæ constantia & perpetuitas clarescat.

## SPECVLATIO I.

### *Divinæ Eucharistiæ hostes & hostilitates ordine recensentur.*

**Q**UI in Eucharistiæ veritatem insurrexerunt primi fuerunt Capharnaïtæ, nonnullique discipuli Domini, qui auditis verbis Salvatoris *Ioan. 6.* abierunt retrò, & dixerunt: *Durus est hic sermo.* Hos secuti sunt primùm Simon Magus, qui veram Christi carnem rejiciens, panem in Christi corpus converti inficiabatur, Altarisque oblationem repudiabat, ut Theodoretus ex S. Ignatio refert *dialogo 3.* Secuti sunt deinde quotquot circa personam Christi Domini, siue veritatem corporis & humanitatis negantes, siue divinitatem humanitati hypostatice uniri inficientes erraverunt. Illi enim, ut refert Lanfrancus, panem & vinum in veram Filii hominis carnem, verumque ejus sanguinem converti fatebantur: at quis esset ille filius hominis, diversimodè exponebant. Quidam enim arbitra-



arbitrabantur hunc oportere intelligi quemlibet hominem, sive justum, sive peccatorem, in cujus carnem & sanguinem conversa terrena substantia sumeretur in remissionem peccatorum. Alii verò existimabant, non hunc esse quemlibet de turba hominem, sed virum justum, sanctum, & à communi hominum vita singulari vitæ celsitudinē segregatum, in cujus carnem & sanguinem posse commutari panem vinumque altaris hæreticā pertinaciā delirabant. Quæ hæresis, inquit, tempore Cœlestini exorta à Concilio Ephesino damnata est, ubi & ea fides roborata est, quā credimus panem converti in eam carnem quæ in cruce pependit, vinumque in eum sanguinem qui de pendentis latere in cruce emanavit. Unde in declaratione undecimi anathematismi jussu Synodi à S. Cyrillo factâ hæc habentur: *Sanctum, ac vivificum, in cruentumque in Ecclesiis sacrificium peragimus, corpus quod proponitur, similiter & preciosum sanguinem non communis nobisque similis hominis cuiuspiam esse credentes; sed potius tanquam proprium corpus effectum & sanguinem etiam Verbi, quod omnia vivificat accipientes; siquidem communis caro vivificare non potest. Et hoc Salvator ipse testatum facit: Caro, inquiens, non prodest quidquam, Spiritus est qui vivificat. Quia verò caro Verbi facta est propria, ob id intelligitur & est vivifica, quemadmodum ipse Salvator ait: Sicut misit me vivens Pater, &c.*

Quartò circa octavum sæculum, ut S. Joannes Damascenus *lib. 4. de fide, cap. 14.* indicat, nonnulli arbitrati sunt in Eucharistia non verum corpus & sanguinem Christi, sed illius danta

duntaxat figuram inveniri. Quod confutans vir sanctus ait : *Absit verò hoc , sed est ipsum corpus Domini deificatum , ipso Domino dicente : hoc est meum ( non figura corporis ) sed corpus ; & non figura sanguinis , sed sanguis.*

Quintò significat etiam inibi S. Damascenus sub illa tempora extitisse nonnullos sustinentes corpus Christi esse quidem in Eucharistia, sed corruptibile, atque in secessum, non secus ac cibum communem abiens, quos idem Sanctus refellens : *Hæc est , inquit , pura hostia & incruenta , quam ab ortu usque ad occasum ipsæ offerri per Prophetam Dominus loquitur , corpus videlicet & sanguis Christi in stabilimentum animæ nostræ & corporis , inconsumptum & incorruptum , non in secessum iens ( absit enim ) sed in nostram substantiam & conversationem , omnimodis nocuenti reparatio , sordis omnis purgatio.*

Hinc hæretici illi Stercoranistæ vocati sunt. De illis ita loquitur Algerus lib. 2. de Sacramento corporis & sanguinis Dominici , cap. 1. *Diximus superius , non minus ore corporis quam ore cordis corpus Domini esse sumendum : sed ex hac ipsa visibili & corporali comestione qua sacramento tenus fit , nascitur foedissima hæresis Stercoranistarum. Dicunt enim tantum Sacramentum sicut corporali comestioni , sic & secessui esse obnoxium. Et infra postquam statuit accidentia panis existere per se , subdit : Non est ibi de corpore suspicandum , ubi non est aliqua huius foeditatis natura , sed tantummodò divinæ virtutis miraculum. Non sunt igitur observanda Græcorum hæreticorum , qui meritò Stercoranistæ*



nista vocantur, deliramenta, qui dicunt participatione corporis & sanguinis Christi solvi Ecclesiastica jejunia usque ad crapulam & ebrietatem, ventrisque distensionem, putantes cœlestem substantiam velut terrenam indifferenter accipi, & in sordidum ventris secessum emitti. Eiusdem hæresis mentionem facit Humbertus contra Nicetam, aitque credidisse Stercoranistas participatione corporis & sanguinis Domini dissolvi quadragesimalia & Ecclesiastica jejunia, & cœlestem escam velut terrenam in secessum dimitti per dejectionem sicut cœnum olidum in latrinam. Eiusdem fœtidissimi erroris meminit Durandus Troarensis lib. de corpore & sanguine Christi, part. 3. & 4. necnon Paschasius Abbas Corbeiensis lib. de corpore & sanguine Domini, cap. 20.

Ex quibus patet 1. falsò scripsisse Faucherum lib. 9. cap. 7. Stercoranistas non alios fuisse ab iis, qui solum panem solumque vinum ore corporis percipi censuerunt, quæ sumpta in stomachum & deinde in secessum sicut cæteri cibi mittuntur. Patet, inquam, id esse falsum, cum ex relatis Authoribus constet Stercoranistarum hæresim de orthodoxa doctrina perversè intellecta esse natam, in eoque esse sitam, quod crederent cœlestem escam velut terrenam indifferenter accipi, & in sordidum ventris secessum emitti.

Patet 2. impostura cujusdam Maræsi, qui scribere non erubuit Stercoranistas non esse quærendos extra Papatum; nullus enim Catholicus unquam scripsit vel somniavit corpus Christi in Eucharistia sumptum corruptioni, & secessui esse obnoxium, sed potius oppositum sentien-

sentientes, tanquam hæreticos Ecclesia Romana damnavit, ut ex Authoribus memoratis evidentissimum est. Unde Maræsi illius turpilookium & putidissimum mendacium est ipsis Stercoranistarum sordibus fœdus & graveolentius.

Sextò difficultas est de Bertramo, seu Rattramo, qui authore Flodoardo *lib. 3. historia Rhemensis, cap. 15. & 28.* primùm Corbeienfis Monachus & Presbyter, deinde Abbas Orbacensis fuit, scripsitque librum de corpore & sanguine Domini circa annum Christi 850. à Carolo Calvo Caroli Magni nepote jussus. Porro authorem illum suum esse non solum gloriantur Calvinistæ, sed illum etiam è Catholicis Genebrardus in Chronologia, & Bellarminus *lib. 1. de Eucharist. cap. 1.* hæreticis accensent. Alii Catholicum fuisse censent, ut Santesi *repetitione 2. de Eucharist. cap. 14.* sed contendunt librum illum falsò attribui Bertramo. Alii cum Cardinali Perronio Catholicum agnoscunt Bertramum, sicut & libri præfati authorem, sed hæreticorum artibus, Oecolampadii præsertim, qui opus illud primus publici juris fecit, operâ vitiatum esse atque corruptum: solent enim hæretici Catholicorum operibus, quorum editionibus adornandis invigilant, nonnulla assuere, suis ut erroribus patronos asciscant. Quod variis experimentis comprobari facile posset, sed uno satis exemplo præfenti instituto acomodatissimo confirmatur. Usserius namque Amalcanus *Gotescalcane historia cap. 11.* ait Bertramum librum de nativitate Christi scripsisse, in eoque eandem quæ in libro de corpore Domini continetur, doctrinam



doctrinam expressisse; quam manifestam imposturam retexerunt viri locupletissimi ex illius libri apographo, in quo nihil prorsus de difficultate illa sermonis habetur.

Quæ in hac opinantium varietate verisimilia apparent paucis explicabo. In primis Bertramum fuisse virum catholicum, & scripsisse librum de corpore Christi, testatur Trithemius libro de Scriptoribus Ecclesiasticis, ubi ait Bertramum Monachum & Presbyterum in divinis fuisse Scripturis valde peritum, nec minus vita quam doctrinâ insignem; additque scripsisse multa præclara opuscula, & inter alia librum de corpore & sanguine Domini: his autem elogiis Bertramum Trithemius Abbas Catholicus non evcheret, si catholicum de Eucharistia dogma, Bertramus impugnasset. Quod & affirmat Sigebertus de Scriptoribus Ecclesiasticis capite 96. Accedit quod per totos 700. annos nemo Bertramum hæreseos reprehendit, quasi malè scripserit, sed in catalogum Scriptorum Ecclesiasticorum ut vir non minus vita, quam ingenio, doctrina, & eloquio insignis relatus est. Deinde in disputationibus tempore Berengarii habitis, Catholici Bertramo proximi hæresis illum nunquam insimularunt, nec Berengarius opus Bertrami in suæ causæ subsidium unquam adhibuit, tanti viri celebre opus jussu Regis occasione gravissimæ controversiæ elaboratum minimè taciturus, si quid illi de sua potuisset hæresi acceptum referre; sicut nec Joannis Scoti, de quo postea, opus prætermittebat, sed summis potius laudibus extollebat, suam ut inde hæresim confirmaret. Denique in Concilio Vercellensi,  
ini

in quo & Berengarius damnatus, & liber Scoti censurâ iniustus, nec Bertrami fides, nec opera accusata sunt.

Probabilius etiam est opus Bertrami, etsi viciatum fortassis non fuerit fraudibus hæreticorum, posse tamen ab eorum calumniis vindicari. Testatur Cardinalis Perronius, repertum fuisse manuscriptum sub Bertrami nomine codicem, exemplaribus per Oecolampadium editis planè persimilem; unde utrum opus illud corruptum fuerit necne, ægrè definiverim. Sed utut sit, contendimus librum de corpore Christi Bertramo assertum non reddere fidem Authoris illius suspectam, imò quàmplurima doctrinam Catholicam exertè confirmare, alia verò subobscuriora facili & benigno posse interpretatione ad sensum orthodoxum reduci. Etenim mens alicujus Authoris ex sententiis obscuris & à viris constantissimè Catholicis usurpari interdum solitis non rectè colligitur, nec oportet quæ certa & manifesta sunt, ex dubiis & incertis exponi, sed potius obscura, dubia & ambigua ex certis & manifestis interpretari debemus; id enim pietas, id prudentia christiana, id charitas Catholica postulant. Atqui doctrina orthodoxa præsentia realis corporis Christi & transubstantiationis in opere Bertrami manifestè & sine ambiguitate exprimitur: *Panis* ( inquit in responsione ad priorem quaestionem, quam initio libri proposuerat ) *qui per Sacerdotis ministerium Christi corpus efficitur, aliud exterius humanis sensibus ostendit, & aliud interius fidelium mentibus clamat. Exterius quidem panis, quod antè fuerat, forma prætenditur, color ostenditur, sapor accipitur; &*  
*interius*

interius longè aliud multoque pretiosius, multoque excellentius intimatur, quia cœleste, quia divinum, idest Christi corpus ostenditur. : : Post mysticam consecrationem nec panis jam dicitur, nec vinum, sed Christi corpus & sanguis. : : Sub velamento corporei panis corporeique vini spirituale corpus Christi, spiritualisque sanguis existit. Et infra: Panis qui offertur ex fructibus terra cum sit assumptus, in Christi corpus transponitur, sicut & vinum cum ex vite defluerit, divini tamen sanctificatione mysterii efficitur sanguis Christi, non quidem visibiliter, sed operante invisibiliter Spiritu Sancto. Denique sic concludit: Ex his omnibus quæ hæcenus dicta sunt, monstratum est, quod corpus & sanguis Christi, quæ fidelium ore in Ecclesia percipiuntur, figura sunt secundum speciem visibilem; at verò secundum invisibilem substantiam, idest divini potentiam Verbi, corpus & sanguis Christi verè existunt: unde secundum visibilem creaturam corpus pascunt, juxta verò potentioris virtutem substantia mentes fidelium & pascunt & sanctificant.

Hac de causa non solum Caletius, sed ipsi etiam Magdeburgenses *centuria 9. cap. 4. 6. & 8.* contendunt non solum Bertramus credidisse corpus & sanguinem Domini super altare poni, & inde populo distribui, sed etiam transubstantiationis habere semina: *Utitur enim,* inquiunt, *vocabulis commutationis & conversionis.*

Nec obest quod aliqua obscura & ambigua scripserit Bertramus. Non obest, inquam; si enim S. Athanasius, referente Facundo Hermianensi *lib. 10. cap. 5.* S. Dionysium Alexandrinum

drinum à calumniis Arrianorum vindicavit, tametsi aliqua dura, & ad excusandum difficilia protulerit, quia nunquam cum viveret, fuit de impietate accusatus, aut Episcopatu dejectus, sed in Ecclesiæ semper permansit unitate: nec mens authoris ex levi sono verborum, sed ex intentione illius æstimanda est; intentio autem, cum jam persona defuncta est, ex communione Ecclesiæ religiosius æstimatur, ne tota quæ ei communicavit culpetur Ecclesiæ: ita similiter, etsi aliqua ambigua, & ad defendendum difficilia in opere Bertrami legantur, excusari tamen possunt & debent, cum cæteroquin constet Bertramum dum viveret nunquam fuisse hærescos insinulatum, sed in Ecclesiæ permansisse unitate, in ejusque sinu atque communione placidè obdormivisse.

Loci autem illi obscuriores & explicatu difficiliiores sunt, 1. quia scripsit in Eucharistia figuram esse, & quod in Ecclesia Fidelium ore sumitur, fieri corpus & sanguinem Christi in mysterio seu figura. 2. Quia scripsit corpus quod ex Virgine natum est, non esse id quod ore Fidelium per sacramentorum mysteria sumitur in Ecclesia. 3. Quia dixit, quod secundum creaturarum substantiam, quod fuerunt ante consecrationem, hoc postea consistunt.

Verùm hæc ex aliis ejusdem locis facilè intelliguntur. Primo enim loco non intendit in Eucharistia esse meram figuram, sed quod species panis & vini sunt figuræ corporis & sanguinis Christi sub eis contentorum; nam ut ipsemet ait, figura est obumbratio quædam quibusdam velaminibus quæ intendit ostendens,



dens. Quare nihil aliud Bertramus intendit, quàm Stercoranistarum dogma refellere, assentientium in Eucharistia adeo nullam interesse figuram, ut ipsa quæ apparent accidentia, corporis Christi accidentia evadant. Secundo verò loco vult solùm corpus de Virgine natum non esse eodem modo in Eucharistia quò visibiliter natus est, quia modo spiritali speciebus sacramentalibus obvolutum in Eucharistia continetur: nam cæteroquin affirmat corpus Christi in Eucharistia verè existere. Denique tertio loco vult solùm panem & vinum consistere post consecrationem secundùm apparentiam substantiæ, non quòd substantia panis remaneat, sed quia sensibus, mediis accidentibus, appareret. Nam ipsi Magdeburgenses Centuriatores transubstantiationem agnovisse Bertramus non diffitentur.

Septimò difficultas est de Joanne cognomento Scoto vel Erigena, ex Hibernia oriundo, quæ patrio idiomate Erin seu Eri nominatur, & anno 883. vel 884. obiisse legitur. Vindicare illum nonnulli satagunt: gravissimis tamen momentis vir suspectæ fidei creditur, & liber ejus de corpore Christi ut erroribus scædens reprobatur. Tum quia Joannis Erigenæ autoritate potissimùm utebatur Berengarius. Tum quia teste Nicolao Romano Pontifice epist. ad Carolum Calvum, licèt Joannes multæ scientiæ esse prædicetur; tamen non sanè sapere in quibusdam frequenti rumore dicitur. Tum quia in Concilio Vercellensi liber Erigenæ proscriptus est. Tum quia Berengarius epist. ad Lanfrancum, quæ extat in manuscripto Bibliothecæ Regiæ, asserit Joannem

Scotum à Paschasio, qui longè antè annos 818. de Eucharistia scripserat, dissentire, reprehenditque Lanfrancum, quòd Scoti sententias improbaverit. In epistola etiam ad Assellium, illum idem Berengarius vehementer objurgat, quòd hæreticum haberet Joannem Scotum inconsideratè, impiè, & indignè sacerdotio suo. Cui respondens Assellius : *Ioannem verò Scotum*, inquit, *nec inconsideratè, nec impiè, nec indignè sacerdotio meo hæreticum habeo, quem toto nisu totaque intentione ad hoc solum tendere video, ut mihi persuadeat, hoc videlicet quod in altari consecratur, neque verè corpus, neque verè Christi sanguinem esse : hoc autem astruere nititur ex Sanctorum Patrum opusculis quæ pravè exponit.* Denique in epistola ad Richardum idem Berengarius conqueritur Joannem Scotum in Concilio Vercellensi injustissimè damnatum, & Paschasium nihilominus asseritum.

Nec obest, quod idem Joannes post obitum Sanctus & Martyr habitus sit, sepultusque ad magni Altaris sinistrum latus cum insigni epitaphio his versibus à Guillelmo Malmesburiensi lib. 2. cap. 4. relatis, comprehenso : *Claudatur hoc tumulo sanctus Sophista Ioannes, qui ditatus erat jam vivens dogmate miro : Martyrio tandem Christi conscendere regnum commeruit.* Non obest, inquam ; hoc enim epitaphium non auctoritate Ecclesiæ, sed amicorum affectu positum est. Neque cum ut Martyrem commendat Cardinalis Baronius ad annum 884. Quin potius doctissimus Genebrandus in liturgiam S. Dionysii, confossum graphiis, & à discipulis sævissimè interemptum  
Joannem

Joannem ait propter Sacramentariorum impium dogma quod defendebat. Unde cum nec ut Sanctum, nec ut Martyrem agnovit Ecclesia Catholica, quæ potius librum ejus post obitum condemnavit.

Octavò in Ecclesiæ orthodoxam fidem insurrexit Berengarius Andegavenſis Ecclesiæ Archidiaconus, qui licet de multis accusetur ab Episcopo Leodiensi Deoduno epist. ad Henricum Francorum Regem, necnon à Guitmundo rejecti Baptismi parvulorum & everſorum legitimorum conjugiorum insimuletur; quia tamen eorum errorum in Conciliis Berengarii causâ coactis nulla fit mentio, dicendum est propriam & singularem Berengarii hæresim in eo fuisse sitam, quod negaret in Eucharistia veram fieri substantiæ panis & vini in corpus & sanguinem Christi conversionem. Unde omnia in Sacramento altaris per figuram & similitudinem geri inferebat, & ea quæ ad altare deferuntur panis & vini munera, post consecrationem etiam quod fuerant permanere. Quavis autem initio hæreseos Berengariani realem Christi præsentiam inficiarentur, nihilque corporis & sanguinis Domini sacramentis inesse contenderent, sed umbras tantum & figuras; in progressu tamen Ecclesiæ rationibus convicti dixerunt in sacramento corpus & sanguinem Domini reverà, sed impanatum contineri, transubstantiationem inficientes.

Porro Berengarii hæresis in Galliis sæpe proscripta ad Apostolicam tandem Sedem delata, primùm in Concilio Romano, deinde in Vercellensi sub Leone IX. anno 1053. damnata est, liber Joannis Scoti anathemate per-

cultus, & Ecclesiæ Catholicæ fides concordi omnium assensu confirmata. E vita migravit deinde Leo IX. quem defunctum hæresiarcha Berengarius, ut refert Guitmundus, convitiis laceravit, eumque Concilium vanitatis coëgisse impiè blasphemavit. Petulcam ejus audaciam compressurus Victor II. Leonis successor Concilium Turonis coëgit anno 1055. cui per Legatos, maximè per Ildebrandum, qui postea fuit Gregorius VII. præfuit. Data ibi illi est causæ suæ defendendæ optio, quam tamen defendere reformidans, communem Ecclesiæ fidem confessus est, datoque propriæ manus sacramento, ab ea se nunquam recessurum spondit. At hæresiarcha sacramenti immemor & violator ad vomitum rediit. Unde virus ne serperet, Nicolaus II. Romæ Concilium ex centum tredecim Episcopis, cui & Berengarius interfuit, anno 1059. coëgit. Ibiq; ejus sententia à Patribus & summo totius Christiani nominis Pontifice audita, examinata, atque damnata fuit. Ipseque Berengarius sanctæ Synodo concedens libros suos perversum dogma continentes in medio sacri Concilii propalam igni tradidit, jurans fidem à Patribus præsentibus traditam se inviolabiliter servaturum.

Authoritate sanctæ Synodi Umberto Episcopo Cardinali demandata provincia est, ut veræ fidei formulam ederet, & Berengario ad legendum & confitendum traderet. Acquiescens autem Berengarius eam accepit, legit, confessus est, seque ita credere jurejurando firmavit, & manu tandem propria subscripsit. Hæc autem fidei professio ad hanc formam redacta fuit:

*Ego*



Ego Berengarius indignus Diaconus Ecclesia S. Mauritii Andegavensis cognosco veram, Catholicam, & Apostolicam fidem: anathematizo omnem hæresim, præcipuè eam de qua hætenus infamatus sum, qua astruere conatur panem & vinum qua in altari ponuntur, post consecrationem solummodo sacramentum, & non verum corpus & sanguinem Domini nostri Iesu Christi esse, nec posse sensualiter nisi in solo sacramento manibus Sacerdotum tractari, vel frangi, aut Fidelium dentibus atteri. Consentio autem sanctæ Romanæ Ecclesiæ & Apostolicæ Sedi, & ore & corde profiteor de Sacramentis Dominicæ cœnæ eam fidem me tenere, quam Dominus & Venerabilis Papa Nicolaus, & hæc sancta Synodus authoritate Evangelicæ & Apostolicæ tenendam credidit, mihiq; formavit: scilicet panem & vinum qua in Altari ponuntur, post consecrationem non solum sacramentum, sed etiam verum corpus & sanguinem Domini nostri Iesu Christi esse, & sensualiter non solum sacramento, sed in veritate manibus Sacerdotum tractari, frangi, & fidelium dentibus atteri. Iurans per sanctam & indivisam Trinitatem, & per hæc sacrosancta Christi Evangelia. Eos verò qui contra hanc fidem venerint cum dogmatibus & sectatoribus suis æterno anathemate dignos esse pronuntio. Quod si ego ipse aliquando contra id sentire ac prædicare præsumpsero, subjaceam Canonum severitati. Lecto & perlecto sponte subscripsi. Ita referunt Lanfrancus, Guirmundus, Algerus, & habetur de consecratione distinct. 2. quæst. 1.

Calumniantur hæretici hanc fidei professionem, quam non solum suis hæresibus, sed etiam

catholicis Ecclesiæ Romanæ sensibus contendant esse adversam. Nam neque panis est corpus Christi, neque corpus Christi sensualiter in veritate manibus tractatur, frangitur, & dentibus atteritur, nisi vera esset spurcissima Stercoranistarum doctrina. Verùm hæc hæreticorum calumnia nullius momenti est; nam fidei professio illa non habet, panem esse corpus, quod consubstantiationem significaret; sed panem post consecrationem esse corpus, quod transubstantiationem significat; sicut è contra Berengarius docuerat panem post consecrationem non esse nisi sacramentum & signum corporis Christi. Dicitur autem corpus Christi manibus tractari, frangi, atteri dentibus, denominatione extrinsecâ petitâ à speciebus quæ contrectantur, franguntur, atteruntur, sub quibus corpus Christi realiter continetur, uti suprà inter dissolvenda Calvinistarum sophismata diximus. Sed ad Berengarium redeamus.

Post tam solenne sacramentum versatilis & arundini vento agitatae similis Berengarius fidefragus & sacrilegus violator veritatem catholicam iterum impugnavit verbis scriptisque nefariis, Ecclesiæ clavo astante Alexandro Papa, qui cum ad Dominum migrasset anno 1073. ejus successor Gregorius VII. Concilium Romæ in Ecclesia Salvatoris anno 1079. adversus impietatem relapsi Berengarii coëgit, cujus acta apud eundem Gregorium libro 6. epistolarum, post epistolam 17. habentur. Ibi firmata veritas Catholica, convictus iterum Berengarius, veniamque ab illa Sede quæ tota est ad clementiam comparata, quæve more Dei

non

non vult mortem peccatoris , sed inagis ut convertatur & vivat , impetravit , in eumque modum juravit : Ego Berengarius corde credo & ore confiteor panem & vinum , quæ ponuntur in altari per mysterium sacra orationis & verba nostri Redemptoris , substantialiter converti in veram & propriam ac vivificatricem carnem & sanguinem Iesu Christi Domini nostri ; & post consecrationem esse verum Christi corpus quod natum est de Virgine , & quod pro salute mundi oblatum in cruce pependit , & quod sedet ad dexteram Patris ; & verum sanguinem Christi qui de latere ejus effusus est , non tantum per signum & virtutem sacramenti , sed in veritate natura & proprietate substantia. Sicut in hoc brevi continetur , & ego legi , & vos intelligitis , sic credo , nec contra hanc fidem ulterius docebo. Ita habetur in editione Lanfranci anni 1540. operâ Francisci Quadrati adornata ex vetusto codice bibliothecæ Bexensis Monasterii. Quanvis enim opus Lanfranci editum sit ante obitum Alexandri Papæ , ad quem Lanfrancus ad Archiepiscopatum Cantuariensem assumptus opus suum transmiserat , potuit tamen professio illa fideliter exscripta operi illi adjici , utpote argumento illius peropportuna. Utut sit ex actis Concilii Romani habetur Berengario præcepisse Gregorium VII. ne amplius de corpore & sanguine Domini cum aliquo disputaret , nisi fortè eorum , qui ejus doctrinâ decepti in errorem prolapsi fuerant , ad fidem catholicam reducendorum gratiâ. Absoluto Concilio secum per aliquod tempus Berengarium paternâ benignitate Summus Pontifex detinuit , ut instabilitatem viri toties lapsi

figeret & fidei constantiam probaret. Explorata verò illius in fide firmitate, eum post multas moras ad proprios lares cum litteris commendatitiis remisit, quibus & rectam illius fidem testatus est, vetuitque ne ullum vel personæ vel bonis ejus nocumentum importaretur.

An autem Berengarius ad vomitum canino more redierit, an in fide Ecclesiæ in finem usque perseveraverit, contendit Bertoldus continuator Hermanni ad annum 1083. ipsum in errorem suum relapsum, quem sequuntur plures scriptores Calviniani. Veritas tamen est, Berengarium peractâ culparum suarum pœnitentiâ in Ecclesiæ Romanæ fide & communione obiisse anno 1088. die Epiphaniæ. Tum quia ultima Berengarii morientis verba catholicam fidem clarissimè significantia refert Guillelmus Malmesburiensis *lib. 3. de gestis Anglorum*, aitque eum in ultimo vitæ agone alternis spei & timoris motibus fuisse jactatum, Dei misericordiam sperans propter pœnitentiam, justitiam verò formidans propter aliena, quorum causa fuerat, peccata. Tum quia egregiis epitaphiis ab Hildeberto, qui postea fuit Episcopus Cœnomanensis, & à Baldrico Abbate Gurgulienfi cohonestatus fuit. Tum quia sepulturâ Ecclesiasticâ in claustro S. Martini Turonensis donatus fuit, ut scribit Papirius Masso *lib. 3. Annalium Francia*. Denique Berengarium ejurata hæresi Catholicum è vivis excessisse fatentur quamplures Historici, nec dissentit Baronius ad annum 1088. quanvis Hildebertum redarguat, quòd gloriosius quàm hæresiarchæ toties sacrilegè relapsi conditio postularet, epitaphium



raphium ei scripserit. Neque enim iis honoribus excipiendus est hæreticus etiam pœnitens, qui ut ei objecerunt Lanfrancus, Guitmundus, Algerus, alique Scriptores Benedictini (clarissimo enim S. Benedicti Ordini Berengarianæ impietatis victoriam & triumphum secundum Deum Ecclesia debet). doctrinæ novitatem contra Ecclesiæ toto orbe diffusæ sensum invexerat, id sæpius labefactare molitus quod universalis Ecclesiæ consensione roboratum est.

Nonò referunt Guitmundus & Algerus nonnullos hæreticos existimasse, quod panis & vinum ex parte mutantur, & ex parte remaneant; alios verò putasse panem & vinum ex toto quidem in Eucharistia mutari, sed carnem & sanguinem Domini ab indignis accepta in panem & vinum malis eorum meritis iterum converti.

Decimò circa annum 1126. Petrus de Brui, à quo sequaces Petrobrussiani dicti sunt, varios errores in Provincia Arelatensi disseminavit. Nam & infantes extra ætatem discretionis baptizari volebat; & templa non esse in lege nova ædificanda, ædificata esse diruenda docuit; & cruces confringendas comburendasque in horrorem occisionis Christi censuit, & sacrificia, orationes, oblationes, elemosynas aliaque pia pro defunctis opera derisit, & veritatem corporis & sanguinis Domini in Eucharistia, ejusque jure in Ecclesia offerri solitum sacrificium inficiatus est. Quavis enim panem in corpus Christi ab ipso Christo in cœna ultima conversum esse fateretur, ab Apostolis tamen eorumque successoribus idem fieri

pernegabat , ut ex initio tractatus Petri Cluniacensis claret. In ignem tandem, quem ad succendendas cruces ipso Dominicæ Passionis die pararat, projectus & combustus est. Adversus hæreticum illum scripsit plures epistolas & tractatum specialem de sacrificio Missæ & transubstantiatione Petrus Cluniacensis. Ejus hæresim primarius ejus discipulus Henricus, à quo Henriciani, post viginti annos, anno scilicet 1147. propagavit. Hunc S. Bernardus *epist. 24. & serm. 65. in Cantica*, scriptis variis etiam sermonibus & miraculis confutavit, ut in vita Bernardi apud Gosfridum Clarevalensem videre est. Arnoldus etiam de Brixia, unde Arnoldistæ nomen sortiti sunt, circa Eucharistiam, referente Othone Frisingensi *lib. 2. cap. 20.* pariter erravit, quem Bernardus *epist. 195. & 196.* acriter exagitavit. Tandem combustus, & ejus cineres in Tiberim sparsæ sunt.

Undecimò Waldenses seu Pauperes de Lugduno, sic dicti à Petro Waldo Lugdunensi, in fidem Catholicam circa annum 1176. insurrexerunt. Vocati etiam sunt Albigenenses & Tolosani, quia errorum illorum virus non parum per regionem Albiæ & Tolosæ grassatum est. Cognominati etiam sunt Lollardi à Lollardo famoso Waldi discipulo. Non tam secta specialis quam fœdissima sectarum colluvies fuit. Nam & Arianismum renovarunt, & cum Manichæis vetus Testamentum repudiarunt, & veram transubstantiationem alii negarunt, alii corporis Christi veritatem inficiati sunt, ut apud Historicos quamplures videre est. Illos S. Dominicus auctoritate summi Pontificis, Re-

gum

gum Christianorum copiis partim profligavit, partim prædicatione & miraculis convertit.

Duodecimò Catholicam de Eucharistia fidem Joannes Wiclefus Anglus circa annum 1312. aggressus est. Nam, ut in Concilio Constantiensi sess. 8. refertur, substantiam panis & vini in Sacramento Altaris permanere affirmavit, & accidentia panis non manere sine subiecto sustinuit, & Christum in eodem sacramento realiter adesse negavit, & Sacerdotem in peccato mortali existentem non conficere, neque consecrare Eucharistiam tradidit. Ejus errores sequutus est Joannes Hus Boëmus, ut pater ex sessione 15. ejusdem Concilii, & ex processibus contra illum factis ac per testes idoneos & locupletes probatis. Nihil tamen contra Eucharistiam scripsit, nec illum ejus errorem omnes discipuli sequuti sunt. More etiam hæreticorum dubitanter de hoc mysterio interdum loquutus est.

Decimotertiò transubstantiationem aperte impugnavit hæreticorum post hominum memoriam audacissimus Martinus Lutherus ab Erebo sæculo superiori suscitatus, veritatem corporis Domini in Eucharistia negare paratus & avidus, si per planum Evangelii textum & perpetuam traditionem licuisset, ut ex ipso alibi retulimus. Fluctuabat initio hæresiarum animus, & transubstantiationis affirmantem sententiam permittebat, modò ne consubstantiatio sua hæreseos insimularetur: impudentior tamen deinde factus Catholicum de transubstantiatione dogma impium & blasphemum anno 1523. calamo impio & blasphemò

libro contra Henricum Angliæ Regem, quem novum & eximium Thomistam appellat, edito pronuntiavit, declarans suam se antiquam transubstantiare seu mutare sententiam. Hanc ejus assertionem mordicus tuentur discipuli Lutherani, verba Christi, *Hoc est corpus meum*, sic interpretantes: In hoc, cum hoc, sub hoc pane est corpus meum. Eodemque modo aiunt Christum porrigendo corpus suum in pane potuisse dicere, *Hoc est corpus meum*, quo rusticus de avena in sacco inclusa, demonstrato sacco ait, hoc est avena; quo mater de infante in cunis cunas ostendens ait, *Hoc est infans meus*; vel caupo de vino scyphum porrigens ait, *Hoc est vinum meum*. Id etiam aliis exemplis exponit Lutherus libro citato contra Regem Angliæ: Sicut ignis, inquit, in fornace salvâ ferri substantiâ, & Deus in homine salvâ humanitate, utrobique sic mixtis substantiis, ut sua cuique operatio & natura propria remaneat, & tamen unum aliquod constituent: sic salvo pane in sacramento est corpus Christi. Hanc suam sententiam ut adversus Oecolampadium & Zuinglium propugnaret, ubiquitatem corporis Christi somniavit, quam paulò post abjecit tamen. Hinc inter Lutheranos schisma, Kemnitio cum suis solam impanationem, Brencio & Witembergensibus ubiquitatem defendentibus.

Decimoquartò Huldericus Zuinglius Helvetius non minùs Luthero quàm Ecclesiæ Catholicæ infensus figurativam tantùm corporis Christi in Eucharistia præsentiam circa eadem tempora finxit, quem sequuti sunt Oecolampadius, & ex parte Carolstadius; ut  
quales



quales essent imaginarii præsentæ reformationis authores tot dissidiis clareret. Zuinglium etiam sequutus est Hæreticorum nostratum architectus Joannes Calvinus, dolosè quidem initio mentem suam aperiens, ne Lutheranos offenderet; veritatem tamen corporis Christi ferre non valens, Christum ore duntaxat fidei recipi astruere conatus est. Ejus impietatem sequitur confessio Huguenottorum Gallica, *art. 36.* sequuntur & Pseudo-Ecclesiæ Anglicanæ, Scoticæ, Belgicæ, Palatinæ, quam & plures Ministri iniquitatis, & novissimè Claudius Charentonenfis apertæ veritatis impugnator scriptis nefariis propugnarunt. Sed de his capite proximè superiori latius.

## REFLEXIO.

Sacramentum Eucharistiæ erroribus hæretici, sed longè gravius indignis Communionibus Catholici persequuntur. Quare realis corporis Christi præsentæ veritas, novæ vitæ à nobis postulat veritatem. Si Scripturarum & Patrum Christum sub rerum visibilium specie invisibiliter, reverà tamen delitescentem contestantium authoritati obtemperamus, quidnī ejusdem authoritatis ponderi cedimus, eique quæ vitæ revera conversæ realem præcipit ad Eucharistiam suscipiendam mutationem, non obsequimur? Si impio Calvino Basilio auscultare jubeamus *lib. 2. de bapt. quæst. 3.* scribenti: *Qui Eucharistiam sumunt, corpus Christi contingunt*; cur eidem non & nos auscultemus *lib. 1. de baptismo, cap. 3.* asseveranti: *Oportet ut quisquis accedit ad corpus & sanguinem Domini*

*in commemorationem ejus qui pro nobis mortuus est ac resurrexit, se peccato, mundo, ac sibi mortuum exhibeat? Si Sacramentariorum imagines tantum & figuras, quarum alioquin infensissimi sunt nefandi Iconoclastæ, in hoc sacramento comminiscuntur, & præcipuum divini in Ecclesiam amoris pignus in symboli tenuitatem deturbantium figmenta &, offutias hac Ambrosii luce dispellimus, quam lib. 4. de sacrament. cap. 4. effundit: Panis est ante verba sacramentorum; sed ubi accesserit consecratio, de pane fit caro Christi: cur ejusdem Patris sese ingerentem lucem repellimus, dum hæc monita luce splendidiora nobis suggerit sermone Domin. 4. Adventus: Mutare vitam debet, qui vult accipere vitam; nam si non mutat vitam, ad judicium accipiet vitam; & magis ex ipsa corrumpitur, quàm sanetur; magis occiditur, quàm vivificetur?*

Si novissimum Claudium Ministrum Charontonensem vaniloquiis, sophismatis, & inani Philoſophiâ fallacis Rhetorices fucis oblitâ tot Calvinianos decipientem, & adversus veritatem perenni sæculorum omnium traditione, & omnium Christianarum communionum, una dempta Calviniana, consensione stabilitam blaterantem meliùs loquentis Chrysostomi aureis sententiis confundimus, ejusque eloquentiæ hujus eloquentiam opponimus, quam fudit vir divinus hom. 24. in 1. epist. ad Cor. his verbis: *Hæc mensa cæli ac terra supremi Regis est mensa, cui Angeli ministrant, & in qua Rex ipse videndum se exhibet, neque videndum modo, sed etiam tractandum ac degustandum; quia nimirum &*

*eum*

eum ibi Angeli vident, & nos ipsum ratione specierum videmus, & contrectamus: cur ejusdem eloquentiæ tantâ vi, tantâque copiâ non flectimur, quæ *hom. 17. in epist. ad Hebræos*, & *hom. 24. in 1. Cor.* sic tonat: *Qui hoc honore dignantur, ut mensa regia accumbant, & pocula tangerant regia, formosos esse oportet, & mentis pulchritudine praditos, auro fulgentes, ac pura veste amictos. Neque hac gracculorum mensa est, sed aquilarum, hoc est animalium sublimium, & in cœlum erectarum, quæ nullum cum terra commercium habeant, neque deorsum trahantur, aut repant rerum creaturarum cupiditate illecta, sed quæ indefinenter sursum evolent, ipsumque justitiæ Solem acutis ac perspicacibus mentis oculis intueantur?*

Si denique omnium moderniorum hæreticorum Missæ sacrificium abominantium, & altaria deturbantium petulantiam hoc Augustini fulmine conterimus, quod *libro 9. Confess. cap. 19.* nobis ad extollentia se adversus Ecclesiam capita comprimenda reliquit his verbis: *E nostris altaribus dispensatur victima sancta, quâ deletum est chirographum, quod erat contrarium nobis: cur ad formidandas ejusdem Patris voces attoniti non pavebunt mali Catholici, quas tract. 26. in Joannem, protulit: Qui non manet in Christo, & in quo non manet Christus, procul dubio non manducat spiritualiter carnem ejus, licet carnaliter & visibiliter premat dentibus Sacramentum corporis & sanguinis Christi: sed magis tanta rei Sacramentum ad judicium sibi manducat & bibit, quia immundus præsumpsit ad Christi accedere sacramenta, quæ aliquis non dignè sumit, nisi*

quæ

*qui mundus est?* Itane contra unos hæreticos valebit sacrata Patrum autoritas? Itane solos Ecclesiæ hostes exarmabit, Ecclesiæ filios non persuadebit? Absit, absurdum est, iniquum est. Cur credis, ô catholice, ibi Redemptorem tuum esse, si ipsum tam indignè, tam contumeliosè maculosissimâ vitâ tuâ habes? Quâ fronte Christo pacis osculum foris admoves, ad eumque amantis ore atque habitu accedis, quem propediem, & quandoque ipso illo die novis peccatis sceleratè prodiss?

Magna sunt, ô Catholice, in Eucharistia quæ credis; ineffabilia sunt, divina sunt; gratias non vulgares inde hausturum te speras, eximia ergo sit & singularis animi tui ad recipiendum divinum cibum compositio. Præclarè Sixtus III. vel quis alius Author in Bibliotheca Patrum: *Inenarrabile est quod credimus: immensum est quod speramus: non est vulgare quod quarimus: ergo non debet esse vulgare quod vivimus.*



## SPECVLATIO II.

*Substantia panis & vini in corpus  
& sanguinem Christi Domini  
secundum se totam convertitur,  
unde & vera datur transub-  
stantiatio.*

**D**efinita est hæc veritas orthodoxa in plu-  
ribus Conciliis adversus Berengarii pro-  
phanam novitatem coactis, & deinde in Mag-  
no Lateranensi sub Innocentio III. & in Con-  
stantiensi *sessione* 8. & Florentino in decreto  
unionis, & Tridentino *sess.* 13. *capite* 4. &  
*can.* 2.

Eandem veritatem clarissimè docuerunt Pa-  
tres superiori capite producti. Nihil enim ex-  
pressius iis testimoniis esse potest, quæ ex Cy-  
rillo Jerosolymitano, Gregorio Nysseno ora-  
tione catechetica, Ambrosio libro de initiandis  
& de sacramentis, Cypriano vel Authore ser-  
monis de cœna Domini, Damasceno *lib.* 4. *de*  
*fide*, Thophilacto *in cap.* 6. Joannis retulimus.  
Quibus & illud adde Eusebii Emissemi, vel Eu-  
cherii Lugdunensis homil. 1. de Paschate: *In-*  
*visibilis Sacerdos visibiles creaturas in substan-*  
*tiam corporis & sanguinis sui verbo suo secreta*  
*potestate convertit. ::: Ut ibi novum & impossi-*  
*bile non debeat videri, quod in Christi substan-*  
*tiam terrena & mortalia commutentur. Quan-*  
*do*

do benedicenda verbis cœlestibus creatura sacris altaribus imponuntur, antequam invocatione summi Numinis consecrentur, substantia est illis panis & vini: post verba autem Christi corpus & sanguis est Christi. Quid mirum autem, si ea quæ verbo creare potuit, possit creata convertere? Imò jam minoris videtur esse miraculi, si id quod ex nihilo agnoscitur condidisse, jam conditum in melius valeat commutare. Requiere quid ei possit esse difficile, cui facile fulgus visibilia & invisibilia voluntatis imperia suscitare. Quid luculentius & nervosius? Quæ ergo fronte Lutherus libro suo de captivitate Babylonica scribere potuit transubstantiationem esse portentosum somnium, nec illius Patres per mille ducentos annos meminisse?

Perpetua etiam fidei traditio hanc veritatem demonstrat; cum enim ante suscitatum ab Erebo Lutherum Christianismus sub cœlo totus veram transubstantiationem in Eucharistia agnosceret, profectò adversus antiquitatem, universitatem, & consensionem Lutherus pugnavit, unde redeunt argumenta quæ contra Calvinianos & Claudii perspicua mendacia superiori capite in aciem produximus.

Denique ostenditur hæc veritas ratione S. Thomæ *quæst. 75. art. 2.* Non essent vera Salvatoris verba, si substantia panis in Eucharistia remaneret: hoc enim pronomen demonstrativum *hoc*, indigitat substantiam sub accidentibus latentem esse corpus Christi, ut salvetur identitas prædicatum inter & subjectum: ergo si substantia panis post consecrationem permaneret, sensus esset, Substantia panis est corpus meum.



meum, quod est apertè falsum : unde non fuisset à Christo dicendum, Hoc est corpus meum, sed hîc est corpus meum. Sanè si quis haberet aurum & argentum in crumena delitescencia, falsò diceret, hoc est aurum, quia demonstraret totam substantiam in crumena delitescentem, quæ non est minùs argentum quàm aurum. Et ratio est ; quia omnis prædicatio unius de alio supponit identitatem vel unionem attributi cum subjecto ; ex eo enim quod res est vel non est, oratio dicitur vera vel falsa : panis autem & corpus Christi sunt res omninò disparatæ, nec inter se ulla identitate vel unione copulantur, nec ex natura sua vel hominum usu panis ad continendum corpus Christi est institutum, sicut dolium est institutum ad continendum vinum ; unde ostenso dolio vini pleno rectè dicitur, hoc est vinum : ergo particula *hoc*, non supponit pro substantia panis, quæ proinde non manet, cum nulla panem inter & corpus Christi unio in sacramento Eucharistiæ intercedat.

Nec dici potest sensum hujus propositionis, *Hoc est corpus meum*, istum esse ; in, vel sub, vel cum pane est corpus meum ; non verò panis est corpus meum. Non, inquam, dici id potest, quia unum esse aliud, & unum esse cum alio, toto cœlo differunt : si enim indistantia unius cum alio sufficeret ad veritatem prædicationis, omnia de Deo rebus omnibus intimo prædicari possent.

Hanc rationem ex verbis Christi desumptam sua autoritate sacrum Tridentinum Concilium sess. 13. cap. 4. confirmat his verbis : *Quoniam Christus Redemptor noster corpus suum*  
id

id quod sub specie panis offerebat verè esse dixit, ideo persuasum semper in Ecclesia Dei fuit, idque nunc denuò hæc sancta Synodus declarat, per consecrationem panis & vini conversionem fieri totius panis in substantiam corporis Christi Domini nostri, & totius substantia vini in substantiam sanguinis ejus. Eandem veritatem ex verbis Salvatoris sacri Doctores derivarunt. Dubitari nefas est, inquit S. Fulbertus Carnotensis Episcopus epist. ad Adeodatum, ad cujus nutum cuncta ex nihilo substituerunt, se pari potentia in spiritualibus sacramentis terrena materies natura & generis sui meritum transcendens in Christi substantiam commutetur; cum ipse dicat, Hoc est corpus meum; & paulò post, Hic est sanguis meus. Et S. Gaudentius Brixienensis Episcopus tractatu 2. in Exodum: Quod annuntiatum est credas, quia quod accipis corpus est panis illius cœlestis, & sanguis illius sacra vitis: nam cum panem consecratum & vinum discipulis suis porrigeret, sic ait: Hoc est corpus meum, Hic est sanguis meus. Et Guitmundus lib. 3. de veritate corporis & sanguinis Domini: Hos Impanatores suo ipse Dominus verbo oris sui interfecit, cum accipiens panem gratiasque agens ac benedicens, ait: Hoc est corpus meum. Non ait, in hoc latet corpus meum; nec dixit, in hoc vino est sanguis meus; sed dixit, Hic est sanguis meus. Unde non est tuta Scoti, Durandi, aliorumque Scholasticorum sententia existimantium futuram veram consecrationis formam, etiamsi panis substantia permaneat, & solâ Ecclesiæ autoritate de fide transubstantiationis constare. Nam transubstantiationem ex verbis Christi colligi



colligi sacrum Tridentinum Concilium cum totius Ecclesiæ sensu, tum sua authoritate declaravit.

Objiciunt primò Lutheraui quasdam Scripturæ & Patrum authoritates. In primis Eucharistia panis dicitur, 1. *Cor.* 10. & *Matth.* 26. *genuimen vitis. Joan. etiam* 6. Christum esse se panem dixit. Irenæus quoque docet Eucharistiam duabus constare rebus, terrenâ scilicet & cœlesti, quæ terrena panis est. Origenes pariter *ad cap.* 18. *Matth.* ait Eucharistiam juxta id quod habet materiale, abire in ventrem & in secessum mitti. Item S. Cyrillus Hierosolymitanus *Catechesi* 3. docet panem Eucharistiæ post invocationem S. Spiritus non esse ampliùs panem communem, sed corpus Christi; sicut sanctum unguentum postquam consecratum est, non est ampliùs unguentum commune & nudum, sed sanctum chrisma Christi, quod adventu Spiritus sancti per ejus divinitatem energiam habet: at chrisma non amittit per consecrationem substantiam unguenti: ergo nec panis Eucharisticus transubstantiatur. Denique panem Eucharistiæ esse corpus Christi, tum Chrysostomus epistol. ad Cæsarium Monachum, tum in sua retractatione sub Nicolao II. facta Berengarius faterentur.

Respondeo ex dictis capite superiori patere ejusmodi locorum intelligentiam. Eucharistia enim post consecrationem dicitur panis & vinum, quia panis & vinum est hujus sacramenti materia; quia panis & vinum sunt terminus à quo hujus conversionis, sicut serpens Moisis virga uade factus est nominatur; quia in Eucharistia

charistia sensibilia panis & vini accidentia permanent, ratione quorum terrenam rem in Eucharistia inveniri dixit S. Irenæus. Corpus Christi in Eucharistia, ut inquit Lanfrancus *lib. sæpè citato*, dicitur panis, vel quia ex pane conficitur, vel quia ratione accidentium panis, cum caro sit, videtur; vel quia sicut panis materialis corpus nutrit, sic panis ille divinus animam alit, vegetat, & saginat. Christus autem *Ioan. 6.* panem vivum semetipsum appellavit, utpote in cibum animarum realiter porrectum. Origenes etiam (si tractatus memorati illius sunt, Origenis enim non esse Bellarminus & alii affirmant,) de accidentibus, quæ corrumpuntur, facile exponi potest. Comparatio autem Cyrilli non in eo posita est, quod mutatio adveniens unguento & adveniens pani sint ejusdem rationis, sed intendit S. Pater quod sicut unguentum post consecrationem sanctitatem acquirit, nec est quid prophanium, ita panis est corpus Christi. Et diligenter advertendum, non dixisse Cyrillum unguentum post consecrationem esse Spiritum sanctum, vel corpus Christi, sicut dixit panem esse corpus Christi. Mens etiam Cyrilli ex ejus à nobis suprà relatis locis expressior est, quàm ut in dubium revocari possit. Falsò porro producit Chrysostomus, cujus nulla ad Cæsarium Monachum extat epistola. Confessionem etiam Berengarij sub Nicolao II. factam suprà à calumniis hæreticorum vindicavimus.

Objiciunt 2. auctoritatem Ambrosii *lib. 4. de sacramentis, cap. 4.* dicentis: *Si tanta vis est in sermone Domini Iesu, ut inciperent esse qua*  
*non*

non erant : quando magis operatorius est , ut sint quæ erant, & in aliud commutentur ? Ergo in Eucharistia cum corpore Christi manent quæ erant, id est substantia panis.

Respondeo in Eucharistia manere quæ erant secundum visibilem sensibilem accidentium speciem , & in aliud commutari intrinsecam panis substantiam , in corpus scilicet Christi , quod non ex nihilo fit , sed ex iis quæ erant , quæ tamen non sunt id quod erant, id est panis & vinum , sed in aliud commutantur. Nam ut eodem libro S. Doctor ait : *Quantis igitur exemplis utimur ut probemus hoc non esse quod natura formavit , sed quod benedictio consecravit ; majoremque vim esse benedictionis quam natura , quia benedictione etiam natura ipsa mutatur.* Observat etiam Lanfrancus in aliis codicibus præfatam Ambrosii sententiam aliis verbis exprimi hoc modo : *Si igitur tanta vis est in sermone Domini Iesu , ut inciperent esse quæ non erant ; quanto magis operatorius est, ut quæ erant in aliud commutentur.* Quæ littera illi sententiæ affinis est quæ libro de initiandis habetur in hæc verba : *Sermo ergo Christi , qui potuit ex nihilo facere quod non erat, non potest ea quæ sunt in id mutare quod non erant ?*

Objiciunt 3. auctoritatem Papæ Gelasii , qui libro de duabus in Christo naturis contra Eutychen & Nestorium edito, sic habet : *Sacramenta quæ sumimus corporis & sanguinis Christi divina res est ; propter quod & per eadem divina effici-mur consortes natura , & tamen esse non desinunt substantia vel natura panis & vini.*

Respondeo constans esse, libellum illum de duabus

Si autem quæras quisnam sit illius operis architectus? Respondebo arbitrari nonnullos compilatorem esse nullius authoritatis, qui & quædam ex Gelasio assuit, & alia ex suo cerebro adjecit. Ipsum etiam operis exordium, quod sic incipit: *Necessarium quoque fuit, ut qui, &c.* evincit tractatum esse collectoris exscribentis aliena verba, non authoris librum veluti proprium fœtum edentis. Melchior autem Cano *lib. 6. de locis, cap. ultimo, ad 9.* librum illum Gelasio Casarensi Scriptori Græco asserit.

Objiciunt 4. authoritatem Theodoretī, qui dialogo 1. sic habet: *Symbola quæ videntur appellatione corporis & sanguinis honoravit, non naturam quidem mutans, sed natura gratiam adjiciens.* Et Dialogo 2. *Neque signa mystica post sanctificationem recedunt à sua natura, manent enim in priori substantia, figura, & forma, & videri & tangi possunt sicut prius.*

Respondeo hujus loci authoritatem multipliciter elevari. Tum quia grandis non est Theodoretī authoritas, ubi de Eucharistia sermo est. Fuit enim vir de Nestorianismo suspectus, cui ne noceret, lubricè de Eucharistia loquebatur, Patribus ut occurreret, qui veritatem Incarnationis ex Eucharistia confirmabant, ut ex S. Cyrillo claret, sicut & Verbi divinitatem ex eodem Eucharistiæ mysterio S. Hilarius adversum Arianos stabilivit. Tum quia Theodoretī mens ex obscuro elici loco nequaquam potest. At Theodoretus materiam Eucharistiæ nedum obiter pertractat, sed obscuritatem quandam affectat. Dialogo enim primo sic Orthodoxus affatur: *Velim te paulò*



*magis mysticè respondere ; adsunt enim fortasse nonnulli , qui non sunt initiati mysteriis. Cui Eranista : Ita audiam , & ita respondebo. Quod & dialogo 2. & 3. inculcatur. Tum quia priori loco intendit tantùm Theodoretus in Eucharistia non mutari naturam seu essentiam accidentium , cùm panis & vinum non sint corporis & sanguinis Domini symbola nisi ratione accidentium. Tum quia in posteriori loco per substantiam non intelligitur substantia panis quæ dat esse simpliciter & substantiale oppositum esse secundum quid & accidentali. In Græco enim Theodoreti legimus *οὐσία* , seu essentiam , quam utique accidentia retinent. Substantiæ etiam nomine Doctores leges, strictæ Philosophiæ prætergredi non curantes rei qualitates , virtutes , & proprietates intelligunt. Sic Hilarius *can. 10. in Matth.* in resurrectione futurum esse ait , *ut caro nostra refundatur in substantiam spiritualis anima.* Tum quia ut Cardinalis Perronius aliique observarunt, Theodoreti verba non sunt accuratè ab interprete à Græco in Latinum translata ; non enim debuit vertere , *manent enim in priori substantia figura , & forma ; sed manent enim in prioris substantiæ forma , & figura* , uti ex Græco demonstrant.*

Dices : In dialogo illo Orthodoxus ex comparatione Eucharistiæ colligit in Christo post unionem nedum superesse formam & figuram, sed ipsam etiam corporis substantiam : ergo ne invalidum sit ipſius argumentum, supponere debet in Eucharistia præter formam & figuram, ipsam quoque permanere panis substantiam.

Respon

Respondeo Orthodoxum non comparare in omnibus Eucharistiam cum Incarnatione, cum manifestum sit duo illa mysteria sicut multis conveniunt, multis quoque differre. Valide tamen ex Eucharistia, suppositis aliis ab adversariis vel concessis, vel certè necessariò concedendis, argumentatur. Ex eo enim quod in Eucharistia remaneant accidentia panis infert Orthodoxus, in Christo vera quoque fuisse accidentia & proprietates humanitatis afficientia Christum Dominum, non secundum naturam divinam: ergo secundum naturam humanam. Quavis enim accidentia possint divinitus sine subiecto existere, tamen quia ex scripturis & communi sententia constabat accidentia humanitatis verè Christum affecisse, qui propterea verè dictus est fœns, comedens, fatigatus, passus, &c. rectè inde inferebant Catholici, quod cum non possent Christum afficere secundum divinitatem, humanitatem prorsus afficiebant. Itaque argumentum adversarii colligentis in Christo non esse humanitatem, sed esse in divinitatem conversam, quia substantia panis in Eucharistia convertitur in substantiam corporis Christi; argumentum, inquam, illud rectè retorquet Orthodoxus dicens: In Eucharistia nedum est corpus Christi, sed etiam vera panis accidentia: ergo similiter, in Christo vera sunt humanitatis accidentia propria. Ex quo, supposito alio principio, inferebat esse quoque in Christo veram humanitatem: quia nimirum accidentia humanitatis verè Christum afficiebant, ut tota Scriptura clamat: ergo aliquam in Christo naturam afficiebant; non divinam, ergo humanam. Ex concessis ergo ab adver-

factio validum ab Eucharistia argumentum deduxit Orthodoxus.

Objiciunt 5. auctoritatem Abbatis Ruperti, qui fatentibus etiam nonnullis insignibus Catholicis impanationem admisit, quatenus voluit panem in Eucharistia non in corpus Christi converti, sed à Verbo Divino assumi, quemadmodum ab eodem humanitas in mysterio Incarnationis assumpta est. Ita enim censuerunt Cardinales pietate magis & doctrinâ quàm purpurâ Eminentissimi Baronius & Bellarminus.

Respondeo multa apud Rupertum legi, quæ impanationi in speciem favere videntur: salvo tamen meliori iudicio, salva præsertim quæ Cardinalibus præfatis reverentia debetur maxima, benignè piissimus ille & doctissimus Abbas exponi, & ad sensum Catholicum reduci facile potest. In primis impanationem docuisse videtur *lib. 2. in Exodum*, ad hæc verba: *Sed comedetis assum tantum igni. Id est*, inquit, totum attribuetis operationi Spiritus Sancti, cujus affectus non est destruere vel corrumpere substantiam quamcunque; sed substantiæ bono permanenti quod erat, invisibiliter adjicere quod non erat: sicuti naturam humanam non destruxit, cum illam operatione sua ex utero Virginis Deus Verbo in unitatem personæ conjunxit: sic substantiam panis & vini secundum exteriorem speciem quinque sensibus subactam non mutat aut destruit, cum eidem Verbo in unitatem corporis ejusdem quod in cruce pependit, & sanguinis ejusdem quem de latere suo fudit, ista conjungit. Et rursum: *Quomodo Verbum à summo demissum caro factum est, & non mutatum in*  
*carnem*

*carnem , semper assumendo carnem : sic panis & vinum utrumque ab imo sublevatum fit corpus Christi & sanguis , non mutatum in carnis saporem , sive in sanguinis horrorem , sed assumendo indivisibiliter utriusque , divina scilicet & humana , quæ in Christo est immortalis , substantia unitatem. Proinde sicut hominem , qui de Virgine sumptus in cruce pependit , rectè & catholicè Deum confitemur , sic veraciter id quod sumimus de sancto Altari Christum diximus , Agnum Dei predicamus. Idem non minùs perspicuè tradit lib. 6. in Ioannem , ubi docet, Verbum jamdudum factum carnem , panem visibilem fieri , non mutatum in panem , sed assumendo , & in unitatem personæ transferendo panem. Additque ratione illius assumptionis panem verè dici corpus Christi. Quod & lib. 2. de officiis , cap. 1. & 9. repetere videtur.*

Nihilominus tamen pro transubstantiatione stetit Rupertum , multipliciter ostendi potest. Tum quia Rupertus locis capite præcedenti, ubi eum à Calvinismo vindicavimus, laudatis, à Berengarii se doctrina abhorrere profitetur: constat verò Berengarium ( nec ignorare poterat Rupertus ) non minùs ob inductam præsentiam figuralem quàm ob investam impanationem ab Ecclesia fuisse solennibus iteratisque judiciis condemnatum. Tum quia locis ibi memoratis, *panem & vinum in veram corporis & sanguinis Domini transire substantiam* luculenter confitetur , quæ ipsissima est transubstantiationis doctrina. Tum quia lib. 2. de officiis , cap. 2. disertè ait : *Panis & vinum in verum corpus & sanguinem Domini transfe-*



246 *Lib. XI. Pars II. Dissert. I. Cap. II.*  
*runtur.* Quibus verbis à Catholicis tradi-  
ta transubstantiatio significantissimè exprimi-  
tur.

Quæ etiam in locis præfatis nonnihil mo-  
lestiæ facere videntur non incommodè exponi  
possunt. Etenim verum est operatione Spiritus  
sancti non destrui vel corrumpi simpliciter  
substantiam panis per omnimodam desitionem  
vel conversionem quæ non sit in melius: tunc  
enim solum substantia destruitur, vel corrup-  
pitur, cum vel ad nihilum prorsus redigitur,  
vel totalis fit usque ad materiam primam, nul-  
lo sensibili permanente resolutio. Et certè ve-  
ram conversionem unius substantiæ in aliam  
divinitus posse contingere non negat, sed eò  
loci exemplo conversionis aquæ in nuptiis  
Cana factæ astruit confirmatque Rupertus.  
Cum etiam permanere substantiam ait, non  
de substantia opposita accidentibus loquitur,  
sed de essentia accidentium, quæ substantia  
quadantenus dicitur, uti supra diximus. Pater  
enim Rupertum non loqui nisi cum modifi-  
catione de substantia, quam ibi substantiam  
*secundum exteriorem speciem quinque sensibus*  
*subactam* appellat, quam & in Joannem *sub-*  
*stantiam visibilem* appellat. Substantia autem  
quam in corpus Christi converti Ecclesia Ca-  
tholica docet; non est visibilis, neque quinque  
subacta sensibus. Manifestè etiam colligi vi-  
detur, negare ipsum accidentia panis non con-  
verti in accidentia corporis Christi, dum ait  
panem & vinum in Christi corporis non con-  
verti saporem, vel sanguinis horrorem. Deni-  
que cum comparat assumptionem panis cum  
assumptione humanitatis, non intendit inter-  
cedere

cedere unionem hypostaticam panem inter & Dei Verbum, sed idem Verbum, quod assumpsit humanitatem substantiam panis in substantiam corporis Christi à se assumpti convertere, ratione cuius conversionis panis appellatur caro, & Verbum panis vivus qui de cœlo descendit. Explicare etiam unum per alia mysteria difficultatum complanandarum gratiâ Patres assolent; dumque unum alteri comparant, non strictam similitudinem intendunt, sed unum miraculum alio illustrare, servatis servandis, cæterisque paribus confirmare satagunt. Et ita Rupertus Eucharistiam, quam Patres Incarnationis extensionem jure dicunt, ejusdem Incarnationis sacramento exponere, & credibilem reddere studuit, salvis tamen utriusque mysterii discriminibus.

## R E F L E X I O.

Totam panis viniq̃ue substantiam in suam Christus convertit, ut cibus noster factus totum hominis cor, totam mentem, totos animi affectus in se transformet. Transubstantiatio elementorum est Eucharistiæ miraculum, transformatio animorum finis & fructus est divinissimæ Eucharistiæ. *Cibus sum grandium*, aiebat Augustino Deus: *nec tu me mutabis in te sicut cibum carnis tue; sed tu mutaberis in me.* Cibos carnales in substantiam nostram convertimus; at divinus Eucharistiæ cibus in se transmutat quos pascit: quia nimirum corporalem cibum nativus calor concoquit, & agendo animalis, cujus instrumentum est, imprimit proprietates. At panis Angelorum

Christus ore quidem realiter sumitur, solo tamen amoris igne digeritur: amor porro amantem in rem amatam transfert: unde si Christus sicut oportet comeditur, in Christum comedens commutatur.

Itaque si scire aves, an dignè cœleste pabulum frequentes, perpende num mentem à Christo semotam, voluntatem averfam, sensus cordis intimos alienatos geras. Cerne utrum te rerum sæcularium ac terrenarum odio fastidioque occupatum, divinarum ac cœlestium studio captum ac velut ebrium senseris. Et cum te videas omnis devotionis sensu & fructibus, quibus solida pietas potissimum dignoscitur, adeo nudum ac vacuum, ut anima tua incultum quoddam ac sterile solum esse videatur, in quo præ nimio terrenorum, quibusmersus es, amore; præ insaniarum falsarum implicatione, nulla charitatis scintilla emicat, nullà quâ irrigeris cœlestis gratiæ stilla pluit.

Ergo ut vera contingat cordis, animique transubstantiatio, expurga vetus fermentum, & munda cordis tui habitaculum; quia corpus quærit puritatis amator. Insisce orationi, ingemisce, pete, quære, pulsa, neque incepto antè desiste, quàm ut à Deo interioris gratiæ radios experiare, & amoris ejus indicia & pignora exprimas, ac velut extorqueas. Frustra animi tui in Christum transformandi beatissimam unionem expectas, si omnes ambitionis ac voluptatum libidines inclus animo immotasque serves, si tui mundique amore ferueas, si arctissimis sæculo vinculis astrictus sis. Solo calore fit cibi transmutatio:  
quid.

quid ergo mirum si in Christum quem realiter sumis non transmuteris, qui nedum torpore & ariditate in Sanctos quandoque cadente afficeris, sed lethali etiam frigore illo laboras, quod à vitæ pravitate, à cupiditatum corruptela, ab ardenti terrenorum studio, à tui ipsius amore immenso, ab incuria & dissolutæ vitæ languore proficiscitur.

Quotquot ad fortunatam illam cordium transformationem aspiramus; audiamus Chrysostomum hom. 83. in Matth. feriò monentem: *Nemo nauseans ad hanc mensam adeat, nemo remissus; sed alacres, accensi, & ferventes omnes accedant. Nam si Iudæi stantes, calceati, ac baculos in manibus habentes cum festinatione paschalem agnum comedebant: quantum magis vigilare nos decet, viridosque & inflammatos ad Sacramentum istud animos afferre?* -

### SPECVLATIO III.

*Inter solvenda argumenta à ratione petita, Catholica transubstantiationis doctrina magis magisque explicatur.*

**E**Xpositis paucis quæ ex Patribus depro-  
munt Lutherani argumentis, elidenda su-  
persunt petita ab humana Philosophia eorum  
sophismata; cum enim se ab autoritate sacra



desertos nudosque sentiant , rationem humanam in fidem hæreticorum more armare moliantur.

Et quidem vulgarem cavillum ab accidentibus , quæ sine connaturali subjecto existere non posse vaniloquiis inanissimis contendunt, desumptum , superius contrivimus. Neque enim convincere unquam poterunt inhærentiam actualem ad essentiam accidentium desiderari ; aptitudinalem & radicalem , Deo præsertim qui omnia portat verbo virtutis suæ miraculosè operante , non sufficere. Ostendant si possint , Creatorem omnipotentem, qui omnia è nihilo condidit, creata non posse sine naturalibus fulcris conservare. Fortè creaturarum adminiculo eget conservator Deus facta ne pereant, qui ipsa adminicula sustentandi vim contulit ? Dei virtutis tessera est è nihilo agere : tunc ergo dignè agit omnipotens , cum è nihilo subjecti facta tenet atque conservat , qui subjecta ipsa è nihilo creavit. Nec propterea accidentia sunt in statu violento , quia cum cuilibet enti insita sit universalis ad obediendum Creatori obedientia , quæ omni est peculiari propensione antiquior & vehementior , nulla fit accidentibus violentia, dum peculiaris inclinatio universaliori Deo supernaturaliter agente & omnia suaviter disponente concedit. Et sanè congruebat accidentia panis desinente per transubstantiationem subjecto permanere ; tum quia non est consuetum hominibus , sed horribile humanam carnem edere , sanguinemque potare : porrigi ergo nobis debuit caro & sanguis Christi sub earum specie rerum , quæ frequentius in usum hominis

hominis veniunt , qualis est panis & vinum. Tum ne si sub specie propria Dominus ederet , impiorum irrisioni exponeretur. Tum ut dum invisibiliter corpus & sanguis Christi sumitur , major exercendi & captivandi intellectum in obsequium fidei occasio præbeatur.

Quod si suam sine subjecto accidentibus existentiam largitur Deus , qui est primum totius esse principium ; liquidò consequitur accidentia Eucharistica in eandem posse operationem omnem prorumpere , quam dum in subjecto inerant elicere nata erant ; operatio namque sequitur esse , & unumquodque in tantum operatur in quantum est actu : unde si accidentia divinitus sine subjecto esse possunt , sine illo etiam operari utique poterunt ; non enim operatio accidentis magis pendet ab operatione substantiæ , quàm esse accidentis ab esse substantiæ. Quod si accidentia possunt sine subjecto existentia in alia subjecta operari , poterunt etiam ab aliis agentibus pati , seu eorum actionis impressum impulsu recipere , subindeque destitui & corrumpi , si actionis agentis contrarii impetum ferre non valeant : cum enim actio & passio sequantur esse , si esse divinitus accidentia sine subjecto possunt , sicut sine illo agere ; ita & ab aliis agentibus sine subjecto pati possunt.

Multa autem huc ex Philosophia asportari possent , sed quia varii variè philosophantur , his tricis implicandam Theologiam minimè necessarium reor. Thomistarum tamen & communior sententia est , solam quantitatem sine subjecto existere , cætera verò in quanti-



tate subjecti vices gerente sustentari. Tum quia videmus accidentia dividi ad divisionem quantitatis; unde ei insunt, cui commensurantur, cujusque sectione interfecantur. Tum quia actionis & reactionis accidentium Eucharisticorum cernimus dari commune subjectum, quod est quantitas ad genus causæ materialis proximè accedens, cum sit prima substantiæ corporeæ proprietas. Sicque omnia in speciebus Eucharisticis & connaturalius fiunt, & commodius explicantur, & innumera sine necessitate miracula non multiplicantur.

Dices: Concursum causæ materialis impræscindibilem involvit imperfectionem partis componentis, & recipientis ab alia perfectionem. Ergo Deus supplere causalitatem materiæ & subjecti accidentium non potest, quia non decet actum purum ab omni imperfectionis labe immensum alienum vel aliud recipere, vel ab alio perfectionem mendicare.

Respondeo Deum non posse causalitatem subjecti per modum subjecti recipientis formam, ab eaque perfectionem emendicantis supplere; ejus tamen concursum efficienter supplere posse quidquid per concursum materiale præstatur. Sicut enim vices formæ informantis, & cum materia totum componentis gerere non potest, tamen quidquid præstat forma eminentiori & nobiliori modo supplere valeat, ut patet in mysterio Incarnationis, in quo divini Verbi substantia humanitati propriam existentiam & substantiam nudam totum confert quod ab illa forma præstaretur; ita quidquid materia sustentando facit, totum id Deus Verbo

Verbo virtutis suæ effectivè portare, & conservare potest.

Instabis : Dum Deus subjecti accidentium vices & officium supplet, vel id per manutentionem duntaxat præstat, vel id per modi per se existentiae communicationem efficit : neutrum dici potest. Non primum, quia nisi conservatio Dei aliquid reale quantitati imprimat, cujus beneficio per se existat, eodem sicut antea modo quantitas se habebit. Secundum etiam dici nequit, quia modus realis per se existendi est substantiæ proprius, nec potest accidenti esse communis; nec minùs repugnat modum per se existendi communicari accidenti, quàm modum existendi in alio substantiæ diffundi, alioquin rerum naturæ confunderetur, & omnia susque deque miscebuntur. Ergo subjecti concursum Deus ne quidem efficienter supplere potest.

Respondeo eatenus quantitatem panis in Eucharistia existere per se, quatenus Deo eam manutendente subjecto non inhaeret, nec illius eget fulcimento. Neque opus est ut quantitati aliquid Deus reale imprimat, ut sine subiecto persistat; sed sat est, ut ejus perenni conservatione faciat Deus ne in nihilum relabatur. Fictitius enim, & impossibilis est modus aliquis positivus existendi per se accidentibus communicatus, quia vel esset substantialis, vel accidentalis. Non substantialis; tum quia nulla remanet in Eucharistia naturalis substantia, sed una remanent accidentia sub quibus corpus Christi latet: tum quia modus quivis rei modificatae naturam & conditionem sapit, ejusque perfectione inferior est; modus autem  
sub



compertum, multa sæpe ex Eucharistia generari. Patet enim ad sensum ex speciebus nimio humore corruptis vel mora diuturniore servatis vermes effluere; easdem combustas in cineres redigi, efficique acetum. Certum est etiam substantias in generationibus illis de novo productis ex incorruptibili Christi corpore non educi, nec etiam ex aëre circumstante, ut quibusdam olim visum est, enasci. Quia uti benè argumentatur *art. 5. S. Thomas*, illud ex quo aliud generatur, prius alteratum & corruptum apparet: nulla autem in aëre circumstante corruptio vel alteratio visa est. Tum quia non est talis natura aëris, ut ex ea corrupta vermes vel cineres generentur. Tum quia ex magna specierum quantitate magna etiam vermium vel cinerum, vel aceti copia generatur: tanta autem terreni corporis abundantia non est ex subtili aëris materia, eaque non addensatâ generari nata. Tum demùm quia ex Eucharisticis speciebus in auro & argento circumstante reclusis similis generatio obvenit, quæ tamen circumstantes materiæ integræ perseverant: ergo quod aër circumstet, non probat novas ex illo formas aggenerari.

Non potest etiam dici formas illas de novoeductas ex redeunte panis substantia gigni, ut quibusdam antiquis à Sancto Thoma memoratis benè visum est. Tum quia cùm substantia panis sit conversa in corpus Christi, deberet iterum corpus Christi converti in substantiam panis, quod inauditum est. Tum quia si rediret substantia panis, vel rediret manentibus accidentibus panis, vel iis omninò corruptis. Non manentibus accidentibus panis,

nis, quia nunquam est substantia panis cum corpore Christi, ne consubstantiatio admittatur. Non corruptis etiam accidentibus panis, quia substantia panis non existit omnibus suis spoliata accidentibus, nec in illam sic nudam agunt causæ creatæ novam introducentes formam. Et quanvis per miraculum aliter possit fieri, cum tamen corruptio & generatio in Eucharistia naturaliter contingat, non est ad modos insolitos sine necessitate recurrendum, debetque salvari, ex speciebus Eucharisticis posse novum compositum naturaliter generari. Quod etiam non salvant Scotus & Valques, qui volunt novas formas ex nihilo creari: non salvat etiam Hispalensis, qui existimat quantitatem à solo Deo in corpus Christi converti. Illi enim veram generationem experiëntiâ, quæ non est sine urgenti necessitate deneganda, minimè salvant, quæ exigat ut forma nova de subiecto educatur, vel saltem ut unio materiæ cum forma producta vi agentium naturalium attingatur.

Dicendum ergo cum S. Thoma, novas formas educi vi agentium naturalium ex quantitate materiæ vices gerente: quod non est intelligendum cum Ferrariensi, ut solâ quantitate subiecti generationis vices supplente compositum substantiale novum ex sola quantitate & forma coalescat. Tum quia in aliis compositis nunquam forma & accidentia sine materia existunt, estque miraculum Eucharistiæ eximium, ut accidentia sine materia subsistant; unde non est dicendum accidentia vermium & aceti, aliorumque corporum quæ ex eis successivè generantur, sine materia semper consisto-

re, & hominem pane Eucharistico diu vefcentem nullam materiam in illa nutritione requirere. Tum quia ex sola quantitate & forma substantiali non potest fieri ens per se & substantiale, nec compositum physicum quod essentialiter materiâ & formâ constat. Sensus ergo D. Thomæ est, quod quia per consecrationem datum est quantitati supplere vices materiæ primæ quantum ad omnia quæ instans generationis antecedunt, ita ut & formas accidentales, & omnes dispositiones ad novam formam præparantes recipere queat; ideo Deus introductâ ultimâ dispositione materiam primam producit in ipso instanti generationis novæ formæ, quæ tamen ex sinu materiæ vi agentium naturalium dicitur educi, quatenus vi ultimæ dispositionis ab agente naturali inducitur materia à Deo producta talem, & non aliam recipit formam. Nec est necesse quod materia ad recipiendas novæ formæ dispositiones tempore præcesserit novæ formæ introductionem, modò in sui vices gerente quantitate antecesserit: cum enim de æquipollentibus idem sit iudicium, satis est ut quantitas vices & officia materiæ supplens toto tempore instans generationis antecedente sub novæ formæ privatione præcesserit.

Porro Deus materiam in huiusmodi generationibus connaturaliter subrogat, utpote qui ad exigentiam causarum naturalium eam subministrat. Statim enim atque dispositiones ad novam formam positæ sunt; exigunt causæ naturales eam formam introduci, ad quam dispositiones per se sunt institutæ: forma verò cum introduci non possit nisi in materiam, nec

mate

materia vi agentium naturalium produci possit; idcirco ad generalem totius orbis provisorum attinet causarum secundarum exigentia se se accommodare, ac convenientem proinde materiam mox educenda formæ, supponere; sicut animam rationalem ad exigentiam organicam materia creat. Quæ materia vel creatione, vel ut probabilius videtur, conversione quantitatis in materiam producit, ut quantitas quæ recepit dispositiones, in ipsam materiam convertatur, quæ sola formam recipere potest. Ea etiam dicendi ratione res modo magis connaturali, qui retenta mysterii & doctrinæ catholicæ veritate admodum æmulandus est, explicatur, salvaturque id quod remanet de substantia panis esse subjectum formæ eductæ, sin immediatum certè mediante materia in quam conversum est. Ex quibus argumentum à nutritione desumptum omnino solutum manet; cum enim nutritio sit partialis generatio, sicut ex speciebus Eucharisticis potest aliquid generari, ita & ex eis pari modo nutriri.

Objicies iterum: Si nihil de substantia panis in Eucharistia remaneret, tota panis substantia ad nihilum redigeretur; quid enim est quippiam annihilari, quam ita in nihilum cedere ut nulla rei pars remaneat; sicut nihil est aliud corruptio quam destructio formæ, remanente subjecto. Atqui tota panis substantia non annihilatur, cum in corpus Christi convertatur, & ab uno esse in aliud transeat, unde nulla datur conversio, si vera contingat substantiæ panis annihilatio. Ergo aliquid in Eucharistia de substantia panis permanet.

Respondeo inter Theologos Catholicos  
conveni



convenire, totam panis substantiam definere, nihilque ejus post consecrationem remanere sive quoad formam, sive quoad materiam. Contendunt tamen Scotus, Ochamus, eorumque discipuli, hujusmodi defitionem annihilationem esse & jure vocari. Negant cum S. Thoma ejus discipuli, alique non pauci, quibus omninò adhærendum est. Etenim ad annihilationem propriè dictam exigitur tum totalis rei secundum omnes & singulas suæ entitatis partes defitio per meram divini concursus suspensi cessationem; tum ut ad illius defitionem nihil reale & positivum ex natura rei sequatur. Ratio est, quia annihilatio opponitur creationi; unde quemadmodum creatio est à nihilo tanquam termino à quo, ad ens tanquam terminum ad quem; ita annihilatio debet esse ab ente tanquam à termino à quo ad purum nihil tanquam terminum ad quem. Si autem vel aliquid rei remanet, vel si ex rei defitione aliquid positivum sequatur, jam res non cedit in merum nihilum, sed in aliquid positivum. Ergo substantia panis non annihilatur in Eucharistia. Et confirmatur ex S. Thoma *quæst. 75. art. 3.* Secundum fidem Catholicam panis verè & substantialiter convertitur in corpus Christi: at substantia quæ prorsus annihilatur non convertitur in aliam; substantia enim quæ convertitur in aliud transit in illud; quod autem in aliud transit, nequaquam in nihilum cedit: igitur substantia panis in Eucharistia non annihilatur. Sanè si vera esset Scoti sententia, ad conficiendam Eucharistiam duæ desiderarentur actiones, una substantiam panis ad nihilum redigens, altera corpus Christi produ-  
ducens

ducens vel adducens ; ex annihilatione enim totali substantiæ panis non magis aut potius sequitur ex natura rei productio corporis Christi, quàm alterius. Ergo in Eucharistia non dabitur una actio convertens panem in corpus Christi ; actio enim conversiva exigit duos terminos positivos , ita ut ex desitione unius alter per se succedat.

Ad difficultatem in contrarium dicendum, annihilari illud cuius ita nihil remanet ut aliud etiam per conversionem non sequatur ; panis autem non fit merum nihil, sed fit corpus Christi. Sicut enim forma non dicitur annihilari, quando ex corruptione illius succedit generatio alterius ; ita tota substantia non dicitur redigi in nihilum , quando ex vi desitionis illius per se producitur altera : actio autem per quam desinit panis , unâ in corpus Christi quod in illius locum sufficitur per se tendit ; ex positione enim corporis Christi per se panis desinit, & ex desitione panis per se corpus Christi succedit. Unde una & eadem actio est quâ desinit panis, & præsens ponitur corpus Christi. Non enim veritati consona videtur opinio Suaris existimantis admittendam esse specialem actionem, quâ separantur accidentia à substantia. Etenim prius naturâ desinit substantia quàm accidentia separantur ; ideo enim à substantia separantur, quia substantia desinit. Maximè verò quia si unâ actione panis substantia separatur ab accidentibus & desinit, aliâ verò ponitur Christi, jam illæ actiones erunt disparatæ, nec subsistet ratio conversionis, ad quam planè requiritur, ut terminus à quo transeat in terminum ad quem ex efficacia ejusdem actionis.

Hanc

Hanc autem totalem panis in corpus Christi conversionem penetrantiùs intelliges, si cum D. Thoma *art. 4. ad 3.* consideres, virtute quidem agentis finiti non posse formam in formam, nec materiam in materiam commutari: at virtute agentis infiniti, cujus actio in totum ens protenditur, optimè potest talis conversio fieri; quia nimirum utrique formæ & utrique materiæ communis est natura entis, & id quod est entitatis in una potest totius entis effectus in id quod est entitatis in altera convertere, eo per quod ab illa distinguitur sublato. Sanè qui è nihilo potuit omnia Creator omnipotens efficere, quidni quodlibet ens in aliud valebit commutare, cum longè major sit inter ens & non ens, quàm inter hoc & illud disparitas atque distantia? Et quanvis in conversionibus formalibus, in quibus una forma in aliam mutatur, eadem remanente materiâ, commune subjectum conversionis desideretur, non tamen in conversionibus totalibus, ad quas sufficit ut ex vi actionis conversivæ destruaturs terminus à quo, & producaturs terminus ad quem, sufficitque ut sub utroque extremo permaneat ratio communis entis.

Quare nostra sententia magis est doctrinæ Ecclesiæ consentanea, quæ tradit in Sacramento Eucharistiæ veram intercedere conversionem seu transubstantiationem; quod sacra Concilia expressè deservivere, atque ex ipsius veritate formæ liquidò colligitur. Ut enim hæc propositio, *Hoc est corpus meum*, sit vera, necesse est ut contentum sub speciebus pronomine *hoc* demonstratum, in fine prolationis verbo



verborum non sit amplius panis, sed corpus Christi evadat; quod planè exigit ut fiat transitus, & mutatio panis desinentis in Corpus Christi. In hoc etiam mysterio quatuor conditiones ad veram conversionem requisitæ omninò reperiuntur. Primò enim est inter terminos positivos, à quorum uno fit transitus ad alium. Secundò terminus, à quo fit conversio, desinit esse. Tertiò aliquid positivum succedit. Quartò inter desitionem unius & positionem alterius non mera concomitantia, sed connexio quædam intercedit.

Dices: Ex vi actionis quâ corpus Christi ponitur in Eucharistia, non necessariò desinit substantia panis; neque enim repugnat quin de potentia Dei absoluta substantia panis unâ cum corpore Christi sub speciebus Eucharisticis contineatur. Ergo inter desitionem panis & successionem positi corporis Christi non est necessaria connexio.

Respondeo, quod quanvis non esset essentialis connexio inter desitionem panis & positionem corporis Christi, quanvis etiam posset corpus Christi aliter quàm per conversionem panis in ipsum in Eucharistia divinitus poni, hoc tamen nihil nostræ assertioni officeret, quæ exigit solùm, ut ex vi ejusdem actionis corpus Christi præsens ponatur, & simul desinat substantia panis, quidquid aliter de extraordinaria Dei potentia contingere possit; tunc enim est vera conversio, quando inter desitionem termini à quo, & positionem termini ad quem connexio quædam connaturalis existit.



An autem de potentia Dei absoluta corpus Christi aliter in Eucharistia possit existere, quàm per conversionem panis in ipsum, variè opinantur Authores. Capreolus enim, Paludanus, & Ferrariensis existimant id esse impossibile, nec posse etiam de potentia absoluta substantiam panis simul cum corpore Christi sub speciebus contineri. Eis etiam maxime favere videtur S. Thomas in 4. dist. 11. quæst. 1. art. 1. quæst. 1. ubi dicit, non posse etiam per miraculum fieri, ut aliquid nunc sit alicubi ubi priùs non fuit, ipso nihil mutato, vel aliquo in ipsum; sicut implicat aliquid esse animal rationale & non esse hominem. Et ad 3. sic habet: *Ad hanc positionem* ( scilicet quod corpus simul cum substantia panis realiter præsens variis in locis sub speciebus existat ) *sequitur gravius inconveniens quàm quod contradictoria sint simul vera; quia ponit definitionem, scilicet aliter esse nunc quàm priùs; & non potest ponere definitum, scilicet motum, neque in corpore Domini, neque in substantia panis.* Id etiam suadet ratio quâ S. Doctor quæst. 72. art. 2. probat corpus Christi non posse simul existere cum substantia panis. Nihil potest esse alicubi ubi priùs non erat, nisi per motum localem, vel per conversionem alterius in ipsum. At corpus Christi non incipit esse in hoc Sacramento per motum localem, alioquin definiret esse in cælo: ergo per solam conversionem panis in ipsum: ergo eâ conversione sublatâ & remanente substantiâ panis non posset sacramentalis Christi in Eucharistia præsentia multiplicari. Nec dicas S. Thomam loqui de potentia ordinaria; de hac enim potentia loquitur

tur S. Doctor, per quam institutum est hoc sacramentum, quæ utique non est ordinaria. Denique si corpus Christi posset esse in Eucharistia sine conversione ulla præsens, vel illam præsentiam ratione substantiæ, vel beneficio quantitatis acquireret. Non primum, quia substantia non est ratio occupandi locum in corporibus. Non secundum, quia alioquin corpus Christi esset ibi circumscriptivè, & simul in cælo, quod in doctrina S. Thomæ repugnat. Adverte autem non esse quæstionem, utrum corpus Christi possit cum substantia panis penetrativè poni; id enim certum est esse possibile: sed tunc desinere esse in cælo corpus Christi oporteret, quia una & eadem quantitas non est sufficiens duo loca occupandi ratio. Sed quæstio procedit de præsentia Sacramentali, utrum nimirum possit Christi corpus sacramentaliter in Eucharistia, & simul connaturali modo in cælo absque ulla panis in ipsum conversione existere.

Veruntamen Cajetanus & Soto id esse possibile affirmant: tum quia quantitas panis manet cum quantitate corporis Christi; quidni ergo ambæ simul substantiæ manere possunt? Non enim videntur minùs impossibiles, minùsve insociabiles duæ quantitates, quàm duæ substantiæ; sed potius magis videntur oppositæ, cum proprius quantitatis effectus sit aliam ab eodem loco expellere. Tum quia cum duo corpora invicem penetrantur, una substantia est alteri intimè præsens & veluti infusa: ergo potest cum substantia panis adesse simul corpus Christi. Tum quia actio quæ ponitur in Eucharistia corpus Christi, est vera productio

productio, ut postea dicemus, ita ut si per impossibile corpus Christi non existeret, per illam actionem revera produceretur: ergo vi & efficacia illius actionis potest poni conservarique corpus Christi in Eucharistia, tametsi ipsa remaneret panis substantia.

Hæc tamen argumenta absque grandi negotio dissolvunt primæ sententiæ assertores, ad primum quidem dicentes non esse paritatem, quia quod ibi non possit esse substantia panis simul cum substantia corporis Christi, non ex impossibilitate substantiarum proficiscitur, sed ex eo quod nequeat corpus Christi alibi existens sacramento interesse nisi per alicujus in ipsum conversionem; quantitas verò corporis Christi potest divinitus cum quantitate panis simul poni cum eaque penetrari, quia cum sit proprietas corporis Christi, illud semper & ubique comitatur. Ad secundum dicunt, substantiam panis posse quidem cum substantia corporis Christi simul divinitus poni, sed tunc corpus Christi in cælo esse desitutum. Ad tertium respondent, actionem illam esse quidem corporis Christi productivam, sed simul necessariò conversivam, habentem consequenter indissolubilem cum desitione substantiæ panis connexionem.

Utramque sententiam conciliare nituntur aliqui Thomistæ recentiores, si nimirum doctrina S. Thomæ intelligatur eo supposito quod de facto contingit, nimirum corpus Christi incipere esse in hoc sacramento absque ulla sui mutatione; & hoc supposito verum est repugnare corpus Christi esse absque ulla sui mutatione in Eucharistia, & ibi non esse

per conversionem panis in ipsum. Sicut enim Deus, quia nunquam mutatur, non potest incipere esse de novo in creatura sine mutatione creaturæ: ita nec corpus Christi in hoc Sacramento absque ulla sui mutatione esse potest, nisi panis ipse per conversionem in corpus Christi mutetur. Cum quibus stat, absolutè posse constitui corpus Christi in hoc sacramento simul cum substantia panis, etiamsi non desinat esse in cælo, modò tamen aliquo alio pacto mutetur. Hæc & alia multa subtilia magis quam necessaria tuo iudicio, Lector, permitto.

Objiciunt demùm Lutherani, transubstantiationis nomen esse in Ecclesia novum & peregrinum, in Scripturis non legi, non fuisse ab Apostolis vel Sanctis Patribus usurpatum, sed à Concilio Lateranensi post mille ducentos annos in Ecclesiam fuisse inductum: ergo & ipsa res per nomen illud significata nova est, ac proinde Catholicis dogmatis minimè annumeranda.

Respondeo eodem prorsus modo Arianos consubstantialitatis nomen olim calumniatos fuisse, quo nunc Lutherani transubstantiationis vocabulum infamant. Unde sicut tunc Ecclesia ore Athanasii, aliorumque Patrum respondit, rem antiquam novum accepisse nomen, non vocabulo novo novæ rei virtutem accessisse, quia Ecclesiasticæ semper moris fuit disciplinæ, si quando hæreticorum nova doctrina insurrexerit, contra insolentem temerariarum quæstionum novitatem rebus immutabiliter permanentibus nominum mutare vocabula, atque significantius rerum naturas exprimere: ita illud idem in præsentī  
pro



pro transubstantiationis nomine reponimus. Id præclare exponit alibi laudatus Vincentius Lirinensis. Crescat, inquit, oportet, & multum vehementer proficiat tam unius quam totius Ecclesiæ ætatum ac sæculorum gradibus intelligentia, scientia, sapientia; sed in suo duntaxat genere, in eodem scilicet dogmate, eodem sensu, eademque sententiâ. Ut annis scilicet Christianæ Religionis dogma consolidetur, dilatetur tempore, sublimetur ætate; incorruptum tamen illibatumque permaneat, & universis partium suarum mensuris, cunctisque quasi membris ac sensibus propriis plenum atque perfectum sit: quod nihil præterea permutationis admittat, nulla proprietatis dispendia, nullam sustineat definitionis varietatem. Ut cum aliquid ex illis seminum primordiis accessu temporis evolvatur, & nunc lateatur & excolatur; nihil tamen de germinis proprietate mutetur. Addatur licet forma, species, distinctio; eadem tamen cujusque generis natura permaneat. Quodcumque igitur in hac Ecclesia Dei agricultura fide Patrum satum est, hoc idem filiorum industriâ decet excolatur & observetur, hoc idem floreat & maturescat, hoc idem proficiat & perficiatur. Fas est etenim ut prisca illa cœlestis Philosophiæ dogmata processu temporis excurentur, limentur, poliantur; sed nefas est ut commutentur, nefas est ut detruncantur, ut mutilentur. Accipiant licet evidentiam, lucem, distinctionem; sed necesse est retineant plenitudinem, integritatem, proprietatem.

Sanè sicut in ipso Christianæ Religionis exordio omnes in Christum Dominum credentes

discipuli primùm vocati , Christiani postmodum dicti sunt , ut veri à falsis discipulis discernerentur ; impletumque est illud Isaiaë vaticinium , *Servientibus enim mihi vocabitur nomen novum* : ita Ecclesia juxta illam ab Apostolis traditam nominibus utendi formam novas hæreseon pestes novis nominibus refellere consuevit. Sic Patrem ingenitum appellavit, Sabellium ut confunderet , qui eum è Virgine natum blasphemabat. Sic Filium *ὁμοῦσιον* , seu consubstantialem adversus Arii impietatem nominavit. Sic nomen hypostasis , nomen Incarnationis , nomen ipsum Trinitatis in sacris licèt litteris non usurpatum adhibuit. Quidni ergo ad veritatem Eucharistiæ à Christo traditam , ab Apostolis prædicatam , à Patribus ad nos perenni traditione derivatam exprimendam , & contra profanas hæreticorum novitates tutandam transubstantiationis nomine jure merito utetur ? Falsum est etiam nomen illud à Lateranensi Concilio esse invectum ; nam & illius meminit Petrus Blesensis *epist.* 140. & res per illud significata aliis æquipollentibus vocabulis à Patribus luculentissimè tradita est. Quod si nomen illud transubstantiationis barbarum & inelegans esse hæretici contendant, eorum fastidium delicatissimum facilè spernunt Catholici , qui in rebus theologicis Theologos quàm Grammaticos agere malunt. Si enim sua cuique opificio artificiosa factitiaque vocabula concedimus , nec cùm de re illius sermo est , propriis ejus nominibus uti sordidum , sed scitum splendidumque censemus ; cur quod infinis artibus datur , maximæ omnium , & ab humana non solum ratione , sed etiam cogitatione

tatione elatissimæ Theologorum disciplinæ negabimus? Cur conditas ab eis ad rerum divinisissimarum adumbrationem dictiones degeneri molliæ & morosa teneritudine fugiamus? Sed hæretici nostri malunt cum Grammaticis ornatè quàm verè dicere: at Catholicis Grammaticorum iudicio squallescere melius est, quia pulchrior est veritas non solum Helenæ Græcorum, sed etiam elegantia & nitore hæreticorum.

*Quæres, quenam actio sit transubstantiatio Eucharistica?*

Respondeo in primis certum esse, transubstantiationem Eucharisticam esse actionem propriè dictam. Id enim modus loquendi Patrum apertè declarat; utuntur enim nomine transelementationis, mutationis conversivæ, transitus unius substantiæ in aliam, & conversionis: quæ omnes voces actionem significant, quâ una substantia in aliam convertitur.

Porro illa actio secundum probabiliorem sententiam talis est, ut per eam corpus Christi verè producat, non absolutè & simpliciter, sed tali modo, nimirum ex substantia panis in ipsum Christi corpus conversa. Id enim dilucidè significat modus loquendi Patrum verbis productionem significantibus utentium. Cyprianus namque, seu author sermonis de cœna Domini, ait corpus Christi in Eucharistia creari. Notum est etiam illud Hieronymi epist. ad Heliodorum: *Honorifica Sacerdotes,*

*qui Christi corpus sacro ore conficiunt.* Damascenus quoque lib. 4. de fide , cap. 14. *Panem* , inquit , & *vinum corpus suum fecit.* Quod Ambrosius non minus perspicue locis supra memoratis tradidit.

Patres sequutus est S. Thomas , qui *art. 8.* docet hanc conversionem in hoc cum creatione & naturali transmutatione convenire , quia verè & propriè dicere possumus , quod ex non ente fit ens , & ex pane corpus Christi. Quod evidenti argumento est , corpus Christi ut factum & reproductum esse hujus conversionis terminum. Nec placet expositio Marci Serræ aientis corpus Christi eo modo fieri , quo Deus dicitur factum esse refugium nostrum sine ulla sui mutatione , vel productione. Illud enim subterfugium textui S. Doctoris apertè adversatur. Affirmat enim S. Thomas corpus Christi eo modo verè & propriè fieri , quo ex non ente ens , & ex aëre ignis fit ; quæ utique per veram productionem & mutationem fiunt. Juxta etiam tradita à S. Thoma principia repugnat corpus Christi esse terminum conversionis , & non per veram mutationem produci : ideo enim S. Doctor supra *quæst. 2. art. 1.* ait essentiam divinam non posse converti in aliud , nec aliud in ipsam , quia est incorruptibilis & ingenerabilis : ergo sentit terminum veræ conversionis produci & mutari oportere ; nam per ingenerabile , ut notat ibi Cajetanus , intelligit improducibile , cum ceteroquin possit fieri transubstantiatio in aliquid ingenerabile & incorruptibile ; quale est corpus Christi gloriosum. Nec valet aliud ejusdem Serræ effugium dicentis id esse verum de conversione quæ non fit



fit per totalem transmutationem, sed per solam formæ corruptionem, qualis ea est, quæ elementa convertuntur in mixta, nec esse necesse terminum totalis conversionis debere mutari. Si enim hæc responsio veritate constaret, posset aliquid in divinam substantiam totali & transubstantiativa conversione transire, cum hæc nullam in termino conversionis inferat mutationem: quod nedum inauditum, sed ab ullo Theologo inexcogitatum est.

Ratio verò est, quia implicat esse conversionem substantialem, & non esse productionem termini illius conversionis. Etenim conversionis substantialis terminus est etiam substantialis, qui per influxum alicujus principii communicatur. At communicatio substantialis est vera productio, ut patet in emanationibus divinis, quæ dicuntur productiones hoc ipso, quod essentia divina quæ est in Patre, aliis suppositis divinis intellectione & amore communicatur. Similiter communicatio esse divini facta humanitati assumptæ dicitur productio Dei hominis, & per eam Verbum Dei caro factum est. Ergo pariter communicatio esse substantialis corporis Christi est vera productio, licet idem esse substantiale sub nova ratione formali communicetur. Et certè nulla est actio conversiva unius rei in aliam sine actione productiva vel reproductiva ejus in quod fit conversio, ut cum uxor Loth conversa est in statuam salis, virga Aaron in serpentem, & aqua in vinum in nuptiis Cana. Nec est necesse ut aliquid de novo producat; reproductio enim rei abstrahit ab eo quod res existat, vel

salem sufficit ut ad rem alio modo existentem terminetur.

Confirmatur : Impossibile est aliquid ibi esse substantialiter , ubi antea non erat , nisi per veram aliquam actionem producat , vel certe aliunde adducatur. Atqui corpus Christi non solum adducitur in Eucharistiam , producta duntaxat novâ præsentia , vel unione ipsius cum speciebus Eucharisticis , uti Scotus, Vasques , Bellarminus & alii opinantur ; quia conversio quæ in Eucharistia fit est substantialis ; actio autem merè adductiva non est conversio substantialis , seu transsubstantiativa , sed præsentia accidentalis productio. Imò nec conversio dici potest ; ad conversionem enim requiritur impossibilitas termini à quo , cum ex vi actionis illius unus , terminus in alium transeat. Terminus autem , quem producit actio merè adductiva , est modus aliquis præsentia & ubicationis , similis illi quo Angelus præsens in loco constituitur : modus autem ille ubicationis non est impossibilis cum termino à quo , scilicet pane , cum quo potest absolutè corpus Christi penetrari ; sicut nec Angelus dum spatio corporeo sit præsens , non continuò substantiam corpoream expellit. At verò conversio , & maxime substantialis , exigit ut terminus à quo desinat , atque in terminum *ad quem* transeat & transmutetur. Unde in sententia adversariorum hæc actio non transsubstantiatio , sed transpositio vel translocatio dici deberet. Neque enim ad transsubstantiationem satis est , quod una substantia alteri succedat ; potest enim esse substantiarum successio sine transsubstantiatione , ut cum mortuo homine

homine alter in ejus locum sufficitur, & corruptis speciebus succedunt vermes, in quos tamen nemo dixerit corpus Christi converti.

Ex quibus etiam facile refelles opinionem Gabrielis & Suaris existimantium transubstantiationem esse actionem duntaxat conservativam corporis Christi sub speciebus Eucharisticis; quæ quidem actio corpus Christi produceret, nisi de facto illud productum inveniret. Verum id non satisfacit; mera enim conservatio nulli loco rem conservatam affigit, sed ab omni loco abstrahit, cum eadem maneat creatio & conservatio, tametsi præsentia quotidie mutetur. Non inmoror in confutando quorundam recentiorum placito, qui posuerunt actionem conservativam nec esse adductivam, ut vult Scotus, sed neque productivam; terminari tamen ad corpus Christi secundum esse substantiale, non quomodocumque, sed ut in illud conversus est panis, & ut contentum sub speciebus ejus. Etenim modus ille dicendi implicat in terminis; repugnat enim corpus Christi esse in Eucharistia præsens, & tamen nec adduci, neque produci corpus illud. Denique omnes falsas sententias refelles; si præ oculis semper habeas, hanc actionem esse transubstantiativam, cujus terminus est substantia, cujus efficaciam substantia una definit in aliam in quam convertitur, quæ proinde nec ad solum ubi, neque ad aliud quippiam accidentale duntaxat tendit.

Sed dices: Ex D. Thoma in 4. dist. 11. q. 1. art. 3. quæst. 1. hæc interest differentia inter conversiones naturales & miraculosam, quæ fit in

Eucharistia, quod in naturalibus transmutatur & id quod convertitur, & id in quod convertitur: sed in hac conversione illud in quod fit conversio erat præexistens; unde hoc in quod fit conversio nullo modo transmutatur, scilicet corpus Christi, sed solus mutatur panis qui convertitur. Ex quo loco sic instauratur ratio: Conversio Eucharistica non terminatur in id quod non erat, sicut conversio aquæ in vinum in nuptiis Cana, & conversio uxoris Loth in statuam salis; sed potius hæc conversio definit in corpus Christi præexistens. Atqui quod per actionem aliquam producit, nunquam actioni præexistit: ergo per huiusmodi conversionem non producit corpus Christi. Etenim quod producit, de non esse ad esse mutatur: corpus autem Christi hoc ipso quod est præexistens, de non esse ad esse mutari non potest.

Respondeo quod cum D. Thomas eò loci docet corpus Christi per transubstantiationem non mutari, loquitur de mutatione destructiva vel corruptiva, non verò de mutatione perfectiva, quâ res semel producta alio modo se habet, unde hæc mutatio modalis dici potest. Ita enim intelligendum esse S. Doctorem patet ex locis pro nostra assertionem productis. Ad rationem subjunctam dico, id quod præsupponitur existens non posse actione primitivâ ad rem simpliciter efficiendam ordinatâ produci, benè tamen actione secundariâ ad rem sub novo modo constituendam ordinatâ: quâ distinctione sponte corruunt quæcumque in ejus rationis confirmationem addita sunt, quia



quia de primaria & primitiva productione procedunt.

Instabis: Ex nostra doctrina plura sequuntur inconvenientia. Si enim corpus Christi in transubstantiatione produceretur, sequeretur corpus ex pane productum non esse corpus ex Virgine natum, sicut vinum in nuptiis Cana ex aqua factum non fuit vinum ex vite: & tamen Patres & antiqui Theologi docent in Eucharistia non fieri novum corpus & novam humanitatem, sed panem in aliquid præexistens converti. 2. Sequeretur idem Christi corpus esse prius & posterius seipso. Prius quidem; nam corpus Christi est potissimum instrumentum miraculosæ istius conversionis & transubstantiationis, sicut aliorum miraculorum; causa autem efficiens suo est effectu prior. Posterius verò, utpote à semetipso effectivè proficiscens. 3. Sequeretur transubstantiationem esse conversionem accidentalem, utpote ad novum dumtaxat modum terminatam, quo Christus ponitur in Eucharistia; neque enim aliquid substantiale habet Christus in Altari, quod non habeat in cœlo: talis autem est mutatio qualis est terminus; unde cum terminus hujus conversionis non sit nisi novus præsentiae modus, qui utique accidentalis est, consequitur conversionem istam esse accidentalem. 4. Sequeretur eundem effectum à duabus actionibus totalibus procedere; corpus namque Christi in cœlo existens per unam actionem totalem productum est, & in sacramento per aliam actionem totalem producitur, & rursus in diversis altaribus per plures distinctas actiones idem corpus producitur. Ex quo

ulteriùs sequeretur plura accidentia solo numero distincta, plures nimirum actiones productivas in eodem subjecto, nimirum corpore Christi recipi: quæ omnia veræ Philosophiæ adversantur. Denique sequeretur corpus Christi, quoties desineret sub speciebus Eucharisticis, toties substantialiter annihilatum iri; talis enim est desitio, qualis est productio, cum eundem terminum diverso licet & contrario modo respiciant: ergo si productio sit substantialis, ita etiam desitio substantialis erit, cum id totum desinat quod fuit per actionem productum. Vel dicendum, quod sicut una duntaxat præsentia & ubi sacramentale definit, ita solus præsentia modus per illam actionem productus fuit.

Respondeo, nullum ex nostra sententia sequi inconveniens. Non primum quidem; nam corpus ex Virgine natum idem in Eucharistia adoramus. Nec est simile de vino ex aqua producto, quod vinum de vite nequaquam dici potest, quia in prima sui productione ex aqua fuit sine vite formatum. At idem Christi Domini corpus, quod primâ fuit productione ex Virgine natum, per secundam actionem reproducitur; unde illud idem est, quod è virginali Mariæ sinu prodiit. Unde Patres dicunt Eucharistiam esse extensionem Incarnationis: & nota est illa sententia à Sanctis tradita, & in precationibus Ecclesiasticis frequentata: *O magna Sacerdotum dignitas, in quorum manibus velut in utero Virginis Christus quotidie incarnatur.* Et hoc est quod intendunt Patres & Theologi, docentes in Eucharistia non novum Christi corpus, nec  
novam



novam humanitatem produci ; sed non negant idem Christi corpus reproduci.

Ad secundum dicendum, idem per primariam actionem terminatam ad esse simpliciter posse esse prius seipso reproducto per actionem secundariam terminatam ad esse sacramentale quod habet corpus Christi in Eucharistia : unde idem non est prius & posterius seipso per eandem actionem & secundum idem.

Ad tertium dico, non esse necesse ad hoc ut conversio sit substantialis, vel terminetur ad substantiam, quod producatur aliquid substantiale quod antea non erat, sed sat est ut substantia eadem novo modo producatur. Unde terminus formalis actionis transubstantiativæ non est novus modus, sed substantia novo modo ; non enim à Veritate dictum est, *Hic est corpus meum* ; sed, *Hoc est corpus meum*.

Ad quartum respondeo duas actiones totales in eundem effectum sub diversa ratione formali productum ferri posse ; corpus autem Christi in cælo existens non fuit per actionem conversivam, sicut in Eucharistia contingit, productum. Porro diversæ actiones Sacerdotum, quibus Christi corpus variis in altaribus consecratur, sunt duntaxat instrumentales, à quibus per se non pendet effectus, sed ab agente solum præcipuo varia instrumenta ad libitum applicante, ut supra dum de pluribus eundem baptizantibus dictum fuit.

Ad id quod additur, plura accidentia non posse in eodem recipi subiecto individuo, nec consequenter plures actiones productivas, sive præcipuas, sive instrumentarias in eodem Chri-

sti corpore subjectari ; dicendum plura accidentia solo numero distincta non posse recipi in eodem subjecto eodem modo posito , & in eodem loco constituto ; bene tamen in eodem subjecto diversis sub speciebus distinctisque altaribus constituto , quia tunc licet sit idem subjectum , hoc ipso tamen quod est sub diversis speciebus distinctisque locis præsens , veluti distinctis subjectis æquivalet. Accidentia namque à subjecto eodem modo scripto & in iisdem circumstantiis constituto individuuantur.

Ad ultimum dico corpus Christi corruptis Eucharisticis speciebus nequaquam annihilari, quia annihilatio supponit rem absolutè in nihilum cedere ; unde tunc solum talis est definitio , qualis est rei productio , quando res per se definit & ratione sui , non verò quando simpliciter manens definit solum ratione alterius, ut corpus Christi in Eucharistia non nisi ratione specierum definit ; vel quando est definitio esse simpliciter primò producti , non verò quando est definitio rei novo modo reproductæ.

### *Corollaria derivata.*

Ex dictis sequitur 1. proprium & formalem Eucharisticæ transubstantiationis terminum esse Christi Domini corpus & sanguinem ut reproducta per conversionem totius substantiæ panis , & contenta sub accidentibus panis & vini modo invisibili. Patet id ex modò dictis, cum transubstantiatio sit actio conversiva corpus  
Christi



Christi ex pane produciens, transmutans, & transelementans.

Sequitur 2. Eucharisticam transubstantiationem fieri in instanti, ut docet S. Thomas *quæst. 75. art. 7.* Aliqua enim mutatio tripliciter potest esse instantanea. Primò ex parte formæ quæ non suscipit magis & minus: secundò ex parte subjecti, quod ad receptionem formæ successivè non præparatur: tertio ex parte agentis non indigentis temporis morâ suos ut effectus producat. Atqui his tribus modis transubstantiatio Eucharistica est instantanea; nam & substantia corporis Christi, ad quam terminatur ista conversio, non suscipit magis & minus; & in hac conversione totali nullum est subjectum quod debeat successivis dispositionibus præparari; & transubstantiatio ab agente infinitæ virtutis Deo ab omni tempore independentè proficiscitur. Ergo in Eucharistia & panis substantia in instanti desinit, & corpus Christi in instanti advenit, ac pròinde in instanti in quo est primum non esse substantiæ panis est primum esse corporis Christi.

Sequitur 3. ad corruptionem specierum desinere corpus & sanguinem Domini esse sub illis speciebus. Quia ut optime ait S. Thomas *quæst. 75. art. 4.* cum corpus & sanguis Christi succedant in hoc sacramento substantiæ panis & vini, eodem modo desinit ibi esse corpus Christi; quo panis substantia desiisset; unde si fiat talis immutatio ex parte accidentium, quæ non fuisset sufficiens ad corruptionem panis & vini, propter

propter hujusmodi immutationem non desinunt corpus & sanguis Christi esse sub hoc Sacramento; sive fiat immutatio ex parte qualitatis, putà cùm color aut sapor nonnihil immutatur, vel intenditur aut remittitur calor aut frigus; sive ex parte quantitatis, ut cùm dividitur panis & vinum in tales partes, in quibus posset substantia conservari. Si verò tanta fiat immutatio, ut ex ea panis vinique substantia corrumpi nata esset, tunc corpus & sanguis Christi sub hoc sacramento amplius non remanet, sive corruptio specierum ex conflictu qualitatum species destruentium, sive ex imminutione & contritione partium sub quibus non posset forma panis permanere, proficiscatur. Quæ specierum corruptio, ut *ad tertium* S. Doctor monet, naturalis censenda est, non miraculosa, tametsi miraculum præsupponat, quo species illæ per consecrationem esse sine subiecto retinent suum: sicut cæcus miraculo illuminatus, & naturaliter videt, & naturaliter vi morbi vel alio casu exculatur.

## R E F L E X I O.

Cum stupendam specularis elementorum Eucharisticorum in Christum transubstantiationem, ad beatam illam cordium cùm Christo conjunctionem animum attolle, quâ novæ creaturæ à seipsis liquefcentes, illi amore copulantur, cujus reali præsentia dignantur. Justum est, æquum planè, Domine Jesu, ut tibi cor nostrum intimè adhærescat, cujus amore  
rerum

rerum naturas mirabili potestate immutas. Tibi ergo dicat cor nostrum : *Mihi vivere Christus est.* Id est , quia mihi permisceris , ut in te me totum divino cibo transformes , jam non veterem hominem , sed te novum Christe vivo. Tu mihi spiritus , tu mihi lumen & vita es. Procul à me omnis affectio humana ; procul voluptas , dolor , ira , invidia , vindicta , & injuriarum tenax memoria ; procul honoris ac gloriæ divitiarumque libido ; procul quidquam eorum , quæ animum quadam erga se affectione polluant : solus ille in corde vivat , qui nihil est horum Christus. Si missum ferrum in ignem totum profectò ignis efficitur , quidni Christo cibo pastus totus convertar in Christum ? Quidni ad me veniens omnes in se transferat & captivet affectus ? Quidni *ad alia omnia* , ut Bernardus *serm. 7. Quadrag.* ait , *mortuus sum , non attendam , non curem ; si qua verò sunt Christi , hæc vivum inveniant & paratum ?* Postquam animatum Christi cælum sacrâ communionem factus sum , quid mihi est in cœlo , & à te quid volui super terram , Deus cordis mei & pars mea Deus in æternum ? Ita planè supervacua quæque ex animo tollam , liberum ut in me Christus habeat hospitium. Latum spatium res tam magna desiderat. Expellenda omnia sunt , ut totum illi pectus vacet , quod Christi in se majestatem dignum invenitur suscipere , & suscipiens capere. Tanto hospiti locum faciant terreni affectus. Nullam in cordis penetrabile , quod totum unus Jesus occupare debet , alienam sæculi curam ingredi sinam. Membra mea templum Dei vivi facta sunt ; cor ergo meum velut rem sacram


custo

custodiam, ne inquinatam sedem offensus hospes derelinquat. Ibi hostiam vivam, holocausta ratione prædita, sacrificia charitatis jugiter offeram; quia ut rectè monet Hilarius can. 33. in Matth. *Nihil est quod præter eum oporteat in peccata nostra penetrare.*

Verùm proh dolor! Quis hæc sentit, quis hujus ævi Christianorum cordis in Christum sui transformationem experitur? Videmus omnes quæ sua sunt quærere, non quæ Jesu Christi. Videmus illos, ipsos qui flagitiorum suorum sordes paulò antè in Confessione evomuerunt, eorundem vivam ac veluti spirantem imaginem in animis infixam, radicem in cordibus penitissimè impressam gerere ut primum cum occasio inciderit de integro pullulaturam. Illine in Christum convertuntur, quidituranâ atque inolitâ vitiorum labe in eum languorem debilitatemque venerunt, ut ne ad octo quidem dies ab iisdem peccatis temperare valeant, nullam in sanctis propositis firmitatem assequuti? Itane in illis formatur Christus qui ulceribus scatentes manant etiamnum sanie ac tabo peccatorum, quæ nullis poenitentiae subsidiis expurgare atque detergere satagunt? Panis ille divinus nobis permixtus fatiscens fulcit, confirmatos tueretur, gratiam dilabi ac diffuere vetat, quotidiana illius à concupiscentia importata detrimenta sarcit, & languentes reficit. Ergo illi panem illum non digerunt, in quibus non splendent Christi mores, in quibus omnis animi temperatio prævis affectionibus dissoluta est, quid denique peccatorum pondere depressi ad Deum sese erigere non possunt. Unde hoc? Timeo *ne infirmum*



*firmum validior cibis opprimat, ut Ambrosius lib. 6. in cap. 9. Luca, observat: quia ut ibidem ait: Nemo cibum accipit Christi (utique fructuosè) nisi fuerit antè sanatus. Transubstantiationem ergo Eucharistiæ non imitantur, quorum corda lapidea in carnea non mutantur.*



## DISSERTATIO II.

*De existentia & essentia sacramenti  
Eucharistia, necnon materia  
& forma illius.*



**S**TABILITA Eucharistiæ veritate, seu reali corporis & sanguinis Christi præsentia per veram substantiæ panis & vini in corpus & sanguinem Domini conversionem & transubstantiationem, superest ut de sacramento ipso agamus, ejusque existentiam & essentiam exponamus, unde & consequenter de materia ejus & forma differemus.

## CAPVT I.

*De existentia & essentia sacramenti Eucharistiæ, ubi de necessitate, unitate, & institutione illius.*

Certum est, dari in Ecclesia Catholica Eucharistiæ sacramentum, quod sit unum ex septem illis quæ Orthodoxi omnes semper receperunt, & religiosè venerati sunt. Nullum enim est de cujus institutione clariùs loquantur Scripturæ, & unanimis quatuor Evangelistarum consensus. Aliunde verò in hoc Sacramento signa visibilia apparent; gratia etiam in eo sicut in fonte hauritur. Ergo ad veritatem & existentiam sacramenti nihil in Eucharistia desideratur, sed omnia certatim concurrunt.

Existentiam etiam hujus sacramenti utilitas ejus necessitasque demonstrant. Etenim provisor noster Deus non minùs in ordine gratiæ quàm naturæ & utilia suppeditat, & necessaria nunquam negat, ut vitæ spiritali peræquè ac corporali consulat. Ergo sicut vitam corporalem tradit per parentum generationem, vitæ illius perfectionem per augmentum efficit, ejusdemque conservationem alimentorum copiâ & delitiis impertitur: ita ad vitam spiritalem nos generat per Baptismum, roborat & perficit

perficit in Confirmatione , fovet & pascit in Eucharistia. Igitur utile est & necessarium hoc Sacramentum , & ut S. Thomas *opusc.* 37. ait, *Nullum Sacramentum est isto salubrius , quo purgantur peccata , virtutes augentur , & mens omnium spiritualium charismatum abundantia impinguatur.* Sed de his plura dum de effectibus Eucharistiæ. Ejus autem existentiam magis institutio, ejusque percipiendi necessitas confirmabit ; illud namque in Ecclesia existat oportet , quod à Christo institutum est , quodve ab omnibus indispensabiliter usurpandum est.

## SPECVLATIO I.

*Eucharistia Sacramentum à Christo Domino institutum est lunâ decimaquartâ primi mensis , illud subinde in azymo conficiens ; quod Sacramentum omnibus est necessarium necessitate medii , sine re , certè voto suscepti.*

**A**Ntequam prima hujus speculationis pars suadeatur , sciendum est Hebræos alio modo dies festos , alio modo dies naturales numerasse ; nam dies festos ab occasu solis ad alium occasum ducebant , ita ut noctem sequentem



quentem & diem crastinum, usque ad noctem exclusivè complecterentur, juxta illud Levitici 17. *A vespera usque ad vesperam celebrabitis sabbatha.* Per sabbatha autem quælibet festa, maximè verò solenniora intelliguntur; nam ibidem festum expiationis, *sabbatum requietionis* appellatur. Quo more in Ecclesia Christiana festa quoad officium divinum à prima vespera incipiunt, & in secundam vesperam desinunt. Dies verò naturales, seu usuales inverso ordine disponebant; illos enim ab ortu solis ducebant, & ad alium usque solis ortum protendebant, vel secundùm alios à media nocte in mediam noctem.

Sciendum rursus, apud Judæos solenne fuisse menses omnes à novilunio exordiri, & idem fuisse apud illos diem primum & lunam primam. Porro primus anni mensis Judæis erat ille, quem nos Martium nominamus, quemve illi *Abib*, vel *Nizan* appellant.

Sciendum tandem juxta legem Mosaicam, quæ habetur *Exodi 12.* lunâ decimaquartâ primi mensis, id est decimoquarto à novilunio mensis Martii post Solis occasum dies azymorum incipere, septemque durare diebus consuevisse, id est ad vigesimum primum inclusivè. Qui omnes dies paschales erant, vocabanturque dies azymorum, quia in illis pane fermentato uti minimè licebat. Cæterum inter omnes illos dies solus primus dies, id est decimusquintus, & ultimus qui erat vigesimus primus solennes erant & festivi. Dicebantur autem dies illi Paschales, quia Pascha transitum significat; illi autem dies erant instituti in memoriam beneficii, quo Angelus vastator primogeni



mogenitos Ægypti interimens, Judæos salvos reliquerat, qui ab Ægyptiis expulsi ita festinanter discesserunt, ut panes per temporis angustias fermentare non valentes, præproperè panes azymos concoquere coacti sint. Illorum porò dierum institutio habetur *Exodi* 12. his verbis: *Mensis ipse vobis principium mensium primus erit in mensibus anni. Decima die mensis hujus tollat unusquisque agnum per familias & domos suas, & servabit eum usque ad quartam-decimam diem mensis hujus, immolabitque eum universa multitudo filiorum Israël ad vespèram, & edent carnes nocte illa assas igni, & azymos panes, & comedetis festinanter. Habebitis autem hunc diem in monumentum, & celebrabitis eum solennem Domino. Septem diebus azyma comedetis, in die primo non erit fermentatum in domibus vestris: dies prima erit sancta & solennis, & dies septima eadem festivitate venerabilis.* His animadversis.

Probatur nostra, & communis Latinorum adversum Græcos sententia ex tribus Evangelistis, Matthæo, Marco, & Luca. Primus enim *cap. 16.* sic ait: *Prima die azymorum accesserunt discipuli ad Iesum dicentes: Ubi vis paramus tibi pascha?* Et postea: *Et paraverunt pascha. Vespere autem facto discumbebat cum discipulis suis.* Idem repetit Marcus *cap. 14.* *Prima die azymorum quando pascha immolabant, dicunt ei discipuli, quò vis eamus, & paramus tibi ut manduces pascha?* Quibus cum Dominus respondisset, & quid opus esset facto docuisset, discipuli paraverunt pascha. *Vespere autem facto venit Iesus cum duodecim, pascha celebraturus, ut ibi diffusius narratur.* Et similiter

liter Lucas cap. 22. *Venit autem, inquit, dies azymorum, in quo necesse erat occidi Pascha; & misit Petrum & Joannem: & cum facta esset hora discubuit, & duodecim cum illo.* Ex quibus evidens elicitur argumentum: Prima dies azymorum erat decimaquarta mensis primi, in qua fermentato uti non licebat, ut patet ex lege duodecimo Exodi capite indicta. Atqui ex præfatis Evangelii testimoniis constat, Christum prima azymorum die comedisse Pascha cum discipulis suis, subindeque illo duntaxat in instituta tunc Eucharistia usum fuisse pane, quo tunc ex præscripto legis uti licebat; non enim Christus venerat solvere legem, sed adimplere. Ergo Christus lunâ decimaquartâ primi mensis, in qua fermentato velci pane vetitum erat, Eucharistiam in azymo consecravat. Et certè si diem à lege præscriptum in comedendo agno paschali prævenisset, ut quidam Græci dicunt, justam accusandi, mortique tradendi Christi causam Judæi invenissent. Cum enim de observantia azymorum lex dicat: *Quicumque fermentatum comederit, peribit anima illa ex Israël;* si illius fuisset legis transgressor Christus, tam speciosam accusandi Salvatoris causam minimè reticuisissent, qui tam studiosè falsa adversus Christum testimonia conqui-  
verant.

Verba Christi in suo naturali, quem præferunt sensu accipiunt Patres, & ille præsertim, cujus auctoritatem Græci non revereri non debent, Magnus & divinus Chrysostomus, tum hom. 81. in Matth. *Si pascha comedebant, quare contra legem recumbentes comedebant? Verùm dum comederent Pascha minimè recumbebant, sed*

*sed postquam illud comedissent. Vbi vis pare-  
mus tibi comedere pascha? Addit hom. 82. Non  
illud quod nostrum est, sed interim Iudæorum. ...  
Quia omnia quæ sunt legis adimplevit. Ubi  
Christum in comedendo paschate omnes legis  
Iudæorum ritus observasse, subindeque in azy-  
mo celebrasse clarè tradit. Illa vespèra, uti sub-  
jungit, quando Iudæi comedebant pascha, uti-  
que sine fermentato. Quod & reperit hom. 83.  
in Ioan. & orat. 1. in Iudæos. Idem docet S.  
Epiphanius lib. 1. hæresi 30. ubi ait Christum  
tempore Paschatis usum fuisse carne & azymis.  
Idem habet Theophilaetus in cap. 22. Luc. Diem  
azymorum, inquit, nominat feriam quintam, in  
cujus vespèra pascha immolaturi erant. Quod  
& tradit in commentariis in alios Evangeli-  
stas; cuius tamen verba corrupta benè ex ve-  
rustioribus exemplaribus restituit Arcudius  
libro 3. cap. 5.*

Dices: Joannis 13. dicitur Christum ante  
diem festum Paschæ cœnam suam celebrasse:  
sed dies festus Paschæ erat decimusquartus  
mensis primi, in cuius vespere festivitas inci-  
piebat. Ergo non in illo vespere Christus Eu-  
charistiam instituit, aliàs non ante diem festum  
Paschæ, sed in ejus exordio cœnam suam in-  
stituisset.

Respondeo per diem festum Paschæ intel-  
ligi solennem & festivum diem azymorum,  
seu diem usualem, quo festivitas primæ diei  
azymorum celebrabatur, quæ dies erat prima  
de septem, contingebatque lunâ decimaquintâ  
omnium celeberrima, in cuius vespere præce-  
dente, quæ erat luna decimaquarta, immola-  
batur agnus cum azymis; & tunc Dominus

cum discipulis cœnavit. Quare eadem omninò dies est quam tres Evangelistæ vocant diem azymorum, Joannes verò ait ante diem Paschæ contigisse. Illi enim loquuntur de prima vespéra diei festi azymorum, quæ ad festum illud pertinebat; Joannes verò loquitur de die decimoquarto usuali, qui non erat festivus; solennitas namque festi quoad cessationem ab operibus non nisi luna decimaquintâ usuali incipiebat. Dicitur enim Levitici 13. *Mense primo, decimaquartâ die mensis ad vespèrum Phase Domini est: & quintodecimo die mensis hujus solennitas azymorum Domini est.*

Instabis: Joannis 18. dicitur quod in die dominicæ passionis Judæi non ausi sunt ingredi prætorium, ne contaminarentur, utque manducationi paschatis, seu agni paschalis operam darent. Ergo in die quo Christus passus est manducabatur pascha: sed non manducabatur pascha nisi lunâ decimaquartâ: ergo passus est Christus luna decimaquartâ. Atqui cœnam Christus non instituit nisi pridie quàm pateretur: ergo cœnam Eucharisticam lunâ decimatertiâ, subindeque in fermentato Christus instituit.

Respondeo quod cùm dicitur Judæos in die passionis non ingressos fuisse prætorium, ut manducarent pascha, per *ly Pascha* non intelligitur agnus paschalis, qui primo vespere cum azymis panibus comedebatur, sed alii intelliguntur cibi paschales, qui per septem dierum decursum à Judæis comedebantur; sicut enim septem dies, ita septem illorum dierum cibi paschales meritò dicebantur. Nam ut ex Deuteronomii 16, & 2. Paralipom. 35. patet, Judæi azymos



azymos panes, aliasque victimas ex legis præscripto offerebant, ad quæ munditia legalis desiderabatur. Quâ de causa dies azymi paschales, & azyma pascha indifferenter vocabantur, dicente Lucâ : *Appropinquabat dies azymorum, qui dicitur Pascha.* Idem quoque Evangelista in Actibus Apostolorum narrat, quod Herodes captum Petrum misit in carcerem, volens post Pascha producere eum populo. Quid autem per Pascha intelligat, declarat subjungens : *Erant autem dies azymorum.* Nec mirum, cum etiam *Exodi 3.* Dominus tria festa præcipua celebrare constituens, Pascha tacuit, solennitatem azymorum custodiri iussit, quâ tamen prætermisâ Pascha observari nequit.

Urgebis : Joannis 19. dicitur : *Erat autem Parasceve pascha hora quasi sexta.* Est autem parasceve præparatio ad festum celebrandum, seu vigilia paschæ : ergo Christus passus est in vigilia paschæ. Unde Judæi *Matth. 16.* dicebant : *Non in die festo, ne forè tumultus fieret in populo.* Et Lucas *cap. 23.* narrat, die quâ Christus mortuus est, religiosas mulieres parasse aromata, unde dies ille non erat festus, in quo nihil operis facere licitum erat, iis duntaxat quæ ad esum desiderabantur exceptis, ut *Exodi 2.* jubetur. Quod si Christus ante diem Paschatis passus est, à fortiori ante diem illum Eucharistiam instituit, quam pridie quàm pateretur nobis reliquit.

Respondeo parasceven Paschæ non significare præparationem ad pascha, sed præparationem ad Sabbathum, quæ illo anno ipso paschalium dierum tempore occurrebat. Cum

enim in Sabbatho parari cibi non possent, bene tamen in aliis festis, solum Sabbathum parascieven seu præparationem habebat, ut patet *Exodi 15. & 35.* ubi Judæi jubentur feriâ sextâ colligere cibum pro sequenti Sabbatho. Et certè Joannem loqui de parascève Sabbathi patet ex eo quod eodem capite ait: *Judæi ergo quoniam parascève erat, ut non remanerent in cruce corpora in Sabbatho.* Et ex illo *Marci 15. Erat autem parascève, quod est ante Sabbathum.* Nec obest prætextus ille diei festi, quem Judæi objiciebant. Nam vox illa eorum fuit expressa sententia, quæ minimè prævaluit, sed aliorum potiùs obtinuit consilium, qui falsæ religionis umbone putantes obsequium se præstare Deo, vel odio & invidiâ in Christum perciti eo illum die morti tradendum nisi sunt, quo major illi infamia ex grandi populi ad festivitatem confluentis concursu crearetur. Non obest etiam piarum mulierum in conficiendo aromate labor. Tum quia in aliis à Sabbatho festis non erat tam rigorosa vel scrupulosa ab operibus vacatio; tum quia opera misericordiæ erga Salvatorem præsertim exercita inter opera servilia & prohibita religiosæ illæ & divinitus inspiratæ mulieres minimè annumerabant. Hac eadem ratione Joseph mercatus est syndonem ad sepulturam, quæ non est opus servile, sed officium charitatis, licitum subinde in die festo, ut ex facto *Tobiæ* claret, qui mortuos die festo, ut *Tobiæ 2.* refertur, sepeliebat. *Deuteronomii* etiam 21. præcipitur, ut qui appensus fuerit in patibulo, eodem die sepeliretur. Quâ etiam de causa *Simonis Cyrenæi* iter licitum fuit, si tamen Simon ille

Judæus

Iudæus fuit; nam Hilarius, Ambrosius, & Leo Gentilem illum fuisse volunt, ut typus esset conversionis Gentium, in quas crucis Christi fructus derivandus erat. Et admodum verisimile est, militum vi hominem extraneum ad probrosum lignum deferendum fuisse coactum.

Scio Doctores aliquos aliis modis hæc Græcorum argumenta dissolvere. Nam Lyranus, Burgensis, & Maldonatus censent Christum quidem lunâ decimaquartâ celebrasse; arbitrantur tamen eodem die non fuisse Pascha à Iudæis illo in anno celebratum, sed ex speciali dispensatione in diem decimumquintum, quod erat Sabbathum, seu in primas ejus vespas agni paschalis esum transtulisse; ne, inquiunt, molesta foret & gravis populo duorum festorum immediatè consequentium celebratio. Verùm hæc conjectura levis videtur; nam præter quod duorum festorum immediatè succedentium incommodum semel in multis annis occurrens haud magni momenti est, insuper Iudæi in incommodum, quod initio solennitatis declinare voluissent, in fine incurrissent; si enim in Sabbatho celebratus fuisset primus dies azymorum, dies septimus qui erat etiam festivus, in feriam sextam sequentem incidisset, ac proinde in vigilia Sabbathi utique festi. Accedit, quod in omnibus Scripturæ locis, in quibus dicitur Christum Eucharistiam instituisse, asseritur etiam eodem id fecisse die, quo Iudæi immolabant, & necesse erat occidi pascha, ut patet *Luce 26.* & *Matth. 26.* Ponderatione etiam digna sunt illa verba: *Scitis quia post biduum pascha fiet; ubi ly fiet*, ab omnibus faciendum signifi-

cat; & ly *scitis*, hoc futurum more solito indigebat, aliàs illud Apostoli nescivissent. Accusassent etiam Judæi Christum, quòd contra morem & traditionem agnum immolasset. Nec est ullum imaginariæ illius Judæorum festum paschæ transferre valentium traditionis fundamentum.

Alii post Oleastrum & Stellam docent eodem quidem die, à Christo & unà à Judæis Pascha fuisse celebratum; volunt tamen celebrationem illam in priore vespere lunæ decimæquartæ contigisse, hoc est sub finem lunæ decimætertix, hisque rationibus moventur. Primò, quia Judæi in illo vespere celebrabant Pascha, qui ad diem decimamquartam pertinebat: atqui ad illum diem pertinebat primus vesper, non secundus, qui magis ad diem sequentem spectabat. Ergo in primis vesperis lunæ decimæquartæ Christus Eucharistiam instituit. Præterea eodem die immolabant Judæi agnum, quo primùm in Ægypto immolaverunt, cùm immolatio agni anniversaria in memoriam prioris immolationis & liberationis fieret: sed in exitu de Ægypto agnum in principio lunæ decimæquartæ immolaverunt; cùm enim Judæi egressi sint de Ægypto nocte lunam decimamquartam terminante, ut patet *Exodi 12. Deuter. 16. & Num. 13.* aliunde verò nocte, quâ agnus immolabatur, nemo de domo ante ortum diem exhibet, juxta illud *Exodi 12. Nullus vestrum egrediatur ostium domus suæ usque ad mane*; relinquitur tunc agnum in principio lunæ decimætertix Judæos immolasse. Maxime quia cùm sexcenta hominum millia egressa sint de Ægypto absque parvulis & mulieribus,

necessa



necessarius saltem fuit dies integer ad tantam multitudinem congregandam, ad colligendamque vasa aurea & argentea atque supellectilem quam ab Ægyptiis postularunt; unde ea nocte quâ egressi sunt Judæi de Ægypto, non potuerunt agnum immolare, sed illum nocte præcedenti immolare debuerunt, ut per diem integrum, qui inter esum agni & exitum eorum interfuit, suis negotiis consulerent, atque ad iter se accingerent. Unde *Numer. 13.* dicuntur Judæi altera die à Phase seu ab esu agni de Ægypto exiisse.

Erudita sanè sententia, sed inde fortassis improbanda judicabitur, quòd immolari agnum decebat & solebat in vespere ad solennitatem pertinente; siquidem ille dies ab Evangelistis primus azymorum appellatur, qui maximè sollemnis erat. Maximè quia eo vespere agnus paschalis manducabatur, quo incipiebat interdictio usus panis fermentati, ut ex dictis patet. At in primis vespere lunæ decimæquartæ non erat prohibitus usus fermentati, nondum enim inceperat primus dies azymorum à secundis vespere lunæ decimæquartæ ortum ducens, ut luna decimaquinta esset primus dies sollemnis azymorum.

Motiva etiam in contrarium adducta urgentia non sunt. Non primum, quia secundæ vespere lunæ decimæquartæ & ad diem decimumquartum per modum terminantis, & ad diem decimumquintum per modum inchoantis pertinent. Maximè quia celebritas paschæ non erat festiva nisi ratione primi diei azymorum, qui in secundis vespere lunæ decimæquartæ incipiebat, unde celebritas paschalis

à secundis vesp̄is lunæ decimatertiæ , & primis decimæquartæ ortum minimè ducebat.

Secundum etiam motivum nihilo fortius est. Tum quia Iudæi de Ægypto nocte quidem declinante , sed ante ortum solem tamen egressi sunt. Neque hoc impedire potuit hominum congregandorum multitudo , vel supellectilis copïa , quia ad hoc potuerant retroactis diebus præparari , vel summâ diligentîâ angustiam temporis supplere potuerunt. Adde prohibuisse Mosem ne nocte illa è domibus egredierentur , nisi ab Ægyptiis compellerentur , ut patet *Exodi 12.* Unde cùm Pharaonis Ægyptiorumque vi exire compulsi sint , præceptum latum minimè transgressi sunt. Et sanè festinanter egressos fuisse Iudæos inde perspicuum est , quòd panes fermentare minimè potuerunt.

Ultimum denique motivum facilè solvitur. Ideo namque Iudæi de Ægypto altero die ab esu agni egressi dicuntur , quia in vesp̄e lunæ decimæquartæ agnum comederant , & diluculo sequentis diei usualis exierunt.

Insistes : Chrysostomus *hom. de proditiōe Iudæ* , ait Iudæos impudenti animo proponere *azyma* , tanquam qui corda habeant incircuncisa. Vides , ait paulò post , quod immunda sunt eorum *azyma*.

Respondeo damnare Chrysostomum *azyma* Iudæorum , non quòd azymis successerit fermentatum , sed quia volunt sola *azyma* subsistere , & ea nondum esse quorum *azyma* figura erant ; cùm tamen veniente Sole , ut ait , *non amplius lucerna præbeat lumen* , & adveniente

veniente veritate cesset umbra. Immunda similiter ait esse eorum azyma, sicut & eorum sacrificia, quæ Paschæ spiritualis adventu evacuata sunt, & institutione divinissimi Sacramenti figuræ impletæ. Cæterum Christum in illa institutione pane azymo usum fuisse, luculenter inibi tradit Chrysostomus dicens: *Et circumcisionem sustinuit (Christus) & Sabbathum observavit, & azyma comedit.::: Nostra azyma non sunt farina humore temperata & macerata, sed sincerum institutum, vitaque honesta.*

*Necessitas Eucharistia.*

Altera speculationis pars asserit Eucharistiæ sacramentum esse omnibus necessarium necessitate mediæ, ita ut nullus absque eo vel re, vel saltem voto suscepto salutem consequi possit. Dico *saltem voto*; nam parvuli sacris, undis intincti, vel proprio sanguine baptizati salutem absque actuali Eucharistiæ perceptione obtinent. Sæpe etiam adulti in ea rerum serie constituuntur, in qua cœlesti hoc cibo pasci nequaquam possunt, ut qui tempestate jactati in aquis sepeliuntur, vel qui repentinam mortem in gratia alioquin constituti obeunt. Et ita quoad parvulos sacra Tridentina Synodus sess. 21. cap. 4. his verbis determinavit: *Eadem sancta Synodus docet parvulos usu nationis carentes nulla obligari necessitate ad sacramentalem Eucharistiæ communionem; si eundem per baptismi lavacrum regenerati & Christo incorporati adeptam jam Filiorum Dei gratiam in illa*

estate amittere non possunt. Neque ideo tamen damnanda est antiquitas, si eum morem in quibusdam locis aliquando servavit: ut enim sanctissimi illi Patres sui facti probabilem causam pro illius temporis ratione habuerunt; ita certe eos nulla salutis necessitate id fecisse sine controversia credendum est. Idem definit can. 4. Dixi etiam necessitate medii; nam Eucharistiam esse necessariam necessitate præcepti cum Ecclesiastici, tum Divini, satis ex verbis Salvatoris Ioan. 6. & ex Ecclesiæ decretis patet. Quare sola medii necessitate non est semper necessarium hoc sacramentum re susceptum, cum sine eo prima gratia haberi possit, & illud phreneticis, vel infirmis vomitum patientibus, vel ultimo supplicio addictis sancta & à Domino gubernata Ecclesia non porrigat.

Cæterum quod saltem implicitum Eucharistiæ votum sit omnibus necessitate medii necessarium, aperte colligitur ex verbis illis Redemptoris Ioan. 6. *Nisi manducaveritis carnem filii hominis & biberitis ejus sanguinem, non habebitis vitam in vobis.* Idque post Augustinum infra referendum docet expressè S. Thomas q. 73. art. 3. ubi inter alia quæ huic veritati probandæ peropportuna sunt, sic fatur: *Per baptismum ordinatur homo ad Eucharistiam, & ideo ex hoc ipso quod pueri baptizantur, ad Eucharistiam ordinantur per Ecclesiam; & sic sicut ex fide Ecclesia creditur, sic ex fide Ecclesia considerant Eucharistiam.* Quod & luculenter confirmat quæst. 79. art. 1. ad 1. inquiens: *Hoc sacramentum ex seipso virtutem habet gratiam conferendi, nec aliquis habet gratiam ante suspensionem hujus sacramenti, vel nisi in aliquo voto*  
*ipsum;*



*ipsius, vel per seipsum sicut adulti, vel voto Ecclesia sicut parvuli, sicut supra dictum est.*

Ratio verò est, quia Eucharistia est omnium Sacramentorum finis, ad quam cætera tanquam media ordinantur. Cum enim in eo Christus Dominus sacramentorum author & gratiarum omnium scaturigo realiter contineatur, clarum est hoc sacramentum esse totius religionis centrum, & christianæ sanctitatis consummationem, apicem, & coronamentum: unde fit cætera omnia mysteria & Sacramenta ad Eucharistiam dignius suscipiendam, ad ejusque effectus uberius percipiendos ordinari. Nec solum Eucharistia Christum, qui est finis noster, juxta illud, *Vos autem Christi*, continet; sed ipse etiam Eucharistiæ effectus cæterorum est sacramentorum finis & coronis: ad hoc namque instituta sunt sacramenta, ut Christo uniti & incorporati vitam adipiscamur æternam, & gloriosam corporum resurrectionem obtineamus. Hæc autem per Eucharistiam obtinemus; divino enim hoc sacramento Christo intimè unimur, eique ut loquuntur Patres, commiscemur, unde dixit Veritas: *Qui manducat me, vivet propter me.* Futura etiam animæ beatitudo & gloriosa corporum resurrectionem proprius est hujus sacramenti fructus, juxta illud: *Qui manducat hunc panem vivet in æternum, & ego resuscitabo eum in novissimo die.*

Quod ut melius intelligas, suraviusque percipias, eo modo Christus Dominus in Eucharistia considerandus est, quo Rex in Regno quod moderatur. Sicut enim omnia officia & mi-

nisteria regni & à Rege proficiscuntur, & propter illum sunt, & illi serviunt; cunctaque imperii munia regali potestati subordinata & Regi militant, & in ejus honorem cedunt, & in illius obsequium conspirant, & membrorum politici corporis cum capite unionem & colligationem intendunt, procurant, conservant; licet non omnes subditi familiarem cum persona Regis convictum habeant, quia hæc specialioris amicitiae significatio à Rege ut privatae personæ munus obit, non ut publici Regni moderatoris officio fungitur, proficiscitur: ita similiter licet convivere Christo, ejus præsentia frui, & panis coelestis suavitate pasci ac saginari sit specialis Eucharistiae effectus, quo ii duntaxat dignantur qui cibum illum divinum de corde puro & optimo comedunt; attamen unio cum Christo capite, quæ hujus sacramenti effectus est, omnium est sacramentorum finis, in quem tota quanta sunt collinant. Et certè justum est ut sicut Deus est rerum omnium ultimus finis, ita ubicumque Deus speciali modo invenitur, ibi etiam ultimi finis rationem habeat, cæteraque quæ ad illum ordinem spectant, illicius suæ bonitatis sibi subiciat. Hinc quia in justis singulari modo inhabitat, ideo omnia propter electos facta sunt, juxta illud, *Omnia vestra sunt*. Quia in Christo omnis plenitudo divinitatis corporaliter inhabitat, ideo propter Christum electi prædestinati sunt, juxta illud, *Vos autem Christi*. Quia cælum Deus specialiter manifestatione suæ gloriæ incolit, juxta illud, *Cælum mihi sedes est*, idcirco fortunatus ille locus laborum omnium nostrorum & desideriorum meta est. Ergo quia Christus singulari & ineffabili

ineffabili modo in Eucharistia realiter præsens est, ideo ad Eucharistiam omnia religionis Sacramenta referuntur. Unde per aquas Baptismatis & Pœnitentiæ evadimus receptacula munda ad cœlestem illum cibum recipiendum idonea; per Confirmationem ad illius mysteriî fidem, fideique professionem & defensionem armamur; & per Ordinem digni constituimur Eucharistiæ ministri; per Matrimonium concupiscentiam frænamus, cuius repressio non parva est ad immaculatum Agnum immaculato animo manducandum dispositio; & per Extremam Unctionem post viaticum conferri solitam, unionem cum Christo suscepto in ultimo agonis conflictu indivulsè servamus, & illud Apostoli Deo donante experimur, *Mihi vivere Christus est, & mori lucrum.*

Ex quibus omnibus subsûmo in hunc modum: Atqui sine aliquo finis Christianæ religionis voto nemo potest justificari, imò sine voto illo cætera suscipi sacramenta nequaquam possunt; cum media non nisi ex amore finis assumi queant, & cætera sacramenta media sint quæ ad Eucharistiam recipiendam, vel ejus fructum conservandum proprio & connaturali pondere inclinant, ad eamque velut ad vitæ spiritualis consummationem propendent. Ergo omninò necessarium est Eucharistiæ votum, sin expressum & explicîum, certè implicitum & virtuale, quo res desideratur non in seipsa ut distinctè cogitata, sed in aliquo alio connexionem quandam cum illa habente. Quod implicitum votum in adultis & in actus formales interdum prorumpere, & exequutioni aliquando mandari debet, cum præcepta non de habitibus,

bus, sed actibus cū internis, tum externis, ut sæpe diximus, dentur. Alioquin frustra Veritas dixisset : *Nisi manducaveritis carnem Filii hominis, & biberitis ejus sanguinem, non habebitis vitam in vobis.* Quasi diceret : Non poteritis diu vitam in Baptismate acceptam sine cibo carnis mæ conservare, nec ad veram vitam in finis ultimi adeptione sitam pervenire.

*Solvuntur objectiones. Mens S. Augustini circa Communionem parvulorum accuratè indagatur & exponitur.*

Dices : Sine Eucharistia salus æterna obtineri potest, cū ad eam adipiscendam prima duntaxat gratia requiratur cum perseverantia in illa : utrumque autem sine Eucharistia obtineri potest ; prima quidem gratia, quia est effectus Baptismatis, nec eam confert Eucharistia, tamen illam foveat augeatque ; perseverantia etiam, quam parvulis præmatura mors speciali Dei providentia contingens confert, quam utique mortem votum Eucharistiæ non infert. In adultis verò perseverantia est donum speciale sub meritum non cadens, quod quibus voluerit, & quando voluerit largitur misericors Deus. Ergo Eucharistia non est absolute necessaria.

Respondeo hac objectionem firmari magis nostram sententiam, ex eaque erui rationem ad eam probandum efficacem. Nam sicut ad dandam vel restaurandam primam gratiam instituta



tuta sunt Baptismatis & Pœnitentiæ sacramenta, ita ad conferendam in accepta gratia perseverantiam institutum est divinum Eucharistæ sacramentum. Quemadmodum enim vita animalis per alimenta fovetur, nisi stomachum invenerint ægrum, & cibos præ cachectæ non laudabiliter, ut loquuntur Medici, concoquentem: sic vita spiritalis cibo animarum, qui Eucharistia est, sana incolumisque servatur, nisi cor invenerit pravâ peccati affectione laborans. Unde perseverantia in bono proprius est & characteristicus Eucharistiæ fructus. Præmatura etiam electorum mors ejus effectus est, non ut est occisio, sed quatenus est conjunctio mortis cum gloria, quam Deus intuitu Eucharistiæ voto Ecclesiæ in parvulis desideratæ impertitur. Et quanvis donum perseverantiæ adultis collatum ex sola Dei misericordie voluntate pendeat, auxilia tamen ad perseverandum necessaria, quibus homo & præcepta servat & peccata vitat, confert usus Eucharistiæ.

Instabis: Quæ ad confirmandam Eucharistiæ necessitatem produximus, nimis probant; convincunt enim Eucharistiam re susceptam esse necessariam necessitate mediæ, ac proinde nec sine ea parvulos decedentes posse salvari; nam sicut dictum est: *Nisi quis renatus fuerit ex aqua & Spiritu sancto, non introibit in regnum Dei*; ita de Eucharistia scriptum est: *Nisi manducaveritis carnem filii hominis, & biberitis ejus sanguinem, non habebitis vitam in vobis*. Sicut ergo ex prioribus verbis necessarium esse baptismi necessitate mediæ colligimus, ita & idem de Eucharistia peræquè fatendum est.

Idque

Idque primitivæ Ecclesiæ praxis confirmat, quâ Eucharistiæ sacramentum parvulis recens baptizatis conferebatur, ut docent S. Dionysius, *de Ecclesiastica Hierarchia*, cap. 2. & 3. S. Cyprianus *serm. de lapsis*, S. Augustinus *epist. 107. ad Vitalem*, aliique Patres, suoque tempore morem illum viguisse testatur S. Anselmus *in cap. 2. Luca*. Quod observatum minimè fuisset, nisi Patres existimassent Eucharistiam re susceptam medium esse ad salutem consequendam, non minùs quàm Baptisma necessarium.

Respondeo Baptismum & Eucharistiam in hoc convenire, quod sicut adulti sine voto Baptismi salvari nequaquam possunt, quanvis sine eo re collato interdum cum solo voto salventur; ita sine aliquo Eucharistiæ voto nullus adultus salutem consequitur, licèt eam sine actuali Eucharistiæ usu aliquando adipiscatur. Attamen hoc inter utrumque Sacramentum interest, quod Baptismus est spiritualis vitæ principium, & omnium Sacramentorum janua, Eucharistia verò est vitæ spiritualis fastigium & consummatio, omniumque Sacramentorum finis; quia per omnium sanctificationes Sacramentorum ad recipiendam vel consecrandam Eucharistiam via sternitur, animusque instruitur & comparatur: & ideo perceptio Baptismi ad inchoandam vitam spiritalem omninò desideratur, usus autem Eucharistiæ ad vitam illam consummandam necessarius est; unde non exigitur ad vitam spiritalem simpliciter habendam, modò tamen in aliquo voto habeatur, sicut & finis desiderio & intentione haberi potest. Habent autem parvuli baptizati votum illius.

illius finis eo modo , quo habent fidem , nimirum ex intentione Ecclesiæ , sicut ex fide Ecclesiæ credunt : & ideo per Baptismum ordinantur pueri ad Eucharistiam per vota ipsius Ecclesiæ , unde & recipiunt fructum ipsius , licet illam re minimè percipiant. At verò ad Baptismum non ordinantur per aliud sacramentum antecedens , & ideo Baptismum in voto sicut adulti habere non possunt , remque proinde Baptismi sine actuali Baptismo recipere non valent. Ex quibus patet arctioris esse necessitatis sacramentum Baptismatis quàm Eucharistiæ. Nec obest primitivæ Ecclesiæ praxis , quæ ut ait Tridentinum , probabilem habuit ratione illorum temporum causam , sed necessitatem absolutam minimè imponebat. Nam etiam Confirmatio parvulis post Baptismum continuò conferebatur , sine qua tamen parvulos baptizatos posse salvari nemo ambigit.

Urgebis : Saltem negari non potest , Augustinum in ea fuisse sententia , sacramentum Eucharistiæ re susceptum esse omninò & necessitate mediæ ad salutem æternam obtinendam necessarium. Cùm enim existentiam peccati originalis adversus Pelagianos probaret ex illo : *Nisi quis renatus fuerit ex aqua & Spiritu sancto , non potest introire in regnum Dei ?* Pelagianique vim argumenti clusuri distinguerent inter Regnum Dei & vitam æternam , vellentque illud solis baptizatis donandum , istam verò parvulis etiam Baptismate non initiatis ; reponerat Augustinus , quod etiam à vita æterna excludendi erant non baptizati , propter illud Christi : *Nisi manducaveritis carnem Filii hominis*

*nis, non habebitis vitam in vobis.* Eandem p. recipiendæ Eucharistiæ ac suscipiendi Baptismatis impositam à Christo necessitatem existimans, ut ex concertationibus Augustini adversum Pelagianos claret.

Respondeo non solum heterodoxos quamplures, præsertim Calvinistas Augustinum accusare, quod necessitatem Eucharistiæ se susceptæ omnibus imposuerit; sed inter Catholicos etiam Joannem Maldonatum in cap. 6. *Ioannis*, existimasse Augustinum & Innocentium in ea fuisse opinione à cæterorum Patrum sensu longè discedente. Verum Augustini mentem minimè intellexerunt, cujus doctrina hac in parte communis erat totius Ecclesiæ, ac ipsius præsertim Ecclesiarum matris & magistræ Romanæ & Sedis Apostolicæ sensus, ut testatur ipse Augustinus *epist. 106.* ubi ait Pelagianos asserentes infantes non baptizatos habituros vitam æternam, contra sententiam Domini disputare dicentis: *Nisi manducaveritis carnem filii hominis, non habebitis vitam in vobis; & contra Apostolica Sedis auctoritatem, ubi de hac ipsa re cum ageretur, hoc testimonium adhibitum est evangelicum, ne parvuli non baptizati vitam posse habere credantur.* Et postea: *Si autem credimus Sedi Apostolica, vel potius ipsi Domino & Magistro Apostolorum, qui dicit non habituros vitam in semetipsis, nisi manducaverint, &c.* Et lib. 2. ad Bonifacium, cap. 4. *Quid illud quod idem Papa de hac ipsa causa etiam Numidia rescripsit Episcopis, quia de utroque Concilio, & de Carthagenensi scilicet & de Milevitano scripta susceperat, nonne apertissimè de parvulis loquitur. Hac enim ejus verba sunt: Illud verò quod*



quod eos vestra fraternitas asserit predicare, parvulos aeterna vitae premiis etiam sine Baptismatis gratia posse donari, persatuum est; nisi enim manducaverint carnem filii hominis, & biberint sanguinem ejus, non habebunt vitam in semetipsis. Qui autem hanc eis sine regeneratione defendunt, videntur mihi ipsum Baptismum velle cassare, cum predicant hos habere, quod in eos credimus non nisi Baptismate conferendum. Et deinceps: Ecce beata memoria Innocentius Papa sine baptismo Christi, & sine participatione corporis & sanguinis Christi vitam non habere parvulos dicit. Videsis Innocentii epistolam inter Augustinianas nonagesimamtertiam.

Nec Innocentius solum, sed ipse Papa Gelasius post obitum Augustini sic ad Episcopos per Picenum scripsit: Ipse Dominus Iesus Christus cœlesti voce pronuntiat: Qui non manducaverit carnem, &c. ubi utique neminem videmus exceptum: nec opus est aliquem dicere parvulum sine hoc sacramento salvari ad aeternam vitam posse perducī, sine autem illa vita in perpetua futurum morte non dubium est. Nihil autem aliud scripsit Augustinus, quàm quod Sedes Apostolica clarissimorum Pontificum oraculis tradidit, ut cùm lib. 1. de peccatorum meritis, cap. 20. adversus Pelagianos distinguentes regnum cœlorum à vita aeterna, dixit: Nova quadam & mirabili presumptione, quasi salus & aeterna vita posset esse præter Christi hereditatem, præter regnum cœlorum? Dominum audiamus, non quidem hoc de sacramento sancti lavacri dicentem, sed de sacramento sacra mensæ suæ, quod nemo ritè nisi baptizatus accedit: Nisi manducaveritis,

caveritis, &c. An verò quisquam hoc dicere audebit, quod ad parvulos hac sententia non pertineat, possintque sine participatione corporis hujus & sanguinis in se habere vitam, quia non ait: Qui non manducaverit; sicut de Baptismo: Qui non renatus fuerit; sed ait: Si non manducaveritis, veluteos alloquens qui audire & intelligere poterant, quod utique non valent parvuli? Sed qui hoc dicit non attendit, quia nisi omnes sententia ista teneat, ut sine corpore & sanguine Filii hominis vitam habere non possint, frustra etiam etas major id curat; potest enim (si non voluntatem, sed verba loquentis attendas) eis solis tunc videri dictum, quibus tunc Dominus loquebatur: quia non ait, qui non manducaverit; sed, Si non manducaveritis. Et ubi est quod eodem loco de hac ipsa re ait: Panis quem ego dedero caro mea est pro saculi vita? Secundum hoc enim etiam ad nos pertinere illud sacramentum intelligimus, qui tunc nondum fuimus, quando ista dicebat; quia non possumus dicere ad saculum nos non pertinere, pro cuius vita Christus carnem suam dedit. Quis autem ambigat saculi nomine homines significatos esse, qui nascendo in hoc saculum venimus? Ac etiam pro parvulorum vita caro data est, qua data est pro saculi vita; & si non manducaverint carnem Filii hominis, nec ipsi habere possunt. Idem reperit lib. 1. ad Bonifacium, cap. 22. & lib. 3. contra Julianum, cap. 1. & lib. de prædest. Sanct. cap. 13. & alibi non semel.

Anne propterea Doctor sanctissimus Romanæ Ecclesiæ vestigiis catholicè indivulsèque adhærens à communibus cæterorum Patrum & universalis Ecclesiæ sensibus recessit? Absit, absurdum

abſurdum eſt dicere, & cogitare impium & jux-  
tâ ignorantîâ pleniffimum. Quando enim Au-  
guſtinus, quando Innocentius, quando Gela-  
ſius Euchariftiam ad ſalutem omnibûs etiam  
parvuliſ necēſſariam dixerunt, ejuſque indiſ-  
penſabilem necēſſitatem clariffimis Salvatoris  
verbis confirmarunt, manifeſtè de Euchariftia  
quoad rem in voto ſuſcipiendam, non de actua-  
li ejuſdem eſu loquuti ſunt. Ita enim ſui in-  
terpres mentem ſuam expoſuit Doctor gratiæ  
*lib. 3. de Peccatorum meritis, cap. 4.* hiſ verbis:  
*Quid autem apertius tot tantique testimoniis di-  
vinorum eloquiorum, quibus dilucidiffimè appa-  
ret, nec propter Chriſti ſocietatem ad vitam ſa-  
lutemque æternam poſſe aliquem injuſtè damna-  
ri, hoc eſt ab illa vita ac ſalute ſeparari? Unde  
fit conſequens, ut quoniam nihil tale agitur aliud  
cû parvuli baptizantur, niſi ut incorporentur  
Eccleſiæ, id eſt Chriſti corpori membrisque ſocien-  
tur, manifeſtum fit eos ad damnationem, niſi  
hoc iis collatum fuerit, pertinere. Et poſteà:  
Nunquid etiam illud, niſi manducaverint homi-  
nes carnem ejus, hoc eſt participes facti fuerint cor-  
poris ejus, non habebunt vitam? Nonne Veritas  
ſine ulla ambiguitate proclamat, non ſolûm in  
regnum Dei non baptizatos parvulos intrare non  
poſſe, ſed nec vitam æternam poſſe habere, niſi  
Chriſti corpus, cui ut incorporentur, ſacramento Ba-  
ptiſmatis inducuntur.*

Vides S. Patrem eo modo velle Euchar-  
iſtiam eſſe necēſſariam, quo in Baptiſmo man-  
ducari poſteſt: manducari autem ait in Baptiſ-  
mo carnem Chriſti, quatenus incorporamur  
myſtico Chriſti corpori & membris ejus, id eſt  
Eccleſiæ. Idem declarat Præful ſanctiſſimus  
*tract.*

*tract. 26. in Joan. ad hæc verba : Qui manducat meam carnem , &c. Qui hanc sumit , inquit , habet vitam , & hanc uique æternam. Hunc itaque cibum & potum societatem vult intelligi corporis & membrorum suorum , sicut rei sacramentum , id est virtutem corporis & sanguinis Christi. Alicubi quotidie , alicubi certis intervallis dierum in dominica mensa preparatur , & de mensa dominica sumitur , quibusdam ad vitam , quibusdam ad exitium : res verò ipsa cujus sacramentum est omni homini ad vitam , nulli ad exitium , quicumque ejus particeps fuerit. Quando ergo dixit Augustinus Eucharistiam esse omnino omnibus ad vitam necessariam , non de sacramento ut sic loquutus est , quod quibusdam ad vitam , quibusdam ad exitium porrigitur ; sed de re sacramenti , quam societatem esse ait corporis & membrorum Ecclesiæ , cui parvuli per Baptismum ascribuntur. Denique sententiâ 341. à S. Prospero ex Augustino excerptâ , sic habet : *Escam vita accipit seu æternitatis pocula bibit qui in Christo manet , & cujus Christus agitator est : nam qui discordat à Christo , nec carnem ejus manducat , nec sanguinem bibit , etiam si tanta rei sacramentum ad judicium sua presumptionis quotidie indifferenter accipiat. Itaque res & fructus Eucharistiæ , qui est in Christo manere , omnibus est omnino necessarius , nec potest ullus unquam vitam æternam habere , qui eo modo Eucharistiam non comederit.**

S. Augustinum de re sacramenti , non de sacramento actu suscepto loquutum esse , non ex ejus solùm verbis , sed ex Patribus posterioribus ita cum interpretantibus perspicuum est.

Ita



Ita ipsum intellexit S.<sup>i</sup> Fulgentius epistola ad Ferrandum de Baptismo Æthiopis, cap. 11. his verbis : Nullus debet moveri fidelium in illis , qui etsi legitime sanâ mente baptizantur , prave-  
niente velocius morte carnem Domini mandu-  
care & sanguinem bibere non sinuntur , propter  
illam sententiam Salvatoris , quâ dixit : Nisi  
manducaveritis , &c. Quod quisque non solum  
secundum veritatis mysteria , sed secundum my-  
sterii veritatem considerare poterit , in ipso lava-  
cro sancta regenerationis fieri providebit. Quid  
enim agitur sacramento sancti Baptismatis , nisi  
ut credentes membra Domini nostri Iesu Christi  
fiant , & ad compagem corporis ejus Ecclesiasticâ  
veritate pertineant ? Quod ubi productis variis  
sacrarum litterarum testimoniis demonstravit ,  
subjungit : Qui ergo membrum corporis Christi  
fit , quomodo non accipit quod ipse fit , quando  
utique illius fit verum corporis membrum , cujus  
corporis est in sacrificio sacramentum ? Hoc ergo  
fit ille regeneratione sancti Baptismatis , quod est  
de sacrificio sumpturus Altaris. Quod etiam  
sanctos Patres indubitanter credidisse ac docuisse  
cognoscimus. Beatus quoque Augustinus de hac re  
sermonem fecit admodum luculentum & aptum  
adificationi atque instructioni fidelium , quem  
sermonem totum epistola malui subjicere. Inte-  
grum sermonem profert Fulgentius , in quo in-  
ter cætera hæc habentur : Corpus ergo Christi si  
vis intelligere , Apostolum dicentem audi , dicen-  
tem , inquam , fidelibus : Vos estis corpus Christi &  
membra. Si ergo vos estis corpus Christi & mem-  
bra , mysterium vestrum in mensa Domini posi-  
tum est : mysterium Domini accipitis. Ad id  
quod estis , Amen respondetis , & respondendo sub-  
scribitis.

cribitis. Audi ergo corpus Christi, & respondeas Amen. Esto membrum corporis Christi, ut verum sit Amen. Quare ergo in pane? Nihil hic de nostro afferamus: ipsum Apostolum item audiamus. Cùm ergo de isto sacramento loqueretur, ait: Unus panis, unum corpus multi sumus. ::: Qui accipit mysterium, & non servat vinculum pacis, non mysterium accipit pro se, sed testimonium contra se. Arbitror sancte Frater (verba sunt Fulgentii sermonem Augustini ponderantis) disputationem nostram præclari Doctoris Augustini sermone firmatam, nec cuiquam esse aliquatenus ambigendum, tunc unumquemque fidelium corporis sanguinisque dominici participem fieri, quando in Baptismate membrum corporis Christi efficitur, nec alienari ab illo panis calicisque consortio, etiamsi antequam panem illum comedat & calicem bibat, de hoc saculo in unitate corporis Christi constitutus abscedat. Sacramenti quippe illius participatione ac beneficio non privatur, quando ipse hoc quod illud sacramentum significat invenitur.

Augustinum eodem modo interpretatus est Lanfrancus epist. 33. his verbis: Credimus generaliter omnes omnibus ætatibus plurimum expedire tam viventes quàm morientes dominici corporis & sanguinis perceptione se munire; nec tamen si priusquam corpus & sanguinem Domini sumant contingit baptizatos statim de hoc saculo exire, ullatenus credimus eos (quod Deus avertat) propter hoc in æternum perire. ::: Nam sententia illa quam Dominus in Evangelio dicit, Nisi manducaveritis, &c. quantum ad comestionem oris non potest generaliter dicta esse de omnibus. Plurique enim sanctorum Martyrum ante Baptis-

num quoque diverſis excruciatī prius de corpore migraverunt ; eos tamen in numero Martyrum computat , & ſalvos credit Eccleſia. Infantem quoque non baptizatum , ſi morte imminente urgeatur , à ſideli laico , ſi Preſbyter deſit , poſſe baptizari Canones præcipiunt ; nec eum tamen , ſi ſtatim moriatur , à conſortio fidelium ſejungunt. Neceſſe eſt ergo prædictam Domini ſententiam ſic intelligi , quatenus unus uiſque divini myſterii per intelligentiam capax carnem Chriſti & ſanguinem non ſolùm ore corporis , ſed etiam amore & ſuavitate cordis comedat & bibat, videlicet amando , & in conſcientia pura dulce habendo quod pro ſalute noſtra Chriſtus carnem aſſumpſit , pependit , reſurrexit , aſcendit , & imitando veſtigia ejus , & communicando paſſionibus ipſius , quatenus humana infirmitas patitur , & divina ei gratia largiri dignatur. Hoc eſt enim verè & ſalubriter carnem Chriſti comedere , & ſanguinem ejus bibere. Quam ſententiam in libro de doctrina Chriſtiana B. Auguſtinus exponens , ſic ait : Facinus vel flagitium jubere videtur ; figura verò eſt præcipiens paſſioni Dominica communicandum eſſe , & ſuaviter atque utiliter in memoria recondendum , quod pro nobis caro ejus vulnerata & crucifixa ſit. Figuram vocat figuratam loquutionem : neque enim negat veritatem carnis & ſanguinis Chriſti ( quod plerique ſchiſmaticis viſum eſt , & adhuc non ceſſat videri. ) Et Dominus in Evangelio : Qui manducat carnem meam , & bibit meum ſanguinem , in me manet , & ego in eo. Quod exponens B. Auguſtinus ait : Hoc eſt namque carnem Chriſti & ſanguinem ſalubriter comedere & bibere , in Chriſto manere , & Chriſtum in ſe manentem habere. Nam & Iudas qui Dominum tradidit , cum

*ceteris Apostolis ore accepit ; sed quia corde non comedit , iudicium sibi aeterna damnationis accepit.*

Sanctus etiam Thomas sic Magistrum suum Augustinum intellexit *quæst. 73. art. 3. ad 1.* ubi explicans illud nostri Servatoris , *Nisi manducaveritis , &c.* sic habet : *Dicendum quod sicut Augustinus dicit exponens illud verbum Ioannis , hunc cibum & potum , scilicet carnis sue , societatem vult intelligi corporis & membrorum suorum , quod est Ecclesia.* Quod & verbis ejusdem Augustini *epist. ad Bonifacium* confirmat. Hoc etiam pacto locum Joannis interpretatus est S. Bonaventura *in 4. dist. 12. quæst. 1. ad 1.* & Durandus *dist. 9. quæst. 2. ad 2.* Et certè eadem fuit S. Augustini hæc in parte sententia , quæ Innocentii ; cum Sanctissimi hujus Pontificis verba exscribat , laudetque Augustinus. At Innocentius Papa loquutus est de Eucharistiæ re in voto suscepta , non de sacramento actu suscepto ; Innocentius enim commentum Pelagianorum vitam æternam à regno cælorum insulsiſsimè distinguendum reprobans ex illo , *Nisi manducaveritis* , ait hæreticos illos *Baptismum ipsum cassare , quia prædicant habere sine baptismo infantes , quod non nisi baptismo eis conferatur.* Ergo censebat Beatus ille Papa , censebatque proinde S. Augustinus , Baptismate conferri vitam æternam , quæ non datur nisi manducando carnem filii hominis ; atque in ipso baptismo manducari carnem filii hominis quoad rem , quatenus baptismo mystico Christi corpori incorporamur. Unde effectus Eucharistiæ sine Eucharistia re suscepta , in voto tamen optata habetur. Quod Eucharistiæ votum in Baptismo

mate



mate includitur. Id ipsum ex eo etiam evidentissime claret, quod Augustinus *lib. 1. de peccatorum meritis* docet Baptismum infantibus sufficere ad Salutem: *Parvulus*, inquit, *si percepto Baptismo de hac vita migraverit soluto reatu cui erat originaliter obnoxius, perficietur in illo lumine veritatis, quod incommutabiliter manens, in aeternum justificatos praesentia veritatis illuminat.* Quod & *cap. 21. & 22.* repetit, necnon *lib. 2. cap. 28.* Videatur etiam Bernardus *lib. de diligendo Deo, cap. 4.*

In fine hujus speculationis nonnulla advertere operepretium visum est circa Communionem parvulorum. Sciendum igitur, non solum Ecclesiam Græcam pueris & infantibus sacram Communionem porrigere, sed morem illum fuisse antiquitus non modò in Oriente, sed in Occidente etiam usurpatum. Hinc olim sacramenta Baptismatis, Confirmationis, & Eucharistiae non interrupta celebratione conferebantur. Cujus ritus meminit Alcuinus Venerabilis Bedæ discipulus & Caroli Magni præceptor *lib. de divinis officiis, cap. de sabbatho sancto Paschatis*; & Gennadius *lib. de Eccles. dogmatibus, cap. 52.* Et longè antè Clemens Romanus *lib. 8. Constitut. cap. 20.* Meminit etiam hujus consuetudinis Cyprianus *serm. de lapsis*, inter referendam historiam puellæ quæ Eucharistiae sacramentum, quòd prius idolothyta comedisset, deglutire non potuit. Augustinus quoque hujus moris non semel mentionem facit. Evagrius similiter refert *lib. 4. Eccles. hist. cap. 35.* puerum Hebræi cum pueris Christianorum scholas frequentantem, cum aliis reliquias Eucharistiae comedisse, & domum

tardiùs revertentem à patre vitriario opifice in  
clibanum ardentem injectum , illæsum tamen  
post triduum repertum inter flammæ fuisse.  
Quod & Nicephorus *lib. 17. cap. 25.* recenset.  
Hujus etiam praxis Concilia Toletan. XI. c. 11.  
& Marisconense *cap. 16.* testes sunt.

Ecclesia tamen Latina hæc duo sacramenta,  
Eucharistiæ potissimum communionem solis  
adultis usu rationis præditis confert, tum ut  
majori cum fructu & ampliori emolumento re-  
cipiantur; tum ut tantorum mysteriorum im-  
mensa dignitas sanctiùs tractetur, & ab infan-  
tibus non satis decorè cibus ille divinus sumat-  
ur. Multos etiam in Actibus Apostolorum le-  
gimus baptizatos, quibus hæc bina Sacramenta  
non impertivisse Apostolos refertur. Illum ta-  
men morem non reprehendit Tridentinum su-  
prà laudatum, quia nimirum primitivis tem-  
poribus, quando minor erat fidelium numerus,  
citò & faciliè incommoda illa, quibus consue-  
tudo hujusmodi, sicut & communio sub utraque  
specie exposita est, præcavebantur.

Cæterum quorundam Schismaticorum hæ-  
reticos imitantium audacia minimè ferenda  
est, qui cum Simeone Thessalonicensi *lib. de  
sacramentis*, Nicolao Cabasila *orac. 1. de vita  
in Christo*, Hieremia Constantinopolitano *in  
secunda sua censura apologia*, Philadelphien-  
si *lib. de Sacram.* Ecclesiæ Romanæ fugillandæ  
gratiâ opinantur Eucharistiæ usum esse me-  
dium ipsis etiam parvulis ad salutem omninò  
necessarium. Quod meritò reprobatur Tridenti-  
num, cùm Baptismus animam parvuli divinâ  
gratiâ exornet, qui per lavacrum regeneratus  
& Christo incorporatus adeptam jam filiorum  
Dei

Dei gratiam in illa ætate amittere non potest. Gratiæ autem, si quis in ea decesserit, vita æterna respondet; quæ quidem gratia semel obtenta uno peccato mortali deperditur.

## R E F L E X I O.

*Desiderio desideravi hoc Pascha manducare vobiscum.* Luc. 22. Si desiderium una & condigna fuit ad hoc sacramentum amoris instituendum præparatio, profectò eadem desideratur ad illud idem suscipiendum dispositio. Justum est planè ut amore recipiamus, quod uno amorè donatum est; & sicut teste Augustino anima Deo plenè serviens beatam vitam, quæ Deo æternum fruatur, sine intermissione desiderat, *augescentisque pietatis indicium est maximum, cum desiderium istud magis ac magis inflammatur*, ut *epist. 121. & in Psalm. 37.* inculcat; sic divinam Eucharistiam, quæ futuram fruitionem præfigurat, ejusque pignus est & primitiæ, vehementer appetere tenetur anima sancta, ut omnium quibus hæc mortalis vita assidue conflictatur ægritudinum levationem ac remedium indidem petat, utque urgente charitate ad Christum realiter præsentem, ut ad unicum in ærumnis consolatorem, unicum in miseris liberatorem, unicum in infirmitate adiutorem, unicum sanctitatis authorem adducatur. Hinc viri Sancti nihil sibi gravius accidere, vel acerbius posse rentur, quam cibo illo, qui votorum suorum summa est, privari. Cum enim Eucharistia summum in hac vita Christiani hominis bonum sit, gravissimam omnium pœnam me-

caveritis, &c. An verò quisquam hoc dicere audebit, quod ad parvulos hac sententia non pertineat, possintque sine participatione corporis hujus & sanguinis in se habere vitam, quia non ait: Qui non manducaverit; sicut de Baptismo: Qui non renatus fuerit; sed ait: Si non manducaveritis, velut eos alloquens qui audire & intelligere poterant, quod utique non valent parvuli? Sed qui hoc dicit non attendit, quia nisi omnes sententia ista teneat, ut sine corpore & sanguine Filii hominis vitam habere non possint, frustra etiam atas major id curat; potest enim (si non voluntatem, sed verba loquentis attendas) eis solis tunc videri dictum, quibus tunc Dominus loquebatur: quia non ait, qui non manducaverit; sed, Si non manducaveritis. Et ubi est quod eodem loco de hac ipsa re ait: Panis quem ego dedero caro mea est pro saculi vita? Secundum hoc enim etiam ad nos pertinere illud sacramentum intelligimus, qui tunc nondum fuimus, quando ista dicebat; quia non possumus dicere ad saculum nos non pertinere, pro cuius vita Christus carnem suam dedit. Quis autem ambigat saculi nomine homines significatos esse, qui nascendo in hoc saculum venimus? Ac etiam pro parvulorum vita caro data est, qua data est pro saculi vita; & si non manducaverint carnem Filii hominis, nec ipsi habere possunt. Idem reperit lib. 1. ad Bonifacium, cap. 22. & lib. 3. contra Julianum, cap. 1. & lib. de prædest. Sanct. cap. 13. & alibi non semel.

Anne propterea Doctor sanctissimus Romanæ Ecclesiæ vestigiis catholicè indivulsèque adhaerens à communibus cæterorum Patrum & universalis Ecclesiæ sensibus recessit? Absit, absur



absurdum est dicere, & cogitare impium & jux-  
tâ ignorantia plenissimum. Quando enim Au-  
gustinus, quando Innocentius, quando Gela-  
sius Eucharistiam ad salutem omnibus etiam  
parvulis necessariam dixerunt, ejusque indis-  
pensabilem necessitatem clarissimis Salvatoris  
verbis confirmarunt, manifestè de Eucharistia  
quoad rem in voto suscipiendam, non de actua-  
li ejusdem esu loquuti sunt. Ita enim sui in-  
terpres mentem suam exposuit Doctor gratiæ  
*lib. 3. de Peccatorum meritis, cap. 4.* his verbis:  
*Quid autem apertius tot tantisque testimoniis di-  
vinorum eloquiorum, quibus dilucidissimè appa-  
ret, nec propter Christi societatem ad vitam sa-  
lutemque æternam posse aliquem injustè damna-  
ri, hoc est ab illa vita ac salute separari? Unde  
fit consequens, ut quoniam nihil tale agitur aliud  
cùm parvuli baptizantur, nisi ut incorporentur  
Ecclesia, id est Christi corpori membrisque socien-  
tur, manifestum sit eos ad damnationem, nisi  
hoc iis collatum fuerit, pertinere. Et postea:  
Nunquid etiam illud, nisi manducaverint homi-  
nes carnem ejus, hoc est participes facti fuerint cor-  
poris ejus, non habebunt vitam? Nonne Veritas  
sine ulla ambiguitate proclamat, non solum in  
regnum Dei non baptizatos parvulos intrare non  
posse, sed nec vitam æternam posse habere, nisi  
Christi corpus, cui ut incorporentur, sacramento Ba-  
ptismatis inducuntur.*

Vides S. Patrem eo modo velle Euchi-  
stiam esse necessariam, quo in Baptismo man-  
ducari potest: manducari autem ait in Baptis-  
mo carnem Christi, quatenus incorporamur  
mystico Christi corpori & membris ejus, id est  
Ecclesiæ. Idem declarat Præful sanctissimus  
*tract.*

*tract. 26. in Joan. ad hæc verba : Qui manducat meam carnem , &c. Qui hanc sumit , inquit , habet vitam , & hanc utique æternam. Hunc itaque cibum & potum societatem vult intelligi corporis & membrorum suorum , sicut rei sacramentum , id est virtutem corporis & sanguinis Christi. Alicubi quotidie , alicubi certis intervallis dierum in dominica mensa præparatur , & de mensa dominica sumitur , quibusdam ad vitam , quibusdam ad exitium : res verò ipsa cujus sacramentum est omni homini ad vitam , nulli ad exitium , quicumque ejus particeps fuerit. Quando ergo dixit Augustinus Eucharistiam esse omnino omnibus ad vitam necessariam , non de sacramento ut sic loquutus est , quod quibusdam ad vitam , quibusdam ad exitium porrigitur ; sed de re sacramenti , quam societatem esse ait corporis & membrorum Ecclesiæ , cui parvuli per Baptismum ascribuntur. Denique sententiâ 341. à S. Prospero ex Augustino excerptâ , sic habet : *Escam vita accipit seu æternitatis pocula bibit qui in Christo manet , & cujus Christus agitator est : nam qui discordat à Christo , nec carnem ejus manducat , nec sanguinem bibit , etiam sitans rei sacramentum ad judicium suæ presumptionis quotidie indifferenter accipiat.* Itaque res & fructus Eucharistiæ , qui est in Christo manere , omnibus est omnino necessarius , nec potest ullus unquam vitam æternam habere , qui eo modo Eucharistiam non comederit.*

S. Augustinum de re sacramenti , non de sacramento actu suscepto loquutum esse , non ex ejus solùm verbis , sed ex Patribus posterioribus ita eum interpretantibus perspicuum est.

Ita

Ita ipsum intellexit S. Fulgentius epistola ad Ferrandum de Baptismo Æthiopis, cap. 11. his verbis : Nullus debet moveri fidelium in illis, qui etsi legitime sanâ mente baptizantur, prave-niente velocius morte carnem Domini mandu-care & sanguinem bibere non sinuntur, propter illam sententiam Salvatoris, quâ dixit : Nisi manducaveritis, &c. Quod quisque non solum secundum veritatis mysteria, sed secundum my-sterii veritatem considerare poterit, in ipso lava-cro sancta regenerationis fieri providebit. Quid enim agitur sacramento sancti Baptismatis, nisi ut credentes membra Domini nostri Jesu Christi fiant, & ad compagem corporis ejus Ecclesiasticâ veritate pertineant ? Quod ubi productis variis sacrarum litterarum testimoniis demonstravit, subjungit : Qui ergo membrum corporis Christi fit, quomodo non accipit quod ipse fit, quando utique illius fit verum corporis membrum, cujus corporis est in sacrificio sacramentum ? Hoc ergo fit ille regeneratione sancti Baptismatis, quod est de sacrificio sumpturus Altaris. Quod etiam sanctos Patres indubitanter credidisse ac docuisse cognoscimus. Beatus quoque Augustinus de hac re sermonem fecit admodum luculentum & aptum adificationi atque instructioni fidelium, quem sermonem totum epistola malui subjicere. Inte-grum sermonem profert Fulgentius, in quo in-ter cætera hæc habentur : Corpus ergo Christi si vis intelligere, Apostolum dicentem audi, dicen-tem, inquam, fidelibus : Vos estis corpus Christi & membra. Si ergo vos estis corpus Christi & mem-bra, mysterium vestrum in mensa Domini posi-tum est : mysterium Domini accipitis. Ad id quod estis, Amen respondetis, & respondendo sub-scribitis.

cribitis. Audi ergo corpus Christi, & respondeas Amen. Esto membrum corporis Christi, ut verum sit Amen. Quare ergo in pane? Nihil hic de nostro afferamus: ipsum Apostolum item audiamus. Cum ergo de isto sacramento loqueretur, ait: Unus panis, unum corpus multi sumus. :: Qui accipit mysterium, & non servat vinculum pacis, non mysterium accipit pro se, sed testimonium contra se. Arbitror sancte Frater (verba sunt Fulgentii sermonem Augustini ponderantis) disputationem nostram praelari Doctoris Augustini sermone firmatam, nec cuiquam esse aliquatenus ambigendum, tunc unumquemque fidelium corporis sanguinisque dominici participem fieri, quando in Baptismate membrum corporis Christi efficitur, nec alienari ab illo panis calicisque consortio, etiamsi antequam panem illum comedat & calicem bibat, de hoc saculo in unitate corporis Christi constitutus abscedat. Sacramenti quippe illius participatione ac beneficio non privatur, quando ipse hoc quod illud sacramentum significat invenitur.

Augustinum eodem modo interpretatus est Lanfrancus epist. 33. his verbis: Credimus generaliter omnes omnibus aetatibus plurimum expedire tam viventes quam morientes dominici corporis & sanguinis perceptione se munire; nec tamen si priusquam corpus & sanguinem Domini sumant contingit baptizatos statim de hoc saculo exire, ullatenus credimus eos (quod Deus avertat) propter hoc in aeternum perire. :: Nam sententia illa quam Dominus in Evangelio dicit, Nisi manducaveritis, &c. quantum ad comestionem oris non potest generaliter dicta esse de omnibus. Plerique enim sanctorum Martyrum ante Baptis-



mum quoque diversis excruciatu prius de corpore  
 migraverunt ; eos tamen in numero Martyrum  
 computat , & salves credit Ecclesia. Infantem  
 quoque non baptizatum , si morte imminente ur-  
 geatur , à fidei laico , si Presbyter desit , posse bap-  
 tizari Canones precipiunt ; nec eum tamen , si sta-  
 tim moriatur , à consortio fidelium sejungunt. Ne-  
 cesse est ergo prædictam Domini sententiam sic in-  
 telligi , quatenus unusquisque divini mysterii per  
 intelligentiam capax carnem Christi & sangui-  
 nem non solum ore corporis , sed etiam amore &  
 suavitate cordis comedat & bibat, videlicet aman-  
 do, & in conscientia pura dulce habendo quod pro  
 salute nostra Christus carnem assumpsit , pependit,  
 resurrexit, ascendit, & imitando vestigia ejus, &  
 communicando passionibus ipsius , quatenus huma-  
 na infirmitas patitur , & divina ei gratia largiri  
 dignatur. Hoc est enim verè & salubriter carnem  
 Christi comedere, & sanguinem ejus bibere. Quam  
 sententiam in libro de doctrina Christiana B.  
 Augustinus exponens , sic ait : Facinus vel flagi-  
 tium jubere videtur ; figura verò est precipiens pas-  
 sioni Dominica communicandum esse , & suaviter  
 atque utiliter in memoria recondendum , quod  
 pro nobis caro ejus vulnerata & crucifixa sit. Fi-  
 guram vocat figuratam loquutionem : neque enim  
 negat veritatem carnis & sanguinis Christi ( quod  
 plerisque schismaticis visum est , & adhuc non  
 cessat videri. ) Et Dominus in Evangelio : Qui  
 manducat carnem meam , & bibit meum sangui-  
 nem , in me manet , & ego in eo. Quod exponens B.  
 Augustinus ait : Hoc est namque carnem Christi  
 & sanguinem salubriter comedere & bibere , in  
 Christo manere, & Christum in se manentem ha-  
 bere. Nam & Iudas qui Dominum tradidit , cum

mate includitur. Id ipsum ex eo etiam evidentissime claret, quod Augustinus *lib. 1. de peccatorum meritis* docet Baptismum infantibus sufficere ad Salutem: *Parvulus*, inquit, *si percepto Baptismo de hac vita migraverit soluto reatu cui erat originaliter obnoxius, perficietur in illo lumine veritatis, quod incommentabiliter manens, in aeternum justificatos praesentia veritatis illuminat.* Quod & *cap. 21. & 22.* repetit, necnon *lib. 2. cap. 28.* Videatur etiam Bernardus *lib. de diligendo Deo, cap. 4.*

In fine hujus speculationis nonnulla advertere operepretium visum est circa Communionem parvulorum. Sciendum igitur, non solum Ecclesiam Græcam pueris & infantibus sacram Communionem porrigere, sed morem illum fuisse antiquitus non modò in Oriente, sed in Occidente etiam usurpatum. Hinc olim sacramenta Baptismatis, Confirmationis, & Eucharistiae non interrupta celebratione conferebantur. Cujus ritus meminit Alcuinus Venerabilis Bedæ discipulus & Caroli Magni præceptor *lib. de divinis officiis, cap. de sabbatho sancto Paschatis*; & Genadius *lib. de Eccles. dogmatibus, cap. 52.* Et longè antè Clemens Romanus *lib. 8. Constitut. cap. 20.* Meminit etiam hujus consuetudinis Cyprianus *serm. de lapsis*, inter referendam historiam puellæ quæ Eucharistiae sacramentum, quòd prius idolothyta comedisset, deglutire non potuit. Augustinus quoque hujus moris non semel mentionem facit. Evagrius similiter refert *lib. 4. Eccles. hist. cap. 35.* puerum Hebræi cum pueris Christianorum scholas frequentantem, cum aliis reliquias Eucharistiae comedisse, & domum



tardiùs revertentem à patre vitriario opifice in  
 clibanum ardentem injectum , illàsum tamen  
 post triduum repertum inter flammam fuisse.  
 Quod & Nicephorus *lib. 17. cap. 25.* recenset.  
 Hujus etiam praxis Concilia Toletan. XI. *c. 11.*  
 & Matisconense *cap. 16.* testes sunt.

Ecclesia tamen Latina hæc duo sacramenta,  
 Eucharistiæ potissimùm communionem solis  
 adultis usu rationis præditis confert , tum ut  
 majori cum fructu & ampliori emolumento re-  
 cipiantur ; tum ut tantòrum mysteriorum im-  
 mensa dignitas sanctiùs tractetur , & ab infan-  
 tibus non satis decorè cibus ille divinus suma-  
 tur. Multos etiam in Actibus Apostolorum le-  
 gimus baptizatos , quibus hæc bina Sacramenta  
 non impertivisse Apostolos refertur. Illum ta-  
 men morem non reprehendit Tridentinum su-  
 præ laudatum , quia nimirum primitivis tem-  
 poribus , quando minor erat fidelium numerus ,  
 citò & facilè incommoda illa , quibus consue-  
 tudo hujusmodi, sicut & communio sub utraque  
 specie exposita est , præcavebantur.

Cæterum quorundam Schismaticorum hæ-  
 reticos imitantium audacia minimè ferenda  
 est , qui cum Simeone Thessalonicensi *lib. de*  
*sacramentis* , Nicolao Cabasila *orat. 1. de vita*  
*in Christo* , Hieremia Constantinopolitano *in*  
*secunda sua censura apologia* , Philadelphien-  
 si *lib. de Sacram.* Ecclesiæ Romanæ sugillandæ  
 gratiâ opinantur Eucharistiæ usum esse me-  
 dium ipsis etiam parvulis ad salutem omninò  
 necessarium. Quod meritò reprobatur Tridenti-  
 num , cùm Baptismus animam parvuli divinâ  
 gratiâ exornet , qui per lavacrum regeneratus  
 & Christo incorporatus adeptam jam filiorum

Dei

Dei gratiam in illa ætate amittere non potest. Gratiæ autem, si quis in ea decesserit, vita æterna respondet; quæ quidem gratia semel obtenta uno peccato mortali deperditur.

## R E F L E X I O.

*Desiderio desideravi hoc Pascha manducare vobiscum.* Luc. 22. Si desiderium una & condigna fuit ad hoc sacramentum amoris instituendum præparatio, profectò eadem desideratur ad illud idem suscipiendum dispositio. Justum est planè ut amore recipiamus, quod uno amore donatum est; & sicut teste Augustino anima Deo plenè serviens beatam vitam, quæ Deo æternum fruatur, sine intermissione desiderat, *augescitque pietatis indicium est maximum, cum desiderium istud magis ac magis inflammatur*, ut *epist. 121.* & in *Psalm. 37.* inculcat; sic divinam Eucharistiam, quæ futuram fruitionem præfigurat, ejusque pignus est & primitiæ, vehementer appetere tenetur anima sancta, ut omnium quibus hæc mortalis vita assidue conflictatur ægritudinum levationem ac remedium indidem petat, utque urgente charitate ad Christum realiter præseantem, ut ad unicum in ærumnis consolatorem, unicum in miseris liberatorem, unicum in infirmitate adiutorem, unicum sanctitatis authorem adducatur. Hinc viri Sancti nihil sibi gravius accidere, vel acerbius posse rentur, quàm cibo illo, qui votorum suorum summa est, privari. Cum enim Eucharistia summum in hac vita Christiani hominis bonum sit, gravissimam omnium pœnam me-



ritò judicant divinorum mysteriorum participatione carere : gravior enim , aut levior pœna est , quo majus vel minus bonum est quo privantur , quòve magis vel minùs boni illius præstantiam percipimus . Quemadmodum ergo desiderat cervus ad fontes aquarum , ita desideret ad Christum anima nostra , ut hoc puro desiderio veluti sacro igne divinissimum illum cibum concoquere sufficiat , ejus alioquin exuberantiâ obruenda potius quàm fovenda & roboranda .

Etenim ut rectè observat S. Franciscus Salesius lib. 2. epistolarum , epist. 48. *Cibi appetentiâ duplex est ; altera quæ probâ & legitimâ concoctione ; alterâ quæ attrahentis virtutis stomachi depravatione gignitur.* Adest interdum adumbrata hujus cibi fames , eaque se accendi imaginantur infirmissimæ virtutis viri , & sapius mulierculæ , quorum , vel quarum tepida vita , negligens conversatio , terrenus affectus sæcularibus implicatus , incuriosum abstergendarum culparum studium desiderium illud fallax & suspectum esse convincunt . Cùm enim hujusmodi desiderantes nulla vel levis mandatorum Evangelicorum observandorum cura tangat , nihil ex cœlestis alimenti usu virium vel firmitatis trahant , neque cœlesti illo pane pasti vegetentur & spiritûs pinguedine saginentur , procul dubio desideria illa fallacia suspicionem habent , nec Sancti Spiritus , sed amoris proprii calori ascribuntur .

Nihil sanctius , nihil laudabilius , nihil justius sacræ communionis desiderio ; nihil ejus usu , si rectè atque ordine fit , utilius & fructuosius in vita Christiana esse potest . Sed illos vero & sufficienti

sufficienti desiderio flagrare nunquam crediderint, qui nihil de vitæ integritate, morum innocentia, bonorum operum cultu, sæcularium maximarum abiectione, firma in pietate christiana constantia, arctiore cum Deo unione, atque perfectionis progressu solliciti, eo tamen tenentur errore, ut se probè communione defungi arbitrentur, si in superficie mentis quædam ejus cibi desideria sentiant, & brevem ac fluxum devotionis sensum capiant, qui nihil veri fructus & incrementi virtutis asserat, & nihilo amplius ex Eucharistia assequatur, quàm si ad illam omninò hujusmodi desidiosi non accessissent. Verum hujus cibi efficaxque desiderium vitam omninò infert cœlesti pabulo dignam, iis solis divinitus comparato, qui in cupiditatibus expugnandis, domandoque animo acriter & studiosè laborant. Ad hunc enim spiritalem panem non minus quàm ad materialem, ut benè dixit Joannes Avila 1. parte, *epist. 66.* referendum est illud Apostoli: *Qui non vult operari, non manducet; ne scilicet panem gratis comedat.* Cuinam verò sine labore ac dimicatione pane hoc sanctissimo animam pascere concessum est?

Reminiscere, Lector, quod nisi vita tua cum Evangelii forma congruat, periculosè divinis altaribus admoveris. Quia si Patres uti tenemur audiamus, indubium est eum qui frequenter cœlesti cibo reficitur, charitatis eum incensum esse ardore oportere, non secus atque illum qui crebrius alimenta adhibet, nativo calore abundare necessum est: unde sicut solidorum ac succulentorum alimentorum copia agris non officere corporibus non potest; ita infir-

miori ac debiliore animo discrimen imminet, si tam crebro divinissimo illo pane vescatur. *Illi*, inquit Hieronymus in caput 9. Zachariæ, *hunc panem comedunt* ( ut oportet ) *qui in Christo robusti sunt*, & ad quos Ioannes Evangelista loquitur : *Scribo vobis, juvenes, quia sermo Dei in vos manet, & fortes estis, & vicistis malignum.* Non fert summa, quam Christo debemus veneratio, ut ejus benignitate properatis frequentibusque communionibus abutamur, antequam familiari tanti hospitis consuetudine dignos nos vitæ ac morum sanctitate præbuerimus; eaque est tremendi mysterii dignitas atque præstantia, ut ab illo interdum etiam Sacerdotes reverentiæ causâ digredi expediat, tum ne dum hoc sacramento familiarius utuntur, debita ei observantia & reverentia minuat: tum ut certo tempore jejuniis, orationibus, aliisque pœnitentiæ & pietatis officiis impenso, dilatione illa puriores, paratiores, & appetentiores ad cœlestem mensam accedant. Hinc præclare ab Hieronymo in cap. 5. *Iona*, dictum est : *Ipsam quoque Dominum verum Iona missum ad prædicationem mundi jejunasse quadraginta dies, & hereditate nobis jejunii derelicta, ad esum corporis sui sub hoc numero nostras animas preparasse.*

Concors est Catholicorum omnium Doctorum vox, eum qui frequenter communionem pasci velit, eximio quodam pietatis motu efferri oportere; teneri illum non solum grandes grandium peccatorum fœditates pœnitentiæ lacrymis diluere, sed etiam divellere pro virili animum affectumque à venialibus, eorum quavis occasione accuratè abjecta: quia cavillationibus



bus & suffugiis minimè unquam fiet, quin hic sit communis Christianæ pietatis sensus, frequentem communionis usum, & multò minùs quotidianum non nisi sanctioribus animis, gratiæ muneribus, Christi que amore plenis concedi oportere. Hoc verò in animum inducere suum quis possit, homines illos veris lacrymis peccata diluere, sincero affectu animum à venialibus divellere, Christi que dilectione abundare, qui de divinis vix cogitant, quorum pietas elanguit; qui sui amore rumentes & tenacissimi huic sæculo vinculis astricti, omnibus conflictantur animi morbis, omnibus ferè passionibus famulantur, veris & à Spiritu Sancto inseminatis sacre Communionis desideriiis flagrare? Itane mulieres illæ, quas vulgus Devotas dicitur, quarum unum in hac vita negotium est crines componere, vultum immutato Creatoris opere sibi pigmentis refingere, in publicis deambulationum curriculis, saltantium comœdorumque choris, ac ludantium confessibus frequentandis dies conterere, & vigiliis producere, in multam diem & provectionem solem stertere, in altam noctem epulari & ludere, usuque præpostero noctes in dies, & vicissim commutare; illæ, inquam, mulieres circumornatæ ut similitudo templi, odorariis pulveribus insperse, unguentis oblitæ, perfusis moschis imbatæ, nigrarum macularum distinctione vermiculatæ satini ad Communionem quoties libuerit frequentandam paratæ, satini instructæ ut Sanctuarii cœlestis adyta ingredi toties audeant, quia molle aliquod in extrema mentis superficie desiderium expertæ sunt? Ad eam abjectè sentienus de virtutibus antea



quas frequens cum Christo consuetudo postulat, ut omnes sine ullo discrimine ad tremendum altare ipsis Angelis formidandum immitteremus? Adeone neminem vel imbecillum vel pravam reperiri censebimus, quin Communionis octavo quoque die usurpandæ frequentiæ dignus habendus sit, postquam Sancti usum illum præstantissimæ virtutis præmium & mercedem esse constituerunt?

Bonum ergo est atque laudabile ardentibus in Eucharistiam desideriis à charitate profectis æstuarè: bonum etiam est Sacerdotem vitam sanctam agentem frequenter celebrare, quia ut Venerabilis Beda dixit: *Sacerdos non legitime impeditus celebrare omittens, quantum in eo est, privat Sanctam Trinitatem laude & gloria, Angelos lætitia, peccatores veniam, iustos subsidio & gratia, in Purgatorio existentes refrigerio, Ecclesiam spirituali Christi beneficio, & seipsum medicinâ & remedio.* Sed bonum etiam est & Communionem & sacrificium interdum omitti; tum ut ejus desideria eo intervallo accendantur; tum ut lacrymis aliisque pœnitentiæ operibus, atque propriæ indignitatis confessione cum amplius advocemus, qui à solis humilibus honoratur, tum ut Centurionis & Chananæ partes suscipientes, cum illo clamemus, *Domine non sum dignus ut intres sub tectum meum; cum ista verò profiteamur, Etiam Domine indigna sum qua filiorum pane reficiar.* Canis utique sum; sed si canes integro pane non fruuntur, micas certè è mensa Domini defluentes accipiunt. Ita suavissime Domine, qui totus es desiderabilis, si minùs sacrosanctum tuum corpus, gratiæ saltem stillas, quas in eos qui ad ipsum amore se applicant effundit,

effundit, supplex postulo. Hinc S. Franciscus Salesius lib. 2. epist. 52. præstantem virtute matronam sic alloquitur: *Iam tibi tua mentis cura seriò habenda est, ut pro tot tamque ardentibus votis tuis puriorem eam in dies ac firmiorem efficias. Nec abs re censeo tantisper sacra communione privari, si fortè ipsum Eucharistia desiderium majorem etiam vita emendanda curam tibi ac diligentiam allaturum sit.*

## SPECVLATIO II.

*Eucharistia est sacramentum corporis & sanguinis Christi sub speciebus panis & vini realiter contentum, ad spiritalem animæ refecctionem institutum: quod licet duplici elemento, pane scilicet & vino constet, non plura tamen, sed unicum est sacramentum.*

**P**Rior speculationis pars tradit Eucharistiæ essentiam & definitionem id quod est commune & genericum explicantem. dum ait Eucharistiam esse signum, seu sensibile aliquod symbolum, quod omnibus & singulis convenit Sacramentis; illud autem sensibile sunt species panis & vini continentes corpus & sanguinem Christi, quas dum digni comedimus, divini gra-

324 *Lib. XI. Pars II. Dissert. II. Cap. I.*

tiâ pascimur & reficimur : unde habetur hujus sacramenti differentia. Per Baptismi enim gratiam in Christo nascimur , per Confirmationem novâ in Christo nata creatura augetur , per Eucharistiam novus homo pascitur & in vita spiritali perficitur. Nam ut benè ait S. Thomas *quest. 73. art. 1. ad 1.* alia est perfectio quam confert Confirmatio , alia quæ Eucharistiâ obtinetur : in homine namque una est perfectio , ad quam pervenitur per augmentum , & talis perfectio competit Confirmationi : alia autem est perfectio , quam homo consequitur ex admixtione alicujus extrinseci hominem conservantis , putà ex admixtione cibi , vel alicujus ejusmodi ; & talis perfectio competit Eucharistiæ , quæ est spiritalis refectio.

Sed difficultas est , pro quo essentialiter supponat Sacramentum Eucharistiæ , ut sacramentum est. Communior Thomistarum sententia est , hoc sacramentum essentialiter supponere pro solis speciebus consecratis corpus & sanguinem Christi realiter continentibus , ita ut species illæ sint tota hujus sacramenti essentia vel natura , nec ejus constitutionem essentialem ingrediatur corpus Christi , uti Suarez , Vasques , Sylvius , & alii opinantur. Nam in Concilio Tridentino *sess. 13. can. 1.* dicitur corpus & sanguinem Christi in Eucharistiæ sacramento contineri. Censet ergo sancta Synodus , non corpus Christi , sed species sub quibus realiter continetur , esse totum Eucharistiæ sacramentum. Eandem sententiam tradit Catechismus Romanus *part. 2. titulo de Eucharistia , numer. 8.* his verbis : *Diligenter observandum est, multa in hoc mysterio esse , quibus aliquando*  
*sacramen*



sacramenti, nomen sacri Scriptores tribuerunt. Interdum enim & consecratio, & perceptio, frequenter verò & ipsum Domini corpus & sanguis qui in Eucharistia continetur, sacramentum vocari consuevit. Inquit enim S. Augustinus sacramentum hoc duobus constare, visibili scilicet elementorum specie, & invisibili carne & sanguine ipsius Domini nostri Iesu Christi. Atque ad hunc modum sacramentum hoc adorandum esse, nimirum corpus & sanguinem Domini intelligentes affirmamus. Verùm hæc omnia minis propriè sacramentum dici perspicuum est. Ipsa autem panis & vini species veram & absolutam hujus nominis rationem habent. Quæ verba apertissima sunt. Hinc sæpissimè à Patribus Eucharistia sacramentum corporis Christi appellatur, quod utique corpori Christi non convenit. Hinc Theologi vulgò cum S. Thoma quest. 73. art. 1. ad 3. & articulo 6. post Innocentium III. cap. cum Martha, de celebratione Missarum, distinguunt tria in Eucharistia, sacramentum tantum, rem sacramenti tantum, sacramentum & rem sacramenti simul: per sacramentum tantum sensibiles species intelligentes; per rem tantum sacramenti, gratiam animum pascentem & spiritaliter saginantem; per rem & sacramentum simul corpus Christi quod per species significatur; & corpus Christi mysticum, sive gratiam, qua viva Ecclesiæ membra cum inter se, tum cum Christo capite adunantur, significat. Sicut ergo Baptismus non constat essentialiter ablutione & charactere, qui est res & sacramentum simul; sed in sola aquæ elementaris ablutione sub præscripta verborum forma situs est: sic Eucharistia non in specie-

bus



bus & corpore Christi ex æquo, sed in solis speciebus consecratis, corpus tamen Christi realiter præsens connotantibus consistit. Hac etiam nostrâ sententiâ difficiliora Novatorum adversus realem Christi præsentiam è Patribus deprompta argumenta facillimè confringuntur & in fumum abeunt. Cùm enim Patres Eucharistiam dicunt esse sacramentum, symbolum, & signum corporis Christi, non propterea corpus Christi excludunt, ut nostrates hæretici mentiuntur, sed de Eucharistia formaliter & in ratione sacramenti loquuntur, scilicet de speciebus sensibilibus, quæ sunt signum & figura corporis Christi, illud tametsi realiter includant.

Rationem verò hujus sententiæ aliqui ex eo derivant, quod omnia sacramenta secundùm se tota, & secundùm omnes suas partes intrinsecas sunt quædam instrumenta Dei separata: at corpus & sanguinis Christi non sunt instrumenta separata, sed conjuncta divinitati: ergo nec sacramentum Eucharistiæ sunt, nec pars ejus intrinseca. Verùm enim verò frigida admodum & imbecilla ratio illa videtur. Voluntariè namque asseritur, omne sacramentum esse instrumentum separatum; licèt enim id in sacramentis, in quibus Christus realiter non continetur, verum probetur, quomodo id sacramento, cui Christus realiter adest, non conveniat, probandum superest.

Vera ergo ratio à sacro Concilio Tridentino laudato indicatur, & hujusmodi est: Sacramentum quia sacramentum est essentialiter symbolum rei sacræ & invisibilis, gratiæ visibilis & sensibilis forma. Atqui hæc omnium calculo probata

probata sacramenti definitio solis speciebus, minimè verò corpori & sanguini Christi realiter sub eis contentis convenit. Species namque significant gratiam animam cibantem, eamque instrumentaliter causant; significant etiam realiter præsens, invisibile tamen Christi corpus quo pascimur, cuive unimur; non tamen illud causant: non enim omne quod significant sacramenta efficiunt, cum omnia Redemptoris passionis, quam utique non efficiunt, signa sint. Ergo tota hujus sacramenti essentia in speciebus Eucharisticis sita est.

Dices: Licet corpus Christi non sit sensibile per se, est tamen sensibile ratione specierum: sufficit autem ad rationem partis essentialis sacramenti, quod sit sensibilis per aliud; nam contritio est pars essentialis sacramenti pœnitentiæ, & tamen non est sensibilis ratione sui, sed tantum ratione confessionis. Ergo ratione factâ non efficaciter probamus corpus Christi non esse partem essentialem sacramenti Eucharistiæ.

Respondeo, quod cum corpus Christi subsensus non cadat, sed omnium aciem fugiat, solæque species sensibus percipiuntur, hinc sit corpus Christi non esse signum & sacramentum ratione sui, sed unarum duntaxat ratione specierum. Nec est simile de contritione, quæ licet non sit sensibilis sacerdoti ratione sui, sed tantum ratione confessionis rei; est tamen ipsi reo pœnitenti sensibilis, cum eam actu percipiat, actu experiatur. Sufficit verò ad sacramenti rationem, illius præsertim cujus materia sunt actus pœnitentis, ut id quod dicitur pars sacramenti, sit alicui sensibile. Sacramentum  
verò



verò cujus materia exterius exhibetur, merè sensibilem habere materiam oportet, ut patet discurrenti per singula sacramenta.

Instabis : Sacramentum Eucharistiæ est id quod à Christo institutum est ad fideles per modum cibi & potus reficiendos ; hic enim est perpetuus Patrum & Conciliorum loquendi modus : sed cibus ille non species Eucharistiæ, sed caro Christi est sub speciebus latens ; scriptum est enim : *Caro mea verè est cibus, & sanguis meus verè est potus.* Ergo sacramentum Eucharistiæ non solum pro speciebus consecratis, sed etiam pro corpore & sanguine Christi supponit. Unde Patres docent, hoc sacramentum constare ex duabus rebus, terrenâ & cœlesti, ex visibili specie & invisibili carne.

Respondeo Patres Sacramentum Eucharistiæ accipere pro omnibus quæ in illo inveniuntur, non verò pro eo quod præcisam constituit sacramenti rationem, quia continens pro contento, & vice versa communi modo loquendi usurpatur. Cum enim à præcisionibus metaphysicis Patres abstraherent, non erant solliciti tria illa distinguere, quæ in quolibet sacramento Theologi discernunt, sacramentum tantum, rem tantum, sacramentum & rem simul ; quorum primum solis speciebus, secundum gratiæ sacramentali, tertium corpori & sanguini Christi convenire fatendum est, omnia sus deque ne misceamus. Fateor tamen in communi loquendi usu sacramentum pro corpore Christi sub speciebus contento accipi, ut cum dicimus : *Laudetur sanctissimum Sacramentum : Tantum sacramentum veneremur cernui.* Quia de illo loqui solenne est secundum omnia quæ involvit.

vit. Quia etiam licet corpus Christi non constituat directe ipsum sacramentum, est tamen res significata & contenta in ipso, quo pascimur & nutrimur; unde sacramentum Eucharistiæ est cibus animæ, tum ratione gratiæ ad quam producendam vehitur; tum quia realiter continet vivificam Christi carnem, quæ se manducantibus dat spiritus pinguedinem. Hac etiam de causa Sacramentum Eucharistiæ adoratur ratione Salvatoris in eo contenti. Sed de his magis speculatione sequenti.

Urgebis: Omne sacramentum novæ legis constat rebus & verbis; rebus ut materia; verbis ut forma, ut docet Concilium Flørentinum alibi relatum. Ergo solæ species Eucharistiæ etiam ut connotantes & continentes corpus Christi, non sunt adæquata sacramenti Eucharistiæ essentia, quæ etiam verbis consecrationis intrinsecè constat. Et sanè sicut in aliis sacramentis verba materiam ad significandam gratiam determinant; ita species Eucharistiæ non sunt gratiæ significativæ, nisi quatenus verbis consecrationis determinantur.

Respondeo propter hoc argumentum Cardinalem Delugo aliosvè quosdam recentiores existimare verba consecrationis, quibus panis & vinum in corpus & sanguinem Christi convertuntur, ad essentialem hujus sacramenti constitutionem pertinere. Verùm cum hoc sacramentum habeat esse permanens, non successivum; forma verò seu verba consecrationis se habeant per modum alicujus transeuntis effectivè conficientis hoc sacramentum, quanvis verba illa necessario desiderentur ut fiat sacramentum, non tamen ipsius sacramenti Eucharistiæ



330 *Lib. XI. Pars II. Dissert. II. Cap. I.*  
ristiæ constitutionem intrinsecè ingrediuntur,  
nec tam informant quàm efficiunt hoc sacra-  
mentum habens esse ratum & permanens. Non  
enim ea tantùm ratione aliquid dicitur forma  
sacramentalis, quòd semper informet, sed quia  
materiam de se indifferentem determinat, con-  
secrat, & sanctificat. Quare sicut licèt ad Con-  
firmationem omninò requiratur chrisma con-  
secratum, & ad Extremam Unctionem oleum  
ab Episcopo benedictum; ipsa tamen chrisma-  
tis consecratio, vel olei benedictio non sunt in-  
trinseca hujusmodi sacramentorum pars; ita  
verba consecrationis Eucharistiæ omninò qui-  
dem desiderantur, ut perficiatur sacramentum,  
ipsum tamen intrinsecè non constituunt, sed so-  
læ species sacramentales, verba tamen illa con-  
notantes & essentialiter supponentes. Ex qui-  
bus intelligitur doctrina Concilii Florentini  
aientis omnia novæ legis sacramenta perfici re-  
bus ut materia, verbis ut forma; forma, in-  
quam, intrinseca respectu sacramentorum in usu  
positorum, extrinseca verò & effectiva respectu  
sacramenti permanentis, quale est Eucharistia,  
ut magis postea patebit.

### *Unitas sacramenti Eucharistia.*

Posterior pars ad explicandam hujus sacra-  
menti unitatem posita est. Et illius ratio est,  
quia cùm sacramentum sit signum, illa omnia,  
tametsi varia sint, unicum sacramentum effi-  
ciunt, quæ unum integrum sacramenti effe-  
ctum, eundem finem, idem & objectum signi-  
fificant. Atqui nisi species panis & vini simul  
jungantur, non potest significari integer hujus  
sacra

sacramenti effectus, finis, & objectum: etenim hoc sacramentum & passionem Christi, & spiritualem animæ refectionem, & corporis mystici, quod est Ecclesia, unitatem in futura vita consummandam significat; quia ut canit Ecclesia, in hoc sacro convivio, in quo Christus sumitur, recolitur memoria passionis ejus, mens impletur gratiâ, futuræ gloriæ nobis pignus datur, atque unitatis & pacis dona sub oblatiis muneribus designantur. Illa autem omnia non repræsentat sola species panis, nec sola species vini; quia in passione fuit & corporis mactatio, & sanguinis fusio: in convivio etiam fames cibo, sitis potu sedantur. Unitas etiam Ecclesiæ eodem convictu significatur, in quo idem cibus idemque potus omnibus peræquè sine ulla personarum acceptione ministratur. Ergo hoc sacramentum formaliter & completivè ex utraque specie integratur, sicut totum artificiale, putà domus, ex suis partibus componitur. Ergo hoc sacramentum unum est: sicut Extremaunctio, tametsi pluribus unctionibus, pluribusque formis partialibus constet, unicum tamen sacramentum est, quia illa omnia quibus constat, ad eundem finem, ad eundemque effectum, ad reliquias nimirum peccatorum è sensibus profectas, & languentis animum deprimentes persanandas referuntur.

Et certè sicut cibus & potio, tametsi duæ res diversæ sint, quia tamen in unum finem instituta sunt & ad unam corporis viriumque refectionem adhibentur, unicum convivium integrant tamen: ita bina sacramenti Eucharistiæ species, quæ unum spiritualem cibum animos sustinentem & recreantem significant, unicum quoque

quoque efficere sacramentum fatendum est, ut ait Catechismus citatus num. 10. *Licet desint elementa, panis scilicet & vinum, ex quibus integrum Eucharistia sacramentum conficitur; non tamen plura sacramenta, sed unum tantum esse Ecclesia autoritate docti confitemur.* Ecclesie, inquit, autoritate, quæ ex communi Patrum & Conciliorum loquendi modo colligitur, juxta quem septem tantum sacramenta agnoscimus, & Eucharistiam esse unum è septem confitemur.

Dices: Tridentinum *sess. 21. can. 3.* definit, sub una specie totum atque integrum Christum, verumque Eucharistia sacramentum suscipi. Ergo si in qualibet specie verum sacramentum est, in duplici duplex est. Et ratio est; tum quia quælibet species seorsim sumpta est signum practicum gratiæ, non solum quia totum Christum omnis gratiæ fontem continet, sed etiam quia laici una specie pasti totam sacramenti gratiam recipiunt. At quoties multiplicatur signum, quæ est ratio generica, multiplicatur etiam sacramentum, quæ est ratio specifica: ergo in duplici specie sacramentum duplicatur. Tum quia in hoc sacramento duæ materiæ, duæque formæ nullam inter sese conjunctionem habentes inveniuntur, cum una species independentem ab alia conficiatur, independentem ab alia conservetur. Ergo duo sunt in duplici specie sacramenta.

Respondeo, quod cum ratio essentialis sacramenti Eucharistia in eo sita sit, ut spiritalem animæ refectionem significet & efficiat; cumque ad eam significandam & efficiendam utraque species ordinetur, consequens est ex  
utra

utraque specie non nisi unum constare sacramentum. Quod autem Tridentinum ait, sub qualibet specie verum suscipi sacramentum, indubitatum est; at nusquam dixit sacra Synodus in qualibet specie esse totale & adæquatum Eucharistiæ sacramentum, sicut anima rationalis vera est, sed non completa substantia.

Ad rationes subjunctas eadem distinctione respondetur, quamlibet speciem esse practicum gratiæ signum, sed duntaxat inadæquatum; unde licet in qualibet specie totus Christus contineatur, tota etiam sacramenti gratia cordi rectè disposito per quamlibet speciem conferatur; totalitas tamen significationis in qualibet specie non invenitur, cum Eucharistia perfectam refectionem spiritalem per modum convivii cibum & potum peræque includentis essentialiter significet. Unde etiam secundæ rationi fit satis; quia in duplici specie non est duplex materia completa, sed duntaxat inadæquata in ratione significandi, quæve unitur non per modum actus & potentiæ, nec per modum continui physici, sed nexu quodam morali simili illi, quo domus in eadem civitate, milites in eodem exercitu, homines in eadem republica, partiales in eodem Extremæ-unctionis sacramento unctiones copulantur. An autem laici unica tantum specie panis resecti minorem accipiant gratiam, inferius, cum de communione sub utraque specie agetur, explicabitur, ex quibus palam erit hoc sacramentum multa quidem esse materialiter ob signorum partialium distinctionem; esse tamen unum simpliciter, formaliter, & perfectivè. Unum namque dicitur non solum quod indivisibile est,  
vel



vel continuum, sed etiam quod perfectum est. Illud porò in perfectione unum est, quod omnia habet ad suam perfectionem concurrentia; sicut homo ex omnibus membris ad operationem animæ desideratis, domus ex omnibus partibus ad inhabitandum desideratis integratur.

Relinquitur igitur hoc sacramentum specificè quidem unum solo numero multiplicari posse. Nam unum numero sacramentum est quod semel sumitur ab uno, etiamsi plures hostias consecratas accipiat; plura verò sunt numero sacramenta, vel quando unus pluries reficitur, vel quando Eucharistia à pluribus sumitur, etsi illis unica hostia plures in particulas divisa ministraretur.

Et ratio est, quia cùm hoc sacramentum ad spiritalem animi fidelis refectionem referatur, de illo eodem proportionali modo ac de convivio discurrendum est: unde sicut convivium instructum & paratum in actu primo unum est, in actu tamen secundo per plures refectiones numero multiplicatur; tot enim sunt numero refectiones, quot refectiones. Ita quando Sacerdos plures hostias per modum unius consecrationis in eodem altari vel sacrario ponit, unum in actu primo sacramentum & convivium spiritale parat, quod dum à variis sumitur in actu secundo numericè multiplicatur. Nam divisione numerali multitudo crescit, ut patet in aqua plures in portiones distributa. Unde sicut unitas specifica Eucharistiæ ab una specie refectione desumitur; ita ejusdem unitas numerica ex eo quod ad unam numero refectionem referatur

tur petenda est. Fateor equidem maiorem esse in hoc sacramento etiam numero multiplicato, quàm in cæteris unitatem, tum propter ejusdem Christi sub omnibus & singulis speciebus existentis, & jugiter oblatis unitatem; tum propter unitatem sacrificii crucis, in cujus commemorationem institutum est. Quia tamen plures in Eucharistia refectiões percipiuntur, & pluribus materiis formisque frequentatis cœlestis Christi cibus ministratur, plura etiam esse numero Eucharistiæ sacramenta inficiandum non est; quanvis in contrariam sententiam Soto & Suares inclinent.

# REFLEXIO.

Si Eucharistia in duplici specie unum sacramentum est, seu ut loquitur D. Thomas art. 2. *Est multa materialiter, sed unum formaliter & perfectivè*; si hoc sacramentum sit vinculum pacis, mysterium unitatis, centrum religionis, denique communio seu communis unio, atque Christianorum gordius nexus: vide, Lector, atque à temetipso seriò sciscitare, num pacem cum Deo, num cum proximo habeas? Ideo post institutam divinissimam Eucharistiam, quæ sacramentum unitatis est, hanc fidelium concordiam amantissimus Redemptor tam enixè, tam suaviter à Patre postulabat. *Pater sancte* (verba sunt æternæ Vitæ, Joan. 17.) *serva eos in nomine tuo quos dedisti mihi, ut sint unum, sicut & nos. Et pro eis ego sanctifico meipsum, ut sint & ipsi sanctificati in veritate, ut omnes unum sint, sicut tu Pater in me, & ego in te; ut & ipsi in nobis unum sint, sicut & nos unum sumus.*

*sumus. Ego in eis, & tu in me, ut sint consummati in unum.* Quia nimirum hic unus, vel cerè præcipuus est instituendæ Eucharistiæ fructus Christianorum charitate conjunctorum nexus. Posuit enim fines suos pacem, qui nos erat adipe frumenti divini satiaturus.

Recordare, mi Lector, ipsum hujus sacramenti authorem Christum pacem, fratrumque concordiam sacro sui ipsius usui, suo subindeque honori quadantenus prætulisse, dum *Matth. 5.* præcepit: *Si offers munus tuum ad Altare, & ibi recordatus fueris quod frater tuus habet aliquid aduersum te, relinque ibi munus tuum ante altare, & vade prius reconciliari fratri tuo, & tunc veniens offeres munus tuum.* Quàm amanda, quàm fovenda, quàm utilis, quàm felix pacis mutuxque dilectionis concordia, sine qua nec ipsum altaris sacrificium acceptum esse ullatenus potest! Inquire ergo pacem & persequere eam: quæ ut sæpe inculcat Augustinus, serenitas mentis est, tranquillitas animi, congregationis anima, animæ beatitas, amoris vinculum, consortium charitatis. Hæc simul tates tollit, bella compescit, iras comprimit, superbos frangit, humiles solatur, discordes sedat, inimicos conciliat, cunctis placida, nullis amara, quia extolli nescit, horret inflari. Hanc si acceperis, tene; si perdidideris, repete; si amiseris, exquire. Quia tale bonum est bonum pacis, ut in rebus humanis nihil gratiosius soleat audiri, nihil delectabilius concupisci, nihil & utilius possideri. Membra humana spiritus hominis, nisi unita fuerint, non vivificat: & Ecclesiæ membris vitalis Eucharistiæ cibus, nisi fuerint Eucharistiæ vin-  
culo



culo copulata, spiritalis vitæ motum non impertit.

*Qua sunt eadem uni tertio, sunt eadem inter se.* Cum Christo in Eucharistia unum sumus; quomodo ergo à se invicem Christianorum corda sejungi aliquo tandem prætextu possunt? Unum corpus multi sumus omnes qui de uno pane, & de uno calice participamus: ergo ab illo corpore se dividunt, qui solliciti non sunt servare unitatem spiritus in vinculo pacis. Et præclare Augustinus sermone ad infantes, quem ex integro S. Fulgentius refert: *Qui accipit mysterium unitatis, & non servat vinculum pacis, non mysterium accipit pro se, sed testimonium contra se.*

Quia in primitiva Ecclesia Fideles perseverantes erant in divini fractione panis, ad eumque eximiâ cordis castimoniâ accedebant, ideo *multitudinis credentium erat cor unum & anima una, nec quisquam eorum quæ possidebat, aliquid suum esse dicebat*, ut dicitur Actuum 4. Non poterant corda illa divelli, quæ in Eucharistiam veluti linæ in centrum unita confluebant. Nemo autem, ut in caput 5. Matth. Chrysostomus observat, *inter duos inimicos potest esse fidelis amicus amborum; ideo & Deus non vult esse amicus fidelium, quandiu inter se fuerint inimici.* Unde nec Christo poterunt in Eucharistia conjungi, qui à se fuerint simultatum divortio separati.



## SPECVLATIO III.

*Momentosa de permanentia & adoratione Eucharistia corollaria derivantur.*

EX hætenus constitutis sequitur 1. Eucharistiam esse sacramentum permanens, & non in usu formaliter positum. Est contra modernos hæreticos Lutheranos & Calvinistas. Licet enim Lutherus Ecclesiæ Romanæ de permanentia Eucharistiæ fidem aliquando non improbarit, ut constat ex libro ad Waldenses, ubi ait Papistas corpus Christi verè in sacramento habere & circumgestare, licet hoc faciant sine mandato; ab ea tamen sententia suasu Bucer anno 1536. recessisse, & præsentiam corporis Christi in sola cœnæ actione usuque agnovisse dicitur. Hunc errorem apertè sequutus est Philippus Melanctonus in *apologia*, Kemnitius in *examine sess. 13. cap. 3. Tridentini*. Eucharistiam etiam in solo usu consistere hæresiarcha Calvinus exertè docuit *lib. 4. institutionis, capite 17. §. 36. & 39.* cui adhærent Calvinistæ Eucharistiam propterea nunquam reservantes, nec reservatam ad infirmos deferentes. Hanc hæresim damnavit sacra Tridentina Synodus *sess. 13. cap. 3. & 6. & can. 4. & 7.* ubi docet in Eucharistia excellens illud & singulare reperiri supra reliqua sacramenta, quòd reliqua tunc primùm sanctificandi vim habent, cum quis illis

illis utitur: at in Eucharistia ipse sanctitatis author ante usum est; nondum enim Eucharistiam de manu Domini Apostoli susceperant, cum verè tamen ipse affirmaret, corpus suum esse quod præbebat; & semper hæc fides in Ecclesia Dei fuit, statim post consecrationem verum Domini nostri corpus, verumque ejus sanguinem sub panis & vini specie unà cum ipsius anima & divinitate existere: & præterea in hostiis seu particulis, quæ post consecrationem reservantur vel supersunt, remanere verum corpus Domini: atque ex veteri omninò, salutari & necessario more licere sacram Eucharistiam in sacrario reservari, & ad infirmos honorificè deferri.

Hanc sacri Concilii doctrinam confirmat veteris Ecclesiæ praxis, Eucharistiam sive domi, sive in sacris ædibus asservantis, eamque ad infirmos deferentis. Ecclesiastici moris hujus testis est Justinus Martyr apologia 2. ubi ait Eucharistiam non solum distribui unicuique præsentium, sed per Diaconos & Ministros etiam *ad absentes perferri*. Irenæus quoque epist. ad Victorem, apud Eusebium lib. 5. historiæ, cap. 24. *Eucharistiam ad alios mitti docet*. Tertullianus lib. 2. ad uxorem, de Eucharistia *domum deportatâ* apertissimè loquitur. Cyprianus sermone de lapsis narrat mulierem Eucharistiam *domi in arcula sua conclusam* indignis manibus tractare tentantem *igne surgente fuisse deterritam*. Dionysius Alexandrinus epist. ad Fabium Antiochenum, apud Eusebium lib. 6. cap. 36. narrat Sacerdotem præ ægritudine incedere non valentem, puero *Eucharistia exiguam partem dedisse, præcipiendo ut eam*

*madefactam in os senis Serapionis infunderet. Ba-  
filius epist. 28. ad Cæsarium Patricium, eum  
morem, defensurus quo fideles urgente perse-  
quutione propriâ manu, Sacerdote vel Mini-  
stro non præsentem, communionem percipie-  
bant, ait eos omnes qui per eremos vitam mona-  
sticam instituunt, ubi copia non competit Sacer-  
dotis, cum habeant Domini communionem, de  
suis manibus illam percipere. Additque Alexan-  
dria & per Ægyptum unumquemque etiam de  
plebe ut plurimum habere domi suæ communionem.  
Narrat etiam Gregorius Nazianzenus in laudem  
sororis suæ Gorgoniæ, illam omnibus aliis auxi-  
liis desperatis, intempestâ nocte captâ, ad al-  
tare cum fide procubuisse, ibi Christum in Eu-  
charistia præsentem adorasse, statimque liberatam  
se morbo sensisse. Ubi Eucharistiam nocte in  
Altari asservari manifestè testatur. S. etiam  
Ambrosius de obitu fratris sui Satyri refert  
illum fractâ navi petiisse dominicum sacramen-  
tum, & in orario ligari fecisse, moxque in mare  
se misisse, unde favente Deo evasit incolumis.  
Chrysostomus quoque epistola 1. ad Innocen-  
tium Papam, recenset hostes suos magno Sab-  
batho ab vesperam in primarium Ecclesiæ  
Constantinopolitanæ templum irruisse; & mi-  
litibus, quos inter aliqui nondum erant myste-  
riis initiati, statim ingredientibus, & penitus  
omnia quæ intus erant perlustrantibus, San-  
ctissimum Christi sanguinem ( utique in Ecclesia  
pro more illius ætatis asservatum ) in prædicto-  
rum militum vestes fuisse effusum. Hierony-  
mus epist. 4. ad Rusticum, de S. Exuperio To-  
losano Episcopo sic habet: Nihil illo ditius,  
qui corpus Domini canistro vimineo, sanguinem  
portat*

*portat in vitro.* S. Cyrillus Alexandrinus epist. ad Calosyrium adversus Antropomorphitas, tom. 5. *Aliquos esse audio, inquit, qui mysticam Eulogiam nihil ad sanctificationem juvare dicant, si quid ex ea fiat reliqui in alium diem. Insaniunt verò qui hac asserunt. Neque enim alteratur Christus, neque sanctum corpus ejus immutatur: sed benedictionis vis ac facultas, & vivificans gratia perpetua in illo existit.* Eucharistiam demum in columbis aureis & argenteis appensam in sacris adibus fuisse servatam manifestè colligitur ex libello supplici Clericorum & Monachorum Antiochiæ contra Severum, qui habetur in Concilio Constantinopolitano sub Menna, act. 5. ex Ampilochio in vita Basilii, & ex Liturgiâ seu Missâ præsanctificatorum, in qua Sacerdos non consecrat, sed hostiâ præsanctificatâ utitur, ut habetur ex canone 52. in Trullo; quem morem Ecclesia Græca per totam Quadragesimam, exceptis Sabbathis, Dominicis diebus, & festo Annuntiationis; & Ecclesia Latina in die Parasceves etiamnum observat. Hac testium nube obstupefactus haresiarcha Calvinus, veritate coactus fatetur Catholicos Eucharistiam servantes ad ægrosque deferentes habere veteris Ecclesiæ exemplum; addit tamen insaniens, *in re tanta non sine periculo eos errare.* Scilicet dum Ecclesiæ veteris ab Apostolis natæ, à Patribus informatæ vestigia sequimur, periculosè erramus? Si ita sit, nulli impietati, nulli prophanæ novitati aditus præclusus erit.

Ratio autem fundamentalis hujus veritatis orthodoxæ à sacro Tridentino Concilio posita est: Statim peractâ consecratione ante omnem



ejus usum & actualem perceptionem corpus & sanguis Christi sub speciebus panis & vini existunt ; nondum enim Eucharistiam de manu Domini Apostoli susceperant , vel certè comederant , cùm verè tamen affirmaret corpus suum esse quod præbebat ; nec verbis hypotheticis , sed absolutis Veritas usa est : Ergo Eucharistiæ sacramentum est ante omnem suscipientis usum , cùm tunc verè sit Eucharistiæ sacramentum , quando corpus & sanguis Christi sub speciebus panis & vini existunt . Et sanè cùm hoc sacramentum per modum cibi & potus spiritualis institutum sit , sicut cibus est aliquid permanens , tametsi ad usum referatur ; ita Eucharistia est aliquid fixum & ratum , licèt ad esum sit instituta . Sicut etiam communes cibi ad alimoniam licèt parati per aliquid temporis asseruantur ; ita cœlestis Eucharistiæ cibus per aliquid spatii ad usum fidelium reservatur . Denique nemo dixerit conficiendi corporis & sanguinis potestatem penes recipientes esse ; & tamen si usus esset de hujus essentia sacramenti , non minùs penes recipientes quàm penes Ministros & Sacerdotes esset consecrandæ Eucharistiæ facultas .

Dices : Priùs Christus discipulis panem & vinum præbuit , quàm verba illa , *Hoc est corpus meum* , proferret ; dicitur enim Matth. 26. *Accipit Iesus panem , & benedixit , ac fregit , deditque discipulis suis , & ait : Accipite , & comedite , Hoc est corpus meum .* Ergo ratio Concilii Tridentini falso nititur fundamento .

Respondeo in primis non dixisse Tridentinum priùs Christum verba protulisse , quàm Apostoli panem de manu Domini susceperant ,  
sed

sed *Eucharistiam* nondum eos suscepisse, quia ante verba Christi nondum erat Eucharistia. Unde argumentum manet in sua vi; nam panis ille tametsi ante verba ab Apostolis susceptus, non fuit tamen ab Apostolis comestus ante verba Salvatoris, quibus Eucharistia consecrata est; quod maximè verum probatur de calice, ex quo uno & eodem Apostoli omnes biberunt, quavis verba simul tantùm Christus protulerit. Ergo ante usum Eucharistiæ Eucharistia consecrata erat, & sub specie panis & vini corpus & sanguis Christi verè existebat. Deinde veritas est, Christum verba protulisse antea quàm cibum discipulis edendum tradiderit, cum non dederit cibum manducandum nisi ut corpus suum ipsis porrigeret, idque ipsi non ignorarent. Nec obsunt verba relata Matthæi: quid enim in ultima cœna ordine gestum sit, non ex serie & contextu verborum, sed eorum vero sensu colligendum est: alioquin cum Marcus *cap. 14.* de calice dicat, *Gratias agens dedit eis, & biberunt ex illo omnes, & ait illis, Hic est sanguis,* &c. sequeretur prius Apostolos è pretioso calice porrecto bibisse, quàm Christus vinum consecraret, & sacramentum ipsam actionem & usum recipientis fuisse sequutum, quod nemo iure dixerit. Similiter ergo licet Matthæus referat verba consecrationis panis post benedictionem, fractionem, & porrectionem; prius tamen illum consecravit, quàm edendum distribuerit, cum Eucharistiam Christus edendam distribuerit, nec potuit ante verba Christi esse Eucharistia. Unde sensus Matthæi est, accepisse Jesum panem, illumque quem discipulis dedit, his verbis consecrassè, *Hoc est corpus meum.*

Instabis : Non est potior ratio cur alia sacramenta in usu & actione consistant, quàm ipsa Eucharistia : ergo id gratis de Eucharistia affirmamus.

Respondeo manifestam esse disparitatem, quæ ex formis sacramentorum dilucidè colligitur; cum enim forma aliorum sacramentorum actionem essentialiter significet, putà forma Baptismatis, *Ego te Baptizo*, &c. ablutionem; forma Confirmationis, *Signo te signo crucis, & confirmo te*, &c. chrismationem; forma pœnitentiæ *Absolve te*, remissionem peccatorum, clarum est hujusmodi sacramenta sine usu non consistere, sed in actione sita esse. At forma Eucharistiæ non significat actionem & usum, sed aliquid permanens; nam *Hoc est corpus meum, Hic est sanguis meus*, nullam actionem præ se fert vel indicat, & congruit ut cibus & potus in aliquo permanenti consistat, licèt ad usum referatur.

Oppones rursus quædam Patrum testimonia : Origenes enim *hom. 5. in Levit.* ait, quod panem quem discipulis Dominus dedit, non *servari jussit in crastinum*. Author etiam libri de cœna Domini ait : *Panis iste recipitur, non includitur*. Et Ambrosius *in cap. 11. prioris ad Corinthios* ait : *Indignos illos intelligi à Paulo, qui sacramentum hoc vel aliter celebrant, quàm à Christo institutum est, vel aliter illud accipiunt, quàm ab ipso traditum est*. Eucharistia autem à Christo consecrata non fuit reservata, sed statim comesta. Hieronymus etiam in eundem locum ait, in Ecclesia quidquid de sacrificio superesset, omnes pariter comedisse. Beda demùm *lib. 4. Eucharistica historia, cap. 14.* refert puero agroto ab Apostolis cum inv-

sistentibus

sentibus dictum fuisse, ut expectaret donec Missæ celebrarentur, quò viatico Dominici corporis & sanguinis reficeretur.

Respondeo mirum esse hæc nostrates hæreticos objicere posse, & non pudore suffundi, dum ea referunt quibus plures eorum hæreses de sacrificio Altaris, de Missa, de Viatico Dominici corporis jugulantur, plus inde detrimenti imprudentes reportando, quàm scientes lucri referre possent, vera licet essent quæ intendunt: capitalibus illis hostibus similes, qui furore in aliquem sibi invisum occæcati, si quid eis nocere credunt avidissimè captant, in quæ ipsi incommoda longè graviora incurrant rabie acti non advertunt. Sed nihil ex illis locis lucri vel compendii eruere possunt inimici veritatis. Non quidem ex Origene, qui non ait non fuisse prohibitum ut Eucharistia consecrata servaretur, sed non fuisse præceptum ut servaretur. Nec sanè tunc hoc præcipere Christum congruebat; cùm enim Eucharistia in commemorationem sacrificii crucis instituta sit, non debuit eo die servari, quo Christus seipsum obtulit Patri: sed quod jam non debeat servari ad fidelium solatium, ad ægrorum remedium, ad piorum cultum perennem, nunquam dixit Origenes, soli moderni hæretici totius pietatis jurati hostes inficiantur. Adde scopum O. igenis eò loci fuisse ostendit ea quæ ad Dei laudem pertinent nova & recentia esse debere, non vetera; quod probat suo more allegoriis, quia Christus panem mox consecratum dedit discipulis, nec distulit; & quia Christus prohibuit, ne panes portarentur in via, ut semper recentes verbi Dei panes pro-



feramus ; & quia Gabaonitæ quod veteres panes ad Israëlitas detulerint damnati sunt. Quæ probatio per allegoriam procedens vim suam habet , etiam si Eucharistia in Ecclesia asservetur ; procedit enim non ex eo quod potest fieri , sed ex eo quod Christus fecit ; unde sicut panem consecratum Christus dare non distulit , ita nova semper offerre Deo congruit.

Ad authorem sermonis de cœna Domini dicendum , non velle eum Eucharistiam non posse in vasis includi , ut reseruetur , sed non ita in recipiente includi , quin aliis communicari possit. Patet hic sensus ex verborum contextu : *Æqua* , inquit , *omnibus portio datur , integer erogatur , distributus non demembratur ; in corporatur , non injuriatur ; recipitur , non includitur , cum infirmis habitans non infirmatur.* Ad locum Ambrosiastri ( neque enim hujus operis S. Ambrosius author est , sed quidam de grege Pelagianorum ) dico , indignos esse qui hoc sacramentum aliter celebrant vel recipiunt , quàm à Christo institutum vel traditum est , qui nimirum nec præscriptam materiam adhibent , nec formam institutam servant , nec eam afferunt cordis castimoniam , quam cœlestis cibus desiderat. Nec contra institutionem vel traditionem Christi agunt , qui Eucharistiam servant , sed ei potius se conformant ; cum enim Eucharistiam Christus instituerit , ut omnibus communicetur , convenienter asservatur eâ ut omni tempore fideles etiam infirmi refici possint. Hieronymus verò ( qui tamen falsò hujusmodi commentariorum uni Pelagio asserendorum author esse dicitur ) loquitur de oblatis pro vel cum sacrificio , non de his quæ de consecratis

secratis superessent; vel de illis sacramenti reliquiis loquitur, quæ nec commodè, nec decenter juxta morem Ecclesiæ poterant asservari, quales sunt particulæ, vel alia hujusmodi. Historia demùm Bedæ non est ad rem; loquitur enim de Monachio incola parvi monasteriî, in cujus sacello Eucharistia minimè reservabatur. Vel præcipitur ei ut Missæ celebrationem expectaret, non quòd aliunde reportatâ Eucharistiâ reservatâ refici non posset, sed ut sacrificio interesse posset, vel ut communionem in tempus celebrationis Missæ, quo magis se ad cibum illum instrueret, differret.

Pro solutione aliarum objectionum sciendum, morem Eucharistiam domum deferendi olim urgente persecutione inductum in Concilio Cæsaraugustano *can. 3.* & Toletano I. *can. 14.* fuisse antiquatum, ut sacrilegiis & abusibus inde profectis via præcluderetur. S. etiam Clemens *epist. 2.* ea quæ supersunt de sacramento Altaris reservari non vult in crastinum, ubi nimirum necessariis provisum est, cùm ibidem attestetur sacrorum Eucharistiæ fragmentorum reliquias ministris custodiendas fuisse commissas, ne qua in sacrario putredo inveniatur. Sciendum etiam viguisse per multos annos in Ecclesia Orientali morem, ut pueris innocentibus scholas frequentantibus reliquiæ Eucharistiæ consumendæ traderentur, ut ex Evagrio *lib. 4. cap. 35.* & Nicephoro *lib. 17. cap. 25.* constat. Quin & in Ecclesia Occidentali consuetudinem illam viguisse patet ex Concilio Maticensi II. *can. 6.* ubi præcipitur reliquias sacrificiorum post peractam Missam in sacrario supersedentes feria 4., vel 6. ab innocentibus

jejunis esse percipiendas. Quædam etiam Ecclesiæ, authore Eſychio *lib. 2. in Leviticum, cap. 8.* reliquias sacramenti comburere solebant. Verùm hæc non nisi reservatis pro infirmorum solatio necessariis fiebant. Quibusdam etiam diebus reservatâ fuisse sacra fragmenta, ex canone Matisconensi clâret, cùm certis quibusdam diebus asservatas consumi reliquias præscribat, in quibus nimirum diebus recentes species consecrabantur, & Eucharistia renovabatur, ne quid putredinis, vel indecori obveniret. Hæc de causa reliquiæ diu servatæ, & putredine vel aliquo simili sordidatæ igni comburendæ tradebantur, repositis in sacratori loco cineribus in honorem corporis Christi, cujus fuerant velamenta, ut ex Concilio Arclatensi III. *can. 5.* & Aurelianensi apud Ivonem & Burcardum patet. Idque non obscurè indicat Eſychius, eò loci addens ea fragmenta non esse igni committenda, quæ paucis abhinc diebus servata sunt.

## COROLLARIUM ALTERUM.

### *De adoratione Eucharistie.*

Sequitur 2. Christum in Eucharistiæ sacramento esse adorandum adoratione latriæ. Docet hanc veritatem catholicam Concilium Tridentinum *sess. 13. cap. 5.* ubi ait nullum dubitandi locum relinqui, quin omnes Christi fideles pro more in Catholica Ecclesia semper recepto latriæ cultum, qui vero Deo debetur, huic Sanctissimò sacramento in veneratione

ratione exhibeant. Neque enim ideo minus est adorandum, quòd fuerit à Christo Domino ut sumatur institutum. Nam illum eundem Deum præsentem in eo adesse credimus, quem Pater æternus introducens in orbem terrarum dicit: *Et adorent eum omnes Angeli Dei*; quem Magi procidentes adoraverunt; quem denique in Galilæa ab Apostolis adoratum fuisse Scriptura (Matth. 28. & Luc. 24.) testatur. Ibi- dem etiam declarat S. Synodus religiosum esse Ecclesiæ morem, quo singulis annis peculiari quodam & festo die præcelsum hoc & venerabile Sacramentum singulari veneratione & solennitate celebraretur, & in processionibus honorificè per vias & loca publica circumferretur: ut hac rarâ & singulari grati animi significatione ineffabile & planè divinum beneficium Christiani recolant, Salvatorisque victoriam ac triumphos repræsentent. Sic enim oportet victricem veritatem de mendacio & hæresi triumphum agere; ut ejus adversarii in conspectu tanti splendoris, & in tanta universæ Ecclesiæ lætitia positi, vel debilitati & fracti tabescant, vel pudore affecti & confusi aliquando resipiscant.

Adversus hanc fidem communissimis Christianismi notionibus tantoperè consentaneam insurrexerunt nedum Arianæ & Nestorianæ divinitatis Verbi vel unionis hypostaticæ veritatem negantes, sed etiam Wandali, Donatistæ, Suriani, & nonnulli Græci, non quòd Ecclesia Græca Eucharistiam non adoret (cùm oppositum ex praxi eorum & ritibus Liturgiarum pateat, nec nobis unquam Græci objecerint, quòd Christum in Eucharistia adoremus;) sed in odium



odium Latinæ Ecclesiæ & rituum illius. Vide-  
 sis Jacobum de Vitriaco *lib. 1. hist. Ierosolymi-  
 tana, cap. 74.* Qui Catholicos excommunicatos  
 arbitantes, priores Eucharistiam à Catholicis  
 confectam conculcabant, ut videre est apud  
 Victorem Uticensem *lib. 1. de persecut. Wan-  
 dalica*, & Optatum Milevitanum *lib. 2.* poste-  
 riores verò altaria super quæ Latini divina ce-  
 lebraverunt abluere, nec sacramento à nostris  
 Sacerdotibus ad agrotos delato assurgere con-  
 sueverunt. Illi etiam cultui intercesserunt Be-  
 rengariani corporis & sanguinis Christi in Eu-  
 charistia veritatem inficiantes; Waldenses  
 quoque in professione fidei ad Uladislauum, nec-  
 non Begardi & Beguinæ, qui singularem pieta-  
 tem profitentes eò impietatis prolapsi sunt,  
 ut crederent Christo in Eucharistia præsentem  
 nullam se debere exhibere reverentiam, ne à  
 contemplatione divinitatis ad humanitatem  
 recogitandam descenderent. Quos Concilium  
 Viennense proscripsit, ut videre est in Clemen-  
 tina *Ad nostram, lib. 5. Clementinarum.* Lutherus  
 autem *lib. ad Waldenses*, anno 1523. conscripto  
 adorationem Christi in Eucharistia liberam  
 permisit. Philippus Melanctonus in apologia,  
*titulo de cœna Domini*, Eucharistiam extra usum  
 non posse sine manifesta profanatione & ido-  
 lolatria adorari contendit. Posteriores tamen  
 Lutherani neque in ipsa cœnæ actione & usu  
 Christum in Eucharistia esse adorandum affir-  
 mant, quòd Christus huic sacramento non ut  
 adoretur, sed ut edatur intersit. Hunc errorem  
 sequitur hæresiarcha Calvinus *lib. 4. institutio-  
 nis, cap. 17. §. 35.* ubi ait, Catholicos carnalem  
 adorationem perversa temeritate in sacramen-

to erexisse, quia mandatum accipiendi, non adorandi habemus, nec leguntur Apostoli prostrati adorasse, sed discumbentes accepisse & comedisse: in cœlum ergo duntaxat erigi pias animas, & sursum habere corda oportere concludit, atque eam demùm adorationem esse legitimam, quæ ad Christum in cœlo sedentem dirigitur.

In hoc veluti speculo recentiorum hæreticorum ingenium inspicere est, & perditam illorum frontem & conscientiam perhorrescere. Mihi certè tam incredibilem in deneganda Christo etiam præsentì putato adoratione audaciam consideranti, nescio quid in illa supra solitam humani cordis pravitatem subesse videtur, & peculiarem quendam, nec minùs manifestum diaboli instinctum atque afflatum licet advertere; non enim sic omnem christianæ pietatis sensum humana perturbatio posset extinguere, nec in tot se homines diffundere. Si Christum præsentem creditis, ô Lutherani, itane tam absurdâ, tam impiâ, tam à sanitate alienâ consequutione ipsum non adorandum esse credere potestis? Si tam manifestam cæcitatem nondum cernitis, profectò nimis apertè eum qui vos agitatur hæreticum spiritum proditis, quem si prae tenebris vestris non agnoscitis, agnoscunt omnes qui ab ejus contagione liberi sunt. Hinc vestro exemplo mirè patet, eam esse fidei ac rationis, pietatis, veritatisque connexionem, ut qui unam deserat, omnes deserat. Nam ut nùperos suos de Eucharistia errores ab infestæ sibi veritatis apertissima luce hæretici moderni tuerentur, ea de adoratione Eucharistiae effutiunt, quæ omnimodam in ipsis ratio-

nis

nis obscurationem probant. Hoc benè vidit ipse Kemnitiſ ad *cap. 5. & can. 5. ſeſſ. 13. Tridentini*, dicens adorationem Chriſti non eſſe loco vel tempori alligatam: quare poſito quod ſit realiter præſens in Euchariftia, fieri nec poſſe, nec debere, quin fides ipſum in illa præſentem videretur & adoret; neque poſſe negari Chriſtum eſſe adorandum, niſi ab eo qui vel negat proriſus, vel certè dubitat de præſentia Chriſti. Et ſanè cùm Chriſtus ubicumque ſit, Deus & homo ſit, ubique etiam eſt adorabilis. Nec eſt expectandum hujus adorationis ſpeciale mandatum, quod ſuppoſita fide, ipſa indicat ratio naturalis, quâ perſuaſi Magi Chriſtum in cunis adorarunt, cæcus natus in templo, leproſus & Cananæa in via, vectores in navi, Apoſtoli in Galilæa. Nec ullum inde imminet idololatriæ periculum, vel panis adorandi occaſio datur; quia fideles adorantes in Chriſtum cultum ſuum dirigere teſtantur, & Eccleſia talem cultum præcipiens, fideles ſuos de Chriſti præſentia ſatis informat.

Hunc tam juſtum, tam ſanctum Eccleſiæ morem veteris Eccleſiæ praxis confirmat. Cyrillus enim Hieroſolymitanus *catecheſi 5. myſtagogica*, docet accepturum Euchariftiam accedere oportere *preſentem adorationis in modum*. Gregorius Nazianzenus in oratione funebri ſororis ſuæ Gorgoniæ, ait illam *ad altare cum fide procubuiſſe, ipſumque qui ſuper ipſo honoratur cum ingenti clamore invocaffe*. Ambroſius libro 3. de Spiritu ſancto, cap. 12. *Itaque*, inquit, *per ſcabellum terra intelligitur; per terram autem caro Chriſti, quam hodie quoque in myſteriis adoramus*. Chryſoſtomus homil. 14. in 1. Cor.

Hec corpus in praesepe reveriti sunt Magi, & viri impii & barbari longo itinere confecto cum timore & tremore plurimo adoraverunt. Imitemur saltem barbaros, nos qui caelorum cives sumus. Illi enim cum id praesepe & tugurium tantum, nec eorum quicquam qua nunc intueris viderent, summam accesserunt reverentiam & honore. Tu vero non in praesepe, sed in altari; non mulierem qua in ulnis teneat, sed praesentem Sacerdotem & Spiritum perabundè super proposito diffusum sacrificio vides. Nec simpliciter ut illi corpus intueris; sed & ejus potentiam, & omnem cognoscis administrationem, & nihil eorum qua per ipsum facta sunt ignoras. Et hom. 3. in epist. ad Ephesios: Cogitemus ad illum sursum sedentem; qui ab Angelis adcratur, hunc degustamus. Considera quaso, mensa regalis est apposita, Angeli mensa ministrantes, ipse Rex adest, & tu astas oscitans? Iteitur adora, & communica. Augustinus in Psal. 98. Timeo non adorare scabellum Domini mei, quia Psalmus mihi dicit, Adorate scabellum pedum ejus. Quaro quid sit scabellum pedum ejus, & dicit mihi Scriptura: Terra scabellum pedum meorum. Fluctuans convertito me ad Christum, quia ipsum quaro hic, & invenio quomodo sine impietate adoretur terra, sine impietate adoretur scabellum pedum ejus. Suscepit enim de terra terram, quia caro de terra est, & de carne Maris carnem accepit. Et quia in ipsa carne hic ambulavit, & ipsam carnem nobis manducandam ad salutem dedit. Nemo autem illam carnem manducat, nisi prius adoraverit. Inventum est quemadmodum adoretur tale scabellum pedum Domini, ut non solum non peccemus adorando, sed peccemus non adorando.

Idem



Item docent alii Patres, qui hæc verba Psalmi 21. *Edent pauperes & saturabuntur, & laudabunt Dominum qui requirunt eum: manduca- verunt, & adoraverunt omnes pingues terræ* verba, inquam, illa de esu & adoratione Christi in Eucharistia interpretantur, quales sunt Basilii, Hieronymus, Augustinus, Theodoretus. Testantur etiam Chrysostomus *lib. 6. de Sacerdotio*, Ambrosius *orat. 1. preparatoria ad Missam*, Gregorius Magnus *lib. 4. Dialogorum, capite 58.* Eucharistiam ab ipsis Angelis, qui frequenter nostris mysteriis interfunt, adorari. Denique hanc praxim retinet tota Ecclesia Græca, ut tradit & ex professo probat Gabriel Archiepiscopus Philadelphiæ in apologia cultûs Eucharistici, & Cabasilas in expositione Liturgiæ; nec hoc ullus negare ausus fuit, nisi fuerit similis hæretico Claudio, qui etiam in quæstionibus facti oculis, auribus, & sensui communi renuntiare vovit, mavultque mendacii totum orbem accusare, quàm mendacissimam suam assertionem revocare, quâ Ecclesiam Græcam Christi corporis realem præsentiam non agnoscere, nec Christi in ea corpus adorare semel pronuntiavit, quasi infallibilitas in quæstionibus facti illi asserenda sit, qui infallibilitatem Ecclesiæ in quæstionibus juris inficiatur.

Ex quibus sponte & liquidò sequitur, Eucharistiam cultu externo & corporeo adorari oportere, ut patet ex verbis Patrum memoratis, & ipso omnibus non omninò corruptis animis inseminato pietatis sensu. Congruit etiam Eucharistiam eo nos adorationis modo adorare, qui sit naturæ nostræ corpore non minùs quàm anima

animâ constanti consentaneus, per signa nimirum corporea adgeniculationum, prostrationum, inclinationum, salutationum, capitis adaperiti, corporis assurgentis, junctarum constrictarumque manuum, vel etiam expansarum, &c. Hac de causa Urbanus IV. ad summum Ecclesiæ Pontificatum anno 1261. euectus, divini hujus Sacramenti devotione affectus piè statuit, ut integro solennitatis officio institutionem tanti mysteriî recoleret plebs fidelis, utque ejusdem institutionis memoria primâ quintâ feriâ post octavas Pentecostes à cunctis Ecclesiis celebraretur. Tum ut qui per totum anni circulum hoc Sacramento utimur ad salutem, ejus institutionem illo tempore specialiter recolamus, quo Spiritus sanctus corda discipulorum edocuit ad plenè cognoscenda hujus mysteria Sacramenti; nam & in eodem tempore cœpit hoc Sacramentum à fidelibus frequentari. Tum ne tantum Christi beneficium unquam excidat è memoria, debuit per speciale festum ob oculos poni; sicut & alia Dei beneficia in Scripturis & in Ecclesia per festorum convenientem dispositionem ab oblivione vindicantur. Licèt enim tanti doni fiat in Missa quotidiana memoria, ejus tamen speciale decet peragi festum, quia solent quotidiana attentionem perdere & admirationem, nisi novâ aliquâ adhortatione & solennitate ad ea cogitanda animus excitetur. Compulerunt etiam summum Pontificem ad ejus festi institutionem, tum miracula insignia in hujus honorem sacramenti divinitus edita; tum revelationes variæ piis viris de ejusdem procuranda celebratione factæ; tum

ut hæretici & impii hujus mysterii impugnatores confunderentur. Et sanè si in honorem insigniorum Martyrum vetus Ecclesia festa instituit, potiori jure in tanti sacramenti honorem potuit festum institui. Quanvis enim feria 5. hebdomadæ sanctæ hujus institutionis memoria recolatur, quia tamen Ecclesia tempore illo in deflenda morte sponsi sui salubriter occupatur, alius debuit eligi dies, in quo majori cum mentis lætitia per diem integrum talis festivitas celebraretur. Hac etiam de causa eodem die omnium Ordinum solennis supplicatio, seu processio, in qua corpus Christi honorificè circumgestatur, habetur; tum ut grati animi significationes hoc veluti triumpho exhibeantur; tum ut fidem nostram ab hæreticis impugnatam propalam & intrepidè profiteamur; tum ut sicut Christus olim pertransibat benefaciendo & sanando omnes, ita corpus ejus circumgestatum dæmones fuget, mala avertat, bona conferat necessaria, sicut Arca hujus sacramenti figura, quasi in processione extra tabernaculum malorum avertendorum & bonorum impetrandorum gratiâ circumgestabatur. Qui sanè ritus est in Ecclesia Christiana perantiquus, ut ex canone 5. Concilii III. Bracarensis anno 654. celebrati constat. Solebant etiam olim Christiani certa in loca certis diebus convenire, quod stationes & stationum dies nuncupabant; quæ loca Martyrum reliquiis ornata Martyria dicebantur, ad quæ piè, modestèque procedebant divina ut officia persolverent, sacramenta perciperent, tremendo sacrificio interessent; unde tales conventus processiones dicti sunt.

Ad

Ad illa Martyria reliquias Eucharistiæ domum pro more illius ætatis asportatæ deferrebant, clam quidem urgente persecutione, redditâ verò Ecclesiæ pace solenniter à solo Episcopo; quia tunc prohibitum erat ne laïci Eucharistiam domum asportarent.

Pro solutione objectionum à novis hæreticis fieri solitarum advertendum est, quod licet in Scriptura speciale non extet de adorando Christo in Eucharistia præceptum, sufficere tamen in Scripturis haberi, Deum esse adorandum, Christum esse Deum, Christum esse adorandum, Christum esse in Eucharistia realiter præsentem. Unde sicut olim Maximino hæretico petenti ab Augustino, *Da mihi testimonia, ubi adoratur Spiritus sanctus?* Respondēbat Sanctus Pater lib. 3. contra eundem, cap. 3. *Ex iis quæ legimus, ea quæ non legimus intelligi*: ita similiter dico, ex iis quæ de Christo & de Eucharistia in Scriptura legimus, Christum in Eucharistia adorandum rectè concludi.

Sciendum rursus, quod licet semper in Ecclesia Christus à Fidelibus adoratus sit, eam tamen adorationem Patres adversum Arianos divinitatem Filii probaturi minimè in medium proferabant; quia Christum adorandum esse Ariani censebant, tamen Deum illum esse inficiarentur. Vnde Patres idololatriæ Arianos jure merito accusabant; cùm Christum puram creaturam arbitrantur, nihilo tamen minùs eum adorandum prædicabant, ut apud Augustinum *serm. contra Arianos, & lib. 1. contra Maximinum*, necnon apud Athanasium *orat. 1. contra Arianos*.



*Arianos, Nyssenum sermone in laudem Basilii, Ambrosium lib. 1. de fide, cap. 7. videre est. Aut igitur, inquit inibi Ambrosius, desinant colere, quem creaturam appellant; aut desinant, quem colere se simulant, dicere creaturam.*

Sciendum 3. quod aliquando Eucharistiæ usus per modum convivii, in quo convivæ sedebant, celebratus sit: nunquam tamen probabunt hæretici, convivas neque antequàm sederent, neque sedentes adorasse. De viris quidem Apostolicis nullo id testimonio confirmare poterunt: de Apostolis verò, utrum Eucharistiam ad pedes Christi provoluti receperint, Scriptura non commemorat. Quare sicut credibile est Apostolos Agnum Paschalem stantes, juxta legis mandatum, comedisse; ita & eosdem ad pedes Christi prostratos cœlestem cibum à Christo accepisse, tametsi Scriptura taceat, probabile est. Utut sit Christum præsentem credere fide pura non possumus, quin illum continuò adoremus; neque ad hoc speciali mandato opus est. Sicut enim licet Deus filiis parentes colere & diligere præceperit, nullo tamen speciali Decalogi præcepto parentibus amorem filiorum imperat, quia ad illum natura non omninò corrupta satis superque inclinatur: ita Christus corpus suum recipi speciali mandato jussit; illud adorare nullo speciali præcepto urgere constituit, quia ad deferendum illum cultum sufficit communis Christianæ pietatis sensus, sufficiunt communissimæ rationis impietate vel hæresi non prorsus excæcatæ notiones. Nec possunt ab eo cultu removeri vel retardari fideles, quòd incerti sint, num panis sit à vero Sacerdote cum debi-

ta materia, forma, & intentione consecratus. Non, inquam, hæc obsunt, quia ad legitimum cultum sufficit rationabilis adorantis existimatio, cui licet metaphysicè falsum subesse possit, nulla tamen committitur idololatria, cum cultus in Christum solum præsentem putatum referatur: sicut qui proditorem, quem amicum credit, colit, non infidelitatem simulatoris, sed existimatam ejusdem fidem & amicitia necessitudinem veneratur.

Objicit insuper hæreticus Faucherus *lib. 4. cap. 3.* Non potuit in primitiva Ecclesia Eucharistia solenni externoque cultu à Patribus adorari, quin eo ritu Ethnicis speciosa occasio & ansa præberetur, suam simulachrorum adorationem defendere, eamque ab argumentis sacrorum Doctorum vindicare. Etenim Patres superstitiosum illum cultum inde confutabant primùm, quòd absurdum esset Deos in ligno, metallo, simulachrisque concludi, ut patet ex Arnobio *lib. 6.* Secundò, quòd impium esset ligna & lapides eo cultu venerari, qui soli Deo Creatori debetur. Tertiò, quòd absurdum esset aliquà dedicatione numina fieri præsentia simulachris, in minoribus constringenda, in majoribus extendenda commodiùs. Quartò, ridiculum esse & sacrilegum opera hominum adorare, res illas colere, quæ nec vident, nec audiunt, nec agunt, nec ullâ se ratione movent. Denique irrationabile esse illos agnoscere Deos, qui frangi, cremari, ab hostibus conteri, à vermibus exedi, furto radi, sub repagulis pessulisque custodiri, & infinitis demùm modis deperire possent. Atqui hæc omnia inconvenientia in Eucharistia adorationem

rationem retorquere facile Gentes potuissent: nam statim regerere in promptu erat, Quid vos improbatis in nobis quod frequentatur à vobis? Vos namque hostiam consecratam terrena & cœlesti substantiâ constare opinamini, in eaque Deum vestrum concluditis, conclusum adoratis. Vos panem & vinum coliti. Quod si ad latentem Christum cultum dirigere vestrum respondetis, ad numina etiam in simulachris latentia adorationem nostram referimus. Vos in Eucharistia Deum vestrum præsentem consecratione reddi ait, sicut nos eos ibi Deos colimus, quos dedicatio sacra infert, & fabrilibus efficit inhabitare simulachris. Vos Christum modò sub minoribus speciebus coarctatis, modò sub maioribus protenditis. Vos Eucharistiam reverimini, quæ est opus manuum vestrarum; nam & panis humanâ operatione fit, humanâ & consecratione celebratur. Vos in Eucharistia rem quæ neque videt, neque audit, neque se ciet veneramini. Vos denique Eucharistiam colitis, quæ frangi, cremari, custodiri, calcari, & aliis modis perire potest. Ergo ne inania fateamur Patrum adversum simulachrorum adorationem argumenta, dicendum adorandæ Eucharistiæ ritum non fuisse in Ecclesia primitiva usurpatum, sed esse recens inventum.

Respondeo has inanissimarum objectionum fallacias ab ipsis idololatriis mutuatum fuisse hæreticum Faucherum. Constat enim ex Origene *lib. 3. contra Celsum*, hæc argumenta in favorem cultus simulachrorum suorum fuisse à Paganis producta, & contra adorationem Christi intorta. Enimverò consideranti patebit, majorem vim hæc sophismata

mata adversus Dei incarnati, quàm Christi in Eucharistia residentis adorationem obtinere. Majori enim verisimilitudine obijcere poterant Christum humanâ & divinâ substantiâ constare, & totum Deum in humanitate residere & constringi; humanitatem creatam ob præsentiam deitatis cultu divinino honorari; unione hypostaticâ humanitatem divinitate ungi & consecrari; divinitatem in infantilibus Christi membris contractam, in virilibus longius fuisse porrectam; divinitatem unitam Christo in utero materno recluso, & perseverantem in corpore in sepulchro recondito, in ea re præsentem fuisse, quæ neque videbat, neque audiebat, neque ullo prorsus pacto movebatur. Denique Christum, quem Deum colimus, omnibus fuisse injuriis obnoxium, ligatum funibus, flagellatum verberibus, clavis affixum cruci, mortuum, atque in tumulo conclusum. Hæc solvere tenetur Faucherus, nisi adorationem Christi de medio tollere, atque adeò Christianismum ab imis fundamentis subruere cum Ethnicis moliatur. Et si quid probabile in defensionem adorationis Incarnati Verbi protulerit, vindicandæ ab Infidelium sophismatis adorationis Eucharistiæ omninò inserviet. Sed non sunt expectanda ab hæreticis religionis & veritatis præsidia, quæ nobis à Patribus & Doctoribus Catholicis largissimè ministrantur.

Ad primum ergo dicendum immensum interesse discrimen inter cultum simulachrorum & adorationem Eucharistiæ, non solum ex objecto cultûs petito (cùm Ethnicis falsos Deos & veros peccatores in simulachris venerarentur, nos



Christum Filium Dei vivi in Eucharistia realiter præsentem adoremus : ) sed etiam ex modo & circumstantiis utriusque cultus. Ethnici enim Deos suos cœlos deferere , simulachris alligari , ibique virtute consecrationis affixos non posse inde ad libitum discedere fingeant : at corpus Christi in Eucharistia realiter præsens cœlos modo suo connaturali simul incolit , & divinitas ejus immensitate suâ omnia replet. Ineptè ergo comparatur divinitas Paganorum simulachris alligata cum divinitate Christi nulli addicta loco , quæ omnia suis continet locis , nusquam contenta locorum. Ineptè etiam cum corpore Christi ; tum quia majus est inconveniens divinitatem coarctari , quàm corpus ; tum quia Christus sub speciebus non alligatur , cum in cœlo modo extenso permaneat , & aliis altaribus innumeris simul & semel adsit.

Ad secundum respondeo , idololatrias existimasse simulachra sua esse vel tanquam corpora divinitatum suarum ; unde eis tanquam animatis Deorum corporibus divinos honores & cultus obsequia deferebant , ut ex Hermete Trismegisto refert Augustinus *lib. 8. de Civit. cap. 23.* & videre est apud Arnobium *lib. 6.* vel saltem esse repræsentationes & sedes Deorum suorum ibi magicis invocationibus inhabitantium , atque in sedis obscuræ coërcitione latitantium , ut patet ex Arnobio *lib. 6.* atque Eusebio *lib. 5. de præparatione Evangelica, cap. 8.* ubi ex Pythagora Rhodii refert Deos simulachris adigi , à quibus discedere cùm libuerit non poterant , quia vis eis illata , gravis atque imperiosa potestas eos cogebat , ac quadam ab hominibus

nibus impositâ necessitate pertrahebat : vel denique voluisse Deos suos & Deum esse partes vel virtutes magni Jovis, & quasi quædam ejus magni Dei membra, quem mundi animam esse putabant, ut ex Augustino *lib. 4. de Civit. cap. 11.* patet. At Catholici non dicunt species sacramentales esse corpora divinitatis, nec eis divinitatem alligari virtute humana, nec ibi partem divinitatis existere; sed corpus Christi ibi virtute & insigni Dei miraculo adesse, Divinitate ubique protensâ, & corpore ipso in cœlo modo connaturali remanente. Insuperissimè ergo initur comparatio inter Eucharistiam Christianorum & simulachra Paganorum.

Ex quibus patet ad tertium responsio; nam species sacramentales non sunt repræsentationes divinitatis, vel sedes in quibus coarctetur Deus ubique præsens, imò nec Christi corpus ibi modo spiritali totum in toto, totum in qualibet parte residens, & aliunde in cœlis modo extenso & connaturali perseverans, nec deferens cœlestia, ut habitet in Altari. Patet etiam ad quartum; nam idololatræ primæ opinionis ( quibus solis id à Patribus objiciebatur ) existimabant simulachra esse corpora divinitatis habentia oculos & aures, nihil tamen videntia vel audientia. At species sacramentales non sunt corpora divinitatis, nec habent oculos, vel aures. Divinitas etiam nostra ubique videt, & audit præces nostras. Ex quibus tandem patet ad ultimum; nam divinitas nullis obnoxia est injuriis: corpus etiam Christi gloriosum ibi ad modum spirituum existens ab illis omnibus immune est, quæ in solas species creatas cadunt. At simulachra erant vel corpora falso.

rum Deorum, vel propriæ & solæ eorum sedes, unde injuriæ illis illatæ in divinitatem ea animantem, vel in illis coarctatam meritò refundebantur. Illud etiam observandum, omnes illas objectiones nobis nostræque causæ plurimum prodesse; si enim tanto zelo Ethnici Dæmonis suasu summinâ veneratione impia simulachra, in veri Dei contemptum colebant, majoris nos decet verum Deum in Eucharistia absconditum ardore & omnigenis religiosi cultûs significationibus in despectum cacodæmonis venerari.

Instabis: Non solùm Christum, sed etiam species consecratas ratione conjunctionis cum Christo adorant Catholici: atqui, illæ species sunt aliquid creatum: ergo Catholici adorant creaturam, subindeque in idololatriæ crimen infandum incurrunt.

Respondeo Catholicos non solùm ab idololatriæ crimine, sed etiam specie esse alienissimos. Quantum verò ad cultum specierum attingit, docent plures Theologi, quos inter Thomistas sequitur Marcus Serra, solum Christum in Eucharistia adorari. Nec obest quod Tridentinum *sess. 22. cap. 5.* dicat, latriæ cultum huic sanctissimo Sacramento in veneratione exhiberi. Non obest, inquam, quia licet sacramentum formaliter pro speciebus supponat, ibi tamen sacrum Concilium accipit continens pro contento. Unde suam doctrinam in definitionem reducens sancta Synodus *can. 6.* sic habet: *Si quis dixerit in sancto Eucharistia sacramento Christum unigenitum Dei Filium non esse cultu latria etiam externo adorandum, anathema sit.* Alii tamen Theologi concedunt species

cies consecratas ut conjunctas corpori & sanguini Christi posse & debere adorari, non quòd illæ motivum & simul terminativum adorationis objectum sint, sed quatenus solius objecti terminativi rationem habent. Quia nimirum intimior est cum corpore & sanguine Christi specierum Eucharisticarum conjunctio, quàm regiae purpuræ, diadematis, aut sceptri cum Rege; quæ tamen eundem cum Rege cultum terminant, sola licèt regia majestas sit venerationis motivum. Et certè si accidentia naturalia corporis Christi cultu patriæ sunt adoranda, quia ita unum cum corpore Christi faciunt, ut ea qui tangit & videt, corpus Christi tangere & videre censeatur: quidni idem de speciebus Eucharisticis dici licebit, quas qui tangit & videt, corpus Christi tangere & videre juxta tritum Patrum loquendi modum censeatur? Nudas ergo species in illo cultu non apprehendimus, sed in Christum verum adorationis motivum mentem attollimus. Adorantur species illæ, non quòd rationem formalem ob quam adorantur in se habeant, sed quia Christo eam rationem habenti conjunguntur. Hac ratione adoratur humanitas Salvatoris, quia cultum terminat, cujus motivum est solus Deus. Si verò illæ species sine illa conjunctioe ad Christum, cujus sunt velamenta spectentur, considerenturque ut partes essentielles sacramenti ad nostram sanctificationem institui, non sunt quidem patriâ soli Deo eximiâ colendæ; quia tamen sunt aliquid sacrum, aliquâ eas coli veneratione oportet, quatenus reverenter, religiosèque sicut res aliæ sacræ tractari debent.



## R E F L E X I O.

Permanet Christus in Eucharistia : ergo inibi permanenter , & si fieri posset , indefinenter adorandus foret. Hinc animæ sanctæ singularis pietatis laude insignes divinissimum hoc sacramentum Calvinistarum impietate tantopere inhonoratum , præcipuâ sibi pietate colendum elegerunt , ejusque perpetuo sese cultui dicarunt , devoverunt , consecrarunt. Hinc in quibusdam sanctissimis monasteriis non solum officium corporis Christi quintâ quaque feriâ , approbante Sede Apostolicâ recitatur , sed etiam quædam de sacrarum Virginum cœtu coram Sanctissimo Sacramento semper assistunt , ut Sanctum Sanctorum in sanctuario realiter residentem continenter adorent , atque ut fermè perpetuas à nostratibus hæreticis tanto Sacramento illatas injurias adorationis perpetuitate sarciant. Sicut religiosæ vitæ observantiâ Angelicos mores æmulantur , ita hoc potissimum Instituto Seraphinorum ardores imitantur , qui ut dicitur Isaïæ 6. *Clamabant alter ad alterum, & dicebant : Sanctus , sanctus , sanctus Dominus Deus exercituum : plena est omnis terra gloriâ ejus.* Mysticis etiam illis animalibus oculis plenis morem gerunt , de quibus *Apocalypseos 4.* Joannes ait : *Requiem non habebant die ac nocte dicentia : Sanctus , sanctus , sanctus Dominus Deus omnipotens.* Et sanè non poterant melius Virgines prudentes nefandæ Calvinianorum hæreseos in Eucharistiæ excidium conjuratæ impietatem quàm eâ pietate pensare , quæ jugi adoratione jure sacrificium prosequitur

sequitur. Non poterant apertius eum quo flagrant divinissimi mysterii amorem & reverentiam significare, quàm eo perpetui Eucharistiæ cultus testimonio, non verbis tantùm expresso, sed in factis omni eloquentiâ disertioribus impresso; nec in uno tantùm, aut altero facto, sed in totius vitæ serie perpetuæ Christi in Altaribus residentis adorationi consecrate.

Certè si exinanitioni exaltatio jure merito respondeat, quid justius quàm ut in eo sacramento Christus jugiter adoretur, ubi propter nos à suæ majestatis fulgore pallescens ita se humiliat, ita Deo, ita hominibus se supponit, ut pœnitentis & agni pro nobis occisi personam jugiter gerat, & pro nobis impleat. Quidni Deum majestatis post suam exaltationem rursam se deprimentem, ut se totum in nostros usus expendat, pro virili extollemus, & cordis corporisque demissionibus ad centrum usque terræ, si possibile foret, inflexis & prœmissis venerabundi significabimus? Utiq; te Domine cerno usquequaque humiliatum, ad summas scilicet panis angustias depressum stricteque redactum, impiorum etiam manibus obvium, & quod horribile dictu est, eorum sacrilegis communionibus conculcatum. Quis ergo mihi det non modò ut ad humum memet usque dejiciam ac deprimam, sed ut in tantæ humilitatis etiam tuæ honorem & compensationem sanguinem profundat servulus vilissimus, & ad nihilum, si opus esset, redigatur? Quidni pro te honorando, te inquam, quem tam supra me in hoc sacramento esse scio quàm propter me; cujus, inquam, curam

excubare pro salute mea quotidie experior, obijciam me mucronibus hæreticorum tanto tuo beneficio insidiantium, & substernam corpus meum, si per stragem illam meam ad honorem tuum iter struam; sternam, & aliquatenus muniam? Mihi ad honorandam tanti Sacramenti, ubi te totum Christe realiter possidemus, magnitudinem pectus angustum est, & cum illam satis æstimare nequeam, quæ reapse inæstimabilis est, illam quemadmodum sentio eloquar non verbis sonantibus, sed factis pronuntiantibus, si mortem pro te oppetam, tibi ut æternus honor & gloria, mihi autem confusio faciei obveniat.

Gaudeo planè dum populi Christiani, Principum etiam & Regum in honorando tanto sacramento certatim conspirantium fervorem intueor; sed unum, fateor, est quod me dolore defigit. Itane Catholici venerabile & mirabile sacramentum reverentur, qui nihil sunt de componendo ad recipiendum divinum epulum animo solliciti, qui cum iisdem semper hæreant flagitiis, nullam futuræ emendationis spem ostendunt, & tremendam mensam nefandis piaculis polluunt? Næ illi non magni divinissimi Mysterii adoratores sunt, qui è flagitiorum cœno prodeuntes, dignos se pane Angelorum rentur, cum hominum cibis indigni sint; & Christi se tremendæ mensæ circumfundunt, qui tot illam sacrilegiis dedecorant. Solus ille realem Christi præsentiam veneratur, qui externum cultum ab interna pietate proficiscentem exhibet. Solus ille transubstantiationis miraculum honorat, cujus cor lapideum & peccati duratum frigore in cor carneum

neum & amoris flammâ molitum commutatur. Solus ille tantum sacrificium prout oportet adorat, in quo nec vitia vigent, nec cupiditates flagrant, sed mundo, peccato, & sibi mori didicerunt. *Neceſſe eſt*, inquit Magnus Gregorius *lib. 4. dialog. cap. 55. ut cum hac agimus, noſmetipſos Deo in cordis contritione mactemus; quia qui paſſionis dominica myſteria celebramus, debemus imitari quod agimus. Tunc ergo verè pro nobis hoſtia erit Deo, cum nos ipſos hoſtiam fecerimus.*

---

## CAPVT II.

*De materia & forma ſacramenti Eucharistia, atque de modo quo Chriſtus in Eucharistia exiſtit.*

**Q**Via ad omne ſacramentum novæ legis certa materia & præſcripta quædam verborum forma deſideratur, ad plenam hujus ſacramenti naturam pernoſcendam operæpretium eſt conficiendæ Eucharistiæ veram materiam, veramque formam exponere. Sed quia ſtatim poſt conſecrationem & inſtitutorum verborum prolationem verum Domini noſtri Jeſu Chriſti corpus, veruſque ejus ſanguis in Eucharistia exiſtit, ſtatim ſe offert indagandum, quid vi verborum, quid concomi-



tanter in alterutra specie existat, atque de modo quo Christus sub illis præsens adest.

## SPECVLATIO I.

*Panis & vinum vera sunt & sola  
sacramenti Eucharistia  
materia.*

Circa materiam ex qua conficienda sit Eucharistia, varii multipliciter errarunt hæretici. In primis Gnostici à Simone Mago exorti, & à Nicolao uno è septem Diaconis adaucti horrendum in modum prolapsi sunt. Hæret animus calanufque, nec illa in medium audet producere spurciloquia, quæ Apostolus in nobis prohibet nominari. Verùm ut pateat in quàm deplorandas exerrationes humanum animum sibi permissum & à Deo desertum præcipitem agi necesse sit, non abs re erit hæc occulta dedecoris exponere, quorum fides impietatis magnitudine elevaretur, nisi S. Epiphanium testem haberemus omni exceptione majorem. Narrat ergo *lib. de hæresibus, hæresi 6.* in illa secta, quam meritò sterquilinum dixeris, virum & mulierem adulterantes, ex profluvio seminis maris excipientes ad cælum manibus expansis offerre solitos, cum hoc carmine: Hoc tibi munus, nimirum Christi corpus offerimus. Illo etiam vescentes dicebant: Hoc est corpus Christi: Hoc est Pascha. Menstruos etiam sacrilegarum mulie-

rum

rum profluvios (horresco referens) colligentes offerebant aientes : Hic est sanguis Christi. Pascha verò celebrasse se existimabant, si gravidæ mulieris fœtum vi extractum in mortario cum pipere, melle, & aromatibus pistillo contererent, & execrandum farcimen mox vorarent. Hanc nefariam turpitudinem imitabantur Manichæi, qui Eucharistiam humano semine conspersam sumebant, ut August. *lib. de hæresibus, hæresis* 46. refert.

Cataphryges, à Phrygia quam incolebant sic dicti, aliam materiam pro Eucharistia assignabant, sin æquè impuram, certè magis feram. Nam ut refert Augustinus *lib. de hæresibus, hæresis* 26. sacramenta funesta habebant : infantis enim anniculi sanguine, quem de toto ejus corpore minutis punctiõnum vulneribus extorquebant, quasi Eucharistiam suam conficiebant, admixtâ tamen farinâ ut panem conficerent. Puerum inde mortuum habebant pro martyre, superstitem pro magno Sacerdote. Ortum duxit hic non tam hominum quàm beluarum grex à Montano hæreticorum post hominum memoriam amentissimo, qui se Spiritum Paracletum, adjutricibus insanis mulieribus Priscâ & Maximillâ somnia inanissima pro veris prophetiis venditantibus, cominisceretur, cùm ne quidem sensu communi præditus esset. Istos hæreticos sequuti sunt Peputiani idem de sanguine infantium pro Eucharistiæ materia conficientes, ut *hæresis* 27. refert Augustinus.

Circa Eucharistiæ materiam errarunt etiam Artotyristæ, seu Panicaseistæ, qui panem & caseum offerebant : & Aquarii, qui ut refert Au-

gustinus *hæresi* 64. aquam in poculo sacramentali offerebant, à vino tanquam ab aliquo diabolico abstinentes, ut tradit S. Epiphanius; unde Encratitas seu Abstinentes, referente Theodoro, se nominabant. Ideo etiam solam aquam adhibebant, quia ut colligitur ex Cypriano *epist.* 63. timebant ne fervente Decii persecutione hausti odore vini proderentur, magnanimi scilicet Christi milites: nam qui sanguinem Christi erubescabant bibere, suum propter Christum sanguinem quomodo fudissent? De recentiorum hac in parte hæresibus postea dicemus.

Verum hæc omnia deliramenta refellere & veritatem speculationis nostræ stabilire in promptu est. Tum quia de pane id expressum habemus Matth. 26. *Cœnantibus illis, accepit Iesus panem.* Quod Marci 14. Luca 22. 1. Cor. 11. inculcatur. De vino etiam vitis, seu ex fructu vitis expressio patet ex Matthæo & Marco, qui calicem consecratum fuisse vini, apertè indicant, dum hæc verba Servatoris subjiciunt: *Non bibam a modo de hoc genimine vitis.* Quanvis enim Lucas duplicis calicis, communis nimirum & sacri mentionem fecisse videatur, & innuere hæc verba dicta esse de calice communi, cum ea verba ante consecrationem dicta referat: attamen dicendum est juxta Augustinum *lib.* 3. *de consensu Evangelistarum*, cap. 3. unum & eundem fuisse calicem à Luca bis commemoratum, semel præoccupando, & iterum ordine suo post consecrationem panis. Neque enim series rerum in Eucharistiæ institutione factarum ex verborum ordine, ut supra notavimus & scripturâ confirmavi

firmavimus , sed ex eorum sensu colligenda est.

Affertio etiam nostra Patrum testimoniis, Conciliorum decretis , perpetuâ Ecclesiæ traditione constantissima est. Testimonia passim obvia huc asportare supervacaneum est. Ratio verò non est alia quàm instituentis voluntas, qui hanc materiam delegit & ipso suo usu designavit. Quod autem ipse fecit , faciendum aliis præcepit , dum dixit : *Hoc facite in meam commemorationem*. Sicut ergo materia Baptismi est vera & naturalis aqua , quia aquam simpliciter dictam Veritas designavit ; ita quia panem & vinum Christus consecravit , & ita faciendum discipulis imperavit , non est dubium, quin panis simpliciter & absolutè talis , & similiter vinum sint genuina hujus sacramenti materia.

Nec desunt aptæ hujusmodi materiæ convenientiæ. Primò , quia sicut pane & vino homines communiter reficiuntur , ita convenienter illa materia ad Eucharistiæ sacramentum electa est , quo animi nostri cœlesti cibo reficiuntur. Secundò Eucharistia præteritæ Christi passionis signum est , & corporis à sanguine separati repræsentatio ; quotiescumque enim hunc panem manducamus , vel calicem bibimus , mortem Domini annunciamus donec veniat : at panis corpus ex sanguine , vinum sanguinem in passione Salvatoris fustum aptissimè repræsentat. Tertiò Eucharistia etiam Ecclesiæ unitatis symbolum est , unde & communicatio dicitur , non solum quia per eam divina nobis communicata participamus , sed , quia est communis unionis signum, communis dilectionis



nis vinculum, commune Religionis centrum, in quod omnes fideles unanimes veluti lineæ confluunt, juxta illud Apostolicum : *Unum corpus multi sumus omnes qui de uno pane, & de uno calice participamus.* At hæc communis unio optimè per panem ex multis granis confectum, optimè per vinum multis è racemis expressum, uti Augustinus observat, designatur. Quartò Eucharistia est futuræ gloriæ, quâ Deo satiati torrente voluptatis potabimur, & inebriabimur ab ubertate domus Dei, signum prognosticum, & pignus suavissimum; nam qui manducaverit ex hoc pane vivet in æternum. Sub illis ergo symbolis convenienter Eucharistia, quæ dicitur frumentum electorum, instituta est, quibus homo satiatur, & satiatus in profusam erumpit lætitiâ.

Nonne, inquires, expressior foret cruentæ Christi passionis repræsentatio per animalium occisorum carnes, quàm per simplicis panis vinique elementa? Expressior esset, fateor, sed minus aptior, tum ad unitatem Ecclesiæ repræsentandam, tum ad usum fidelium, tum ad hujus sacramenti puritatem & castimoniam significandam, cum non parum impuritatis in carnibus occisorum animalium insit. Convenientiùs ergo illa materia instituta est, quæ fuit hominis innocentis alimentum; cujus consecratione Christus est Sacerdos secundum ordinem Melchisedech, qui panem & vinum obtulit Altissimo; quæve in omnibus terris nascitur, ut triticum; vel certè ad omnes terras de facili asportatur, quantum ad usum hujus sacramenti sufficit, ut vinum.

Nec obest, quod vinum quibusdam infirmis  
nocet

nocet. Non obest, inquam; tum quia vinum in modica quantitate nocere non potest; tum quia si timetur nocumentum infirmis, vel nausea abstemiis, nihil inde detrimenti eis creatur, cum totus Christus in utraque specie recipiatur. Non obest etiam canon 3. Apostolorum; quo licere dicitur ad altare novas spicas, uvas, oleum, & incensum offerre. Non obest, inquam; tum quia in priori canonis parte vetitum est Sacerdoti aliud præter id quod Christus instituit offerre, puta mel, lac, aves, vel animalia ulla, aut legumina. Cætera verò posteriori parte permittit, vel ad honorem sacrificii concedit, puta oleum ad luminaria, & incensum quo altare suffitur; vel ad alimentum ministrorum, ut spicas & uvas maturas tanquam primitias, quæ etiam offeruntur ut benedicantur, & benedictæ à Fidelibus comedantur.

*Observanda circa materiam Eucharistia  
scitu necessaria. Et primum, quis  
& qualis panis?*

Porro circa memoratam Eucharistiæ materiam nonnulla sunt quæ observentur dignissima. In primis panis Eucharisticus omninò debet esse triticeus, ut contra Cajetanum docent communiter Theologi, & expressè determinatur in litteris unionis Concilii Florentini. Id etiam docet Catechismus Romanus sæpe laudatus numero 13. disertè inquit, nullum panem nisi triticeum aptam ad hoc sacramentum

mentum materiam putandum esse. *Hoc enim, ait, Apostolica traditio nos docuit, & Ecclesia auctoritas firmavit.* Accedit primò, quod panis ille congrua hujus sacramenti materia solus censendus est, in quo Christus Eucharistiæ author hoc sacramentum confecit: sed Christus panem triticeum consecravit, qui ut suprà monstravimus, pane azymo usus est: azymus autem ex præcepto Domini, quod habetur Exodi 29. ex simila triticea, id est ex purissimo farinæ tritici flore conficiebatur. Accedit rursum, quod ut ait S. Thomas *art. 4.* solus triticeus apud homines panis simpliciter dicitur; nec alii nisi in hujus defectum introducti sunt & in usum veniunt.

Ex quibus infert S. Doctor, materiam hujus sacramenti non posse esse filiginem, si per filiginem intelligatur granum tritico inferius, quod vulgò secale vel arinca dicitur; secus si filigo accipiatur pro candidissimo tritici genere, à seligendo apud Plinium & Isidorum dicto. Idem dicendum de hordeo, spelta seu zea, farre, millio, oryza, aliisque, ex quibus non nisi in defectum tritici panis conficitur. Idem de amido vel amylo censet S. Doctor, quia cum ex tritico corrupto fiat, ex eo confectus panis non censetur usualis. Idem docet de tritico variis alterius speciei granis permixto, quia multa permixtio speciem solvit & mutat; si tamen modica sit, sicut non impedit quominus panis sit simpliciter triticeus, ita ex eo confici Eucharistia potest.

*Panis Eucharistia quomodo coagmentatur?  
Præclara Ordinis S. Benedicti  
cautela. Figura hostia.*

Observandum secundo, panem triticeum debere esse ex aqua naturali coagmentatum, quia non verus & usualis panis ille censetur qui ex ovis vel lacte, vel aqua rosacea, aliave artificiali conficitur, unde apta nequit esse hujus sacramenti materia. Debet etiam panis ille calore ignis concoqui, quo solo panis usualis efficitur, & forma substantialis panis introducit. Debet etiam esse fixus & solidus; puls enim ex farina licet triticea & aqua naturali confecta & igne naturali decocta non censetur panis usualis.

Hac de causa magna cum cautela & circumspeditione panis in Eucharistia consecrandus confici debet, & pietas Patrum æmulanda est. Refert Lanfrancus *lib. decretorum pro Ordine S. Benedicti, cap. 6.* illius Religionis Monachos tanto studio Eucharistiæ materiam perasse, ut frumentum granatim eligerent, in sacculum mundum, aptum, & fortem reponerent; famulo boni studii ad deferendum in molendinum committerent, qui aliud frumentum moli prius curaret, ut frumentum in usum Eucharistiæ destinatum nullam alienæ farinæ sordem contraheret, vel retineret. Farinam è molendino asportatam sacrista albâ indutus & velato amictu capite incerniculo cribrabat. Constituto autem die Sacrista cum aliis adjutoribus



toribus fratribus, facie manibusque lotis, albis indutis, amictibus velatis ad panem Eucharisticum seu hostias elaborandum & concoquendum eo se ordine accingebant. Eorum unus farinam aquâ conspersam super tabulam mundissimam fortiter compingebat & macerabat: alter qui ferra in quibus hostiæ coquebantur tenebat, nullâ albâ vel amictu indutus, solas manus chirothecis involutas habebat: alii Psalmos & varias preces piè recitabant; omnes arctissimum silentium servabant, famulo interim ignem accendente & fovente lignis siccis, & ante multos dies de industria præparatis. Idem ferè habetur in antiquis statutis Cluniacensium *cap. 55.* in quibus etiam cavetur, ne hujusmodi opus post prandium fiat, utque ne vel saliva, vel flatus ullius aliquo modo ad hostias pertingat. Eadem pietate & accuratone panem Eucharisticum paratum in Ecclesia Romana fuisse refert Humbertus contra calumnias Græcorum Schismaticorum. Theodulphus etiam Aurelianensis Episcopus, qui sæculo 9. floruit, epist. ad suum Clerum panem Eucharisticum vel ab ipsis Sacerdotibus, vel ipsis saltem præsentibus nitidè studiosèque parari præceperat, nihil ut in illo vile, nihil non probatum inveniat. Idem statuerat sub finem sæculi 7. Concilium Toletanum *16. can. 6.* Refert etiam Fortunatus in vita sanctæ Radegundis *lib. 1. cap. 7.* quod suis manibus oblationes factas Sancta hæc venerabilibus locis dispensabat.

Quantum verò ad figuram consecrandæ hostiæ attinet, observavit dudum Ecclesia, ut rotunda, orbicularis, & circularis sit. Ita enim panem super mensam Domini in sacrificium esse

esse offerendum statuit Concilium Toletanum  
mox relatum. Ejus etiam ritus meminit S. Epi-  
phanius in *Ancorato, circa medium*. Et quan-  
vis figura quælibet sit integritati sacramenti  
omniñò accidentalis ; attamen Ecclesia Latina  
traditionis sacræ tenax, hanc figuram à Patri-  
bus probatam religiosè custodit, quâ & per-  
fectio divinitatis Christi, quæ principio & fine  
caret ; & perfectio humanitatis, quæ totum  
terrarum orbem circulari figurâ constantem  
redemit, designantur. Solet etiam communis  
pani Eucharistico imago imprimi Crucifixi  
Domini nostri, ut in tanti sacrificii memo-  
riam hanc hostiam offerri significetur. Aliter  
figurant panem Eucharisticum Græci, ut refert  
Petrus Arcudus *lib. 3. cap. 38*. Aliquando enim  
utuntur figura circulari, quæ tamen in se qua-  
drangulum continet unâ cum cruce & his lit-  
teris abbreviatis, *Ἰησοῦς Χριστός νικῶν*, Jēsus Chri-  
stus vincit. Aliquando merè quadrangulari  
utuntur cum cruce, & litteris præfatis. In sa-  
crificio autem quanvis figuram contingat esse  
circularem, Sacerdotes tamen quadrangularem  
in circulari inclusam quatuor adhibitis inci-  
suris, & conceptis quibusdam verbis eximunt  
ad consecrandum, ut ex Liturgia Græcorum  
patet. Figuram à Latinis observatam damnat  
Simeon Thessalonicensis in suo de Sacramentis  
libro, sed ineptis & ridiculosissimis argumen-  
tis, vel potius nugis, quas ibidem confutat  
Arcudius ; sed quæ à nobis referantur indignis-  
simæ sunt.

*Convenientia panis azymi. Schismaticorum & hæreticorum calumnia elisa.*

Observandum tertio, quod licet panis triticeus, sive fermentatus sit, sive azymus, idonea sit & valida hujus sacramenti materia, convenientior tamen est panis azymus. Quod uterque panis sit apta Eucharistiæ materia, patet: tum quia utrique propria ratio panis, proprium & nomen convenit. Tum quia ita definiit Florentinum, & de facto annuente Catholica Ecclesiâ in fermentato celebrant Græci, imò & Latinos aliquando ita celebrasse Richardus, Scotus, & Durandus opinantur, in detestationem hæresis Ebionitarum legalia simul cum Evangelio permiscantium: unde Sancti Patres ne eis consentire viderentur, instinctu Spiritus sancti Eucharistiam in fermentato ad tempus confecerunt. Sed hæresi illâ extinctâ, inquit, Romana Ecclesia ad pristinum morem, quem ab Apostolis receperat, reversa est. Veruntamen Ecclesiam Latinam azymo ad Eucharistiam pane semper usam fuisse, nec Ebionæos fuisse notatos quod azymis in Eucharistia uterentur, sed quod utendo azymis se legem Mosaicam unâ cum Evangelio observare existimarent, probabilius reor & infra confirmabo. Utut sit, unusquisque Sacerdos juxta receptam Ecclesiæ suæ consuetudinem celebrare tenetur: & sicut peccaret Presbyter Latinus celebrans de pane fermentato, ut ait S. Thomas *quest. 74. art. 4.* ita peccaret Presbyter Græcus celebrans de pane azymo, quasi pervertens Ecclesiæ

clesiæ suæ ritum. Quia nemini licet privatâ authoritate, vel potius temeritate Ecclesiæ suæ ritum immutare. Latinus tamen Sacerdos iter agens per Græciam latino ritu in azymo celebrare potest, quia ad suam Ecclesiam pertinere censetur. Potest tamen Ecclesiæ Græcæ ritui probato sese accommodare, juxta regulam Ambrosii ab Augustino *epist.* 118. laudatam: *Ad quam fortè Ecclesiam veneris, ejus morem serva, si cuiquam non vis esse scandalo, neque quemquam tibi.* Modò tamen omnes Liturgiæ Græcæ ritus observet; neque enim fas est ex una Ecclesia conditionem panis, ex alia cæteros ritus usurpare. Legatur constitutio Pii V. anno 1566. edita, quæ incipit, *Providentia Romani Pontificis*; ubi omnes facultates Latinis ritu Græco, & Græcis ritu Latino celebrandi concessas revocat.

Convenientiùs tamen panem azymum ab Ecclesia Latina usurpari suadetur tum ex institutione Christi, qui primo azymorum die, quo nihil fermentati domi Judæi habebant, Eucharistiæ Sacramentum confecit. Tum quia hæc materia mirum in modum & puritati Christi, & integritati ac mentis munditiei; quam fideles ad hoc sacramentum afferre debent, convenit. Unde Apostolus 1. Cor. 5. ait: *Expurgate vetus fermentum, ut sitis nova conspersio, sicut estis azymi. Etenim pascha nostrum immolatus est Christus. Itaque epulemur non in fermento veteri, neque in fermento malitiæ & nequitia, sed in azymis sinceritatis & veritatis.* Quæ rationes Græcorum momentis præponderant.

Dices: Panis azymus, utpote legalis, pertinet



net ad vetus Testamentum, non ad Evangelium; non est etiam panis usualis. Atqui in lege Evangelica non sunt observanda legalia, & panis usualis solus idonea est Eucharistiæ materia. Ergo panis azymus non est apta Eucharistiæ materia.

Respondeo Ecclesiam Latinam uti azymo non ut legalia servet vel judaïzet; sed ut Christo sponso suo morem gerat. Et certè si argumentum quidpiam efficeret, probaret etiam usum panis fermentati esse illicitum, utpote legalem; nam ut ex Levitici 7. & 13. patet, panes fermentati Deo offerebantur. Ad id verò quod dicitur, panem azymum non esse usua-lem: Respondeo per panem usua-lem illum intelligi, qui ex farina triticea, & aqua coagmen-tatus igne naturali concoquitur; & in hoc sen-su panis azymus est usualis, licèt quòd careat fermento, non sit ita usurpatus, sed hoc omni-no accidentale est materiei: sicut aqua naturalis est materia Baptismi; quod tamen illa aqua sit sale aliquo condita, vel aliis benedictionibus præparata, est aliquid accidentarium; nec usi-bus ordinariis frequentatum. Panis ergo azy-mus usualis rectè dicitur, quia ex rebus illis conficitur, quæ in usum panis ordinarii quo-tidie veniunt.

Ex his sequitur 1. calumniosè & erroneè Græcos Latinam Ecclesiam erroris insimulare, quòd in azymo celebret. Cœpit hoc schisma circa annum 860. anno verò 1053. Michaël cognomento Cerularius Patriarcha Constantinopolitanus, & Leo Archiepiscopus Acridanus vehementem adversus Latinos epistolam ad Episcopum Kouvensem scripserunt, in qua  
Eccle

Ecclesiam Latinam accusabant, quòd sabbatha in Quadragesima custodiret, cùm eo die jejuna-  
 ret; quòd suffocatis vesceretur; quòd Alle-  
 luia in Quadragesima non psalleret; quòd de-  
 mum in azyino Eucharistiam conficeret. Ulti-  
 mum autem mòrem inde ibi reprehendunt,  
 quòd vox *ἀπὸ*, quæ in Evangelio habetur,  
 significat panem elevatum, sic dictum à fer-  
 mento & sale, à quibus calorem habet & ele-  
 vationem; azymus autem est similis luto, nihil  
 saporis habens vel elevationis. Habetur hæc  
*epist. tom. 4. Bibliotheca Patrum editionis Pa-*  
*risiensis*, quam Humbertus Cardinalis Episco-  
 pus Silvæ Candi læ in Latinum idioma transla-  
 tam ad Leonem IX. quintum Pontificatus sui  
 annum agentem misit. Scripsit ad Michaëlem  
 Patriarcham & Leonem Archiepiscopum Leo  
 Papa, cujus epistola ordine prima in volumi-  
 nibus Conciliorum legitur. Ad summum Pon-  
 tificem rescripsit Patriarcha, Ecclesiæ unitatis  
 & pacis cupidus, vel certè simulator: cui Leo  
 Papa *epist. 6.* in Domino congratulatus est.  
 Anno sequenti 1054. Humbertum & Frideri-  
 cum Cardinales Legatos suos Constantinopo-  
 lim misit Papa, per quos ad Imperatorem  
 Constantinum Monomachum scripsit, laudans  
 ejus pacis zelum, & Michaëlis damnuans auda-  
 ciam, qui apertâ persecutione in Latinam  
 exardescens Ecclesiam, anathematizare non  
 timuerat omnes qui sacramenta attrectant ex  
 azymis. Scripsit etiam idem Papa ad Patriar-  
 cham, quem novum Ecclesiæ Latinorum ca-  
 lumniatorem, & publicum persecutorem ap-  
 pellat. Præsentibus Imperatore, Proceribus, &  
 Legatis Nicetas Monachus, dictus Pectoratus,  
 librum

librum de azymo adversus Latinos sub ipsius nomine editum reprobavit, qui liber insistentibus Legatis jussu Imperatoris in ignem projectus est. Sequenti verò die Nicetas Legatos adivit, & anathemate in suos errores iterum à se lato, in Legatorum gratiam & familiarem amicitiam receptus est. Ita refertur in actis brevioribus, quæ extant *tom. 4. Bibliotheca Patrum*. Michaël verò in errore pertinax colloquium & præsentiam Legatorum vitavit. Hinc Græci schismatici Latinos Azymitas palam vocitabant, ut patet ex tractatu adversus errores Græcorum, anno 1252. in Conventu Fratrum Prædicatorum edito, qui eodem Bibliothecæ tomo refertur. Perseveravit hic error ad tempora Concilii Florentini anno 1439. coacti.

Porro fundamentum schismaticorum à voce ἀζυμῶ defumptum, nullius momenti est, sed vanum prorsus ac puerile, cum panis dicatur ἀζυμῶ indifferenter, sive azymus fuerit, sive fermentatus. Nam panes propositionis ex lege debebant esse azymi; & tamen ἀζυμῶ in Scriptura dicuntur: & Exodi 11. ubi dicitur, *Comedetis azymos panes cum lactucis agreilibus*; in Græco habetur vox ἀζυμῶ. Denique Lucas refert quod Christus comesturus cum discipulis euntibus in Ematis, accepit ἀζυμῶν: quod tertia die Resurrectionis factum est, quo tempore in omnibus Judææ finibus nullus panis fermentatus inveniebatur; nam in Paschate per septem dies panis fermentatus nec edebatur, nec servabatur.

Sequitur 2. turpiter errasse Calvinum *lib. 4. Institut. cap. 17. §. 43.* dum ait in Eucharistia usurpārī

assurpari solitum esse panem fermentatum ante tempora Alexandri Romani Episcopi, qui primus azyino pane delectatus est, ut plebis oculos traheret magis quàm ut animos vera religione institueret. Et infrà Catholicæ Ecclesiæ ritum appellat hæresiarcha impiissimus frigidas & histrionicas nugas, quæ nullum alium usum afferunt, nisi ut stupentis populi sensum fallant. Quibus verbis non malitiam solum suam, sed & ignorantiam etiam prodidit novus iste Aristarcus; unde & quis Alexander hujus moris author fuerit tacet, ne mendacii convinceretur. Etenim in Ecclesia Occidentali ad consecrationem panis azymus semper assumptus est. Ita testatur Leo IX. epist. 6. ad Michaëlem Constantinopolitanum: *Illud autem, inquit, quis non stupeat, quod post tot Sanctos & Orthodoxos Patres per mille & viginti à Passione Salvatoris annos novus calumniator Ecclesiæ Latinorum emerfisti, anathematizans omnes & publicam excitans persecutionem, quicumque participarentur sacramentorum ex azymis.* Ubi testatur Ecclesiam ad sua usque tempora azymis in Eucharistia usam semper fuisse. Idem tradit Innocentius III. lib. 4. *Mysteriorum Missæ, cap. 4.* ubi de ritu panis azymi erroris à Græcis insolenter accusato agens sic habet: *Ab ipsis ergo Beatissimis Apostolis Petro & Paulo, quos vivos habuit & defunctos custodit, hunc sacrificii ritum accepit, quem hætenus inviolabili cultu servavit.* Idem tradit Algerus lib. 6. cap. ultimo: *Nulla, inquit, ratio cogit, ut azymum à Christi sacrificio repellatur: dignum est ut quod Christus instituit, omnis autem Ecclesia præter Græcam à primordio sui*



*ex traditione Principum Ecclesiæ , Petri scilicet & Pauli celebravit , indefinenter conservet. Testatur etiam Rupertus lib. de divinis officiis, cap. 22. consuetudini sanctæ Romanæ Ecclesiæ nunquam in sacrificio fermentatum admittendi totam Græciam nescio qua authoritate suffragante refragari. Quia nimirum unus nemo ante Græcos schismaticos usum panis azymi vitio vertit. Nunquam ergo in Ecclesia Latina etiam tempore Ebionitarum vel Ebioneorum pane fermentato Patres usi sunt ad sacrificium, sed tantum ad Eulogias seu panes benedictos, quos dari diebus Dominicis & festivis mos fuit in signum Ecclesiasticæ communionis , qui deinde in usum ministrorum , fidelium , & pauperum distribuerentur. Et hi panes fermentati dicuntur in vita Melchiadis & Syricii Summorum Pontificum, & cap. 5. epistolæ Innocentii I. ad Decentium. Quod patet ex eo quod prohibent Melchiades & Syricius , ne mittantur panes illi ad Presbyteros , nisi prius consecrati ab Episcopo fuerint : quod dici nequit de pane Eucharistico , quem Presbyteri consecrant. Innocentius verò statuit panes illos ad Ecclesias tantum civitatum esse mittendos , & non ad Parochias quæ sunt extra civitates : quod de pane Eucharistico intelligi nequaquam potest. Unde canon 2. Laodicensis prohibet Eucharistiam loco Eulogiarum mittere , distinguens panem Eucharisticum ab Eulogico , qui ultimus erat fermentatus , quemve fideles ultro citroque dare & accipere consueverant , & latiori significatu dicebatur sacramentum , quod esset signum panis Eucharistici ; & fidelium concordia. De eo videtur loqui Augustinus,*

*&*

& innuere solitum fuisse porrigi Catechumenis de quibus loquens *lib. 2. de peccatorum meritis*, cap. 26. ait: *Quod accipiunt (catechumeni,) quanvis non sit corpus Christi, sanctum est tamen, & sanctius quàm cibi quibus alimur, quoniam sacramentum est.* Quanvis aliqui illud quod auctore Augustino accipiebant catechumeni, de sale interpretentur, quod solitum erat catechumenorum sacramentum: & canone 5. Concilii III. Carthaginensis præceptum erat, ut catechumenis solitum duntaxat sal etiam per solennissimos Paschatis dies daretur. Conjecturis locus est, nihil certi definiri potest. Id solum constans, Ecclesiam Latinam nunquam fermentato in Eucharistia usam fuisse, quidquid Scotus & Durandus suprà memorati nihil in confirmationem suæ opinionis proferentes sentiant. Multò magis à veritate alienum est quod disquisitione de azymo Sirmundus ait, consultissimè ad azymos transisse Ecclesiam Latinam, sed seriùs. Id, enim cum adductis à nobis luculentissimis auctoritatibus hujus ritus in Ecclesia perpetuitatem demonstrantibus pugnat.

Sequitur 3. impiè debacchari adversùs Ecclesiam Romanam hæreticos Calvinistas, quòd Latinos azymo pane uti astringat, cum fermentato uti expediat, ut contendit hæreticus Chamierus *lib. 6. de Eucharistia*, cap. 6. asserens Ecclesias suas (si superis placet) reformatas tantò fermentata maluisse, quantò Papistæ confidentiùs azymi prætextu devenerunt tandem ad non panem, sed ad farinacea folia, quæ neque panis formam habent, neque pro pane usquam gentium fuere usitata. Sed hæretici Ec-

clēsiae Catholicae in praeparanda Eucharistiae materia mundissima accuratorem damnantis petulcitas ex his quae observatione secundâ dicta sunt contrita manet. Intolerabilior est Amandi Poloni *lib. 5. syntagmatum, cap. 56. Besæ epist. 2. ad Tillium, Scarpîi controversia 3. quaest. 1. de causa materiali sacra Cœna*, error quo existimarunt deficiente pane & vino licere ex alia substantia conficere Eucharistiam, quia id convenit cum mente iustitientis & fine sacramenti, utique Calvinistici, non Christiani. Sed non est novum hæreticis suas ab erebo excitatas imaginationes Scripturis & perenni traditioni è diametro repugnantes obtrudere, quas sine argumentis pudor Christianis infeminatus satis superque refellit.

*Materia calicis consecrandi vinum,  
& quale.*

Observandum 2. quod cum solum vinum vitigineum sit idonea calicis consecrandi materia, sequitur nec succum è malis granatis, pomis, piris, vel moris expressum, nec acetum, nec agrestam posse esse aptam consecrationis calicis materiam. Quia succus ille è fructibus eliquatus non est nisi similitudinariè vinum; acetum verò est vinum corruptum, & se habet ad verum vinum sicut cadaver ad animal; agresta verò seu omphacium nondum habet speciem vini. Mustum tamen, quia habet speciem vini, in casu necessitatis adhiberi potest, ordinariè tamen usurpari non debet, quia cum non sit purum & defæcatum, non rarò sordibus permiscetur. Vinum etiam  
con



congelatum, quanvis si fieri possit non debeat propter reverentiam sacramenti adhiberi, absolute tamen potest esse materia hujus sacramenti, etiamsi aqua gelu concreta non possit esse materia Baptismi. Quia cum sacramentum Eucharistiae non consistat essentialiter in usu, sed sit aliquid permanens ex rebusque permanentibus constans, non est necesse ut vinum ipso consecrationis momento bibatur, sicut fluidam esse oportet aquam Baptismatis, ut per illam possit corpus abluī. Unde dicitur in rubricis Missalis, ubi de defectibus Missae agitur, quod si species vini consecrati congelentur in calice, calix operiri debet pannis calefactis, ut liquefactus postea sumatur; quod si per pannum calidum liqueferi non potest, ponendus est calix in aquam ferventem prope altare donec liquefiat, & liquefactum bibatur. Quod argumento est congelationem à vino consecrationem non auferre, nec eam subinde necessario impedire. Nec est simile de vino pani imbibito, quod non potest esse idonea consecrationis materia, licet species vini consecrati quibus panis intingitur & imbuitur, retineant consecrationem. Non est, inquam, simile; quia vinum quo imbuitur panis nulla est ratione potabile; at vinum congelatum de facili bibi potest, nec gelatione amittit speciem potabilis. Nec est quod opponas, vinum in uva matura adhuc inclusum non minus esse potabile quam vinum congelatum; illa tamen nequit esse materia consecrationis calicis; ergo nec istud. Non, inquam, id dicas: quia uva vel botrus secundum omnium hominum sensum & usum.



non est vinum : vinum tamen, sive calidum, sive frigidum, sive congelatum, sive non, jure vinum apud omnes habetur.

*Vino aqua permiscenda, quo jure,  
& quanta?*

Observandum est quintò, vino aliquam aquæ naturalis guttam permisceri oportere, ut Sanctorum testimonio, Conciliorum autoritate, & inviolabili Ecclesiæ praxi perspicuum est. Christum enim consecrasse in vino aqua mixto habetur in Liturgia S. Jacobi his verbis : *Similiter postquam cœnavit, accipiens calicem & permiscens ex vino & aqua.* Quod & in Liturgia S. Marci, & in Liturgia S. Basilii repetitur. Idem docet Concilium Carthaginense IV. canone 24. *In sacramentis, inquit, corporis & sanguinis Domini nihil amplius offeratur, quàm ipse Dominus tradidit, hoc est panis & vinum aquâ mixtum.* Idem habetur canone 32. Concilii Quinisexti, ubi Liturgiæ Jacobi, & Basilii, & canon Carthaginensis referuntur.

Traditionis verò Ecclesiæ & praxis perpetuæ testes sunt Sancti Patres : Clemens Romanus lib. 8. Constitut. cap. 12. *Postquam, inquit, miscuit ex vino & aqua.* Irenæus lib. 4. cap. 57. *Christus accipiens calicis temperamentum.* Et libro sequenti vocat *mixtum calicem*, Cyprianus epist. 63. *Admonitos, inquit, nos scias, ut in calice offerendo dominica traditio servetur, nec aliud fiat à nobis, quàm quod pro nobis Dominus prior fecerit : ut in calice qui in commemoratio-*  
nem

*nem ejus offertur, mixtus vino offeratur. :: Invenimus calicem mixtum fuisse, quem Dominus obtulit. Idem docent Justinus Martyr. apolog. 2. Hieronymus in cap. 14. Marci, Ambrosius lib. 5. de sacrament. cap. 1. Augustinus lib. 4. de Doctrina Christiana, cap. 21. Hac de causa Concilium Tridentinum sess. 22. cap. 7. sic habet: Monet sancta Synodus, praeceptum esse ab Ecclesia Sacerdotibus, ut aquam vino in calice offerendo miscerent. Et canone ultimo: Si quis dixerit, aquam non miscendam esse vino in calice offerendo, eo quod sit contra Christi institutionem, anathema sit.*

Egregias hujus ritus congruentias affert de more S. Thomas. Tum quia credibile est Christum in coena vinum aqua temperasse pro suo bibendi more qui viros sobrios decet. Tum quia hac permixtione Passio Christi melius representatur, in qua aqua permixta sanguini fluxit è latere Salvatoris. Qua ratione Alexander Papa dist. 4. de consecratione, cap. In sacramento, & Tridentinum loco praefato utitur. Tum quia hoc ritu unio populi Christiani cum Christo capite significatur; aqua enim populum Apocalypsis 17. praefigurat, vinum verò sanguinem Redemptoris. Ergo cum aqua vino in calice miscetur, Christo populum adunari intelligitur. Qua ratione Cyprianus & Tridentinum locis memoratis usi sunt. Nec obest quod in Scriptura nulla hujus mixtionis mentio fiat. Non obest, inquam, quia aliunde, nimirum ex clarissimis Patrum testificationibus factum Christi tenemus. Ritum etiam illum justis piisque de causis potuisset Ecclesia instituere, illique obtemperare teneremur.

Non est tamen probanda Armacani sententia existimantis permixtionem aquæ esse de necessitate materiæ hujus sacramenti. Tum quia superius laudatum Tridentinum Sacerdotes ad tam permixtionem Ecclesiæ præcepto obligari docet. Tum quia nullibi hanc permixtionem à se licet factam Christus Dominus imperavit. Tum quia Cyprianus paulò ante memoratâ epistolâ ait, simplicitati eorum, qui aquam vino permiscere in Eucharistia conficienda prætermiserant, veniam posse concedi. Quibus verbis satis indicat, illicitè eos quidem pergis-  
 se, at validè sacramentum confecisse tamen. Nec obsunt alia ejusdem Cyprianî verba, quibus in eadem epistola affirmat, aquam debere vino calicis permisceri, sicut permiscetur farina, ex qua altera hujus sacramenti materiæ pars conficitur. Non obsunt, inquam, quia ut ait S. Thomas *quest. 74. art. 7. ad 2.* intendit solum Cyprianus convenientem esse illam aquæ permixtionem. Nec similitudo farinae ob aliud profertur, quàm ut ostendatur quid oporteat fieri, non quod tanta sit utriusque mixtionis & peræqua necessitas, cum aqua sit de essentia panis, non vini. Adde permixtionem aquæ cum vino non esse quidem tantæ necessitatis, quantæ permixtio aquæ cum farina in ordine ad sacramenti integritatem, benè tamen in ordine ad repræsentationem & significationem mysticam unionis populi fidelis cum Christo. Unde ibidem ait: *Si vinum quis offerat, sanguis Christi incipit esse sine nobis.* Quibus satis innuit sanguinem Christi sub speciebus solius & impermixti vini consecrati realiter quidem existere, sed unionem quâ populus Christianus  
 suo

suo Salvatori copulatur tam expressè non significari. Dico *tam expressè* ; nam cæteroquin hæc significatio habetur per hoc , quod multa grana in unum panem coëunt , & liquor è multis uvis eliquatus in unum vinum confluit.

Non obest etiam , quod Christus sacramentum hoc in vino aquâ mixto confecerit ; unde consequens videtur hanc mixtionem esse de præcepto divino , subindeque de necessitate sacramenti , cujus ea sola materia idonea censenda est , quam Christus sacramentorum author instituit. Non obest , inquam , quia sicut licèt Christus panem azymum consecraverit , non tamen sequitur solum illum panem esse necessariam hujus sacramenti materiam ; quia solum panem triticeum in materiam Eucharistiæ Christus delegit : ita similiter vinum , seu genimen vitis materiam calicis instituit ; mixtionem ejus cum aqua non instituit ad præceptum , sed in exemplum , ut quid conveniens , non necessarium.

Ex quibus sequitur errasse Armenos sæculo septimo , qui propter quemdam Chrysostomî locum malè intellectum arbitrati sunt , nullam aquam vino consecrando esse permiscendam. Eorum erroris fit mentio canone 32. Synodî Quinisextæ , seu Trullanæ , sic dictæ , quia ejus canones facti sunt in Trullo Palatio Constantinopolitano. Verba canonis sunt hæc : *Quoniam ad nostram cognitionem pervenit , quod in Armenorum regione vinum tantum in sacra mensa offerunt , aquam illi non miscentes quæ incruentum sacrificium peragunt , adducemus Joannem Chrysostomum hæc dicentem in inser-*



pretatione Evangelii secundum Matthæum : Quamobrem non aquam bibit cum surrexit , sed vinum ; improbam sanè hæresim radicitus exstirpans : & ex eo aqua in sacro sacrificio adjunctionem Doctorem subvertere existimant. Ut autem non ab hoc tempore imposterum ignorantia teneantur , Patris sententiam orthodoxè aperimus. Cum enim improba Hydroparastatarum , hoc est eorum qui aquam offerebant , antiqua esset hæresis , qui pro vino solâ aquâ in proprio sacrificio usi sunt ; refellens hic vir divinus detestabilem ejusmodi hæresis doctrinam , & ostendens quod directè Apostolica traditioni adversetur , id quod jam dictum est affirmavit. Nam & sua Ecclesia , ubi est illi pastoralis administratio tradita , aquam vino miscendam tradidit. Hanc , quam detestabilem hæresim Synodus appellat , renovare molitus est hæresiarcha Lutherus *lib. 6. contra Regem Angliæ* , ibi : *Meo sensu* , inquit , ( suo sensu omnia judicans hæreticorum post hominum memoriam audacissimus ) *melius & tutius foret aquam non miscere vino , cum sit merum figmentum humanum , & sinistram , imò pessimam habeat significationem*. Quia nimirum *Isaia 1.* dicitur : *Vinum tuum mixtum est aqua*. Sed non advertit homo hæresi inebriatus , & meri etiam non minùs quàm veneris amantissimus , eandem rem in Scripturis modò bonam , modò malam sub diversa consideratione significationem habere , ut patet de fermento , quod *1. Cor. 5.* corruptionem significat : Nescitis quia modicum fermentum totam massam corrumpit. Et *Luc. 12.* significat hypocrisim : *Attendite à fermento Phariseorum* , quod est hypocrisis. Et tamen idem fermentum in bonam

bonam partem accipitur Matth. 15. *Simile est regnum cælorum fermento.* Vinum pariter aqua mixtum malum aliquid significare potest, cum similitudo ducitur à cauponibus miscentibus aquam vino, ut impurum pro puro vendant, & ementes decipiant, Cæterum in bonam significationem usurpatur, dum symbolum est sobrietatis Lutheri tantoperè invisæ; unde dicitur Proverb. 9. *Bibite vinum quod miscui vobis.* Vel cum ad unionem membrorum cum capite, fidelium cum Christo, vel aliquam aliam mysticam bonæ rei significationem exprimendam adhibetur.

Sequitur rursus impiè discipulos Lutheri & Calvinii hæresiarcharum clamitare, & adversus Ecclesiam Catholicam debacchari, quod aquam vino admiscere præcepto obliget. Cum enim, inquiunt Kemnitius, Scarpus, Chamierus, sit res indifferens, & de numero earum quas *adiaphoras* vocant, unicujusque est arbitrio permit-tenda. Tantummodò in Papistis reprehendi-mus, addit hæreticus Chamierus, quod nullo præeunte verbo Dei peccata, & quidem morta-lia fingant. Nam si possent aliorum Christia-norum libertatem tolerare, nihil esset hac quid-  
dem in re quod cum eis verbum committere-mus. *Fortasse nec discessimus quidem* (inquit suæ apostasiæ & schismatis conscius) *ut qui non soleamus in rebus ejusce generis aut Ecclesiam occupare, aut ab ea nobis laborem creari.* Itaque tandem inter res mirè indifferentes & cujusvis privati Christiani arbitrio permitendas ritus ille Christi usu consecratus, à Patribus impera-tus, perperrâ traditione retentus, & cujus omis-sionem rebus detestabilibus vetustissima Con-

cilia accensuerunt, putandus est? Itane propter religiosum Patrum suorum cultum Ecclesia Catholica à spuris & apostasiæ suæ consciis filiis damnanda, vel tyrannidis insimulanda communis mater est? Itane de cujusvis arbitratu libertatis obtentu Ecclesiastici mores perenniter custoditi calcandi sunt? Si privatorum Reipublicæ probatos usus pessumdare volentium temeritas coercetur, omnia in Ecclesia susdeque miscere licitum erit? Id certè est Ecclesiam occupare nedum, sed eam etiam perditum ire moliri.

Observandum est sextò, aquam vino consecrando permiscendam oportere esse elementarem, in sua naturali conditione constitutam, & in modica quantitate. Elementaris quidem debet esse aqua, quia hæc simpliciter & absolute aqua dicitur, & ut talis usurpatur; sicut vinum simpliciter tale est vitigenum, & oleum simpliciter est oleum ex olivis expressum. Illa quoque aqua sola populos repræsentat, juxta id quod ex Apocalypsi dicimus. Debet etiam aqua in suo naturali statu adhiberi, id est nec alio liquore perfundi, nec tales fieri. Quia ita Christum adhibuisse credibile est, cum unus nemo Patrum aliter observet, cum etiam ita soleat vino communiter bibendo à viris sobriis usurpari. Fateor Græcos in calicem jam consecratum nonnihil aquæ ferventis injicere solere, sed prius frigidam vino consecrando permiscere, ut ex Liturgia Chrysostomi & Basilii patet. Injiciunt porro guttas aquæ ferventis, ut descensum Spiritus Sancti in Ecclesiam significant, ut ait Nicolaus Cabasilas in expositione Liturgiæ, cap. 37. Unde non debet improbari ille

ille eorum ritus, utpote antiquus, à quibusdam Sanctis, Chrysostomo nimirum & Basilio in suis Liturgiis commendatus, ad aliquid sanctum significandum introductus, & in Concilio Florentino ab ipsis Patribus Latinis probatus. Denique aqua apposita debet esse in modica quantitate. Tum ne solvatur species vini sæpe debilis & parum generosi, ut in frigidioribus regionibus esse assolet. Tum ut significetur excessus dignitatis Christi supra fideles per aquam designatos, quæ in illa unione absorbetur. Tum ut aqua in vinum possit converti, & eo mediante in sanguinem Servatoris. Unde Honorius III. libro 3. Decretalium relatus, perniciosi erroris & abusus eos infimulat, qui majorem aquæ quàm vini quantitatem adhibebant, cum secundum consuetudinem rationabilem Ecclesiæ generalis longè plus vini quàm aquæ adhibendum sit. Denique notat S. Thomas talem permixtionem in ipsa sacrificii celebratione, aut ejusdem præparatione fieri oportere, nec sufficere ad ea significanda quæ tali permixtione representantur, si aqua in dolio fuerit in antecessum apposita.

*Quæres 1. quid fiat de aqua vino infusa post consecrationem, & in quid evadat, aut transmutetur?*

Respondeo varias esse sententias. Primò enim aliqui posuerunt eam converti in aquam, quæ ex Christi pendentis latere fluxit. Sed hæc opinio jam exolevit, & inde rejicitur, quia in illud solum fit conversio, quod verbis consecrationis



crationis significatur, illa quippe verba efficiunt quod significant: patet autem verbis consecrationis calicis nullam significari conversionem appositæ aquæ in eam quæ de latere Christi manavit. Accedit quod illa aqua lateris ponitur sub speciebus vini vel vi verborum, vel per solam concomitantiam: non vi verborum, quæ eam poni non exprimunt, sed unum duntaxat sanguinem: si per concomitantiam, jam illa aqua non est potiori ratione in calice quàm in hostia; unde in eam speciali ratione aqua apposita non transmutatur.

Secunda sententia eorum est, qui posuerunt aquam in propria semper specie permanere vini accidentibus circumfusam. Sed eam communiter rejiciunt Theologi: tum quia veritas formæ exigit, ut totum quod demonstratur sit sanguis Christi: tum quia totum proponitur populo adorandum: tum quia Sacerdos post consumptas vini species censetur jejunos, quod indicio est aquam in sua naturali conditione non mansisse. Tum demùm quia accidentia non transeunt de subiecto in subiectum, nec subinde accidentia vini aquam afficiunt. Nec nova, & Ecclesiæ ignota miracula sunt in hoc sacramento sine necessitate multiplicanda.

Tertia sententia docet, aquam in propria specie ante consecrationem permanere, nec in vinum converti, sed vi consecrationis immediate in Christi sanguinem transmutari. Hanc opinionem dudum antiquatam & exoletam suscitavit Ægidius Coninchus, quem aliqui recentiores sequuntur. Sed refellitur primò authoritate Innocentii III. cap. *Cum Marthe*,  
de

de celebratione Missarum, ubi tres refert de hac difficultate sententias. Prima eorum est, qui dixerunt permixtam vino aquam in eam converti quæ de latere Salvatoris promanavit. Secunda est illorum qui censent aquam vino mixtam in vinum converti, & sic conversam in sanguinem Christi transubstantiari: innuit tamen hanc sententiam niti fundamento, quod nonnulli Physici inficiantur, qui aquam à vino per artificium posse asserunt separari. Tertia sententia ait non transire aquam in sanguinem, sed manere vini accidentibus circumfusam. Ex his verò tribus sententiis quæ tenenda sit, his verbis subinducat. *Verum inter opiniones prædictas illa probabilior judicatur, qua asserit aquam cum vino in sanguinem transmutari.* Ergo cum hæc sit secunda sententia, eam dubio procul Pontifex ille egregius amplexus est. Scio Coninchum respondere Innocentium secundam sententiam bimembrem distinxisse, nec primum membrum approbasse quo asseritur in vinum transire aquam mixtam vino, sed secundum elegisse, quo dicitur aquam cum vino in sanguinem transmutari, & abstraxisse ab illa philosophica quæstione, utrum vino mixta aqua in vinum convertatur. Sed præter quod non dixisset Pontifex aliquam ex his sententiis, nempe secundam, esse probabiliolem, cum ipse quartam invexisset; insuper omnia subterfugia Innocentius lib. 4. *Mysteriorum Missæ*, capite 4. occupavit. Ibi enim eandem versans quæstionem disertè docet, aquam transire in sanguinem, quia mixta vino transivit in vinum. *Quis enim ambigat (inquit) aquam in vinum transire*

*transire cum multo vino modicam infunditur aqua.*

Præterea hæc sententia, & opinio D. Thomæ asserentis aquam mixtam vino transire mediâtè in sanguinem Christi, mediante nimirum vino, in quod priùs aqua convertitur, stabilitur. Illud duntaxat convertitur immédiâtè in sanguinem Christi, quod est idonea calicis consecrandi materia, cum ideo duntaxat assumatur materia ut consecratione fiat ineffabilis elementorum transubstantiatio. Atqui solum vinum vitigineum apta est calicis consecrandi materia, ut ex perpetua traditione hætenus creditum est, & sacrorum Conciliorum Florentini & Tridentini definitionibus firmatum. Ergo aqua mixta vino non immédiâtè in Christi sanguinem, sed mediante vino, in quod priùs conversa est, transmutatur.

Nec valet evasio adversariòrum dicentium duplicem esse calicis consecrandi materiam; necessariam unam, nempe vinum; liberam alteram, nempe aquam vino mixtam, sicut peccata venialia libera sunt sacramenti pœnitentiæ materia. Non, inquam, valet: tum quia hujus duplicis materiæ commentum est in Ecclesia inauditum, sua proinde novitate in re tanti momenti sollicitè cavenda sponte liquefscens & corruens. Tum quia cum aqua non nisi ex præcepto Ecclesiæ sit permiscenda, nec talis permixtio sit de jure divino, ut ex dictis constat, manifestum est aquam non esse Eucharistiæ ulla prorsus ratione materiam: omnis quippe sacramentorum materia à Christo designata & instituta est, alioquin dicere licebit sal aquæ lustrali Baptismatis ex præcepto & ritu Ecclesiæ permixtum.

tum, & alia sacramentalia jussu Ecclesiæ materiis sacramentorum adjuncta ad eorum materiam pertinere. Tum quia ea materia libera censenda est, quæ absente necessariâ ad sacramenti integritatem sola sufficit: eâ enim ratione peccata venialia libera sacramenti materia dicuntur, quod eis forma absolutionis, non existentibus etiam mortalibus, validè applicari potest. At in nullius Theologi mentem adhuc venit, in sola aqua posse calicem deficiente vino consecrari, & oppositum dicere est in damnatam Aquariorum hæresim incurrere. Et certè grandis hallucinatio committitur dum aqua peccatis venialibus comparatur. Peccata enim venialia dicuntur libera sacramenti Pœnitentiæ materia, quia nullum est ea in confessione aperiendi præceptum, sed vera tamen sunt materia hujus sacramenti, cujus materia idonea est omne peccatum vero dolore contritum, & ore Sacerdoti apertum. Unde supposito quod homo solum venialium conscius sacramentum Pœnitentiæ adire velit, fiunt necessaria Sacramenti Pœnitentiæ materia. At nemo volens sacramentum Eucharistiæ peragere, potest aquam solam in penuria vini consecrare. Tum quia si aqua permixta esset hujus sacramenti libera materia, in magna posset quantitate apponi, contra Florentinum *modicissimam* vino apponi aquam imperans. Cur autem modicissima aqua præscriberetur, si in Christi sanguinem immediatè converti posset, nec eam prius in vinum transformari oporteret? Tum demùm, quia si aqua esset Sacramenti materia in sanguinem Christi immediatè conversa, poterit sub speciebus aquæ à speciebus vini arte separatis (ut separari posse



posse contendunt Adversarii , argumentum inde postea diluendum depromentes ) conservari; tandiu enim manet corpus & sanguis Christi, quandiu durant species , quarum substantia in Christi substantiam conversa est , & quandiu sub illis vera & naturalis substantia integra permansisset , ut docet Tridentinum *sess. 13. can. 3.* At quis credat sub separatis arte aquæ speciebus , si separari possunt , sanguinem Christi existere , ibique adorandum esse ? Quis credat sub illis separatis remanere posse Christi sanguinem , & non posse aquam separatam consecrari ? Quod enim sine vino consecratum manet , quidni sine vino consecratum fiat ?

Vera ergo sententia , & ad propositam questionem responsio est , aquam non immediate in Christi sanguinem , sed mediante solum vino , in quod primitus fuerit transmutata , converti ; & ideo modicam infundendam esse , ut ait Catechismus Romanus titulo de Eucharistia : *Nam Ecclesiasticorum Scriptorum sententia & iudicio*, inquit , *aqua illa in vinum convertitur.* Idem docet Sacerdotale Romanum *1. p. tract. 10. cap. 2.* his verbis : *Aqua , quæ in calice vino admiscetur , debet esse in modica quantitate , quia eam in vinum converti oportet.* Quia nimirum aqua modica in minutissimas particulas divisa confunditur , absorbetur , & activitate vini ferè momento corrumpitur , nec potentiori agenti , quo undique cingitur , resistere valet. Nec obest quod aqua sit corpus elementare & simplex , quod in mixtum immediate non convertitur. Non obest , inquam , quia pura hîc non habemus elementa ; sed multorum admixtione impura. Adde quod licet elementum aquæ non posset

posset actione vini in vinum commutari, posset tamen per divisionem, quâ materia aquæ in minimas particulas dissecta formam aquæ retinere nequaquam potest; sed circumdantis vini formâ afficitur. Non est etiam quod dicas, aquam vino mixtam posse arte chimica à vino separari, ut si vinum in vase ex ligno hederæ facto includatur, vel si immittatur medulla junci, vel si spongia oleo imbuta adhibeatur. Non, inquam, id dicas; quia tunc solum vera aqua extrahitur, quando magna ejus quantitas, quæ in vinum non potuit converti, apposita fuit: si autem modica aqua infusa fuit, id quod separatur non est aqua elementaris, sed debilior vel subtilior vini pars aquæ similitudinem & colorem præferens, ut ex eo patet quod eadem arte è vino puro, cui nulla aquæ portio admixta est, hujusmodi vapor aqueus elici facile potest, & in aquam etiam naturalem converti, sicut terræ vapores vi caloris solaris exciti in media aëris regione in aquam convertuntur. Sed de his ad Philosophos.

*Fit satis objectis.*

Dices: Patres docent aquam vino mixtam in altari offerri, benedici, consecrati, & consecratione mutari in sanguinem Christi. Ita Cyprianus *epist.* 53. Justinus Martyr *apologia* 2. *sub finem*, Ambrosius *lib.* 4. *de Sacramentis*, *cap.* 4. & 5. ubi ait: *Vinum & aqua in calicem mittitur, sed fit sanguis consecratione verbi cœlestis. Ante verba Christi calix est vini & aqua plenus: ubi verba Christi operata fuerint, ibi sanguis efficitur qui plebem redemit.* Idem tradunt

dunt Damascenus *lib. 4. de fide, cap. 14.* Paschasius *lib. de corpore Domini, cap. 11.* Algerus *lib. 1. cap. 16.* Hildebertus Cenomanensis *carmine de mysterio Missæ.* Ex quibus patet aquam in sanguinem Christi transmutari, unde non prius in vinum convertitur, alioquin solum vinum in consecratione transubstantiaretur.

Respondeo Patres vel loqui de oblatione præparatoria antecedente consecrationem, & sic verum est aquam in vinum infusam peræquè atque vinum ipsum offerri; vel loqui de oblatione essentiali, seu consecratione, in qua sacrificium altaris essentialiter situm est; & sic aqua non immediate, sed mediante vino, in quod prius conversa est, transmutatur. Cum enim Patres doceant admixtionem aquæ rem esse institutionis Eucharistiæ, secundum hanc doctrinam dicere necesse est, vel non transmutari aquam, quod Sancti nolunt; vel in sanguinem Christi mediante duntaxat vino transubstantiari; cum in potestate Ecclesiæ positum non sit Sacramenta condere, vel novas eis materias assignare. Mediante ergo vino, quod sola est à Christo præscripta calicis consecrandi materia, aqua consecratur. Nihil tamen propterea dicere vetat aquam in sanguinem Christi converti, etiamsi prius in vinum conversa sit; solent enim substantiæ in aliam transmutatæ eo nomine appellari, quo ante conversionem vocabantur: nam Joan. 2. aqua in vinum in nuptiis à Domino conversa pristino nomine nuncupatur: *Cum gustasset, inquit, architriclinus aquam vinum factam.* Exodi etiam 7. serpens Moysis virga, unde factus fuerat, appellatur.



appellatur. Et magis ad rem corpus Christi in Eucharistia sæpe panis in Scripturis & à viris Catholicis vocitatur.

Instabis : Sæpe contingere potest in vinum aquam non posse converti , ut cum aliqua aquæ quantitas vino tenui & parum generoso infunditur ; cum Sacerdotes ante mox consecrandum calicem recordati se non miscuisse aquam, eam immediatè ante consecrationem, ex præscripto rubricarum Missalis Romani apponunt ; & cum Christus aquam calici mox bibendo apposuit, utique in magna quantitate juxta leges temperantiæ & mores hominum conviventium , apud quos ridiculum haberetur guttulis aquæ vinum temperare. Atqui tunc aqua immediatè in sanguinem Christi convertitur, cum totum quod calici inest, populo adorandum exhibeatur ; cum haustu illius aquæ non solvatur jejunium Sacerdotis , possitque in casibus licitis , putà in die Dominicæ Nativitatis iterum celebrare ; cum denique totum in calice contentum hoc pronomine *Hic* designatum consecretur , ne falsidica forma consecrationis existat , & redeant omnia argumenta contra secundam sententiam initio à nobis intorta. Ergo aquam immediatè in sanguinem Christi converti contingit. Quod si aliquando id concedere necesse sit , frustra ad eam conversionem requirimus , ut priùs in vinum fuerit transmutata.

Respondeo majorem & minorem dubiis vel falsis suppositionibus constare. In primis non est certum, vinum non convertere in se aquam, tametsi debile sit ; quia aqua in vinum non solum actione vini, sed ipsius etiam aquæ absorp-



ræ divisione convertitur, modò quantitas vini  
 aquam notabiliter excedat. Unde in casu quo  
 Sacerdos guttulam aquæ calici mox consecran-  
 do apponit, aqua ipsa momento liquefcit, & fit  
 vinum. Christus verò naturarum omnium per-  
 fectissimus comprehensor eam aquæ quantita-  
 tem calici à se consecrando & discipulis propi-  
 nando apposuit, quam sciebat in vinum con-  
 versam iri, sive illa magna fuerit, sive parva.  
 Quod si parvam miscendam esse cognovit, par-  
 vam utique infudit, quod licèt homines in con-  
 vivio communi & usuali non probarent, nihil  
 absurdi in eo convivio, quod mysticum fuit, in-  
 venirent tamen. Minor etiam propositio fal-  
 sum assumit, nimirum aquam vino admixtam,  
 nondumque in vinum quibusdam in casibus  
 fortassis conversam immediatè in Christi san-  
 guinem converti. Si enim ita esset, frustra In-  
 nocentius in rationem secundæ quam ample-  
 ctitur sententiæ protulisset hæc verba: *Cùm in*  
*vinum transeat mixta vino.* Frustra etiam ab  
 Ecclesia præciperetur, ut modica, & ut ait  
 Florentinum, *modicissima* aqua vino miscere-  
 tur. Si ita esset, aqua esset idonea hujus sa-  
 cramenti materia, sub ejusque specie à vino  
 separata sanguis Christi existeret. Si ita esset,  
 mixtio aquæ esset de jure divino, cùm ea solus  
 Christus instituerit, quæ sunt in suam substan-  
 tiam transubstantiatione convertenda. Quare  
 si contigerit aquam non esse in vinum ipso  
 consecrationis tempore conversam, vel prop-  
 ter nimiam ejus copiam infusam, vel propter  
 vini non satis generosi debilitatem, vel propter  
 aquæ resistantiam & tenacitatem, tunc per ac-  
 cidens & præter intentionem aqua in Christi  
 sangui

sanguinem non convertitur, atque adeò ad illud Sancti Patres docentes absolutè aquam consecratione transmutari, non respexere. Nec obest, quod totum in calice consecratum proponatur populo adorandum. Non obest, inquam, quia adorantis populi intentio ad Christi sanguinem realiter in calice existentem dirigitur, sicut non adoratur pulvis, musca, vel quippiam simile casu vel incuriâ in calicem decisum. Et ratio est, quia adoratio fide dirigitur, unde id solùm in calice adoratur, quod fides objectum esse adorationis docet. Nec eâ aquâ in sua natura permanente solvitur jejunium: tum quia ignoratur num aqua sit conversa, & ideò modica apponenda præcipitur, ne jejunium solvatur: tum quia tunc aqua per modum sacramenti & communionis ebibitur, unde non est similis ablutioni, quæ quia seorsim à sacris speciebus, neque ut conjuncta sacramento sumitur, jejunium solvere meritò existimatur. Denique nulla propterea falsitas formæ contingit, quia particula *hic*, contentum sub speciebus vini designat; intentio enim Sacerdotis consecrantis, Christi in cuius persona loquitur intentioni conformatur: Christus autem solum vinum consecrare voluit, cùm ex Scripturis, Patribus, & Conciliis habeamus solum vinum vitigineum esse idoneam calicis consecrandi materiam.

Urgebis: Si unum vinum vitigineum sit apta consecrationis materia, aqua neque mediata, neque immediata in Christi sanguinem convertetur; aqua enim etsi in vinum quavis tandem ratione conversa, non est genimen vitis, utpote  
de



de vite non expressa : ergo nostra ratio nimis probat.

Respondeo vinum , quod est materia calicis, naturam vini vitiginei habere oportere , quavis hujus causa efficiens non sit vitis. Vinum enim vitigineum opponitur vinis improprie dictis vini naturâ carentibus. Unde vinum miraculo productum , quale fuit vinum nuptiarum in Cana Galilææ , aptam esse hujus sacramenti materiam nemo nisi absurdè negaverit. Addi potest , aquam in vinum conversam esse quadantenus vinum vitigineum , quia à vino vitigineo conversa est ; unde sicut vitis est causa efficiens vini convertentis , ita & remotè vini conversi , quia quod est causa causæ est causa causari.

*Queres secundò , utrum una species possit sine altera consecrari in extrema saltem necessitatis articulo , & accedente Summi Pontificis dispensatione.*

Respondeo validè quidem unam speciem sine altera consecrari , nunquam tamen licitè , quantaquanta necessitas supponatur , quantaque dispensatio accedat. Validè , inquam , una species sine altera consecratur ; quia statim ac verba consecrationis panis prolata sunt , continuò sub speciebus illius existit corpus Christi ; verba enim cum producant quod significant , statim atque corpus Christi præscriptis verbis significatur , sine mora adest. Unde & confestim

confestim hostia proponitur adoranda. Nunquam tamen unam sine alia speciem consecrare licet, quia non licet alio modo Eucharistiam consecrare, quàm eam Christus consecrandam imperavit: præcepta namque divina transgredi nunquam & nusquam licet. At Christus utramque speciem indivisim consecrandam præcepit; nam ut ait Tridentinum sess. 22. cap. 1. *Christus corpus & sanguinem suum sub speciebus panis & vini Deo Patri obtulit, ac Apostolis, eorumque in sacerdotio successoribus ut offerrent præcepit per hæc verba, Hoc facite in meam commemorationem, uti semper Ecclesia Catholica intellexit & credidit.* Et ratio est, quia Eucharistia jure divino sacramentum est per modum convivii spiritualis institutum; nec sacramentum tantum, sed etiam sacrificium: nec potest hoc sacramentum perfici, nisi simul sacrificium offeratur; sed ad rationem integri convivii potus peræquè ac cibus desideratur. Sacrificium etiam Eucharistiæ unâ nequit specie immolari & perfici, quia sacrificium novæ legis est cruenti sacrificii crucis commemoratio, juxta illud ejusdem Tridentini cap. 2. dicentis: *In divino hoc sacrificio, quod in Missa peragitur, idem ille Christus continetur, & incruentè immolatur, qui in ara crucis semel seipsum cruentè obtulit. :: Vna enim, eademque est hostia, idem nunc offerens Sacerdotum ministerio, qui seipsum tunc in cruce obtulit, solâ offerendi ratione diversâ.* Sicut ergo sacrificium crucis non fuit sine sanguinis à corpore separati effusione, ita nec potest talis separatio sine consecratione calicis repræsentari; utraque ergo species consecratur necesse est, ut sit sa-



crificii crucis jugis memoria, & sacrificium secundum ordinem Melchisedech, qui panem & vinum obtulit Altissimo, ut Genesis 14. dicitur, perenniter offeratur. Igitur non potest ullo unquam casu, suffragante quavis dispensatione, panis solus sine vino consecrari, quia summus Ecclesiae Antistes nec praecepta divina irritare, nec sacramenta truncare, nec sacrificii perennis institutum à Christo modum & ordinem immutare, atque invertere potest. Neque enim potestas illi divinitus data est, ut superioris sibi Christi leges solvat, ab eisque observandis Fideles eximat; sed eas ut custodiat, curetque ab aliis custodiri. Habet quidem Ecclesia Catholica, ejusque visibile caput Romanus Pontifex in Sacramentorum dispensatione ea statuere vel mutare potestatem, quae suscipientium utilitati, seu ipsorum Sacramentorum venerationi pro rerum, temporum & locorum varietate magis expedire judicaverit, ut Tridentinum *sess. 21. cap. 2.* docet: at *salva* tamen remanere debet *eorum substantia*, ut inibi Sacrum Concilium tradit. Patet autem ad substantiam convivii & sacrificii passionis Christi rememorativi utriusque speciei consecrationem pertinere.

Non dispensabit, inquires, summus Ecclesiae Hierarcha, sed legem Christi interpretabitur, illamque certis in causis vel locis non obligare potestate sibi à Deo facta declarabit, concurrente praesertim altero divinae legis mandato, ut alterutrum omitti necesse sit. V. g. contingere potest, ut nisi panis sine vino consecratur, aliqui populi vino laborantes vel semper, vel certe diu coelesti & adeò necessario Eucharistiae cibo

cibo priventur, vel quod aliqui repentino morbo oppressi sine viatico mortem obeant, si nullis reservatis speciebus Missæ celebratio expectanda sit. Quidn̄ ergo extremis illis necessitatibus succurrendi gratiâ, habitâ Ecclesiæ Capituli licentiâ, solum panem citò consecrare, & multorum calamitatem sublevare, & recipiendæ Eucharistiæ divinum præceptum servare fas erit? His de causis cum Norvegiis dispensasse Innocentium VIII. ut sine vino, quod statim in illis regionibus acescat, consecrarent, Volaterranus & Onuphrius testes sunt. Nec Christi solum intentioni, sed etiam facto & exemplo se Pontifex ille accommodavit: Salvator enim coram discipulis in Castellum Emaus proficiscentibus panem sine vino consecravit, ut innuit Augustinus *lib. 3. de consensu Evangelistarum, cap. 25.* & in ipso contextu satis indicatur; nam accepto, fracto, & benedicto pane evanuit ab oculis eorum.

Respondeo, illegitimam futuram quamvis Christi legis de consecrando sub utraque specie sacramento dispensationem, quâ divini natura & substantia sacrificii sine duplici specie consistere non valentis deperiret. Nec est ulla populorum vel alicujus morientis necessitas, cui non facilè per delationem vini, vel hostias in Ecclesiis reservatas possit occurrì. Omnis ergo vel obligatio vel utilitas præcepto de retinenda sacrificii integritate, quo nullum arctius est vel antiquius, concedat necesse est, & perfectio sacramenti & sacrificii reliquis omnibus est anteponenda; nec sumendæ Eucharistiæ præceptum prævalere unquam potest, quia non nisi habitâ sacramenti copiâ unquam urget, & pio



hominum voto suppleri potest. Historia porro Volaterrani fabella est malè materiata, & suâ ipsâ falsitate sponte evanescens, cùm dicat facultatem fecisse Pontificem, ut sine vino Norvegii calicem consecrarent, quasi sine vino possit aliquando rerum calix consecrari? Quasi vini materiae vel aquam Aquariorum damnato more, vel cervisiam, vel pomaceum aliûmve liquorem sufficere Innocentius potuerit aut voluerit? Quasi importatum aliunde in illas regiones vinum statim acescere non sit commentum ipsi experientiæ repugnans? Certè nullibi extat Pontificiæ illius dispensationis diploma; unde si aliquod ullibi promulgatum est, alicujus malè feriati falsarii adulteratione id contigisse fatendum est. Nec te moveat exemplum Christi: tum quia Christum calicem non consecrasse malè ex Evangelistarum silentio colligitur; non enim omnia quæ facta sunt recensere solent: tum quia si à calice consecrando Christus abstinuit, id potestate excellentiæ sibi tanquam sacramentorum auctori eximiâ, nec Ecclesiæ concessâ præstare potuit. Unde Ecclesia hujus Christi præcepti adeo fuit semper sollicita, adeo tenax, ut voluerit in casu quo Sacerdos aquam pro vino soluto jejuniis consumpserit, consecrationem calicis ex integro repeti, & sacrificium ab aliquo inchoatum, & quavis tandem ratione non completum, ab alio etiam non jejuno perfici, non obstante de sumenda à jejunis Eucharistia mandato.

Dices: Ecclesia laicis usum calicis justis de causis non indulgens, à Christi præcepto verbis illis, *bibite ex eo omnes*, expresso eximit: quidni

ni similiter gravibus de causis poterit à consecrando vino dispensare?

Respondeo falsum esse omnibus omninò Christianis communionem calicis Christum verbis illis imperasse, quibus solis eam sacerdotibus consecrantibus præcepit. Illis enim duntaxat dixit, *Bibite ex eo omnes*, quibus etiam, *Hoc facite in meam commemorationem*, continuò præcepit, quibus verbis Apostolos! Sacerdotes instituit, & ipsis eorumque in Sacerdotio successoribus, ut corpus & sanguinem suum sub speciebus panis & vini Deo offerrent mandavit, ut ex perpetua Ecclesiæ traditione sacrum Concilium Trid. docet. Unde laicos unâ tantum specie refectos à Christi lege Ecclesia non eximit, quibus utriusque speciei usus non est à Christo imperatus. Sacerdotibus verò consecrantibus nunquam indulgit, nec indulgere Ecclesia potuit, ut alterâ tantum specie reficerentur, quia in quolibet sacrificio, & utraque species consecrari, & utraque consumi debet. Unde in die Parasceves, in quo utraque species nec offertur, nec sumitur, nullum sacrificium celebratur.

Urgebis: Una species potest sine alia sumi, & licitè sumitur: quidni sola poterit, ut in necessitate sumatur, consecrari, cùm non conficiatur consecraturque cibus cœlestis, nisi ut sumatur?

Respondeo quod cùm Eucharistiæ sacramentum non consistat in usu, ejus integritas, ejusque perfectio essentialis non ex fidelium sumentium usu, sed ex totius materiæ consecratione pensanda est. Adde Eucharistiam non idèò solum confici ut sit animorum cibus, sed ut sit etiam jure Christianæ Religionis sacrificium, quod sine utraque specie non subsistit.



*Quæres tertio, utrum ad materiam hujus  
Sacramenti determinata panis & vini  
præsentia, determinata etiam quantitas  
desiderentur?*

Respondeo ad primum, materiam consecrandam præsentem esse oportere Sacerdoti consecranti; præsentem, inquam, cum physicè, tum moraliter. Id enim colligitur tum ex facto Christi Domini, qui panem & vinum sibi præsentia & in mensa apposita consecravit: tum ex perpetua Ecclesiæ praxi, quæ nec Eucharistiam, nec ullam aliam rem sacris usibus destinatam, nisi præsentem benedicit aut consecrat: tum ex ipsa formæ consecrationis significatione, quæ pronomine demonstrativo *Hoc*, vel *Hic* materiam consecrandam coram Sacerdote, ac proinde physicè & moraliter, id est secundum prudentum hominum existimationem præsentem esse indigitat.

Quid autem requiratur ad illam præsentiam, non potest, nec debet mathematicè determinari, sed sat est ut usu, more, & consuetudine hominum atque prudentum judicio materia in ea distantia sit, ut pronominis prolatione demonstrari rationabiliter queat. Unde absurdum est credere posse Sacerdotem omnes fori venales panes, omnia in cella vinaria reclusa vina consecrare, sicut & hostias à tergo positas, vel trans parietem collocatas, quantumvis in speculo relucentes; quia secundum moralem hominum æstimationem (cujus in administratione Sacramentorum humano modo peragendorum  
ratio

ratio magna habenda est ) materia sic posita præsens in ordine ad exercendam demonstrandamque aliquam operationem minimè censetur. Sicut è contra hostia sub alijs in acervo latitans , vel subtus corporali , vel in pyxide clausa contenta , vel vinum in calice cooperto existens præsentia moraliter censetur ; quia quæ interjacent corpora per modum continentis aut velaminis se habentia moralem subjectionem rerum præsentiam minimè impediunt. Ex quibus sine negotio Majoris oppositum sentientis argumentis occurret. Ex quibus etiam Sacerdotum eorum scrupulos evelles, qui verba consecrationis dum proferunt , os & labia ita materiæ admovent , ut inspirato halitu eam fœdent. Qui sanè mos & inanis est , & juxtà indecorus. Neque enim oris inconcinnam compositionem , sed modestam capitis inclinationem , & sacrorum verborum secretam, distinctam , reverentemque prolationem rubricæ præscribunt.

Respondeo ad secundum , materiam hujus sacramenti non esse determinatæ quantitatis : unde panis & vinum possunt in quantalibet quantitate validè , tametsi non licitè consecrari. Est contra aliquos antiquos Theologos, nominatim contra Alensem 4. *part. quest. 34. art. 3.* existimantem non esse divinitus datam eam verbis consecrationis virtutem , quæ panem & vinum in quacumque quantitate convertat , sed in ea duntaxat quantitate , quam ordinata consecrantis intentio determinet. Porro illam ordinatam intentionem esse ait , quæ est Ecclesiæ intentioni consentanea : Ecclesia verò cum solum panem consecrari vult , quæ

fideliū usibus rationabiliter & moraliter deserviat, cū Dominus eo se fine consecrāsse satis his verbis indicet: *Accipite, & comedite.* Unde cū indefinita materia non sit Fidelium usui accommodata, non potest etiam validè consecrari.

Verū hęc sententia confutatur, & unā responsio nostra suadetur. Licet quantitas materiæ hujus sacramenti per comparisonem ad usum fidelium determinetur, quia cūjuscvis materiæ determinatio ex fine propter quem assumitur petenda est: attamen non potest materiæ quantitas per comparisonem ad usum fidelium tunc occurrentium determinari, *alioquin*, inquit. benè S. Thomas quæst. 74. art. 2. *Sacerdos paucos parochianos habens non posset multas consecrare hostias.* Quod praxi & moribus Ecclesiæ adversatur. Ergo materia hujus sacramenti non nisi per comparisonem ad usum fidelium absolutè determinari potest. Atqui numerus fidelium non est determinatus. Ergo materiæ hujus sacramenti præfixa non est certa quantitatis mensura.

Sacerdos ergo qui quantitatem nimiam consecraret, id est in longè majori copia, quàm fidelium qui communiter occurrunt, vel occurrere possunt aut solent, usus postulat, validè quidem sacramentum perageret, at illicitè & sacrilegè tamen; utpote qui conceditā sibi potestate abutens, tremendum & venerabile sacramentum vel contempnui & derisioni, vel certè corruptioni specierum sine causa exponeret.

Sicut autem quantitas materiæ non debet esse tam magna, ut numerum fidelium communiter



munitur occurrentium propemodum & moraliter excedat ; ita non debet esse tam parva , ut non sit sensu aliquo perceptibilis , quia nisi percipi possit, demonstrari nequaquam potest. Unde consecratio materiæ imperceptibilis est invalida ; consecratio autem materiæ , quæ licet percipi possit , porrigi tamen commodè secundum Ecclesiæ morem non potest , illicita est ; tum quia praxi Ecclesiæ adversa , tum quia tam exigua materia in contemptum & venerabilis Sacramenti derisionem vergeret. Dixi materiam debere esse aliquo sensu perceptibilem , quia non est necesse ut actu videatur : tum quia hostiæ in acervo latitantes non videntur ; tum quia quod est perceptibile, tamen actu non videatur , pronomine demonstrativo indigere potest : tum quia Sacerdos cæcus validè consecrare potest. Narrat enim Dominicus Soto *in 4. dist. 9.* in Concilio Tridentino quendam fuisse Episcopum cæcum , qui ex Summi Pontificis dispensatione celebrabat.

Præter præsentis materiæ determinationem exigitur etiam Sacerdotis designatio , quâ hanc potius quàm illam materiam practicè usurpet. Unde Sacerdos coram se sex panes positos habens, ex quibus quinque velit consecrare , quos tamen non designaverit , nullum prorsus consecraturus est , quia non est potior ratio cur unum potius quàm alium inconsecratum relinquat , & particula demonstrativa *Hoc* , vel *Hic* , in panes à Sacerdote designatos cadat necesse est : ubi ergo nulla designatio , nulla consecratio. Unde consultius erit , Sacerdotem eos panes velle consecrare , qui sibi moraliter præsentibus sunt , & in Altare ad consecrandum



asportati sunt, & omne vinum in calicem infusum. Ad quod intentio formalis & virtualis, modo dum de sacramentis in communi satis exposito, sufficit. Nec sunt curandæ, sed facili faciendæ scrupulorum nenix, nec tam religio quàm superstitio; habenda solum accurata diligensque cautela.

### REFLEXIO.

Multa sanè sunt quæ apertè nitideque demonstrant, panis & vini symbola aptissima esse ad eas res declarandas adumbrandasque, quarum sunt sacramenta: eis namque convenientissimè erudimur, Christum Dominum hæc sacramenta purè sumentibus æternæ vitæ alimenta præbere, mentem quoque pretiosi corporis & sanguinis communionē refici, & ut loquitur S. Thomas *impinguari*. Monemur etiam, ut eam cogitationem suscipiamus, esse in hoc sacramento corporis & sanguinis Domini realis præsentix veritatem. Cum enim panem & vinum in humanam carnem & sanguinem nativi virtute caloris quotidie immutari experiamur, quis adeo mentis inops & fidei Christianæ rudis est, ut dubitare possit panis vinique substantiam in veram Christi carnem, verumque sanguinem divinâ posse virtute converti?

Hæc, fateor, mira, & juxtà vera sunt; sed unum est, quod nisi meus me fallit animus, quoslibet citò rapere possit attentos. Christus eam delegit materiam, quæ nunquam non præsto est, atque omnibus & ubique facile parari potest; ut omnes, & singuli, & ubique, & semper

per Salvatoris beatissimam copiam habentes, suavissimè illius charitatem experirentur, qui naturam, quam à nobis sumpserat, à nobis nunquam subtrahere voluit, nobiscum usque ad consummationem sæculi permansurus. Mirentur qui voluerint, & jure mirentur hujus sacramenti miracula in eo certatim mysterio micantia, quod fecit Deus memoriam mirabilium suorum: mirentur transubstantiationem, accidentium nullo subjecto nisorum existentiam, & alia sine fine prodigia. Ego Christi suavissimam facilitatem magis magisque demiror, quàm esse versarique nobiscum & semper voluit, & ubique; ideoque ea elementa elegit, quæ & facilè invenire esset, quibus & in nos intimè transfundi posset, ut omni tempore omnique loco illud verè dictum verissimè impleret: *Delicia mea esse cum filiis hominum.*

Et quod auget admirationem, non solùm justis & sanctis, sed & criminosis hominibus sui copiam facit. Miratur Tertullianus lib. de patient. cap. 3. Christi Domini patientissimam benignitatem, non tantùm quòd tempore passionis calumniis petitus, spuris inhonestatus, verberibus laniatus, felle potatus, clavis confixus, spinis coronatus sit, sed quòd proditorem etiam suum secum æquo animo tulerit. Despuitur, inquit, verberatur, deridetur, fœdis vestitur, fœdioribus coronatur: parum hoc si non etiam proditorem suum secum haberet. At in Eucharistia proditores nedum secum patitur suos, sed eorum etiam pectus inferno horribilius ingreditur. Non est magni beneficium dare & perdere aiebat Seneca lib. 7. de beneficiis; hoc est magni animi beneficium perdere

& dare. Id est magnanimi est beneficia iis etiam prodigere, qui prævidentur ingrati. Quale ergo est Christi magnificentiae prodigium, vel si dicere fas est, prodigalitas stupenda, quâ corpus suum & proditori ea ipsa in qua tradebatur nocte, & infinitis beneficio suo abusus paravit?

Hoc immensum divinæ largitatis prodigium jure suspicit Angelicus Doctor opusculo 57. *Neque enim, inquit, est aut fuit aliquando tam grandis natio, qua habeat Deos appropinquantem sibi, sicut Deus noster adest nobis.* Etenim non solum in nostræ assumptione naturæ in terris Deus visus est, & cum hominibus conversatus est; sed insuper quod de nostro assumpsit, totum nobis contulit ad salutem: corpus suum in cibum, & sanguinem suum in potum sub specie panis & vini fidelibus dereliquit. Non fuit satis divino amor omnes & sapientiæ & scientiæ Dei thesauros, ipsam quoque totius divinitatis plenitudinem humano generi verè, & ut scripsit Apostolus corporatiter impertiri, ut hominibus in altissimo dignitatis fastigio collocatis jam gloriari liceat, Filium Dei os nostrum & carnem nostram esse: quod utique beatissimis Angelorum spiritibus non licet; nusquam enim, ut ab Apostolo veridicè scriptum est, Angelos apprehendit, sed semen Abraham apprehendit. Non fuit satis nimis Christi charitati vitam humanam à nobis sumptam pro nobis ultrò offerre, & totum sanguinem pro omnibus fundere, ac nostro tantum nomine mortem, quam defugere poterat, libenter occumbere; quantum hoc beneficii genus tale ac tantum sit, ut omnem non solum referendæ, sed etiam habendæ



bendæ gratiæ facultatem vel gratissimo cuique eripiat. Sed hæc redemptioni sufficiebant, amor non sufficiebant. Humanitatem quam pro omnibus sibi univit, omnibus uniri voluit, ut tam communis esset Christus ac panis, tam intimus ac cibus.

Quàm meritò Eucharistia *Incarnationis extensio* à Sanctis nominatur? Etenim qui semel pro nobis in utero Virginis incarnatus est, quotidie ubique terrarum in omnibus quotquot voluerint quadantenus incarnatur, dum caro ejus verè cibus, sanguis ejus verè porus noster efficitur. Angustatum quodammodo, & veluti coarctatum erat divini amoris opus, quando in Incarnationis operæpretio una duntaxat Redemptoris humanitas ad Divinitatis apicem provecta est. At magnifico Eucharistiæ instituto beneficium uni collatum in omnes & singulos protenditur, diffunditur, dilatatur. Decebat planè Christum Dominum, Deum se esse hac largitate probaret. Nemo bonus nisi solus Deus, bonorum omnium summum & summa. At bonum est sui diffusivum, nec ullis patitur se limitibus præfiniri. *Magna & vera bona, aiebat Philosophus Moralis epistol. 73. non sic dividuntur, ut exiguum in singulos cadat, ad unumquemque tota perveniunt.* Hinc Christus non solum in unoquoque Altari totus, sed in utraque specie, & in quavis utriusque speciei particula totus voluit contineri, ut omnibus sui copiam faceret, nec esset qui se absconderet à calore ejus.

Sed si Deus dignatione dives, dignitatis nefcius, sui adeo prodigus effectus est, si nullum repellit, si omnes allicit, & sub qua latet panis  
vini



vinique specie inescat; cur, quæso, tam difficilem, tam morosum, tam te præbes avarum, ut & Christo amorem, & pauperibus Christi bonorum tuorum deneges communionem? Itane charitati tantæ tepiditas tanta, largitati tali talis avaritia tua respondet? Christus sub communissimis speciebus omnes laborantes ad se vocat reficiendos à se, omnes expectans expectat, omnes dignè accessuros mammillâ Regum gratiarum omnium rore plenissimâ lactaturus invitat: cur ad eum ergo tam rarò, tam invitus, tam incompositè accedis, ut nisi præceptis Ecclesiasticis adigerere, ipsum vix invisere dignareris, qui à sexcentis supra mille annis sinum suum aperit totum tibi, & ædificatam ab amore suo solitudinem patientissimâ longanimitate custodit.

An nescis Eucharistiam totius esse Christianæ Religionis centrum suavissimum, in quod omnes confluant Christiani, veluti in oceanum rivi, nec secus ac in punctum medium ambientes lineæ, necesse est? An ignoras te pani illi vivo indivulsè adhærere oportere, qui caput nostrum est, à quo præcisus non viris, sed samentum; non operi agricolarum, sed igni destinariis flammarum? Euge tandem illi cor tuum dare ne detrectes, qui corpus & sanguinem suum vi verborum, animam & divinitatem, totum denique quidquid habet ex concomitantia liberalissimè largitur. Ne illi per aliquot horas fufis de corde puro precibus convivere fastidi, quem tot sæculorum curricula, tot sacrilegorum flagitia non fatigant. Quàm justum, ut pro illo vivas qui pro te semel physicè mortuus, mysticè quotidie mori non cessat.

cessat. Absit ut ad eum venire trepides, apud quem nullus advena, nullus extraneus, nullus habetur ignotus; cui est cura de omnibus, fecitque cœnam magnam omnibus patentem, mittens servos suos animarum rectores, qui dicant invitatis parata esse omnia. Ergo modò vestem nuptialem, innocentiam ad altare apportes, *Securus accede, panis est, non venenum*, inquit August. *tract. 26. in Joan.* Avertere itaque, ut alibi monet idem Pater, ut convertaris; funde, ut implearis; discce non diligere, ut discas diligere. Avertere à peccato & commutabili bono, ut ad Deum bonum incommutabile convertaris: funde à corde tuo vitia, ut gratiâ & virtutibus implere: discce non diligere creaturas, ut discas diligere Creatorem.

## SPECVLATIO II.

*Legitima & essentialis sacramenti Eucharistia forma his verbis continetur: Hoc est corpus meum, Hic est sanguis meus; vel quod idem est, Hic est calix sanguinis mei.*

Circa formam Eucharistiæ variî prodierunt hæreticorum errores, & Catholicorum sententiæ. In primis si credamus Guidoni Carmelitæ *cap. 9. de hæresibus vvaldensum*,  
Walden

Waldenses rejectâ Ecclesiæ formâ posuerunt, vel potius somniarunt orationem Dominicam septies repetitam legitimam esse hujus sacramenti formam. Verùm quia nihil tale de illis Æneas Sylvius, qui postea fuit Pius II. summus Pontifex, hæreseos illius diligentissimus inquisitor observavit, nec illis hanc hæresim asserunt Petrus de Luxemburgo, vel Alphonsus à Castro, ideo de hac eorum hæresi meritò dubitant Theologi gravissimi.

Secundò Græci recentiores, ut refert Cardinalis Bessarion *lib. de Sacramento Eucharistia*, censent Eucharistiam confici precibus Sacerdotum, quæ suis in Liturgiis hoc modo habentur: *Rogamus Pater, ut mittas Spiritum tuum super nos, & super hæc apposta munera, & fac panem istum pretiosum corpus Filii tui, & quod est in calice pretiosum sanguinem Filii tui.* Hujus sententiæ præcipui defensores fuerunt Nicolaus Cabasilas in expositione Liturgiæ, cap. 27. Marcus Ephesinus in speciali opusculo de forma Eucharistiæ, & Simeon Thessalonicensis in Liturgia, qui omnes licet doceant debere verba Christi proferri, illis tamen apposta elementa non consecrari, nisi Sacerdotis oratione applicentur, asserunt. De hac Græcorum cum Latinis discordia in Concilio Florentino sess. 25. agitur.

Tertiò Lutherani & Calvinistæ multifariam in hac sicut in aliis ferè omnibus rebus lapsi sunt. Etenim Lutherus libro de abroganda Missa privata, & in libro contra Regem Angliæ, & in formula Missæ pro Ecclesia Witembergensi, postquam Catholicam irrisit Ecclesiam, quod verba consecrationis à Sacerdotibus in in-

tino

ultimo sacrarum rerum secreto agentibus proferri jubeat ; quia , inquit , verbis illis in toto orbe nihil oportuit esse notius atque vulgatus ; declarans postea quæ sit Eucharistiæ forma , ait hæc verba , *Qui pridie quàm pateretur* , &c. esse etiam consecratoria. Kemnitiuss verò in examine capitis primi , & canonis primi de Eucharistia , vult ad formæ integritatem totam Christi institutionem recitari oportere. Calvinus autem *lib. 4. institut. cap. 17.* sugillans Ecclesiam Catholicam quasi adhibentem verba velut magi sua carmina , quæ demurmurasse satis sit , quasi ab elementis exaudiantur , addit verba consecrationis esse vivam prædicationem , quæ auditores ædificet. Ejus hæresiarchæ impietatem , & in Ecclesiam Catholicam odium æmulatur & vincit Ostinianus *lib. 1. & 2. historia sacramentaria , cap. 1.* ubi ait benedicere , consecrare , seu sanctificare panem & vinum , non esse incantare , & occulta quadam vi verborum panem & vinum transelementare vel transsubstantiare ; sed esse ea divinis sacrisque usibus destinare , nimirum ut quæ communia erant corporum alendorum adminicula , fiant efficacia deinceps symbola carnis & sanguinis Christi. In Ecclesiam deinde Romanam ore petulco blasphemans , ait eam hac in re , quemadmodum in aliis Ethnicos egregiè imitari , quin & magos eorumque artem æmulari , dum verba consecrationis tam sollicitè occultat , & à vulgi auribus removeret. Scarpus verò *controversia 1. de sacra Cæna , quest. 4.* preces & totam institutionem ad consecrationem pertinere ait , quem sequitur Chamierus *lib. 6. cap. 5.* addit tamen consecrationem distingui à forma ,



ut totum à parte : consecrationem vult esse in tota Christi institutione, ne exclusis quidem Ecclesiæ precibus, quibus à Deo postulat fieri quod Christi institutione continetur : formam verò non diffitetur illis verbis contineri, *Hoc est corpus meum. Hic est sanguis meus.* Deinde verò iræ acerbitalisque suæ virtus adversus Ecclesiam genio hæretico & infrunito, atque ore mendaci evomens subjungit, se cum suis improbare magicam illam vim, quam Papistæ verbis ipsis tribuunt, quasi iis indita quædam potentia mysterium peragat, & aliter operetur quàm per significationem in animis humanis. Hæc Hæretici; quid Catholici, ex sequentibus clarebit.

Probatur ergo speculatio tum ex perenni Ecclesiæ Catholicæ praxi formam illam usurpante, eamque ab Evangelistarum & Pauli 1. Cor. 10. textibus, atque Apostolorum traditione derivante. Tum ratione : Illa est legitima sacramenti forma, quâ illud significatur quod in sacramento efficitur; ad hoc enim instituta sunt verba in Sacramentis usurpari solita; maximè quia cùm verba id efficiant quod significant, procul dubio illa sunt verba idonea, quæ quod efficitur significant. Atqui verba præfata declarant & significant id quod in hoc sacramento fit, nempe conversionem panis in verum Domini nostri corpus, & vini in sanguinem ejus. Ergo prædictis verbis idonea Sacramenti Eucharistiæ forma continetur.

Objicies 1. Christus Eucharistiam sine verbis confecit, licet confectam verbis postea declararit. Etenim Christus panem consecravit  
ante

antequam diceret, *Hoc est corpus meum* : panem quippe tum consecravir, cum eum benedixit: prius verò benedixit, quàm verba illa protulerit; testante enim Evangelio, *Accepit Iesus panem, benedixit, fregit, deditque discipulis suis dicens: Accipite, & manducate, Hic est corpus meum.* Ex verbis etiam Marci cap. 14. apparet Apostolos jam bibisse, quando Christus dixit, *Hic est sanguis meus.* Discipulis etiam in Castello Emaüs Eucharistiam sine verbis ullis consecratam porrexit, dicente Luca cap. ultimo: *Accepit panem & benedixit, ac fregit, & porrigebat illis.* Denique Augustinus in *Psal. 10.* ait Eucharistiam manibus Christi confectam ejus ore fuisse commendatam. Ergo verba illa à nobis relata non sunt necessaria Eucharistiæ consecrandæ forma, sed sufficienter precibus & benedictionibus Ecclesiæ Eucharistia conficitur.

Respondeo existimasse olim Innocentium lib. 4. *de mysteriis Missæ, cap. 6.* Christum ratione potestatis excellentiæ absque omni verborum forma consecrasse, verba tamen postmodum protulisse, quibus in Ecclesia futuris temporibus Eucharistia consecraretur. Alii Christum verbis quidem & oratione consecrasse aiunt, sed vel nobis ignotis, vel si iis quibus utimur, bis illa protulisse, clam ut consecraret, palam ut instrueret. Verùm hæ sententiæ non sunt veritati consentaneæ. Tum quia Evangelistæ & Paulus referunt Christum verba illa adhibuisse, & addidisse, *Hoc facite in meam commemorationem.* Ergo cum Sacerdotes consecrantes faciant quod ipse Christus fecit, verba eadem quæ Sacerdotes usurpant, Christus adhibuit.

buit. Tum quia Concilium Tridentinum *sess. 13. cap. 1.* docet Christum tunc hoc sacramentum instituisse, quando disertis verbis se corpus & sanguinem illis præbere suum testatus est. Illud autem quo Christus hoc sacramentum instituit & confecit, rationem formæ habeat necesse est. Tum quia id ipsum docent perspicuè Patres, Tertullianus lib. 4. contra Marcionem, cap. 40. *Acceptum panem & distributum discipulis, corpus suum illum fecit, Hoc est corpus meum dicendo.* Author sermonis de cœna Domini apud Cyprianum: *Ex quo à Domino dictum est, inquit, Hac est caro mea, Hic est sanguis meus; quotiescumque his verbis & hac fide actum est, panis iste supersubstantialis, & calix solenni benedictione sacratus ad totius hominis vitam salutemque proficit.* Chrysostomus etiam hom. 2. in secundam ad Timotheum, & hom. 60. ad populum Antiochenum; idem docet, sicut & Ambrosius suprà dùm de veritate corporis Christi in Eucharistia memoratus, postea etiam memorandus. Denique omissis aliis, Damascenus lib. 4. de fide, cap. 15. sic habet: *Sicut Deus dicendo, Fiat lux, fecit lucem: ita dicendo, Hoc est corpus meum, & Hic est sanguis meus, perfecit hoc sacramentum.*

Ad rationes in contrarium respondere non est difficile. Ad primam quidem dicendo, vel benedictionem ibi per verbum *benedixit* expressam, non esse consecrationem, sed bonam super panem precationem, & divinæ potentiæ ac munificentiae super illum invocationem, quâ Christus elevatis in cœlum oculis, ut habetur in sacro Missæ canone, elementorum mox futuram consecrationem & transmutationem postulabat.

flulabat. Favet Tridentinum loco antè relato  
 dicens : *Post panis vinique benedictionem se  
 suum corpus illis prabere, ac suum sanguinem di-  
 fertis ac perspicuis verbis testatus est.* Conten-  
 dunt tamen alii benedictionem illam fuisse ip-  
 sam consecrationem, propter illud Apostoli 1.  
 Cor. 10. *Calix benedictionis cui benedicimus* ( id  
 est ut exponit S. Thomas lect. 4. *quem nos sã-  
 cerdotes consecramus* ) *nonne communicatio san-  
 guinis Christi est?* Favet Ambrosius lib. de iis  
 qui initiantur, cap. 9. *Hic est panis, inquit, quem  
 benedictio consecravit : major est vis benedictio-  
 nis quàm natura, quia benedictione etiam ipsa  
 natura mutatur.* Favet etiam author sermonis  
 de cœna Domini, verbis paulò antè prolatis.  
 Nec obest contextus Evangelistarum, qui ut  
 docet Augustinus lib. de consensu Evangelista-  
 rum, cap. 39. & 44. non semper eundem ordi-  
 nem in recitando servaverunt, quo res gestæ  
 sunt. Unde sensus eorum est : *Accipit Jesus  
 panem, & gratus agens benedixit dicens, Hoc  
 est corpus meum.* Seu ut ait D. Thomas art. 1.  
 ad 1. dum Jesus benediceret, frangeret, & da-  
 ret discipulis suis, hæc verba dixit : *Accipite  
 & manducate, Hoc est corpus meum.* Et ita in-  
 terpretandum venit Tridentinum. Testatus est  
 Christus corpus suum dare post benedictionem  
 seu consecrationem. Sicut si diceremus : Post  
 baptismum homo accipit characterem & fidem,  
 id est, non nisi per baptismum, & non antè homo  
 characterè insignitur. Ad factum Christi Lucæ  
 ultimo memoratum, supposito quod Christus  
 tunc Eucharistiam confecerit ( quod non pauci  
 inficiantur ) dicendum verba consecrationis  
 Christum protulisse, nec esse necesse hanc  
 circum



circumstantiam fuisse à S. Luca descriptam. Vel si aliter tunc Christus potestate excellentiæ se gessit, nihil tamen inde contra nos, qui contendimus in ipsa Eucharistiæ institutione Christum verbis præfatis Eucharistiam consecrasse. Ad locum Augustini respondeo Eucharistiam dici manibus Christi, id est potestate ejus consecratam, & ore commendatam; non quòd fuerit sine verbis illis consecrata, sed quia verbis consecrandi vim sua potestate impressit.

Instabis: Sancti Patres asserunt ratione Sacerdotis consecrari Eucharistiam. Ita enim docet Justinus Martyr *apologia* 2. & Irenæus *lib. 4. cap. 34.* ubi ait, *invocatione Spiritus sancti confici corpus Christi.* Et Origenes *lib. 8. contra Celsum*, ubi docet, *prece fieri ex pane corpus Christi.* Et Optatus *lib. 6. contra Parmenianum*, ubi ait quod ad conficiendam Eucharistiam *postulatus descendit Spiritus sanctus.* Et Cyrillus Jerosolymitanus *catechesi* 1. & 5. docens, *invocari sanctam Trinitatem, & peractâ invocatione ex pane fieri corpus Christi.* Et S. Ephrem *lib. de natura Dei curiosius non scrutanda*, ubi tradit, *benedictione fieri consecrationem.* Et Theophilus Alexandrinus *s. rm. 1. Paschali*, ubi inquit, *panem & calicem per invocationem & adventum Spiritus sancti consecrari.* Et Gregorius Nyssenus *orat. catechetica, cap. 37.* ait panem *sanctificari per verbum Dei & orationem.* Et Basilius *lib. de Spiritu sancto, cap. 37.* dicens: *Invocationis verba cum conficitur panis Eucharisticus & poculum benedictionis, quis Sanctorum in scripto nobis reliquit?* Et Hieronymus *epist. 85. ad Evagrium*, ubi inquit, *Ad quorum (Sacerdotum) preces Christi corpus sanguis*

*sanguisque conficitur.* Et Augustinus *lib. 3. de Trinit. cap. 4.* ait Eucharistiam esse id, quod *prece mystica consecratum sumimus ad salutem.* Et *lib. 1. de baptismo contra Donatistas, cap. 20.* ait, *Deum exaudire homicidam deprecantem super Eucharistiam.* Et *epist. 59. ad Paulinum, in solutione 5. questionis,* orationes appellat ipsam benedictionem & consecrationem Eucharistiæ. Et Magnus Gregorius *lib. 7. epist. epist. 63.* dicit morem Apostolorum fuisse, *ad ipsam solummodo orationem Dominicam oblationis hostiam consecrare.* Denique in Liturgiis Græcis post recitata Christi verba rogat Sacerdos, ut Deus subiectum panem faciat corpus, & quod est in calice sanguinem Christi. Ergo non in à nobis relatis verbis, sed in Ecclesiæ precibus à Sacerdote fuis tota consecrandæ Eucharistiæ forma sita est.

Respondeo in precibus Sacerdotum non posse Eucharistiæ formam constitui. Tum quia positio corporis & sanguinis Christi, & mirabilis panis & vini transelementatio & transubstantiatio cum sit quid divinum & miraculorum miraculum, solâ Deo potestate, & per ea quibus nihil sit efficacius evenit: talia autem sunt Christi Domini verba, quibus dicit & res fiunt, mandat & creantur, non autem hominum preces. Tum quia humanæ preces tunc fiunt efficaces, cum ab hominibus Deo gratis & benemeritis funduntur; ut enim dicebat cæcus natus: *Scimus quia Deus peccatores non exaudit.* Eucharistia verò non petentium meritis fit, sed ab indignis Sacerdotibus peræquè peragitur, quia nimirum quod significant efficiunt. Tum quia consecratio corporis Domini non pendet à

re

re dubia , sed infallibiliter fit : penderet autem à re dubia , si solis hominum precibus conficeretur ; dubium enim remanet , num preces ab hominibus fusæ suum effectum sortituræ ; & infallibiliter impetraturæ . Nec est simile de forma Extremæ-unctionis , quæ deprecatoria est ; quia tunc non tam Sacerdotis quàm Ecclesiæ oratio est , quibus in hoc singulari sacramento efficaciam Christus spondit . Tum quia verborum , quibus hæc ineffabilia mysteria peraguntur , nulla diversitas , nulla debet esse mutatio , cum immutabilis sit tanti sacramenti forma . At sola verba Christi eadem sunt , preces variè à variis proferuntur : unde verba illa & Evangelistæ , & Paulus ritum hujus conficiendi sacramenti à Domino acceptum recitans , & Patres omnes in suis liturgiis unanimi consensione referunt . Tum quia in sui memoriam , & quemadmodum ipse fecit , hoc sacramentum facere Sacerdotes Salvator imperavit : expressior autem fit Christi memoria , expressior est ejusdem imitatio , dum ipsius verba proferuntur . Ergo non in precibus quibusvis , sed sacris Christi verbis Eucharistiam confici certissimè tenendum , & sine ulla dubitatione credendum est . Tum demùm , quia utriusque Ecclesiæ ritus id demonstrant . Græci enim verba hæc , *Hoc est corpus meum* , recitant , & populus responderet , *Amen* , quasi dicat , verè ita est ut tu dicis ; & confestim Diaconus Sacerdoti ministrans panem & calicem ostendit , significans utique panem illum esse corpus Christi , & quod in calice est , sanguinem ejus , quemadmodum verbis illis assertum est . Et tamen nondum sunt preces illæ fusæ , quibus unis Græci recentiores Eu-  
charistiam



charistiam confici asserunt. Id ex ritu Ecclesiae Romanae & Latinae manifestius est ; nam post prolata Christi verba , hostia adoranda proponitur ; non autem proponeretur , nisi foret consecrata. Et certè falsa essent illa verba , *Hoc est corpus meum* , nisi vi illorum corpus Christi consecraretur.

Nec Patres adversantur , sed prorsus favent. Luculentissima sunt Ambrosii verba lib. 4. de Sacr. cap. 4. ubi ait : *Tu fortè dicis : Meus panis est usitatus. Sed panis iste , panis est ante verba sacramentorum : ubi accesserit consecratio , de pane fit caro Christi. Hoc igitur astruamus , quomodo potest qui panis est , corpus esse Christi ? Consecratione. Consecratio igitur quibus verbis est , & cuius sermonibus ? Domini Iesu. Nam reliqua omnia qua dicuntur , laudem Deo offerunt. Oratio praemittitur pro populo , pro Regibus. Vbi venit , ut conficiatur venerabile sacramentum , jam non suis sermonibus Sacerdos , sed utitur sermonibus Christi. Ergo sermo Christi hoc conficit sacramentum. Et cap. 5. Vbi verba Christi accesserint , corpus est Christi. :: Ante verba Christi calix est vini & aqua plenus ; ubi verba Christi operata fuerint , ibi sanguis efficitur , qui plebem redemit. Et lib. de iis qui initiantur , cap. ult. Ipse clamat Dominus Iesus , *Hoc est corpus meum* : ante benedictionem verborum coelestium species nominatur ; post autem consecrationem corpus Christi significatur. Ipse dicit sanguinem suum , ante consecrationem aliud dicitur , post consecrationem sanguis nuncupatur. Et tu dicis , *Amen hoc est* , Verum est.*

Favet etiam Augustinus lib. 20. contra Faustum , cap. 13. *Noster panis , & calix non quilibet*



*sed certâ consecratione mysticus fit nobis , non nascitur. Certa autem consecratio , non præces Ecclesiæ quæ variari possunt , sed determinata à Christo Domino verba sunt. Favet quoque Chrysostomus homil. de proditiōe Judæ: Non enim homo est , inquit , qui proposita de consecratione mensæ Domini corpus Christi facit & sanguinem ; sed ille qui pro nobis crucifixus est Christus. Sacerdotis ore verba promuntur , & Dei virtute consecrantur & gratiâ. Hoc est , ait , corpus meum. Hoc verbo proposita consecrantur. Et sicut illa vox quæ dicit , Crescite & multiplicmini & replete terram , semel quidem dicta est , sed semper sentit effectum ad generationem operante naturâ : ita & vox illa semel quidem dicta est , sed per omnes mensas Ecclesiæ usque ad hodiernum diem , & usque ad ejus adventum præstat sacrificio firmitatem. Et hom. 2. in 2. ad Timotheum : Volo quiddam adjicere planè mirabile , & nolite mirari , neque turbemini. Sacra ipsa oblatio , sive illam quilibet Sacerdos , sive illam Paulus , sive Petrus offerat , eadem est quam dedit Christus ipse discipulis , quamque Sacerdotes modò quoque consciunt. Nihil habet ista quàm illa minus. Cur id ? Quia non hanc sanctificant homines , sed Christus qui illam antè sacraverat. Quemadmodum enim verba quæ loquutus est Christus , eadem sunt , quæ Sacerdotes nunc quoque pronuntiant , ita & oblatio eadem est. Favet pariter Gregorius Nyssenus orat. catechet. c. 37. ubi docet quod panis statim per verbum in corpus transmutetur , sicut dictum est à Verbo: Hoc est corpus meum. Et paulò post : Mox ad carnem transmutatur , quoniam ipse dixit : Hoc est corpus meum.*

Idem

Idem docet Tertullianus; Author sermonis de cœna Domini, & Damascenus superiùs producti. Quibus adde Justinum Martyrem *apologia* 2. ubi docet Eucharistiam perfici precibus Christi & gratiarum actione sitis in illis verbis, *Hoc corpus meum.* Adde etiam Irenæum *lib. 4. cap. 32.* eodem modo explicantem preces quibus perficitur hoc sacramentum. Adde etiam Eusebium Emislenum *hom. in Ramis Palmarum*: Qui dixit tunc per se, inquit, modò dicite per suos ministros, *Hoc est corpus meum.* Et tanta est ejus verbi virtus & efficacia, ut statim fiat quod dicitur. Adde & Paschasium *lib. de corpore Domini, cap. 5.* dicentem: Hoc sacramentum non meritis, non verbis humanis, sed procul dubio divinis efficitur & consecratur mandatis. ::: Sed verbo Creatoris, *Hoc est corpus meum.* In hoc verbo creatur illud corpus, quia divinum verbum est, & omnipotentia plenam. Adde quoque Remigium Altissiodorensem de celebratione Missæ: Christi ergo virtute, inquit, & verbis iste panis & calix ab initio est consecratus, & semper consecratur, & consecrabitur. Ipse enim loquens per Sacerdotes verba sua cœlesti benedictione sanctum corpus & sanguinem suum perficit. Adjice quoque Stephanum Eduensem de sacramento Altaris, *cap. 14.* aientem: Credimus & quod cùm benedixit, corpus suum fecit; & in his verbis, *Hoc est corpus meum*, Hic est calix sanguinis mei, data est virtus sacramenti: dixit enim, & facta sunt. Et *cap. 15.* Fides nostra est, & verè credendum est, quod Sacerdote proferente hæc verba, *Hoc est corpus meum*, jam non est panis terrenus, sed ille panis qui de cœlo descendit. Item virtute verborum isto-

*rum, Hic est calix sanguinis mei, vinum conuer-*  
*titur in sanguinem meum.* Adde & Odonem Ca-  
 meracensem in expositione Canonis : Tolle, in-  
 quit, *verba Christi, non sunt sacramenta Chri-*  
*sti. Vis fieri Christi corpus & sanguinem, appone*  
*Christi sermonem : facit sermo veritatis quod di-*  
*cit, quia ipse dixit, & facta sunt ; ipse manda-*  
*vit, & creata sunt.* Sine dubio fit in creatura,  
 quod Christi sermo dicit de creatura. Est enim om-  
 nipotens sermo tuus, o Genitor : fit ergo sermone  
 Christi corpus & sanguis Christi.

Hac traditione permotum Concilium Tri-  
 dentinum *sess. 13. cap. 1.* docet Christum Eu-  
 charistiam his perspicuis verbis, *Hoc est corpus*  
*meum*, instituisse. Et *cap. 3.* docet vi verborum  
 solum corpus sub specie panis, solum sangui-  
 nem sub specie vini poni. Ergo supponit ver-  
 bis illis consecrari panem, quibus solum cor-  
 pus significatur ; consecrarique vinum illis qui-  
 bus unus sanguis significatur. At ejusmodi ver-  
 ba non sunt alia quam recensita verba Salvato-  
 ris : ergo doctrina nostra est magis sacri Con-  
 cillii menti consentanea. Dico esse *magis consen-*  
*taneam* ; testatur enim Salmeron, qui Concilio  
 Tridentino interfuit, Patres auditis hinc inde  
 rationibus, quâ formâ Christus hoc sacra-  
 mentum confecerit, definire prudenter noluis-  
 se, & totum Theologorum indagini permisisse.  
 Ita ille *tom. 9. tract. 13.*

Ad authoritates in contrarium productas  
 priusquam respondeam præmonendus est Le-  
 ctor, Ecclesiam verbis consecratoriis, in quibus  
 totam & integrâ hujus sacramenti formam  
 constituimus, preces præmittere solere, quibus  
 Deum panem in corpus, vinum in sanguinem  
 Christi

Christi convertere in Canone deprecatur. Sic enim habet: *Hanc igitur oblationem tu Deus in omnibus quasumus benedictam, ascriptam, ratam, rationabilem, acceptabilemque facere digneris, ut nobis corpus & sanguis fiat Domini nostri Iesu Christi.* Hac de causa propter illas Ecclesiæ preces nunquam omitti solitas, orationibus Ecclesiæ & Sacerdotum Eucharistiæ confectionem Patres interdum asseruerunt, non quòd illis formaliter Eucharistia consecratur, sed quia consecrationem illam immediatè & semper antecedunt. Nec dicas inanem esse illam orationem, si independenter ab illa fieri consecratio possit: non, inquam, id dicas; delectatur enim Deus, ut illa etiam postulemus, quæ etiamsi nulla fieret postulatio, largiretur, ut ea se gratis, liberaliter, & piam misericordiâ largiri significet. Sic prædestinatio, tamen si sit gratuitum miserendi propositum, sit liberalis transmissio creaturæ rationalis in vitam æternam à meritis & precibus etiam prævisis independentens, sit præparatio beneficiorum quibus certissimè liberantur quicumque liberantur, teste tamen D. Thoma gratuitæ prædestinationis acerrimo defensore juvatur precibus Sanctorum. Sic etiam Ecclesia formæ Baptismi puero mox conferendi varias præmittit preces, tamen si nec in illis, nec dependenter ab illis forma Baptismatis suum imprimat novæ creaturæ effectum. Verum novit pia & humilis mater dona etiam illa à Deo petere, quæ se daturum obstrinxit atque oppignoravit Deus, quia non illa ex justitia nostra, sed suâ confert Deus fidelis in omnibus verbis suis.

Præmonendus es rursus, Patres per preces



& orationes, quibus confici Eucharistiam interdum aiunt, non intelligere quid distinctum à verbis Salvatoris, quæ quia verba sunt, oratio dici possunt; & quia illis formaliter hostia immolatur & mysticè mactatur, preces & oblationes veluti in actu exercito dicuntur. Tunc enim Deum precari jure meritò censemur, cum ei actu litamus, & sacrificiî immolatione divinam recognoscimus Majestatem. Hunc esse non extortum vel violentum, sed genuinum Patrum objectorum sensum, ex singulorum locorum examine clarebit.

Ita enim Justinus Martyr, ita Irenæus, uti vidimus, seiplos interpretati sunt, dum orationem & invocationem in relatis Christi verbis posuerunt. Eodem planè modo Origenes, Optatus, Cyrillus, & Ephrem veniunt intelligendi, nisi semper addas respexisse eos ad preces quas consecrationi præmittere Ecclesia in omni suo ritu consuevit. Theophilus ait quidem, panem & calicem per invocationem & adventum Spiritus sancti consecrari, sed non negat præfatis Christi verbis advocari vel advenire Spiritum sanctum. Gregorii Nysseni mens ex iis quæ ex eadem oratione catechetica prorsus conspicua est. Basilii vult solùm totum canonem, sine quo Eucharistia non conficitur, nec verba consecratoria proferuntur, non esse in sacris litteris scriptum, sed traditione haberi. Ambrosius per sacræ orationis mysterium verba Christi se intelligere manifestè locis à nobis relatis ostendit. Hieronymus similiter per Sacerdotum preces in latiori significatione verba Christi intelligit, vel ad duo quæ præmonuimus respexit. Augustinus verò per

per *prece[m] mysticam* non potuit intelligere orationem Ecclesiæ, quæ perspicua est & plana, sed verba Christi mysteriorum plena, & mysteriorum efficientia. Dum verò ait Deum exaudire homicidam deprecantem super Eucharistiam, seipsum in eodem contextu explicat dicens : *Deus adest sacramentis & verbis suis per qualeslibet administrentur*. Unde per deprecationem verba Christi à Sacerdote prolata intelligit. Ibidem ait, quod Sacerdos deprecatur super aquam baptismi, & super capita eorum quibus manus imponitur; ergo quemadmodum forma Baptismi & Confirmationis non in oratione propriè dicta, sed in præscriptis verbis sita est, ita & de forma Eucharistiæ secundum Augustinum dicendum est. In epistola verò ad Paulinum orationem appellat sanctificationem & benedictionem Eucharistiæ; sed illam orationem à verbis Christi esse distinctam non tradit. Magnus Gregorius voluit dumtaxat post consecrationem recitari Orationem Dominicam, uti Apostolorum sacra traditio ferebat, non quòd per illam orationem Apostoli consecrarint, sed quia inter celebrandum tremendum sacrificium hujus orationis recitationem nequaquam præmittebant. Unde non ait per Orationem Dominicam, sed ad illam solummodò Apostolos consecrasse, quia tunc propter temporis & persecutionis angustias non multis precibus sicut modò sacrificium adornabant, unius Dominicæ Orationis ( quæ ut ait Tertullianus *de orat. Dominica*, est *breviarium Evangelii*; authore Cypriano est *cœlestis doctrina compendium*; authore Ambrosio *lib. 5. de sacramentis, c. 4.* est *cunctarum plena virtutum*) recitatione contenti. Loqui au-

tem Gregorium de precibus sacrificio adjunctis manifestum est ex eo quod inibi ait : *Et valde mihi inconveniens visum est , ut precem quam Scholasticus composuerat , super oblationem diceremus , & ipsam traditionem quam Redemptor non ster composuit , super ejus corpus & sanguinem non diceremus.* Id est, si verba & preces à Scholastico aliquo compositas, aliasque pias orationes consecrationi præmittimus & subjicimus , quantò magis inter celebranda divini sacrificii solennia Orationem Dominicam, quæ omnibus aliis immensum præstat , adhibemus ? Ad ritum Græcarum Liturgiarum respondeo cum Cardinali Bessarione , rogari post verba præfata ut fiat corpus Christi, non naturale, sed mysticum ; fiatque corpus Christi naturale corpori mystico utile , ut si leles unum sint , & in Christo maneant ; unum enim corpus multi sumus. omnes qui de uno pane & de uno calice participamus , ut in Liturgia Basilii satis perspicue significatur. Suspiciatur etiam idem doctissimus Cardinalis ordinem Liturgiarum esse inversum , & postpositas fuisse orationes, quas Latina Ecclesia præmittit.

*Quæres , utrum sola verba adducta sint essentialia & necessaria , ut corpus Christi conficiatur ; num verò illa etiam pro consecratione panis , Qui pridie quàm pateretur , &c. vel ista, Quod pro vobis tradetur , desiderentur ?*

Respondeo ad primum existimasse Scotum, ad conficiendum Eucharistiæ sacramentum necessariò

cessariò præmittenda verba esse illa Canonis, *Qui pridie quàm pateretur, &c.* quia nisi illa præmittantur, non significat Sacerdos se loqui in persona Christi, sed in sua; & consequenter dum dicit, *Hoc est corpus meum*, non corpus Christi, sed suum demonstrat. Sed hanc sententiam optimè antè confutaverat S. Thomas *quest. 78. art. 1. ad 4.* Quia Sacerdos sola præfata verba proferens cum intentione conficiendi hoc sacramentum, perficit hoc sacramentum; quia intentio facit ut hæc verba intelligantur, quasi ex persona Christi prolata, etiamsi verbis præcedentibus id minimè significetur. Neque enim verba consecrationis merè historicè recensentur, ut unus sit sensus, Christus ita loquutus est; sed verba illa significativè etiam, & ut ita dicam exercitivè à Sacerdote referuntur, ita ut nomine suo institutionem Christi referat, & nomine Christi practicè significet corpus Christi vi huiusmodi verborum in altari effectivè poni, sicut dum orationem Dominicam in Missa Sacerdos profert, verba Christi referens, unà petit quæ in illa postulantur. Etenim si forma historicè duntaxat proferretur, nec practicè ad præsentem materiam applicaretur, sequeretur verbis illis non significari conversionem actu factam, sed consecrationem Christi reoli & in memoriam revocari; sequeretur Sacerdotem in persona Christi, contra unanimem Patrum & Conciliorum vocem, non loqui, nec eam veluti induere, sed ea duntaxat recensere, quæ à Christo in ultima cœna gesta sunt. Quod sanè si sufficeret, nulla præsentis materix foret necessitas; ad recitandam quippe historiam non est necessaria rei, de qua fit nar-



ratio, præsentia. Quia ergo Sacerdos verba consecrationis in persona Christi profert, sicut Legatus in persona Regis, sicut & Angelus in persona Dei, cum diceret, *Ego sum qui sum, Ego sum Deus patris tui*; nec Sacerdos suam ipsius, sed Christi actionem exprimit, & conversionem ac transubstantiationem elementorum practicè & in actu exercito significat; ideo validè consecraret, tametsi verba illa narrativa, *Qui pridè quàm pateretur*, prætermitteret. Graviter tamen sic conficiendo peccaret, utpote qui ritum ab Ecclesia præscriptum privatâ auctoritate, vel potius temeritate violaret. Quæ etiam de causa particulam, *Enim*, verborum connexionem convenienter significantem qui prætermitteret, peræquè peccaret. Sicut etiam graviter peccaret, qui particulam *Enim*, missam faceret; quia licèt non sit de essentia formæ, nec eam Christus adhibuerit, gravissimis tamen de causis eam à Domino docta & inspirata Ecclesia usurpat, ut nimirum veritas & efficacia formæ patesceret, pleniusque innotesceret Eucharistiam non cibum esse communem, sed ipsum Christi corpus, quo reficimur & nutrimur.

Ex his etiam responsum manet ad secundam quæsitam partem, nimirum verba illa, *Quod pro vobis tradetur*, non esse essentialia; nam sacramenti ea forma est, quâ illud significatur quod in sacramento efficitur, ut sæpe dictum est. Atque sola verba illa, *Hoc est corpus meum*, conversionem panis in corpus Christi sufficienter significant, ac proinde illum efficiunt. Ergo sola verba illa formæ consecrationis panis rationem habent; ista verò, *Quod pro vobis tradetur*,

*detur*, non sunt necessaria necessitate sacramenti, imò nec necessitate præcepti, cùm ab Ecclesia Romana & Catholica ab Spiritu sancto gubernata prætermittantur, nec apud Matthæum & Marcum habeantur. Et quanvis verba illa à Christo prolata referant Lucas & Paulus, non tamen omnia quæcumque Christus inter consecrandum protulit, sunt de necessitate sacramenti, sed ea duntaxat quibus conversio panis in corpus Christi significatur. Scio aliam esse Ecclesiæ Græcæ praxim à praxi Latinæ, sed unaquæque probatos suos ritus retineat.

*Quæres 2. An verba illa quæ inter consecrandum calicem proferuntur, sint de essentia forma, nimirum: Novi & æterni Testamenti; mysterium fidei; qui pro vobis & pro multis effundetur in remissionem peccatorum?*

Responsioni præmitto verba illa convenientissimè ab Ecclesia Catholica adhiberi; tum quia multa ex illis verbis tanquam à Christo prolata referunt Evangelistæ & Paulus, cætera verò protulisse Salvatorem communis sententia traditioni & generali Ecclesiæ praxi innixa fert. Tum quia tres sanguinis Christi in passione fusi effectus mirabiles ad hoc sacramentum potissimè pertinentes verbis illis explicantur, nimirum aditus ad æternam vitam, qui nobis novi & æterni Testamenti jure patescit. *Habemus enim fiduciam in introitu Sanctorum in sanguine Christi, ut dicitur Hebr. 10. Secundus effe-*

ctus est accessus ad iusticiam, quæ est per fidem dilectione operantem, juxta illud Rom. 3. *Quem proposuit Deus propitiatorem per fidem in sanguine ipsius, ut sit ipse justus, & justificans eum, qui est ex fide Iesu Christi.* Tertius effectus est remissio peccatorum, quibus uterque aditus intercludebatur; unde dicitur Hebr. 9. *Sanguis Christi emundabit conscientiam nostram ab operibus mortis.* Primi effectus designandi gratiâ apponuntur illa verba, *Novi & æterni Testamenti;* ratione secundi additur, *mysterium fidei;* ratione tertii subjungitur, *Qui pro vobis & pro multis effundetur in remissionem peccatorum.*

Explicantur uberius singula verba, quæ cum sint mysteriorum plenissima, non parum ad pietatis igniculos & reverentiæ cientes motus conducent. Hoc namque præcipuè intendere debet quicumque de sacramentis disserit, ut lectores & sacrorum præsertim ministri admonentur, quæ, qualia, & quanta sint quæ quotidie tractant, quo rerum divinarum quas frequentant studio & desiderio exardescant. *Hic est calix sanguinis mei,* id est: En vobis propino calicem sanguine meo plenum, neque enim sanguinem sub specie vini porrigo, nisi ut bibatur, nec nisi in calice bibitur. Ergo bibite charissimi, & inebriamini, non mero, sed amore, & dum vini suavitatem percipitis, verba mea meliora vino sapite, atque gustate quoniam suavis est Dominus. Si quid infiniti valoris sanguine pretiosius haberem, ultrò amorem meum testaturus largirer: at enim quid eo cruore præcellentius, quo emitur hæreditas regni cælorum? Unde subdit, *Novi & æterni Testamenti,* id est: Ne credite figuram solum sanguinis mei eo vobis in calice propinari,

propinari : verum sanguinem exigit novum Testamentum, in quo non figuris locus amplius est, sed veritati; verum sanguinem postulat Testamentum æternum, id est æterna hereditas, quam vobis ereptam non figura, sed sanguis Agni immaculati crastina die fundendus, vobisque jam bibendus porrectus redempturus & restitutus est. Scio equidem vobis hoc visum iri difficile, quod aliàs Capharnaïtis durum apparuit; sed nescitis mysteria fidei ab oculorum sensu remotissima certâ esse fide credenda? Quâmlibet ergo difficultatis & negotii in hoc sacramento humana ratio experiatur, vos tamen estote in hac credenda propugnandaque veritate intrepidi, quia *mysterium fidei* est, non quod rei veritatem excludat, sed quia tam stupendum pietatis meæ miraculum solâ fide creditur, nullis humanis argumentis suadet. Et ne vobis ulla dubitandi ratio insit, illum eundem sanguinem vobis bibendum relinquo, qui crastina die *pro vobis effundetur*. Quare ergo sinceritate & veritate eum pro vobis in passione & cruce fundam, eadem illum vobis in calice propino. Sed proh dolor! Sanguinis illius, tametsi à me pro omnibus fundendi fructus non ad omnes, sed ad multos duntaxat perveniet, ideoque *pro vobis & pro multis effundetur in remissionem peccatorum*. Nam ut præclare dixit Catechismus Romanus, verba illa *pro vobis, & pro multis effundetur*, è Matthæo & Luca singula singulis sumpta sunt, quæ tamen sancta Ecclesia spiritu Dei instructa simul conjunxit, ut passionis fructum & sanguinis fundendi utilitatem declararet. Nam si ad ejus virtutem inspiciamus, pro omnium salute

sanguis



sanguinem à Christo effusum esse fatendum erit : si verò fructum quem homines ex eo perceperint cogitemus , non ad omnes , sed ad multos tantum eam utilitatem provenire facile intelligimus. Cum igitur *pro vobis* dixit , eos qui aderant , vel delectos ex Judæorum populo , quales erant Discipuli , excepto Juda , quibuscum loquebatur , significavit. Cum autem addidit *pro multis* , reliquos ex Judæis & Gentibus electos intelligi voluit. Rectè ergo factum est , ut pro universis non diceretur , cum hoc loco tantummodò de fructibus passionis sermo esset , quæ salutis fructum pro electis solum attulit. Atque huc spectant verba illa Apostoli : *Christus semel oblatus est ad multorum exhauriendâ peccata*. Et quod Dominus apud Joannem inquit : *Ego pro eis rogo , non pro mundo rogo , sed pro his quos dedisti mihi , quia tui sunt*. His præmissis.

Respondeo divisos esse hac in quæstione Theologos etiam Thomistas ; quia cum nihil hac in parte certum ex traditione Patrum & Conciliorum habeamus , in varias varii sententias suis hinc inde momentis instructas abierunt. Porro illa sententia longè nobis probabilior , & traditioni magis consentanea videtur , quæ totam consecrandi calicis formæ essentiam in illis duntaxat verbis constituit , *Hic est sanguis meus* ; vel quod idem est , *Hic est calix sanguinis mei*. Patres enim paulò ante relati asserentes formam consecrationis non in precibus Ecclesiæ , sed in verbis Christi esse sitam , aliorum ab istis verborum mentionem non faciunt , quin solis illis verbis , *Hic est sanguis meus* , Deum operari mirabilem conversionem testantur. Quia ,  
inquit

inquit Damascenus lib. 4. de fide, cap. 14. illud Dei verbum verum est, & efficax, atque omnipotens, non minùs quàm illud, *Fiat lux, fit firmamentum*. Eusebius etiam Emislenus, sive quicumque Author vetustus sermonis de corpore & sanguine Domini, cujus initium, Magnitudo cœlestium beneficiorum, sic habet: *Invisibilis Sacerdos visibiles creaturas in substantiam corporis & sanguinis sui verbo suo secretâ potestate convertit, ita dicens, Accipite & edite. Hoc est enim corpus. Et sanctificatione repetitâ, Accipite, & bibite; Hic est sanguis meus. Ergo sicut ad nutum precipientis Domini ex nihilo substiterunt excelsa cœlorum, profunda fluminum, vasta terrarum; pari potentia in spiritualibus sacramentis verbo præbatur virtus, & rei servit effectus*. Et S. Gaudentius tract. 2. de Exodo: *Quod annuntiaturum est, inquit, credas; quia quod accipis corpus est illius panis cœlestis, & sanguis est illius sacra vitis; nam cum panem consecratum & vinum discipulis suis porrigeret, sic ait: Hoc est corpus meum, Hic est sanguis meus. Credamus cui credidimus: nescit mendacium veritas. Non infringamus os illud solidissimum, Hoc est corpus meum, Hic sanguis meus. Verbum etiam exclusivum adhibet Iustinus Martyr Apologia 2. ad Antoninum Imperatorem: Apostoli, inquit, in commentariis suis, quæ Evangelia dicuntur, ita sibi Jesum præcepisse tradiderunt, eum accepto pane cum gratias egisset dixisse, Hoc facite in memoriam mei. Hoc est corpus meum; dixisse etiam accepto poculo, Hic est sanguis meus, ipsisque solis dedisse. Illis etiam mox prolatis consecrari vinum, & in sanguinem Christi converti, docet non solum Am-*

brosius,



brosius *lib. 4. de sacrament. cap. 5.* Sed etiam Author sermonis de coena Domini apud Cyprianum: *Ex quo, inquit, à Domino dictum est, Hæc est caro mea, & Hic est sanguis meus, quotiescumque his verbis & hæc fide actum est, panis iste supersubstantialis, & calix benedictione solenni sacratus ad totius hominis vitam salutemque proficit.* Quod totidem ferè verbis repetit Innocentius III. *lib. 4. de Mysteriis Mssæ, cap. 6.* Nec sufficit dicere Patres illos consecrandi calicis formam integram referre non fuisse sollicitos. Non, inquam, id sufficit: tum quia Patres illi contestantur verbis illis omnipotentibus consecrari calicem, & vinum in Christi sanguinem converti; quod nisi formationem haberent, nequaquam efficerent. Tum quia idem & eodem modo sentiunt de verbis illis, *Hic est sanguis meus*, atque de istis, *Hoc est corpus meum.* Ergo sicut in istis integram & non diminutam consecrandi panis formam, ita in illis completam conficiendi Christi sanguinis formam constituerunt. Tum quia *iis solis, & ex quo* verba illa prolata fuerint, calicem benedictione solenni sacrari dixerunt: ergo aliqua vis verba ad essentiam formæ pertinere minimè arbitrati sunt.

Eadem traditio colligitur ex Liturgiis Ecclesiæ Græcæ, tum per antiquis, cum etiam recentioribus & hodiernis à Romana Sede probatis, in quibus non habentur omnia illa verba, *Novi & æterni Testamenti, mysterium fidei, &c.* sed vel penitus omittuntur, vel non omnia, sed quædam in aliis, quædam in alteris referuntur: illa verò, *Hic est sanguis meus*, in omnibus constanter & uniformiter habentur. Nam ut Pe-

trus Arcudius Græcorum rituum callentissimus lib. 3. *concordia Ecclesia Orientalis & Occidentalis in septem Sacramentorum administratione*, cap. 16. testatur : *Forma consecrationis hujus sacramenti apud Græcos*, inquit, *sunt hæc certa & determinata, eaque sola verba, Hoc est corpus meum, Hic est sanguis meus. Quæ sunt verba Salvatoris, & ea extant in Liturgia Græcorum.* Affirmant etiam viri locupletissimi, pietate, doctrinâ, & dignitate etiam eminentes, quales fuerunt Cardinales Cajetanus & Delugo, Missalia se vidisse Græca & Maronitica, in quibus additamenta præfata non habentur. Et certè in nulla (solâ Romanâ exceptâ) Liturgia omnia illa verba referuntur, ut ex Liturgiis quæ in Bibliotheca Patrum referuntur, legenti patebit. Nec integra illa calicis consecrandi verba Græci usurpant, si unos excipias Monachos Cryptæ Ferratæ non procul ab Urbe degentes, qui ritus suos Ecclesiæ Romanæ omnium Magistræ, & sibi alioquin conterminæ & confinis praxi prudenter & tutò conformant. Dicere autem totam Ecclesiam Græcam formâ calicis & caruisse semper, & etiamnum carere, nec Ecclesiam Romanam reclamare, nec reclamasse; hoc, inquam, dicere tam absurdum est quàm quod maximè, nec refutari oportet quod sponte sua corrui.

Nec satisfacit si dicas cum quibusdam recentioribus, similem esse hanc difficultatem illi quæ de forma Confirmationis, & de materia sacramenti Ordinis objici solet omnibus Theologis peræquè communis, peræquè solvenda. Nam Græci in administranda Confirmatione hac utuntur verborum forma, *signaculum do-*  
nationis



*nationis Spiritus sancti*, quæ utique à Latinæ Ecclesiæ verbis inter confirmandum adhibitis diversa sunt. Varia etiam est verborum forma, quibus sacros Ministros ordinant; varia quoque ejusdem Ordinis in utraque Ecclesia materia, quæ Græcis manuum impositio, Latinis instrumentorum porrectorum contactus est, ut alibi diximus, explicatiùs etiam dum de Ordinis sacramento dicturi. Sicut ergo à communi illa difficultate nos expedituri, agentes de sacramentis in communi diximus, Christum Dominum materias & formas sacramentorum genericè duntaxat & quoad rationes formales, non specificè & quoad rationes materiales ac individuales determinasse; quatenus talem quidem voluit esse materiam, talemque formam, quæ effectum sacramenti determinatè significaret; materialia tamen verba non elegit, quibus effectus ille significaretur; sed ea non cujusbet quidem privatæ voluntati, sed Ecclesiæ à Spiritu suo gubernatæ authoritati & determinationi permisit. Similiter ergo, inquit, licet sit diversitas materialis in forma calicis à Græcis adhiberi solita, est tamen unitas formalis, utpote ad eundem effectum significandum ordinata. Et quia Ecclesia Latina ad significandam sanguinis consecrationem verba omnia illa elegit, idè illa omnia esse essentialia fatendum est, quidquid sit de tenore formæ à Græcis ex sua præscripto Ecclesiæ usurpatæ.

Non satisfacit, inquam, difficultati hæc responsio, sed eam magis implicat, magisque auget. Quanvis enim verba quoad materiale vocis, integrâ essentiâ sacramenti variari possint, necesse est tamen quod verba æquivalentia,  
eandem

eandemque significationem habentia remaneant. V. g. quod baptizetur Christianus his verbis, *Ego te baptizo*; vel istis, *Baptizatur servus Christi*, ad materiale vocum diversitatem in diversis Ecclesiis usurpatam pertinet, ac proinde formæ essentiali significationem non mutat. Si verò verba, *In nomine Patris, & Filii, & Spiritus sancti*, Ecclesia aliqua præmitteret, causata effectum Baptismi prioribus verbis satis significari, omissionem illam Ecclesia Catholica non probaret, sed decretis reprehenderet, percelleret anathematis; sicque truncatâ formâ baptizatos iterum ex integro baptizaret, quia nimirum verba illa, *In nomine Patris*, &c. formæ Baptismatis essentialia esse Ecclesia verbis Christi & traditioni innixa semper & ubique arbitrata est. Ergo similiter si verba illa, *Novi & æterni Testamenti, mysterium fidei*, &c. essentialia esse Romana Ecclesia arbitraretur, materiale quidem eorum variationem, sufficique illi æquivalentia tolerare posset, & prudenter toleraret. At omnimodam verborum illorum omissionem ferre nec posset, nec deberet; multoque minùs hanc formæ mutilationem, & tot verborum essentialium suppressionem autoritate suâ falli vel fallere nesciâ, utpote cui Deus semper assistit, positivè non probaret. Et Græcos tamen sic consecrare & probè novit, & sic consecrare jubet, dum suum cuique ritum servare Conciliorum & Summorum Pontificum infallibilibus imperiis præcipit, & calicem sic consecratum non modò non consecrat iterum, sed adorat. Ergo doctrina illa de variatione materiali formarum variis in locis & etiam temporibus contingenti

tingenti ad præsentem quæstionem impertinens est (Logicorum more loquor verba quædam impertinentia, alia pertinentia distinguendum; ablit enim ut oppositæ sententiæ admodum probabilis, quæve mihi diu placuit, authores ostendam :) nec argumentum à Liturgiis omnium temporum & locorum à Sede Apostolica in Concilio Florentino & deinceps non toleratis modò, sed probatis, sed imperatis petitum enervat, sed magis confirmat.

Accedit primò, magisque illustratur doctrina illa dum de sacramentis in genere tradita. Quanvis materiæ & formæ sacramentorum sacris in litteris non expressæ, nec à Christo Domino in individuo designatæ & definitæ non sint materialiter determinatæ, sed eam determinationem Ecclesiæ columnæ & firmamento veritatis iudicio permiserit, ut docent Theologi dum de Sacramentis in communi: attamen si quæ materia & forma à Christo indicata legitur, nulla eam praxis, nulla consuetudo, nulla autoritas mutare potest: sic quia materiam baptismi aquam, materiam Eucharistiæ panem & vinum esse Christus voluit & luculentissimè expressit, aliâ quavis quocumque tandem modo suspectâ materiâ, nunquam Baptismus, nunquam Eucharistia conficietur. Sic quia in forma Baptismi nominari personas sanctissimæ Trinitatis Salvator voluit & præcepit, irrita erit omnis forma Baptismatis, quæ omisâ invocatione & expressione nominis trium divinarum Personarum, invec̃ta & obtrusa fuerit. In aliis verò sacramentis, Confirmatione, Ordine, Pœnitentia varia in diversis Ecclesiis, diversis quoque temporibus verba usurpata circunferuntur,

cunferuntur, quia numeralem eorum quantitatē veritas non expressit. Cæterum in Eucharistia Christus multa verba protulisse legitur; nam cū corpus tradidit, *Hoc est corpus meum, quod pro vobis tradetur*, dixit; & cū calicem sacrauit, *Hic est sanguis meus, qui pro vobis & pro multis effundetur*; vel, *Hic calix novum Testamentum est in meo sanguine*, dixisse sacri Scriptores litteris commendarunt. Ergo si omnia verba à Christo inter instituendam, conficiendamque Eucharistiam probata essent essentialia formæ, nullâ possent Ecclesiæ potestate mutari, nullâ praxi, nullâ consuetudine prætermitti. Ergo è contra si eorum aliqua supprimantur, sicut in Ecclesia Latina supprimuntur illa, *Quod pro vobis tradetur*; & in Græca ista, *Novi & æterni Testamenti, mysterium fidei*, &c. manifestum est utramque Ecclesiam credere verba duntaxat hæc, *Hoc est corpus meum, Hic est sanguis meus*, vel illis æquivalentia, putà *Hoc est calix sanguinis mei*, esse sola essentialia. Maxime quia ut rectè observat Arcudius lib. 3. c. 25. §. Nota quare, alia Sacramentorum conficiendorum verba Evangelistæ referunt, ut sunt verba institutionis: at verba Eucharistiæ produnt ut sunt institutionis simul & consecrationis. Quando enim Christus præcepit baptizare in nomine Patris, & Filii, & Spiritus sancti, neminem baptizavit; neminem etiam absolvit à peccatis, cū dixit, *quorum remiseritis peccata remittuntur eis*. At quando dixit, *Hoc est corpus meum, Hic est sanguis meus*, & Eucharistiam instituit, & unâ sacrauit, juxta illud suprâ laudati Tertulliani, *Acceptum panem corpus suum illum fecit, Hoc est corpus meum dicendo*; & illud Chrysostomi



soctomi homil. 59. in Matth. *Qui dixit, Hoc est corpus meum, & verbo factum confirmavit.* Nec illis tantum verbis Christus elementa sacra-  
vit, sed à Sacerdotibus etiam consecranda præcepit, cum dixit, *Hoc facite in meam commemorationem.* Non autem hoc facit quod Christus fecit, nisi eadem verba, quibus Christus fecit, ipse proferat; quandoquidem dicere Christi actio est, & quidem potissima, quam inter illud sacramentum consecrandum fecit, cum dicendo corpus & sanguinem fecerit: unde si verba, quibus Christus sanguinem suum fecit, Græci prætermitterent, quæ Christus fecit non facerent, subindeque nihil efficerent. Ergo si quid efficiant (efficere autem illos verum Christi sanguinem nemo Catholicus inficiatur) ea proferunt verba, quæ Christus tanquam essentialia adhibuit. At Græci sola hæc verba, *Hic est sanguis meus*, proferunt. Ergo illa sola sunt essentialia formæ, utpote nulli Ecclesiæ ullius arbitrio vel mutationi obnoxia.

Accedit rursus, atque amplius eadem ratio ad hominem confirmatur. Thomistæ qui nobis hac in parte adversantur, probaturi contra *Ægidium Coninchum* aquam vino infusam non converti immediatè in sanguinem Christi, inde præcipuum argumentum depromunt, quod id solum in sanguinem convertitur, quod est instituta à Christo Eucharistiæ materia, quam solam esse vinum vitigineum communis sententia Scripturæ & Traditioni innixa fert. *Ægidium* verò respondentem Christum instituisse, ut id quod Ecclesia Spiritu sancto afflata misceret, idonea esset consecrandi calicis materia, sic confutant: Quia in designandis Sacramen-  
torum

torum materiis Christus nihil Ecclesiæ commisit, sed circa illorum duntaxat usum & administrationem, dicente Tridentino sess. 21. cap. 2. *Declarat* ( Sancta Synodus ) *hanc potestatem perpetuò in Ecclesia fuisse, ut in Sacramentorum dispensatione, salvâ illorum substantiâ, ea statueret vel mutaret, qua suscipientium utilitati, seu ipsorum Sacramentorum venerationi, pro rerum, temporum, ac locorum varietate magis expedire judicaret.* At materia, inquiunt, & quidem benè, pertinet ad substantiam seu essentiam Sacramentorum. Ergo illius designatio non est commissâ Ecclesiæ, nec Ecclesiæ liberæ facultati permissa, quæ non ad sacramenta, sed ad sacramentalia duntaxat extenditur. Quæ sanè ratio vel nihil, vel idem pro forma Eucharistiæ convincit.

Nec obest quod Christus pro materia matrimonii illum contractum designaverit, quem Ecclesia validum esse decreverit: quidni ergo similiter illa erunt essentialia calicis consecrandi verba, quæ Ecclesia Christi autoritate freta assignaverit. Non obest, inquam, quia Christus evehendo matrimonium in Sacramentum, illius materiam eam esse duntaxat voluit, quâ verus contractus constat; quid autem ad contractum in individuo opus sit, non significavit: unde Ecclesia contractuum leges & condiciones instituens, & novas interdum pro rerum exigentia & sua sapientia adjiciens, non materiam à Christo institutam mutat, nec facit, ut validus contractus non sit apta matrimonii celebrandi materia, sed quid sit verus contractus, quæve ejus condiciones declarat. At verò materiam & formam Eucharistiæ ipse, Salvator de-

legit,

legit, ut in illam observandam Ecclesia sub cœlo tota conspiraret, utque omnium præstantissimum sacramentum majori fideles veneratione prosequerentur, conscii Redemptorem suum sacramentum illud, ejusque ritum & verbis suis instituisse, & peregissee, & ita ab omnibus peragendum præcepisse. Ergo non licet Ecclesiæ quidquam essentialia à Christo adhibitum mutare, sed illud idem religiosè & inviolabiliter retineatur necesse est.

*Mens D. Thomæ ob oculos posita, & ejus rationis efficacia.*

Probatur demùm nostra sententia auctoritate & ratione S. Thomæ *quest. 73. art. 1. & 3.* Et quanvis mens S. Doctoris nonnihil intellectu difficilis & quadantenus subobscura videatur, quin S. Doctorem nobis prorsus adversum dicant quidam recentiores Thomistæ; si tamen contextus Angelici Præceptoris attentè & accuratè perpendatur, palam erit doctrinam ejus non modò nobis non repugnantem, sed penitus esse favorabilem, nostræque sententiæ fundamentum solidissimum sanctum ipsum Thomam jecisse.

In primis *art. 1.* quærit, utrum hæc sit forma hujus sacramenti, *Hoc est corpus meum*, & *Hic est calix sanguinis mei*, nec ullorum ibi aliorum verborum meminit. Respondet verò affirmativè; quia, inquit, *Forma hujus sacramenti importat solam consecrationem materia, quæ in transubstantiatione consistit, puta cum dicitur, Hoc est corpus meum, vel Hic est calix sanguinis mei.*

*mei*. Vides S. Thomam perspicuè se explicantem, & nostram sententiam inde confirman-  
tem, quod illa est vera forma Eucharistia, quæ  
importat & significat consecrationem materiæ,  
quæ in transubstantiatione consistit. Atqui sola  
illa verba, *Hoc est corpus meum, Hic est calix*  
*sanguinis mei*, significant consecrationem &  
transubstantiationem; significant enim substan-  
tiam sub speciebus panis latentem esse corpus  
Christi, substantiam in calice existentem esse  
sanguinem Christi. Ergo auctore S. Thoma &  
ratione ejus id suadente, sola illa verba consti-  
tuunt formam Eucharistia.

Hinc in responsione ad 4. ejusdem articuli  
sic exerte mentem suam aperit, ut nullum  
dubitandi locum reliquerit, ait enim: *Di-*  
*cendum est*, quod si Sacerdos sola prædicta ver-  
ba proferret (nimirum, *Hoc est corpus meum,*  
& *Hic est calix sanguinis mei*,) *cum intentione*  
*consciendi hoc sacramentum, perficeretur hoc sa-*  
*cramentum*. Ergo sola illa verba *cum inten-*  
*tione consciendi hoc sacramentum*, ad perfici-  
endum Eucharistia sacramentum S. Thomas  
desideravit. Unde non est hallucinatus noster  
Marcus Serra, dum scripsit hoc testimonium  
esse pro nostra sententia manifestum, ut qui-  
dam carpere faciles, carpi impatientes arbitrati  
sunt, qui tantæ lucis vim eo ex testimonio  
emicantem ægrè ferentes dixerunt S. Thomam  
verbis illis excludere solum verba anteceden-  
tia, *Qui pridie quàm pateretur*, non verò sub-  
sequentia, *Novi & æterni Testamenti*. Quia  
nimirum S. Thomas respondens argumento  
probandi verba illa, *Qui pridie quàm pateretur*,  
esse necessaria, ait quod sola verba illa



cum intentione perficiunt sacramentum: *Quia intentio*, inquit, *faceret ut hac verba intelligerentur quasi ex persona Christi prolata, etiamsi verbis præcedentibus hoc non recitaretur.* Unde, inquit, sola verba præcedentia excludit S. Thomas.

Sed hoc effugium sua ipsa subtilitate evanescens abit in fenum; etenim in toto illo articulo primo asserit; & ex professo probat Sanctus Thomas, sola illa verba, *Hoc est corpus meum, Hic est calix sanguinis mei*, essentialem formam continere. Contra hoc objicit sibi primo loco, sola illa verba non posse formam constituere; quia cum verba illa in persona Christi proferri debeant, ut id significetur, oportet præmitti verba illa, *Qui pridie quàm pateretur.* Ad quod respondens in conclusione in corpore stabilita constanter perseverans, ait sola illa verba sufficere, nec obesse quod illa in persona Christi à Sacerdote proferri oporteat, ad quod videntur necessaria verba antecedentia; non obesse, inquam, quia hoc sufficienter facit intentio, etiamsi verbis antecedentibus hoc non significetur. Ex quibus manifestissimum est, S. Thomam excludere quidem eò loci à forma Eucharistiæ verba antecedentia, sed ea ratione, iisque verbis, quæ & alia quævis verba sive comitantia, sive sequentia excludunt. Quia, inquit, ad conficiendum Sacramentum sufficit ad materiam accedere formam cum intentione quæ facit ut Sacerdos agat in persona Christi, etiamsi præcedentia Canonis verba omittantur: *Vnde si Sacerdos sola verba prædicta proferret cum intentione conficiendi hoc Sacramentum, perficeretur*

tur hoc sacramentum. Accedit, quod in eadem responsione ad 4. ideo verba illa, *qui pridie*, non esse de essentia formæ ait: *Quia Canon Missæ non est idem apud omnes, nec secundum omnia tempora, sed diversa sunt à diversis apposita.* Ex quibus infert sola verba à nobis adducta esse essentialia, & quidem consequenter; nam verba illa & eadem apud omnes sunt, & semper, & ubique fuerunt. Qua ratione tam sequentia, quàm antecedentia verba apertissimè exclusit: Verba enim illa, *Novi & æterni Testamenti*, &c. *Nec sunt eadem apud omnes, nec secundum omnia tempora, sed diversa sunt à diversis apposita*, & à multis prætermissa, ut ex lectione Liturgiarum, tam antiquarum quàm modernarum omnibus constat. Ergo verissimè dixit S. Thomas: *Quod si Sacerdos sola illa verba proferret cum intentione conficiendi hoc sacramentum, perficeretur hoc sacramentum.*

Major videtur esse difficultas in articulo tertio. Sed diligenter consideranti patebit ibi S. Doctorem nostram sententiam astruxisse. In primis notandus est titulus articuli, *Utrum hæc sit conveniens forma consecrationis vini, Hic est calix sanguinis mei, novi & æterni Testamenti*, &c. Ubi advertendum non inquirere S. Doctorem, utrum hæc sit essentialis forma, vel utrum hæc omnia ad essentiam formæ Calicis pertineant; id enim inquisiverat art. 1. & responderat sola illa verba, *Hic est calix sanguinis mei*, esse essentialia, eisque solis perfici sacramentum. Impræsentiarum ergo quærit, num hoc non obstante in forma Calicis adhibeantur hæc verba, *Novi & æterni Testamenti*, &c.

quæ per modum unius formæ Ecclesia Latina ab Apostolis instructa recitat. Unde convenientiam illorum verborum, non essentialem eorum necessitatem exponere intendit.

Hoc posito respondet quosdam absolutè, & sine ulla distinctione affirmare verba illa nullo modo esse de substantia formæ. *Sed hoc videtur inconueniens*, inquit, *quia ea quæ sequuntur sunt quadam determinationes predicati, id est sanguinis Christi, unde pertinent ad integritatem loquutionis: & propter hoc sicut alii melius dicunt, omnia sequentia sunt de substantia formæ usque ad hoc quod postea sequitur, Hac quotiescumque feceritis, quod pertinet ad usum hujus sacramenti.* Ecce verba quibus potissimum adversarii confidunt. Sed frustra; legitimus enim D. Thomæ sensus est: Inconueniens est dicere absolutè verba illa nullo modo esse de substantia formæ, cum sint explicationes formæ essentialis, & cum illa per modum unius continentis periodi & integræ loquutionis uno & eodem ritu & modo à Sacerdote recitentur. Certè sicut in sacramento Pœnitentiæ licet forma essentialiter consistat in illis verbis, *Ego absolvo te*, ut docet & probat D. Thomas 3. p. quæst. 84. art. 3. tamen verba ista, *à peccatis tuis*, quæ ex usu Ecclesiæ adduntur, possunt dici de substantia formæ, quia eandem propositionem integrant, & quid ly *absolvo* significet declarant: ita quia verba illa, *Novi & æterni*, &c. per modum unius integræ orationis explicitè aperiunt quod verba essentialia implicitè tantum important, meritò de substantia formæ dici possunt, id est ingrediuntur integritatem loquutionis, & veluti constructionem

structionem ejusdem propositionis & enuntiationis.

Hanc esse D. Thomæ mentem manifestum est; tum quia explicans quo sensu verba illa sint de substantia formæ, ait ideo esse, quia *pertinent ad integritatem ejusdem loquutionis*; quo etiam modo hæc verba, à *peccatis tuis*, pertinent ad integritatem ejusdem loquutionis Sacerdotis absolventis; quo similiter modo verba hæc, *Quod pro vobis tradetur*, in Ecclesia Græca eodem ritu & modo celebrata dici possunt pertinere ad integritatem ejusdem loquutionis. Tum quia mentem suam sic adhuc apertiùs in eodem corpore articuli S. Thomas interpretatur. Dicendum ergo, quod omnia prædicta verba sunt de substantiâ formæ, sed per prima verba cum dicitur, *Hic est calix sanguinis mei*, significatur ipsa conversio vini in sanguinem eo modo quo dictum est in forma consecrationis panis. His verbis omnem ambiguitatem submovit; si enim sola hæc verba, *Hic est calix sanguinis mei*, significant conversionem vini in sanguinem, profectò eam efficiunt, cum sacramenta id efficiant quod significant; & si eodem modo significant quo forma consecrationis panis, utique perfectam conversionem significant. Addit tamen convenienter verba sequentia adjici per modum ejusdem formæ, seu per modum explicationis formæ essentialis, quæ cum significet sanguinem ut à corpore separatum, convenienter verba sequentia formam calicis ingrediuntur per modum accessorii, ut illis designetur virtus sanguinis effusi in Passione, qua operatur in hoc sacramento, inquit S. Thomas.



Dices : S. Thomas ibi per substantiam formæ intelligit essentiam formæ ; tum quia agens de sacramentis in genere, *quest. 60. art. 8.* pro eodem accipit substantiam & essentiam : *Si diminuat*, inquit, *aliquid eorum quæ sunt de substantia forma sacramentalis, tollitur sensus verborum.* Tum quia in eodem sensu accipit S. Thomas nomen substantiæ, cum ait quosdam velle verba omnia non esse de substantia, ac cum addidit alios melius dicere omnia esse de substantia formæ. Atqui in prioribus verbis Authores illi nomen substantiæ pro essentia usurpabant : Ergo & in posterioribus verbis D. Thomas per substantiam essentiam intellexit, ne æquivocatione laborasse videatur.

Respondeo satis mirum videri ; conari nonnullos S. Thomam ipsomet reclamante in alium sensum detorquere , & conjecturis suadere velle ibi S. Doctorem per substantiam essentiam intellexisse , ubi declarat se per substantiam intelligere *integritatem ejusdem loquutionis* , & majorem explicationem , seu *designationem virtutis sanguinis effusi* ; non verò essentiam formæ conversionem operantis , quia *per prima verba cum dicitur , Hic est calix sanguinis mei , significatur ipsa conversio vini in sanguinem ; eo modo quo dictum est in forma consecrationis panis.* Quod autem alibi per substantiam essentiam intellexerit , quid inde , vel quid tum ? Quasi nomen substantiæ non possit variè variis in locis accipi , præsertim si quo sensu accipiatur luculentissime explicetur ? Quasi D. Thomas verba multiplici sensu foeta , in eodem sensu ubique & semper accipere alligatus fuerit ? Quasi D. Thomas in quæstione illa

Ille 60. per substantiam essentiam se intelligere non indigitavit, dicens per diminutionem substantiæ se intelligere mutationem, *quâ tollatur debitus sensus verborum*; hic verò per substantiam non asseruerit se intelligere integritatem, & veluti explicationem *eiusdem loquutionis*? Quod verò dicitur, Authores quos in principio articuli refellit S. Thomas, per substantiam intellexisse essentiam, ægrè ni fallor probarent adversarii, si ejusmodi illorum conjecturæ rationes sciscitaremur. Quare eorum Authorum mens non divinando, sed ex refutatione S. Thomæ dignoscenda est. At S. Thomas non reprehendit eos, quòd vellent sola verba priora esse essentialia, sed quòd nullo modo, nulloque sensu substantiam formæ ingrederentur, se haberentque sicut verba illa, *Hec quotiescumque feceritis*, &c. Ergo Authores illi per substantiam non intelligebant essentiam tantum, sed quidquid substantiæ nomine comprehendendi aliquâ tandem ratione potest, ut magis patet ex his quæ inter expendenda S. Thomæ verba dicta sunt.

Ex his, quæ in Summa Theologica clarè & distinctè S. Præceptor docet, explicari facile possunt quæ nobis ex aliis locis objici solent. Nam cum dixit S. Thomas in 4. dist. 8. q. 2. art. 4. *quæst. 1.* omnia verba illa esse *de forma*, veridicè scripsit; sed an sint de forma per modum essentiæ vel per modum integritatis loquutionis, seu explicationis & veluti expansionis formæ essentialis, non ibi, sed in Summa nobis aperuit. Cum verò ait ibidem *ad 3.* verba illa esse *essentialia sanguini prout in hoc sacramento consecratur*, verum est; quia explicant es-

sentiam sanguinis ut reverà separati, quam verba essentialia implicite tantum significant: sicut *ly à peccatis*, sunt essentialia gratiæ absolutivæ quæ poenitentiae sacramento impenditur, quam hæc verba, *Ego te absolvo*, implicite duntaxat nobis significant. Similiter cùm *lect. 6. in cap. 11.* prioris ad Corinth. scripsit omnia verba *esse de necessitate formæ*, id intelligitur, non per modum constitutivi formæ, sed per modum explicationis illius; unde subdit ea *pertinere ad ejusdem loquutionis sententiam*, sicut de his verbis, *à peccatis tuis*, dictum est, & eodem modo quo diceretur: Petrus est homo, seu animal rationale. Cùm denique ibidem ait, *Totum pertinere ad vim effectivam*, vel per modum essentiae efficientis, vel per modum explicationis rei quæ efficitur, verissimum est, ut in Summa S. Doctor sui interpretes exposuit.

Sed inquires: Quid ergo causæ est, quod B. Pius V. summus Pontifex non ita pridem in Beatorum numerum à Clemente X. relatus illam Cajetani commentariorum partem, in qua nostram sententiam tuebatur, expungi jussit?

Respondeo varias afferri à variis hujus Pontificii præcepti causas, quarum meminit Isambertus. Primò aiunt Pontificem non Cajetani sententiam reprobasse, sed prudenter statuisse discipuli & interpretis S. Thomæ, tanti Magistri sententiam non satis honorificè, nec ea quæ par erat reverentiâ tractantis, commentaria textui, quem elucidare debuerant, contraria esse delenda. Secundò & veriùs dici potest, meritò obliterari illam Cajetani commentariorum

riorum partem debuisse, quia germanam D. Thomæ mentem non attigerat vir alioquin ingeniosissimus & eruditissimus Cajetanus ad purpuram jam assumptus, subindeque sui juris factus & propriis opinationibus plus æquo indulgens. Etenim S. Thomam arbitratus est existimare omnia verba illa esse formæ calicis consecrandi essentialia, quibusdam articuli tertii verbis ab aliorum contextu, divulsis deceptus. Et tamen veritas est S. Doctorem totam Calicis consecrandi formæ essentiam in illis duntaxat verbis, *Hic est sanguis meus*, constituisse; cætera ad majorem expressionem, & formæ essentialis declarationem idonea & congrua declarasse.

Ratio fundamentalis hujus nostræ responsionis non est alia præter eam, quæ à S. Thoma posita est, & ad hanc formam reducitur: Forma sacramentorum essentialis ea est, quâ illud significatur quod in sacramento efficitur: atqui hæc una verba, *Hic est sanguis meus*, vel *Hic est calix sanguinis mei*, significant conversionem vini in sanguinem, subindeque eam efficiunt; non enim minus significant ista, *Hic est sanguis meus*, quàm hæc, *Hoc est corpus meum*, ut benè argumentatur S. Thomas. Ergo sola illa verba sunt essentialia. Hanc rationem tangit Concilium Trident. sess. 13. cap. 4. ubi probat fieri in Eucharistia conversionem substantiæ panis in corpus Christi, & vini in sanguinem ejus, quia verbis suis Christus significavit hoc quod offerebat, esse corpus & sanguinem suum: Ergo illa tantum verba quæ hoc significant, sunt conversiva & consecrativa, cum idem sit convertere panem & vinum in



corpus & sanguinem Christi, & Eucharistiam consecrare. Atqui verba conversiva & consecrativa sunt essentialis hujus sacramenti forma, cum sacramentum sola consecratione fiat. Ergo sola præfata verba sunt essentialis Calicis consecrandi forma, cum ex vi illorum etiam non prolatis aliis significetur conversio vini in sanguinem Christi, proindeque conversio illa efficiatur. Dicere verò verba illa non significare conversionem illam nisi dependenter à verbis sequentibus, probabilitate caret; tum quia non minùs sunt significativa verba hæc, *Hic est sanguis meus*, quàm ista, *Hoc est corpus meum*; & sicut significatio istorum non pendet à verbis quæ Christus adjecit, dum dixit, *Quod pro vobis tradetur*; nec illa ab istis, *Qui pro vobis effundetur*. Quia nimirum utraque non addidit Christus tanquam formæ essentialia, sed ut discipulos & fideles omnes de quo corpore, de quòve sanguine loqueretur efficeret certiores. Tum quia verbis illis, *Hic est sanguis meus*, continetur aliqua propositio perfecta significans aliquam veritatem. At non aliam significat, quàm quod in calice sit sanguis Salvatoris, cum ex illis verbis Ecclesia in sacro Tridentino congregata colligat veram dari & substantialem vini in sanguinem Christi conversionem. Ergo sola illa verba, *Hic est sanguis meus*, significant sanguinem Christi ibi adesse, etiam antequam verba cætera proferantur, alioquin falsum enuntiarent; assererent quippe adesse sanguinem qui nondum foret: ex eo autem quod res est vel non est, oratio dicitur vera vel falsa. Quia nimirum omnis oratio vera objectum suum vel supponit, si speculativa sit; vel

certè

certè efficit, si practica & factiva existit. Præsertim cum verba Sacramentorum sint agentia necessaria, quæ à Ministro quidem applicari debent, sed semel prolata & applicata non possunt quod significant non efficere.

Nec valet si respondeas quod sicut verba ista, *Ego te baptizo*, licet grammaticè effectum sacramenti Baptismi significant, verba tamen sequentia, *In nomine Patris, & Filii, & Spiritus sancti*, sunt essentialia, quibus nondum prolatis, nondum etiam producit effectus sacramenti, quantumvis in prioribus verbis significatus.

Non, inquam, valet: tum quia verbis istis, *Ego te baptizo*, non ita perspicuè effectus Baptismi significatur, quin ad alia multa significanda deduci possint; verba enim illa de se ad varias ablutiones significandas in differentia, ad ablutionem internam à gratia sanctificante, quæ sanctissimæ Trinitatis expressio est & attractio, proficiscentem designandam determinantur. At verò verba hæc, *Hic est sanguis meus, Hic est calix sanguinis mei*, perspicuè conversionem vini in sanguinem Christi significant, non minus quàm ista, *Hoc est corpus meum*, conversionem panis in corpus Salvatoris. Tum quia in designandis Sacramentorum essentialibus formis Ecclesiæ judicio, usibus, & consuetudinibus probatis standum est. Cum ergo in omnibus Christiani orbis Ecclesiis expressa sanctæ Trinitatis invocatio ad formam Baptismi essentialiter desideretur, relinquitur verba illa, *In nomine Patris, & Filii, & Spiritus sancti*, ad essentialem baptismatis formam pertinere. At contra verò in multis Ecclesiis,

quin & in toto Oriente omnia illa verba inter consecrandum calicem non adhibentur; & qui non adhibent minimè reprehenduntur: signum ergo est omnia illa non esse formæ essentialia.

Dices: Omnia illa verba eodem ritu & modo profert Sacerdos calicem in manu tenens, antequam sanguis populo adorandus proponatur. Quin verba illa adeo necessaria arbitratur Latina Ecclesia, ut in Missalis rubricis præcipiatur, repetendam ex integro esse formam, si aliqua verborum illorum prætermitti contigerit. Ex quibus sic ratio instauratur: Si omnia verba illa ad essentiam formæ non pertinerent, possent salvâ Sacramenti essentiâ prætermitti, cum per priora verba conversionem vini in sanguinem efficientia peractum Sacramentum supponatur. Atqui Ecclesia Latina aliquod verborum illorum prætermitti strictissimè vetat, & in casu quo prætermisum fuerit, repeti iteratò formam præcipit; cum tamen Sacramentorum formas super eandem repetere materiam nefas sit. Ergo censet Ecclesia Latina omnia verba illa esse essentialia.

Respondeo eodem argumento probaturum Theologum Græcum verba illa, *Quod pro vobis tradetur*, esse panis consecrandi formæ essentialia, cum ea Græcus Sacerdos eodem ritu & modo proferat, ut ex Græcorum Liturgiis quæ habentur tomo 6. Bibliothecæ Patrum editionis Parisiensis patet. Nec posset ei responderi, ideò verba illa non esse essentialia, quia ab Ecclesia Latina prætermittuntur: non, inquam, id ei responderi posset; statim namque reponeret quod nobis respondent adversarii, Christum  
non

non instituisse específicas & individuales Sacramentorum formas, seu materialem eorum tenorem, sed totum quoad hoc Ecclesiæ auctoritati permisisse: & quia Ecclesiæ Græca verba illa, *Quod pro vobis tradetur*, Scripturæ & Patrum liturgiis innixa adhibenda decrevit, verba illa erunt essentialia, tametsi à Latinis non usurpata, si vera sit adversariorum doctrina, de qua superius actum est.

Dicendum ergo omnia verba illa eodem ritu & modo à Sacerdote proferri, quia sunt formæ essentialis explicatio & declaratio, atque integram & adæquatam propositionem determinando præcipuum prædicatum componunt: sicut in forma Pœnitentiæ omnia verba hæc, *Ego te absolvo à peccatis tuis, in nomine Patris, & Filii, & Spiritus sancti*, à Sacerdote eodem ritu & modo proferuntur, licet non omnia peræquè ad essentialiam pertineant. Cùm verò dicitur interdicere Ecclesiæ, ne verba ex illis ulla prætermittantur, probat quidem necessitatem præcepti, at non necessitatem Sacramenti tamen. Quod verò additur, Ecclesiæ in casu omissionis alicujus particulæ formæ illius, totam ex integro repeti velle, sollicitudinem & cautelam Ecclesiæ in Sacramentis consuevissent securiora sectantis ostendit; cùm enim omnia verba illa ad essentialiam desiderari multi Doctores teneant, illa præsertim, quæ effusionem sanguinis significant; & aliunde in possessione illius formæ Ecclesiæ sit, eam retinere, & omisam instaurare prudentissimè studet, ut in re omnium maxima, centro nimirum Religionis & pietatis Eucharistiâ nullum prorsus dubium supersit. Cùm verò verba ex integro repetuntur,



petuntur, postquam illa semel prolata sunt, *Hic est calix sanguinis mei*, tunc non sunt consecratoria, cum consecrationem supponant, sed sunt explicativa & declarativa proprietatum sanguinis Christi fusi, & veluti sacer formæ commentarius à traditione consecratus.

Instabis : Eucharistia non solum est Sacramentum, sed etiam sacrificium : Ergo utrumque debet exprimi per formam ; formas enim Sacramentorum ipsorum exprimere naturam effectusve oportet. At nequit verbis exprimi sacrificium, nisi fiat fusi sanguinis mentio, sicut nec reapse fit sacrificium sanguine non fuso. Ergo saltem verba illa, quæ Christi sanguinis effusionem significant, non possunt ad essentialiam formæ non pertinere.

Respondeo certum esse verba quæ sanguinis effusionem significant, longè magis censeri necessaria quàm ista, *Æterni, Mysterium fidei* ; unde in omnibus ferè Liturgiis quas legere potui, fusi vel fundendi sanguinis mentio expressa fit. Sed non propterea essentialia esse argumentum convincit. Quanvis enim Eucharistia sit sacramentum & simul sacrificium, tamen utrumque essentialiter significant verba hæc, *Hoc est corpus meum, Hic est sanguis meus*. Cum enim significant corpus mysticè separatum à sanguine, imò & significando illud mysticè separent, sacrificium & significant, & significando peragunt, & adorandam victimam Deo immolant.

Multa circa efficacitatem, significationem, instans productionis verborum formæ inquiri solent ; sed hæc aliaque subtilia magis quàm utilia ex superius dictis dum de transubstantia-

tionem agebamus, satis superque elucidata manent.

REFLEXIO.

In materia Eucharistia Christi aditu & congressu facilis, suavissimam comitatem, & beatissimam copiam mirati sumus; in forma ejusdem Christi voluntariam obedientiam, quæ attentos rapit, contemplari & imitari est. Mirantur fateor, & certatim in hoc divinissimo Sacramento virtutes tuæ collucent, ô Domine Jesu; unde illud Davidicum meritò usurpare licet: *Quàm dilecta tabernacula tua, Domine virtutum!* Et iterum: *Altaria mea Domine virtutum, Rex meus, & Deus meus.* Quia nimirum in Sacramento tuo fecisti speculum animæ meæ, in quo splendentes omnes virtutes tuæ se conspicuas & imitandas præbent, ut sine timore de manu inimicorum meorum liberatus ferviam tibi in sanctitate & justitia coram te omnibus diebus vitæ meæ. Verum enim ita in eo rutilat virtus obedientiæ, ut sola tenere palmam, sola eminere videatur. Ad cujus claritatem

Considerandum est primum, totum universi decorem in ordine à Deo præstituto, & partium illius harmonia & consonantia situm esse. Porro ordo ille, in cujus tranquillitate pax orbis tota, auctore Augustino consistit, rerum invicem concatenatarum obedientia continetur, quæ inferiora superioribus, infimæ causæ mediis, mediæ supremis jugiter supponuntur. Hinc tam innato odio à vacuo natura abhorret, quo nimirum causarum influxu & inferiorum

rum à superioribus dependentiâ dissolutis, universitatis unitas in illa connexionē & naturali obedientia consistens interturbaretur, omniaque proinde susdeque miscerentur. Creaturæ omnes & singulæ, ut docet D. Thomas 1. 2. *quest. 93. art. 2.* à superioribus, & à prima omnium causa Deo motuum suorum principia perenniter accipiunt, quæ sunt veluti æternæ legis derivati radii & expressiones, juxta illud Psalmographi: *Præceptum posuit, & non præteribit.*

Considerandum rursus in solis creaturis ratione præditis veram obedientiam inveniri, quæ Deo dum obsequuntur, ultimam naturæ suæ perfectionem consequuntur; servire enim Deo regnare est. Hinc Angeli, creaturarum nobilissimi, toti ad obedientiam nati, toti comparati, & veluti effecti sunt. Omnes enim sunt administratorii spiritus, atque ut Paul. *Hebr. 2.* post Davidem testatur, *Fecit Deus Angelos suos spiritus, & ministros suos ignem urentem, seu flammam ignis*: quia nec celerius rapiuntur venti, nec ignis in centrum vehementius cietur, quàm beati illi Spiritus ad exequenda supremi Domini mandata feruntur. Solus Deus, per quem Reges regnant, utpote ab omnibus independens, ab obedientiæ legibus immunus est. Tot tamen & tantæ sunt hujus virtutis venustates & gratiæ, ut Dei filius cùm intra Deum obtemperare non posset qui Patri æqualis est, humanam sibi assumere decrevit infirmitatem obedire ut posset, dicente Apostolo *Hebr. 5. Et quidem cùm esset Filius Dei, didicit obedientiam.* Tota Redemptoris vitæ series perpetua obedientiæ exercitatio fuit. Pri-



ma Incarnati Verbi cogitatio obedientia fuit: *Ecce venio, Deus meus volui, & legem tuam in medio cordis mei.* Ultimum ejus suspirium obedientia; fuit enim obediens usque ad mortem; mortem autem crucis, & ut ait Bernardus, *ne perderet obedientiam, perdidit vitam.* Moriens quoque inclinat caput, ut observat Cyprianus, quasi ponens super caput Patris mandatum.

Quia Eucharistia est Incarnationis extensio, & passionis jugis memoria & viva imago, obedientiæ etiam est perpetua expressio. Generalis est illa obedientia; etenim Patri obsequitur, cui se perenni sacrificio immolat. Sacerdotibus obtemperat, ad quorum nutum se sistit, & momento præsentem exhibet. Utrunque stupor, ut phrasi Bernardi utar: utrinque miraculum; & quod creatura Deo principetur, sublimitas sine socio; & quod Creator creaturæ obsequatur, obedientia sine exemplo. Infinitam omnipotentissimæ virtutis suæ potestatem, cum è nihilo cuncta condidit, demonstravit: at nihilo minus infinitam obedientiæ humilitatem ostendit, dum à Sacerdote toties Christus producit, quoties divinum Sacramentum conficitur. Beneficium Incarnationis extollit Joannes, quod per illud dedit Pater nobis potestatem filios Dei fieri: quid autem mirabilius, an accipere potestatem filios Dei fieri, an habere potestatem corpus Filii Dei facere? Magnificat Scriptura collatam Josuë potestatem, quod Solis cursum sistere, & Deo Solis conditori & rectori meruerit imperare. *Stetit itaque Sol*, inquit sacer Textus Josuë 10. *& non festinavit occumbere: non fuit antea, nec postea*  
tam



*tam longa dies, obediēte Deo voci hominis. At Sacerdotes non Solem corporeum, sed Solem justitiæ; non per unum diem, sed à sexdecim sæculis sistunt, & apud nos præsentiam ejus & deliciis fruituros retinent. Sol, aiebat Seneca, spectatorem non habet, nisi cū occidit. Ejus miramur eclipsim cujus splendorem non suspicimus. Sol justitiæ in hoc Sacramento quotidie mysticè moritur, quotidie morientis formam induit, quotidie sub specierum velo eclipsim & veluti luminis sin defectionem, certè occultationem præ obedientiæ amore patitur: & nemo miratur, quia tantum prodigium nobis assiduitate vilescit. Præclare Chrysostomus hom. 27. in epist. ad Hebr. expendens Josuë divinitus collatam potestatem Solem in medio cælo cōhibentem: Fortasse, inquit, unusquisque vestrum vellet esse hujusmodi, posse imperare soli & luna: sed his majora assequemur, si velimus. Quid mihi opus est Sole & Luna, & his miraculis? Cū ipse omnium Dominus ad me descendat, & apud me firmus maneat & stabilis.*

Nec Sacerdotibus solum, sed cæteris etiam omnibus obsequitur obedientissimus Jesus. Impiorum etiam conculcationibus se supponit; unde omnibus charitate & voluntariâ obedientiâ inferior. *Calcari enim non potest*, inquit Augustinus lib. 7. de serm. Domini in monte, cap. 10. *nisi inferior.* Et D. Thomas in cap. 1. ad Hebr. lect. 6. *Illud dicitur perfectè subiectum alicui, quod ipse potest pedibus conculcare.* Hinc Scriptura significatura omnia Christo esse subji-cienda: *Ponam*, inquit, *inimicos tuos scabellum pedum tuorum.*

Et quasi parum esset omnibus hominibus obedire, illis in omnibus, & per omnia obsequitur Christus, nedum generali, sed cæcâ etiam obedientiâ. Omnibus sui copiam facit Christus; nec causas requirit: ad infirmos se deferri, per plateas circumgestari, indignis quoque se porrigi sinit; quia sepulto propriæ voluntatis arbitrio, ad hoc se usque ad consummationem sæculi reliquit, ut aliorum se permetteret voluntati. Duas obedientiæ cæcæ dotes Patres spirituales commendant; nam non vultum, sed potestatem respicit imperantis, nec præcepti rationes disquirunt. Christus non Sacerdotis consecrantis vultum, aut animæ sive fœdum, sive pulchrum, sive sordentem peccatis, sive splendentem virtutibus considerat: solius potestatis rationem habet, ut prolatis ab ipso verbis sine mora adsit. Motiva etiam consecrantis non discutit ut veniat, sive sacrilega, sive sacra intentio sit; sive Dei gloriam, ut decet; sive propriam & turpe lucrum, ut fieri sæpe & nimium assolet, inquirat, perinde est: obedire sine discretione vult, & iniquis se subijcit voluntatibus, ut superbus homo justis amet obedire præceptis.

Denique quod me stupore defigit, promptitudo est obedientiæ: momento exequitur Dominus servi voluntatem, & ut adventum suum nullâ tardatione remoretur, ingentia in instanti miracula patrat, innumerisque simul locis adest, ulla ne sit verba prolata inter & sui præsentiam intercapedo. Verus obediens, uti libro de præcepto & dispensatione docet Bernardus, parat aures auditui, linguam voci, pedes itineri, manus operi, & se totum intus colligit.

ligit, ut mandatum peragat imperantis. En genuinam Christi in Eucharistia obedientis imaginem; ubi totum se nostris devovet voluntatibus. Planè aures ejus in preces nostras inclinatae sunt, qui Sacerdotum nutibus regitur, & beneplaciti eorum expectatione totus suspensus hæret & pendet.

Si tam grata est & accepta Christo obedientia, ut eâ alligari omnipotentiam suam sinat qui nullo vinculo astringi potest, ut ejus amore inescatus Christus, & magnitudinem naturalem seponat ad exiguum spatium contractus, & civilem exuat totus in nostros usus expensus, & sacrilegiis etiam impiorum suppositus: nonne Deo Regi Regum, veroque omnium Domino subjecta erit anima mea? Quâ fronte tam justum imperium detrectabit vilis creatura, posteaquam tam iniquo se Deus majestatis subjecit? Non quatuordecim duntaxat annos, sicut olim Jacob sponsam obedientiâ lucraturus, sed à sexcentis supra mille annis nobis deservire non desinit amator cordis nostri, & videntur ei dies pauci præ amoris magnitudine, & nondum eum de cordibus nostris triumphare finimus, & post tantos tanti tamque solliciti amoris impulsus repulsam patitur & contemptionem? Teneræ militiæ est, aiebat Chrysologus, & delicati conflictus amore certare, amore referre victoriam: & tamen, ô cordis humani super adamantem duri rigorem! tantæ teneritudini, tantis infiniti amoris blanditiis non cedimus? Nonne talem rebellionem talis confundit obedientia? Christus quidquid suarum virtutum est ad utilitates & compendia nostra refert; & nos, cujus nostrum nihil est, Deo denegamus?

Dignum



Dignum sanè & justum est, Domine Jesu, ut sicut authore Apostolo præmium obedientiæ fuit exaltatio, & nominis tui super omne nomen celebrati gloria, ut in nomine tuo omne genu flectatur, cœlestium, terrestrium & infernorum; ita ob tantam quam in Eucharistia obedientiam præstas, de omnibus gloriosè cordibus triumphes. Ergo Rex esto noster, & dominare in medio inimicorum tuorum. Advéniat, quæso, regnum tuum; regnum, inquam, quod intra nos sit, quodve non est esca & potus, sed gaudium & pax in Spiritu sancto. Regnum, inquam, cui qui servit, liber & Rex efficitur: à quo qui se summovet, & quam habet amittit, & in deteriorem quam assequitur incidit servitutem. Nam alia sarcina pondus habet; sarcina tua pennas habet, cujus jugum suave est, & onus leve: & quod de Patre filii prodigi in collum occurrentis nati incidente scripsit Chrysologus, in te per Eucharistiam in nos incurrentem veriùs cadit: *Juvatur istius Patris onere filius, non gravatur.*

## SPECVLATIO III.

*Modus quo Christus in Eucharistia  
existit, paucis quasitis  
exponitur.*

EX formæ Eucharistiæ superiori speculatione stabilitæ veritate, & realis Christi corporis, sanguinisque præsentia, materię transubstantiatio seu transelementatio sponte  
sua



sua consequitur : sed cùm forma panis solius corporis , forma vini consecrandi solius sanguinis mentionem faciat , restat , & statim se offert inquirendus modus , quo Christus sub remanentibus utriusque elementi speciebus , seu accidentibus existit.

*Quæres I. quid vi verborum , quid concomitanter sub utraque specie contineatur ?*

Respondeo ex vi verborum formæ corpus Christi sub speciebus panis , sanguinem sub speciebus vini contineri ; cætera verò omnia non nisi per concomitantiam hoc in sacramento inveniri.

Ratio totius responsionis est : Illa ex vi formæ verborum in hoc sacramento per se ponuntur , quibus positæ veritas formæ consistit ; illa verò concomitanter adesse dicuntur , quæ verbis non exprimuntur quidem ; illi tamen quod exprimitur ita conjunguntur , ut sine illis quod exprimitur , esse naturaliter non possit. Atqui verbis consecrationis panis unum Christi corpus exprimitur , verbis verò consecrationis vini solius sanguinis mentio fit. Ergo ex vi verborum solum sub speciebus panis corpus , solus sub speciebus vini sanguis continetur. Veruntamen quia corpus Christi ex sanguine non est , sed vivum & animatum , & in Verbo subsistens , corporis præsentiam & sanguis , & anima rationalis , & persona Verbi , & ipsa divinitas naturali connexionе concomitantur : quod de sanguine peræquè certum est,

cum

cùm à corpore, vel à Verbo divulsum non sit: Ergo quidquid in Christo est per concomitantiam in Eucharistia realiter adest, juxta illud in Ecclesia celebratum: *Caro cibus, sanguis potus; manet tamen Christus totus sub utraque specie.*

Hanc doctrinam definivit ex professo Tridentinum sess. 13. cap. 3. his verbis: *Semper hac fides in Ecclesia Dei fuit, statim post consecrationem verum Domini nostri corpus, verumque ejus sanguinem sub panis & vini specie ex vi verborum; ipsum autem corpus sub specie vini, animamque sub utraque, vi naturalis illius connexionis & concomitantia, quâ partes Christi Domini, qui jam ex mortuis resurrexit non amplius moriturus, inter se copulantur: Divinitatem porrò propter admirabilem illam ejus cum corpore & anima hypostaticam unionem; quapropter verissimum est tantundem sub alterutra specie atque sub utraque contineri, & sub quavis ipsius speciei parte; totus item sub vini specie, & sub ejus partibus existit. Quod & can. 3. necnon sess. 21. cap. 3. sancta Synodus inculcat. Idque antea definiverat Concilium Constantiense sess. 17.*

Irrident, scio, vel etiam hanc doctrinam conviciantur moderni hæretici, errorum tenebris & capitali quo in Ecclesiam feruntur odio occæcati. Lutherus quidem hac in parte varlus & parum sibi constans fuit; postquam enim in assertione articuli 16. & in responsione ad schedulam inhibitionis Episcopi Misnensis, necnon suo ad Waldenses libro dixit totum Christum sub utraque specie existere & accipi, in informatione tamen ad quemdam amicum scribit,

scribit, Christi corpus non sanguinem sub pane, & sanguinem non corpus sub vino contineri. E discipulis verò ejus Philippus Melanthon in apologia, Kemnitius in examine decreti de communione sub utraque specie, & Brentius in Confessione Wittembergensi Christum vivum, subindeque sub utraque specie totum & integrum adesse fatentur. Attamen Hilemanus *libro de sexcentis erroribus Pontificiorum*, & Illyricus, necnon Hermannus Hamelmanus *lib. de communione sub utraque specie*, totum Christum sub utraque specie contineri inficiantur, & concomitantiam à Catholicis assertam, diabolicum inventum esse blasphemant. Calvinus verò *lib. 4. institutionis, cap. 17.*

§. 4. doctrinam de concomitantia animi laxis habenis lascivientis & ferocientis audaciam vir post hominum memoriam, impudentissimus appellat. Sed Scripturâ, ad quam solam provocant hæretici profligantur. Cum enim Christus *Joan. 6.* perspicuè dicat, *Qui manducavit me, vivet propter me*, totum se in Eucharistia manducari apertissimè declarat. Neque enim aliter se Christus edendum porrigit, quàm juxta conditionem & statum quem nunc habet, subindeque corpus vivum, animatum, & Verbo hypostaticè unitum tradit. Nec propterea duæ seorsim consecrationes fiunt, tum quia sic passio Christi melius repræsentatur, in qua sanguis è corpore Servatoris fuit sejunctus. Tum quia instructi diviniis convivii ratio apertius significatur, in quo anima Christo commensalis carne pascitur, sanguine potatur, si verè tamen, ut par est, justiciam esuriat & sitiat.

Porro per corpus, quod per se directè, & vi  
verborum



verborum sub speciebus panis poni diximus, non est intelligenda materia affecta quantitate, vel formâ corporeitatis, aliisque partialibus formis instructa; quia corpus juxta principia Philosophiæ nostræ per illa non constituitur; sed intelligenda est materia informata animâ, quatenus dat gradum corporeum, unde directè caro, ossa, & alia ad corporis organici integritatem pertinentia adsunt. Neque hinc inferre licet, animam vi verborum sub specie panis contineri: non, inquam, id inferas; quia anima prout dat esse vivum & animatum, vi verborum formaliter non adest. Cujus signum luculentum est, quod si in triduo mortis Christi fuisset hoc sacramentum celebratum, non fuisset sub speciebus panis anima sive vi verborum, sive naturali concomitantia præsens; & tamen ibi corpus adesset idem, non identitate formæ substantialis, sed identitate suppositi eandem existentiam & substantiam habentis. Cæterum quomodo corpus importet formam substantialem quæ dat esse corporeum, dependet ex quæstione philosophica de forma corporeitatis; unde juxta suæ Philosophiæ principia facilè quisque respondere poterit.

Dices: Vi verborum ponitur corpus cum omnibus partibus ipsius integralibus. Ergo unâ cum corpore necessariò & directè ponitur principium divisionis & distinctionis partium, quod est quantitas, quæ subinde vi verborum sub speciebus panis invenitur.

Respondeo vi verborum non poni partes in ratione partium, sed secundum rationem substantiæ; unde & actio conversiva transubstantiatio dicitur. Quare non adest quantitas nisi



concomitanter, quia est proprietas conjuncta corpori & coæva materiæ, quæ vi verborum adest. Ex quibus etiam Durandi opinio confutata manet, qui corpus Christi suâ orbem quantitate in Eucharistia contineri arbitratus est, falso suo principio nixus de essentia quantitatis, quam in extensione locali & actuali impenetrabilitate sitam esse putavit. Sed præter ea quæ contra ipsum Philosophi urgent, stat ratio invicta à doctrina Ecclesiæ petita, quæ totum Christum, non mancum aut mutilatum, nec confusum aut indistinctum, Eucharistiæ realiter adesse confitetur.

*Quæres 2. Vtrum Pater & Filius per concomitantiam in Eucharistia præsentés speciali aliquâ ratione sint?*

Respondeo negativè, contra Suarem & Vasquem: tum quia Tridentinum loco citato ea diligenter enumerans quæ in hoc sacramento vel formaliter, vel concomitanter habentur, nullam aliarum à Filio Trinitatis personarum mentionem facit, non prætermitturum si speciali aliquo titulo inessent. Tum quia quando hoc sacramentum sumimus vel offerimus sacrificium, Patrem & Spiritum sanctum sacramentaliter sumere, vel immolare nequaquam dicimur. Tum quia ideo Tridentinum divinitatem concomitanter adesse ait, quia corpori est hypostaticè unita. Patet autem nec Patrem, nec Spiritum sanctum corpori esse personaliter unitum.

Nec obest personarum omnium cum divinitate

tate

tate unio & identitas, quia sicut hæc identitas non facit Patrem vel Spiritum sanctum esse etiam concomitanter incarnatos; ita nec facit in Eucharistia concomitanter inveniri. Quia nimirum ut aliquid per concomitantiam in sacramento Eucharistiæ insit, opus est ut realiter unitum sit corpori vel sanguini, quæ verborum vi in Eucharistia continentur; cum id solum concomitanter adesse censeatur, sine quo id quod verbis formæ exprimitur, integrum esse non potest.

Non est tamen inficiandum, totam Trinitatem speciali quadam ratione, tametsi non sacramentali, hocce in sacramento præsentem esse; quia, nimirum singularem specialissimæ erga nos charitatis effectum operatur. Præsertim quia cum hoc sacramentum divini sit centrum amoris, & ineffabilis clementiæ thronus, ibi adsit oportet Spiritus sanctus amor personalis, cui omnes amoris profusiones specialiter attribuantur. Ibi etiam misericordiarum Pater & Deus totius consolationis adest, è cuius sinu pietatis & benignitatis fluenta Filius jugiter in nos derivaturus hauriat; quia ut ait Bernardus serm. 43. in Cant. *Accubitus Regis sinus est Patris, quia semper in Patre Filius est. Nec dubites hunc Regem esse clementem, cui perennis accubitus est paterpa benignitatis diversorium.*

*Quares 3. Quomodo Christus sub speciebus existat?*

Respondeo Christum esse in Eucharistia realiter præsentem per modum aliquem supernaturalem & substantialem. Ratio est, quia cer-

tum est Christum in Eucharistia modum aliquem realem præsentiaæ obtinere, qui eidem in cælo existenti minimè competit, quo in multis simul Altaribus realiter & indivisibiliter existit, quòve alio modo se habet; quod sine mutatione aliqua, sive novi modi receptione, quem antea non habebat, esse non potest. Atqui modus ille supernaturalis est & substantialis. Supernaturalis quidem, cum omnem naturæ exigentiam, omnes causarum naturalium facultates & vires excedat. Substantialis verò, cum beneficio illius Christus sit in Eucharistia ad modum substantiæ, juxta illud D. Thom. q. 76. art. 5. *Corpus Christi non est in hoc sacramento sicut in loco, sed per modum substantiæ, eo scilicet modo quo substantia continetur à dimensionibus: succedit enim substantia corporis Christi in hoc sacramento substantia panis; unde sicut substantia panis non erat sub suis dimensionibus localiter, sed per modum substantiæ, ita nec substantia corporis Christi.* Et hac de causa sicut tota ratio substantiæ in toto continuo, & in totis ejus partibus invenitur; ita corpus Christi totum in tota hostia, totum in singulis ejus partibus realiter existit. Atqui modus existendi substantiæ eximius substantialis est, non accidentalis, cum sit rei existenti consentaneus, & omnia accidentia saltem ordine naturæ antecedit. Ergo Christus est in Eucharistia realiter præsens ratione superadditi alicujus modi supernaturalis & substantialis, quo Christi corporis substantia afficitur, & modum existendi substantiæ imitatur. Ex quibus

Sequitur 1. modum præsentiaæ Christi in Eucharistia non esse meram relationem propinquitatis

quitatis ejus ad species; nec actionem Christi conservantis species sine subiecto, eo ferè modo quo præsentia Angelorum ab ipsorum actione proficiscitur; nec modum aliquem ubicationis, uti Suares & alii quidam existimarunt. Non est quidem relatio, quia hæc supponit fundamentum unde resultet, quod explicandum superest; supponit enim relatio propinquitatis præsentiam, non facit. Non est etiam actio conservativa specierum, quæ species afficit, non Christum; unde modum indivisibiliter existendi formaliter non confert. Non negaverim tamen Christum ad conservationem specierum sine subiecto existentium concurrere: tum quia miraculosi effectus omnes Christo specialiter asseruntur: tum quia cum Christus substantiæ succedat, ejus vices non passivè sustentando (quod imperfectionem redoleret) sed effectivè accidentia verbo virtutis suæ porrando supplet. Non est etiam ubicatio: tum quia modus ubicationis, si detur, supponit fundamentum cui innitatur, putà quantitatem in corporibus, operationem in spiritibus. Modus autem sacramentalis præsentiae Christi & à quantitate, & ab actione conservativa specierum independens est.

Sequitur 2. Christum non esse in hoc sacramento tanquam in loco, sive localiter, ut eodem art. 5. docet S. Thom. Et rationem assignat, tum quia corpus Christi est in Eucharistia ad modum substantiæ totum in toto, & totum in qualibet parte: ergo legibus præsentiae localis non subicitur, nec dimensionibus commensuratur. Tum quia duplex est tantum modus existendi in loco, circumscriptivus unus, definitivus alter:



at neutro modo Christus est in Eucharistia; non quidem circumscriptivè, seu per commensurationem totius substantiæ & quantitatis ad spatium, ita ut totum corpus toti spatio, & partes corporis parti spatii corresponsdeant; cum Christus sit totus in toto, totus in qualibet hostiæ consecratæ parte; nec etiam definitivè, eo modo quo Angeli sunt in loco, & anima rationalis in corpore: quia esse definitivè in loco est intra determinatam spatii sphaeram concludi, licèt in illa spiritus sit totus in toto, totus in qualibet parte; sicut Angelus non potest adæquatam loci connaturalis sphaeram transilire, nec anima plura simul discreta corpora informare. At Christus in nulla hostia, nulloque altari arctatur, sed in innumeris à se mutuò remotissimis simul & semel invenitur. Ergo præsentia Christi in Eucharistia realis quidem est, at non localis tamen, sed illâ superior & eminentior, quæ sacramentalis appellatur. Quod si esse in loco penetraliùs accipiatur pro eo quod est esse realiter præsens illi loco, illi-que spatio in quo sunt species, tunc bono sensu admitti potest Christum esse localiter in Eucharistia; licèt enim Christus solitum corporis spatium more corporum non impleat, qua de causa præsentia localis nomen S. Thomas aspernatus meritò est; ferri tamen potest hæc loquendi formula, si nihil aliud eâ intelligatur, quàm verè sub speciebus contineri Christum, quæ cum in certo sint loco, consequens est eodem loci esse corpus Christi.

Ex quibus liquet quanta sit quorundam recentiorum inscitia, qui carpendorum Catholicissimorum qujusdam in paucis celebris Theologi

logi de Eucharistia sensuum cacozelia acti scripserunt ad fidem catholicis verbis de Eucharistia efferendam & profitendam non satis esse his verbis uti : *Credo in Eucharistia corpus Christi esse realiter præsens* , nisi addatur *Christum esse præsentem præsentia locali*. Verùm ut dixi , incitiam suam produnt , qui catholicam de Eucharistia fidem his verbis concipi oportere aiunt. Præsentia enim localis nusquam Patres , nusquam Concilia , nusquam Tridentina Synodus hac in parte accuratissima , atque ad Lutheri , Calvinique impia dogmata proscribenda congregata istuc verbi usurparunt. Ipse etiam Pius IV. qui juxta Sacri Concilii dispositionem fidei professionis formam & tenorem edidit , in qua articulus Eucharistia disertissimè & luculentissimè exprimitur , voce illa usus non est. Et ipse D. Thomas clarissimus Eucharistia defensor , à Deoque ad exponenda Eucharistia arcana specialiter provisos , non solum vocem eam non adhibuit , sed eam etiam ex professo repudiavit 3. p. quæst. 76. art. 5. *Nulla modo* , inquit , *corpus Christi, est in hoc sacramento localiter*. Quæ autem tam perfrictæ frontis audacia Concilia , Pontifices , Patres , Doctores Eucharistiam ab hæreticis vindicantes suspectæ vel ambiguae fidei insimulare præsumat ? Sed in re planissima & ipsis Theologia novitiis nota & triviali immorari supervacaneum est , præsertim cum ex mox dicendis id ampliùs elucidaturi simus.

*Quæres 4. An corpus Christi per se, vel  
per accidens hoc in Sacramento  
moveri possit?*

Respondeo ex D. Thoma art. 6. Christum in Eucharistia non moveri per se localiter, sed duntaxat per accidens, ratione specierum sub quibus existit. Ratio sequitur ex dictis: Christus non est in sacramento sicut in loco seu modo & præsentia locali propriè dictâ: quod autem non est in loco, non movetur per se de loco in locum, sed ad ejus in quo est motum cietur.

Ex quibus sequitur 1. eorum recentiorum sententiam esse rejiciendam, qui posuere Christum non posse quidem motu progressivo, ad quem requiritur extensio, se movere; benè tamen motu simplici ei non absimili quo gravia deorsum, levia sursum feruntur: putà si Christus è speciebus exiret, vel si cum illis ad rem diffitam se conferret: & ita in illis miraculosis casibus in sacris historiis recensitis contigisse volunt, in quibus hostiæ sacræ nullo eas deferente ad viros sanctos convolasse leguntur. Rejicienda est, inquam, hæc imaginatio. Non enim exit, vel quasi egreditur Christus de speciebus nisi cum istæ desinunt, ad quarum defitionem ipse desinit: quod enim de se habet esse indeficiens, non potest esse deficienti principium, sed alio deficiente tunc desinit esse in eo: Christus autem habet esse indeficiens & incorruptibile, unde non nisi ad defitionem specierum ipse desinit. Et quanvis Christus  
in

in casibus miraculosis moveat motu progressivo hostiam (quod tamen incertum est) non tamen sequitur ipsum per se moveri localiter, sed tantum per accidens ad motum hostiæ à se efficienter motæ : sicut anima licet moveat corpus, non tamen per se, sed per accidens ad motum corporis localiter movetur; & Angelus dum corpus assumptum movet, ad motum ejus per accidens movetur. Et ratio paulò antè tradita est, quia sicut Christus non est in loco per se & ratione sui, sed duntaxat ratione specierum, quia non est in loco ratione quantitatis molis, quæ unicum est in corporibus occupandi loci fundamentum, sicut in Angelis quantitas virtutis : ita nec per se localiter moveri potest; moveri enim localiter est mutare locum, quod fieri nisi ab occupante locum non potest.

Sequitur 2. rejiciendam esse Scoti, Durandi-que sententiam, qui omnem omninò motum etiam per accidens Christo in Eucharistia dene- garunt. Oppositum enim certum est. Etenim cum juxta Tridentinum *sess... cap. 5. & 6.* Christus in Sacramento Eucharistiæ per vias & loca publica in solennibus supplicationibus circumferatur & circumgestetur, atque ad infirmos deferatur, moveri ipsum per accidens & cum speciebus mutare locum necesse est.

Porro hic motus per accidens dupliciter intelligi potest. Primum ita ut ad motum specierum corpus Christi motum & ubi intrinsecè recipiat : sic pars ad motum totius, nauta ad motum navis cietur. Secundò ita ut nullius motus vel ubi impressione afficiatur. Priori modo arbitratur Suares corpus Christi moveri



posteriori Thomistæ, & quidem probabilius: quia cum motus localis in speciebus receptus sit accidens corporeum & extensum, sicut & ubi circumscriptivum, quod est illius terminus, illud solum motum intrinsecè recipit, quod accidens extensum recipere natum est: corpus autem Christi indivisibiliter in Eucharistia existens non est ad recipiendum extensum accidens idoneum: nihil ergo corpori Christi, sed unis duntaxat speciebus motu illo imprimitur.

Dices: Quomodo moveri potest quod nullum in se recipit motum, cum effectus formalis à forma proficiscatur, & esse motum à motu? Certè sicut Christus neque frigefactis speciebus etiam per accidens friget, nec incalescit calefactis, quia neque frigus, neque calorem in se recipit ullum: ita moveri nequaquam dicitur, nullum si impressum motum recipiat.

Respondeo quod sicut anima rationalis ad localem corporis motum moveri localiter per accidens dicitur, nec tamen calefacto corpore incalescit; ita corpus ad motum specierum mutare locum dicitur, ad earum tamen alterationem vitari, alterari, vel corrumpi non dicitur. Et ratio differentię est, quia alterari nihil potest, nisi alterum reipsa fiat; alterum verò non fit quod nihil recipit: ad motum verò localem sufficit, ut aliquid in eo quadam ratione contineatur quod novum spatium occupat; præsentia enim rei contentę continentis præsentiam sequitur & imitatur.

Instabis: Non potest corpus Christi in Eucharistia realiter præsens ad motum specierum etiam per accidens moveri, nisi illis speciali quadam ratione unitum sit; non enim move-

tur aliquid ad motum alterius, nisi illi conjunctum sit, ut ejus veluti ductum sequatur. Ac nulla inter corpus Christi & species remanentes unio interest, quæ enim? Neque enim est unio subjecti cum accidentibus, cum Corpus Christi accidentibus illis non substernatur, nec ab eisdem informetur. Nec est unio continui ad continuum, cum corpus Christi sit in Eucharistia modo indivisibili & spiritali, ab omnibus proinde continui legibus absolutum. Nec est unio contigui ad contiguum, eo modo quo liquor in vase concluditur, vel quo vestes corpori adhærent, quia hæc unio coextensioni locali innititur, cui corpus Christi eminet. Quonam ergo nexu, quo vinculo alligatur corpus Christi speciebus, ut istarum motum sequi teneatur?

Respondeo præter vinculum amoris, quo se Deus speciebus addixit, ut omnibus etiam distantibus copiam faceret; non enim amat, & deserit; præter illum, inquam, charitatis indissolubilem nexum, est alia ratio ob quam speciebus physicè uniri meritò dicatur. Cum enim corpus Christi substantiæ panis succedat, & in accidentia id efficienter influat quod illa passivè præstabat, unitur Christus accidentibus sicut motor mobili, sicut Angelus sphaeræ quæ eiet, sicut columna & fulcrum (se motâ tamen omnis passivi concursus imagine & labe) ædificio quod sustentat; uno verbo effectivè accidentibus unitur, sicut substantia cui sufficitur, ejusve vices sine imperfectione gerit, accidentibus illis ante transelementationem passivè copulabatur. Certè sicut subsistentia Verbi humanitati sublatæ imperfectionibus eo modo

unitur, quo substantia creata naturæ fuisset copulata, quia ejus loco succedit & officia implet; ita cum corpus Christi substantiæ panis, cui substituitur, munera præstet, cum speciebus effectivè connectitur, sicut eisdem substantia panis sustentando uniebatur. Explicant id alii exemplo penetrationis, ut sicut corpus penetrans ibi est & eò pergit, quò penetratum fertur, ita corpus Christi species pervadens earum motum sequitur. Verùm hujusmodi unionis exemplum aptè non quadrat, nec præsentì congruit instituto. Etsi enim corpus penetrans penetrato præsens sit, attamen ab istius loco & motu independens est, nec ejus motum sequi obligatur, nisi unum alteri quodam vinculo naturali alligetur, quo unum aliud veluti trahat, & secum progredi faciat, nec exire sinat. Sola autem penetratio id non præstat, quia sicut loco corporis penetrati non alligat corpus penetrans beatam spirituum subtilitatem assequutum, ita nec motum ejus sequi compellit, sed ipsum moveri sinet se immoto, nisi nexu illi aliquo devinciatur.

*Quæres 5. utrùm corpus Christi in hoc sacramento realiter existens ab oculo corporeo saltem glorioso & divinitus videri possit?*

Instituitur primò quæstio de oculo corporeo, non de intellectu; quia licet intellectus virtute naturali corpus Christi in Eucharistia existens videre non possit, cum intellectus nihil pro statu nisi per species à sensibus emendicatas,

dicatas, quas in Eucharistia corpus Christi non emittit, intelligere queat; attamen si intellectus lumine gloriæ perfusus ipsam divinam essentiam objectorum omnium cognoscibilem præcellentissimum intuitivè videt, à fortiori corpus Christi in Eucharistia tametsi supernaturaliter existens divinitus videre poterit.

Inquiritur secundò de oculo glorioso, id est supernaturali lumine divinitus adjuto; quia exploratum est nullum oculum corporeum corpus Christi in Eucharistia existens ingenitâ naturalis virtutis facultate videre posse: tum quia corpus Christi medium diffusionis specierum non immutat, ad hoc enim modo extenso & quantitativo ipsum existere oporteret. Tum quia corpus Christi est in hoc Sacramento, ad modum substantiæ, id est secundum modum qui substantiæ ut præscindit ab accidentibus per se convenit: sicut ergo substantia sic spectata ab oculo corporali naturaliter videri non potest, ita nec corpus Christi. Difficultas ergo superest de oculo supernaturali lumine divinitus roborato. Negant Capreolus, Suares, & Joannes à S. Thoma; nihilominus

Respondeo per absolutam Dei potentiam corpus Christi in Eucharistia existens ab oculo corporeo videri posse. Probatur ratione & auctoritate. Ratione quidem, quia licet oculus non possit videre modum præsentiae corporis Christi in Eucharistia, qui cum sit merè supernaturalis & indivisibilis, sub sensum cadere non potest, sed à solo intellectu percipi valet; attamen corpus in hoc sacramento existens continetur intra latitudinem objecti specificativi potentiae



potentiæ visivæ, quod est coloratum & lucidum : sed nulla est repugnantia objectum potentiæ visivæ ab oculo videri, quia licet in hoc statu sit objectum improporcionatum, novo tamen supernaturalis luminis accessu aptabitur oculus, & objecti improporcionem facile vincet. Sicut etsi Deus clarè visus sit objectum omnem intellectum creatum & creabilem excedens, beneficio tamen luminis gloriosi Deum, qui cæteroquin intra objectum specificativum facultatis intelligentis continetur, intuitivè videre potest, & reapse in cælis videt. Nec dicas ad id non sufficere lumen, nisi habeatur objecti species, quam corpus Christi in Eucharistia in oculum emittere non potest. Non, inquam, id dicas; quia nihil repugantiæ est, vel Deum producere speciem corporis Christi in oculum videntis, vel ipsum corpus eam per operationem naturali superiorem divinitus emittere.

Favet etiam autoritas S. Thomæ *art. 7. ad 2.* asserentis oculum Christi corporeum seipsum videre sub sacramento existentem; non tamen videre modum essendi quo est sub sacramento, quod pertinet ad solum intellectum. Quod si Christi oculus corpus suum videt, quidni idem corpus alii oculi divinitus adjuti videre poterunt? Dicere verò cum Capreolo textum esse mendosum & vitiatum, deceptio est, cum ita in omnibus codicibus, & in ipso Parisiensi S. Thomæ coarvo legatur. Addere verò cum Suare & Joanne à S. Thoma ly *sub sacramento*, non esse conjungendum cum objecto visionis quod significatur per ly *seipsum*, sed cum oculo vidente, ut sensus sit, oculus corporalis Christi sub sacramento existens videt seipsum absolute,

absolutè, non prout in sacramento, sed prout in propria specie existit, quia nimirum retinet visionem quam habet in cœlo, quâve seipsum in propria specie cernit: hoc, inquam, addere est manifestam vim plano S. Thomæ textui inferre; non enim dixit Divus Thomas, *oculus Christi videt seipsum sub sacramento existens*, quod utique dicere debuisset, si ly *sub sacramento*, cum oculo vidente conjungi oporteret; sed dixit, *oculus Christi videt seipsum sub sacramento existentem*, id est fertur in corpus suum quod in sacramento existit.

Sed inquires: Quid ergo causæ est, quod D. Thomas concedens oculum corporalem Christi videre seipsum sub sacramento existentem, de aliis oculis gloriosis id inficiatur; subjungit enim: *Nec tamen est simile de alio oculo glorioso, quia etiam oculus Christi est sub hoc sacramento, in quo non conformatur ei oculus gloriosus?*

Respondeo jure merito oculum Christi in Eucharistia existentem ab aliis etiam gloriosis oculis discernere S. Doctorem, quia alter oculus gloriosus non est capax recipiendi naturaliter species ab objecto illo; quia quantumcunque gloriosus sit, objectum tamen suum non nisi per species extensas videre naturaliter potest, quas corpus Christi in Eucharistia non diffundit. At verò oculus Christi corporeus ad modum sui corporis in sacramento existit, id est modo indivisibili & inextenso, unde sui corporis speciem recipit; & hoc est, quod voluit S. Thomas dum dixit: *Quia etiam oculus Christi est sub hoc sacramento, in quo non conformatur ei oculus gloriosus.* Cæterum id esse  
absolutè

absolutè possibile aliis oculis gloriosis extra sacramentum existentibus non negat. D. Thomas, sed positivè affirmat in 4. dist. 11. quest. 1. art. 4. q. 1. ad 1. dicens: *Oculus Christi extra species sacramentales existens non videt seipsum intra species sacramentales existentem, nisi miraculosè: & similiter alii oculi gloriosi non vident ipsum hic nisi fortè per miraculum.*

Dices: Implicat potentiam illam cognoscentem ferri in objectum quod est extra sphaeram suæ propriæ & adæquatæ specificationis. Atqui corpus Christi in Eucharistia existens est extra sphaeram objecti specificativi & adæquati potentia visivæ, quod debet esse sensibile: non est autem sensibile quod modo quantitativo & extenso non existit; quia tunc sui speciem in medium & potentiam immittere non potest: illa enim species nec indivisibilis esset, nec divisibilis; non indivisibilis, utpote in medio & in oculo extenso recepta; non divisibilis, utpote ab objecto indivisibiliter existente emissa. Ergo corpus Christi in Eucharistia existens nullâ etiam absolutâ potentiâ ab oculo corporeo videri potest.

Respondeo Corpus Christi in Eucharistia existens non amittere visibilitatem, cum lucidum & coloratum inibi perseveret: & quanvis non sit in sacramento extensum in ordine ad locum, extensionem tamen & distinctionem in ordine ad se retinet; unde in se visibilis & sensibilis permanet: non tamen naturaliter videtur, quia sui speciem non diffundit, sed eam Deus potest in oculum producere, & quidem extensam atque facultati videnti accommodatam. Non est etiam repugnantia ulla, quod



quod corpus Christi per actionem naturali altiore Deo supernaturaliter concurrente sui in oculum speciem emittat. Maxime quia modus ille spiritalis quem corpus Christi in Eucharistia habet, facit quidem corpus Christi invisibile, atque illud à conditionibus loci immune reddit; sed dum illud à conditionibus spatii absolvit, non tamen naturali vi agendi illud privat, ne privilegio illo aliquid ei deperat: unde posset Christus & se visibilem, & sensibus præbere tractabilem si vellet. Facit quidem absconditus ille Christi existendi modus, ut nullus corporeus oculus videre corpus Christi & specierum velum veluti percurrere & pervadere possit; non impedit tamen quominus Christus corpus suum specierum involucri voluntarie circumfusus in lucem aspectabiliter proferre queat, possitque erumpere corporis gloria, quam magno potestatis, & majore amoris miraculo suspendit, omnes ut ad se venire sinat, nullumque deterreat tantæ splendor majestatis: sicut in terris dum viveret, sponte redundaturum ex anima in corpus gloriæ effluxum retinebat, ut nobis similis apparens dulcius alliceret, vehementius stringeret, & inter tolerandos humilis vitæ labores nostræ redemptionis opus expleret.

Instabis: Non potest videri corpus Christi in sacramento existens, nisi videatur modus quo existit, cum modus ille sit ratio formalis existendi in sacramento: at modus ille, utpote insensibilis, à solo intellectu videri potest: ergo nullus corporeus oculus corpus Christi in Eucharistia existens videre potest.

Respondeo visâ re oportere simul videri  
modum



modum quo existit , quando res existens & modus existendi sunt ejusdem ordinis , non diversi ; tunc enim objectum specificativè cernitur , sed non ut est existens , vel ut sub existentia reduplicativè videtur. Sic beati illi oculi Christum in terris conversantem videntes , rem existentem quidem , existentiam tamen & subsistentiam divinam minimè pervidebant. Nec propterea illa visio dicenda erit abstractiva , sed intuitiva ; quia tunc solùm abstractio contingit , quando unum percipitur non percepto alio ad eandem potentiam pertinente , vel eodem modo proportionato ; nam experienciâ compertum est , oculum percipientem colorem , saporem non attingere , nec justam quantitatis mensuram , quando objectum est valde distans.

### REFLEXIO.

Multa advertere potuit Lector eruditus divinæ virtutis prodigia in modo quo Christus in Eucharistia existit : sed ut verum fatear , unum est quod & suaviùs allicit , & arctiùs stringit , & attentum rapit , modus nimirum amoris qui sine modo est , & ultra omnem modum : quem sanè dum mente recogito , verba defunt , intellectus hæret , judicium obruitur. Tanta profectò Christi charitas urget nos , hoc est non allicit modò & demulcet , sed vim etiam quodammodo cordibus nostris infert. Tam mirabilis , tam insolitæ , tam stupendæ existendi rationis modum invênit , ut nobis intimiùs unitus & ipse in nobis , & nos in ipso maneremus. *Magnum quidem fuit* , inquit S. Thomas  
opusculo

opusculo de sacramento Altaris, cap. 3. *Christum Dominum seipsum in peregrinationis nostræ socium dedisse: majus verò in pretium redemptionis. Hoc tamen donum adhuc est in aliqua separazione ab eo cui datur: cum autem datur in cibum, datur non ad aliquam separationem, sed ad omnimodam unionem. Uniuntur enim in unitate corporis & cibus, & qui cibum sumit.*

Tria sunt quæ amorem sibi justissimè vindicant, bonitas nimirum, amor, beneficentia: hoc triplici igne qui non incenditur, neque liquefcit, ferrei cordis sit necesse est. At enim in hoc sacramento & essentiam bonitatis, & diffusionem charitatis, & beneficiorum, quorum non est numerus, largitatem possidemus. Ergo quid aliud in nobis faciat ( ut Bernardus de amore Dei sermonem habens perpendit ) considerata tanta & tam indebita miseratio, tam gratuita & sic probata dilectio, tam inopinata dignatio, tam invicta mansuetudo, tam stupenda dulcedo? Quid, inquam, hæc omnia faciant diligenter considerata, nisi ut considerantis animum ab omni penitus pravo vindicatum amore ad se mirabiliter raptant, vehementer afficiant, faciantque præ se contemnere quidquid nisi terrènarum rerum contemptu appeti non potest? Nimirum proinde in odorem unguentorum horum sponsa currit alacriter, amat ardentè, & parum sibi amare sic amata videtur, etiam cum se totam in amore perstrinxerit. Nec immeritò. Quid magnum enim si tanto repensatur amor, si pulvis exiguus totum se ad redamandam collegerit, quem illa nimirum majestas in amore preveniens, tota in opus salutis ejus intenta conspicitur.

Sed

Sed si tanta est, inquires, Christi in Ecclesiam animasque dilectio, cur eum existendi modum elegit, quo faciem & se totum abscondit? Nonne potius erunt nobis lacrymarum panes die & nocte, dum dicitur nobis quotidie, Ubi est Deus vester? At quisquis hæc objicit, divini ignorat industrias amoris. Realiter Christus in Eucharistiæ adest sacramento, absens tamen videri vult, ut amorem probando acuat, aciendo inflammer: adest, ut auxilium præbeat & solatium; abesse videtur, ut ipsum animus Christianus quærat, ipsum appetat, ipsi inhiet, in quem desiderant Angeli prospicere. Denique adest, & non apparet; nisi enim adesset, non præberet remedium; nisi lateret, non inescaret appetitum. Ergo quia adest, sub umbra illius sedeamus, ut sit fructus ejus dulcis gutturi nostro; quia latet, statque post parietem nostrum respiciens per fenestras, prospiciens per cancellos, in illum totis medullis cordium, totis præcordiorum affectibus, & geminatis desideriorum castorum igniculis feramur. Deficiamus in salutare ejus, hoc est, ut exponit Ambrosius in Psal. 118. in Christum totis studiis migremus quem diligimus: illum cogitemus, illi adhæreamus, illum personemus: in illum quadam animæ defectione transfundamur, præ desiderio tabescentes, & tanquam corporis viribus resoluti. *Sed quo magis lassatur affectus, eo magis amor crescit: Et quo diutius abest qui desideratur, eo expectantis desideria majori quadam vi amoris ignescunt.*





## DISSERTATIO III.

*De causis & effectibus Eucharistia.*

AVSAS & effectus divinissimæ Eucharistiæ tractaturo ab illis Doctoris melliflui verbis exordiri libet : *Potestne aestimari quale & quantum sit hoc Sanctum sanctorum, Sacramentum sacramentorum, amor amorum, dulcedo omnium dulcedinum?* Adeo enim eo in efficiendo totius pietatis sacramento certatim collucent divina attributa; adeo patent ibi viscera misericordiæ, cogitationes pacis, mysteria salutis; adeo in Sanctos exinde profluunt copiosæ redemptionis rivi, ut in eo cœlesti convivio elaborando ac instruendo verius illud esse probetur quod de hominis formatione libro de resurrectione carnis Tertullianus scriptum reliquit: *Recogita totum Deum occupatum ac deditum manu, opere, consilio, providentiâ.*

Porro circa causam hujus sacramenti dubitare nemo potest, quin Deus sit mirabilis illius operæ pretii causa efficiens & finis ultimus; Deus, inquam, author supernaturalis, à quo opus omnes naturæ vires immensum excedens procedat necesse est, & in cujus gloriam præcipuis radiis illustrandam cedit: sed inquirenda sunt primùm motiva proxima, quibus permota misericordia tantæ molis opus merita excedens



excedens & vota edidit: deinde quæ attributa in eo parando cibo splendidiùs eniteant, investigandum est; demùm de causa ministrante, seu de hujus sacramenti sive conficiendi, sive dispensandi Ministro priùs agendum est, quàm ejus effectus ordine recenseamus.

## SPECVLATIO I.

### *Specialia divina Eucharistia motiva expenduntur.*

**P**rimum est singularis & eximia præcipui amoris & excellentissimæ dilectionis, quæ majorem nemo habet, nemo habere potest, demonstratio. Cùm enim amoris sit amantium unio & bonorum communio, nihil ad demonstrandum amorem in nos suum hoc sacramento efficacius Christus habet, quo cor nostrum illud sibi copulaturus invadit, & omnia nobis bona sua sine exceptione largitus est, & jugiter nobiscum usque ad consummationem sæculi convivens largitur, illud implens quod aliàs Proverb. 8. dixerat: *Delicia mea esse cum filiis hominum.* Unde piè cum Cardinali Turcremata in opusculo de divinissimo Eucharistiæ sacramento, non ita pridem reperto exclamare licet: O charitas Christi omni admiratione major! Siliquis porcorum vix digni sumus, & Angelis commensales & convivæ facti sumus: panem enim cœli dedit eis, panem Angelorum manducavit homo. Nec solùm nobis panem omne delectamentum in se habentem

bentem porrigit, sed quod nos stupore defigat oportet, suas in hominum convictu delicias divinus Amor constituit. Confiteantur Domino misericordiae ejus, & mirabilia ejus filiis hominum. Quid tibi, ô anima mea, potuit de cœlorum vertice stillari suavius, vel porrigi delectabilius, quàm quod universorum Dominus, totius boni fons & plenitudo delicias arbitretur suas esse cum filiis hominum? O dura & obdurata corda filiorum Adam! ô gelida prorsus eorum pectora, quæ tanto amoris incendio non incenduntur & liquefcunt! Sed de his fusiùs speculatione sequenti, ubi de amoris divini in hoc sacramento sese effundentis largitate agemus.

Secundum instituendæ Eucharistiæ motivum fuit consolatio Ecclesiæ, quam sponso orbam manere suo 'Christi' benignitas passa non est. Licet enim Christi conspectu sensibili Ecclesia non fruatur, ejus tamen reali præsentiâ jugiter potitur. Ibi invenit in mœroribus solamen, in laboribus requiem, in fletibus gaudium, in tribulatione auxilium, in infirmitate robur, in persecutione azylum, in bello triumphum; denique Dominus regit eam, & nihil illi deerit, in loco pascuæ ibi eam collocavit; & si ambulaverit in medio umbræ mortis, non timebit, quoniam Christus secum est, parans in conspectu ipsius mensam adversus eos qui tribulant eam. Si Petri navis hærescon, schismaticum, & criminum hominum impiorum fluctibus tunditur, si procellis jactatur, si tempestatum afflicatur sævitiâ, animum suum non despondet tamen, quia divinus non abest nauta, qui licet videatur in puppi dormiens, quia in Eucharistia

stia modo mortuo existit, non dormitat tamen, neque dormit qui custodit Israël, sedans fluctus, pericula submovens, salutem morbis restituens desperatis: ejus jussu planantur undæ, tumidi fluctus sternuntur, venti diffugiunt, magnaue procella in tranquillitatem maximam commutatur. Sanè inter tot iniquitatis impetus Ecclesia deficeret, nisi adversariorum tela divinæ Eucharistiæ scuto repelleret. At in arenam intrepida descendit illius suavissimæ promissionis securitate recreata: *Ecce ego vobiscum sum omnibus diebus usque ad consummationem sæculi.* Matt. ultimo. Hinc in primitiva Ecclesia Martyribus cum tyranno præliaturis Eucharistia porrigebatur. *Viventibus*, inquit Cyprianus epistol. 2. *Communicatio à nobis danda est, ut quos excitamus & hortamur ad prælium, non inermes & nudos relinquamus, sed protectione corporis & sanguinis Christi muniamus. Cum ad hoc fiat Eucharistia, ut possit accipientibus esse tutela, quos tutos esse contra adversarium volumus, munimento dominica saturitatis armamus.*

Tertium motivum fuit, ut Christus jure passionis suæ, quæ prima & fontalis est salutis humanæ causa, & præcipuum Christi in nos amoris argumentum, memoriale & monumentum Ecclesiæ relinqueret. Sicut enim Agnum paschalem Eucharistiæ figuram unà cum lactucis amaris seu agrestibus Israëlita comedebant, ita inter degustandas cœlestis epuli delicias acerbæ meminisse passionis Christus jussit, ut tanti beneficii memoriam nulla unquam deleret oblivio. Unde Christus hoc sacramentum instituens: *Hoc*, inquit, *facite in meam*

*meam commemorationem.* Et Paulus quod acceperat à Domino tradens : *Quotiescumque, inquit I. Cor. II. manducabitis panem hunc & calicem bibetis, mortem Domini annuntiabitis donec veniat.* Quotidianum ergo hunc panem comedentes, passionis & mortis Christi immensum beneficium recolamus, ne ingratis in gratiores jure merito censeamur. Audiamus Jeremiam Threnorum 3. monentem : *Recordare paupertatis & transgressionis mee, absinthii & fellis :* necnon Ecclesiasticum cap. 29. aientem : *Gratiam fidejussoris ne obliviscaris ; dedit enim pro te animam suam.*

Quartum motivum fuit vitæ spiritualis cœlesti alimoniâ pascendæ, fovendæ, & augendæ necessitas. Sicut enim vita animalis quotidiano cibo indiget, quo caloris nativi humidum radicale continenter depascentis jacturas resarciat : ita suscepta in Baptismo gratia, & in Confirmatione aucta intestinis concupiscentiæ artibus in justis etiam ad agonem manentibus citò deperiret, nisi frumento electorum & vino virgines germinante per lignum vitæ præsignato novæ creaturæ vita repararetur. Hinc Chrysostomus hom. 45. in Joan. *Hic sanguis, inquit, facit ut imago in nobis regia floreat : hic sanguis pulchritudinem & nobilitatem anima, quam semper irrogat & nutrit, languescere non finis.* Qua in re suavissima clementissimi Domini providentia mirè relucet, ut sicut vetiti fructus esu Protoparens ejusque propago in mortem & infinitas calamitates incurrit ; ita cœlestis cibi esu vitam habeamus, & abundantius habeamus ; ut unde mors oriebatur, inde vita resurgeret, & medela ferretur inde hostis unde



læserat. Nam sicut de priori cibo dictum est Genes. 2. *Quicumque die ex eo comederis, morte morieris*: ita de posteriori, Joan. 6. *Qui manducat hunc panem, vivet in aeternum*. Rectè Basilii in cap. 3. Isaix: *Quemadmodum corpora nostra convalescunt ac firmanur sub alternâ sumptione congruentium alimentorum*: ita quiddam est quod consentanè pascit animam, eique suggerit vegetas vires ad bonitatem consecrandam. Quid illud tandem est? Nimirum quod dixit Dominus, quia caro mea verè est cibus, & sanguis meus verè est potus. Quibus autem non suppetunt hæc, iis utique deficit robur panis & aqua.

Quintum motivum fuit, ut in Ecclesia jube sacrificium haberetur, sine quo nulla vera religio consistit. Fuit autem hæc oblationis perennitas necessaria, tum ut Deo supremo Domino divinos honores deferremus; tum ut benefico largitori dona sua perpetim fundens gratias perpetuas haberemus, & suæ bona nostra redderemus origini, ut iterum fluant; tum ut pro quotidianis offensis quarum non est numerus, Agnum immaculatum offerremus, ejusque sanguine meliùs clamante quàm Abel divinæ iræ accensum peccatis nostris ignem sin extingueremus planè, certè temperaremus; tum demùm ut miseriis animi corporisque necessitatibus undèquaque circumsepti & oppressi, hoc sacrificio Christi, qui semper pro sua reverentia exauditur, & temporalia auxilia, & spiritualia incrementa impetraremus. Sed de his uberius dum de sacrificio Missæ.

Denique ut paucis multa complectar, nobiscum convivit Christus in Eucharistia, ut nobis

bis fiat cognoscibilis, amabilis, accessibilis, favorabilis, imitabilis. Etenim cognoscendum se præbet manifestatione attributorum & prodigiorum stupendorum gloriâ; amandum bonorum omnium suorum diffusionem; accessibilem aditus & congressus facilitate & copiâ, propitium & favorabilem jugi ipsius pro nobis immolatione; denique imitandum, virtutum omnium micantissimarum quas inibi exercet, putâ humilitatis, obedientiæ, paupertatis, patientiæ, secessus & solitudinis, orationis, ac totius demum sanctitatis exemplo; quæ meditandi latissimum pio Lectori campum aperient. Sed omnibus, ut dixi, supereminet charitas in Ecclesiam Militantem quam redemit, non ferens ut quam sibi semel desponsavit, unquam deserat, verè illud Levit. 26. implens: *Ponam tabernaculum in medio vestri, & non abjiciet ves anima mea.*

## REFLEXIO.

Motivorum omnium Christi incentivum potissimum, finium finis, causa causalissima fuit amor in finem diligens modo qui est ultra omnem modum; amor, inquam, dignatione dives, dignitatis nescius, suavis efficax, affectu potens, triumphans de Deo; amor, inquam, non necessitatibus tantummodò nostris providens, sed usque in delicias amans, sine intermissione benefaciens, dona donis, cumulando effundens, claritatem quam dedit ei pater dans nobis, ut *de opimitate dominici corporis* (phrasis est Tertulliani lib. de pudicit. cap. 9.) Eucharistiâ scilicet vesceremur. Unde illud cernimus

*Isaiæ cap. 66. impletum vaticinium : Ut sugatis  
& repleamini ab ubere consolationis ejus ; ut mul-  
geatis , & deliciis affluatis ab omnimoda gloria  
ejus.*

Quid ergo causæ est , cur frigidum pectus nostrum nullam charitatis scintillam persentiat ? Ignem venit Christus mittere in terram , & quotidianis communionibus mittit , nihil volens nisi ut accendatur ; & in dies tepescimus , & refrigerescimus , & induramur ? *Quanam erit nobis excusatio* , inquit Chrysostomus homil. 83. in Matth. *cùm talibus pasto talia peccamus ; cùm lupi simus Agnum comedentes ; cùm tanquam oves pasto more leonum diripiamus ?* Christus non tantum in salutem & utilitatem nostram , sed in delicias etiam nostras hoc in sacramento exinanitur : unde ergo est quod nos non divina delectant , nullamque capimus de Salvatore suavitatem ? Salvatore , inquam , cui comparata omnis aliunde jucunditas , mœror est ; omnis suavitas , dolor est ; omne dulce , amarum ; omne decorum , fœdum ; omne postremo quodcumque delectare possit , molestum. Unde hoc igitur ? Quia ex quo cordis palatum sensu carnis prævalente infecit virus peccati , cœpit anima non sapere bonum , & sapor noxius subintrare. Non perdit divinus cibus suavitatem , sed corruptus & vitiatus animalis hominis gustus non percipit quæ Dei sunt , sed mutans gloriam suam in similitudinem vituli comedentis fœnum , degenerare nimis animo , menteque tota servili terrena sapit , coquorum afflatus , squalores culinæ , hesterni horrore fœtentia perquirat obsonia , cui jugiter regius deseruit atque adjacet apparatus. Derelinquit

quit homo fontem aquæ vitæ, fodisque sibi cisternas dissipatas, quæ continere aquas, nisi forte turbidas, cœnoscas, impuras non valent: quid ergo mirum si manna divinum, quod omnium exsuperat dulcedinum voluptates, palato non sano amarum sit, quod sano est suave; si oculis ægris odiosa lux sit, quæ puris est amabilis? Quid mirum, si non sapit bonum suum, quod est summum bonum, animus rationalis, qui quærit bonum pecorum, quod est implere ventrem, carere indigentia, dormire, gestire, bibere, sanum esse; qui desiderat Ægyptiacas carnes; qui dicit cum Judæis carnalibus, benè nobis erat in Ægypto, cùm manducabamus carnes in ollis, & allia, & cucumeres.

Vis igitur, Lector optime, gustare quoniam suavis est Dominus? vis divini convivii immaculatas experiri delicias? os cordis amore aperiri; illud dilectione dilata, ut impleatur: quantum dilataveris, tantum accipies; hoc uno & summo bono, & omnis boni bono exsaturatum & repletum in bonis desiderium tuum nihil suinde terrenum concupiscet, nihil esuriat, nihil sitiet, sed omni mundi suavitatem abdicata, ejusque etiam concupiscentiam clausam atque abdicatam, uni huic vero bono in Eucharistia veluti fonte porrecto jugiter adhærebit. Unde præclare Cyprianus, sive quis alius Author sermonis de cœna Domini: *Qui manducat ex hoc pane, inquit, ultra non esurit; qui bibit, ultra non sitit: quoniam mysterii hujus sic sufficit gratia, sic reficit intelligentia, ut cuiusque tanta rei innotuerit plenitudo, omnis consummationis sine invento, Christi bajulus ipsum ferat in pectore, ipsum gerat in mente.* Et



iterum : *Esus igitur carnis hujus quadam aviditas est , & quoddam desiderium manendi in ipso ; per quod sic imprimimus & eliquamus in nobis dulcedinem charitatis , ut hareat palato nostro & visceribus sapor dilectionis infusus , penetrans , & imbuens omnes anima corporisque recessus. Ama , & divina dulcedine atque spiritus pinguedine reficere : quia ut semel & iterum dixit Augustinus , verus amor non sentit amaritudines , sed dulcedines ; quia amoris soror dulcedo , sicut soror odii est amaritudo. Per dilectionem copulabit te sibi Deus , ut ei semper inhærendo , ipsum quo beatificandus es bonum ex ipso quodammodo per affectum sugas , & de ipso per desiderium bibas , & in ipso gaudium semper possideas. Suge , inquit , ô apicula , suges , suges , & bibe dulcoris tui inenarrabilem suavitatem : immergere , & repleare ; quia ille deficere nescit , si tu nescias fastidire. Adbare ergo , & inhære ; sume , & frue ; si sempiternus gustus fuerit , sempiterna quoque beatitudo erit. Hæc S. Pater lib. 13. Confess. & lib. de subst. dilect. vel quis alius apud Augustinum. Has cœlestis sponsi delicias , hanc suavitatem quam nemo scit nisi qui accipit , hos de fontibus Salvatoris egredientes castæ delectationis torrentes , has humilium nectareas lacrymas , hæc contemplantium beata suspiria , hunc rorem matutinum de cœlestibus stillantem , hoc superabundans gaudium , hanc pacem Domini quæ exsuperat omnem sensum , quamve Pater misericordiarum , & Deus totius consolationis largitur ipsum quærentibus in veritate , hanc denique unctionem spiritus mentem delinientem tibi aveo Lector , & mihi tuis precibus impetra*

*Causa efficiens Eucharistia.*    **SIL**  
petra ; spero enim fore , ut id nobis mutuis  
precibus , & Dei potissimum gratiâ con-  
tingat.

## SPECVLATIO II.

*In Eucharistia efficienda adcoè po-  
tentia , sapientia , & dilectio  
Dei eminent , ut dicere auserim,  
quod cum Deus sit omnipotens,  
plus dare non potuit ; cum sit sa-  
pientissimus , plus dare nesciuit ;  
cum sit ditissimus , plus dare non  
habuit.*

**S**olius Dei est magna facere , nec ulla est  
tam vilis & despicabilis creatura , in qua su-  
premi artificis infinita virtus & industria præ-  
cipuis radiis non splendeat , verumque probe-  
tur illud propheticum : *Qui facit mirabilia mag-  
na solus.* Illud discriminis interest inter opera  
à solo Deo elaborata , & illa quæ unà cum cau-  
sis secundis coëfficit , quod sicut priora nume-  
ris omnibus absoluta sunt ; vidit enim Deus  
cuncta quæ fecerat , & erant valdè bona : ita  
posteriora sexcentis sæpè & ferè semper naëvis,  
mendis , & vitiis scatent : quia nimirum opera  
quæque sua Deus præclarissimis & indefectibi-  
libus conformat ideis & exemplaribus , quo-  
rum similitudine dum referunt creaturæ , non

egregia esse non potest expressa earum ad tantum archetypum facies. At verò dum causis secundis, utique infirmis, è nihiloque productis sese attemperat; dum earum se aptat & veluti servit imbecillitati, & in agendo languori, vitiatum exit opus debiliorem partem sequutum: non secus ac à Pictore quàmlibet præcellenti impolita rudisque imago adhibitis lentis dilutisque pigmentis, & inculto penicillo confingitur. Propriis ergo duntaxat operibus suæ virtutis characteres Deus imprimit.

At enim etsi Deus nullis circumscriptus limitibus, eosque solum in agendo fines agnoscens quos sua sibi voluntas præfinivit, cælum & terram, naturam & gratiam stupendis prodigiis adornarit, in conficienda tamen Eucharistia nedum hæcenus edita miracula, sed seipsum etiam superare visus est. *Memoriam enim fecit mirabilium suorum misericors & miserator Dominus, escam dedit timentibus se.* In hoc enim mysterio potentiam suam, sapientiam, & amoris divitias quadantenus exhaustit, ut hac speculatione clarebit: neque enim hæc materies, tametsi moralis, & tota ad pietatem comparata, à theologico instituto aliena censenda est; sed potius existimanda dignissima quæ tractetur, tum ut hujus divini operæpretii causam efficientem & consilia dignoscamus; tum ut huic sacramento divinos honores deferamus, tum ut quos largissime fundit gratiarum fructus uberes capiamus: quæ omnia minimè consequi dabitur, ea nisi diligenter exponamus, quæ sacrorum mysteriorum majestatem magis illustrare posse videantur.

*Eucharistia divina omnipotentia non plus  
ultrà, seu ultima meta.*

*Cum Deus sit omnipotens, plus dare non po-  
tuit.* Et si omnia Dei perfecta sint opera, non  
solet tamen supremus Artifex operibus sin-  
gulis ultimam statim adhibere manum, sed  
sensum, & gradatim cujusque perfectionem  
profert, producit, & amplificat. Hac de cau-  
sa opus creationis ab opere distinctionis; &  
utrumque ab opere ornatus Scriptura discer-  
nit. Postremum sex dierum opus homo fuit,  
cæterorum omnium epilogus & coronis. Quia  
beatitudo est ordinis supernaturalis finis, ideo  
status bonorum omnium aggregatione perfe-  
ctus ab omnibus appellatur. Innumera Chri-  
stus miracula toto vitæ curriculo patravit, quæ  
si scriberentur per singula, nec ipsum arbitror  
mundum capere posse eos qui scribendi sunt  
libros; uti Joannes in Evangelii calce testatur;  
semper, & quaquà iter habebat, pertransibat  
benefaciendo, sed quantaquanta fuerint illa  
opera, præludia duntaxat fuerunt ad opus in  
finem dilatum & asservatum: *Nam cum dile-*  
*xisset suos, in finem dilexit eos.* Ultrà progredi  
non potuit Christus, nisi aliquid quæramus  
post omnia.

Meritò Salvator de Ecclesia sermonem ha-  
bens, eam sæpè sæpius Regnum cælorum ap-  
pellat; Gregorio enim interprete, *Regnum cæ-*  
*lorum præsens Ecclesia nominatur.* Post institu-  
tam Eucharistiam id longè verissimum proba-  
tur, impleturque illud oraculum: *Ecce creo cæ-*  
*los novos, & terram novam.* Unde Chryosto-



mus Ecclesiam in cœlum per Eucharistiam commutari toties affirmat. Etenim sicut cœlum est Dei authoris naturalis operæpretium, ita Eucharistia est operum supernaturalium consummatio. In cœlo divinæ virtutis gloria clarescit juxta illud, *Cœli enarrant gloriam Dei*: in Eucharistia non esse impossibile apud Deum omne verbum demonstratur. Cœlum in omnia inferiora virtutem diffundit suam, terram fecundat, foris eam floribus, fructibus, plantis vestit, intus metallis ditat: Eucharistia divinorum est charismatum fons irriguus, in totum quàm latè patet Ecclesiæ campum profluus; ipsa etiam mundi viscera arcanâ virtute pervadit, patientis Ecclesiæ piaculares flammæ temperatura. Cœlum innumerabilibus distinguitur stellis, quarum aliquot primæ magnitudinis, altera secundæ magnitudinis, alia tertiæ magnitudinis sydera Astrologi vocant: Eucharistia tot miraculis fulget, quot stellis cœlum, illâque ad trēs veluti classes similiter revocare est. Miraculorum enim genus aliud est *præter naturam*, aliud *supra naturam*, aliud *contra naturam*. Panem in corpus Christi converti naturæ haudquaquam repugnat, cùm conversionum substantialium exempla quotidiana experientia suppeditet; sed totam substantiam in aliam nullâ remanente materiâ transire & transubstantiari, *præter naturam* est, & Eucharistiæ eximium. Idem corpus in multis simul inveniri locis, & totum in toto, totum in qualibet spatii parte realiter existere non obsistit natura; quæ animam totam in capite, totam in pede protendit, quæve eandem concionantis vocem in multiplices astantium

voces

voce diffundit : at idem corpus pluribus simul adesse locis nullâ prorsus ratione continuis aut contiguïs, *supra naturam* est. Accidentia sine subjecto subsistere, corpus extensione locali orbari, *contra naturam* esse citò crederemus, nisi privata rerum propensio generali, quæ potentia obediæntialis dicitur, ultrò concederet, dicente Augustino lib. 21. de Civit. cap. 8. & lib. 26. cont. Faustum, cap. 2. *Tanti utique Conditoris voluntas, rei cujusque natura est. Id cuilibet rei naturale est, quod ille fecerit, à quo est omnis modus, numerus, ordoque natura.*

Sed apertiori sensibiliorique argumento utamur : Si per impossibile Dii plures existerent, & alter alterum convivio apparatu divino excipere peroptaret, arfodes lautiores apponere epulas, vel splendidiorẽ eã posset instruere mensam quam nobis Christus paravit, non vitulorum aut hircorum aliorumve opsoniorum delicias & cupedias atque nectareas potiones, sed ipsam divinitate unctam carnem in cibum; & infiniti pretii sanguinem proprium in potum porrecturus, ipsomet attestante : *Cara mea verè est cibus, & sanguis meus verè est potus* ? Vel aliud possibile quidem, sed nunquam futurum supponamus : Si ipsa adorandæ Trinitatis prima persona humanam naturam assumens careretur, & tantum Patrem hominem factum tantus Filius Christus Dominus eã quã par est magnificentiam excepturus, fercula non in orbe solum condito, sed in immensis omnipotentis thesauris sedulo pervestigaret, certè nihil illo cibo potiusque pretiosius, exquisitius, & æterno Patre dignius, inveniret, quo nos reficit &



pascit. Qualis mensa, qualis cibus qui Deo ipsi sufficeret! Sed quid in supponendis quæ futura non sunt moror? Testatur ipse Filius se eo modo nos excipere peroptare, quo à Patre excipitur. *Et ego, inquit, dispono vobis sicut disposuit mihi Pater*, ut edatis & bibatis super mensam meam in regno meo. Quasi diceret, eo vos loco habebo, quo Pater me & quæ Deum & quæ hominem habet: quæ Deo naturam, perfectiones mihi omnes largitur, & sese largiendo exhaurit; nihil dando excipit, nisi titulum Patris quem dare non potuit, ita ut sim alius; non aliud: quæ homini non solum gratias & dotes omne genus profudit, sed omnem plenitudinem divinitatis corporaliter inhabitantem contulit, & quidquid habet, totum in me derivavit, qui nihil retinuit. En ex quo archetypo opus Eucharistiæ duxi; meam enim mensam usurpantibus, & corpus, & animam, & personam, & divinitatem, denique me totum porrigo; & cum sim omnipotens, plus dare non possum.

*Eucharistia divina adinventionum sapientia ultimus conatus.*

Cum sit sapientissimus, plus dare nescivit: nec quippiam melius vel opportunius excogitare in omni sapientia sua ille potuit, in quo sunt omnes thesauri sapientiæ & scientiæ Dei absconditi. Miraculorum miraculum edidisse videtur potentia Dei, ita vincens scientiam nostram, ut fidem humana ratio detrectaret, nisi fide freta daret Deum posse aliquid facere, quod nequit ipsa comprehendere; effectque in talibus

talibus rebus tota ratio facti potestas infinita facientis, secuta non opus esse curiositate post Christum, nec inquisitione post Evangelium.

Veruntamen potentia divina micantem undique in hoc mysterio splendorem obscurare quadantenus videtur sapientia, quae ibi sibi domum aedificavit, lux ineffabilis specierum licet sacramentalium velo, ne foret importabilis, involuta, praclarum illud cujusdam sapientis implens effatum: *Magni artificis est totum clausisse in exiguo.* Triplicem immensa sapientiae radium, aliis praetermissis, specularum propono. Sanè sapientiae illius non esse numerum fateare necesse est, quia factum est, ut Christus ascensione in coelum à nobis abscedens nobiscum permaneret, ut Agnus immaculatus jam immortalis, quotidie tamen hoc sacrificio mystice moreretur; ut demum homines in hac lacrymarum & calamitatum valle anticipatis Paradisi felicitatibus bearentur. Singula expendamus.

Singularem celeberrimi judicii sapientiam totus orbis miratus est, quando Salomon contententium de puero mulierum litem composuit; cum enim utraque mater filium superstitem suum esse diceret, mortuum verò & nocte oppressum altera alteri assereret, meretricum discordiam sapientissimus Rex compositurus dixit: *Afferte mihi gladium.* Cumque attulissent gladium coram Rege: *Dividite*, inquit, *infantem vivum in duas partes, & date dimidiam partem uni, & dimidiam partem alteri.* Facta est & inita Ecclesiam Triumphantem inter & Militantem pugna amoris, non discordia voluntatum, sed rerum: Jesum quia Deus est.



est, revocabat cœlum; Jesum, quia homo est, terra retinebat: alliciebat Filium unigenitum sinus æternus Patris; distinebat Filium hominis sinus virgineus Matris: Angeli attolli & elevari portas æternales, ut introïret Rex gloriæ, instabant; homines Christum sibi datum, sibi natum, à se divelli ægrè patiebantur. Felix pugna, in qua de Christo possidendo certatur! In tam suavi dilectionis conflictu hæret suspensum cor Domini Jesu omnibus omnia factum, utriusque Ecclesiæ desideriis prolectatum; quia hinc sursum, hinc deorsum peræquè trahitur, nutat, cunctatur, similis ferro inter duos magneticos lapides peræquè librato. Quò se vertet multò magis quam Pauli coarctatum è duobus amantissimi cor Salvatoris? Fortassis Salomonis exemplo humanitatem à divinitate divisam, hanc cœlo, illam terræ restituet? At enim, *Ecce plus quàm Salomon hic*, ab humanis divina non sejunget; quod assumpsit nunquam dimittet, nec cœlum expectationibus suis frustrabitur; nec terras suo jure depellet; quod suum est, unicuique tribuet, & Patri & Matri, & Angelis & Apostolis arte mirabili satisfactorius: nam & hic quidem cœlum suscipiet usque in tempora restitutionis omnium, & unà nobiscum erit usque ad consummationem sæculi. *Vado*, inquit, *& venio ad vos*; ad cœlum Ascensione vado, ad vos Eucharistiâ venio; vado ad Patrem præmia percepturus; venio ad vos inestitias vestras solaturus. Verè testante Isaïa cap. 5. *Deus noster* (Christus nimirum per Incarnationem noster factus) *multus est ad ignoscendum*; quia hoc infinitæ sapientiæ miraculo unus cùm sit, quadragenus multipli

multiplicatur, dum cœlo simul & terræ realiter adest, nec pallium duntaxat suum sicut Elias Eliseo relinquit, sed totum se Angelis fruendum, totum se Fidelibus in Eucharistia edendum præbet. Ergo mirâ solertiâ & simul à nobis visibiliter abest, & invisibiliter, realiter tamen & jugiter adest; quia cùm sit sapientissimus, plus dare nescivit.

Ingeniosa sanè sapientia, quæ absentem nobis Christum præsentem effecit: sed ecce alterum industriæ suæ miraculum peræquè stupendum, peræquè nobis compendiosum. Infiniti pretii fuit copiosa & superabundans Christi morientis passio, sive rei oblatae dignitas, sive offerentis personæ divinæ seipsam humiliantis exinanitio expendantur; omnes strictæ justitiæ leges de rigore accuratè & ad amussim eo opere servatæ sunt, longèque plura offenso Deo Christus sese deprimendo restituit, quàm homo superbiendo abstulerat. Attamen sapientia Christi, ingrati Christianorum tanto beneficio abuserorum animi præscia, quorum eo pravior futura erat iniquitas, quo Filium Dei concubicare, sanguinem Testamenti pollutum facere, Christum in semetipsis rursus crucifigere, & gratiarum fonti obicem ponere atrocius est; hæc, inquam, prænoscent Christus, sciensque ægerrimè pacatum semel morte suâ Deum novis deinde criminibus exasperatum post violata fœderis capita reconciliari, novum excogitat benignissimus Mediator remedium, quo possint homines passionis amplissimo pretio abusi in offensi Patris gratiam redire. Quid ergo faciet nunquam benefacere pertæsus Salvator? Fortè caput suum iterum offeret, iterum vitam, funden

iterum : *Esus igitur carnis hujus quadam aviditas est , & quoddam desiderium manendi in ipso ; per quod sic imprimimus & eliquamus in nobis dulcedinem charitatis , ut hereat palato nostro & visceribus sapor dilectionis infusus , penetrans , & imbuens omnes anima corporisque recessus. Ama , & divina dulcedine atque spiritus pinguedine reficere : quia ut semel & iterum dixit Augustinus , verus amor non sentit amaritudines , sed dulcedines ; quia amoris soror dulcedo , sicut soror odii est amaritudo. Per dilectionem copulabit te sibi Deus , ut ei semper inharendo , ipsum quo beatificandus es bonum ex ipso quodammodo per affectum fugas , & de ipso per desiderium bibas , & in ipso gaudium semper possideas. Suge , inquit , o apicula , sugesuge , & bibe dulcoris tui inenarrabilem suavitatem : immergere , & repleare ; quia ille deficere nescit , si tu nescias fastidire. Adbare ergo , & inhare ; sume , & frue ; si sempiternus gustus fuerit , sempiterna quoque beatitudo erit. Hæc S. Pater lib. 13. Confess. & lib. de subst. dilect. vel quis alius apud Augustinum. Has cœlestis sponsi delicias , hanc suavitatem quam nemo scit nisi qui accipit , hos de fontibus Salvatoris egredientes castæ delectationis torrentes , has humilium nectareas lacrymas , hæc contemplantium beata suspiria , hunc rorem matutinum de cœlestibus stillantem , hoc superabundans gaudium , hanc pacem Domini quæ exsuperat omnem sensum , quamve Pater misericordiarum , & Deus totius consolationis largitur ipsum quærentibus in veritate , hanc denique unctionem spiritûs mentem delinientem tibi aveo Lector , & mihi tuis precibus impetra*



*Causa efficiens Eucharistia.*     **SIL**  
petra ; spero enim fore , ut id nobis mutuis  
precibus , & Dei potissimum gratiâ con-  
tingat.

## SPECVLATIO II.

*In Eucharistia efficienda adcoè po-  
tentia , sapientia , & dilectio  
Dei eminent , ut dicere ausim,  
quod cùm Deus sit omnipotens,  
plus dare non potuit ; cùm sit sa-  
pientissimus , plus dare nescivit ;  
cùm sit ditissimus , plus dare non  
habuit.*

**S**olius Dei est magna facere , nec ulla est  
tam vilis & despicabilis creatura , in qua su-  
premi artificis infinita virtus & industria præ-  
cipuis radiis non splendeat , verumque probe-  
tur illud propheticum : *Qui facit mirabilia mag-  
na solus.* Illud discriminis interest inter opera  
à solo Deo elaborata , & illa quæ unà cum cau-  
sis secundis coëfficit , quod sicut priora nume-  
ris omnibus absoluta sunt ; vidit enim Deus  
cuncta quæ fecerat , & erant valdè bona : ita  
posteriora sexcentis sæpè & ferè semper nãvis,  
mendis , & vitiis scatent : quia nimirum opera  
quæque sua Deus præclarissimis & indefectibi-  
libus conformat ideis & exemplaribus , quo-  
rum similitudinem dum referunt creaturæ , non



egregia esse non potest expressa earum ad tantum archetypum facies. At verò dum causis secundis, utique infirmis, è nihiloque productis sese attemperat; dum earum se aptat & veluti servit imbecillitati, & in agendo languori, vitiatum exit opus debiliorem partem sequutum: non secus ac à Pictore quàmlibet præcellenti impolita rudisque imago adhibitis lentis dilutisque pigmentis, & inculto penicillo confingitur. Propriis ergo duntaxat operibus suæ virtutis characteres Deus imprimit.

At enim etsi Deus nullis circumscriptus limitibus, eosque solum in agendo fines agnoscens quos sua sibi voluntas præfinivit, cœlum & terram, naturam & gratiam stupendis prodigiis adornarit, in conficienda tamen Eucharistia nedum hæctenus edita miracula, sed seipsum etiam superare visus est. *Memoriam enim fecit mirabilem suorum misericors & miserator Dominus, escam dedit timentibus se.* In hoc enim mysterio potentiam suam, sapientiam, & amoris divitias quadantenus exhaustit, ut hac speculatione clarebit: neque enim hæc materies, tametsi moralis, & tota ad pietatem comparata, à theologico instituto aliena censenda est; sed potius existimanda dignissima quæ tractetur, tum ut hujus divini operæpretii causam efficientem & consilia dignoscamus; tum ut huic sacramento divinos honores deferamus, tum ut quos largissimè fundit gratiarum fructus uberes capiamus: quæ omnia minimè consequi dabitur, ea nisi diligenter exponamus, quæ sacrorum mysteriorum majestatem magis illustrare posse videantur.

*Eucharistia divina omnipotentia non plus  
ultrà, seu ultima meta.*

*Cum Deus sit omnipotens, plus dare non po-  
tuit.* Etsi omnia Dei perfecta sint opera, non  
solet tamen supremus Artifex operibus sin-  
gulis ultimam statim adhibere manum, sed  
sensim, & gradatim cujusque perfectionem  
profert, producit, & amplificat. Hac de cau-  
sa opus creationis ab opere distinctionis; &  
utrumque ab opere ornatus Scriptura discer-  
nit. Postremum sex dierum opus homo fuit,  
ceterorum omnium epilogus & coronis. Quia  
beatitudo est ordinis supernaturalis finis, ideo  
status bonorum omnium aggregatione perfe-  
ctus ab omnibus appellatur. Innumera Chri-  
stus miracula toto vitæ curriculo patravit, quæ  
si scriberentur per singula, nec ipsum arbitror  
mundum capere posse eos qui scribendi sunt  
libros; uti Joannes in Evangelii calce testatur;  
semper, & quaquà iter habebat, pertransibat  
benefaciendo, sed quantaquanta fuerint illa  
opera, præludia duntaxat fuerunt ad opus in  
finem dilatum & asservatum: *Nam cum dile-*  
*xisset suos, in finem dilexit eos.* Ultrà progredi  
non potuit Christus, nisi aliquid quæramus  
post omnia.

Meritò Salvator de Ecclesia sermonem ha-  
bens, eam sæpè sapius Regnum cœlorum ap-  
pellat; Gregorio enim interprete, *Regnum cœ-*  
*lorum præsens Ecclesia nominatur.* Post institu-  
tam Eucharistiam id longè verissimum proba-  
tur, impleturque illud oraculum: *Ecce creo cœ-*  
*los novos, & terram novam.* Unde Chryosto-

mus Ecclesiam in cœlum per Eucharistiam commutari toties affirmat. Etenim sicut cœlum est Dei authoris naturalis operæpretium, ita Eucharistia est operum supernaturalium consummatio. In cœlo divinæ virtutis gloria clarescit juxta illud, *Cœli enarrant gloriam Dei*; in Eucharistia non esse impossibile apud Deum omne verbum demonstratur. Cœlum in omnia inferiora virtutem diffundit suam, terram fecundat, foris eam floribus, fructibus, plantis vestit, intus metallis dicit: Eucharistia divinorum est charismatum fons irriguus, in totum quàm latè patet Ecclesiæ campum profluus; ipsa etiam mundi viscera arcanâ virtute pervadit, patientis Ecclesiæ piaculares flammæ temperatura. Cœlum innumerabilibus distinguitur stellis, quarum aliquot primæ magnitudinis, altera secundæ magnitudinis, alia tertiæ magnitudinis sydera Astrologi vocant: Eucharistia tot miraculis fulget, quot stellis cœlum, illaque ad trēs veluti classes similiter revocare est. Miraculorum enim genus aliud est *præter naturam*, aliud *supra naturam*, aliud *contra naturam*. Panem in corpus Christi converti naturæ haudquaquam repugnat, cùm conversionum substantialium exempla quotidiana experientia suppeditet; sed totam substantiam in aliam nullâ remanente materiâ transire & transubstantiari, *præter naturam* est, & Eucharistiæ eximium. Idem corpus in multis simul inveniri locis, & totum in toto, totum in qualibet spatii parte realiter existere non obsistit natura; quæ animam totam in capite, totam in pede protendit, quæve eandem concionantis vocem in multiplices astantium

voces diffundit : at idem corpus pluribus simul adesse locis nullâ prorsus ratione continuis aut contiguïs, *supra naturam* est. Accidentia sine subjecto subsistere, corpus extensione locali orbari, *contra naturam* esse citò crederemus, nisi privata rerum propensio generali, quæ potentia obedientialis dicitur, ultrò concederet, dicente Augustino lib. 21. de Civit. cap. 8. & lib. 26. cont. Faustum, cap. 2. *Tanti utique Conditoris voluntas, rei cujusque natura est. Id cuilibet rei naturale est, quod ille fecerit, à quo est omnis modus, numerus, ordoque natura.*

Sed apertiori sensibilibiorique argumento utamur : Si per impossibile Dii plures existerent, & alter alterum convivio apparatu divino excipere peroptaret, arc fodes lautiores apponeret epulas, vel splendidiorẽ eã posset instruere mensam quam nobis Christus paravit, non vitulorum aut hircorum aliorumve opsoniorum delicias & cupedias atque nectareas portiones, sed ipsam divinitate unctam carnem in cibum, & infiniti pretii sanguinem proprium in potum porrecturus, ipsomet attestante : *Cara mea verè est cibus, & sanguis meus verè est potus* ? Vel aliud possibile quidem, sed nunquam futurum supponamus : Si ipsa adorandæ Trinitatis prima persona humanam naturam assumens cario fieret, & tantum Patrem hominem factum tantus Filius Christus Dominus eã quã par est magnificentia excepturus, fercula non in orbe solum condito, sed in immensis omnipotentis thesauris sedulò pervestigaret, certè nihil illo cibo potùque pretiosius, exquisitius, & æterno Patre dignius, inveniret, quo nos reficit &



talibus rebus tota ratio facti potestas infinita facientis, secuta non opus esse curiositate post Christum, nec inquisitione post Evangelium.

Veruntamen potentia divina micantem undique in hoc mysterio splendorem obscurare quadantenus videtur sapientia, quae ibi sibi domum aedificavit, lux ineffabilis specierum licet sacramentalium velo, ne foret importabilis, involuta, praeclarum illud cujusdam sapientis implens effatum: *Magni artificis est totum clausisse in exiguo.* Triplicem immensae sapientiae radium, aliis praetermissis, speculandum propono. Sanè sapientiae illius non esse numerum fateare necesse est, quia factum est, ut Christus ascensione in caelum à nobis abscedens nobiscum permaneret, ut Agnus immaculatus jam immortalis, quotidie tamen hoc sacrificio mysticè moreretur; ut demum homines in hac lacrymarum & calamitatum valle anticipatis Paradisi felicitatibus bearentur. Singula expendamus.

Singularem celeberrimi judicii sapientiam totus orbis miratus est, quando Salomon contententium de puero mulierum litem composuit; cum enim utraque mater filium superstitem suum esse diceret, mortuum verò & nocte oppressum altera alteri assereret, meretricum discordiam sapientissimus Rex compositurus dixit: *Afferte mihi gladium.* Cumque attulissent gladium coram Rege: *Dividite*, inquit, *infantem vivum in duas partes, & date dimidiam partem uni, & dimidiam partem alteri.* Facta est & inita Ecclesiam Triumphantem inter & Militantem pugna amoris, non discordia voluntatum, sed rerum: Jesum quia Deus est

est, revocabat cœlum; Jesum, quia homo est, terra retinebat: alliciebat Filium unigenitum sinus æternus Patris; distinebat Filium hominis sinus virgineus Matris: Angeli attolli & elevari portas æternales, ut introïret Rex gloriæ, instabant; homines Christum sibi datum, sibi natum, à se divelli ægrè patiebantur. Felix pugna, in qua de Christo possidendo certatur! In tam suavi dilectionis conflictu hæret suspensum cor Domini Jesu omnibus omnia factum, utriusque Ecclesiæ desiderijs prolectatum; quia hinc sursum, hinc deorsum peræquè trahitur, nutat, cunctatur, similis ferro inter duos magneticos lapides peræquè librato. Quò se vertet multò magis quam Pauli coarctatum è duobus amantissimi cor Salvatoris? Fortassis Salomonis exemplo humanitatem à divinitate divisam, hanc cœlo, illam terræ restituet? At enim, *Ecce plus quam Salomon hic*, ab humanis divina non sejunget; quod assumpsit nunquam dimittet, nec cœlum expectationibus suis frustrabitur; nec terras suo jure depellet; quod suum est, unicuique tribuet, & Patri & Matri, & Angelis & Apostolis arte mirabili satisfactorius: nam & hic quidem cœlum suscipiet usque in tempora restitutionis omnium, & unà nobiscum erit usque ad consummationem sæculi. *Vado*, inquebat, *& venio ad vos*; ad cœlum Ascensione vado, ad vos Eucharistiâ venio; vado ad Patrem præmia percepturus; venio ad vos inestitias vestras solaturus. Verè testante Isaiâ cap. 5. *Deus noster* (Christus nimirum per Incarnationem noster factus) *multus est ad ignoscendum*; quia hoc infinitæ sapientiæ miraculo unus cum sit, quadragenus multipli

multiplicatur, dum cœlo simul & terræ realiter adest, nec pallium duntaxat suum sicut Elias Eliseo relinquit, sed totum se Angelis fruendum, totum se Fidelibus in Eucharistia edendum præbet. Ergo mirâ solertiâ & simul à nobis visibiliter abest, & invisibiliter, realiter tamen & jugiter adest; quia cum sit sapientissimus, plus dare nescivit.

Ingeniosa sanè sapientia, quæ absentem nobis Christum præsentem effecit: sed ecce alterum industriæ suæ miraculum peræquè stupendum, peræquè nobis compendiosum. Infiniti pretii fuit copiosa & superabundans Christi morientis passio, sive rei oblatae dignitas, sive offerentis personæ divinæ seipsam humiliantis exinanitio expendantur; omnes strictæ justitiæ leges de rigore accuratè & ad amussim eo opere servatæ sunt, longèque plura offenso Deo Christus sese deprimendo restituit, quàm homo superbiendo abstulerat. Attamen sapientia Christi, ingrati Christianorum tanto beneficio abusorum animi præscia, quorum eo pravior futura erat iniquitas, quo Filium Dei conculcare, sanguinem Testamenti pollutum facere, Christum in semetipsis rursus crucifigere, & gratiarum fonti obicem ponere atrocius est; hæc, inquam, prænoscentis Christus, sciensque ægerrimè pacatum semel morte suâ Deum novis deinde criminibus exasperatum post violata fœderis capita reconciliari, novum excogitat benignissimus Mediator remedium, quo possint homines passionis amplissimo pretio abusi in offensi Patris gratiam redire. Quid ergo faciet nunquam benefacere pertæsus Salvator? Fortè caput suum iterum offeret, iterum vitam, funden

fundendum iterum sanguinem devovebit? Non detrectaret iteratæ mortis agones immensus Redemptoris amor: ac æterno immobilique decreto Christus resurgens ex mortuis jam non moritur, mors illi ultra non dominabitur. Fortè præteritæ passionis immensum pretium Patri rursus exhibebit, & tantæ humilitatis memoriam revocabit? Ita planè; ideoque vulnera tanquam æternæ charitatis suæ monimenta Patri identidem ostensurus servavit: attamen tantæ Christi dilectionis memoria Christianorum est impietatis exaggeratio, eorumque ingrati animi amplificatio. Novâ Christi morte opus esset, quâ Christianis iterum mortuis vita restitueretur. Et hoc est divinæ sapientiæ arcenum, quo Christus in Eucharistia sin moritur, modo certè mortuus vivit, seipsum quotidie sacrificaturus, nunquam tamen moriturus. *Vidi Agnum tanquam occisum*, aiebat Joannes, *habentem oculos septem*. Tanquam occisus offertur, cujus corpus à sanguine mysticè separatur: habet oculos septem, quia sapientiæ radii undique in hoc mysterio nitent, ut cum sit sapientissimus plus dare nesciverit.

Immensa fuit sapientia crucis, quâ mortuam vitâ, captivi libertate, inimici gratiâ, orbis pace donati sunt: sed si dicere liceat, Eucharistiæ sapientia illustrioribus nitet fulgoribus. Acceptissimum quidem erat Christi morientis sacrificium; sed tam præclaræ hostiæ gloriam Judæorum sævitia, Judicis iniquitas, tortorum rabies subobscurabant: ac tam novum infandi flagitii genus Sol ne videret, obscuratus est, contremuit horrore terra, & sceleris granditatem elementa senserunt; ipsi etiam Angeli pa-

cis



*Causa efficiens Eucharistia.* 521

eis amarè flebant. At in Eucharistiæ sacrificio nihil non amabile, nihil non acceptum Patri exhibetur, & juxta Malachiæ prophetiam à solis ortu usque ad occasum in omni loco sacrificatur, & offertur nomini Domini oblatio munda, hostia pura, hostia sancta, hostia immaculata, panis sanctus, calix salutis perpetuæ. Hinc exclamat *cap. 9. Zacharias: Quid pulchrum ejus, nisi frumentum electorum, & vinum germinans Virgines?* Hinc *Isaias cap. 25.* anticipato hujus sacrificii odore suavitatis illectus, illud *convivium vindemia defacata* appellat, id est ab omnibus illis sceleribus mundæ, quæ operi Passionis impietate Judæorum permixta sunt. O sapientiæ miraculum vincens quodvis prodigium! Pro nobis quotidie Christus moritur, nec perdit vitam; fundit sanguinem, nec anitit; occiditur, nec qui occidunt sunt tortores, sed Sacerdotes. Ergo cùm sit sapientissimus, plus dare nescivit.

Denique tertio sapientiæ miraculo terra cœlum efficitur, & mortales vitæ hujus miseris immerfi ante mortem beatitate donantur. Beatus est qui habet omnia quæ vult, & nihil mali vult: velle, & quod volumus non habere, pœna damnati est; habere, sed malè velle, major est cordis de perversitate pœna. Verum & unum bonum nostrum Christus est desideratus cunctis gentibus. Ergo dum ipso in Eucharistia fruimur, beati in antecessum sumus.

Accedit divinâ Eucharistiâ charitatem pasci & saginari, quâ in terris degentes quæ sursum sunt quærimus, quæ sursum sunt sapimus, & cœlos mentis conversione incolimus. Sapientiæ est finem intendere, & idonea ad ipsum obtinendum

522 *Lib. XI. Pars II. Dissert. III. Cap. I.*

tinendum apparare ; attingit enim à fine ad finem fortiter , & disponit omnia suaviter : finis Christianæ vitæ non consumens , sed consummans Deus est visione possidendus : ad illum charitate veluti unico medio possumus pervenire , quâ à terrenis expediti cœlestibus inhiamus , magna magnè desideramus ; tota enim vita Christiani boni , ut Augustinus docet , bonum desiderium est , cujus amplitudini æternum respondet gloriæ pondus ; quia desiderium , inquit D. Thomas *1. p. quæst. 12. art. 6.* quodammodo facit desiderantem aptum & paratum ad susceptionem desiderati. Quod sanè desiderium Eucharistia accendit , urgente charitate quam inflammat.

Ad quorum profundiorē notitiā considerandum est , triplicem inesse rebus omnibus perfectionem ab Authore naturæ diffusam ; esse nimirum naturam constituens , finem naturam perficientem , & inclinationem ad finem convenientem ferentem & veluti manu ducentem. Forma ignis v. g. ejus naturam constituit ; locus sursum ignem tanquam centrum & finis allicit ; levitas sursum impellens propensio est , quâ ignis veluti pondere fertur quocumque fertur , eaque actus obices perrumpit , montes concutit , ferrum & marmora diruit ignis inclusus. Animus rationalis hominem facit ; veritas nota hominem beat ; veri sciendi ardor hominibus omnibus inseminatus & altissimè impressus inclinatio est , quâ homo veritatem inquit falsitatis impatiens. Hæc triplex dos à tribus Dei attributis proficiscitur. Potentia infundit esse ; effectus enim universalissimus , ut docet D. Thomas , respondet causæ universalissimæ :



lissimæ : bonitas Dei finem præstituit ; bonum namque , authore Philosopho , & finis conver-  
tuntur : sapientia demùm media ad finem asse-  
quendum disponit & designat , & ideò dicitur  
quod sapientiam suam Deus super omnia ope-  
ra sua effuderit.

Quia gratiæ est naturam perficere , non inte-  
rimere vel invertere , eandem in ordine super-  
naturali œconomiam Deus observat. In hoc  
divino statu esse supernaturale gratia consti-  
tuit , quâ ex Deo nati divinæ sumus consortes  
naturæ : finis est Deus clarâ visione & æter-  
nâ dilectione possidendus ; medium charitas  
est , ignis ille divinus in cœlum unde descendit  
semper inclinans. Porro trinus hic ordinis su-  
pernaturalis effectus è tribus potissimis Religio-  
nis mysteriis desinit. Esse & vitam supernatura-  
lem Christus moriens contulit , filiòsque inter  
agonis dolores peperit : cœlum aperuit Chri-  
stus ascendens : ad cœlum permover infusâ in  
Deum propensione Christus in Eucharistia nos  
pascens ; cor ipsum invadit , ut sit internum ve-  
luti pondus quo ad cœlestia rapiamur. Nam  
ut ipse ait : *Qui manducat me , vivet propter me.*  
Vitam autem in motu sitam esse nemo igno-  
rat : propter Christum ergo vivit qui Christo  
pascitur , quia in divina jugiter cietur. Unde  
illud Apostolicum verè usurpare potest , qui ne-  
cessariâ cordis castimoniâ divinis epulis refe-  
ctus est : *Vivo ego jam non ego , vivit verò in me*  
*Christus.*

Cæterùm sicut nihil cibo illo divino præ-  
cellentius , ita nec medio illo ad permovendum  
in finem suum novum hominem aptius & op-  
portunius excogitare potuit sapientia infinita.

Etenim,

524 *Lib. XI. Pars II. Dissert. III. Cap. I.*

Etenim, ut rectè S. Thomas argumentatur, homo nec solo corpore, nec unâ duntaxat animâ constat, sed ex utroque coalescit: corpus cum animantibus commune plantis, fructibus, carnibus Deus alit; animam immortalem veritate pascit: neque enim in solo pane vivit homo, sed in omni verbo quod procedit ab ore Dei: hominem verò integrum cibo hactenus orbem seipso pane vivo nutrit, corpori beatæ immortalitatis semina inserens, animo spiritus pinguedinem largiens, & novam creaturam in Baptismate natam, in Confirmatione auctam cœlesti pabulo fovens, ab intestinis cupiditatis æstibus incolumem servans, vires resarciens, & ineffabilem charismatum opimitate & beatissimâ copiâ saginans.

*Eucharistia divini amoris effusionum  
coronis.*

*Cum sit ditissimus divinus amor plus dare non habuit.* Miretur quem libuerit splendentia in Eucharistia omnipotentæ miracula; suspiciat sapientiæ cujus non est numerus consilia: sine tamen, Domine Jesu, ut totum me tui mecum in Eucharistia conviventis permittam amor. Nimis me allicit, arctiùs devincit, stringit vehementiùs amabilitas tua, ut alteri dare locum affectui vel possim illectus, vel debeam ne si ingratus. Sileat mentis inquisitio scrutatrix majestatis opprimenda à gloria; una loquatur dilectio: solus ex omnibus animi motibus, sensibus atque affectibus amanti Jesu, totique desiderabili respondeat amor, quia dum dilectionem cerno Salvatoris effusam, nihil  
fine



sine dubio aliud vult quàm amari ; non ad aliud quippe amat nisi ut ametur , sciens ipso amore beatos qui se amaverint. Splendet potentia , sed terret virtus , cui non possum resistere ; nitet sapientia , sed quid tam timendum , quàm oculus cui non possum abscondi ; imperfectum enim meum viderunt oculi ejus ? At tantus & talis amor terrores temperat & pavores. Nam cùm dilexisset suos , in finem dilexit eos. *In finem*, seu ad finem usque vitæ suæ. *In finem*, id est ultra finem vitæ , amore usque ad consummationem sæculi duraturo. *In finem*, id est ut exponit S. Thom. *usque ad ultimum finem amoris*, ibi metas figens , nec ultra progredi valens. *In finem*, id est modo qui est ultra omnem modum , quia ut ait Chrysostomus in cap. 13. Joannis : *Nihil omisit quod vehementer amantem decet*. Et sacrum Tridentinum sess. 13. cap. 2. *Salvator noster discessurus ex hoc mundo ad Patrem Sacramentum hoc instituit , in quo divitias sui erga homines amoris velut effudit*, ut ex sequentibus demonstrationibus palam erit.

Primò amantis est bona sua diffundere , quæ Christus nobis hocce mysterio sine exceptione largitur. Multifariam , multisque modis bona sua creaturis rationalibus benignissimus Dominus impertitus est : verùm in eis dandis , vel aliquid dominium suum significaturus excepit , vel ea certè inæqualiter , speciali nonnullos prærogativâ donaturus , distribuit. Adamo mox condito liberum Paradisi voluptatis omnigenorum fructuum usum permisit : at ei vitæ fructus esu interdixit tamen. Post diluvium animalium carnibus vesci indulsit ; quasdam tamen exercendæ causâ obedientiæ prohibuit.

buit. Voluntas suas datâ per Moysen lege hominibus patefecit; sed ejus luce unum angustæ Judææ angulum illustravit. In cruce corpus terræ, at spiritum Patri commendavit. In Incarnatione omnem quidem inhabitantem Divinitatis plenitudinem sacrosanctæ humanitati communicavit, sed ad tantam sublimitatem unus Christus qui prædestinatus est Filius Dei provectus est. In cœlis totam gloriæ majestatem Beatis expandit; at tanto beneficio pusillus electorum grex beatur, magnæque interest graduum felicitatis differentia, stella enim differt à stella in claritate. Verùm in Eucharistia se totum omnibus, & singulis dat, se totum animæ, se totum corpori suscipientis largitur; fit enim, ut aiunt Patres, *nobis consanguineus, concorporeus, nobisque permiscetur*. Alibi gratiarum rivos veluti per canales & aquæductus Deus in nos derivat: at hîc fons ipse porrigitur. Haurietis in gaudio, inquit Propheta, de fontibus Salvatoris: & salutem habemus & Salvatorem, & lumen & Solem, & vitam & Authorem vitæ, & meritum & principium meriti possidemus, ut jure illud cujusdam Patris usurpemus: Quantus Filius in Patre, tantus in utero Virginis; quantus in utero Virginis, tantus in ore pectoréque fidelis.

Secundò amantis est cum re amata intimo dilectionis nexu copulari; hinc languor & desiderium cùm ista abest; hinc gaudium dum adest: & quia exoptant amantium corda liquescere ac in se vicissim transfundi, & corporis obice impediuntur, hinc & suspiria fundunt, & in amplexus ruunt. Solus Christi in Eucharistia amor objectacula quæque intimæ unionis

nis perrumpit, os ingreditur, pectus pervadit, cordi ipsi illabatur. Rectè observavit S. Thomas in aliis divini amoris effectibus quandam semper contingere separationem: nobis se dat Christus nascens, sed in socium; dat se docens, sed in magistrum; dat se conversans, sed in exemplum; dat se sanctificans, sed per diffusam in cordibus charitatem; dat se regnans, sed lumen gloriæ illius æternæ unionis nexus est. At in Eucharistia ipse unitur, & ipse unio; ipse qui dat, & ipse donum; quia dum se in edulium convescens præbet, in nos non mutatur quidem, sed in se mutat, totòsque transformat: *Claritatem*, inquit, *quam dedisti mihi, dedi eis, ut sint unum, sicut & nos unum sumus*. Planè factus est tanquam unus ex nobis, immò non tanquam, sed verè unus ex nobis, quin idem nobiscum.

Tertiò amantis est non quæ sua sunt quære-  
re, sed sepositis propriarum rationum studiis,  
unis amici utilitatibus inservire. Et hæc est  
characteristica Christi in hoc sacramento amo-  
ris dos. Multa sanè instituendæ Eucharistiæ in-  
tercedebant: videbatur tantam Christi familia-  
ritatem divinam non decere Majestatem; ne-  
que enim benè conveniunt, nec in eadem sede  
morantur majestas & amor. Congruere vide-  
batur non omnibus promiscuè Sacerdotibus  
corporis Christi conficiendi dandam esse facul-  
tatem, multòque minùs ubique, semper &  
omnibus etiam impiis & sceleratis permitten-  
dum cœlestis cibi liberum esum: solis Summis  
Ecclesiæ Christianæ Hierarchis vel Episcopis,  
& quidem certis locis, definitisque temporibus  
celebrandæ Eucharistiæ faciendæ facultas vide-  
batur,

batur, ne usu vilesceret mysteriorum augustissimum, & tanta frequentia contemptum esset paritura. Cur Domine Jesu substantiam tuam dissipas cum criminosis & meretricibus, facileque ex charitate quod prodigus à te memoratus ex libidine præstitit? Cur sanctum canibus, margaritas projicis ante porcos? Has aliasque ultro sese ingerentes repugnantias, inconvenientia, indecoras ingratorum hominum futuras rationes vicit amor dignatione dives, dignitatis nescius, suasu potens, affectu efficax, de Deoque triumphans: inferendas injurias, & hæreticorum blasphemias, infanda peccatorum sacrilegia præscit & floccificat purissima Christi dilectio; nam aquæ multæ non potuerunt extinguere charitatem, nec flumina obruent illam.

Hac de causa divinus Apostolus hoc de sacramento sermonem habens, temporis institutionis signanter meminit. *In qua nocte tradebatur*, inquit, hoc extremum ultimæ dilectionis pignus nobis reliquit. Itane panem vitæ mortem illaturis parat, & excogitantibus hominibus mille Christo nocendi artes beneficiorum summum, & summam meditatur? Quodnam est istud sacræ antiperistasis genus, quo ingravescente frigore iniquitatis, increbrescit Christi ardor dilectionis, ut eis porrigat cibum omne delectamentum in se habentem, qui mox acetum felle conditum sunt propinaturi? Ne mirare: purus est Christi amor, ipse qui amat, ipse unde amat; nec nostris allicitur meritorum motivis, vel utilitatum suarum compendiis; amat quia amat verus amicus; nullum nisi ex inexhausto pietatis suæ fonte eruit, quærit, invenitque illicium. Percussâ  
petrâ



petrâ fluxerunt aquæ : petra autem erat Christus , ex eoque illâ ipsâ nocte , quâ laboribus , doloribus , opprobriis , contumeliis percutiendus traditur , profluxit Sacramentum Sacramentorum , jugisque bonorum omnium scaturigo , ut cum sit ditissimus , plus dare nequiverit.

Quartò amantium est quem experiuntur amorem peculiaribus significationibus testatum facere. Nonnullos variarum ætatum insignes viros singularibus prærogativis decorasse Deum nemo est qui ignoret : at totus ille favorum acervus uni Eucharistiæ privilegio concedit. Omnibus decessoribus suis gratiâ & dignitate Joannes Baptista præstitit ; & testante Veritate nullus eo major inter natos mulierum unquam surrexit. Verùm post ejus celebrata encomia , post ipsûmque cæteris omnibus antelatum , eundem fidelium minimo Veritas ipsa postposuit : *Qui minor est in regno cælorum* ( id est Ecclesia , uti Patres interpretantur ) *major est illo.* Matt. II. Ipsum in utero inclusum visitavit Verbum caro factum ; in ipsum primos lucis suæ radios Sol justitiæ effudit. At *qui minor est in regno cælorum* , minimus inquam novi Testamenti fidelis , *major est illo* ; quippe quem Christus non semel , sed quotidie nedum invisit , sed invadit ; nec domum tantum ingreditur , sed cordi etiam ipsi illabitur. Incomparabilis fuit Joannis Evangelistæ gratia , qui supra pectus Domini in cœna recubuit. At *qui minor est in regno cælorum* , postrema inquam Christianismi miracula , *major est illo.* Nunquid familiarius & blandius est Christum in corde nostro quotidie quiescere & reclinari , quàm momento super

pectus recumbere Salvatoris ? Beata fuit sancti  
 senis Simeonis puerum Jesum in ulnas suas ac-  
 cipientis fors : dimitti se in pace professus est,  
 quia viderant oculi sui salutare Dei. Verùm *qui*  
*minor est in regno cœlorum, major est illo*, qui  
 Christum non brachiis amplectitur, sed ore su-  
 mit, corde suscipit, & Dominum manducat  
 pauper, servus, & humilis. Quanti facienda sit  
 Beati Patriarchæ Joseph Deiparæ sponsi præro-  
 gativa, qui deificæ Christi carnis nutricius &  
 Creatoris sui altor fuit, nemo in dubium revo-  
 cat. Cæterùm *qui minor est in regno cœlorum,*  
*major est illo* : nam Christum cibus corruptibili-  
 bus pascere, ipsâ Christi carne divinitate unctâ  
 pasci longè inferius est. Optimam partem ele-  
 gerat Magdalena Christi contemplatione con-  
 tenta ; beati erant discipulorum oculi Christum  
 videntes, beatæ aures verba vitæ æternæ au-  
 dientes ; quia multi Prophetæ & justî cupierunt  
 videre quæ viderunt, & audire quæ audierunt ;  
 nec videre, neque audire datum est. Attamen  
*qui minor est in regno cœlorum, major est illis* ;  
 quilibet namque fidelium, ut Chrysostomus  
 ait, ipsum videt, ipsum tangit, ipso vescitur,  
 ipsi unitur. Ergo cùm sit ditissimus divinus  
 amor, plus dare non habuit.

## R E F L E X I O.

*Fruento & vino stabili vi te* ( frumento, in-  
 quam, electorum, & vino virgines germinan-  
 te : ) *ultrâ quid faciam ?* Genesis 27. Quid enim  
 potui facere, & non feci ? Nec minas, nec pro-  
 missiones ; nec verbera, nec blanditias ; nec  
 prospera, nec adversa ; nec prædicationem fo-  
 ris

gis sonantem , nec inspirationem intus coruscantem ; nec scripturas , nec miracula ; nec doctrinam , nec exempla ; nec vitam , nec mortem , denique quo te allicerem nihil omisi , intentatum quo tibi placerem nihil reliqui ; post dona mea dedi meipsum , dedi immeritis , dedi indignis , dedi ingratis , dedi in cibum ut gustarent quoniam suavis est Dominus ; deinde in potum , ut inebriarentur ab ubertate domus Dei , & torrente voluptatis potarentur.

*Sapientia abscondita , & ihesus invisus , qua utilitas in utrisue ?* Eccles. 20. Imensum thesaurum possidemus , miraculorum miraculum tenemus : nihil ad salutem efficacius , nihil ad omnia salubrius excogitare potuit Deus ; & nudi sumus , & miseri , & miserabiles ? Unde hoc quæso , unde hoc ? Fortè pauci ad sacramentam , iique rarò accedunt ? Minimè gentium. Altaria communicantibus circumfluunt ; nihil communionem frequentius , & emendationem nihil ratiùs tamen : seminavimus multum , & intulimus parum ; comedimus , & non sumus satiati ; merces congregavimus , sed nescimus eas in sacculum pertusum ; in cor Christi immittimus levitati , vanitati obvium , peccato obnoxium : cœlestis Eucharistiae semen vel secus viam , seu in cor cogitationibus vanissimis pervium ; vel in petrosa , sive in cor iniquitate obduratum ; vel in spinis , in cor nempe terrenorum cupiditate implicatum cadit : quid ergo mirum , si fructum neque trigesimum , neque sexagesimum , neque centesimum reportamus ? Hinc in illud incurrimus iudicium ab Ecclesiaste cap. 5. & 6. prænuntiatum : *Est infirmitas pessima quam vidi sub solo , divitiis conser-*

*vata in malum Domini sui. Est aliud malum quod vidi sub sole, & quidem frequens apud homines: vir cui Deus dedit divitias, nec tribuit ei potestatem Deus ut comedat.*

Si teste Salviano *intolerabile malum est acceptis bonis non uti*, quale mali portentum tanto bono abuti? Væ cæcis ex sacramento tam feraci nihil compendii capientibus! Medius nostrum stat, & nos nescimus; fons patens apertus est, & siti tabescimus; Deum nostrum ignem consumentem possidemus, & algemus; bonum aurum Christi sanguinem habemus, qui ut ait Ambrosius *dives est ad pretium, profluus ad redimendum*, & debita nunquam solvimus, sed augemus. Denique Atheniensium more *ignoto Deo* litamus, tantum bonum nec corde recogitantes, & tenebras ipsas nostras amantes.

Quid ergo opus facto? Tam inæstimabile beneficium serò cognitum, serò amatum mente revolvemus, tantæ sapientiæ curas credemus, tanto amorì amorem utique rependemus, ne qui venit ad nos, & in nos, veniat ipse contra nos. Dicamus ergo qui redempti sumus à Domino: Confiteantur Domino misericordie ejus, notas facite in populis adinventiones ejus, annuntiate hoc in universa terra: venite & videte quanta Deus fecit animæ nostræ. Ibi ergo cor nostrum sit, ubi est thesaurus noster. Si in reddendis pro beneficiis aliis gratiarum actionibus impar sum, *Quid tibi retribuam Deus pro te*, inquit Bernard. *lib. de dilig. Deo*; quidni me illi totum dabo, qui totum se dedit, & secum omnia? Ergo quia in finem dilexisti me, utique in finem diligam te Domine fortitudo mea; refugium & firmamentum meum:



*in finem*, quia nullum in te diligendo finem faciam, interdum adorabo te in aula sancta tua, & iterum anima mea desiderabit te in nocte: quandiu potero convivam tecum. Et quia delicia tua esse cum filiis hominum, quandiu licebit lateri tuo adhærebo indivulsè comes solitudinis tuæ. *In finem* diligam, in te veluti cor pietatis, centrum religionis, desideriorum metam, negotiorum oraculum, vitæ meæ polum jugiter etiam dum abesse contigerit propensus. *In finem* diligam, in te diligendo finem ultimum meum & unam felicitatem meam constituturus, ut te donante te infinito amore dignissimum per æterna sæcula sine fine diligere merear.

### SPECVLATIO III.

*Minister Eucharistia conficienda solus est Sacerdos propriè dictus, ad quem etiam eam dispensare jure divino pertinet, quanvis illam Diaconi potestate delegatâ ministrare queant.*

**Q**uia ut ex dictis patet, Eucharistia est sacramentum permanens, in eoque substantia ab usu distinguitur, meritò prius de ministro conficiendæ Eucharistiæ agimus, quàm ut ministrum ejusdem dispensandæ designemus.

Prior pars est articulus fidei definitus in Tri-

dentino sess. 22. cap. 1. Christus, inquit, *Sacerdotem secundum ordinem Melchisedech se in aeternum constitutum declarans*, corpus & sanguinem suum sub speciebus panis & vini Deo Patri obtulit; ac sub earundem rerum symbolis Apostolis, quos tunc novi Testamenti Sacerdotes constituerebat, ut *sumerent tradidit*, & eisdem eorūque in Sacerdotio successoribus ut offerrent praecepit per haec verba, *Hoc facite in meam commemorationem*, uti semper Catholica Ecclesia intellexit, & docuit. Quod & canone 2. repetit, oppositum sentientibus anathemate percussis. Idem definiverat magnum Lateranense Concilium sub Innocentio III. & refertur cap. *Firmiter*, his verbis: *Hoc utique sacramentum nemo potest conficere nisi Sacerdos, qui rite fuerit ordinatus secundum claves Ecclesiae, quas concessit Apostolis eorūque successoribus Iesus Christus*. Id ipsum docuerat Concilium Nicænum can. 14. ubi correcturum abusum Diaconorum, qui alicubi Eucharistiam Sacerdotibus porrigebant, hanc rationem profert: *Hoc neque regula, neque consuetudo tradidit, ut si qui offerendi sacrificiū non habent potestatem, his qui offerunt corpus Christi porrigant*. Favet etiam canon decimusquintus Concilii Arelatensis primi, ubi sancta Synodus compressura abusum Diaconorum, qui sibi Sacerdotum officium vindicabant: *De Diaconis*, inquit, *quos cognovimus multis locis offerre, placuit minimè fieri debere*.

Idem docent SS. Patres; Hieronymus enim praeter loca alibi relata, quibus docet Sacerdotes Eucharistiam sacro ore conficere, insuper dialogo adversus Luciferianos de Hilario schismatico

schismatico ait, quod *Eucharistiam non poterat conficere, quia Diaconus tantum erat.* Eandem etiam veritatem libris de sacerdotio inculcat Chrysostomus. Denique id supponit universa Patrum traditio, inde Sacerdotis dignitatem super Angelicam evehentium, & ad tantum statum eminentem sanctimoniam desiderantium, quod solis Sacerdotibus divina per universas orbis Ecclesias celebrare mysteria concessum sit.

Ratio verò est, quia ille solus est Eucharistiae conficiendae minister, cujus est in nova lege sacrificare, seu sacrificium Religionis offerre: etenim Eucharistia sacrificando conficitur, & conficiendo sacrificatur, ut ex dicendis de sacrificio Missae liquebit. Atqui non ad omnes promiscuè fideles, sed ad unos Sacerdotes ad id muneris specialiter assumptos totius Religionis sacrificium offerre pertinet: tum quia ut docet Apostolus Hebr. 5. 1. *Omnis Pontifex ex hominibus assumptus, pro hominibus constituitur in iis quae ad Deum sunt, ut offerat dona & sacrificia pro peccatis.* Tum quia Sacerdos medius Deum inter & hominem constituitur; unde Chrysostomus lib. 2. de sacerdotio, per Sacerdotes, inquit, Christum induimus; per ipsos Dei Filio conjungimur; per ipsos membra beati ipsius Capitis efficimur. Unde infert quanta sit dignitatis munus, quod tametsi agitur in terra, coelestibus tamen negotiis continetur. *Non homo, addit, non Angelus, non Archangelus, non aliqua alia creatura, non virtus, sed ipse Spiritus sanctus hoc munus instituit, atque adhuc manentes in carne mysterio fungi prestat Angelorum.* Quomodo ergo nobis isti non solum reverendi magis quam Reges, aut Iudices; sed



etiam nobis magis erunt honorabiles quàm parentes. Ergo Sacerdos ab aliis segregatur, unde ei soli in ordinatione dicitur: *Accipe potestatem offerendi in Ecclesia sacrificium tam pro vivis, quàm pro defunctis.* Nec consequenter illi officio potest se quilibet de proprio arbitratu nefandâ obtrusione ingerere; non enim sibi quisquam assumit honorem, sed qui vocatur à Deo tanquam Aaron. Tum quia si conficiendæ Eucharistiæ ministerium non sit quibusdam hominibus ex aliis specialiter assumptis eximium, vix, ac ne vix quidem assignari poterit ratio, cur non omnes homines, etiam infideles, sicut baptizare, ita Eucharistiam conficere possint. Quod si celebrandæ Eucharistiæ facultatem suscepto dicas inniti Baptismati; præter quod voluntarium aliquid dicis, nihil ex Scripturis producat, quo non tuus continuò error juguletur; illud etiam non effugies, mulieres saltem baptizatas idoneas esse ad Eucharistiam conficiendam administras, ipsisque pascendi munus turpiter asseres, quibus doctus à Domino Paulus docendi in Ecclesia officio interdixit. Adde Pepusianos & Collyridianos ab Epiphanio *hæres. 40. & 79.* & ab Augustino *hæresi 27.* hæreticis accenseri, quòd offerendi sacrificii munus mulieribus tribuerint. Denique si Christiani omnes fuissent in primitiva Ecclesia Sacerdotes, frustra fuissent fideles de asportanda in domos privatas Eucharistia solliciti, quam quilibet momento conficere potuisset: fuissent etiam conventus Eucharistici sine Sacerdote celebrati, cujus tamen nullum in traditione non dico monumentum, sed nec apparens ullum vestigium apparet.



Ex his confutati manent varii hæreticorum errores, quorum aliqui, ut Lutherus *lib. de instituendis ministris*, contendunt Ecclesiæ officium consecrandi omnibus esse commune; contra Patres, contra Concilia, contra Ecclesiæ consuetudinem, quæ sibi objecta contemnit vir ab orbe condito audacissimus, contemnens verba illa, *Hoc facite in meam commemorationem*, omnibus Servatorem dixisse præsentibus & futuris, qui de pane illo ederent, & de calice biberent. Tali impietati subscripserunt Calvinistæ, qui sacrificium omne de medio tollentes, omnemque subinde religionem ad nihilum redigentes, absurdissimâ tamen consequutione fideles omnes Sacerdotes natos affirmant, nec apud ipsos Ministros alio fine eligi volunt, quàm ut nomine Ecclesiæ suæ omnia peragant, ut apud Calvinum *lib. 4. institutionis, à cap. 17.* videre est. Sed de his plura dum de sacrificio Missæ, & de sacramento Ordinis suis locis agetur.

Alii contrà Sacerdotum conficiendæ Eucharistiæ potestatem plus æquo coarctantes, eam criminosis Sacerdotibus denegarunt. Sic quidam apud Algerum *in Prologo*, gratiæ Dei derogantes dixerunt Sacerdotum malis meritis ita invocationem divini nominis annullari, ut eorum indignâ consecratione panis in corpus Christi non convertatur. Illos sequuti Waldenses in oratione excusatoria dixerunt, quod ut fiat consecratio dignus debet esse Sacerdos cum fido populo. Denique inter Wiclefi articulos iste recensetur: *Si Sacerdos est in peccato mortali, non conficit, non consecrat.*

Verùm hic posterior ex dictis dum de Sacra-

mentis in communi , satis superque confutatus manet. Cùm enim nulla iniquitate, nulla infidelitate, nulla à fide desertorum defectione indelebilis character, quo uno conficiendæ Eucharistiæ potestas continetur, obliterari possit, semper validè à quocunque Sacerdote sacramentum hoc ministratur, si cæteroquin quæ essentialia sunt, ritè servantur. Neque enim tanti tamque divini operis confectio à Ministrorum meritis vel fide proficiscitur; uni Christi innitur potestati, cujus gloriæ sicut bona, ita mala suo modo famulantur. Quare Sacerdos in peccatum lethale, hæresim, schisma, vel excommunicationem prolapsus, in eoque statu degens, sacrilegè quidem, at validè tamen sacramenta facit, bonâ potestate malè usus. Nec sequitur ab hujusmodi nefariis ministris, si pervulgata præsertim fuerint vel flagitia, vel irretientis censuræ vincula, Sacramenta recipere licitum esse; non, inquam, sequitur: quia nedum peccare malum est, sed alicui etiam peccandi locum & ansam præbere æternâ lege vetatur: pœna enim digni sunt non solum qui faciunt, sed & qui consentiunt facientibus: quia nimirum alieni peccati contagione se contaminat, illiusque culpâ obstringitur, qui in sacrilegii societatem aliquo tandem modo venit.

Nec propterea Sacramenta refugimus, ut rectè ait S. Thomas *quæst. 82. art. 9. ad 1.* sed ea potius veneramus, dum nefandam indignè ministrantium culpam detestamur. Sacramentum ab ipsis impiè licèt confectum cernui veneramus, sed in sacrilegam porrigentis manum zelo justissimo indignamur, malumque beatissimo cibo ad tempus orbari, quam communione

nione præcipiti & intempestivâ alium ad peccandum provocare. Ubi etiam observandum; quod quanvis impii, & etiam reapse suspensi Sacerdotis Missam, quandiu ab Ecclesia toleratur audire licitum sit (modò tamen illum ad celebrandum non provocemus) nihilominus ut refertur capite *Ad evitanda*, dist. 32. de concubinariis Sacerdotibus sic Ecclesia statuit: *Nullus Missam audiat Sacerdotis, quem indubitanter concubinam novit habere.* Id autem Ecclesia de notoriis concubinariis decrevit, tum ut suum erga Sacerdotum spurcitas horrorem significaret; tum ut hujus criminis detestationem Sacerdotibus inspiraret; tum ne homines ad libidines proni ad luxuriæ inquinamenta Sacerdotum exemplo allicerentur; vel certè ad diviniſsimorû myſteriorum contemptum, quæ cernerent ab iis contrectari, quorum manus sordibus plenæ sunt.

Objiciunt hæretici aliquot authoritates. Primò singuli Christiani dicuntur Sacerdotes, 1. Pet. 2. *Genus electum, regale Sacerdotium.* Apocal. 6. *Fecit nos regnum & Sacerdotes.* Secundò toti Ecclesiæ per Apostolos repræsentatæ dictum est, *Hoc facite in meam commemorationem.* Tertiò Concilium Ancyranum can. 2. præcipit Diaconos qui idolis immolaverant, resipiscen-tes tamen iterum cum hostibus fidei certaverant, gradu quidem suo non esse privandos, debere tamen cessare ab omni sacro, ita ut non panem, nec calicem offerant; nec pronuntient, nisi fortè aliqui Episcoporum conscii sint laboris eorum, & humilitatis, & mansuetudinis, & voluerint eis aliquid amplius tribuere, vel adimere. Penes ipsos ergo erit de his potestas. Concilium etiam Laodicenum can. 25. *Non oportet*



inquit, *Diaconum panem dare, nec calicem benedicere.* Ergo alii à Sacerdotibus Eucharistiam conficiebant.

Respondeo ad 1. eodem modo Christianos omnes dici Sacerdotes, quo Reges in illis testimoniis esse dicuntur; quia sicut dum concupiscentiam frænamus, passionum æstus moderamur, illicitis principamur desideriis, Reges sumus: ita orationibus ad Deum fuis, sanctis operibus Deo jugiter oblatis, pœnitentiâ facta carnis mortificante dum sacrificamus sacrificium justitiæ & sanctimonix Sacerdotes in ampliori significato dicimur, de quo plura diximus *lib. 10. dissert. 1. cap. 1. specul. 3. per totam reflectionem.* Sicut ergo illis locis commune Christianis omnibus regnum speciale Regum dominium non tollit; ita nec Ecclesiæ Hierarchiam confundit spiritale virtutum Sacerdotium. At hæretici & Regum monarchiam, & Ecclesiæ principatum infandis moliminibus subvertere peræquè nituntur, utriusque potestatis, quam immani odio prosequuntur, hostes capitales.

Ad secundum dicendum, falsum omninò esse. Sacra faciendi facultatem verbis illis, *Hoc facite in meam commemorationem*, omnibus indiscriminatim esse concessam; conficiendi enim sacramenti, & offerendi sacrificii potestatem iis verbis Apostolis ut Sacerdotibus fecit. Et certè valde sunt mirabiles nostrates hæretici, qui verba Christi Petro dicta, *Quodcumque ligaveris super terram erit ligatum & in cœlis; quodcumque solveris super terram erit solutum & in cœlo*, ad solum Petrum pertinere volunt, nihil ad successores ejus: potestatem  
etiam



etiam clavium, & remittendorum retinendorumque peccatorum auctoritatem Apostolis verbis nitentissimis datam, Episcopis eorum successoribus repugnante tota traditione denegant; & verba illa, *Hoc facite*, seu Eucharistiam conficiendi potestatem accipite, ad omnes omninò Christianos dilatant. Quo jure verba Apostolis dicta modò ampliare inmodicè, modò restringere violenter de suo arbitratu hæretici præsumunt? Itane privatus eorum spiritus vitiis corruptus, schismate infuscatus, hæresi sauciatus amissis est ad quam ipsæ divinae litteræ ita exigendæ sunt, ut eorum interpretamentis fidem cæcam debeamus? Scilicet. Discant ergo ab Augustino, in illis Domini verbis atque præceptis quæ universè & indefinite omnibus facta videntur, habendam esse personarum rationem. *Erit*, inquit lib. 3. de doctrina Christiana, cap. 17. *etiam hoc in observationibus intelligendarum Scripturarum, ut sciamus alia omnibus communiter præcipi, alia singulis quibusque generibus personarum.* Alia ergo dixit Christus Apostolis ut Rectoribus Ecclesiæ, alia ut totam Ecclesiam repræsentantibus. Neque enim omnes Pastores, vel Doctores, vel sacrorum Antistites.

Ad canones Ancyranum & Laodicenum dicendum, priori canone vetari Diaconis illis, ne Sacerdoti sacrificaturo panem & calicem de more offerrent, nec Eucharistiam consecratam distribuerent, nec verbum Dei prædicatione annuntiarent in præcedentis delicti & scandalî satisfactionem, nisi fortè laboriosâ magnæ humilitatis pœnitentia ad prædicta ministeria restitui de consilio Episcopi mererentur. Posteriori

steriori verò canone, scilicet Laodicensi vetatur Diaconis, vel etiam Subdiaconis ( vox enim Græca utros amborum significet incertum est, placetque Zonaræ & Balsamoni Subdiaconos significare ) ne superiorum Ordinum munia, putà Sacerdotis, si de Diaconis sermonem habet; vel Diaconi, si de Subdiaconis loquitur, obire præsumant. Ex quo nihil contra nos.

Dices: Tertullianus *lib. de exhortatione castitatis*, non minùs laicos quàm sacris ministeriis addictos à secundis nuptiis dehortaturus, eos ut deterreat sic scribit: *Nonne & laici Sacerdotes sumus? Scriptum est: Regnum quoque nos & Sacerdotes Deo & Patri suo fecit. Differentiam inter Ordinem & plebem constituit Ecclesiæ autoritas, & honor per Ordinis confessum sanctificatus: adeo ubi Ecclesiastici Ordinis non est confessus, & offers, & tingis, & Sacerdos es tibi solus. Sed ubi tres, Ecclesia est, licet laici: unusquisque enim sua fide vivit. Igitur si habes jus Sacerdotii in temetipso, ubi necesse est, habeas etiam oportet disciplinam Sacerdotis.*

Respondeo in primis Tertullianum librum illum scripsisse jam Montani erroribus implicatum, & ab Ecclesia Catholica segregem: unde valet quod de eo dixit Hieronymus: *Homo Ecclesiæ non fuit.* Et Hilarius can. 5. in Matth. *Sequenti errore detraxit scriptis probabilibus auctoritatem.* Et Vincentius Lirinensis: *Tertullianus Catholici dogmatis, id est universalis, ac vetustæ fidei parum tenax, ac disertior multò quàm felicior, mutatâ deinde sententiâ, fuit ipse quoque in Ecclesiâ magna tentatio.*

Deinde non loquitur Tertullianus de sacrificio propriè dicto, nec de Sacerdotio consecrationis,

crationis, sed de sacrificio orationis, pœnitentia, eleemosynarum, in quo unusquisque Christianus Sacerdos est, ut suprâ diximus, & eleganter tradit Chrysologus serm. 108. *In odorem thymiana semper orationis accende; arripe gladium spiritus; altare cor tuum pone, & sic corpus tuum admove Dei securus ad victimam. Deus fidem, non mortem quarit; votum, non sanguinem scit; placatur voluntate, non nece.* Et serm. 108. expendens illud Apostoli: *Ut exhibeatis corpora vestra hostiam vivam*, sic habet: *Apostolus sic rogando omnes homines ad sacerdotale fastigium provexit. O inauditum Christiani Pontificatus officium, quando homo sibi ipse est & hostia & Sacerdos! Quando hostia mactatur, & vivit; Sacerdos nescit occidere, qui litabit. Mirum sacrificium, ubi corpus sine corpore, ubi sine sanguine sanguis offertur! In tali victima mors expenditur, hostia permanet; vivit hostia, mors punitur.* Hunc autem fuisse Tertulliani animum patet, quia jus istius Sacerdotii uni Baptismati inniti vult: quod fundamentum cum in mulieribus inveniatur, jure illæ Sacerdotii potirentur. Quod à veritate abhorret, & Tertulliano ipsi repugnat; libro enim de velandis virginibus, cap. 9. *Non permittitur, inquit, mulieri in Ecclesia loqui, sed nec docere, nec tingere, nec offerre, nec ullius virilis muneris, nedum Sacerdotalis officii sortem sibi vindicare.* Christiani ergo dicuntur Sacerdotes, & quia seipso Deo immolant, fiuntque vitæ christianæ exercitationibus tanquam oves occisionis; & quia Missæ sacrificium cui devotè intersunt, cum Sacerdote offerunt; unde inter Missarum preces ait Sacerdos: *Orate, fratres,*



*fratres, ut meum ac vestrum pariter in conspectu Domini sit acceptum sacrificium. Et in canone: Pro quibus tibi offerimus, vel qui tibi offerunt hoc sacrificium laudis, tibi que reddunt vota sua aeterno Deo & verq.* Demum quia laici praesertim in primitiva Ecclesia quaedam offerebant à Sacerdote benedicenda, consecranda, Deoque offerenda, quae absente Sacerdote ipsi laici benedicere & offerre solebant: de quo variarum oblationum ritu videri potest tertius Canon Apostolorum.

Objicies demum quaedam facta. In primis Frumentius apud Theodoretum *lib. 1. hist. Ecclesiast. cap. 23.* cum juvenis in India commoraretur, Christianos mercatores Romanos illuc appulso ad celebranda divina mysteria seu Liturgias invitavit; nec tamen ipse, nec advenae Sacerdotes erant. Ergo tunc à Laicis Eucharistia confecta est. 2. In actis S. Petronillae habetur ipsam celebratis Dominicæ oblationis mysteriis & Eucharistiâ refectam, mortem obiisse. 3. In Prato spiritali, *cap. 25.* refertur Monachum laicum super panes, quos secum habebat, verba consecrationis pronuntiasse, Angelumque astitisse qui panes consecratos esse declaravit. Ergo conficiendæ Eucharistiæ potestas non est Sacerdotibus eximiae.

Respondeo ad primum, Frumentium cum mercatoribus preces, Psalmos, aliâque pietatis officia unâ celebrasse: Nicephorus enim, Sozomenus, & ex quo tres illi historiam mutuati sunt, Ruffinus *lib. 1. cap. 9.* solius orationis meminerunt. Quam Theodoretus Liturgiâ nominavit vel in latiori acceptione, vel quia preces illas, quas inter celebranda Missarum solennia



solennia Romana Ecclesia fundere solebat, ipsi sine consecratione fuderunt: sicut apud nos quæ orationes aliæque devotè legit, quæ in Missali habentur, solâ consecratione omisâ, Missam siccam celebrare dicitur. Quod si de Liturgia strictè sumpta loquutum fuisse contendas Theodoretum, dicendum nec constare utrum Frumentius ille fuerit Sacerdos, cum postea fuerit à S. Athanasio in Indorum Episcopum ordinatus; nec utrum illi mercatores secum Sacerdotem ullum adduxerint tantæ peregrinationis comitem, cum videamus in navibus & triremibus Catholicorum in longinquas præsertim regiones proficiscentibus aliquem semper advehi Sacerdotem periclitantibus succursum, quem Eleemosynarium vocant.

Ad 2. dico in actis S. Petronillæ non haberi ipsam divina celebrasse mysteria, sed celebratis utique ab aliquo Sacerdote eam invisente mysteriis, spiritum emisisse. In primitiva namque Ecclesia Sacerdotibus solenne erat ad Christianos in carcere ergastulisque detentos convenire, quod afflictis solatium, angustiarum auxilia, certantibus verbi & Eucharistiæ potissimum robur conferrent, ut in Cypriani operibus passim legere est. Sufficiant hæc ex libro 1. epistol. 2. *Quomodo docemus aut provocamus eos in confessione nominis sanguinem suum fundere, si eis militaturis sanguinem Domini denegamus? Viventibus communicatio à nobis danda est, ut quos excitamus & hortamur ad prælium, non inermes & nudos relinquamus, sed protectione corporis & sanguinis Christi muniamus. Cum ad hoc fiat Eucharistia, ut possit accipientibus esse tutela, quos tutos esse contra*  
adversa

*adversarium volumus, munimento dominica sac-  
turitatis armamus.*

Ad tertium suppositâ veritate historiæ, quam falsam aliqui subodorantur, sicut librum in nonnullis viciatum fuisse dicunt, dicendum totum id miraculosè & de potentia extraordinaria contigisse; unde ex facto insolito ordinariam Ministrorum potestatem dimetiri absurdissimum est. Ex rei porrò gestæ narratione clarebit solâ Dei absolutâ potentiâ illud miraculi evenisse. *Frater quidam erat in Cœnobio Cuziba, qui sanctæ oblationis verba ritumque didicerat. Die ergo quadam ut benedictiones ferret, cum jam rediret ad Monasterium, verba sanctæ oblationis, quasi versus aliquos caneret, dixit. Easdem verò benedictiones imposuerunt Diaconi sancto Altari. Quas cum Abbas Joannes Presbyter offerret, qui postea Casarea Palestina Episcopus fuit, non vidit, ut solitus erat, sancti Spiritus adventum. Contristatusque valde, & cogitans ne quid fortè peccasset in mente, atque ideo se Spiritus sanctus avertisset, ingressus est sacrarium plorans, corruitque in faciem suam. Apparuit autem ei Angelus Domini dicens: Quoniam frater ille qui oblationes attulit, verba sanctæ oblationis in via dixit, sanctificata jam ac perfectæ sunt. Ex tunc igitur statuit senior, ut nullus deinceps addisceret sanctæ oblationis verba, nisi qui ordinatus ad hoc esset, neque passim ea quispiam diceret quocumque tempore absque loco consecrato.*

Ex quibus verbis manifestum est, consecrationem illam nequaquam modo ordinario contigisse. Cum enim certum sit ad consecrandum desiderari de via ordinaria Ministri intentio-

nem



mem, planum est, Fratrem illum tanquam ministrum ordinarium oblationes non consecrasse; non enim intentionem necessariam habuit, qui quasi versus aliquos verba benedictionis, quæ didicerat, canebat. Neque enim Diaconus, vel Subdiaconus, qui inter Missarum solennia verba consecrationis ex Evangelio vel Epistola Pauli canit, continuo oblatum panem consecrare intendit: nec qui verba illa in refectorio panibus instructo legit ( ut in sacris Clericorum & Regularium Conventibus fieri assolent ) præsentem panem consecrat, ut suo loco latius exposuimus. Unde si verba illa divinitus ad consecrandos panes assumerentur, non ordinarii ministerii, sed insoliti miraculi argumentum esset.

Voluit autem Deus eo singulari prodigio significare sacratissima conficiendæ Eucharistiæ verba, quibus quidquid in Religione augustius est conficitur, non nisi profunda veneratione, à solisque Ministris esse proferenda, neque esse puerilibus ludicris & jocis exponenda. Hac de causa in eodem Prato spiritali *cap. 196.* refertur miraculum quod pueris Appamiensibus contigit, qui joco verba consecrationis protulerant.

„ Narravit nobis Gregorius Africanæ Provin-  
„ vinciæ Præfectus, fidelis vir, & Monacho-  
„ rum ac pauperum amator, bonisque semper  
„ congaudens. In provincia, inquit, mea ( erat  
„ autem Appamiensis secundæ Syrorum pro-  
„ vinciæ, ex oppido quod dicitur Thorax )  
„ ager est ab urbe quasi quadraginta milliari-  
„ bus distans, qui Gonagus dicitur. In hoc,  
„ sive in ejus finibus pueri pascebant pecora, &

„ ut solet pueris contingere , puerili con-  
 „ suetudine voluerunt ludere. Cumque lude-  
 „ rent, dixerunt ad invicem : Venite celebremus  
 „ Missam, & offeramus sacrificium, & com-  
 „ municemus, sicuti semper in Ecclesia Presby-  
 „ ter facit. ( *Vide quomodo sacra facere solius fuit*  
 „ *semper Sacerdotis.* ) Quod cum placuisset om-  
 „ nibus, constituunt ex eis unum in ordine  
 „ Presbyteri, duosque alios pueros in ministro-  
 „ rum officio, veniuntque ad saxum quoddam  
 „ ( erant enim in planitie ) ac supra saxum in  
 „ morem Altaris apponunt panem & vas te-  
 „ steum cum vino : assistuntque, unus quidem  
 „ coram altari, quiungebatur officio Presbyteri  
 „ medius; duo verò alii hinc atque hinc veluti  
 „ ministri : & ille quidem sanctæ oblationis  
 „ verba dicebat, illi verò fasciis quæ fere-  
 „ bantur pro flabellis utentes auram faciebant.  
 „ Qui verò Presbyteri fungebatur officio ideo  
 „ sanctæ oblationis verba sciebat, quia con-  
 „ suetudo fuit in Ecclesia, ut pueri in Missis  
 „ ante sacrarium assisterent, primique post  
 „ Clericos communicarent Sanctis Christi Dei  
 „ nostri venerandisque mysteriis. Quoniam ve-  
 „ rò quibusdam in locis altâ voce consueverunt  
 „ Presbyteri sancti sacrificii orationes pronun-  
 „ tiare, pueri, ut propius astantes, sæpius ea  
 „ audiendo didicerant.

„ Cum igitur omnia secundum Ecclesiasti-  
 „ cam consuetudinem fecissent, priusquam pa-  
 „ nes frangerent ac communicarent, ignis cœ-  
 „ litus delapsus quæ proposita erant consum-  
 „ psit omnia, saxumque totum combussit, ita  
 „ ut nihil omnino neque saxi, neque eorum  
 „ quæ fuerant superposita relinqueretur. Hoc re-  
 „ pentè



„ pentè factum cum pueri vidissent , in terram  
„ omnes præ timore corruerunt , ac diutius se-  
„ inivivi permanserunt , neque erumpere vo-  
„ cem , neque de terra surgere valentes.

„ Cum verò non redirent domum horâ quâ  
„ consueverant reverti , sed pavidi in pavi-  
„ mento jacerent , exierunt è villa parentes eo-  
„ rum , ut viderent cujus rei gratiâ consueto  
„ legitimo tempore non revertissent. Egressi  
„ autem pueros omnes humi jacentes invene-  
„ runt , neque agnoscentes aliquos , neque lo-  
„ qui se alloquentibus valentes. Parentes ita-  
„ que semivivos eos aspicientes , unusquisque  
„ filium suum assumentes domum retulerunt ,  
„ videntésque pueros in hujusmodi excessu diu-  
„ tius durantes , mirabantur nimium , causam  
„ stuporis eorum omninò ignorantes , nec dis-  
„ cernere valentes ; sæpiusque illos per totum  
„ diem interrogantes , responsum nullum ac-  
„ cipere ab eis potuerunt , & quæ illis accide-  
„ rant scire omninò nequiverunt , donec dies  
„ illa & nox tota præteriiit. Tunc enim & pue-  
„ ri paulatim in ipsos reversi cuncta ipsis retu-  
„ lerunt quæ gesta fuerant , & quæ illis conti-  
„ gerant. Assumentes verò parentes suos &  
„ omnes loci ipsius habitatores egressi sunt , &  
„ locum eis ostenderunt in quo mirabiliter ista  
„ contigerant , vestigia quædam illapsi ignis  
„ indicantes.

„ Audientes verò quæ facta fuerant , & ipsis  
„ indiciis rerum admoniti in civitatem cucur-  
„ rerunt , cunctâque Episcopo civitatis nuntia-  
„ verunt : qui percussus magnitudine & novi-  
„ tate miraculi , cum omni Clero festinus ac-  
„ currit : videntésque pueros , & rursus ab eis  
„ quæ

„ quæ evenerant audiens , & cœlestis ignis ve-  
 „ stigia intuens , pueros quidem omnes conti-  
 „ nuò in monasterium immisit , locum verò  
 „ Monasterium fecit latissimum ; supra locum  
 „ autem ignis Ecclesiam construxit , & sanctum  
 „ crexit Altare.

„ Dicebat autem ipse Dominus Gregorius fi-  
 „ delissimus vir , unum se istorum puerorum  
 „ aspexisse , ejusque Monasterii ubi miraculum  
 „ acciderat , Monachum ipsum cognovisse. Et  
 „ istud quidem magnum reverà ac divinum  
 „ stupendùmque miraculum Gregorius Vene-  
 „ rabilis nobis ætate nostra contigisse enar-  
 „ ravit.

¶ Vides quantâ reverentiâ verba quibus tre-  
 menda mysteria conficiuntur, habenda sint ; un-  
 de prudentissimè Catholica Ecclesia à Spiritu  
 sancto gubernata verba illa à Sacerdotibus rem  
 divinam facientibus demissâ voce pronuntian-  
 da præcepit. Quare ex hujusmodi historiis  
 nihil aliud inferre possunt nostrates hæretici,  
 nisi meritò sibi timendam esse divinæ iræ indi-  
 gnationem , quia omnes mysteriorum divino-  
 rum ministros per summam totius ordinis &  
 hierarchiæ perversionem esse contendunt.

### *Minister dispensanda Eucharistiæ.*

Secunda speculationis pars asserens Sacerdo-  
 tem esse jure divino dispensandæ Eucharistiæ  
 ministrum , nullam patitur difficultatem. Quos  
 enim Apostolus, 1. Cor. 4. *Ministros Christi*, eos-  
 dem *dispensatores mysteriorum Dei* appellat : &  
 Tridentinum sess. 13. cap. 8. *Semper*, inquit, *in*  
*Ecclesia mos fuit ex Apostolica traditione descen-*  
*dens*

*dens, ut laici à Sacerdotibus communionem acciperent.* Sanè ille connaturalis est sacramenti dispensator, qui ejusdem est consecrator, cum non consecret nisi ut dispense. Sacerdos etiam medius Deum inter & hominem constituitur: unde sicut ad eum populi dona Deo offerre spectat, ita ad eundem sanctificata divinitus dona juxta sacras divini commercii leges reciprocè tradere pertinet. Denique summi Sacerdotis Christi exemplum tenemus, qui consecratum in ultima cœna corpus suum distribuit. At Sacerdotes personam Christi sustinent, ejusque nomine adoranda mysteria conficiunt: eorum ergo est Christum nedum consecrantem, sed consecrata etiam dispensantem imitari.

Quin etiam adeo Sacerdotibus eximium est dispensandæ Eucharistiæ ministerium, ut ad id muneris præter potestatem Ordinis ipsa etiam jurisdictionis potestas, quâ Parochus in parœcia, Episcopus in diœcesi, Summus Pontifex in tota Ecclesia gaudet, desideretur. Pastorum enim est spirituales Christiani gregis oves pascere: pascitur autem potissimum divino Eucharistiæ cibo Christianus. Id autem ne ita intelligas, quod jurisdictio ad valorem sacramenti & substantiam actus necessaria sit, sed quia sine illa consentaneus modus & ordo non servatur. Quam quidem jurisdictionem jure ordinario sibi propriam in alios Sacerdotes curam animarum non habentes Parochus, Episcopus, & supremus Antistes possunt delegatione transfundere, quam ipsi à Christo receperunt, juxta illud Magni Leonis epistola ad Theodorum Episcopum Foro-Juliensem: *Mediator Dei & hominum homo Christus Jesus hanc Præpositis*

*Præpositis Ecclesia tradidit potestatem, ut & consentientibus actionem pœnitentia darent, & eisdem salubri satisfactione purgatos ad communionem Sacramentorum per januam reconciliationis admitterent.*

Ultima denique pars, quæ ait Diaconos posse ex commissione Eucharistiam potestate delegatâ dispensare, ex usu primitivæ Ecclesiæ comprobatur, cujus locupletissimi testes sunt Justinus Martyr apologia 2. *Ii, inquit, qui apud nos Diaconi appellantur, omnibus adstantibus panem & vinum & aquam consecrata porrigunt.* Testatur etiam S. Cyprianus *serm. de lapsis*, Diaconum puellæ de sacramento Calicis infudisse. Commissam quoque sibi fuisse Domini Sanguinis dispensationem Beato Pontifici Sixto S. Laurentius fundendi propii sanguinis sitibundus regerebat. Denique Concilium Carthaginense IV. & Gelasius Papa *epist. 10.* Diaconos præsentem Episcopo & Presbytero posse Eucharistiam corporis Christi populis, si necessitas cogat, jussos erogare clarissimè tradunt.

Nec illud obstat, quod Tertullianus *lib. de corona militis*, scripsit: *Eucharistia sacramentum nec de aliorum manu quàm de Præsidentium sumimus.* Non obstat, inquam: tum quia Diaconus ex commissione præsidens esse potest. Tum quia si per præsidentes soli Pastores, Presbyteri & Episcopi intelligendi sunt, loquitur de ministris quibus id jure ordinario competit, à quibus & communiter Sacramenta recipimus. Tum demùm, quia hoc inde tantùm colligi potest, non eundem semper dispensandæ Eucharistiæ morem in Ecclesia viguisse, sed



sed variam fuisse consuetudinis illius pro ratione temporum, occasionum, & emergentium necessitatum disciplinam. Nam per solos Presbyteros ordinariè, quandoque per Diaconos sub utraque specie, & deinde per eosdem Diaconos sub unius specie vini Eucharistia dispensata est.

Qui postremus usus fuit in Ecclesia frequentior & pervulgatior; quia ut rectè observat S. Thomas *quest. 82. art. 3.* ad dispensandum Sanguinem in Calice contentum non oportet Eucharistiam immediatè tangi, sicut tangitur species panis dum corpus Christi porrigitur; tam sacra autem immediatè non nisi à manibus consecratis tangi, debita tremendis mysteriis reverentia postulat. Tum quia sanguis redemptionem à Christo in populum derivatam significat, unde & consecrando Calici aqua, quæ populi typus est, permiscetur. Et quia Diaconi Sacerdotem inter & populum medii intersunt, convenientius visum est, si eis sanguinis potius quàm corporis dispensandi provincia demandaretur. Demùm quia quando dispensatio sanguinis erat in usu, ipse ritus ministerium Diaconi postulabat, ne Eucharistiæ dispensatio nimium esset celebranti Sacerdoti onerosa.

Cæterùm neque corpus, neque sanguinem Diaconi nisi ex commissione dispensare queunt, seu ut jura dicunt, nonnisi ab Episcopo vel Presbytero jussi. Nec obest quod sanctus Thomas doceat Diacono *ex officio* competere Dominici Sanguinis dispensationem. Non obest, inquam; non enim eatenus id ex officio Diaconis competit, quatenus eo jure ipsi gaudeant,

sed quia ex officio habent, ut illud sibi muneris committi possit, quod Subdiaconis vel Clericis inferioribus, & multò minùs laïcis committi nequaquam valet. Et quanvis non soleat jam id Diaconis committi, in necessitate tamen de consensu Pastorum Eucharistiam licitè Diaconus dispensaret, cùm hæc dispensatio fuerit olim usurpata, & Conciliis probata, nec ullo sit jure, urgente præsertim necessitate, prohibita.

An autem laïci possint esse dispensandæ Eucharistiæ ministri? Certum est secundùm præsentem Ecclesiæ disciplinam, nullum laicum Eucharistiam etiam extremum vitæ spiritum agentibus dispensare. Præceptum enim recipiendi sacri Viatici tunc solùm ligat, cùm Eucharistia eâ quâ par est, & quæ tantam decet majestatem, reverentiâ accipi potest. Exigit autem tremendorum mysteriorum dignitas, ut à solis ministris in Ecclesia designatis, servatisque servandis dispensetur.

Unum excipio persecutionis casum, in quo milites Christi ad pugnam munimento dominicæ saturitatis armandi sunt. Hinc Basilii in epistola ad Cæsariam Petritiam (quam Græcè extare vir doctissimus Groperus testis est, ne quis in Latinis quæ extant, eam deesse cavillettur) *Persecutionis, inquit, temporibus necessitate cogi quempiam, Sacerdote aut Diacono non presente, Communionem propriâ manu sumere, nec difficile est, nec superfluum demonstrata, quod longâ consuetudine hoc ipso rerum usu confirmatum est: in Alexandria & Ægypto laïcorum quisque, seu quisquis de populo est, ut plurimùm communionem in domo sua habet. Narrat etiam*

etiam Cyprian. fœminam quandam arcam suam, in qua Domini corpus ex Ecclesia asportatum, indignis manibus aperire tentantem, igne inde surgente deterritam fuisse, ne auderet attingere. Hac de causa inclytæ Mariæ Stuart Scotiæ Reginæ sibimet communionem dandi facultatem Pius V. fecit, ut adversus impiæ Elizabethæ non tam mulieris quàm furia tyrannidem muniretur. Sanè cum persequutionis tempore sacri cœtus nec liberi, nec frequentes esse possint, sacris peractis Eucharistia petentibus iustissimè datur asportanda domum, ut paratam in conspectu suo habeant mensam adversus eos qui tribulant ipsos.

Scio etiam hunc morem dispensandæ à laïcis Eucharistiæ unius persequutionis occasione cœptum, non statim redditâ Ecclesiæ pace desisse. Nam teste Hieronymo apologia in Jovinianum, Romani sua ætate Eucharistiam domi sumebant: quod licet nec reprehendat, nec prober, illud tamen ægerrimè fert, quod eodem die post rem uxoriæ quidam communicarent, qui tamen Ecclesias ingredi non audebant. *An alius, inquit, in publico, alius in domo Christus? Quod in Ecclesia non licet* (nimirum circa corpus Christi, à qua potissimum habet Ecclesia quod sacra sit) *nec domi licet.* Nam cæteroquin multa fiunt domi quæ in Ecclesia fieri nec liceret, nec deceret, nec expediret.

Quin tanta erat olim de hoc divinissimo Sacramento fides & devotio, tanta ejus cum utilitatis tum necessitatis persuasio, tamque altè fidelium animis cordibûsque infixæ, ut divinus ille cibus, in cujus usu sancto tota Christianæ



vita<sup>e</sup> felicitas sita est , ad Monachorum desertos secessus deferretur , in eorumque usum quotidianum asservaretur. Testis enim est Palladius in vita Apollo Abbatis , *cap. 52.* Fratres qui cum ipso erant, non prius alimoniam accipere consuevisse , quàm Eucharistiæ Christi hora diei nona communicassent , ne Deus procul ab eis recederet , qui se à divinis Sacramentis amovent ; quia nimirum eximiæ & Angelicæ puritatis discipulos Abbas ille regebat. Nam cœteroquin testatur qui eodem tempore floruit Chrysostomus *hôm. 17. ad Hebr.* eos qui tum eremum incolebant Monachos Eucharistiam semel in anno , fortassis etiam & post duos annos , fortassis quoque adhuc rarius ( nimirum pro ratione culparum eremi pœnitentiâ expiandarum ) participasse. Porro Monachos etiam laicos sibimetipsis Eucharistiam dispensasse author est Basilii in epistola suprà laudata ad Cæsariam Patritiam ; *cap. 18.* *Omnes , inquit, in eremo vitam agentes , ubi non est Sacerdos, communionem domi servantes à seipsis communicant.* Et hac de causa Eucharistiam in columbis aureis vel argenteis super altare pendentibus, ut inde identidem reficerentur , asservabant. Cujus ritus meminit tum prælaudatus Basilii, tum etiam V. Synodus Constantinopolitana, *actione 1. & 5.*

Sed quid mirum si Eucharistia ad desertorum antra in Religiosorum hominum usum deportaretur , cùm etiam à peregrè profecturis terra marique delata sit. Etenim in Martyrologio , 18. Calend. Septembris legimus sanctum Tharsitium Sacramenta corporis Domini deferentem Pagani cùm reperissent , cœpisse eos



eos disquirere quid gereret. Is verò indignum ratus margaritas porcis, hoc est discussoribus prodere, ab eis tamdiu fustibus & lapidibus mactatus est, donec spiritum exhalavit. Porro evoluta ejus corpore sacrilegi nihil Sacramentorum Domini in ejus manibus aut vestibus invenientes, eo relicto fugerunt cum terrore. Refert etiam S. Ambrosius oratione de fratre suo obitu, quod Satyrus frater in naufragio constitutus, cum quâ vehebatur navis scopuloso illisa vado urgentibus hinc inde fluctibus solveretur, non mortem metuens, sed ne vacuus mysterii è vita exiret, ab initiatis divinum illud fidelium poposcit sacramentum, non ut curiosos oculos arcanis infereret, sed ut fidei suæ consequeretur auxilium. Etenim ligari fecit in orario, & orarium involvit in collo, atque ita se dejecit in mare, non requirens de navis compage resolutam tabulam, cui supernatans inniteretur, quia fidei solius arma quæsierat. Quibus se munitum satis credens, alia non desideravit auxilia. Nec deseruit spes, nec fefellit opinio: primus servatus ex undis, & in portum terrenæ stationis evehctus fuit. Magnus etiam Gregorius *lib. 3. dialogorum, cap. 37.* narrat fideles in Adriatico mari naufragium propè facturos sibi met pacem dedisse, & corpus atque sanguinem Redemptoris accepisse. Verum hic asportandæ domum, & à laicis ministrandæ Eucharistiæ usus innumeris propemodum offendiculis, abusibus, scandalis cum esset obnoxius, cessante persecutione sublatus, & variis Conciliis, Toletano I. *can. 14.* Cæsaraugustano *can. 3.* Rothomagensi *can. 2.* abrogatus est; cessante enim causâ desinit effectus. Testatur

tamen Arcadius *lib. 3. cap. 59.* Monachos Græcos iter agentes Eucharistiam secum deferre.

*Nonnulla quæ circa Eucharistiæ consecrationem & dispensationem observentur scitu digna.*

In calce hujus speculationis quædam de Eucharistiæ sive conficiendæ, sive dispensandæ ministris advertere operæpretium duxi.

Primum nota, <sup>1</sup> Sacerdotem Eucharistiam consecrantem eandem recipere oportere, ut illius fiat particeps quod Deo offert, aliisque dispensat. Tum quia id fert Ecclesiæ consuetudo ab Apostolica traditione profecta. Tum quia consuetudini illi suo Christus prævit exemplo, qui corpus suum & Patri obtulit, & discipulis porrexit, & ore proprio accepit. *Ipse conviva, ipse convivium, ipse comedens & quod comedebatur*, ut loquitur Hieronymus *epist. 150.* Id autem congruebat; tum quia id exigat ratio convivii, ut cibi & potus communionem & consociationem habeat ipse convivor; & decorum est invitantem excipientemque alios convictorem esse, & non tantum conditorem instructoremque convivii. Tum quia ne discipuli corpus & sanguinem Christi sumere horrent, prior ipse Christus Sacramentum suum convenientissimè degustavit. Denique Sacerdos numeris suis omnibus absolutus non inchoatum duntaxat, sed integrum sacrificium obtulit: integritas autem sacrificii rei oblatæ consumptionem postulat. Nec fructu sacramenti Christus caruit, non quod intensior  
vel

vel cumulatione evaserit gratia Salvatoris, cujus plenitudo nullum recipit incrementum; sed quia spiritus dulcedinem percepit, atque ingentem animi vigorem, quo infinitos proximè futuræ passionis labores toleraret.

Nota secundò, quod in casu quo plures Sacerdotes simul celebrant, uti in ordinatione contingit, in qua novi Sacerdotes unà cum Episcopo eandem hostiam consecrant, & dum Cardinales cum Summo Pontifice rem sacram faciunt; tunc novi Sacerdotes cum Episcopo simul conficiunt, unde non debent Antistitis verba antevertere, ne præcipui celebrantis fraudetur intentio & forma, nève contingat Episcopum non offerre sacrificium, imò nec tunc perfectum fieri sacrificium; siquidem solus Pontifex sub utraque specie sacramentum sacrificiūque consumit, quod tamen in ea suppositione non confecisset, si nimirum alii præveniando consecrassent. Unde novorum Sacerdotum ea debet esse intentio, ut non nisi cum Episcopo consecrent, caventes interim ne prius quàm Episcopus verba protulit formam ipsi absolvant. Scio Richard. & Cajetan. opinari novos Sacerdotes verba sacra non nisi recitativè in signum potestatis sibi concessæ, atque in memoriam convivii à Christo cum Apostolis celebrati, partim instructionis, partim ceremoniæ causâ proferre. Sed cùm oppositum non solum S. Thomas, sed Innocentius etiam Papa *lib. 4. mysteriorum Missæ, cap. 25.* verbis significantissimis doceant, traditæ doctrinæ adhærendum & standum est.

Notandum tandem Sacerdotes, tametsi curam animarum non habentes, ad conficien-



dam itentidem Eucharistiam divina lege teneri tamen. Non enim frustra eis in persona Apostolorum dictum est : *Hoc facite in meam commemorationem*. Et sanè sicut inanis est potestas quæ in actus nunquam funditur , inordinatum etiam est conceditâ sibi divinitus potestate nunquam uti , nunquam pro populo , nunquam in honorem Dei , nunquam in commune Religionis bonum offerre. Ergo ille Sacerdos est servus malus , piger , & inutilis , subindeque juxta Veritatis oracula in tenebras exteriores ejiciendus , qui talentum abscondit in terra ; quia omni habenti dabitur , & abundabit : ei autem qui non habet , & quod videtur habere auferetur ab eo , *Matth. 25*. Unde intolerabilis eorum incuria est , qui præcipuis anni festis diebus non celebrant , vel ne celebrent impedimenta ponunt. Nam & in cap. *Dolentes* , de celebrat. Missar. reprehenduntur qui vix quater in anno celebrant , Deum quantum in ipsis est gloriâ , Ecclesiam militantem auxilio , Patientem solatio , Triumphantem gaudio , seipsos remedio privantes.

## R E F L E X I O.

*Imitamini quod tractatis* , inquit novis Ministris ad sacros Ordines proVectis Episcopus. Audiant sacri Ministri , timeant Sacerdotes. Nihil eorum statu munereque divinius , quibus solis tam divina tractare datum est : ac nihil illis miserabilius , qui quæ tractant non imitantur. Heu ! heu Domine Deus ( lamentatio est Bernardi , Gregorii , & aliorum Patrum ) facta est plaga nostra insanabilis , postquam



quam ipsi Medici vulnera fovent; & qui se pro populi peccatis intercessores obicere tenentur, ipsi graviora committunt. Quomodo Deum placabimus, si dispensator mysteriorum, qui ante Dominum stat jugiter, & versatur inter altaria semper, inde sibi sumat crimen, unde aliis veniam debuerat reportare?

Cui rei similes dixerimus ministros malos, nisi aqua quâ intingitur baptizatus, quæ baptizatorum peccata diluens illos ad regnum cæleste mittit, & in cloacas ipsa descendit? Grandis sanè dignitas divina tractantium, sed grandior ruina si peccant. Ne latentur ad ascensum, sed timeant potius ad lapsum; quia non est tanti gaudii excelsa tenuisse, quam mæroris de sublimioribus corruisse. Considerate quale sit divinis Sacramentis insistere, quid sit populo sancto præesse. Tales eos esse decet qualia sunt Sacramenta quæ ministrant, ne vindictam adversum offerentem postulent, quæ ad impetrandam veniam obtulerant.

Eucharistiam conficere, confectam dispensare sublimitas est sine socio, *quâ nec majus quippiam, nec præstantius apud nos est, ut orat. 1.* Nazianzenus ait, Verum honor sublimis eminentem postulat sanctitatem. Quo non oportet esse puriorem, inquit Chrysost. hom. 60. ad popul. Antioch. *tali fruente sacrificio? Quo solari radio non splendidiorum manum carnem hanc dividente? Linguam quæ tremendo nimis sanguine rubescit?* Frustra altarium Ministri à populo segregantur, qui divisam à populo vitam non agunt. Vilescit Sacerdotii dignitas, quia in pluribus nihil nisi plebeium & commune, nihil separatum & eminens populi respici-

ciunt. *Quomodo*, inquit Ambrosius epist. 10. *observari potest à populo, qui nihil secretum habet à populo? Quid in te miretur, si tua in se cognoscat?*

Ergo quod sumus officio, professione & moribus sumus: congruat actioni nomen, & actio respondeat nomini: ne sit honor sublimis, & vita proclivis; deifica professio, & illicita actio; gradus excelsus, & mores abjecti. Hæc autem adversus malos ministros ita dicta sunt, ut & sanctos fidelisque dispensatores, malorum etiam statum, dignitatem autoritatemque veneremur. Statum enim sacerdotalem revereor quantum non possum dicere; tantum revereri me quantum debeo, non audeo dicere. Neminem lædit, qui in vitia generatim invehitur, maxime qui libros scribit: etsi enim Concionator peccata universim reprobet, tamen ad definitos auditores oratio ejus non restringitur; unde cum magna illi cautela loquendum est, non quod veritatem in injustitia detinere fas sit, sed ut adjuncta seu circumstantias serio perpendat, ne ponendo in cælum os suum plus oblit quam prosit: nihil ergo temerè, nihil nisi de consilio prudentum, nihil nisi de Episcoporum assensu & jussu, totum moderante christiana prudentiâ aggrediatur. At verò liber publici juris factus dum vitia generalia abusúsque infectatur, à loco, tempore, personisque privatis omninò abstrahit, nullum seorsim sugillat, nudam veritatem, adversus quam nihil potest, sed pro ea, exponit ægris quidem oculis invisam, sed puris amabilem. Quod hîc obiter observare libuit, quia nonnullos ægrè & indignè ferre audiivi, quod variis natis passim  
occasionibus

occasionibus nonnulla ex Patribus adversum Rectores animarum incuriosos, Clericos vocationis suæ celsitudinem non satis attendentes, Regulares etiam collapsæ disciplinæ, vel alios quosvis Sanguinis Christi Sacramentorumque dispensationem non satis idoneis committentes, quibus temporalium rerum gerendarum provinciam non crederent, exaravi. Verum his offendi generalissimis monitis delicatissimi fastidii est. Sanè si hujusmodi teneritudinis ratio habenda esset, expungenda forent integra Patrum volumina; quid enim aliud resonant Salviani de providentia libri; quid integri Gregorii Magni, Bernardi, aliorumve Sanctorum sermones adversus populi, Cleri, collapsorumque Monasteriorum excessus, vel abusus intorri?

Nonne sancti Patres universi temporum suorum vitis ingemuerunt, & disciplinæ Ecclesiasticæ labe & defectiones non ullo in personas ullas, & multò minùs in hominum status odio (quod hæreticorum proprium est), sed misericordiâ & charitate, atque Ecclesiæ honoris amplificandi gratiâ adverterunt & deplorarunt, ut disciplinæ deformatæ profluvium, casus, & inclinationes ad pristinum, si fieri posset, decus splendoremque referrent? Ne ergo morosi illi vitiligatores veritatem in invidiam, charitatem in crimen vocent. Ne dolorem ex illatis Ecclesiæ incommodis conceptum ab uno in Ecclesiam Matrem amore filiali profectum pro vitio ducant. Quia etsi vitiorum vulnera generatim ramen incessimus, non ad ludibrium ea vel dedecus ostentamus, sed ad conciliandam sanitatem aperimus.

Quid dixissent illi tam tenelli, tam ad pun-  
ctionem ab omnibus singularibus personis  
præscindentem molles, tam quærentes qui lo-  
quantur placentia; quid dixissent si cum Cy-  
priano *tract. de lapsis*, scripsssem: *Quod tradi-*  
*tam divinitus disciplinam pax longa corruperat*  
*quod non in sacerdotibus religio devota, non in*  
*ministeris fides integra, non in operibus miseri-*  
*cordia, non in moribus disciplina vigeat?* Quis  
lites non movissent, si ex Nazianzeno carmine  
de vita sua exscripsssem, *Christianam omnem*  
*evanuisse virtutem, nihil ex ea, vel parum ad-*  
*modum esse reliqui; nec jam se nisi lacrymas Ec-*  
*clesia quidquam largiri posse?* Quantum queri-  
tati fuissent, si cum gemebundo Magno Grego-  
rio *lib. I. epist. 4.* deplorassem, *in Ecclesia navim*  
*undique intrare fluctus, ut jam quotidianâ ac*  
*validâ tempestate quassata putrida naufragium*  
*tabula sonent?* Sed ad istas Bernardi non tam  
voces quàm fulmina quantum stomachati ex-  
canduisse, si nomine meo, suppressâ tantî  
Doctôris mentione protulisssem quæ *serm. 34. in*  
*Cant.* vibrat velut sagittas acutas & carbones  
desolatorios: *Serpit hodie putrida tabes per om-*  
*ne corpus Ecclesia, & quo latius, eo desperatius;*  
*atque periculosius, quo interior.* :: *Ministri Chri-*  
*sti sunt, & serviunt Antichristo. Non fugare,*  
*non fugere eos potest, ita invaluerant & multi-*  
*plicati sunt super numerum. Intestina & insana-*  
*bilis est plaga Ecclesia, & ideo in pace amaritu-*  
*do ejus amarissima.*

Sed Regularibus pepercit Bernardus suavi  
illâ suâ & mellitâ pietate? Minimè gentium, &  
cùm esset ipse religiosæ vitæ professor, instaur-  
ator & gloria, judicium nihilominus incipie-  
bat



bat à domo sua. In primis strictioris observantiae professores, quorum magna in victu parcitas & asperitas, in vestitu notabilis vilitas, in opere manuum quotidiana desudatio, in jeuniis & vigiliis jugis exercitatio, totius denique vitae austerior conversatio commendabiliore efficit; superba tamen de aliis contemptio & detractio clamorem invectionis & susurrum detractionis emittit, sic apologia ad Guillelmum Abbatem perstringit. *Va portantibus crucem, non sicut Salvator suam, sed sicut ille Cyrenaeam alienam! Va citharædis citharizantibus: non ut illi de Apocalypsi in citharis suis, sed verò ut hypocrita in alienis! Va semel, & va iterum pauperibus superbis! Va inquam semel, & va iterum portantibus crucem Christi, & non sequentibus Christum: quia nimirum, cujus passionibus participant, humilitatem sectari negligunt.* Duplicem quippe contritione conteruntur qui hujusmodi sunt, quando & hic pro temporali gloria temporaliter se affligunt, & in futuro pro interna superbia ad aeterna supplicia pertrahuntur. Laborant cum Christo, sed cum Christo non regnant. Sequuntur Christum in paupertate sua, sed in gloria non sequuntur. De torrente in via bibunt, sed non exaltabunt caput in patria. Lugent nunc, sed tunc non consolabuntur. Et meritis quid enim facit superbia sub pennis humilitatis **JESU**? Nunquid non habet quo se palliet humana malitia, nisi unde involuta est infantia Salvatoris? Et quomodo intra praesepe Domini simulatrix arrogantia se coarctat, pro vagitibus innocentia malum ibi detractiois immurmurat? An non illi superbissimi de Psalmo, quorum profuit ex adipe iniquitas eorum, multò tutius operati

operti sunt iniquitate & impietate sua, quàm nos latemus sub sanctitate aliena? Quis enim magnus impius, an proficiens impietatem, ac mentiens sanctitatem? :: Magni abusus. Magna cura est ut corpus regulariter induatur; & contra regulam suis vestibus anima nuda describitur. Cùm tanto studio tunica & cucullus corpori procurentur, quatenus cui deerunt Monachus non putetur: cur similiter spiritui pietas & humilitas, quæ profectò spiritualia indumenta sunt, non providentur? Tunicati & elati abhorremus pelliceati: tanquam non melior sit pellibus involuta humilitas, quàm tunicata superbia? Repleti deinde venrem fabâ, mentem superbiâ, cibis damnamus singulos; quasi non melius sit exiguo saginâne ad usum vestit, quàm ventoso legumine usque ad ructum exsaturari? Et precipue cùm Esau non de carne, sed de lente sit reprehensus; & de ligno Adam, non de carne damnatus; & Ionathas de gustu mellis, non de carnis morti adjudicatus: è contra Elias innoxie carnem comederit; Abraham gratissimè carnibus Angelos paverit, & de ipsis sua fieri sacrificia Deus præceperit. Sed & satius est modico vino uti propter infirmitatem, quàm multâ aquâ ingurgitari per aviditatem. Quod variis inibi confirmat petitis è sacris litteris exemplis.

Quantùm verò Monasteria à primitivæ observantiæ rigore deficientia non tam calamo quàm ferro, & magis cauterio adurente quàm stylo corripiente reprimat, ex eadem apologia claret. Pauca, inquit, quæ & vobis displicere cognovi, & omnibus bonis vitanda esse non dubito, necessarium reor subjungere, quæ quidem etsi fieri videntur in Ordine, absit tamen ut

sint de Ordine. Nullus quippe Ordo quippiam recipit inordinatum : quod verò inordinatum est, ordo non est.

Dicitur, & veraciter creditur sanctos Patres illam vitam instituisse ; & ut in ea plures salventur, usque ad infirmos regula temperasse rigorem, non regulam destruxisse. Absit autem ut credam tantas eos, quantas vides in plerisque Monasteriis, vanitates ac superfluitates precepisse vel concessisse. Miror etenim unde inter Monachos tanta intemperantia in comessionibus & potationibus, in vestimentis & lectisferniis, & equitaturis, & construendis edificiis inolescere potuit : quatenus ubi hac studiosius, voluptuosius, atque effusius sunt, ibi Ordo melius teneri dicatur, ibi major putetur Religio. :: Sub hac abusione jam ferè ubique sic pro Ordine tenentur, fere jam ita ab omnibus sine querela atque irreprehensibiliter obscurantur, quanquam dissimiliter. Nonnulli quippe his omnibus tanquam non utentes utuntur, & ideo aut cum nulla offensa, aut cum minima. Aliquantum quippe hac agunt ex simplicitate, aliquanti ex charitate, aliquanti ex necessitate. Quidam namque simpliciter ista tenent, quoniam sic eis precipitur, parati aliter agere si aliter preciperetur : quidam autem ne discorditer vivant ab eis cum quibus habitant, sectantes in his non suam libidinem, sed aliorum pacem. Alii verò quia resistere non valent multitudini contradicentium, qui hac utique tanquam pro Ordine liberâ voce defendunt ; & quoties isti aliqua, prout ratio dicat, restringere vel mutare incipiunt, illi mox tota eis auctoritate resistunt.

Quis in principio cum Ordo cœpit Monasticus  
ad

ad tantam crederet Monachos inertiam devenire? O quantum distamus ab his, qui in diebus Antonii extitere Monachi! Siquidem illi cum se invicem per tempus ex charitate reviserent, tantâ ab invicem aviditate panem animarum percipiebant, ut corporis cibum penitus oblii, diem plerumque totum jejunis ventribus, sed non mentibus transigerent. Et hic erat rectus ordo, quando digniori parti prius inserviebatur. Hæc summa discretio, cum amplius sumebat qua major erat. Hæc denique vera charitas, ubi anime, quarum charitate Deus mortuus est, tantâ sollicitudine refocillabantur. Nobis autem convenientibus in unum (ut verbis Apostoli utar) jam non est dominicam cœnam manducare. Panem quippe cœlestem nemo est qui requirat. Nihil de Scripturis, nihil de salute agitur animarum, sed nugæ & risus & verba proferuntur in ventum. Interprandendum quantum facies dapibus, tantum aures pascuntur rumoribus, quibus totus intentus modum nescias in edendo. Interim autem fercula ferculis apponuntur, & pro solis carnibus à quibus abstinetur, grandia piscium corpora duplicantur.

Hæc & alia omninò multa Bernardus, singularia quæque capita persequens. Etenim futilissimè describit & quanta accuratione & arte coquorum cuncta appararent, quò varietas fastidium tolleret, & adulterinis saporibus gulam provocarent. Non omittit quantâ apud eos sollicitudine ova versarentur & vexarentur, quanto studio everterentur, subvertèrentur, liquarentur, durarentur, diminuerentur, & nunc quidem frixa, nunc assa, nunc farfa, nunc mixta, nunc sigillatim apponerentur, soli ut fastidio



fastidio consuleretur; unde dum oculi coloribus, palatum saporibus illiciebantur, infelix stomachus, cui nec colores lucent, nec saporres demulcent, omnia suscipere coactus, oppressus magis obruebatur quàm reficiebatur.

Potum verò eorum sic facetà gravitate carpit. Jam verò de aqua potu quid dicam, quando ne ullo quidem pacto vinum aquatum admittitur? Omnes nimirum ex quo Monachi sumus infirmos stomachos habemus, & tam necessarium Apostoli de utendo vino consilium meritò non negligimus; modico tamen, quod ille pramissit, nescio cur pratermisso. Et utinam vel solo, cum etiam purum est, contenti essemus. Pudet dicere, sed magis pudeat acclitari: & si pudet audiri, non pudeat emendari. Videas uno prandio ter vel quater semiplenum calicem reportari, quatenus diversis vinis magis odoratis quàm potatis, nec tam haustis quàm attactis, sagaci probatione & celeri agnitione unum tandem è plurimis, quod fortius sit, eligatur. Quale autem est illud quod nonnulla Monasteria ex more observare dicuntur, in magnis videlicet festis vina delibuta melle, pigmentorum respersa pulveribus. in Conventu bibere? Nunquid & hoc fieri dicimus propter infirmitatem stomachi? Hoc verò ad nihil aliud valere video, nisi ut vel amplius bibatur, vel delectabilius.

Ad alia deinde magis singularia unius singularis Ordinis laxatæ disciplinæ capita descendit. Refert enim quosdam juvenes in domum infirmorum se recipere solitos fuisse regularis abstinentiæ speciosius violandæ causâ, baculosque in manibus portasse: Planè, inquit, necessarios, ut quàm pallor in vultu maciesque

non

*non indicat, baculus sustentans mentiatur invaletudinem. Ridendas, an lugendas dixerim huiusmodi ineptias? Ubi notandum non accusari à Bernardo Monachos illos proprietatis, læsæ castitatis, vel voti obedientiæ violati; non ebrietatem exprobrat, vel crapulam; non obijcit sacramentorum profanationem, ministrorum inscitiam vel incuriam: solam curiositatem, superfluitatem, & conquistas intra sphaeram abstinentiæ à carnibus in communi refectorio jugiter servatæ delicias opponit. Et tamen zelo zelatus pro arctiori regulæ custodia sic totus ignitus erumpit: Sic Macharius vixit? Sic Basilius docuit? Sic Antonius instituit? Sic Patres in Ægypto conversati sunt? Sic denique Sancti Odo, Majolus, Odilo, Hugo, quos se sui utique Ordinis Principes & præceptores habere gloriantur, aut tenuerunt, aut teneri censuerunt? Heu me miserum, qualemcunque Monachum? Cur adhuc vivo, videre ad id devenisse Ordinem nostrum? &c.*

*Sed fortassis, inquires iterum, libenter hæc audiebantur Bernardi tempestate, in hoc proinde sæculo omnis reprehensionis etiam levissimæ & generalissimæ impatiente minimè usurpanda. Ne tu vehementer falleris qui hæc cogitas? Audi ipsummet Bernardum omnes illas delicatulorum nauseas prævidentem & occupantem: Dicam, dicam; presumptuosus dicar, sed verum dicam. Quomodo lux mundi obtenebrata est? Quomodo sal terræ infatuatum est? Quorum nobis vita via vita debuit esse, dum exemplum in suis actibus ostendunt superbia, cati facti sunt duces caecorum. Utinam hæc pauca scripserim sine scandalo. Enim verò vitia carpens, scio me offendere*



*fendere vitiosos. Potest tamen fieri volente Deo, aliquibus quas me timeo exasperasse, potius placiturum esse, sed si desinant esse vitiosi.*

Si hujusmodi apostolicarum divini viri vocum millesimam partem meo nomine usurpassem, si umbram mihi zeli illius imitandam proposuissem, nunquid perturbator, Clericorum & Religiosorum insectator, attentator à prudentia ( sic enim obloquuntur viri si Superis placet prudentissimi, sed cā prudentiā quæ vult omnibus omnia fieri; non Pauli consilio, ut omnes lucrifaciant, sed ut omnibus placeant, omnes & palpent ) desertus diris omnibus devovendus audirem.

Testis es mihi Domine Jesu, cui abscondita non sunt occulta tenebrarum, cui nuda & aperta sunt cordis arcana: testem, inquam, te appello, quem judicem pronus adoro, quia non mentior. Nosti ipse, & ita est, quantā & quā sincerā dilectione, quā profundā & cordis medullis impressā veneratione & Sacerdotes & Religiosos quosvis prosequar. Testes sunt quotquot me norunt ( norunt autem multi, quantum in hac caligine homo homini innotescere potest ) me statum Sacerdotalem penē adorare, Regularem oculis habere chariorem. Dixi, & dico: nihil Sacerdotio sanctius vel sublimius; nihil Monasterio ad regulam suam composito ad salvandas animas securius. Ego ne vel despicio, vel damno quos sic prædicavi, sic prædico, sic quandiu vixero Deo dante prædicabo? Quis unquam me adversus divinos illos status vel coram audivit disputantem, vel clam susurrantem, & non potius in laudes omne genus effusum? Quos utriusque status professores

fellores, nisi cum gaudio magno valde vidi, nisi cum honore excepi, nisi cum reverentia alloquutus, nisi cum humilitate scribendo memoravi, & pro virili magnificavi?

Enim verò scio, & certus sum bonos Religiosos ( ut de illis speciatim loquar quos reflexionibus meis offendisse me quidam pueriliter garrunt ) plebem esse illam perfectam Deo juxta Angelicum vaticinium *Luc. i.* memoratum parandam : nam præstantissimum, Deoque gratissimum illud vivendi genus meritò existimandum est, quo homines totos se Deo consecrantes, in ejusque possessionem seipsos transferentes divinis obsequiis perpetuò mancipantur; illud in terris æmulantes quo apud Deum in cælo Angeli absque ulla intermissione funguntur. *Quod faciunt Angeli in cælis*, inquit Hieronymus in Psal. 115. *hoc Monachi faciunt in terris.* Quibus certissimè persuasus libenter illud usurpaverim quod Bernardus apologiâ laudatâ de se testatur : *Non adversum Ordinem, sed pro Ordine disputare putandus ero, si non Ordinem in hominibus, sed hominum vitia reprehendo. Et quidem diligentibus Ordinem in hac re molestum me fore non timeo, quinimò gratum procul dubio accepturi sunt, si persequimur quod & ipsi oderunt. Si quibus verò displicuerit, ipsi se manifestant, quia Ordinem non diligunt, cujus utique corruptionem, id est vitia, damnari nollunt. Ipsi itaque illud Gregorianum respondeo: Melius est ut scandalum oriatur, quàm ut veritas relinquatur.* In hoc tamen à Bernardo ferè immensum differo, quod de nullo unquam speciatim Ordine loquutus sim, qui omnes & singulos totâ voluntate complector.



## CAPVT II.

*Eucharistia utilitates & fructus  
immensi perstringuntur.*

**P**Erstringuntur, inquam; infinita enim divinissimi hujus Sacramenti compendia, quibus non dicam exornandis, sed enarrandis impares sunt linguæ hominum & Angelorum, intra capitis unius angustias concludi nequaquam possunt. Facile enim veritate ipsâ coactus immensos Eucharistiæ effectus nullâ posse oratione representari quisque fatebitur, qui serio perpenderit Christum gratiarum omnium fontem plenissimum eo fine verè & realiter in Eucharistia contineri, ut ex scaturigine inexhausta divinæ gratiæ amplissima munera hauriamus. Et certè si Christus tot beneficentiæ significationes iis contulit, in quorum recta mortalis receptus est, vel qui unius vestis aut simbræ tactu distillantem medicinam percipere; quantò magis animas nostras, in quas immortalis gloriâ jam præditus ingredi non dedignatur, paratas quidem illas, & ritè compositas amplissimis charismatis ornaturum esse sine dubitatione credamus? O quàm, inquit Chrysologus serm. 34. docuit mulier quantum sit corpus Christi, qua in Christi simbria tantum esse monstravit! Audiant Christiani, qui quotidie corpus Christi attingunt, quantum de ipso corpore  
sumere

§ 74 *Lib. XI. Pars II. Dissert. III. Cap. II.*  
*sumere possunt medicinam, quando mulier totam*  
*rapuit de sola Christi simbria sanitatem. Suga-*  
*mus ergo divini sponsi ubera, non typho rur-*  
*gentia, sed lacte manantia; ubera meliora vi-*  
*no, fragrantia unguentis optimis, & præclaris*  
*opima virtutibus.*

## SPECVLATIO I.

### *Varii Eucharistiae effectus ordine* *recensentur.*

**D**ivinum hoc & salutare sacramentum ef-  
fectus suos nedum in animam, sed in  
corpus etiam dignè recipientis diffundit. Sin-  
gulos paucis referemus.

#### *Primus Eucharistiae effectus: Gratia &* *vita spiritalis augmentum.*

*Aliter tamen quàm per sacramentum Confir-*  
*mationis augetur per Eucharistiam gratia, ut*  
*docet S. Thomas quæst. 79. art. 1. ad 1. Confir-*  
*matio enim gratiam illam largitur, quâ exterio-*  
*ribus inimicorum Christi impugnationibus re-*  
*pugnemus, eorûmque hostiles conatus irritos*  
*efficiamus. Eucharistia verò gratiam auget, ut*  
*homo Christianus interiùs perfectior, spirita-*  
*lior, Deoque conjunctior evadat. Cujus diffe-*  
*rentiæ signum etiam est, quod confirmatus in*  
*fronte perungitur; at Eucharistia ad modum*  
*cibi suscepta cor usque pervadit. Principium*  
*fortitudi*

*fortitudinis est in corde, inquit S. Doctor q. 72. art. 9. ad 2. sed signum apparet in fronte: unde dicitur Ezech. 3. Ecce dedi frontem tuam durior frontibus eorum. Et ideo sacramentum Eucharistia, quo homo in seipso confirmatur, pertinet ad cor, secundum illud Psalmi 103. Panis cor hominis confirmet. Sed ad sacramentum Confirmationis requiritur signum fortitudinis ad alios, & ideo exhibetur in fronte. Hoc præmissio.*

Facile probatu est gratiæ & vitæ spiritualis augmentum ab hoc sacramento proficisci. Et quidem per hoc sacramentum conferri gratiam sanctificantem perspicuum est. Cum enim hunc effectum communem habeant omnia novæ legis sacramenta, à fortiori id de præstantissimo sacramento dicendum est, cum in eo Author Sacramentorum, fonsque omnium gratiarum contineatur, à quo velut à capite & concha ad alia sacramenta, velut tanquam ad rivulos & canales quidquid sanctitatis producere possunt derivatur. Quod verò gratiæ & sanctitatis augmentum sit proprius hujus sacramenti effectus, suadetur; quia in hoc sacramento datur nobis Christus sub speciebus panis & vini in memoriam passionis ejus: Christus autem non venit ad nos nisi ut thesauros gratiæ effundat, sicut in mundum, testante Joanne, non venit nisi ut gratia & veritas per ipsum fieret. Christus etiam per modum cibi & potus hoc in sacramento venit, eos ut nobis conferat effectus, quos terrestris cibus & potus corporibus præstat, quæ sustentat, auget, reparat, & delectat. Denique memoriale passionis & mortis Christi illud facit in homine quod

quod passio Christi fecit in mundo: passio autem Christi est universale gratiarum omnium principium. Igitur Eucharistia donorum celestium aquis scatet, quibus accedentium sanctitas perficitur, augescit, cumulat.

Signum porro hujusmodi incrementi spiritualis ex Christianarum virtutum praxi & animi in via Dei firmitate dignoscitur. Sicut enim animantium vita in motu sita est, sic nova vita virtutum operatione clarescit, quibus diligenter & strenue incumbit qui pie ac reverenter hoc sacramentum frequentat. Nam non solum in peccata lethalia continuis prolapsionibus non recidit, sed etiam, ut alicubi Bernardus docet, *fit homo mansuetior ad correctionem, patientior ad laborem, ardentior ad amorem, sagacior ad cautelam, ad obedientiam prior, ad gratiarum actionem devotior*. Interior animi profectus cognitu difficillimus est, si de illo ex sensibilibus duntaxat cordis affectibus iudicium ferendum sit. Etenim nonnulli solide pii radio & languore interdum deprimuntur, Deo pietatis ardorem & sensum illis, quò humiliores sint & cautiore, eripiente. Quare profectus ex vitæ castimonia, ex indefessa bonorum operum praxi, ex fideli divinorum mandatorum & consiliorum observantia veriùs, securiùsque discernitur. Sicut enim, ut olim apud Granatensem me legisse memini, arborem adulescere oculi non vident, etiamsi in eam defixi hæreant; adultam vident tamen, nimirum diffusam in ramos, vestitam floribus, fructibus opulentam; non absimili modo spiritualis vitæ incrementum sepe non sentimus, quæ ex fructibus eorum, ut non semel Veritas dixit, cognoscuntur.

Juxta



Juxta quam regulam ab ipso Domino constitutam inferre est, inanes, & utinam non sacrilegas eorum esse Communiones, qui semper peccati mortisque, nunquam poenitentiae & pietatis fructus edunt. Si panis, & maxime iste divinus cor hominis confirmat, signum est in illis sacrum calorem coquendo coelesti cibo necessarium extinctum esse, in quibus idem languor, infirmitas eadem perseverat, eadem concupiscentiae infausta radix de integro pululat, & vulnera sanie & tabo etiamnum manant. Itaque sola vitae integritas, morum innocentia, peccati horror, bonorum operum cultus, corruptarum mundi naniarum sincera & effectiva abjectio, arctior cum Deo conjunctio, firmum & constans Evangelicarum maximarum observandarum propositum exhibitione operis comprobatum lapis lydius est, quo profectus gratiae in Eucharistia perceptae spectari, dijudicarique potest. Quod si post accuratam, & ab Apostolo imperatam probationem pateat te christianè pieque non vivere, nec mores fidei respondere, nec suscepta in baptismo pacta sanctè servare, nec Christi Sanctorumque vestigiis insistere, profectò non augmentum, sed decrementum, sed extinctionem gratiae tuae timeo.

*Secundus Eucharistia effectus: Specialior cum Christo unio. Tertius: Unio Fidelium inter se.*

Ita post Patres docet Concilium Florentinum saepe memoratum, dum ait, *adunatio*  
*Tom. VIII.* Bb

*nem hominis ad Christum esse effectum hujus sacramenti. Sicut, inquit Cyrillus lib. 4. in Joan. cap. 17. si quis cera liquefacta aliam ceram infuderit, alteram cum altera per totam commisceat necesse est: sic qui carnem & sanguinem Domini recipit, cum ipso ita conjungitur, ut Christus in ipso, & ipse in Christo inveniatur. Etenim ut in matrimonio inter virum & uxorem tanta initur unio, ut duo esse in carne una dicantur, quia nimirum mutua est alterius conjugis in alterius corpus potestas: sic etiam quia Christus se in hoc Sacramento suscipienti dat, & Christo se vicissim recipiens tradit, magna inter utrumque intercedat unio necesse est.*

*Id tamen non ita intelligas velim, quasi physicam cum Christo unionem fideles consequantur; solus enim intervenit moralis cordium nexus & veluti transfusio, juxta illud Authoris sermonis de cœna Domini, inter Cypriani opera: Nostra & ipsius conjunctio nec miscet personas, neque unit substantias, sed affectus consociat & confœderat voluntates.*

*Nec obest si dicas hanc unionem ab eodem Cyrillo, necnon à Chrysostomo homil. 88. in Matth. & 45. in Ioannem, dici substantialem, naturalem, corporalem. Non obest, inquam; hujusmodi enim expressionibus impium Calvinistarum dogma præfocare in antecessum voluerunt, & fideles omnes docere Christum naturale & substantiale corpus nobis in Eucharistia porrigere. Itaque unionem illam vocant substantialem, corporalem, naturalem ex parte rei datæ, nimirum corporis Christi, quod substantialiter, corporaliter, & naturaliter datur; non verò eam sic appellant habitâ ratione*

tionem modi unionis quâ Christus cordibus nostris connectitur; qui non physicus, sed moralis est.

Ex unione fidelium cum Christo nexus eorum inter se liquidò consequitur. Etenim quæ sunt eadem uni tertio, unum etiam inter se omnino efficiuntur. Quare Christus in Eucharistia est veluti centrum in quod omnes boni Christiani veluti lineæ confluunt: cæmentum est ac divinum signum, quo fidelium inter se corda stringuntur: lapis est angularis, qui facit utraque unum. Unde illud tritum Apostoli: *Vnum corpus multi sumus omnes qui de uno pane, & de uno calice participamus.* Sed de his plura agentes de unitate Sacramenti Eucharistiæ speciali reflexione egimus.

In hoc ergo cognoscent omnes num Christo in Eucharistia uniamur, si dilectionem habuerimus adinvicem. Illis claritatem illam suam in mirabili Sacramento dat Christus, quam ipsi dedit Pater, qui unum charitate sunt, sicut Pater & Filius naturæ identitate. Hæc mutua dilectio christianitatis tessera est, & Christianorum fortitudo. *Domum Dei fideles non faciunt*, inquit August. serm. 9. in Annivers. Ecclesiæ, tom. 10. *nisi quando charitate compaginantur. Ligna ista, & lapides si non sibi certo ordine cohererent, nemo huc intraret. Quando vides in aliqua fabrica lapides & ligna bene sibi coherere, securus intras, ruinam non times.* Præclare Magnus Gregorius exponens illud Cant. 6. *Terribilis ut castrorum acies ordinata*, sic habet: *Scimus & constat, quia castrorum acies tunc hostibus terribilis ostenditur, quando ita fuerit constipata atque densata, ut in nullo loco*

*interrupta videatur. Nam si ita disponitur, ut locus vacuus, per quem hostis possit ingredi, dimittatur, profectò jam suis hostibus terribilis non est. Et nos ergo cum contra malignos spiritus spiritualis certaminis aciem ponimus, summopere necesse est ut per charitatem semper uniti atque constricti, nunquam interrupti per discordiam inveniamur; quia etsi qualibet bona in nobis opera fuerint, si charitas desit, per malum discordia locus aperitur in acie, unde ad feriendum hostis valeat intrare.*

Veram & realem corporis & sanguinis Christi præsentiam magis quàm sexcenta miracula confirmat & persuadet Eucharistiam frequentantium sacra concordia. Nam ut divinè scripsit Chrysostomus hom. 33. in 1. Cor. *Etsi sexcenta miracula edant, dum dissident inter se, ridiculi cæteris erunt. Quemadmodum etiamsi nullum signum edant, diligant autem sese verè, suspicendi invictique omnibus mortalibus permanebunt.* Nam & Paulum eam ob rem miramur, magis autem quàm ob mortuos suscitatos, leprasve mundatas. Stupenda vox est: *Quis infirmatur, & ego non infirmor? Quis offenditur, & ego non vror? Sexcenta narra mihi miracula; nullum huic equiparandum adduces.* Nihil tam Eucharistiæ adversum hæreticorum blasphemias detrahit, quàm malorum Catholicorum eo cibo pastorum discordia intestina.



*Quartus Eucharistia effectus : Pinguedo  
spiritus , seu victrix gratia  
delectatio.*

Ita docet D. Thomas quæst. 79. art. 1. ad 2. *Ex virtute hujus sacramenti, inquit, anima spiritualiter reficitur per hoc quod anima spiritualiter delectatur, & quodammodo inebriatur dulcedine bonitatis divinæ, secundum illud Cant. 5. Comedite amici, & bibite, & inebriamini charissimi. Hujus divini cibi suavitatis figura manna fuit, ex quo omnis saporis dulcedo percipiebatur. Hinc etiam Isaias cap. 25. in hujus cœlestis convivii commendationem prædixit: Faciet Dominus exercituum in monte hoc (scilicet Ecclesiæ) convivium pinguium, & convivium vindemia; convivium pinguium medullatorum, & vindemia defacata. Quia nimirum castæ nobis hîc exhibentur voluptates, quæ nihil nedum impuritatis, sed nec amaritudinis etiam admixtum habent, utpote quæ ex intima Christi inhabitantis præsentia, & tenerri- mo amabilissimi hospitis amplexu proficiscuntur. Hujus convivii sacras delicias, quibus spiritus saginatur, hancque spiritalem ebrietatem sic piè exponit Author sermonis de cœna Domini, apud Cyprianum: Quàm præclarus est calix iste! Quàm religiosa hujus potus ebrietas! per quam excedimus Deo, & qua retro sunt obliti, ad anteriora extendimur; non habentes sensum hujus mundi, cruci hæremus, sanguinem sugimus, & intra ipsa Redemptoris nostri vulnera figimus linguam, quo interius exteriusque ru-*

*bricasi , à sapientibus hujus sæculi judicamur  
amantes. Ut manna , sic & hic panis omne dele-  
tamentum in se habet : virtute mirifica omni-  
bus qui dignè & devotè sumunt secundùm suum  
desiderium sapit , implet , satiat edentium appe-  
titus , & omnium exsuperat dulcedinum vo-  
luptates. Esus igitur carnis hujus quadam avi-  
ditas est , & quoddam desiderium manendi in  
Christo , per quod sic imprimimus & eliquamus  
in nobis dulcedinem charitatis , ut hereat palato  
nostro & visceribus sapor dilectionis infusus , pe-  
netrans & imbuens omnes anima corporisque re-  
cessus.*

Illud porro deplorandum , tam paucos , &  
ferè nullos hujus suavissimi convivii super mel  
dulces consolationes experiri. Ne mirare ; no-  
xius humor subintravit , infecitque palatum  
cordis delectatio terrenorum. Mutavit homo  
gloriam suam in similitudinem vituli come-  
dentis fœnum , desideravit Ægyptias carnes , al-  
lia , & cucumeres : quî ergo fieri potest , ut cor-  
de sensum carnalium habente , secularibûsque  
nugis & quîsquiliis repleto , cœlestem saporem  
percipiat ? Errat omninò , inquit Bernardus  
serm 6. de Ascensione , si quis cœlestem illam  
dulcedinem huic cinerî , divinum illud balsa-  
mum huic veneno , charismata ista spiritus mis-  
ceri posse hujusmodi illecebris arbitratur. Non  
nisi post ablactationem esus panis datur infan-  
ti : non ergo homo delectabitur in divinis , quî  
se priùs à sæculi voluptatibus velut à maternis  
uberibus infans non alienaverit. Ergo huic ut  
nos castæ delectationi , quæ in Eucharistia ve-  
luti in fonte potatur , pro nostro exiguitatis  
modo præparemus , exinanire per omnia nos-  
metipsos,

metipfos, & à delectationibus miseris & caducis consolationibus evacuare studeamus. Ut cum Propheta gustemus & videamus quoniam suavis est Dominus, eodem monente vacemus & videamus, quoniam ipse est Deus: nimirum rebus divinis, negotio salutis, poenitentiae exercitationibus seriam operam navemus, anxias curas remittamus, superfluis sollicitudinibus medeamur, sumamus à mundanis occupationibus quas maledictas Bernardus appellat, otium; illas decidere, effluere, & obire sinamus: & si illis cogente necessitate ad horam distinemur, lenius ac remissius circa illas agamus, ut illis præclara animi libertate expeditis, totis in Deum studiis transeamus. Alioquin corde sicci, mente aridi, viribusque languidi sacris intererimus mysteriis: lambemus quidem petram, sed inde nec mel sugemus, nec oleum; qui nec aliqua charitatis dulcedine, nec Spiritus sancti pinguedine vegetabimur.

Itaque cum Augustino *lib. 2. confess. cap. 2.* colligamus nos à dispersione, in qua frustatim discissi sumus, dum ab uno summo bono aversi in multa evanuimus, ut recolentibus vias nostras nequissimas in amaritudine animæ nostræ dulceat dulcedo non fallax, dulcedo felix & secunda. Et tum unusquisque nostrum illud ejusdem Augustini *lib. 9. Confess. cap. 1.* Deo donante personabit: *Quàm suave mihi subito factum est carere suavitatibus nugarum! Ejiciebas eas à me vera Tu & summa suavitas; ejiciebas, & intrabas pro eis omni voluptate dulcior.* Ita comparatus manducans Eucharistiae cibum, ultra non esuriet; sic bibens præclarum calicem,



ultrà non sitiet : *Quoniam*, inquit Author sermonis de cœna Domini, inter opera Cypriani, *mysterii hujus sic sufficit gratia, sic reficit intelligentia, ut cuicumque tanta rei innotuerit plenitudo, omnis consummationis sine invento, Christi bajulus ipsum ferat in pectore, ipsum gerat in mente, & omni tempore habitatori suo laudes resonet, & gratiarum actiones decantet.*

Illud tamen circa spirituales Eucharistiæ delectationes observandum meritò est, has sacras delicias à viris etiam justis interdum non percipi; tum in pœnam alicujus peccati venialis fervorem charitatis remorantis, & internæ unctionis lucem nonnihil obscurantis: tum sine peccato, ex ordinatione divinæ providentiæ, ad majorem Sanctorum humilitatem & probationem teneriorem pietatis sensum subducentis. Quæ quidem gratia devotionis cum deest, insistendum est orationi, inquit Thomas à Kempis aureo suo de imitatione Christi opere, *lib. 4. cap. 12.* ingemiscendum, & pulsandum, nec desinendum *donec mereamur micam, aut guttam gratia salutaris accipere.* At tamen animum interim despondere suum non debet Christianus, sed ut S. Franciscus Salesius ait *Philothœa sue 4. part. c. 14.* in Dei nutu & providentiâ prorsus conquiescendum est, ut nos in istis internis desolationibus quandiu libuerit, benignissimus Pater quos amat castigaturus, exerceat. Interea bonis operibus constans opera navanda est, quæ licet sapida fortè nobis non sint, Deo tamen, cui sola sinceri cordis voluntas placet, jucundissima sunt. Et Thomas à Kempis libro laudato, cap. 15. *Oportet te devotionis*



devotionis gratiam instanter querere, desideranter petere, patienter & fiducialiter expectare, gratanter recipere, humiliter conservare, studiose cum ea operari, ac Deo terminum & modum superna visitationis, donec veniat, committere. Humiliare precipue te debes, cum parum aut nihil devotionis interius sentis; sed non nimium deijci, nec inordinate contristari. Dat saepe Deus in uno brevi momento, quod longo negavit tempore. Dat quandoque in fine, quod in principio orationis distulit dare. Si semper cito gratia daretur, & pro voto adesset, non esset infirmo homini bene portabilis. Propterea in bona spe & humili patientia expectanda est devotionis gratia. Quisquis ergo intentionem suam simplici corde sursum ad Deum levaverit, seque ab omni inordinato amore, seu displicentia cujuslibet rei creata evacuaverit, aptissimus gratia percipienda, ac dignus devotionis munere erit. Dat enim Dominus ibi benedictionem suam, ubi vasa vacua invenerit: & quando perfectius infimis quis renuntiat, & magis sibi ipsis per contemptum sui moritur, tanto gratia celerius venit, copiosius intrat, & altius liberum cor elevat.

**Quintus Eucharistia effectus: Spiritalis vigor, quo tentationibus obsistimus, & à peccati mortiferi veneno preservamur.**

Ita docet D. Thomas art. 6. & sacra etiam Tridentina Synodus sess. 13. cap. 2. ubi hoc sacramentum appellat Antidotum quo liberamur

*à culpis quotidianis, & à peccatis præservamur.* Et ideo animi in bono perseverantis firmitas ab hoc potissimum Sacramento derivatur. Hac de causa ægrotantibus in fortitudine cibi illius iter æternitatis confecturis per modum viatici ministratur. Ob eandem etiam rationem S. Cypriano auctore *lib. 1. epist. 2.* Fidelibus ad tormenta & cædem raptis, ne in certamine deficerent, Eucharistia porrigebatur, ut munimento dominicæ saturitatis armati, foris pugnas, in-  
tus timores superarent. De quibus non longè antè multa diximus.

Porro à peccatis futuris præservat divini huius cibi perceptio, tum interiorum virium per gratiam & virtutes, infusas incremento, tum auxiliorum actualium pro necessitate habendorum jure collato, tum exterioris cacodæmonis impetus cohibitione: non enim tantâ vi & audaciâ ad eum humani generis hostis accedit, quem videt tantæ Majestatis præsentiam ful-  
tum, & memoriali Dominicæ Passionis, quâ devicta sunt tartara, communitum. Unde Chrysostomus *hom. 35. in Ioan.* Fideles dignè hocce Sacramentum usurpantes leonibus flammam spirantibus comparat, eosque Diabolo terribiles effectos esse pronuntiat.

Quæ cum ita sint, absque negotio inferet pius Lector, suspectas omninò esse eorum Communiones, qui in peccata mortalia creberrimè prolabentes, sanctissimis, tamen tremendisque Altaribus sine ulla formidine sese inferunt, in eadem innox flagitia recisuri. Si vigor à peccatis præservans sit Eucharistiæ effectus, nec absint effectus nisi obex interponatur, quid de illis celsere licet, qui eo animi languore debilitatèque laborant, ut

ne octo quidem dies ab iisdem peccatis sibi temperare valeant? Grandis dubio procul, & longè periculosissima illa ægritudo est, quam talis tantusque cibus tam sæpe perceptus non persanat, & nec collapsas vires restituit tantæ virtutis alimonia ori tuo frequenter ingesta.

Scio equidem hominis viatoris statum & conditionem mutabilem illam atque in bonum malumque liberi arbitrii infirmitate flexibilem, nunquam eam immobilitatem, quæ paucis in gratia confirmatis eximia est, obtinere: attamen homines hoc cibo fortium pastos easdem semper & interdum graviores ægritudines experiri, nunquam convalescere, nunquam laqueos infirmitatis evadere, cum hujus Sacramenti effectû à Sanctis omnibus tradito quàm bellè consentiat, non video, non capio, non reor. Sacramenta sunt causæ physicae, naturaliter suinde, nisi objectaculum intercedat, operantes: ergo si mens tua vanis formis imaginibusque corporeis vitiorum & cupiditatum consuetudine inculcatis ita obducitur atque obruitur, ut nihil jam in ipsa loci divinarum rerum cogitationi relinquatur; si pectus tuum in terrenis usque adeò demersum atque defixum sit, ut paululum modò in cælum animum attollere, & in Deum cœli erigere non valeas; si tanta denique sit inertia tua, ut nec calamitatis sensum experiare, nec remedium illis aliquod adhibere sollicitus sis, nonne argumento est satis claro, te tot fœdis cupiditatibus miserandum in modum irretitum, in iisdemque semper delictorum sordibus hærentem, nondum hujus Sacramenti effectû frui, nondum te in Christo, Christum in te manere, sed munda



di, carnis, dæmonisque mancipium permanere. Ad ignem accedere, & semper algere, cœlestem fontem potare, & carnalia semper sitire; in Christi (qui vera lux mundi est, ignisque consumens Deus noster, nec est qui se abscondat à calore ejus, nisi voluntarii frigoris glaciem opponat) in Christi, inquam, complexus irruere, & à pietatis sensu, fervore charitatis, Dei studio, rerum cœlestium curâ & cogitatione alienissimum se sentire, cum Sanctorum doctrina de animo expurgando atque ad Eucharistiam excolendo, necnon de robore panis cœlestis quomodo convenire possit, nullus, nisi meus me fallit animus, bonus Christianus intelliget.

*Sextus Eucharistia effectus : Venialium remissio peccatorum.*

Ita docet S. Thomas *art. 4.* ubi tradit peccata venialia dupliciter hoc Sacramento remitti. Primò quia hoc Sacramentum per modum cibi nutrientis accipitur, juxta illud Joan. 6. *Caro mea verè est cibus, & sanguis meus verè est potus*: illud etiam Tridentini *sess. 13. cap. 2.* Salvator noster sumi voluit hoc Sacramentum, *tamquam spirituales animarum cibum, quo alantur & confortentur viventes vitâ illius qui dixit: Qui manducat me, & ipse vivet propter me.* Unde sicut quod innati caloris vi quotidie detrahatur ac deperit, paulatim alimento reficitur & sarcitur; ita quidquid anima cupiditatis ardore quotidie per leves offensas amittit, totum pius Eucharistiæ usus restaurat. Secundò  
quia



quā peccatis venialibus fervor charitatis imminuitur, qui cū hoc vitali cibo mirum in modum excitetur & flammescat, eo remitti delerique peccata venialia non est quod dubitari debeat. Unde meritō à Beato Ambrosio *lib. 5. de sacram. cap. 4.* dictum est: *Isle panis quotidiana sumitur in remedium quotidiana infirmitatis.*

Nec valet si dicas hanc duplicem rationem in eandem tandem coincidere: cū enim peccatum veniale privet fervore charitatis, sicut privatio non nisi per formam quam removet tollitur, ita peccata venialia uno charitatis fervore remittuntur; ac proinde non ex opere operato, sed ex opere duntaxat operantis peccata venialia condonabuntur.

Non valet, inquam: tum quia cū divina Eucharistia jus habendorum auxiliorum, quibus inflammetur charitas, subindeque peccata leviora deleantur, ex opere operato imperiat, consequenter peccata venialia ex opere operato sufficienter abstergere censenda est. Tum quia gratia sacramentalis quā talis modum aliquem specialem importat, ut in materia de Sacramentis in communi probabilius esse monstravimus, quō maculas veniales remanentes abstergi non est inconveniens. Etenim peccatum habituale veniale prāter privationem fervoris actus charitatis quam includit, quamdam etiam immundiciem & maculam invehit, quam gratiā Eucharisticā deleri congruum est, nisi affectum hominis circa illa venialia inveniat occupatum.

Tum denique, quia duplex est venialium nozarum genus; aliā enim ex deliberatā proposito,

posito voluntatis proficiscuntur, nec nisi ob-  
 materiæ parvitatem leves sunt, sicut menda-  
 cium merè officiosum, & furtum unius pomi:  
 alia non de industria & animo deliberato, sed  
 per incogitantiam irrepunt; ideo enim multis  
 latentis concupiscentiæ laqueis & insidiis irre-  
 timur, ut sæpe nobis plus iusto indulgentes  
 peccemus, nec peccare nos advertamus tamen:  
 quin etiam ( quæ magna infirmitas nostra est,  
 & Sanctis flendi copiosa seges ) dum bona age-  
 re opinamur, in occulta interdum delicta inci-  
 dimus; dumque nihil aliud nisi pietatem nobis  
 videmur habere propositam, tunc vel igno-  
 rantia vincibili, vel nimio irrepentis amoris  
 proprii studio peccamus. *Sæpe enim, ut ex Ma-*  
*gno Gregorio. sæpe in hoc Opere diximus, nec*  
*iterari tam præclarum documentum piger, sibi?*  
*de se mens ipsa mentitur, & fingit se de bono*  
*opere amare quod non amat, de mundi autem*  
*gloria non amare quod amat. Fit ut aliud in-*  
*imis intentio supprimat, & aliud tractantis*  
*animo superficies cogitationis ostendat. Ita 1. part.*  
*Past. cap. 9. Quod & aliis variis locis alibi me-*  
*moratis Pontifex sanctissimus repetit. Primi*  
*ordinis peccata sine actualis pœnitentiæ à fer-*  
*vore dilectionis profectæ motu nunquam re-*  
*mittuntur, quia privatio actus non nisi per*  
*actum quem removet, unquam removetur. Ac*  
*posterioris generis delicta beneficio gratiæ*  
*Eucharisticæ ex opere merè operato remitti*  
*probabilissimè remur, ut sacro illo cibo quod*  
*cupiditatis occultis insidiis perdimus restaure-*  
*mus. Vnde advertenter, & juxta sapienter Ca-*  
*techismus Romanus part. 2. tit. de Eucharist.*  
*n. 53. postquam dixit, Eucharistiæ devoto usa*

restitui quidquid ardore cupiditatis ad leves  
offensas pertrahentis amisimus, subdit: *Verum  
hec de iis peccatis intelligenda sunt, quorum  
sensu & delectatione animus non permove-*  
*tur.*

Ex his liquere puto, parum illos ex Eucha-  
ristia proficere, qui peccata venialia pro nihilo  
ducunt, nihilque ab illis metuentes, nihilque ab  
iis cavendis laborantes, ea non minori quàm  
laudatissima quæque opera, facilitate & confi-  
dentiâ suscipiunt. Etenim peccata illa simul vo-  
luntariè congregata, velut scabies animæ decus  
exterminantia, à cœlestis Sponsi castissimis am-  
plexibus cùm separent, divinæ Eucharistiæ  
fluentis intercedunt, dum in ea non incauti tan-  
tùm & imprudentes, sed volentes etiam &  
scientes incurrimus. In aliquot venialia peccata  
incidere humanum est & quotidianum: at affe-  
ctum erga illa retinere, illaque piis operibus  
redimere non curare, magno est Eucharistiæ  
fructibus impedimento. *Verè dico vobis, Fratres  
charissimi, ait S. August. serm. 244. quia non hoc  
de nobis Deus meretur, ut in nobis imago ipsius  
per malas concupiscentias injuriam patiatur. Et  
cùm nullus homo velit cum tunica sordibus ple-  
na ad Ecclesiam convenire, nescio quâ conscien-  
tiâ, cùm anima per luxuriam sit inquinata, præ-  
sumit ad altare accedere.* Non loquitur autem  
August. de luxuria lethali, sed veniali, in quam  
incidunt qui matrimonio intemperanter ac ex-  
tra liberorum procreandorum fines utuntur;  
sic enim habet: *Sed dicis, peccatum quidem est,  
sed tamen parvum est. Nec nos dicimus, quia  
capitale peccatum est. Sed tamen si frequentius  
exerceatur, & jejuniis vel elemosynis non redi-*  
*matur,*

matur, nimis immundam facit animam. Noli despiciere peccata tua, quia parva sunt. Nam & pluviarum gutta sunt, sed flumina implent, & moles trahunt, & arbores cum suis radicibus tollunt. Tu qui dicis, quia parvum peccatum est, velim scire quoties tale peccatum admittis, si tot parvulas plagas in corpore, & tot maculas aut scissuras in vestibus tuis fieri velis? Cum ergo in corpore tuo plagas, nec in veste tua scissuras vel maculas fieri acquiescis, quâ conscientiam tot facere in anima tua non metuis? Ac sic quicumque hoc fecerit, plus amat vestem ac carnem suam, quàm animam. Sed de his copiosius dissertatione sequenti.

*Septimus Eucharistiae effectus: Remissio poena vel penitus, vel partim, pro modo & ratione fervoris susipientis condonata.*

Explicatur & probatur doctrinâ S. Thomæ art. 5. quæst. 79. Eucharistia considerari potest vel prout sacrificium est, vel tanquam sacramentum: utroque autem modo ad remissionem poenæ conferre potest. Quà sacrificium quidem, nam si propitiatoriis veteris legis hostiis homo remissionem poenæ olim impetrabat, multò magis hoc unigeniti Filii Dei infiniti pretii sacrificio veniam culparum & poenarum eis debitarum indulgentiam consequi valeamus: sed de his, ne omnia susdeque misceamus, dissertatione quinta operosior sermo habendus est. Eucharistia etiam quâ sacramentum est ad poenæ remissionem conducit. Etenim licet Sa-  
cramentum



eramentum hoc ad animam spiritualiter nutriendam directè sit institutum, quia ut rectè D. Thomas, & Pontifex in Clementina unica de reliquiis & veneratione Sanctorum dixerunt, in Eucharistia anima spiritualiter delectatur, & quodammodo inebriatur dulcedine bonitatis Dei: in quo ipsa Dei dulcedo in ipso fonte degustatur. *Hic est cibus, qui plenè reficit, verè nutrit, simulque impinguat, non corpus, sed cor; non carnem, sed animam; non ventrem, sed mentem.* Attamen quia proprius & caracteristicus hujus Sacramenti effectus est augmentum charitatis, ex cuius fervore, inquit D. Thomas laudatus, aliquis consequitur remissionem non solum culpa, sed etiam pœna; inde est quod ex consequenti per quandam concomitantiam ad principalem effectum homo consequitur remissionem pœna, non quidem totius, sed secundum modum suae devotionis & fervoris.

Accedit, nunquam reatum culpæ tolli, nisi reatus pœnæ sin ex toto, certè ex parte tollatur. At per Eucharistiam peccata venialia quoad culpam remittuntur, & aliquando, per accidens tamen, mortalia, ut postea dicemus. Ergo reatus pœnæ per Eucharistiam deletur. Denique eatenus Eucharistia pœnam remittere dici meritò potest, quia omnes omnium pœnitentiæ laborum, omniumque virtutum fructus & effectus cumulare & absolvere, solius Eucharistia est.

Sed advertere hîc operæpretium est, beneficio Eucharistiæ quâ sacrificiî & quâ sacramenti pœnas peccato debitas remittentis non propterea pœnitentiæ necessitatem excludi. Nulla est enim indulgentia sive à Christo, sive ab Ec-

clesia

clesia vice Christi collata, quæ agendæ pœnitentiæ omnibus peccatoribus indictum præceptum evacuet. Verum non est vero contrarium, sed facillimè à veritatis amantibus conciliantur. Culpas & pœnas delent Sacramenta, delent Ecclesiæ Pastores traditis sibi divinitus clavibus Regni cœlorum. Verumtamen ille ipse qui dixit, *Quorum remiseritis peccata, remittuntur eis*; & iterum, *Quacumque alligaveritis super terram, erunt ligata & in cœlis*: non minori veritate dixit, *Nisi pœnitentiam egeritis, omnes simul peribitis*. Magna est, & juxtâ salutaris Sacramentorum, magna Indulgentiarum vis: sed peræquè magna est pœnitendi necessitas iis qui Baptismi sanctitate violatâ, sanguinem Christi conculcare, & spiritum Sanctum contristare non formidaverunt. Exigit enim divinæ justitiæ ratio, inquit Patrum omnium & Veritatis ipsius vestigiis inhærens sacrosancta Tridentina Synodus *sess. 14. cap. 2. & 8.* ut ad vitæ novitatem & integritatem *sine magnis nostris fletibus & laboribus nequaquam pervenire possimus*, ut meritiò Pœnitentia laboriosus quidam Baptismus à Sanctis Patribus dicta fuerit.

Novatorum Sacramenta augustissima, & Ecclesiæ Claves efficacissimas impiè irridentium audaciam anathematis infinitis justissimè percellit omnis Catholicus; sed eorundem perversissimam facilitatem non minùs coarguit, quâ peccata post Baptismum commissa absque operosiore & laboriosiore pœnitentia deleri, certissima Scripturarum & sacratæ Traditionis præcula evertentes affirmant. Sed de his uti opportunius, ita fusiùs tractatu sequenti de

Pœnitentia , Deo benè vertente , differemus.

*Octavus Eucharistia effectus : Cordis castimonia in appetitum diffusa.*

Non sistant intra animam uberes Eucharistia utilitates ; in appetitum etiam , corpûsque dimanant. In appetitum quidem redundat passionum moderatio : Christo namque obumbrante , & castitatis rorem instillante , *spiritalè refrigerium percipit vir Christianus* , inquit Angelicus Doctor *opuscul. 58. cap. 21.* illud usurpans Ozeæ 14. *Ego quasi ros , & Israel germinabit quasi lilium* , quod est hieroglyphicum castitatis. Et in præsentî , art. 6. ad 3. *Licet hoc sacramentum non directè ordinetur ad diminutionem fomitis , diminuit tamen fomitem ex quadam consequentia , in quantum auget charitatem ; quia sicut Augustinus dicit in libro 88. questionum , augmentum charitatis est diminutio cupiditatis.*

Ferunt Naturalistæ , in herba quam vocant Agnum Castum recumbentes castos evadere & pudicos. Agnus verè Castus Christus est : quidni ergo dum super nos recumbit , sævienti membrorum nostrorum legem sedabit , vitiorum incentiva reprimet , animi æstus refrænatos exstinguet ? Dominabitur planè in medio inimicorum suorum ; & hoc erit præsentis Christi virtutis insigne , hoc trophæum singularis triumphî , ut prædæ suæ prædo ipse , ipsis captivis suis ipse captivus , vinctis quondam suis vinctus ipse Diabolus nunc tradatur. Si tentationis procella urget , ingruitque tempestas , adest beneficio Eucharistia in mœnore solatium,

solatium, in periculo remedium; adest intrinsecus debellans, victorque passionum, quæ tametsi pulsent, tentent, provocent, concident tamen ad nostram gloriam triumphorum. Nobis enim cupit vincere in Eucharistia nobiscum convivens Christus, qui in terris dum viveret pro nobis dignatus est militare. Hinc pax illa quæ exsuperat omnem sensum proficiscitur, quia appetitus rationi, ratio Deo mirâ ordinis tranquillitate jugiter famulantur. Quantum ergo desiderabile est nomen pacis, tantum amabile est Altaris Dominici cœleste convivium. Et quid dignum possumus de pace proloqui? Pax nomen est ipsius Christi; sicut enim Apostolus *Ephes. 2.* dixit: *Ipse est pax nostra qui fecit utraque unum.* Quia ut præclare dixit Chrysologus serm. 53. *Plantare pacem radicatus est Dei, evellere penitus inimici.* Neque enim æstus corporis voluntariè sentit, quem divinæ protegit umbra virtutis; nec fallaces libidinum voluptates inquit, qui se septum superni splendoris circumspicit velamento. Et quomodo regnaret in corpore nostro mortale peccatum, quod sibi in reclinatorium & thronum Rex noster elegit?

Itaque Divinæ Eucharistiæ umbraculo & ancili tecti & protecti, internarum impetus conflictusque passionum ne timeamus. Sanè sicut majorem mundum non inficit, sed decorat elementorum inter se pugnantium concors discordia; ita minorem mundum hominem, rerum omnium compendium & epilogum non deprimit, sed beneficio cibi vitalis attollit quotidiana passionum lucta, quæ intrepidi magnitudinem animi dum exercet, opportunitatem



tem victoriæ, locum suppeditat triumpho.

Ethicam appellarunt nonnulli animi agriculturam; eam alii officinæ ferrariæ compararunt, appositissimè illi quidem. Quemadmodum enim agros sponte suâ spinarum & tribulorum feraces non ornat modò & mundat, sed fructibus ditat & beat agricultura; sic virtus gratiâ cœlesti adjuta, & Eucharistiæ robore munita hominem naturâ rudem, concupiscentiâ brutescentem, vitiis non paucis squalidum & horrentem informat, polit, instruit, adornat, & solidorum bonorum beatissimâ copiâ cumulat. Rursus sicut inter malleorum ictus, flammæ crepitus & fumos, folium flatus importunos, & repetitas incudis tunsiones & pressuras elaborantur artefacta ad speciem pulchra, ad miraculum concinna, ad humanos usus perutilia; sic eximium virtutis operæpretium ex passionum conflictu enascitur, non secus ac ex nimborum, pluviarum, grandinum, nivium, fulminum, fulgurumve strepitu fructus & plantæ pullulant, adolescunt, maturescunt. Affligitur, fateor, in hoc certamine appetitus: sed sicut arbor frugifera luxuriantium ramorum amputatione castigatur, ut ornatiùs vestiatur, nihilque illi nisi in salutem deperit, abscissis palmitibus redeuntibus cum usura; ita impetus illi animi, quos passiones nominamus, quive opprobria hominis sunt, fiunt instrumenta salutis, quibus dum homo pœnaliter læditur, salubriter exercetur, atque utiliter eruditur. *Nisi præcesserit pugna, inquit Cyprianus de mortalit. non potest esse victoria. Delicata jactatio est cum periculum non est.*

Principia entis naturalis contraria esse Philosophi

sophi omnes veritate coacti posuerunt, ut ex continua rerum lite perpetuus generationum reditus, & perennis rerum genitarum circulatio non deficerent. Hinc teste quodam antiquo, mundus est sibi ipsi morbus & medela; infirmus unà & medicus; sibi simul sepulchrum & incubulum; quia cum corruptio unius sit generatio alterius, ex ruinis & cineribus suis, succedente per varios status transitu, quæ perierant rediviva restaurantur. Unde Tertulliano observante, natura fit *de fraudatrice servatrix*, intercipiens ut reddat, perdens ut custodiat, vitians, ut integret, uberiora & cultiora restituens quàm exterminavit. Ita non absimili modo ex multiplici cupiditatum prælio, studiorumque conflictu dum quatitur animus, virtutum radices penitiùs defiguntur.

Verùm non tam labori tuo quàm Christi virtuti & Eucharistiæ influxibus asserenda victoria est. Solo frumento electorum & vino Virgines germinante (sic à Zacharia *cap. 9.* appellatur Eucharistia) conciliatur interiori homini pax, appetitus quàmlibet indomitus ad obsequium voluntatis adigitur, concupiscentia contumax ad officium nedum compellitur, sed effusis cœlestium charismatum suavitatibus mollita & victa ad subeundas Dei & principantis rationis leges sponte sua concedit, quibus antè fuerat refractaria. Quàm felix sub Christo duce pugna, tam fortunatæ victoriæ parens! Si quis *vestrùm*, inquit Bernardus *serm. in cœna Domini*, non tam saepe modo, nec tam acerbos sentit iracundia motus, invidia, luxuria, aut ceterorum hujusmodi, gratias agat corpori & sanguini Domini, quoniam virtus sacramenti

operatur

*operatur in eo. Victoriā tibi si ascribas, eo jam ipso prosterneſ visus, factus mancipium superbiæ, dum tibi crassiorum vitiorum vindicas laudem. Si vis vincere, ait Augustinus, illi assigna victoriæ gloriā, qui tibi donat ut victoriā referas palmam.*

Collige ex his quā suspectæ eorum Communiones sint, in quibus passionēs semper indomitæ, semper effrænatae vigent. Cœlestis epuli delicias quomodo saperet corruptus eorum appetitus, qui voluptatibus corporis male dulcibus inhians, & porcorum manducat siliquas, & dæmones pascit, qui semper corporum vitiis saginantur, & sordibus. Christi corpus immaculatum ore realiter suscipientes, illud in cor putridum & conscientiam ingerunt cauteriatam. Laxant fræna corpori, ut per indulgentiam caro laxata in Dæmonis incurrat servitutem. Quin qui in Christum realiter præsentem charitate debuerant transformari, in Diabolum immunditiâ convertuntur. Nam ut veridicè Chrysologus *serm. 5.* scripsit: *Sicut Domino qui se jungit, unus spiritus est; ita qui se jungit Diabolo, est Dæmon unus.* O rem lacrymis dignam inenarrabilibus! *Mulier olim de vulnere medicinam tulit; nobis medicina retorquetur in vulnus,* inquit idem Pater *serm. 34.* *Hinc est quod Apostolus ait, Dormiunt multi. Dormientes mortuos dicit, quos luget in corpore jam sepultos.* Sepultos planè, qui ingluvie ventris, otii, soporisque resolutione jacent & languescunt. Hujusmodi non tam hominibus quā pecudibus in eadem semper luxuriæ flagitia recurrentibus nihil prodest panis Angelicus; cū in ventrem adversis humoribus occupatum



cupatum ingestus corporeus cibus plus lædat quam juvet, magisque noceat quam proficiat. Sol lippientibus oculis non lucem tribuit, sed tenebras. Vinum vires febrientium non reparat, sed tenervat: sic criminosis perniciosum est sine fide, charitate, & castitate, fidei, charitatis, & castimonie Sacramentum.

*Nonus Eucharistiae effectus: Semen immortalitatis & beatæ resurrectionis in corpus derivatum.*

Operatur in corpus nostrum divina Eucharistia duobus modis. Primò quidem per quandam veluti refusionem & redundantiam voluntatis, & moderati appetitus in ipsum. Sicut enim externus corporis habitus bonorum usu ciborum pulchrescit atque florescit; sic auctis voluntatis per Eucharistiam virtutibus, domitisque passionibus appetitûs, externa hominis cœlesti cibo pasti conversatio fit magis composita, suavior, & bono virtutum odore fragrantissima. Quia per Eucharistiam, Patribus authoribus, Christus fit nobis *concorporeus & consanguineus*; impleturque illud Apostoli vœtum: *Filioli quos iterum parturio donec formetur in vobis Christus*. Hinc in externis Christiani actibus Christi modestia & gestuum compositio relucet, & veluti in speculo visendam se præbet. Hinc in incessu gravitas, in vestitu simplicitas, in vultu verecundia, in verbis castimonia, in operibus gratia, in manibus misericordia, in agendis prudentia, in toto denique homine forma virtutis certatim collucent,



cent, ut corporis species simulachrum sit mentis, figuraque probitatis.

Secundò, sed occultiori modo diffundit in corpus nostrum cœlestis hic cibus arcanam vim longè divinissimam, semen nimirum gloriosæ resurrectionis. Hunc Eucharistiæ effectum significat Salvator Joan. 6. *Qui manducat meam carnem, & bibit meum sanguinem, habet vitam æternam, & ego resuscitabo eum in novissimo die.* Quæ verba ponderans Cyrillus Alexandrinus lib. 4. in Ioan. cap. 2. in versum 55. sic habet: *Fieri prorsus nequit, ut qui secundum naturam vita est, corruptionem non superet ac vincat mortem. Proinde licet mors, qua per pravaricationem nos invasit, humanum corpus corruptionis necessitati subjiciat; tamen quia Christus per suam ipsius carnem in nobis est, omnino resurgemus. Incredibile enim est, imò verò impossibile (de potentia saltem ordinaria solito divinæ sapientiæ & bonitatis agendi modo consentanea) ut vita eos in quibus fuerit non vivificet. Quemadmodum enim scintillam multis paleis inserimus, ut semen ignis servemus: sic etiam Dominus noster Iesus Christus per carnem suam in nobis vitam integit, ac veluti quoddam semen immortalitatis inserit, quod totam qua in nobis est corruptionem abolet.* Quibus, verbis nihil planius vel expressius.

Idem docet Sanctus Petrus Chrysologus. Postquam enim sermone 59. dixit ex corpore Christi semen immortalitatis & resurrectionis proficisci, his verbis: *Crucifixus est, ut quia per lignum mors venerat, rediret vita per lignum: & sepultus, ut officia*

tota mortis impleveret, ut mors morte moreretur, ut ex illius semine corporis omnis humanorum corporum satio vitalem surgeret & levaretur in messem. Deinde serm. 95. divinæ Eucharistiæ beatæ effectum immortalitatis ascribit, dicens: Rogavit Dominum quidam Phariseus ut manducaret cum illo. Phariseus, fratres, Catholicus dicitur Iudaorum; nam & resurrectionem credit, & à Sadducæo resurrectionem negante discedit. Hinc est quod rogat Christum, id est resurrectionis authorem, ut manducet cum illo; quia qui convivit Christo, mori nescit, utique vivit semper. Rogas, Pharisee, ut manduces cum illo. Crede, esto Christianus, & manducas ex illo. Ego sum, inquit, panis qui de cœlo descendi. Semper Deus majora tribuit quàm rogatur: nam se manducandum dedit, qui rogabatur ut manducandi secum fiduciam largiretur: & tamen sic hoc dedit, ut illud quod postulatus est non negaret. Immortalitas ergo in eum qui convivit Christo per Eucharistiam porrecto derivatur.

Dices: Non impedit Eucharistiæ usus, quo minus eo cibo pasti moriantur: Ergo immortalitas non est Eucharistiæ effectus.

Respondeo hanc objectionem à Beato fuisse Cyrillo loco laudato occupatam. Discant, inquit capite 2. ab initio, si velint corruptionis immunes esse, & ipsam ex prævaricatione ingruentem mortem exuere, necessariò accedendum esse ad participationem ejus qui vivificare potest, & qui corruptionem delet, & mortem destruit. Proprium enim istud revera & convenientissi-

num vita secundum naturam opus est. :: Qui panem in se vita suscipiunt, premium immortalitatis habebunt, & corruptionis ceterorumque malorum expertes ad perpetuum & aeternum illud Christiana vita spatium ascendent. Nec obstat quod iis qui facti sunt Christi participes, necessario mors degustanda sit; nam licet humanitus eis mors accadat, tamen ut Paulus (Rom. 6.) ait, vivunt Deo victuri. Moriuntur ergo etiam Eucharistici usurpantes in pœnam peccati originalis à vetere Adam propagati, sed virtute secundi & cœlestis Adam in corpora nostra per Eucharistiam inseminata resurgent.

Instabis: Etiam infideles Eucharistiæ sacro cibo nunquam pasti, & mali Christiani corpus Christi indignè sumentes, iudiciumque sibi manducantes aliquando rerum resurgent. Ergo resurrectio non est specialis Eucharistiæ, ejusdemque boni usus effectus.

Respondeo hanc ipsam etiam instantiam S. Cyrillum lib. 3. cap. 6. præoccupasse: Cum Christus, inquit, ex vivo Patre genitus sit, ipse quoque naturâ suâ vita est. Et quoniam vita secundum naturam suam officium est vivificare, Christus omnia vivificat. Ut enim panis terrenus imbecillitatem carnis nostra sustentans, eam corrumpi non sinit, ita & ipse per Spiritus sancti operationem spiritum nostrum vivificat: neque hoc tantum, sed & ipsum corpus in incorruptionem conservat. Sed dicet forsan aliquis, addit lib. 4. cap. 2. resurrectionem mortuorum mentis oculo attentè considerans: Enim verò qui fidem in Christum non susceperunt, nec facti sunt ejus participes, resurrectionis tempore non revivificent? Quid ergo? Nonne omnis creatura qua-



*cumque in mortem lapsa est, revocabitur ad vitam? Ita sanè, resurget omnis caro. Suscitatum enim iri mortuos Propheta prænuntiat. Ad omnem quippe humanitatem illud per resurrectionem Christi mysterium pertinere statuimus, & in ipso ac primo nostram omnem naturam corruptione liberatam esse credimus. Omnes enim resurgent juxta similitudinem ejus qui propter nos excitatus est, & qui omnes sicuti erat homo in seipso continet. Et quemadmodum in primo Adamo inclusi sumus in mortem; sic in eo rursus, qui primogenitus est propter nos, à mortuis cuncti resurgent. Sed qui bona quidem egerint, in resurrectionem vitæ, ut scriptum est (Joan. 5.) qui verò mala egerint, in resurrectionem judicii. Resurgere verò ad pœnam, & ad sola supplicia excitari, morte ipsâ longè acerbius esse judico. Non ergo qualiscumque resurrectio, sed sola beata & gloriosa divinæ Eucharistiæ fructus est salutaris. Quod & alii plerique Patres docent, qui idcirco Eucharistiam *Pharmacum immortalitatis, præservativum corruptionis, eternitatis alimoniam* appellant. Resurrectio autem damnatorum ad pœnam eorum instituta, & ad æternam mortem subeundam divinitus constituta, ab hoc Sacramento aliena est.*

Urgebis: Arcana illa vis in corpora Sanctorum ab Eucharistia derivata, vel est moralis duntaxat, vel physica etiam & realis: si moralis, nihil eximium asserimus Eucharistiæ; omnia enim novæ legis Sacramenta cum sint causæ gratiæ, & consequenter gloriæ, jus morale rectè ea susipientibus conferunt ad resurrectionem suo tempore & beatitudinem animæ sequenturam. Non potest verò dici, quod sit  
 physica;



physica; quomodo enim in tam multis corporum in hac sæculi glorificandorum transmutationibus quotidie contingentibus subsistere potest virtus illa divinitus impressa, quæ de subiecto in subiectum transire, nequaquam potest? Ergo resurrectio corporum non potest speciali titulo participationi corporis Christi ascribi.

Respondeo sanctorum Patrum testimonia recitata causalitate morali aliquid amplius indicare. Cùm enim vivificæ Christi carni hoc ipso quod divinitate uncta est, & vitæ per essentiam unita, aliquid speciale asserant, ab eaque semen & germen vitæ immortalis in corpora Sanctorum indi, inseri, & veluti integri attestentur, idque illustrent exemplis scintillæ ignis post incendium remanentis, quæ sub paleis cineribusque fovetur; seminis agris commissi, panis vigorem corpori impertientis; probabilius, & Patrum dictis conformius, & dignitati tanti Sacramenti consonantius videtur, ex carne Christi nobis per Eucharistiam unitâ vim quandam & supernaturalem qualitatem in corpora nostra manare, quæ ad beatam & gloriosam corporis resurrectionem efficiendam evehetur, vel in ipsa resurrectione quodantenus explicabitur, sicut granum frumenti in terra aliquandiu latens erigitur deinde, atque in uberiores fructus assurgit. Sanè si ab Angeli vice Dei loquentis conspectu tantam lucem Moyse derivavit, ut Apostolo testante 2. Cor. 3. *non possent intendere filii Israel in faciem Moysi propter gloriam vultus ejus*; quidni à divina Eucharistia, quam *fontem lucis, & arcam luminum*, duo clarissimi ejusdem Civitatis Archiepiscopi Chrysostomus & Germanus appella-

runt, splendoris radii effluent, qui in hac quidem mortali vita latent, sed in futura aperientur, hiabunt, dehiscunt, diffundentur? Valet enim argumentatio Apostoli: *Si ministratio mentis litteris deformata in lapidibus fuit in gloria propter gloriam vultus ejus quæ evacuatur; quomodo non magis ministratio spiritus erit in gloria? Si enim quod evacuatur, per gloriam est; multò magis quod manet, in gloria est.*

Ratio verò hujus nostræ sententiæ ex dictis de Sacramentis in communi liquidò consequitur. Si enim sacramenta novæ legis, & potissimè Sacramentorum præstantissimum Eucharistia gratiam aliosque supernaturales effectus physicè ad modum instrumenti producant; & cæteroquin Patrum unanimi consensione constet corporum immortalitatem, & beatam resurrectionem vivificæ Christi carnis in Eucharistia porrectæ effectum esse; planè satis, apertaqué consequutione colligitur, Sacramentum hoc corporum resurrectionem & gloriam physicè & realiter operari, non quidem per suam entitatem, quæ in resurrectione ampliùs non erit; Sacramenta autem quæ non sunt, physicè agere nequaquam possunt: sed per diffusam à se vim vel qualitatem, quæ sit vitæ immortalis germen, & futuræ resurrectionis divinitus inditum semen, suo tempore, postquam miseræ hujusce vitæ hiems transierit, fructus honoris & honestatis editurum. Ut enim in seminibus virtus inest earum rerum quæ ex eis progignuntur; ita in virtute illa à vivificæ Christi carne in Sanctorum corpora derivata omnis resurrectorum corporum vita & gloria virtualiter continetur.

Nec

Nec obest corporum tot vicibus transmutatorum corruptio & generatio, in qua juxta Aristotelis & S. Thomæ sententiam, omnia corrupti corporis accidentia penitus subruuntur, factâ usque ad materiam primam, quæ sola remanet, resolutione. Non obest, inquam; quia cùm hæc virtus seminalis gloriæ sit supernaturalis, non de potentia subjecti naturali, sed obedientiali educitur: quæ potentia obedientiæ cùm semper in materia permanente ut subdita Deo permaneant, per naturalium agentium actiones & reactiones minimè obliterantur. Nec propterea materia sola est illius virtutis subjectum, quia cùm materia nunquam sit sine forma, toti semper composito inhareret, ratione tamen materiæ, maximè quia hæc virtus ad materiam restaurandam exaltandamque est instituta.

Urgebis demùm: Parvuli post Baptismum mox decedentes, nec vitali Eucharistiæ cibo unquam pasti, gloriosi in fine sæculorum resurgent tamen. Atqui ea infantium corporum gloria non potest esse Eucharistiæ effectus, quam nunquam receperunt: ergo corporum beatorum resurrectio & immortalitas ab Eucharistiæ Sacramento physicè & realiter non profiscitur.

Respondeo difficultatem hanc adversariis esse peræquè communem: eatenus enim juxta illos Eucharistia est gloriolæ resurrectionis causa, quatenus Eucharistia suscepta est futuræ corporum resurgentium gloriæ pignus, cujus intuitu promissam Christus resurrectionem implebit. At pueri mox à Baptismo mortem oppetentes pignus illud nequaquam rece-

perunt : quomodo ergo Eucharistia est eorum beatæ immortalitatis causa moralis ? Dicendum ergo , quod sicut aliàs inter explicandam Sacramentorum efficientiam exposuimus, Sacramenta novæ Legis effectus suos physicè quidem quando sunt emittunt ; ita præterita vel futura , subindèque in voto duntaxat vel proprio vel alieno suscepta effectus suos non nisi in genere causæ moralis operantur. Sanè Christi agendi modum Christi instrumenta imitantur ; unde sicut Christus jam existens bonorum omnium supernaturalium fons est & causa realis , ejusque humanitas est potissimum miraculorum organum ; à Christo verò nondum existente & nato omnes veteris Testamenti gratiæ tanquam à causa finali & morali proficiscebantur , quatenus intuitu prævisorum meritorum Redemptoris quidquid fidei , virtutis, & gratiæ in sanctis Patribus refulsit , totum à Deo collatum est : ita pariter Sacramenta existentia physicè , non existentia moraliter duntaxat operantur. Et hoc modo Eucharistia puerorum resurrectionem efficit , quam quidem pueri baptizati non propriâ voluntate, sed matris Ecclesiæ votis concupiscunt , ut alibi satis diximus.

Itaque per Eucharistiæ usum Christus , quem B. Jacobus *insitum Verbum* appellat , plantatur quadantenus in cordibus nostris , quæ si charitate viventia invenerit , vitam immortalem in corpus ipsum mira diffusionem d'latat ; si mortua peccato , mortis venenum in corpus ipsum protendit : nam *mors est malis , vita bonis*. Et ut præclare Chrysologus *serm. 77.* scripsit : *Sicut illud cor cælum est , in quo vivit & regnat*



*regnat Christus; ita illud pectus sepulchrum, in quo Christus adhuc habetur mortuus, & sepultus.*

Hæc cum ita sint, ad Eucharistiam nemo nisi mundo, nisi peccato; nisi sibi mortuus accedat, ut ex fonte vitæ vitam jugiter hauriamus. Petamus ut Christus per Eucharistiam porrectus dominetur in medio inimicorum suorum, atque in nos adveniat regnum ejus; quia si ille regnaverit in nobis, in illo nos ipsi regnabimus. Regnavit hæcenus diabolus, regnavit mors: rogemus ergo ut Christo regnante pereat diaboli tyrannis, deficiat peccatum, abjiciantur opera tenebrarum, ne amplius diabolus arcem, mors imperium, infernus gerat ac teneat potestatem. Iterum, atque iterum oremus, ut Christus semper suis regnet in militibus, ut milites suo semper triumphent in Rege. Regnabit porro, si ejus semper voluntatibus obsequamur. *Hoc est regnum Dei*, inquit Chrysologus serm. 67. *quando in cælo, & in terra Dei voluntas est sola.* Tunc evadit terra nostra cælum, vita nostra Deus, tempus nostrum imago æternitatis, census noster innocentia, honor noster immortalitas, spes nostra felicitas animi, & corporis gloriosa resurrectio.

*Decimus Eucharistiaè religiosè frequentata effectus: Perseverentia finalis, cui aterna felicitas succedit.*

Hæc est Eucharistiæ effectuum beatissima coronis, votorum nostrorum meta, & tota ra-

tio spei nostræ. Perseverantiam porrò cum gloria jungimus, quia duo licet effectus sint, adeo tamen indivulsi sunt, ut pro eodem merito computentur.

Perpicuè autem hunc nobis effectum Veritas significavit & spondit, Joan. 6. *Si quis, inquit, manducaverit ex hoc pane, vivet in æternum.* Vita autem æterna hominis felicitas est, ad quam unâ perseverantiâ pervenimus. Ergo gloria æterna est effectus Eucharistiæ, atque etiam perseverantia, de qua specialiter intelligi potest illud ejusdem Salvatoris: *Qui manducat meam carnem, & bibit meum sanguinem, in me manet, & ego in eo.* Hoc autem mansionis nomen permanentiam continentem significat, juxta illud: *Ad eum veniemus, & mansionem apud eum faciemus.* Nihil aliud autem est perseverare, quàm in Christo manere, & ab ejus nunquam gratia decidere. Sed de perseverantia primum, deinde de corona pauca ordine dicamus.

Perseverantia ergo est divini Sacramenti fructus præcipuus, & certè hac fortè de causâ permanens illud esse voluit Christus, ut beatam mentis in sanctitate firmitatem impertiret. Porrò perseverantiam nobis conciliat, tum quia à peccatis mortalibus cœleste hoc antidotum præservat, quibus solis noster ad Deum cursus impeditur. Tum quia quemadmodum corpus cibo naturali conservatur incolume, ex eoque quotidie vires, quotidie suavitatem percipit sanitati fovendæ salutarem; ita etiam divinæ Eucharistiæ cibus salutem animæ sustentat, vires addit, efficitque ut spiritus divinarum rerum satuberrimâ delectatione magis magisque  
commo

commoveatur, atque in dies faginetur. Certè panem ordinarium Dei optimi maximi & amantissimi provisoris beneficio sustentandi corporis, cordisque virium confirmandarum gratiâ nobis indultum Scriptura sacra testatur: *Ut, inquit psalm. 103. educas panem de terra, & vinum latificet cor hominis, & panis cor hominis confirmet.* Unde per Prophetas non semel minatur Deus populum vitiis inquinatum panis robore ac præsidio se spoliaturum. *Auferet dominator dominus, inquit Isaiâs cap. 3. à Ierusalem omne robur panis. Conteram baculum panis, ut additur Ezech. 4.* Quanto potius panis ille cœlestis datus est, ut fatiscentem animam fulciat, ut confirmatam tueatur, ut gratiam dilabi ac diffluere vetet, ut quotidianas à concupiscentia importatas jacturas sarciat, ut Christum sequentes, ejusque crucem jugiter portantes, atque in via perfectionis, pœnitentiæ, ac mortificationis fatigatos reficiat, non secus ac quinque panes, quibus Eucharistia tam graphice adûmbrata est, pîs turbis Salvatorem in deserto sequentibus, ne deficerent in via, stupenda multiplicatione porrecti fuere, ut castarum animarum Christum qui justitia est esurientium, in illiusque unionem anhelantium famem ab ipsa Veritate *Matth. 5.* & ab ejus Matre *Luc. 1.* beatificatam exsatiaret; denique ut Christianos cœlestium uno amore incensos, & eorum desiderio contabescences soletur interim, extollat, sustentet, & bonis impleat omne genus. Denique omnes hactenus enumerati effectus ad perseverantiam nobis accersendam concurrunt, ut consideranti patebit; & quidquid in tota speculatione operosè satis promul-



mus , ad hunc effectum suadendum conspirat.

Hac de causa Eucharistia *Viaticum* peregrinationis nostræ à Patribus meritò dicitur, atque ab Ecclesia infirmis ægritudine oppressis, atque communis hostis insidiis & tentationibus circumseptis *per modum viatici*, quo iter æternitatis alacrius in fortitudine cibi illius decurrant, securius ministratur. *Ejus virtute recreati*, inquit Catechismus Tridentini 2. p. titulo de Eucharist. num. 56. *non secus atque Elias, qui in subcineritii panis fortitudine ambulavit usque ad montem Dei Horeb* ( ut habetur 3. Reg. 19. ) *cùm ex vita emigrandi tempus advenit, ad æternam gloriam & beatitudinem ascendant.* Mille enim clypei pendent ex eo, & omnis armatura fortium; atque dum bella premunt hostilia, dat robur, fert auxilium, cœlique pandit ostium hæc salutaris hostia.

Videant ergo quàm suspecta sit ipsorum communio, qui in peccata lethalia continuò & fermè majori pronitate post hujus panis usum prolabuntur; nullum ex hoc pane fortium infirmitatis levamen, nullum debilitatis robur reportantes. Durat profectò, durat morbus, quin & recrudescit infirmitas, quàm tam salutaris cibus non persanat. Sanè quemadmodum Medici infirmis graviore & febrili morbo à viscerum corruptione vitaliumque tabe profecto laborantibus pane sapienter interdiciunt, cibosque solidos sedulò subducunt, quoad viciosos morbidisque humoribus remediorum ope atque ipsâ abstinentiâ depulsis allevatum corpus melius habeat, ne infusus cibus, inge-

Ausque



stusque panis quidquid virium reliquum est absumat, opprimat, extinguat: ita non absimili modo studiosus animarum rector, & plagarum animi longè gravissimarum medicus accuratus non quibuscumque indiscriminatim infirmis, infirmitatis eorum nec genere, nec periculis, nec causis, nec adjunctis exploratis, divini panis esum statim consulit, quoad evacuatis perversi cordis in eodem semper luto hærentis affectionibus, unde omnis animæ temperatio dissoluta est, præmissisque pœnitentiæ exercitationibus, quæ una & propria sunt malorum illorum remedia, convalescens paulatim animus eam Deo juvante, & infirmo cooperante sanitatem consequatur, quæ ad escam admodò solidam sacro charitatis igne concoquendam accommodata sit. Alioquin non perseverantiam, sed majorem ruinam tanto abusu eo ex vitali cibo percepturi sunt, qui in cœlestem mensam invadunt antequam pœnitentiæ remediis fortiores effecti sint. Quis enim sibi persuadeat omnes infirmos nullo delectu, nulla aegritudinis gravitatis habitâ ratione, iisdem, eodemque modo & mensurâ reficiendos esse alimentis? Laudanda potius, suscipienda, veneranda atque etiam amanda illius sapientissima benignitas, & benignissima sapientia est, quæ suum cuique demensum, & cujusque viribus attemperatum constituit. *Ne, inquit Ambrosius lib. 6. in Lucam, cap. 9. aut infirmum validioribus cibis opprimat, aut validum exilia alimenta non sicient.* Compellendi ergo ad sacram mensam justî, & fervidi præ humilitate secedentes, ut sint in fide & pietate stabiles; sed unâ arcendi sunt ab altaribus qui non se arcent à criminibus.

Perseve

Perseverantiam finalem corona sequitur sempiterna; nam qui perseveraverit usque in finem, hic salvus erit. Hic est ultimus & præcipuus cœlestis cibi fructus: neque enim alios effectus nisi in ordine ad istum operatur. Si enim gratiam auget, si animam divinis charismatibus reficit, si Christo nos unit, si peccatorum malesuadas voluptates infusâ cœlesti delectatione exstinguit, si tentationes & hostium impetus frangit, si adversum peccata mortalia communit, si ipsa peccata venialia abstergit, si pœnam condonat, si cordis castimoniam in appetitum diffundit, si perseverantiam donat, profectò his saluberrimis mediis viam nobis ad beatam æternitatem & Dei visionem sternit & munit. Ut enim fons per tenues venarum primitiis erumpit meatus, atque angustis sensim serpit in rivulis, donec digno successu in totam se fluviorum latitudinem prorumpat, & valenter infundat; ita fons vitæ Christus, qui sitientes ad se venire jussit, electum gratis præparat, carnem suam deinde commutat in escam per veram panis in corpus suum transubstantiationem, torpentes interim animi meatus ad usum tanti tamque solidi cibi, lacteâ sacrarum consolationum infusione componit, sic compositum carne sua pascit, pastum in se transformat, transformatum fulcit & servat, servatum abscondit in abscondito faciei suæ, & mori mundo facit; absconditum & mortuum tandem revelabit, tandem suscitabit. *Mortui estis*, inquit Apostolus Coloss. 3. *& vita vestra abscondita est cum Christo in Deo. Cum autem apparuerit Christus vita vestra, tunc & vos cum illo apparebitis in gloria.*

Maſte



Macte interim animo, pie Lector, & sacrae Eucharistiae dignè saepius frequentatae cibo roboratus, ne dubites quin mortuus resurgas aeternum in regno Dei beatè victurus, quando Christus tibi resurrexit, tibi vivit, tibi regnat occisus. Ne te turbet fides, spes te longior ne fatiget; quia certa tibi, nisi peccaveris, res est, quae in ipso tibi rerum servatur authore. Aeternae gloriae pignus habes, ipsum ne projicias, & res tibi oppignorata succedet. *Laborans messor quod in semine non videt*, inquit Chrysolog. *serm. 40. videbit in messe; & quod in sulco deflet, gaudebit in fructu.* Interea spe ad futura tende, fide crede, meditatione revolve: cū res venerint, advenerint & promissa, spes destinet, fides cessabit. Dulcis est epistola, sed usquedum veniat ipse qui misit; necessarium chirurgum & pignus, sed usque ad debiti vel promissi redditionem; grati flores, sed usquedum veniatur ad poma; suave Sacramentum Eucharistiae, sed usquedum qui in eo latet videatur. Verū epistolam Christi delebit praesentia; rumper cautionem, implebit solutio pignus; succedent floribus pomorum fructus, Sacramentorum velamina dispellet evidentia Salvatoris. Quod ipse nobis concedat qui est super omnia Deus benedictus in saecula.

Ignoscat, detque veniam Lector eruditus, si materiae suavissimae illicitis in reflexionis flammis orationis impetu abripiamur. Illò quæso revertamur, unde tantisper, nec fortassis frustra digressi sumus.

Operatur denique sacra Eucharistia vitam aeternam, non solum ob adductas superius rationes ex omni genere gratiarum quas Eucharistia

charistia profundit petitas, sed specialiter etiam quia in hoc admirabili Sacramento testamentum habemus æternum, quo ad hæreditatem filiorum jus obtinemus. *Hic calix*, aiebat Salvator, *novum testamentum est in meo sanguine*. Quale testamentum, & quam securum, quod sanguine Christi scriptum est! Planè *habemus fiduciam in introitu Sanctorum*, in sanguine Christi, ut dicitur *Hebr. 10. Quia cap. 9.* dixerat idem Apostolus, *Novi testamenti mediator est, ut in ore intercedente, in redemptionem earum pravaricationum, qua erant sub priori testamento, repromissionem accipiant qui vocati sunt aeterna hæreditatis*. Bonum aurum, aiebat S. Ambrosius, sanguis Christi, dives ad pretium, profluus ad redimendum. Melius profectò clamat sanguis iste quàm Abel; non vindictam ut iste, sed misericordiam, eamque sempiternam exorat.

Pulchrè observat B. Chrysologus post postulatam in oratione Dominica regnum cœlorum, orare nos Deum, ut panem porrigat quotidianum. Quis est ille panis? Num temporalis? Num triticeus è terra natus, in molendino contritus, in pistrino subactus & fermentatus, in fornace decoctus, & dentibus tandem commolitus? Illum quidem pro modo necessitatis, sed aßum potissimè: illum præcipuè petere non iussit, quem prohibuit cogitare, dum dixit: *Nolite solliciti esse quid manducetis, aut quid bibatis*. Cœlestis Pater cœlestem panem cœlestes filii ut postulemus hortatur; unde voluit ut nobis Eucharistia mensa lactesceret, quò Filius suus cibus sempiternus ad parvulos perveniret. *Ego*, inquit ipse Salvator *Joan. 6. sum pa-*



*nis vivus qui de cœlo descendit.* Panis, inquam, qui gratiæ molâ & Spiritus sancti virtute aptatus est in farinam; qui satus est in Virgine, fermentatus in carne, confectus in passione, in fornace coctus sepulchri; qui ut divinitatis suæ calore coqueretur, ipse clibanum decoxit inferni; qui in Ecclesiis conditus, illatus altaribus cœlestem cibum quotidie fidelibus subministrat; qui in remissionem frangitur peccatorum; qui edentes se perpetuam pascit, & nutrit ad vitam. *Post cœleste regnum*, inquit os Petri Ravennatis aureum serm. 68. *panem quis postulet temporalem? Sed quotidianum & in diem vult nos in Sacramento sui corporis panis viaticum postulare, ut per hoc ad perpetuum diem, & ipsam Christi perveniamus ad mensam; ut unde hic gustum sumpsimus, inde ibi plenitudinem, totaque satietates capiamus.*

Dices: Ut Eucharistia esset speciali ratione causa futuræ & æternæ Beatorum vitæ, deberet etiam physicè instrumentaliter concurrere ad productionem luminis gloriæ, & beatæ visionis, in qua futura nostra felicitas essentialiter sita est: propterea enim Eucharistia gratiæ augmenti, aliorumque enumeratorum effectuum causa dicitur, quia beatissimam illam supellectilem physicè operatur. At Eucharista nec gloriosum Beatorum lumen, nec visionem ab eo derivatam physicè efficit; cum in beatitudine nulla Sacramenta permaneant, nullus Sacramentorum velaminibus locus detur. Ut enim aliàs diximus, nec iterari piget, Christum Beati possident nullis figuris, nullis velaminibus obtectum. Judæi contra non Christum habuerunt, sed Christi tantum figuras, atque velami-

na:

na: Christiani inter utrosque interjecti Christum verè quidem, realiter, & substantialiter possident, sed sub accidentibus panis occultatum. Cum autem apparuerit quod perfectum est, id est Christus in gloria; tunc evacuabitur quod ex parte est, id est Sacramenta, quibus cœlestia participamus, desinent quando nuda sine ullis umbris veritas conspicuam se præbebit. Ergo Eucharistia non est æternæ vitæ causa specialis.

Respondeo Eucharistiam esse causam gloriæ & vitæ æternæ, quatenus ad eam adipiscendam speciali ratione opitulatur, juxta illud Augustini tract. 26. in Joan. *Cum cibo & potu id appetant homines, ut non esuriant, neque sitiant, hoc veraciter non præstat nisi iste cibus & potus, qui eos à quibus sumitur, immortales & incorruptibiles facit in societate Sanctorum, ubi pax erit & unitas plena atque perfecta.* An autem Eucharistia ad gloriosum lumen & beatam visionem physicè per modum instrumenti, sicut ad alios effectus concurrat? Probabilius & dictis de Sacramentis in communi consonantius affirmantè respondendum videtur. Licet enim sacramentum Eucharistiæ non nisi ad consumptionem sæculorum in Ecclesia duraturum sit, effectus tamen ab ea relictus, gratia nimirum sacramentalis æternum permanebit, quæ ad lumen gloriæ, atque subinde ad visionem inde manantem, efficiendum divinitus elevabitur. Quod sanè sufficit ut Sacramentum etiam non existens gloriam propriè, per se, & physicè operetur; causæ enim etiam præteritæ effectus asseritur, si virtus ab eo decisa intentum effectum producat; sicut pater filii post mortem ipsius

ipſius nati amor meritò dicitur , quia ejus ef-  
formandi virtutem antea quàm moretur ſui  
vicariam reliquerat.

## REFLEXIO.

Moraliffima totius hujusce ſpeculationis ma-  
teries variis identidem in decurſu pietatis mo-  
nitis veluti parentheſibus interſtincta & quaſi  
interrupta , non tam novam reflexionem quæ  
mentem à dictis avocet poſtulat , quàm novum  
cordis tui , Lector optime , affectum qui enu-  
meratos effectus ſapiat , atque quæ audiuit pe-  
nitius defixa retineat , attentius agiter , & ve-  
luti revocatum è mentis ſtomacho pabulum  
conficiat & ruminet. Deſideriis opus eſt , non  
iteratis poſt tot conſiderationes conſideratio-  
nibus. Attende ergo tibi & doctrinæ traditæ,  
ratus vitam in te æternam cibum iſtum non  
operaturum , niſi æternæ vitæ deſiderio ſince-  
ro ardeas , & veluti conſenſeſcas. Ea amas quæ  
deſideras ; cœleſtia autem æternum poſſidebis  
ea ſi amaveris. At quomodo futura deſiderare  
cenſendus es bona , qui terrenis præſentibus  
tam indivulſè adhæres ? Profectò ſola illa virum  
ſuum amare uxor dicitur & creditur , quæ ab-  
ſentis deſiderio tabeſcit. Ille etiam viator pa-  
triam diligere exiſtimatur , qui redeundi cupi-  
ditate angitur. Hæc ſi poſt acceptum cœleſtem  
cibum ſentis , ſi propter illum , & in illum vivas  
quem manducas , ipſo donante viſes in æter-  
num. Sin autem eundem ad divinas res cogi-  
tandas deſiderandâſque languorem & inertiam  
experiare , cum D. Bonaventura *tom. 1. part. 6.  
cap. 9.* timeo tanto Sacramento contumeliam ne  
facias

facias, *judiciumque tibi manduces & bibas, qui tepidè, indevote, & inconsideratè accedis.*

Hæc cum ita sint, supersubstantiali cibo partus, supra te ipsum, supra creaturas, supra substantiam mundi attollaris necesse est. Pignus habes æternæ vitæ: ne te ergo mortalitas terrena delectet. Grandis dementia est futuram felicitatem hominem credere, quam sibi non desiderat evenire. Ede interim æternæ vitæ cibaria, & perpetuæ retributionis escam avidis quantum potes & castis faucibus occupa; quia semen vitæ vivifica caro Christi, & sanguis ejus ros æternæ salutis. Si Domini Jesu sputum vacuas cæcorum oculorum replevit lacunas; si divino ore luciferam Christus dedit salivam, nemo dubitet Eucharistiæ divino imbri vitam nobis conciliari posse immortalem, cum videat parvâ dominici sputi guttâ arentes cæcitate oculos sic subito suscitatos in lucem: quia quod est pluvia plantis, hoc resurrectoris Dominici Sanguinis in Eucharistia propinati vitalis imber, & ros divinus.

O infelicitas generis humani! Pignus sempiternæ hæreditatis in Eucharistia tenemus, & felicitatem in hac lacrymarum valle inquirimus. Quis de plebeio censu & hospitoli vilitate suspirat, de regno certus, de dominatione securus? Quis mentis compos lapillos colligit, qui arcas habet gemmis plenas & margaritis? Quid ergo tibi cum terra, qui in Eucharistia possides Regem cælorum regnum ipsum brevi daturum? Quid tibi cum humanis quisquiliis, cui datum est adipisci divina? Nisi fortè placeant siliquæ, delectant stercora, amantur pericula, & illata mala bonis sunt gratiora colla-  
tis



tis & majoribus conferendis? O homo, benè tibi invides, qui elevatus ad summa, ipse te ad vilia dejicis, ad egena deponis. Expergiscere ergo, jacta in Domino curam tuam; æterna bonà te aliquando rerum possessorum confide. Nam quod mereri te posse dubitas, habere te, & in Eucharistia possidere jam cogeris confiteri. Qui se tibi totum dedit, regnum suum non denegabit: qui se in escam porrexit, à convivio æterno non arcebit. Quin Sanctos nedum torrente voluptatis potabit, sed ô bonitatem effusam! ô pietatem inauditam & planè incredibilem! nisi credere ipsa Veritas præciperet, illis serviet in cœlo, qui sibi in terra servierint. *Beati*, inquit Luc. 12. *servi illi, quos cùm venerit Dominus, invenerit vigilantes. Amen dico vobis, quia præcinget se, & faciet illos discumbere, & transiens ministrabit illis.* Hæret hic, stupet, miratur Chrysologus *serm. 24.* & exclamat: *En mutatio inaudita rerum! En terribilis correptio dominationis! quia parumper servus assistit in domini sui expectatione succinctus, & sustinendi fidem brevi expectatione portavit, cui ut talionem redderet, dissimulat se in ipsa divinitate divinitus. Discumbenti homini Deus astat, & astat in cœlestibus: epulanti servo servit Dominus, & servit accinctus: pueris suis, ministris suis ministerium facit Christus, & facit in Patris gloria constitutus!*

Quod si gloria te dilata affligit, interim ne superere tardio, ne lassescas tarditate, ne longæ expectationis fatigatione succumbas; crede creditori tuo, qui tibi credidit debitori: expecta parumper ut veniat, qui te diu sustinuit ut venires; da illi inducias de promisso, cujus pignus

pignus pretiosissimum accepisti. Dabit, dabit utique quod promisit, qui corpus & sanguinem suum supra merita tua & vota donavit. Quare tu fatigaris spe Dei, cum genus omne hominum subsistat spe, fide vivat? Agricola nunquam sereret anhelus, si fructum laboris sui de tempore non speraret. Viator laborem prolixi itineris non subiret, nisi se ad destinata crederet pervenire. Nauta mare non intraret incertus, si se lucris sequentibus compensaturum viarum discrimina non speraret. Miles tota juventutis tempora non ageret in periculis, si senectutis honores copiosissimos non speraret. Filius paternæ dominationis tempora non duraret, si se substantiæ paternæ non speraret hæredem. *Et tu, concludit Chrysologus serm. 71. si te jam filium Dei credis, juxta Prophetam, expecta Dominum, viriliter age, & confortetur cor tuum, ut hereditatem Dei de expectationis fide, & de virtute patientia consequaris. Fratres, beati sunt filii Dei, quia & hereditatem rerum omnium possidebunt, & de excessu patris luctus temporum non videbunt.*

## SPECVLATIO II.

*Varia circa Eucharistia dubitationes  
appendices resolvuntur.*

**N**Ec orationis filium, nec materiei in superiori speculatione expositæ suavitatem interpositis subtilioribus atque intricatioribus difficultatibus, quæ è Theologia non minus  
-2ndriog
quàm

quàm è terra spinæ & tribuli fruticant, abrum-  
pere visum est, sed in hanc speculationem reji-  
cere in unum veluti fasciculum colligandas.

*Queres 1. Vtrum Eucharistia Sacra-  
mento prima interdum gratia pro-  
ducatur, quâ peccata mortalia de-  
leantur?*

Respondeo sacramentum Eucharistiæ gra-  
tiam sanctificantem in suis susceptoribus per  
se supponere, ac proinde ad remittenda pecca-  
ta lethalia primò & per se institutum non esse.  
Indicat hanc veritatem sacrum Tridentinum  
Concilium sess. 13. can. 15. *Si quis dixerit, inquit,  
vel præcipuum fructum Eucharistia esse remissionem  
peccatorum, anathema sit.* Si autem ad primam  
gratiam producendam per se esset institutum,  
præcipuus ejus fructus esset remissio peccato-  
rum, sine qua cæteri minimè conferuntur.

Ratio est, quia Eucharistia est cibus ani-  
mæ, ut ex dictis perspicuum est, nec eos latet  
qui communissimas hujus sacramenti notiones  
habent. At cibus non ad suscitandos mortuos,  
sed ad vivos alendos fovendosque per se insti-  
tutus est. Ergo Eucharistia iis tantum effe-  
ctus suos per se confert, qui vitâ spiritali vi-  
vunt. Unde qui peccato lethali mortuus est,  
nutrimentum spiritale suscipere, quod unius  
viventis est, nequaquam potest. Propterea enim  
panis ac vini speciem hoc sacramentum ha-  
bet, ut significetur non ad revocandam ani-  
mi vitam, sed ad eam conservandam divini-  
tus institutum esse. Unde sicut mortuis cor-  
poribus



poribus alimentum nihil prodest, ita animæ spiritu Christi non viventi sacramenta Christi nihil prodesse, sed plurimum obesse certissimum est. *Qui enim manducat & bibit indignè, judicium sibi manducat & bibit.*

Dices: Unumquodque novæ legis Sacramentum medicina est & pharmacum salutis. At medicina non benè habentibus, sed malè habentibus necessaria est. Ergo Eucharistia est peccatorum medicina, ad ea proinde delenda instituta. Unde Eucharistia appellatur testamentum, juxta illud: *Hic calix novum testamentum est in meo sanguine*; qui etiam effundi dicitur in remissionem peccatorum. Et ipsa Ecclesia in Postcommunione sic orat: *Hæc nos communio Domine purget à crimine. Purificent nos, quasumus Domine, Sacramenta quæ sumpsimus: & præsta, ut hoc tuum Sacramentum non sit nobis reatus ad pœnam, sed intercessio salutaris ad veniam; sit ablutio scelerum, sit vivorum atque mortuorum remissio omnium delictorum.* Quæ omnia argumento sunt Eucharistiam ad remittenda peccata esse institutam.

Respondeo Eucharistiam esse medicinam non solum venialium remissivam, sed etiam præservativam à mortalibus; quod duplex medicinæ genus agnoscunt artis corporum curandorum periti. Accedit quod ut dicemus dubitatione sequenti, Eucharistia peccata mortalia per accidens interdum remittit, quæ vel quis sine peccato ignorat, vel de quibus, citra suam tamen culpam, non est perfectè contritus vel confessus.

Ad ea quæ in objectione subjiciuntur addita-  
menta ex verbis formæ calicis, atque ex ora-  
tionibus



tionibus Ecclesiae petita dilucidè respondebis, si prae oculis habeas Eucharistiam sacrificium simul & sacramentum esse : quà sacramentum suscipientem pascit , gratiam ejus fovet , & augeat , quam subinde supponit ; unde & seriam conscientiae probationem , & cordis castimoniam , & eximiam animi compositionem doctus à Domino Paulus , docta à Paulo Ecclesia postulat, ne cibus ille vitalis mors sit malis, qui solis bonis vita est. At verò quà sacrificium & pro peccatis & pro peccatoribus quotidie offertur ; nam & ad gratias quibus convertantur impii obtinendas , & ad indulgentiam poenitentibus conciliandam , & ad occulta etiam crimina, quae Sancti ipsi tantoperè opera sua verentes formidant , condonanda , & ad futura praecavenda , & ad poenam peccatis debitam misericorditer relaxandam quotidie funditur, quotidie litatur ; nec pro iis tantum qui sacrosanctae alimoniae communione dignati sunt, sed pro omnibus qui ad Ecclesiam quocumque tandem modo pertinent, Deo in altari offertur. Nec te moveat quod Ecclesia Eucharistiam *sacramentum* nomet, cum illi remittendorum peccatorum tribuit potestatem. Non, inquam, te moveat verbi hujus scrupulus, quem citò evelles , si consideres augustum Eucharistiae sacrificium etiam quà sacrificium est, sacramentum seu mysterium à veteribus, iisque longè gravissimis non semel appellari. *Notum est*, inquit Augustinus lib. de sancta virginitate, cap. 45. *quo loco Martyres , & quo defuncta Sanctimonialia ad altaris sacramenta ( id est sacrificium in altari offerri solitum ) recitentur. Sacramenta altaris* ( inquit Concilium Carthaginen-

se III. *can. 29.* loquens de Missarum solenniis ) non nisi à jejuniis hominibus celebrentur. Cùm sacramenta offerret B. Martinus ( ut in ejus vita de ipso tremendum sacrificium immolante legimus ) globus igneus apparuit. Apud veteres etiam libri Missarum & Liturgiarum ritus & formulas describentes , *Sacramentarii* inscribebantur , quo titulo ipsum B. Gregorii Sacramentarium usque in hodiernum diem insignitur. Denique S. Thomas Theologorum accuratissimus 3. *p. quest. 83.* non semel celebrationem Sacramenti pro sacrificio, veterum mores & loquendi modum æmulatus appellat.

*Quæres 2. Virum saltem per accidens primam gratiam peccati lethalis remissivam Eucharistia interdum operetur.*

Respondeo affirmanter contra Vasquem aliósq. quos ipse *disp. 105. cap. 4.* recenset. Docet disertè nostram sententiam S. Thomas *quest. 79. art. 3.* his verbis : *Potest hoc sacramentum operari remissionem peccati dupliciter : uno modo non perceptum actu , sed voto , sicut cùm quis primò justificatur à peccato. ( Et in hoc sensu primam gratiam Eucharistia semper producit , cùm nulli sive baptizato , sive pœnitenti gratia unquam conferatur , nisi ex aliquo voto Eucharistiæ , quæ omnium est Sacramentorum finis , ad quam uti media referuntur. ) Alio modo etiam perceptum ab eo qui est in peccato mortali , cujus conscientiam & affectum non habet : fortè enim primò non fuit sufficienter contritus ; tamen devotè*

devotè & reverenter accedens consequetur per hoc sacramentum gratiam charitatis, qua contritionem perficiet, & remissionem peccati. Censet ergo S. Doctör in casu oblivionis peccati, cujus tamen peccator affectum nullum retinet; vel in defectu contritionis perfectæ Eucharistiam infusione gratiæ & charitatis peccata lethalia delere, licet non ad ea remittenda, sed ad gratiam cibantem infundendam, & in Christo natum pascendum fovendumque ex natura sua referatur.

Ratio est, quia Sacramentum Eucharistiæ est cæterorum omnium perfectissimum, cum fontem ipsum gratiarum realiter contineat, plenum sibi, superplenum nobis; unde de illo rectè verba illa *Cant. 4.* usurpantur: *Fons horticulorum, puteus aquarum viventium, quæ fluunt impetu de Libano.* Ergo Eucharistia cæterorum omnium Sacramentorum vim & efficaciam eminentissimè præcontinet. Atqui Pœnitentia & Baptismus primam gratiam producant: ergo illam producere potest, eamque producit Eucharistia; non ordinariè, quia ad hoc cibus divinus non est institutus; sed interdum, & veluti in supplementum aliorum Sacramentorum, quorum potestates altiori modo præhabet. Putà si quis præmisso examine conscientie accuratò & moraliter diligenti, peccati alicujus mortalis non recordetur, quo tamen reapse coram Deo inficitur, sicque bona fide ad Eucharistiam suscipiendam ratus se non esse in peccato mortali accedit, tunc istum divinissimi Sacramenti usu justificatum iri longè probabilius est, si modò actum sinceri doloris vel amoris ( talis tamen qui extra Sacramentum



Pœnitentiæ re susceptum ad justificandum non sufficiat) elicuerit. Et tunc impletur illud Salvatoris, Joan. 6. *Panis quem ego dabo, caro mea est pro mundi vita.* Vitam enim impertit, cum peccatorem justificat, qui peccato mortuus erat.

Atque hanc nostram resolutionem illa ipsa Scripturæ testimonia, illæ Ecclesiæ orantis voces demonstrant, quas superiori difficultate inter objiciendum retulimus. Quæ cum convincant Eucharistiæ vim inesse remittendi peccata, illa etiam quandoque remittere, quando nimirum sacrilegii temeritas abest, congruentissimum est. Qua de causa Eucharistiam Justinus Martyr *in responsione 4. questionis Gentium*, carboni comparat, quem Isaias vidit immundis suis labiis adhærentem, ad iniquitatum peccatorumque expiationem. *Carbo*, inquit, *figuram habebat dominica carnis, qua conscientiam eorum qui ipsam edunt, ab omni scelere expiat.* Chrysostomus etiam *homil. 83. in Matth.* sacramentum hoc remissionem peccatorum facere attestatur. *Spurcitiam* ipsum omnem abstergere, & *morbos omnes depellere*, Cyrillus *lib. 4. in Ioan. cap. 17.* & Damascenus *lib. 4. de fide, cap. 14.* tradiderunt. Quod cum de peccatis eorum qui sacrilegâ & indignâ temeritate cum conscientia & affectu peccati mortalis, minimè seipso probantes, nec corpus Domini dijudicantes in sacramentum irruunt, intelligi non possit, cum Apostolus & tota Patrum traditio reclamant, relinquitur verba illa de illis peccatoribus intelligi oportere, qui peccata latentiora sine culpa ignorant. (quædam enim non sine crimine ignorant, quorum etiam ipsa ignorantia



ignorantia crimen est, ut alibi dictum est, & dissertatione sequenti magis observabitur) vel non satis perfectâ contritione detestantur.

Dices : Alimentum materiale vitam corporis necessario præsupponit, ut calore naturali concoctum, in substantiamque aliti conversum ipsum pascat & saginet. Ergo pariter divinus Eucharistiæ cibus spiritalem animæ vitam præexigit, quam servet, augeat, & communiât. Et confirmatur ratione à priori. Nulla causa potest etiam per accidens suam rationem formalem operandi transilire. Atqui ratio formalis operandi Eucharistiæ est per modum cibi & potus Fidelium, conferendo nimirum gratiam nutrientem, quâ spiritalis homo sustentetur, crescat, reparetur, delectetur. Ergo ad primum gratiam operandam Sacramentum Eucharistiæ extendi nequaquam potest, cum prima gratia non per modum cibi, sed per modum regenerationis, vel certè resurrectionis conferatur.

Respondeo magnum interesse discrimen cibum spiritalem inter & corporeum. Corporeus namque eatenus prodest, quatenus vi caloris nativi animalis in substantiam viventis quod alitur transit : alitum autem cibum in se, nisi vivat, per intus susceptionem non transfert. At verò divinus Christi cibus non in comedentem transmutatur, sed illum potiùs in se transmutat, juxta illud quod ab Augustino *lib. 7. confess. cap. 10.* dictum est : *Nec tu me in te mutabis sicut cibum carnis tuæ, sed tu mutaberis in me.* Unde licet Christus in se mutare nisi jam viventes virâ supernaturali non soleat, absolute tamen potest, & reipsa facit, cum non in-

venit cognitum & volitum gratiæ suæ objectaculum positum.

Accedit aliud non minoris momenti discrimen ex eo petitum, quod cibus corporeus non est in se vivus, nec vitæ productivus; unde ejus duntaxat est præsuppositam sustentare vitam, non eam quam in se non habet mortuis imperire. At Christus est panis vivus qui de cælo descendit, unde Christiani Punici, ut refert Augustinus *lib. de peccatorum meritis & remissione*, *cap. 24.* Eucharistiam simpliciter & veluti antonomasticè *Vitam* appellabant. Quare non solum vitam augere potest, qui est proprius ejus effectus, sed eam etiam primò largiri in casu & circumstantiis memoratis, quia venit & ut vitam habeamus; & abundantius habeamus. Ex quibus rationi subjunctæ, & in confirmationem productæ ferè responsum manet. Etsi enim ratio formalis hujus Sacramenti sit conferre gratiam per modum cibi & potûs, vitalis tamen iste cibus vivificare potest, & omnes aliorum Sacramentorum effectus eminentissimè supplere, quando quis bona fide se primam habere gratiam arbitratur, & cæteroqui per verum dolorem & dilectionem initialem fontem justitiæ licet imperfectè, verè tamen diligere incipit.

Ex quibus tertium discrimen inter peccatorem Christum manducantem, & mortuum animal cui cibus ingereretur proficiscitur. Animal enim mortuum omni prorsus vitæ motu & sensu caret; unde nullum illi adjumentum panis conferre valet. Peccator verò noster jam pœnitens & recogitans annos suos in amaritudine animæ suæ, & ad Patrem in se reversus re-

dire

dire avens , etsi nondum vitâ gratiæ vivat , quia perfectè contritum non esse supponimus , motus tamen vitales ab auxilio actuali prodeuntes in se experitur , viam vitæ ingreditur , mortem suam horret , fontem vitæ sitit , quam in Christo potabit. Sicut enim Sacramenta mortuorum vivis prosunt , cum inveniunt perfectam in suscipientibus contritionem ; ita mortuis per accidens prosunt sacramenta vivorum , cum sincerum vitæ desiderium in illis inveniunt.

*Quæres 3. Quonam tempore vel momento Sacramentum Eucharistiæ rectè dignèque susceptum ordinarios suos effectus largiatur?*

Respondeo certum quidem esse gratiam dignè Eucharistiam suscipientibus conferri ; quo autem manducationis instanti , solum illum scire qui efficit Deus. Varias Authorum sententias referam , non ut instantium minutias subtiliùs curiosiusque discutiam ; religionis enim ! esset inanibus argutiis chartas implere : sed ut inde elicias , in expendendo præiosissimo Communionis tempore totum te conferre , omnemque tuam adhibere curam oportere.

Primò existimant aliqui cum Becano tunc gratiam sacramenti conferri , cum hostia primum sumpta est , antequam in stomachum trahatur , vel per guttur disfluat. Quia in ore verè incipit manducatio cibi corporei , cuius ibi sapor & suavitas degustatur. Similiter , ergo dum Eucharistia ore sumitur , mens divinâ gratiâ saginatur. Ex qua doctrina sequitur gratiæ sa-

verum est manducasse illum cibum porrectum. Et certè cùm gratia hujus Sacramenti producat in instanti, non videtur momentum aliud eo aptius & opportunius posse assignari, in quo verè Sacramentum susceptum est, & per modum cibi applicatum. Quæ sententia probabilitate non caret. Quid autem ex illa ad pietatem inferendum sit, postea clarebit.

Quartò alii censent tum Sacramentum intrus in animam operari, cùm species sacramentales in substantiam aliti convertuntur, ut simul corpus nutriatur, & anima de Deo saginetur. Sed rigorosior videtur aliis ea sententia, quia in infirmis præsertim contingere sæpe potest, species præ debilitate agroti non concoqui, & in aliti substantiam transmutari, qui tunc fructu sacramenti orbabitur, tamen si sacramentum manducaverit. Quod non parum durum apparet. Nec est simile de cibo corporali & sacramentali; ille enim non nisi mediâ digestionis suum sortitur effectum: at cibus sacramentalis non concoctione, sed sensibili sumptione operatur.

Quintò Cajetanus censet Eucharistiam toto eo tempore gratiam in animam affundere, quo species sacramentales in stomacho perseverant. Quæ opinio absolutè & nullo interpretamento prolata aliis displicet: tum quia etsi Christus gratiam promiserit manducantibus Eucharistiam, non eam tamen pro toto manducationis tempore spondit. Tum quia licet Eucharistia sit Sacramentum permanens, actio tamen sacramentalis uno instanti perficitur, quia agit in virtute Dei, quæ nullis temporis morulis eget. Tum potissimè, quia sequeretur melioris cum



eum futurum esse conditionis , qui majorem specierum quantitatem sumeret , vel qui præ caloris nativi debilitate in digerendis speciebus diutius laboraret ; ac proinde in aliquid merè naturale Eucharistiæ gratiarum diversitatem , quod absit , refusam iri.

Quare Cajetani sententiam moderabimur , & probabilem efficiemus , si dicamus Eucharistiæ toto tempore , quo in stomacho subsistunt haustæ species , gratias effundere , modò tamen interioris dispositionis fervor accrescat. Si enim Christus sit Sol justitiæ , quidni rectè dispositos jugiter illustrabit , & quandiu præsto ac præsens est , longè plura animæ sanctæ conferet bona , quàm soleat lux aspectabilis mundo largiri , ipsomet dicente , Joan. 9. *Quandiu in mundo sum , lux sum mundi ?* Si Christus sit fons , quidni ab eo continuo manabunt & scaturient fluentia gratiarum in omnes animæ facultates veluti alveos redundantia ? Si ignis sit consumens peccata , consummans virtutes , quidni implebit illud à se prolatum : *Ignem veni mittere in terram , & quid volo nisi ut ardeat ?* Si est panis vivus & cibus animarum , quidni cibi corporei virtutem æquabit , qui toto tempore quo in stomacho permanet corporaliter prodest ? Ergo dum Christus suæ nobis præsentia copiam facit , omnium nos cœlestium charismatum , quam veluti exstillat ubertate beat ; modò , ut dixi , divinum hospitem virtutum actibus demereatur , ejusque gratiam auspicetur : quia nihil cœlestis sponsi diuturna præsentia conferet , nisi thalamum ornet aurum dilectionis , argentum sapientiæ ; viror spei , virtutum actuum gemmæ , sanctitatis vela ,

poribus alimentum nihil prodest, ita animæ spiritu Christi non viventi sacramenta Christi nihil prodesse, sed plurimum obesse certissimum est. *Qui enim manducat & bibit indignè, judicium sibi manducat & bibit.*

Dices: Unumquodque novæ legis Sacramentum medicina est & pharmacum salutis. At medicina non benè habentibus, sed malè habentibus necessaria est. Ergo Eucharistia est peccatorum medicina, ad ea proinde delenda instituta. Unde Eucharistia appellatur testamentum, juxta illud: *Hic calix novum testamentum est in meo sanguine;* qui etiam effundi dicitur in remissionem peccatorum. Et ipsa Ecclesia in Postcommunione sic orat: *Hæc nos communio Domine purget à crimine. Purificent nos, quasumus Domine, Sacramenta quæ sumpsimus: & præsta, ut hoc tuum Sacramentum non sit nobis reatus ad pœnam, sed intercessio salutaris ad veniam; sit ablutio scelerum, sit vivorum atque mortuorum remissio omnium delictorum.* Quæ omnia argumento sunt Eucharistiam ad remittenda peccata esse institutam.

Respondeo Eucharistiam esse medicinam non solum venialium remissivam, sed etiam præservativam à mortalibus; quod duplex medicinæ genus agnoscunt artis corporum curandorum periti. Accedit quod ut dicemus dubitatione sequenti, Eucharistia peccata mortalia per accidens interdum remittit, quæ vel quis sine peccato ignorat, vel de quibus, citra suam tamen culpam, non est perfectè contritus vel confessus.

Ad ea quæ in objectione subjiciuntur addita-  
menta ex verbis formæ calicis, atque ex ora-  
tionibus



tionibus Ecclesiæ petita dilucidè respondebis, si præ oculis habeas Eucharistiam sacrificium simul & sacramentum esse : quà sacramentum suscipientem pascit , gratiam ejus fovet , & auget , quam subinde supponit ; unde & seriam conscientiaë probationem , & cordis castimoniam , & eximiam animi compositionem doctus à Domino Paulus , docta à Paulo Ecclesia postulat, ne cibus ille vitalis mors sit malis, qui solis bonis vita est. At verò quà sacrificium & pro peccatis & pro peccatoribus quotidie offertur ; nam & ad gratias quibus convertantur impii obtinendas , & ad indulgentiam pœnitentibus conciliandam , & ad occulta etiam crimina, quæ Sancti ipsi tantoperè opera sua verentes formidant , condonanda , & ad futura præcavenda , & ad pœnam peccatis debitam misericorditer relaxandam quotidie funditur, quotidie litatur ; nec pro iis tantùm qui sacrosanctæ alimonie communionem dignati sunt, sed pro omnibus qui ad Ecclesiam quocumque tandem modo pertinent, Deo in altari offertur. Nec te moveat quod Ecclesia Eucharistiam *sacramentum* nominet , cùm illi remittendorum peccatorum tribuit potestatem. Non, inquam, te moveat verbi hujus scrupulus, quem citò evelles , si consideres augustum Eucharistiaë sacrificium etiam quà sacrificium est , sacramentum seu mysterium à veteribus , iisque longè gravissimis non semel appellari. *Notum est*, inquit Augustinus lib. de sancta virginitate, cap. 45. *quo loco Martyres , & quo defuncta Sanctimonialia ad altaris sacramenta ( id est sacrificium in altari offerri solitum ) recitentur. Sacramenta altaris* ( inquit Concilium Carthaginen-

se III. *can. 29.* loquens de Missarum solenniis ) *non nisi à jejuniis hominibus celebrentur. Cùm sacramenta offerret B. Martinus* ( ut in ejus vita de ipso tremendum sacrificium immolante legimus ) *globus igneus apparuit.* Apud veteres etiam libri Missarum & Liturgiæ ritus & formulas describentes , *Sacramentarii* inscribebantur , quo titulo ipsum B. Gregorii Sacramentarium usque in hodiernum diem insignitur. Denique S. Thomas Theologorum accuratissimus 3. *p. quest. 83.* non semel celebrationem Sacramenti pro sacrificio, veterum mores & loquendi modum æmulatus appellat.

*Quæres 2. Virum saltem per accidens primam gratiam peccati lethalis remissivam Eucharistia interdum operetur.*

Respondeo affirmanter contra Vasquem aliòsque quos ipse *disp. 105. cap. 4.* recenset. Docet disertè nostram sententiam S. Thomas *quest. 79. art. 3.* his verbis : *Potest hoc sacramentum operari remissionem peccati dupliciter : uno modo non perceptum actu , sed voto , sicut cùm quis primò justificatur à peccato.* ( Et in hoc sensu primam gratiam Eucharistia semper producit , cùm nulli sive baptizato , sive pœnitenti gratia unquam conferatur , nisi ex aliquo voto Eucharistiæ , quæ omnium est Sacramentorum finis , ad quam uti media referuntur. ) *Alio modo etiam perceptum ab eo qui est in peccato mortali , cujus conscientiam & affectum non habet : fortè enim primò non fuit sufficienter contritus ; tamen devotè*



devoirè & reverenter accedens consequetur per hoc sacramentum gratiam charitatis, qua contritionem perficiet, & remissionem peccati. Censet ergo S. Doctor in casu oblivionis peccati, cuius tamen peccator affectum nullum retinet; vel in defectu contritionis perfectæ Eucharistiam infusione gratiæ & charitatis peccata lethalia delere, licèt non ad ea remittenda, sed ad gratiam cibantem infundendam, & in Christo natum pascendum fovendumque ex natura sua referatur.

Ratio est, quia Sacramentum Eucharistiæ est cæterorum omnium perfectissimum, cum fontem ipsum gratiarum realiter contineat, plenum sibi, superplenum nobis; unde de illo rectè verba illa *Cant. 4.* usurpantur: *Fons hortorum, puteus aquarum viventium, quæ fluunt impetu de Libano.* Ergo Eucharistia cæterorum omnium Sacramentorum vim & efficaciam eminentissimè præcontinet. Atqui Pœnitentia & Baptismus primam gratiam producant: ergo illam producere potest, eamque producit Eucharistia; non ordinariè, quia ad hoc cibus divinus non est institutus; sed interdum, & veluti in supplementum aliorum Sacramentorum, quorum potestates altiori modo præhabet. Putà si quis præmisso examine conscientiæ accurato & moraliter diligenti, peccati alicujus mortalis non recordetur, quo tamen reapse coram Deo inficitur, sicque bona fide ad Eucharistiam suscipiendam ratus se non esse in peccato mortali accedit, tunc istum divinissimi Sacramenti usu justificatum iei longè probabilius est, si modò actum sinceri doloris vel amoris (talis tamen qui extra Sacramentum

Pœnitentiæ re susceptum ad justificandum non sufficiat) elicuerit. Et tunc impletur illud Salvatoris, Joan. 6. *Panis quem ego dabo, caro mea est pro mundi vita.* Vitam enim impertit, cum peccatorem justificat, qui peccato mortuus erat.

Atque hanc nostram resolutionem illa ipsa Scripturæ testimonia, illæ Ecclesiæ orantis voces demonstrant, quas superiori difficultate inter obijciendum retulimus. Quæ cum convincant Eucharistiæ vim inesse remittendi peccata, illa etiam quandoque remittere, quando nimirum sacrilegii temeritas abest, congruentissimum est. Qua de causa Eucharistiam Justinus Martyr *in responsione 4. questionis Gentium*, carboni comparat, quem Isaias vidit immundis suis labiis adhærentem, ad iniquitatum peccatorumque expiationem. *Carbo*, inquit, *figuram habebat dominica carnis, qua conscientiam eorum qui ipsam edunt, ab omni scelere expiat.* Chrysostomus etiam *homil. 83. in Matth.* sacramentum hoc remissionem peccatorum facere attestatur. *Spurcitiam* ipsum omnem abstergere, & *morbos omnes depellere*, Cyrillus *lib. 4. in Ioan. cap. 17.* & Damascenus *lib. 4. de fide, cap. 14.* tradiderunt. Quod cum de peccatis eorum qui sacrilegâ & indignâ temeritate cum conscientia & affectu peccati mortalis, minimè seipso probantes, nec corpus Domini dijudicantes in sacramentum irruunt, intelligi non possit, cum Apostolus & tota Patrum traditio reclament, relinquitur verba illa de illis peccatoribus intelligi oportere, qui peccata latentiora sine culpa ignorant. (quædam enim non sine crimine ignorant, quorum etiam ipsa ignorantia

ignorantia crimen est, ut alibi dictum est, & dissertatione sequenti magis observabitur) vel non satis perfectâ contritione detestantur.

Dices : Alimentum materiale vitam corporis necessariò præsupponit, ut calore naturali concoctum, in substantiamque aliti conversum ipsum pascat & saginet. Ergo pariter divinus Eucharistiæ cibus spiritalem animæ vitam præexigit, quam servet, augeat, & communiât. Et confirmatur ratione à priori. Nulla causa potest etiam per accidens suam rationem formalem operandi transilire. Atqui ratio formalis operandi Eucharistiæ est per modum cibi & potus Fidelium, conferendo nimirum gratiam nutrientem, quâ spiritalis homo sustentetur, crescat, reparetur, delectetur. Ergo ad primam gratiam operandam Sacramentum Eucharistiæ extendi nequaquam potest, cum prima gratia non per modum cibi, sed per modum regenerationis, vel certè resurrectionis conferatur.

Respondeo magnum interesse discrimen cibum spiritalem inter & corporeum. Corporeus namque eatenus prodest, quatenus vi caloris nativi animalis in substantiam viventis quod alitur transit : alitum autem cibum in se, nisi vivat, per intus susceptionem non transfert. At verò divinus Christi cibus non in comedentem transmutatur, sed illum potiùs in se transmutat, juxta illud quod ab Augustino *lib. 7. confess. cap. 10.* dictum est : *Nec tu me in te mutabis sicut cibum carnis tua, sed tu mutaberis in me.* Unde licet Christus in se mutare nisi jam viventes virâ supernaturali non soleat, absolute tamen potest, & re ipsa facit, cum non in-

venit cognitum & volitum gratiæ suæ objectaculum positum.

Accedit aliud non minoris momenti discrimen ex eo petitum, quod cibus corporeus non est in se vivus, nec vitæ productivus; unde ejus duntaxat est præsuppositam sustentare vitam, non eam quam in se non habet mortuis imperire. At Christus est panis vivus qui de cælo descendit, unde Christiani Punici, ut refert Augustinus *lib. de peccatorum meritis & remissione*, cap. 24. Eucharistiam simpliciter & veluti antonomastice *Vitam* appellabant. Quare non solum vitam augere potest, qui est proprius ejus effectus, sed eam etiam primò largiri in casu & circumstantiis memoratis, quia venit & ut vitam habeamus; & abundantius habeamus. Ex quibus rationi subjunctæ, & in confirmationem productæ ferè responsum manet. Etsi enim ratio formalis hujus Sacramenti sit conferre gratiam per modum cibi & potûs, vitalis tamen iste cibus vivificare potest, & omnes aliorum Sacramentorum effectus eminentissimè supplere, quando quis bona fide se primam habere gratiam arbitratur, & cæteroqui per verum dolorem & dilectionem initialem fontem justitiæ licet imperfectè, verè tamen diligere incipit.

Ex quibus tertium discrimen inter peccatorem Christum manducantem, & mortuum animal cui cibus ingereretur proficiscitur. Animal enim mortuum omni prorsus vitæ motu & sensu caret; unde nullum illi adjumentum panis conferre valet. Peccator verò noster jam pœnitens & recogitans annos suos in amaritudine animæ suæ, & ad Patrem in se reversus re-

dire



dire avens, etsi nondum vitâ gratiæ vivat, quia perfectè contritum non esse supponimus, motus tamen vitales ab auxilio actuali prodeuntes in se experitur, viam vitæ ingreditur, mortem suam horret, fontem vitæ sitit, quam in Christo potabit. Sicut enim Sacramenta mortuorum vivis prosunt, cum inveniunt perfectam in suscipientibus contritionem; ita mortuis per accidens prosunt sacramenta vivorum, cum sincerum vitæ desiderium in illis inveniunt.

*Quæres 3. Quonam tempore vel momento Sacramentum Eucharistia rectè dignèque susceptum ordinarios suos effectus largiatur?*

Respondeo certum quidem esse gratiam dignè Eucharistiam suscipientibus conferri; quo autem manducationis instanti, solum illum scire qui efficit Deus. Varias Authorum sententias referam, non ut instantium minutias subtiliùs curiosiusque discutiam; religionis enim esset inanibus argutiis chartas implere: sed ut inde elicias, in expendendo pretiosissimo Communionis tempore totum te conferre, omnemque tuam adhibere curam oportere.

Primò existimant aliqui cum Becano tunc gratiam sacramenti conferri; cum hostia primum sumpta est, antequam in stomachum trahatur, vel per guttur diffuat. Quia in ore verè incipit manducatio cibi corporei, cujus ibi sapor & suavitas degustatur. Similiter ergo dum Eucharistia ore sumitur, mens divinâ gratiâ saginatur. Ex qua doctrina sequitur gratia sa-

cramentalis fructu illum minimè cariturum, qui autè perlatas ad stomachum species sacramentales moreretur. Verba enim Scripturæ, *Ioan. 6.* quæ ad fructus Eucharistiæ percipiendos manducationem præscribunt, peræquè de manducatione inchoata, quàm completa intelligi possunt. Cùm enim ad manducationem perfectam quatuor ordine desiderentur, sumptio oralis, transitus per guttur, receptio in stomacho, & digestio vi caloris naturalis elaborata: sicut non caret fructu Eucharistiæ qui species præ infirmitate evomit nec digerit, ita qui eas morte occupatus deglutire nequit; quia licet ille qui cibum in ore habet aut atterit ut illum exspuat, non manducare, sed mandere dicatur; ille tamen qui ore sumit ut sorbeat si possit, manducare in humana societate & communi opinione censetur. Hæc sunt hujus sententiæ momenta probabilia: sed unum ex ea certum compendium collige. Enitere ut quod ore sumis purâ mente capias; dum sacramento os corporis aperis, ore animi (qui intellectus est, juxta illud, *Os justî meditabitur sapientiam*) præsentem Christum fide respice, religione adora, spe te illi committe, charitate amplexare, mente contingere, cordis manu suscipe, haustu interiori assume, denique dilata os tuum, & implebit illud.

Secundò alii cum Suare existimant gratiam Eucharistiæ tum in mentem infundi, cùm species deglutiuntur, & per guttur diffluunt; quia, inquiunt, qui cibum in ore tenent, nec sorbent, comedere nequaquam creduntur. Quomodo ad hoc respondere possit prima opinio, jam tetigimus. Sed utut sit, ex hac sententia colligo,

gito, non sufficere ad uberes Eucharistia fructus percipiendos cœlestia celeriter, breviter, leviter, & perfunctoriè meditando perstringere, & veluti superficie cogitationis attingere: spatium ergo nobis ad cœleste epulum mandendum, ruminandum, gustandum, deglutiendumque sumere oportet. O morem præclarum eorum, si quidem illum teneremus! qui post perceptum cœlestem cibum sedent solitarii, & levantes se supra se, à terrenis omnibus segregati, quæ sursum sunt quærunt, quæ sursum sunt sapiunt, & in ipsum pietatis authorem & Deum majestatis in pectora sua inclinatum toti aligeri pervolant, & requiescunt. Et sicut margaritifera conchilium ut unionem pariat, falsis & amaris Oceani undis supernatat, sinumque suum uni de cœlo lapso blandissimo rori aperit, moxque testam stringit, ut ne cœlestis imber marinæ aquæ contagione inficiatur: Sicut etiam utres pellium ab omni squallore purgantur, pigmentisque liniuntur odoratis, ut saporem vini possint inviolabilem custodire: ita anima sancta ab omni carnalium cogitationum & curarum concretione attollitur, quò fiat uter divinis torcularibus aptus, atque de prælo crucis, de latere pendentis, de calice altaris accipiat vinum novum germinans virgines, & incorruptam novitatem divino Christi rore impressam conservet.

Tertiò Sotus, cui plures assentiuntur eruditi, contendit illo in instanti sacramentum Eucharistia in idoneum suscipientem gratiam operari, in quo primo primum verum est dicere: Nunc est sacramentum assumptum & in stomachum vitaliter transfusum; quia tunc quoque

verum est manducasse illum cibum porrectum. Et certè cùm gratia hujus Sacramenti producat in instanti, non videtur momentum aliud eo aptius & opportunius posse assignari, in quo verè Sacramentum susceptum est, & per modum cibi applicatum. Quæ sententiâ probabilitate non caret. Quid autem ex illa ad pietatem inferendum sit, postea clarebit.

Quartò alii censent tum Sacramentum intrus in animam operari, cùm species sacramentales in substantiam alicui convertuntur, ut simul corpus nutriatur, & anima de Deo saginetur. Sed rigorosior videtur aliis ea sententiâ, quia in infirmis præsertim contingere sæpe potest, species præ debilitate agroti non concoqui, & in alicui substantiam transmutari, qui tunc fructu sacramenti orbabitur, tametsi sacramentum manducaverit. Quod non parum durum apparet. Nec est simile de cibo corporali & sacramentali; ille enim non nisi mediâ digestionis suum sortitur effectum: at cibus sacramentalis non concoctione, sed sensibili sumptione operatur.

Quintò Cajetanus censet Eucharistiam toto eo tempore gratiam in animam affundere, quo species sacramentales in stomacho perseverant. Quæ opinio absolutè & nullo interpretamento prolata aliis displicet: tum quia etsi Christus gratiam promiserit manducantibus Eucharistiam, non eam tamen pro toto manducationis tempore spondit. Tum quia licet Eucharistia sit Sacramentum permanens, actio tamen sacramentalis uno instanti perficitur, quia agit in virtute Dei, quæ nullis temporis morulis eget. Tum potissimè, quia sequeretur melioris  
cum



eum futurum esse conditionis , qui majorem specierum quantitatem sumeret , vel qui præ caloris nativi debilitate in digerendis speciebus diutiùs laboraret ; ac proinde in aliquid merè naturale Eucharistiæ gratiarum diversitatem, quod absit, refusam iri.

Quare Cajetani sententiam moderabimur, & probabilem efficiemus , si dicamus Eucharistiam toto tempore , quo in stomacho subsistunt haustæ species , gratias effundere , modò tamen interioris dispositionis fervor accrescat. Si enim Christus sit Sol justitiæ , quidni rectè dispositos jugiter illustrabit , & quandiu præsto ac præsens est , longè plura animæ sanctæ conferet bona , quàm soleat lux aspectabilis mundo largiri , ipsomet dicente , Joan. 9. *Quandiu in mundo sum , lux sum mundi* ? Si Christus sit fons , quidni ab eo continuo manabunt & scaturient fluentia gratiarum in omnes animæ facultates veluti alveos redundantia ? Si ignis sit consumens peccata , consummans virtutes , quidni implebit illud à se prolatum : *Ignem veni mittere in terram , & quid volo nisi ut ardeat* ? Si est panis vivus & cibus animarum , quidni cibi corporei virtutem æquabit , qui toto tempore quo in stomacho permanet corporaliter prodest ? Ergo dum Christus suæ nobis præsentiae copiam facit , omnium nos cœlestium charismatum , quam veluti exstillat ubertate beat ; modò , ut dixi , divinum hospitem virtutum actibus demereatur , ejusque gratiam auspicetur : quia nihil cœlestis sponsi diuturna præsentia conferet , nisi thalamum ornet aurum dilectionis , argentum sapientiæ ; viror spei , virtutum actuum gemmæ , sanctitatis vela,

verecundiæ rosæ, violæ humilitatis, lilia castitatis.

Denique alii affirmant, quod cum actio comestionis magnam habeat latitudinem, multum temporis & plura instantia consumat, non est præcisè determinandum ullum instans, sed potest esse quodvis à principio sumptionis specierum usque ad earundem consumptionem & in substantiam hominis conversionem. Ex quo inferunt, quod si homo in primo manducationis instanti cum sufficienti dispositione rectè compositus accedit, sine mora in illomet instanti Eucharistiæ effectus percipiet; si secus, & tamen durantibus speciebus animum instruat, purget, elimet, inflammet, gratiam Sacramentum infundet cum mentem invenerit sic paratam. Et ratio esse potest, quia Eucharistia est sacramentum permanens, non in usu & actione consistens; unde per omnia & singula instantia quibus in homine perseverat, gratiam producere potest, quam non solius ratione manducationis, sed præcipuè ratione cibi manducati Christum realiter continentis operatur. Quandiu ergo Christus adest (adest verò quandiu permanent in stomacho species) tandiu gratiam sacramentalem Eucharistia producere poterit, & reapse producet statim atque aptam invenerit interioris hominis compositionem.

In hac sententiarum varietate si incertus animi & sententiæ sis, illud pro certo habeto tamen quod Patres spiritales inculcant, pretiosissimum nimirum sacræ Communionis tempus sedulò impendendum esse, ut nimirum tantum quantum quisque potest nitatur, quò  
præcla

præclara ex eo cibo vitæ spiritualis compendia reportet. Intende ergo animum, Lector, & in omnes pretiosi temporis moras totâ mente, toto animo & studio omni incumbere. Effuso sinu Christum venientem excipe, præsentem fide adora, charitate amplexare, & totum te in ipsum profunde, ut Spiritus sancti calorem divino illi cibo concoquendo necessarium Deo opitulante accendas.

Quæri duo hîc solent: primò utrum per peccata venialia Eucharistiæ effectus impediatur, Secundò utrum plus gratiæ duplex quàm una Eucharistiæ species suscipientibus peræquè dispositis ex operæ operato conferat. Sed de utroque dissertatione sequenti, ubi de usu Eucharistiæ agendum est, fusè dicemus.

### REFLEXIO.

Quæres demùm cur è tot Eucharistiam frequentantibus tam pauci præclaros Eucharistiæ fructus ex eo bonorum omnium thesauro capiunt? Non argumentis, sed gemitibus huic difficultati, quam propterea in hanc usque reflexionem protulimus, satisfaciendum reor. Lugeamus, mi Lector, lugeamus tot quæ in Eucharistiæ usu nefanda admittuntur piacula. Lugeamus impietatem, injuriam, sacrilegia, quibus tremenda Christi realiter præsentis majestas quotidie & pluries violatur. Sed uberibus etiam lacrymis prosequamur novam Christianorum his extremis temporibus fiduciam, qui defluentibus è mensa Domini micis cum indigni sint, tum maximè se ipsi suâ sponte filiorum pane dignantur. Quis in religionis

gionis rebus, in Patrum decretis, in Sanctorum exemplis adeò hospes est & peregrinus, cui praxis illa probari potest, quâ manna cum allis, cepis & pomis Ægypti, panem filiorum cum filiquis porcorum, pietatem cum sæculi voluptate, Evangelii maximas cum axiomatibus mundi, usum Sacramentorum cum fruitione profanorum placidâ versutiâ bellè & solenter componentes, Patrem adorare posse se putant in spiritu & carne, veritate simul & vanitate? Hinc post innumeris vicibus frequentatam Eucharistiam homines cernimus amore mundi plenos, concupiscentiæ & cupiditatibus semper morem gerentes, & doctrinarum illarum amantes, quæ licentiæ & intemperantiæ lenocinantur. Hinc tantam passim vigere cernimus usurarum & vindictarum crudelitatem, tam profusum ubique etiam in extremis hujus sæculi paupertatis angustiis luxum, tam effrenatam maledicentiam, postremò tam perennem in vitiis contumaciam. In tam sæva morum disciplinæ persecutione, quo latiori eo desperatori, eoque periculosiori quo interiori, non à Paganis, non ab Hæreticis, sed à filiis illata, tantòque infestiori, quantò à minimè suspectis manibus intentata, nonne hæc idoneam tuis magis lacrymis & voluntariis afflictationibus quàm speculationibus materiam ministrant? Quis crederet, nisi cerneret, Eucharistiam non à tyrannis jam, non ab hæreticis aut apostatis tantum, non à Lutheranis modò & Calvinistis cæterisque apertis perduellibus, sed à Catholicis, sed à tuis, Lector, sed à meis moribus vexari? Quis sibi persuaderet intus & in sinu suo hostes suos fovere Ecclesiam; hostes,



ites, inquam, & filios; unam fidem, unam legionem profitentes; e cœlo delapsam fidem inferno natis moribus deturpantes. *Olim prædictum est*, inquit Bernardus spicula cum solito mellē fundens serm. 34. in Cantica, & *nunc tempus impletionis advenit: Ecce in pace amaritudo mea amarissima. Amara prius in nece Martyrum, amarior post in conflictu hæreticorum, amarissima nunc in moribus domesticorum. Non fugare, non fugere eos potest, ita invaluerunt & multiplicati sunt super numerum.*

\* Post obortas lacrymas fusas hæc moralis huius quæstionis rationum momenta accipe. Si ignitum eloquium, teste Bernardo, non capit frigidum pectus, vitalis cibi fructus mortuum cor quomodo recipiet? Ad ejusdem Solis accedentis radios duratur lapis, cera liquefcit: quid mirum igitur si ex usu Solis justitiæ, qui justus est justificetur adhuc, & qui in sordibus est sordescat adhuc? Cibi saporem non percipit obductum vitiato humore palatum, illique non sano pœna est panis qui sano est suavis, & oculis ægris odiosa lux quæ puris est amabilis. Quis ergo castissimas purissimi Sponsi delicias & panis Angelorum utilitates percipiet, cujus mentem veluti tetra nubes cœlum obscurant fæces vitiorum; cujus cor sicut ventorum turbines elementa, sic confundunt æstus passionum; cujus pios affectus velut navem fluctus, sic demergit terrenarum sollicitudo nugarum.

Non pascit nos Christus, ut alibi ex Patribus observavimus, nisi pascatur à nobis. At enim Christus non sordibus delectatur & cœno; non fœtore criminum, non squallore pascitur vitiorum. Væ nobis qui eandem ad Christum

stum recipiendum mentis compositionem afferimus, quæ magis esset ad recipiendum diabolum, si nobis porrigeretur, idonea. Nonne peccatorum ille corda peteret in hospitium, qui mitti se in porcorum gregem mitti postulavit? *De monumentis*, inquit Chrysologus serm. 16. *mitti se precatur in porcos; quia foetores amittere nescit, sed mutare. Cœnum petunt ruentes cœlo; post æthereas habitationes ambiunt volutabra porcorum.* Diabolus ergo, non Christum pascit, cujus cauteriata conscientia foetores semper fundit & putores. Hinc post acceptum indignè à Juda sacrum epulum, confestim diabolus in cor ejus intravit, quia autore Ambrosio in psal. 37. *Sicut Sancti corpus & membra sunt Christi, ita peccatores qui peccatum non deserunt, sed peccato inhaerent, corpus draconis & membra sunt. Ideo nos Christi corpus epulamur, illi autem epulantur corpus draconis.* Ita planè ab eo quem pascunt ipsi & pascuntur. Pascitur autem malis nostris diabolus, qui semper nostris saturatur ex culpis. Ille, inquit Chrysologus serm. 12. *capit satietatem, quando nos luxus solvit, lucra capiunt, usura vinciunt, chirographa ligant, premunt sacculi, felidit aurum.* Sed quod deplorandum & juxtà horrendum est, cum diabolo placidè vivunt peccatores; ejus tartareum foetorem lubenter ferunt, quem nec porcorum natura valuit sustinere, maluitque demergi in mare & fluctibus deperire, quàm ejus immunditiam pati, & putredinem tolerare.

## SPECVLATIO III.

*Aliis à suscipiente Sacramentum  
Eucharistiæ directè non prodest  
quidem, at indirectè tamen.  
Piissimus communionis pro mor-  
tuis ritus, & sacra de ea Con-  
gregationis iudicium explicatur  
& defenditur.*

Antequam hanc assertionem suadeamus,  
Aex eaque Eucharistiæ Sacramenti fructus  
uberrimos in alios etiam diffusos demonstre-  
mus, præ oculis habenda est hujus divinissimi  
Sacramenti dignitas singularis, quæ etsi ex di-  
ctis satis superque constet, paucis tamen de ea  
in hujus speculationis limine præfabimur, ut  
pateat quantum se ad hominum utilitates  
hujus Sacramenti virtus porrigat & explicet.  
Eminentia autem hujus sacramenti, si diligen-  
ter attendimus, ex rebus quas eximias conti-  
net omnino petenda est. Etenim sub vilium  
specierum integumentis Christum, perfectum  
Deum, perfectum hominem, quo proinde  
omnis increata & creata nobilitas continetur,  
Eucharistia includit. Omnia habemus in hoc  
Sacramento: summum & per essentiam bonum  
divinitatis, animam omnibus gratiarum orna-  
mentis cumulata, corpus numeris omnibus  
absolu

absolutum, è purissimo Virginis immaculatæ sanguine Spiritus sancti arte elaboratum. Hinc Sacramenti hujus sanctitas immensa deducitur, cum in ipso omnis plenitudo divinitatis, omnis gratia humanitatis, omnis virtus passionis & mortis Redemptoris inhabitet. Ex quibus patet Eucharistiam esse Sacramentorum finem, religionis centrum, sacrorum rituum consummationem, bonorum abyssum, thesaurum Ecclesiæ, animarum sanctarum in hac valle plorationis solatium & beatitatem. Patet etiam nihil Eucharistiâ Deo gratius offerri posse vel acceptius, cum æternum paternæ dilectionis objectum paterno cordi in altari Ecclesiæ sistat infinitis bonitatis & amabilitatis illiciis vestitum.

Præmoneo rursus, quod cum bonum sit sui diffusivum, quo nobilior est res, eo in alia virtutem suam profundere nata est. Sacramentorum ergo nobilissimum totum est in aliorum utilitates comparatum. Prodest quippe militantibus in Ecclesia, quos pascit, & roborat; languentibus in Purgatorio, quos solatur, eorumque piaculares ignes veluti sanguinis sui quotidie oblatis rore temperat. Beatis etiam in cœlo regnantibus, quos gaudiis accidentalibus auget. Quæ omnia de hoc Sacramento ut simul sacrificium est, facile intelligi & commodè explicari possunt. Eucharistia enim in ratione sacrificii considerata sumentibus & non sumentibus prodest, quatenus pro omnium salute offertur. Sed de sacrificio deinceps; impræsentiarum de uno Sacramento sermonem institui.

His prælibatis

Prior speculationis pars affirmans Sacramentum



metum Eucharistiæ unis suscipientibus directè prodesse, sic ostenditur. Ea est Sacramentorum omnium conditio, ut in illos suos effectus effundant, quos sanctificant, in quos agunt, & quibus applicantur. Unde sicut cibus unis manducantibus per se & directè prodest, medicina solis eam sorbentibus opitulatur: ita cœlestis divinæ Eucharistiæ cibus unis sumentibus ex opere operato opem fert, quos ad modum alimenti nutrit, & sanat ad modum medicinæ.

Posterior pars contendit Sacramentum hoc aliis à sumentibus indirectè prodesse, quatenus nimirum dum pio Eucharistiæ usu suscipientium fervor accrescit, *per quandam concomitantiam ad principalem effectum*, ut quæst. 79. art. 5. loquitur S. Thomas, *homo consequitur remissionem pœnæ*, non solum sibi, sed etiam aliis, cum remissionem pœnæ possit aliis communicare. Hoc enim postulat Sanctorum communio, quam in Symbolo profiteamur, & in qua Regius Propheta exultabat dicens: *Particeps ego sum omnium timentium te, & custodientium mandata tua*. Postulat sacrum Indulgentiarum commercium, quas per modum suffragii mortuis impertimur. Cum enim remissio pœnæ extrinseca sit, eam quisque potest pro aliis Deo offerre; & quod sibi proprium est per laborem, in alios diffundere per amorem, absque ulla internæ sanctitatis iactura, vel gratiæ ullo detrimento. Ergo sicut pœnæ temporariæ remissionem pœnitentiæ exercitationibus partam atque per Indulgentias obtentam, ita & illam è tanti Sacramenti usu haustam in Ecclesiam patientem charitate derivare potest, qui ad Eucharistiam accedit.

Accedit

Accedit 1. quod cùm per Sacramentum Eucharistiæ spiritualis hominis vires in nobis fiant ampliores, iis roborati pro animabus languentibus & fervidiùs oramus, & Deum faciliùs exoramus. Ergo prodest piè frequentata Communio mortuis, dum vivorum preces efficit valentiores. Etenim anima sancta pane vivo pasta, & in ipsum mutata ita ab humanis defæcatur, ut tota lique scat in Deum. Tunc sicut speculum pellucidum totam solis exprimit gloriam, sic illa etiam in isto humani corporis obscuro totâ fulget Christi claritate. Gloriam ergo Domini præsentis speculari, & transformata à claritate in claritatem tanquam à Domini spiritu, non tam ipsa, quam Christus in illa orat & postulat gemitibus inenarrabilibus, ut eos Deus illuminet, qui in tenebris & in umbra mortis sedent, ad dirigendos pedes eorum in viam æternæ pacis. Quid animæ sic per Christum quo plena est petenti, vel ut meliùs dicam, in qua Christus (cui qui adhæret unus spiritus est cum illo) ipse rogat, denegabitur? Sic petens, nonne accipiet; sic quærens, nonne inveniet; sic pulsanti nunquid non aperiatur? Exaudietur profectò Christus pro reverentia sua, nec in respondendo faciet moram, dum vota supplicum ipse format qui repulsam pati nequit Filius dilectus, in quo tam sibi complacet Pater. Magnam nobis fiduciam Salvator indidit, & veluti instillavit, quando quibus oraremus preces ipse dictavit, & orandi thema, materiam petendi, supplicandi normam & formulam paucissimis in verbis ille ipse qui à nobis exorandus est indulgit; at fiduciam auxit, perfecit, convicit, implevit

plevit, cumulavit, quando in corde nostro ipse orat pro nobis in nobis, & de iudice factus est advocatus. Itaque dum fidelis Christo plenus, & in Christum mutatus (formatur enim Paulo auctore Christus in nobis) pro animabus in Purgatorio ad æternam requiem suspirantibus Patrem misericordiarum & Deum totius consolationis supplicat, cunctationem merito credit ablatam impetrandi, imò collatam fiduciam promerendi, quando illum in se sentit orantem quem Pater semper audit. Quomodo metus ibi locum haberet, ubi à Patre Filius pietate interprete desiderat quæ sancta sunt impetrare? Non amovebit orationem nostram & misericordiam suam à nobis Pater, dum per Agnum immaculatum quo pascimur, non impia, sed pia; non terrena, sed cœlestia; non illecebris, sed virtuti congrua; non digna odils, sed apta concordia, denique digna se à se viderit postulari.

Accedit rursus, quod cum omne opus bonum à viventibus elicitum per meritum communionem utile possit esse defunctis, dubitandum non est quin piè suscepta communio, quæ est eximium christianæ pietatis operæpretium, religionis professio, pœnitentiæ laborum fructus, & virtutum omnium coronis, animabus Purgatorii per dilataram extensæ charitatis abundantiam possit esse proficua. Maxime quia in sacra Communione non sola attenditur Sacramenti applicatio, quæ in cibi cœlestis & specierum glutitione sita est; sed sanctæ præparationis labor & difficultas pensatur, qui & probationem, & confessionem sacramentalem,

&c

scelerum per satisfactionis exercitationes purgationem à peccati mortalis consciis, & virtutum internarum apparatus ab omnibus exigit. Quà sanè susceptione totius corruptæ naturæ vires excedente nihil laboriosius, nihil difficilius, nihil proinde ad satisfaciendum etiam pro aliis aptius esse potest. Ergo sacrae communioni sic consideratae conveniunt duæ illæ dotes, quibus instructum opus aliis potest esse salutare, vis nimirum merendi ex bonitate fluens, & satisfaciendi pro alienis pœnis potestas ab opere bono laborioso indivulsa.

Merito ergo sacra Congregatio autoritate Apostolicâ sibi commissâ librum P. Theophili Raynaudi, quo communionem pro mortuis tanquam errorem popularem refellit, post accuratum examen proscripsit. Noverant quippe Eminentissimi Patres orationes post Communionem, & in ipso Communionis usu ad Deum fusas, & Christi præsentis sacro igne succensas fervidiores esse solere, subindeque aliis ex consequenti prodesse Communionem, unde tota quanta orationis efficacia proficiscitur. Et certè si Altaribus, Rosariis, & Sanctorum sacris Iconibus indulgentias ad augendam Fidelium pietatem, & in divina reverentiam liberalitas Apostolica adjungit, quæ possunt in animas defunctorum effusione charitatis per modum suffragii transferri; quidni sacrae Communionis digno usui indulgentiarum beneficentia annecti poterit, quæ in mortuos piâ extensione derivabitur?

Sed inter cæteras Raynaudi opusculi exercitationes, illa nisi mea me fallat opinio, Purpuratorum animos & pietatem commovit, & justissimè



ftiffimè exacerbavit, quâ scribere non dubitavit: *Consensus connubiales mortuis magis Eucharistiâ prodesse: Eucharistiam nihil habere peculiare prater Matrimonium: & mirari se ad-versarios non invitare fideles ad illud pro mortuis ineundum.* Vah spurcissimam comparationem, quam inter scribendum timebam ne atramentum ipsum rubesceret! Non placet in iis sordibus diutiùs versari; nec multis in ea comparatione confutanda morabor, quâ auditâ, pie Lector, mox cohorruiſti, & tacitâ execratione omni argumento validiore prosequutus es. Non enim ita te, mi Theologe, communissimas christianæ pietatis notiones ignorare reor, ut censere possis Sacramentum præstantissimum nihil habere eximium & singulare. Non ita te præjudiciis occupatum vel abreptum arbitror, ut multis tibi persuadere opus sit, inæstimabilem Christi realiter præsentis felicitatem amplexus materiales per se sordidos, & à nobis non nominandos non adæquare. Neque unquam, ut opinor, miratus es, cur non æquè ad frequentiam matrimonii atque ad frequentem Communionem Rectores animarum hortati sint. Non arbitror te nescire quod omnes norunt, Eucharistiam Ecclesiasticæ unitatis sacramentum, Christumque quo tota Ecclesia consolidatur realiter continens, speciali jure aliis Sacramentis minimè communi posse in alios sese diffundere, dum charitatem accendit quæ omnibus omnia fit, & orationem inflammat quæ in omnes potissimum miseros dilatatur.

Et tamen his levissimis argumentis Theophilus ductus scribere non erubuit, Communionem

nionem pro mortuis à Summis Ecclesiæ Capitibus apertis Indulgentiarum thesauris confirmatam & promotam, esse *serdem non ferendam, piam fraudem, escam falsi fructus, stropham prætectu pietatis tectoriæ falsitatis*. Libenter hîc cum Augustino scripserim: *Valeat ad seipsam persuadendam ipsa evidentia*. Valeat ad Lectores & Christianos omnes ab iis avertendis ipsa verborum improbitas, & non occulta, sed ultrò oculis se ingèrens sceditas spurciloquii. Post illa verba ne expecta ut alia ejusdem opusculi errata producam, quò Romanæ censuræ æquitas pateat.

### REFLEXIO.

*Languentibus in Purgatorio subveniat tua compassio*. Subveniat jejuniis, precibus, elemosynis, sed potissimè divinissimi Sacrificii hostiâ, & orationibus post sacram Communionem fuis. Si enim; teste Augustino in *Enchiridio cap. 107.* nonnulla religio est mortuos iis sepelire locis qui sunt Martyrum reliquiis venerabiles, quatenus dum recolimus eorum quos diligimus corpora ubi sunt posita, eorum animas sanctis Martyribus commendamus: magna sine dubio religio erit pro iisdem vel Missæ sacrificium, vel fervidas, Christoque per sacram communionem præsentî conjunctas orationes Deo sistere & offerre.

Justum est sanè, ut in aliorum charitas nostra fundatur, cùm charitas Dei tanto nos Christi corporis beneficio dignata est. Hæc enim est divinæ providentiæ constituta lex, ut non semel Augustinus nos docuit, ut qui à potenti-  
tiori

tiori se vult adjuvari , adjuvet & inferiorem , si est ipse potentior : *Beati enim misericordes, quoniam ipsi misericordiam consequentur.* Matthæi 5. Et sicut nihil tam secundum naturam est, uti lib. de officiis scripsit Ambrosius , quàm juvare consortem natura : ita nihil tam secundum gratiam & charitatem est quàm calamitosi , iisque Dei amicis opem & suppetitas afferre. Ne timeas meritorum & satisfactionum tuarum jacturam vel imminutionem , ea si in eos miseros piâ liberalitate profuderis , à quibus referendæ gratiæ vicem sperare meritò potes. Oleum quippe pietatis & miserationis unguentum quanto copiosius in fraternas necessitates effunditur , tanto donis potioribus augmentatur. Quàm gratum tibi quod aliis porrigis debet esse subsidium , quòd danti magis crescit in commodum quàm suscipienti proficiat in augmentum : ut sic in una mercatione , quod rarò solet emergere , uterque videatur desiderata commoda percepisse. Esto itaque dives in misericordia , si semper esse vis dives in gratia.

Ergo inter sacras cœlestis convivii delicias ne ita divinæ torrente voluptatis capiaris , quin piam compassionis tristitiam suscipias , & si dici potest , bonam miseriam , quæ novit flere cum flentibus , & imbre lacrymarum ignem tribulationis attemperat. Mi Lector sanctarum animarum in piaculari Purgatorii carcere degentium multum & molestum languorem animo intueri : nec clam te est quantus in illis dolor insit , quantum eas gloriæ & beatitudinis spes dilata affligat. Adcône te ignavum putem, adcône porro durum , aut inhumanum , aut

ferum, ut neque te calamitas, neque christiana  
 charitas, neque misericordia commoveat, ne-  
 que commoneat, ut miseris auxilium tuum  
 præstolantibus feras opem? Unum hoc scio,  
 nec te latere reor, has meritas esse ut memor  
 esses earum, par pari aliquando rerum relatu-  
 rarum. Per pietatem ergo tuam, per fidem  
 tuam, perque earum solitudinem oro & obte-  
 stor te, eas ne in miseria deseras, neque dere-  
 linquas. Si te alienæ calamitatis sensus per-  
 cellit, si te communis & catholica urget cha-  
 ritas, si te parentum, fratrum, familiarium amor  
 sollicitat, esto illarum apud Christum orator,  
 & sacræ Communionis occasionem tibi osten-  
 ratam, tam brevem, tam utilem, tam salutarem  
 ne amitte, sed precibus insta, ut Christo refe-  
 ctus Christi adjutor sis, & quæ, ut loquitur Apo-  
 stolus, desunt passioni Christi, ipse adimpleas.  
 Hoc modo Deum tibi totum devincies, qui unâ  
 flectitur, unâ cogitur, unâ nobis charitate com-  
 paratur. Præclarè alicubi Marsilius Ficinus:  
*Vanalis est Deus; at quo nummo? Quo te emit,*  
*charitate.*


In fine hujus capituli & recensitionis effectuum  
 qui ab Eucharistia proficiscuntur, ad ipsam  
 recurramus originem, suo beneficia reddamus  
 fonti ut iterum fluant. Citò enim gratiarum  
 cessabit decursus, ubi recursus non fuerit; nec  
 modò nihil novum derivabitur in ingratum, sed  
 quod accepit, in perniciem ei vertatur necesse  
 est, quia ingratitude est beneficiorum perditio,  
 ventus urens, siccans fontem pietatis, rorem  
 misericordiæ, fluentia gratiæ. Ergo ut censea-  
 mur digni muneribus amplioribus, simus in ac-  
 ceptis fideles.

Immenſa



Immensa sunt, Domine Jesu, quæ in Eucharistia profundis divinæ largitatis tuæ beneficia; sed hæc quantaquanta sunt, quid tandem sunt tibi nobis datæ comparata? Sacra Sponsa Cant. 5. post enumeratas desiderabilis sponsi dotes, post enarrata beneficia & fluentia plenissima ex omnibus ejus membris jugiter manantia, in ipsum demum beatissimum sponsum tota rapta sic concludit: *Talis est dilectus meus*, id est sic beneficus, sic liberalis, sic effusus; sed quod me stupore unâ & amore defigit, *ipse est amicus meus*. Ipse, ipse in quem desiderant Angeli prospicere; ipse paterni cordis deliciæ, ipse paradisi beatitudo, ipse totus desiderabilis, majestate immensus, potentiâ infinitus, perfectione incircumscriptus; *ipse est amicus meus*. Quas gratias raras contulit, quæ beneficia profudit innumera, pluris ut par est facio: sed hoc unum cogitationes obruit, hæc me tanta, tam insperata dignatio confundit; *ipse est amicus meus*. Hoc super omnia mihi ipsū reddit amabilem, hoc omnino amorem meum facile vendicat totum sibi; hoc, inquam, est quod meam devotionem & blandè allicit, & justè exigit, & arctè stringit, & suaviter liquefacit, & afficit vehementer. Multa sunt quæ pro me Christus dixit, magna quæ fecit, majora quæ pertulit, maxima quæ promisit, inter illas tamen omnes infiniti amoris significationes, non tam placent dona, quàm placeat qui donavit. Sed enim licet ubique placeat, in Eucharistiæ tamen umbra dum latet magis adhuc placet, quia non principatum ibi affectat, sed consortium, sed familiaritatem; ibi unus amor splendet qui dominum sin nescit, certè

abscondit. *Vides amorì cedere etiam majestatem,* inquit Doctor Mellifluus *serm. 59. in Cant. Proprietatem abnuìt, societatem non respuit.* Verè in Eucharistia tanquam, imò omninò unus ex nobis, verè Emanuel, id est nobiscum Deus; quid, inquam, nobiscum? Unum cum ipso, sicut ipse rogavit efficimur. Suspiciant alii fructus, ego arborem mirer; alii fluminis impetus civitatem Dei lætificantes, ego flumen & fluminis fontem; alii radios, ego Solem; alii opera, ego opificem; alii effectus, ego factorem; cujus eo in opere potentiam, in modo sapientiam, in causa charitatem nunquam satis commendabilem, nullis unquam gratiarum actionibus æquandam iterum atque iterum, & utinam æternùm benedicamus in sæcula sempiterna.



## DISSERTATIO IV.

*De usu Sacramenti Eucharistiæ : ubi  
de frequenti Communione.*



**E**ST Sacramentum Eucharistiæ in aliquo permanenti situm sit, & in consecratione materiæ perficiatur, non prodest tamen nisi sumatur. Hac de causa scripsit S. Thomas *q. 79. art. 5. in corpore, & art. 7. ad 3. Eucharistiā habere rationem Sacramenti in quantum sumitur.*

& *sumptionem pertinere ad rationem sacramenti.* Quibus verbis non intendit S. Doctor usum & sumptionem esse de ratione essentiali Sacramenti, cùm innumeris locis tradat hoc Sacramentum non in usu, sed in unius consecratione materiæ essentialiter perfici, ut videre est q.73. art.1.ad 3. q.74.art.2.ad 3. *quæst.80.art.1.ad 1.* ubi etiam addit, quod *usus est quid consequens hoc sacramentum.* Vult ergo solum Eucharistiam habere rationem Sacramenti producentis suos effectus, & in tantum in ratione Sacramenti unicuique valere & prodesse, inquantum sumitur. Ad eum planè modum quo approximatio ignis ad lignum de ratione calefactionis dici bono sensu potest, quia conditio est sine qua non calefacit ignis. Sed de his pluribus egimus, quando de hujus essentia Sacramenti in superioribus disputatum est.

Sed antea quàm ulterius progrediamur, observandum est triplicem esse sumendæ Eucharistiæ modum: alius est merè sacramentalis, peccatoribus ipsis communis, quis licèt premant dentibus Sacramentum corporis & sanguinis Domini, non propterea fructum capiunt sacramenti, sed impuro ore & corde tam pura mysteria tranctantes, iudicium sibi manducant & bibunt.

Secundus modus est merè spiritalis, quando viri iusti fide vivâ, charitate non fictâ incensi cœlestem panem esuriunt, ut Christo, ejus amore tenentur, arctissimè copulentur. Qui modus viris spiritalibus pretioso maximè Missæ tempore familiaris, sin omnes, maximos certè utilitatis fructus ex Eucharistia consequitur.

Tertius modus est sacramentalis simul &

spiritualis, quando fidelis non solum spiritu, sed etiam sacramento Eucharistiam percipit, qui nimirum ex præcepto Apostoli prius se probavit, & veste nuptiali ornatus nedum à peccati mortalis labe mundus est, sed etiam venialium affectum abiecit, interiorum domum lacrymis rigavit, omni denique virtutum ornatu instruxit, ut floridum venienti sponso thalamum pararet: unde mixtâ reverentiâ Centurionis cum ardore Magdalene, & Christi majestatem tremebundus adorat, & tantam dignationem multâ dilectione prosequitur.

Assimilatur hæc triplex Eucharistiæ susceptio triplici Verbi Divini conceptioni, quæ vel mente duntaxat, vel corpore solum, vel utroque junctim modo contingere potest. Si has conceptionis partes & modos conferans, inanis est conceptio corporis si absit conceptio mentis: nec enim ubera quæ Christus suxit, nec qui ipsum portavit venter beatificarentur, nisi sacra Parens corde Verbum Dei audivisset, & illud custodivisset. Porro secunda conceptio mentis utilissima est, & Christianis omnibus necessaria; ad hoc enim Christiani sumus, ut spiritu renovati & regenerati Christum induamus; ad hoc Apostolus parturiebat, ut formaretur in nobis Christus. Denique tertia conceptio character est Dei matris, quæ corpore Filium Dei genuit quem mente conceperat; & hic modus cæteris omnibus longissimè antecellit. Ita de usu communionis dicere licet: Longè præstat communio spiritalis merè sacramentali; sed si sacramentali adjicias spiritalem, id est purum charitatis, religiosa humilitatis, cæterarumque christianarum virtu-



tum affectum, uberrimos capies fructus, & Deiparæ maternitatis felicitatem quadantenus æmulabere.

Hanc distinctionem Catholici omnes post sacrum Concilium Tridentinum *sess. 13. de Eucharistia, cap. 8.* amplectuntur, quam negarunt olim quidam hæretici, quorum meminit Guitmundus *lib. 1.* opinantes panem & vinum ex toto quidem mutari; sed indignis ad communicandum accedentibus, carnem Domini & sanguinem iterum in panem & vinum reverti. Quod idem testatur Algerus *in Prologo*. Quia usque adeò ab indignis non posse recipi corpus Christi nonnulli arbitrabantur, ut referente eodem Guitmundo sub finem libri 3. mallent dicere partem panis consecrari in corpus Christi propter dignos suscepturos, partem verò propter indignos immutabilem retineri.

Eandem distinctionem negavit etiam Hæresiararcha Calvinus *lib. 4. instit. cap. 17. §. 33.* contendens impios & sceleratos à Christo alienos corpus Christi non edere, quia nimis indignè, inquit, laceraretur Christus, si prostitueretur incredulis. Addit porro eo sensu corpus suum dare Christum indignis, istosque subinde reos esse corporis & sanguinis Domini, quia id indignis præstare paratus est quod rejiciunt. Unde conatur inferre non labascere fidem promissionum Dei, quia non desinit è cælo pluvie, quanvis pluvie liquorem saxa & rupes non concipiant.

Verùm hæc hæresis Scripturis & toti Traditioni contradicit. Etenim constat omnes Apostolos corpus Christi comedissee; nam illud comederunt, de quo Veritas dixit, *Hoc est*

*corpus meum* ; & de eo calice biberunt , de quo dixit , *Hic est calix sanguinis mei* ; referente enim Evangelistâ : *Biberunt ex eo omnes*. Si omnes : ergo & indignus Judas , quem Christus sivit accipere inter innocentes discipulos pretium nostrum , ut ait August. *epist. 162.* quod & clarissimè repetit *tract. 26. in Ioan.* Et *lib. 1. de Baptismo contra Donatistas , cap. 8.* inquit : *Sicut Judas , cui buccellam tradidit Dominus , non malum accipiendo , sed malè accipiendo locum in se Diabolo præbuit ; sic indignè quisque sumens dominicum sacramentum non efficit , ut quia ipse malus est , malum sit ; aut quia non ad salutem accipit , nihil acceperit.* Corpus enim Domini , & sanguis Domini nihilominus erat etiam illis quibus dicebat Apostolus : *Qui manducat indignè , iudicium sibi manducat & bibit.* Et *lib. 1. contra Cresconium , cap. 25.* prosequitur : *Quid ? De isto corpore & sanguine Domini unico sacrificio pro salute nostra , quanvis ipse Dominus dicat , Nisi quis manducaverit , &c.* Nonne idem Apostolus docet etiam hoc perniciosum malè utentibus fieri ; ait enim : *Quicumque manducaverit panem , & biberit calicem Domini indignè , reus erit corporis & sanguinis Domini.* Videatur *serm. 11. de verbis Domini , cap. 11.* ubi duplicem accipiendi corporis Christi in Eucharistia modum sacramentalem , merum & spirituale sacramentali adjunctum luculentissimè distinguit. Quæ testimonia quia ad veritatem corporis Christi & sacrificii altaris constabiliendam inserviunt , non potui facere , quin illa producerem. Ex quibus etiam omnes Calvini pueriles fallaciæ sponte desiliunt , & in fumum abeunt.

Locus etiam Apostoli 1. Cor. II. quem Augustinus memoratis locis urget, Calvinianam hæresim conficit, & in pulverem conterit: *Qui manducaverit panem hunc, vel biberit calicem Domini indignè, reus erit corporis & sanguinis Domini.* Atqui homo nequit esse reus indignè accepti & malè habiti corporis & sanguinis Christi, nisi accipiat. *Qui enim manducat, & bibit indignè,* subdit Doctor Gentium, *judicium sibi manducat & bibit, non dijudicans corpus Domini.* Quomodo autem jure ille damnatur, qui Eucharistiam sumens corpus Domini non dijudicat discernitque ab aliis cibis, si corpus Domini non est ipsum quod accipit? Sed locum illum argumentosum satis suprâ dum de præsentia reali, ponderavimus.

Pro intellectu quorundam testimoniorum Augustini aliorumve Patrum, quibus Sectarii abutuntur, præ oculis habe, supponere Patres Eucharistiam non solum sacramentaliter, sed etiam spiritualiter, id est fide vivâ per dilectionem operante, & sacris desideriis æstuante sumi oportere, ac proinde sacramentum integrum, & corpus Christi, & species sacramentales, & virtutem seu effectus sacramenti importare. Quando ergo interdum subindicant impios in sacramentam irruentes non manducare, neque bibere Eucharistiam vel corpus & sanguinem Domini, loquuntur de manducatione spiritali, sine qua integrè manducare non censetur, qui inutiliter, imò & innoxie manducat.

Difficilior videtur esse Hilarii locus *can. 30. in Matth.* ubi probat Judam non manducasse corpus Domini. Sed ex ipsa textus lectione

liquet locum illum non esse ad propositum, sed planè abs re. Non enim docet Hilarius Judam sacramentaliter communicasse, & tamen verum Christi corpus non percepisse, quod unum ad rem faceret; quærimus enim utrum indigni sacramentum suscipientes, ipsum Christi corpus & sanguinem realiter peræquè ac justi recipiant. Sed ibi singularem suam opinionem profert ab aliorum Patrum sensu alienam, juxta quam opinatus est Judam ne quidem sacramentaliter communicasse. Verba Hilarii sunt hæc: *Post qua Judas proditor indicatur, sine quo Pascha accepto calice, & fracto pane conficitur; dignus enim æternorum sacramentorum communione non fuerat: nam discessisse statim hinc intelligitur, quod cum turbis reversus ostenditur. Neque sanè cum Domino bibere poterat, qui non erat bibiturus in regno; cum universorum bibentes ex vitis istius fructu, bibituros se, cum postea polliceretur. Quibus verbis probare conatur Hilarius Judam Eucharistiæ sacramentali usu non fuisse dignatum. At ineffaciter tamen: quid enim vetat eum post acceptam Communionem recessisse, diabolo ut morem gereret, qui in ipsum post sorptam dominicam buccellam ingressus est? Bibiturus etiam fuisset Judas in regno cælorum, nisi per ipsum steterisset, & pignus regni gloriæ nefanda prodicione abdicasset. Sicut etiam Ioan. 6. veridicè promittitur: *Qui manducat hunc panem vivet in æternum.* Quem tamen innumeri manducantes æternum pereunt; quia nihil prodest, quin obest plurimis sumptio sacramentalis, eam nisi spiritalis comiteretur, quâ in Christo charitate manemus, & Christus in nobis. Et verò singularem*



gularem Hilarii sententiam Evangelistarum concordia refellit. Matthæus enim Christum cum duodecim discumbentem corpus suum singulis porrexisse significat. Marcus ex calice bibisse omnes testatur. Lucas demum post calicis distributionem subnectit : *Verum manus tradentis me mecum est in mensa.*

His prælibatis , circa usum Communionis tria inquirenda potissimè occurrunt ; necessitas nimirum , apparatus , & frequentia. Prius enim videndum est , an & quando ad usum hujus Sacramenti teneamur. Deinde utrum huic suscipiendæ Eucharistiæ obligationi unius speciei usu laici satisfaciant. Postea quænam animi, quænamque corporis compositio ad dignam communionem cum ex natura rei , tum ex Ecclesiæ sanctionibus desideretur. Denique utrum præstet sacrâ Communionem uti frequentius , an rarius ; expediâtque omnes prorsus homines indiscriminatim ad sacram Eucharistiam frequentius adhibendam propellere.

## CAPVT I.

*De obligatione usurpandæ Eucharistie, & de idonea animi ac corporis ad Eucharistiam adeundam compositione.*

**O**pus grande, opus grande, inquit Pro-  
pheta Regius 1. Paral. 29. Quodnam est  
tandem opus illud grande, & eximium operæ-  
pretium, de quo sermonem habiturus es, ô  
homo secundum cor Dei? Fortè mirabile crea-  
tionis, distinctionis, & ornatus opificium nar-  
raturus es nobis, & obstupefactus exclamaru-  
rus: *Quàm magnificata sunt opera tua, Domine!*  
*Omnia in sapientia fecisti.* Magna illa quidem,  
sed de his nihil impræsentiarum. Fortè mira-  
cula gratiæ & gloriæ, & quàm mirabilis in  
Sanctis suis, quàm magnificus in sanctitate,  
faciens prodigia, quæ alibi recenses expositu-  
rus es? Nihil minus; rem aliam mecum verso,  
& mente agito. Fortè quot gratiarum mune-  
ribus & beneficiis auctus divinitus sis obnuntia-  
turus es nobis, & verbum illud bonum eructa-  
turus: *Venite, audite, & narrabo, omnes qui  
timetis Deum, quanta fecit anima.* Sed nec il-  
lud etiam modò. Opus grande, ecce illud, opus  
grande; neque enim homini, sed Deo præpara-  
tur habitatio. David habitationem Deo præ-  
parare

parare apud se constituit, sed fallente morte occupatus fidem suam liberare, & vota implere non potuit. Opus illud grande animo fideli agendum est, habitationem quippe Domino parat cum se ad sacram Communionem accingit; hospitio verò excipit, dum hoc sacramentum usurpat. Ut autem pateat quandonam ad illam mensam accedere teneatur, quàmve paratus accedere, & accuratè instructus Christum recipere, id sequentibus speculationibus exponendum est.

## SPECVLATIO I.

*Christianis omnibus adultis non solum Ecclesiæ mandato, sed Christi etiam precepto impositum est, ut Eucharistiam identidem usurpent.*

**E**X his quæ suprâ de necessitate Eucharistiæ disputavimus, clarissimum est ad usum Eucharistiæ Christianos omnes ratione utentes iure divino obligari. Et sanè id convincit aperta Veritatis declaratio, quæ Joan. 6. habetur: *Nisi manducaveritis carnem Filii hominis, non habebitis vitam in vobis.* Lucæ etiam 22. Apostolis eorûmque successoribus sacrorum Antistitibus Dominus imperavit: *Hoc facite in meam commemorationem.* Quibus verbis non solum sacrificium offerre Apostolis & Presby-

teris

nostro paratam adversus eos qui tribulant nos, aliquando extra vitæ discrimen adire tenemur.

Ad præceptum autem Ecclesiasticum quod attinet ut explicemus, sciendum fideles in Ecclesiæ nascentis exordiis hoc sacro cibo singulis diebus ali solitos esse, ut ex Actis Apostolorum colligere est. Adeo enim qui tunc Christianam legem profitebantur verâ & sincerâ charitate ardebant, inquit Catechismus Romanus *part. 2. titulo de Eucharistia, num. 63.* ut cum sine intermissione orationibus & aliis pietatis officiis vacarent, quotidie ad sacra dominici corporis mysteria sumenda parati invenirentur. Quare beatis illis temporibus fervescerent Christianorum animi, & Christi adhuc ebulliente sanguine aspersi, plenitudine etiam Spiritus sancti accensi, & æstuantes novis præceptorum calcaribus ad sacram Communionem urgeri non egebant. Veruntamen morem illum intermissum sanctissimus Pontifex & Martyr Anacletus, ut *de consecrat. dist. 2. cap. 10.* refertur, aliqua ex parte renovavit, quatenus ministros qui Missæ sacrificio interessent communicare voluit. Diu etiam in Ecclesia viguisse consuetudinem idem Catechismus commemorat, ut Sacerdos peracto sacrificio cum Eucharistiam sumpsisset, ad populum qui aderat conversus, his verbis ad sacram mensam Fideles invitaret: *Venite fratres ad Communionem.* Tunc qui parati erant summâ cum religione sacrosancta Mysteria sumebant. Videatur B. Hieronymi epistola 28. & 50.

Verum charitate deinde & pietatis studio in ipsa Ecclesiæ pace, ut moris est, adeo refriger-

cente,



ente, ut rarè admodum fideles communionem usurparent, à Sancto Fabiano Papa, cujus decretum habes *de consecrat. dist. 2. cap. 16.* sancitum est, ut ter quotannis, Natali nimirum Domini, & Resurrectione, & Pentecoste omnes Eucharistiam sumerent. Id quod à multis postea Conciliis, præsertim verò ab Agathensi *cap. 38.* his verbis confirmatum est: *Cives qui Pascha, ac Natalis Domini, vel Pentecostes solennitatibus à Episcopis interesse neglexerint, cum in civitatibus Communionis vel benedictionis accipiendæ causâ positos se nosse debeant, triennio communionem priventur Ecclesiæ.*

Ad extremum cum eò languoris & tædiæ ætas Christiana adducta esset, ut non modò sancta illa & salutaris præceptio non servaretur, sed in plures etiam annos sacræ Eucharistiae communio differretur, in Magno Lateranensi Concilio, capite illo celebri *Omnis utriusque sexus*, decretum est, ut semel ad minus singulis annis in Pascha omnes sacrum Domini corpus acciperent; qui verò id facere negligerent, Ecclesiæ aditu prohiberentur. Quam rem sacra Tridentina Synodus confirmavit *cap. 13. can. 9.* his verbis: *Si quis negaverit omnes singulos Christi fideles utriusque sexus, cum annos discretionis pervenerint, teneri singulis annis, saltem in Paschate, ad communicandum, iuxta præceptum sanctæ Matris Ecclesiæ, anathematis sit.* Quod præceptum transgrediuntur non solum qui à sacra Communione merâ iniquitâ in Paschate abstinent, sed illi etiam qui sacram Communionem indignè accedunt. Cum quia præceptum Ecclesiæ est tantum divini interpretatio, præfiniens tempus adimplendi

spiritualis, quando fidelis non solum spiritu, sed etiam sacramento Eucharistiam percipit, qui nimirum ex præcepto Apostoli prius se probavit, & veste nuptiali ornatus nedum à peccati mortalis labe mundus est, sed etiam venialium affectum abiecit, interiorum domum lacrymis rigavit, omni denique virtutum ornatu instruxit, ut floridum venienti sponso thalamum pararet: unde mixtâ reverentiâ Centurionis cum ardore Magdalene, & Christi majestatem tremebundus adorât, & tantam dignationem multâ dilectione prosequitur.

Assimilatur hæc triplex Eucharistiæ susceptio triplici Verbi Divini conceptioni, quæ vel mente duntaxat, vel corpore solum, vel utroque junctim modo contingere potest. Si has conceptionis partes & modos conferans, inanis est conceptio corporis si absit conceptio mentis: nec enim ubera quæ Christus suxit, nec qui ipsum portavit venter beatificarentur, nisi sacra Parens corde Verbum Dei audivisset, & illud custodivisset. Porro secunda conceptio mentis utilissima est, & Christianis omnibus necessaria; ad hoc enim Christiani sumus, ut spiritu renovati & regenerati Christum induamus; ad hoc Apostolus parturiebat, ut formaretur in nobis Christus. Denique tertia conceptio character est Dei matris, quæ corpore Filium Dei genuit quem mente conceperat; & hic modus cæteris omnibus longissimè antecellit. Ita de usu communionis dicere licet: Longè præstat communio spiritalis merè sacramentali; sed si sacramentali adjicias spiritalem, id est purum charitatis, religiosæ humilitatis, cæterarumque christianarum virtu-

tum

tam affectum, uberrimos capies fructus, & Deiparæ maternitatis felicitatem quadantenus æmulabere.

Hanc distinctionem Catholici omnes post sacrum Concilium Tridentinum *sess. 13. de Eucharistia, cap. 8.* amplectuntur, quam negarunt olim quidam hæretici, quorum meminit Guicmundus *lib. 1.* opinantes panem & vinum ex toto quidem mutari; sed indignis ad communicandum accedentibus, carnem Domini & sanguinem iterum in panem & vinum reverti. Quod idem testatur Algerus *in Prologo.* Quin usque adeò ab indignis non posse recipi corpus Christi nonnulli arbitrabantur, ut referente eodem Guicmundo sub finem libri 3. mallent dicere partem panis consecrari in corpus Christi propter dignos suscepturos, partem verò propter indignos immutabilem retineri.

Eandem distinctionem negavit etiam Hæsiarcha Calvinus *lib. 4. instit. cap. 17. §. 33.* contendens impios & sceleratos à Christo alienos corpus Christi non edere, quia nimis indignè, inquit, laceraretur Christus, si prostitueretur incredulis. Addit porro eo sensu corpus suum dare Christum indignis, istosque subinde reos esse corporis & sanguinis Domini, quia id indignis præstare paratus est quod rejiciunt. Unde conatur inferre non labascere fidem promissionum Dei, quia non desinit è cælo pluiere, quanvis pluvix liquorem saxa & rupes non concipiant.

Verùm hæc hæresis Scripturis & toti Traditioni contradicit. Etenim constat omnes Apostolos corpus Christi comedisse; nam illud comederunt, de quo Veritas dixit, *Hoc est*

*corpus meum; & de eo calice biberunt, de quo dixit, Hic est calix sanguinis mei; referente enim Evangelistâ: Biberunt ex eo omnes. Si omnes: ergo & indignus Judas, quem Christus sivit accipere inter innocentes discipulos pretium nostrum, ut ait August. epist. 162. quod & clarissimè repetit tract. 26. in Ioan. Et lib. 1. de Baptismo contra Donatistas, cap. 8. inquit: Sicut Judas, cui buccellam tradidit Dominus, non malum accipiendo, sed malè accipiendo locum in se Diabolo prauit; sic indignè quisque sumens dominicum sacramentum non efficit, ut quia ipse malus est, malum sit; aut quia non ad salutem accipit, nihil acceperit. Corpus enim Domini, & sanguis Domini nihilominus erat etiam illis quibus dicebat Apostolus: Qui manducat indignè, iudicium sibi manducat & bibit. Et lib. 1. contra Cresconium, cap. 25. prosequitur: Quid? De isto corpore & sanguine Domini unico sacrificio pro salute nostra, quanvis ipse Dominus dicat, Nisi quis manducauerit, &c. Nonne idem Apostolus docet etiam hoc perniciosum malè utentibus fieri; ait enim: Quicumque manducauerit panem, & biberit calicem Domini indignè, reus erit corporis & sanguinis Domini. Videatur serm. 11. de verbis Domini, cap. 11. ubi duplicem accipiendi corporis Christi in Eucharistia modum sacramentalem, merum & spirituale sacramentali adjunctum luculentissimè distinguit. Quæ testimonia quia ad veritatem corporis Christi & sacrificii altaris constabiliendam inserviunt, non potui facere, quin illa producerem. Ex quibus etiam omnes Calvinii pueriles fallaciæ sponte desiliunt, & in fumum abeunt.*



Locus etiam Apostoli 1. Cor. 11. quem Augustinus memoratis locis urget, Calvinianam hæresim conficit, & in pulverem conterit: *Qui manducaverit panem hunc, vel biberit calicem Domini indignè, reus erit corporis & sanguinis Domini.* Atqui homo nequit esse reus indignè accepti & malè habiti corporis & sanguinis Christi, nisi accipiat. *Qui enim manducat, & bibit indignè,* subdit Doctor Gentium, *iudicium sibi manducat & bibit, non dijudicans corpus Domini.* Quomodo autem jure ille damnatur, qui Eucharistiam sumens corpus Domini non dijudicat discernitque ab aliis cibis, si corpus Domini non est ipsum quod accipit? Sed locum illum argumentosum satis suprâ dum de præsentia reali, ponderavimus.

Pro intellectu quorundam testimoniorum Augustini aliorumve Patrum, quibus Sectarii abutuntur, præ oculis habe, supponere Patres Eucharistiam non solum sacramentaliter, sed etiam spiritualiter, id est fide vivâ per dilectionem operante, & sacris desideriis æstuante summi oportere, ac proinde sacramentum integrum, & corpus Christi, & species sacramentales, & virtutem seu effectus sacramenti importare. Quando ergo interdum subinducant impios in sacram mensam irruentes non manducare, neque bibere Eucharistiam vel corpus & sanguinem Domini, loquuntur de manducatione spiritali, sine qua integrè manducare non censetur, qui inutiliter, imò & innoxie manducat.

Difficilior videtur esse Hilarii locus *can. 30. in Marth.* ubi probat Judam non manducasse corpus Domini. Sed ex ipsa textus lectione

liquet locum illum non esse ad propositum, sed planè abs re. Non enim docet Hilarius Judam sacramentaliter communicasse, & tamen verum Christi corpus non percepisse, quod unum ad rem faceret; quærimus enim utrum indigni sacramentum suscipientes, ipsum Christi corpus & sanguinem realiter peræquè ac iusti recipiant. Sed ibi singularem suam opinionem profert ab aliorum Patrum sensu alienam, juxta quam opinatus est Judam ne quidem sacramentaliter communicasse. Verba Hilarii sunt hæc: *Post quæ Judas proditor indicatur, sine quo Pascha accepto calice, & fracto pane conficitur; dignus enim æternorum sacramentorum communione non fuerat: nam discessisse statim hinc intelligitur, quod cum turbis reversus ostenditur. Neque sanè cum Domino bibere poterat, qui non erat bibiturus in regno; cum universos tum bibentes ex vitis istius fructu, bibituros secum postea polliceretur.* Quibus verbis probare conatur Hilarius Judam Eucharistiæ sacramentali usu non fuisse dignatum. At ineffaciter tamen: quid enim vetat eum post acceptam Communionem recessisse, diabolo ut morem gereret, qui in ipsum post sorptam dominicam buccellam ingressus est? Bibiturus etiam fuisset Judas in regno cælorum, nisi per ipsum stetisset, & pignus regni gloriæ nefanda prodicione abdicasset. Sicut etiam *Ioan. 6.* veridicè promittitur: *Qui manducat hunc panem vivet in æternum.* Quem tamen innumeri manducantes æternum pereunt; quia nihil prodest, quin obest plurimis sumptio sacramentalis, eam nisi spiritalis comiteretur, quâ in Christo charitate manemus, & Christus in nobis. Et verò singularem

gularem Hilarii ſententiam Evangelistarum concordia refellit. Matthæus enim Chriſtum cum duodecim diſcumbentem corpus ſuum ſingulis porrexiffe ſignificat. Marcus ex calice biſſe omnes teſtatur. Lucas demùm poſt calicis diſtributionem ſubnectit : *Verùm manus tradentis me mecum eſt in menſa.*

His prælibatis , circa uſum Communionis tria inquirenda potiſſimè occurrunt ; neceſſitas nimirum , apparatus , & frequentia. Priùs enim videndum eſt , an & quando ad uſum hujus Sacramenti teneamur. Deinde utrum huic ſuſcipiendæ Eucharistiæ obligationi unius ſpeciei uſu laïci ſatiſfaciant. Poſtea quænam animi, quænamque corporis compoſitio ad dignam communionem cum ex natura rei , tum ex Eccleſiæ ſanctionibus deſideretur. Denique utrum præſtet ſacrâ Communionem uti frequentius , an rarius ; expediâtque omnes prorsus homines indifcriminatim ad ſacram Eucharistiã frequentius adhibendam propellere.

## CAPVT I.

*De obligatione usurpandæ Eucharistiae, & de idonea animi ac corporis ad Eucharistiam adeundam compositione.*

**O**pus grande, opus grande, inquit Pro-  
pheta Regius 1. Paral. 29. Quodnam est  
tandem opus illud grande, & eximium operæ-  
pretium, de quo sermonem habiturus es, ô  
homo secundum cor Dei? Fortè mirabile crea-  
tionis, distinctionis, & ornatûs opificium nar-  
raturus es nobis, & obstupefactus exclamatu-  
rus: *Quàm magnificata sunt opera tua, Domine!*  
*Omnia in sapientia fecisti.* Magna illa quidem,  
sed de his nihil impræsentiarum. Fortè mira-  
cula gratiæ & gloriæ, & quàm mirabilis in  
Sanctis suis, quàm magnificus in sanctitate,  
faciens prodigia, quæ alibi recensentes expositu-  
rus es? Nihil minus; rem aliam mecum verso,  
& mente agito. Fortè quot gratiarum mune-  
ribus & beneficiis auctus divinitus sis obnuntia-  
turus es nobis, & verbum illud bonum eructa-  
turus: *Venite, audite, & narrabo, omnes qui  
timeatis Deum, quanta fecit anima.* Sed nec il-  
lud etiam modò. Opus grande, ecce illud, opus  
grande; neque enim homini, sed Deo prepara-  
tur habitatio. David habitationem Deo præ-  
parare



parare apud se constituit, sed fallente morte occupatus fidem suam liberare, & vota implere non potuit. Opus illud grande animo fidelis agendum est, habitationem quippe Domino parat cum se ad sacram Communionem accingit; hospitio verò excipit, dum hoc sacramentum usurpat. Ut autem pateat quandonam ad illam mensam accedere teneatur, quamve paratus accedere, & accuratè instructus Christum recipere, id sequentibus speculationibus exponendum est.

## SPECULATIO I.

*Christianis omnibus adultis non solum Ecclesie mandato, sed Christi etiam precepto impositum est, ut Eucharistiam identidem usurpent.*

**E**X his quæ suprà de necessitate Eucharistiæ disputavimus, clarissimum est ad usum Eucharistiæ Christianos omnes ratione utentes jure divino obligari. Et sanè id convincit aperta Veritatis declaratio, quæ Joan. 6. habetur: *Nisi manducaveritis carnem Filii hominis, non habebitis vitam in vobis.* Lucæ etiam 22. Apostolis eorūque successoribus sacrorum Antistitibus Dominus imperavit: *Hoc facite in meam commemorationem.* Quibus verbis non solum sacrificium offerre Apostolis & Presby-

teris

teris imperavit, sed quæ ipse fecit facere, id est se aliosque Fideles hoc divino cibo pascere præcepit, quanvis hujus exequendi præcepti tempora non præfiniverit, sed Sponsæ suæ à Spiritu sancto continenter gubernatæ judicio reliquerit.

Et rationem optimam affert D. Thomas *quest. 80. art. 11.* Quia omnes tenentur Eucharistiæ Sacramentum spiritaliter manducare Christo ut incorporentur. Spiritualis autem manducatio percipiendæ Eucharistiæ votum sincerum, seu desiderium non fictum includit; unde sine aliquo hujus Sacramenti voto nulli patere viam regni cælorum alibi demonstravimus. Atqui frustra esset suscipiendæ votum, quin nec verum esset, sed fallax Eucharistiam adeundi desiderium, nisi datâ opportunitate impleretur: hoc ipso convinceretur, non sinceram recipiendæ Eucharistiæ voluntatem, sed inanem & sterilem velleitatem concepisse, qui nunquam reapse oblatam suscipiendæ Eucharistiæ occasionem nancisceretur, cujus desiderio se teneri sibi mentiens iniquitas affirmaret. Recole dicta de necessitate Eucharistiæ, ubi rem hanc suis momentis ponderavimus.

Hinc sequitur 1. adultos in periculo mortis constitutos ad recipiendam Eucharistiam jure divino teneri. Docet enim Tridentinum *sess. 13. cap. 8.* Eucharistiam institutam esse in viaticum salutis, cujus vigore confortati ex hujus miseræ peregrinationis itinere ad cœlestem patriam mortales valeant pervenire. Nec obest quod paucis antè diebus fortassis ad sacram mensam accesserit qui in repentinæ mortis discrimen vocatur; quia imminente novo mortis periculo.

culo nova urget neceſſitas, novo robore in mortis agone opus eſt. Nec propterea ſequitur ad Euchariftiam ſingulis etiam reis ad mortem damnatis miniſtrandam obligari. Quia licet ſinguli eam optare, eamque ſi occaſio tulerit oblatam recipere teneantur, ejusdem tamen diſpenſandæ modum & rationem Eccleſiæ prudentiæ, & Paſtorum judicio Chriſtus permisit. Hanc enim poteſtatem in Eccleſia perpetuò fuiſſe idem ſacrum Concilium *ſeſſ. 21. cap. 2.* declarat, ut in Sacramentorum diſpenſatione, ſalvâ eorum ſubſtantiâ, ea ſtatueret, quæ ſuſcipientium utilitati, ſeu ipſorum Sacramentorum venerationi, pro rerum, temporum, & locorum varietate magis in Domino expedire judicaret. Quâ poteſtate antiquitus uſam fuiſſe Eccleſiam ex episto-  
la 1. Syricii Papæ, ex episto-  
la 3. Innocentii I. atque ex Conciliis Elyberitano & Arelatenſi I. docemur.

Sequitur 2. quod etiamſi nullum extaret Eccleſiæ præceptum determinata accipiendæ Euchariftiæ tempora præſiniens, ad eam etiam extra articulum impendentis mortis uſurpandam adulti ratione præditi jure divino nihilo minus obligarentur. Quia ſacramentum hoc ad modum cibi paſcentis & roborantis animos inſtitutum eſt, Veritate non ſemel inculcante, *Caro mea verè eſt cibus: Niſi manducaveritis carnem Filii hominis, non habebitis vitam in vobis.* Abſurdum, verò eſt dicere in ſolo mortis imminentis periculo alimentum ſumi oportere, illudque non eſſe ſæpius in vita uſurpandum, quo & depaſcentis concupiſcentiæ jacturas ſarciamus, & occurrentes graves tentationes conteramus. Ergo menſam in conſpectu  
noſtro



nostro paratam adversus eos qui tribulant nos, aliquando extra vitæ discrimen adire tenemur.

Ad præceptum autem Ecclesiasticum quod attinet ut explicemus, sciendum fideles in Ecclesiæ nascentis exordiis hoc sacro cibo singulis diebus ali solitos esse, ut ex Actis Apostolorum colligere est. Adeò enim qui tunc Christianam legem profitebantur verâ & sincerâ charitate ardebant, inquit Catechismus Romanus *part. 2. titulo de Eucharistia, num. 53.* ut cum sine intermissione orationibus & aliis pietatis officiis vacarent, quotidie ad sacra dominici corporis mysteria sumenda parati invenirentur. Quare beatis illis temporibus fervere Christianorum animi, & Christi adhuc ebulliente sanguine aspersi, plenitudine etiam Spiritus sancti accensi, & æstuentes novis præceptorum calcaribus ad sacram Communionem urgeri non egebant. Veruntamen morem illum intermissum sanctissimus Pontifex & Martyr Anacletus, ut *de consecrat. dist. 2. cap. 10.* refertur, aliqua ex parte renovavit, quatenus ministros qui Missæ sacrificio interessent communicare voluit. Diu etiam in Ecclesia viguisse consuetudinem idem Catechismus commemorat, ut Sacerdos peracto sacrificio cum Eucharistiam sumpsisset, ad populum qui aderat conversus, his verbis ad sacram mensam Fideles invitaret: *Venite fratres ad Communionem.* Tunc qui parati erant summâ cum religione sacrosancta Mysteria sumebant. Videatur B. Hieronymi epistola 28. & 50.

Verum charitate deinde & pietatis studio in ipsa Ecclesiæ pace, ut moris est, adeo refriger-

cente,



cente, ut rarò admodum fideles communionem usurparent, à Sancto Fabiano Papa, cujus decretum habes *de consecrat. dist. 2. cap. 16.* sancitum est, ut ter quotannis, Natali nimirum Domini, & Resurrectione, & Pentecoste omnes Eucharistiam sumerent. Id quod à multis postea Conciliis, præsertim verò ab Agathensi *cap. 38.* his verbis confirmatum est: *Cives qui Pascha, ac Natalis Domini, vel Pentecostes solennitatibus cum Episcopis interesse neglexerint, cum in civitatibus Communionis vel benedictionis accipiendæ causâ positos se nosse debeant, triennio communionem priventur Ecclesiæ.*

Ad extremum cum eò languoris & tædiæ pietas Christiana adducta esset, ut non modò sancta illa & salutaris præceptio non servaretur, sed in plures etiam annos sacra Eucharistia communio differretur, in Magno Lateranensi Concilio, capite illo celebri *Omnis utriusque sexus*, decretum est, ut semel ad minus singulis annis in Pascha omnes sacrum Domini corpus acciperent; qui verò id facere neglexissent, Ecclesiæ aditu prohiberentur. Quam legem sacra Tridentina Synodus confirmavit *sess. 13. can. 9.* his verbis: *Si quis negaverit omnes & singulos Christi fideles utriusque sexus, cum ad annos discretionis pervenerint, teneri singulis annis, saltem in Paschate, ad communicandum, juxta præceptum sanctæ Matris Ecclesiæ, anathema sit.* Quod præceptum transgrediuntur non solum qui à sacra Communionem merâ incuriâ in Paschate abstinent, sed illi etiam qui ad sacram Communionem indignè accedunt. Tum quia præceptum Ecclesiæ est tantum divini interpretatio, præfiniens tempus adimplendi

plendi divini mandati. Atqui præcepto divino per sacrilegium non satisfacimus. Ergo per indignam Communionem præcepto Ecclesiæ de sacro cibo in Paschate usurpando non obtemperamus. Tum quia Concilium Lateranense memorato capite *Omnis utriusque sexus*, Eucharistiam ad minus in Pascha reverenter *suscipi* constituit. At sacramentum nequaquam reverenter ille suscipit qui in horrendum sacrilegium incurrit, Christum in seipso crucifigit, Filium Dei conculcat, & sanguinem testamenti pollutum ducit.

Neque dicas Ecclesiam non posse præcipere actus internos, sed ejus potestatis sphæram intra actuum externorum ambitum contineri. Non, inquam, id dicas; quia quidquid sit de potestate Ecclesiæ in actus merè internos, de qua Theologorum Moralium differere est, id tamen constans, & apud omnes incorruptæ disciplinæ moralis defensores in confesso est, Ecclesiam actus internos ut conjunctos cum exterioribus jure posse præcipere vel prohibere. Nam in Clementina I. de hæreticis, & cap. *Multorum*, circa finem, excommunicantur Inquisitores hæreticæ pravitatis, si odii, gratiæ, vel amoris, lucri aut commodi temporalis obtentu contra justitiam & conscientiam suam omiserint contra quemquam procedere, ubi fuerit super pravitate hæretica procedendum; vel eodem obtentu quemquam præsumpserint quoquo modo vexare. In capite etiam *Dolentes*, de celebratione Missarum, Clericis præcipitur, ut divinum Officium nocturnum pariter & diurnum, quantum eis Deus dederit, studiose celebrent pariter & devotè. Patet autem

amoris.

amoris & odii obtentum, devotionem etiam celebrando officio adhibendam eſſe actus internos. Denique utut ſit, cùm Eccleſiaſticum Paſchalis Communionis præceptum ſit divini determinatio, nunquam legi illi ſatisfaciet qui ore ſacrilegò divinum epulum acceperit.

Ejuſdem etiam præcepti violatores ſunt, tum qui prænoſcentes ſe Paſchali tempore negotiis, occupationibusque implicatum iri, vel peregrinatione aut navigatione aliisque impeditum iri quominus ſacram menſam adeant, communionis tamen tempus prævenire & anticipare negligunt: tum qui omiſſâ vel impeditâ Communione Paſchali, primâ datâ opportunitate communicare prætermittunt. Ratio eſt, quia intentio Concilii verbis illis, *ad minus in Paſcha*, expreſſa ſignificat Communionem non eſſe ultra paſchale tempus differendam: qui autem impedimenta negotiorum, peregrinationis, navigationis, belli gerendi, aliaque prævidens paſchale tempus non anticipat, Communionem ultra Paſcha prudens & volens differt: igitur præcepto illi morem non gerit. Secundò etiam, quia qui impeditus in Paſchate non communicavit, præcepto de non differenda ultra Paſcha Communione obſtringitur donec ſatisfecerit; non enim deſinit obligari qui præſcripto tempore quod debet non ſolvit; ſed potiùs ſolvendi dies cùm exierit, ad ſolvendum arctiùs obligatur, ut patet in contractibus diem ſolutionis præſinientibus. Quare Communion Paſchalis non eſt onus illi duntaxat tempori alligatum, ſicut recitatio brevii, vel jejunium vigiliæ certæ diei addicitur; ſed eſt determinatio temporis in quo debitum

Communione juri divino solvendum est ; quo tempore sine solutione exeunte solvendi debiti obligatio magis urget. Porro per tempus Paschatis juxta declarationem Eugenii IV. & totius Ecclesiæ usum, quindena illa intelligitur, quæ à Dominica in Ramis Palmarum ad Dominicam in Albis inclusivè protrahitur. Locum autem Communionis Paschalis esse Ecclesiam Parochialem insinuat in capite præfato Lateranensis Concilii, & sacra Congregatio Cardinalium Constitutionibus Apostolicæ Sedis, & praxi Ecclesiarum innixa declaravit. Quin dies ipse Paschatis seu Resurrectionis Dominicæ ita est ex decreto Leonis X. Ecclesiis Parochialibus reservatus, ut illi etiam qui intra quindenam in Ecclesia Parochiali communicassent, non possent tamen eo die alibi citra proprii Sacerdotis licentiam sacræ Communionis fieri participes. Justum enim est ut Christianus ibi suscipiat alimenta vitæ, ubi in Christo primum vivere cœpit : nec Pastorem videretur agnoscere, qui ab eo pane vitæ pasci abnueret.

Ex his omnibus apparet intolerandam esse Lutheri temeritatem, quâ *serm. de confess. & sacramento Eucharistia*, aliisque suis libris scribere non erubuit, errare illos graviterque peccare, qui cogunt homines sub peccato mortali in Paschatis festo Sacramento uti. Sed nulla fuit unquam, nulla (opinor) erit, nec possibilis videtur impudentia Calvinianæ par, quâ *lib. 4. institut. cap. 17. §. 46.* in Matrem Ecclesiam sic furiosus insurgit: *Hæc consuetudo, quæ semel quotannis communicare jubet, certissimum est diaboli inventum, cujuscumque tandem ministeria*



*ferio inuictum fueris. In his confutandis impietatis portentis immorandum non est, cum ejus præcepti utilitas & honestas tum per se satis, tum ex dictis clareat luculenter. Ad illa verò gemini hæresiarchæ convitia aliquid reponere nihil attinet; quia ut cum Hieronymo epist. ad Ctesiph. loquar: Sententias istas prodidisse, superasse est. Patet primâ fronte blasphemia. Non necesse habet convinci quod prima statim professione blasphemum est.*

# REFLEXIO.

Sacramenti Eucharistiæ usus tunc demùm utilis est, si Deo fruamur. Nam qui in Christo non manet, & in quo non manet Christus, cœlesti cibo non utitur ad vitam, sed abutitur in perniciem. Tunc solùm ut oportet Eucharistia usurpatur, atque cum utilitate manducatur, si ut ait August. tract. 27. in Joannem, *manet, & manetur; si habitat, & inhabitatur; si hæret ut non deferatur.* Et serm. 2. de verbis Apostoli, cap. 1. *Manducant ergo qui manducant, & bibant qui bibunt: esuriant & sitiant, vitam manducant, vitam bibant. Illud manducare, refici est; sed si reficeris, ut non deficias unde reficeris. Illud bibere, quid est nisi vivere? Manduca vitam, bibe vitam: habebis vitam, & integra est vita. Tunc autem hoc erit, id est vita unicuique erit corpus & sanguis Christi, si quod in sacramento visibiliter sumitur, in ipsa veritate specialiter manducetur.*

Quàm multos Altaria frequentantes cernimus, cibum vitæ usurpantes, nomen etiam quod

quod vivunt habentes, & reapse mortui sunt. Non usus ille Eucharistiæ, sed abusus jure merito dicendus est. Ad Eucharistiam intrepidè illi quidem accedunt, & accedendo pios se dictitant & devotos; & tamen semper se tepidos, semper à divinarum rerum studio & gustu in dies remotiores, semper gratiæ divinæ inaniores, sui ipsius amore semper pleniores, sæculo semper & humanis voluptatibus addictiores, ac terrenorum cupiditate captiores præsentunt. Dubio procul mortem ex fonte vitæ ille haurit, in quem nullam unquam emendationis vitæ frugem fluere experimur. Cum enim constantes & certi in hominibus benè affectis efficacissimi Sacramenti fructus abundant, profectò ubi nulla eorum fructuum & vitalium motuum vestigia, sed alienissima potiùs & adversa cernuntur, argumento est insolubili, pravam vitiosamque animi peccato mortui habitudinem divinum illum patentemque fontem obstruere, & gratiarum fluentia, ne in sic affectos redundent, prohibere.

Unde quæso post tot tanti antidoti usus nullum in nobis adversus peccata lethifera extinguenda robur, nullæ adversus hostiles impetus vires? Cur ad eadem vitia eadem proclivitate revolvimur, post cibum Angelorum marcescimus, tabescimus potato sanguine Redemptoris? Apud piissimum, & juxta doctissimum Cardinalem Turrecrematam, nisi mea me fallat memoria, abhinc annis aliquot legisse me memini, quatuor ad laudabilem & proficuum cibi alioquin nocituri usum desiderari, masticationem seu commolitionem, delectationem ex legitima decoctione proficiscentem, assimilata

assimilationem, & incorporationem. Mandere cibum & ore conficere oportet, ut trajectus in stomachum haud ægrè concoquatur; unde juxta tritum adagium, *prima digestio in ore elaboratur*: gravatur enim stomachus & cruditatem patitur post ingestas integras & non attritas dapes quàmlibet exquisitas. Parùm etiam prodest cibus ni delectet, neque enim naturam recreat aut levat cibus, quem respuit gustus vitiosis humoribus occupatus; & desperata eorum sanitas est, quibus nihil jam cibi nisi consuetudinis causâ præbetur. Concoctus vi caloris nativi cibus viventis qualitates paulatim induit; unde in massam liquidam albicantem, quæ chylus dicitur, primùm resolvitur, & alimenti partibus purioribus & defæcationibus selectis, fæces per longos intestinorum meandros foras protruduntur. Deinde chylus in sanguinem actione jecoris vel cordis, vel utriusque juxta diversa Philosophorum placita variis hinc inde rationum & experimentorum momentis innixa convertitur, & tandem post varios dispositionum apparatus in carnem mutatur. Sic mutatus in alitum transformatur, ipsique incorporatus eadem totius compositi formâ perficitur, & idem totum ingreditur, cujus initio fuerat adjumentum. Non absimili ratione divinus Eucharistiæ cibus illis duntaxat meritò creditur esse proficuus, qui ore animi, id est intellectus (juxta illud, *Os justî meditabitur sapientiam*) corpus Domini dijudicant, & tremendi mysterii majestatem, & quomodo ad illud adeundum comparati sint, attentè recogitant. Quoniam capacitas nostra ad Christum efficaciter suscipiendum non est in carne, sed in spiritu:



*spiritu ; non in ventre , sed in mente : & mens Christum non attingit nisi per cognitionem & amorem , per fidem & charitatem : ita quod fides illuminat ad recognitionem vel recordationem , & charitas inflamat ad devotionem. Ideo ad hoc quod aliquis dignè accedat , oportet quod spiritualiter comedat , ut sic Christum per recordationem fidei masticeat , inquit B. Bonaventura p. 6. cap. 9. in brevil. tom. 1. Spiritalem illam animi divinarum cogitatione perfusi , & veluti penetrati masticationem sequitur mentis refectio , & cœlestis delectatio torporem , tædium , & languorem eliminans , emicantes pietatis scintillas excitans : & quia anima sancta Spiritus divini calorem cœlesti pani concoquendo necessarium sentit , & spiritualis digestio laudabiliter fit ; ideo tunc Eucharistia alimenti simul & medicamenti loco est , curationem valetudinis explens , morbi que reliquias infuso membris omnibus vigore conficiens. Denique quia anima casta virtutum omnium exercitationibus divinam in se exprimit imaginem , sequitur assimilatio , & tanta Christiani cum Christo conformitas , ut in Christum transformetur , & ut loquitur Paulus , formetur in illo Christus. Oportet , subjungit idem Bonaventura , ut Christum per devotionis amorem suscipiat , per quem non in se transformet Christum , sed ipse potiùs trahatur in ejus mysticum corpus.*



## SPECVLATIO II.

*Nullò divino præcepto Laici & Clerici non conficientes ad Eucharistia Sacramentum sub utraque specie sumendum obligantur ; sed alterius speciei communio ad salutem sufficit. Iustissimis gravissimisque de causis Ecclesia divinitus inspirata usu Calicis laicis interdixit , speciei solius Panis communione permissa.*

**F**Erè totidem verbis è sacro Tridentino Concilio sess. 21. cap. 1. & 2. ne non can. 1. & 2. hæc propositio quoad omnes ejus partes deprompta est. Quæ antea quàm stabiliatur, præmittere hæreticorum errores , quos proscribere sancta Synodus voluit , operæpretium est.

In primis Waldenses in professione fidei ad Vlasdislaum , geminam speciem indispensabili Christi lege præscriptam , ad salutem omnibus & singulis necessariam esse contendunt. Eundem errorem Bohemi ducibus Petro Dresdenfi , & Jacobo Misnensi , aliisque hæretici eo li-

bentius, ut historiae Bohemicae capite 35. Aeneas Sylvius observat, sequuti sunt, quo arbitrati sunt articulum se invenisse in Evangelio fundatum, per quem Ecclesiam Romanam erroris, ignorantiae, vel nequitiae insimularent. Cujus sententiae assertores fuisse Joannem Hus & Hieronymum de Praga contendit Calvinista Plesseus *lib. 1. inst. c. 7.* Quod haud satis comper-  
tum est, cum inter eorum articulos in Concilio Constantiensi recensitos dogma illud minime numeretur. Utut sit erroris illius authores & sequaces sic proscribit idem Constantiense Concilium *sess. 13.* his verbis: *Cum in nonnullis mundi partibus quidam temerarie asserere praesumant, populum Christianum debere Sacramentum Eucharistiae sub utraque panis & vini specie suscipere, & non solum sub specie panis, sed etiam sub specie vini populum laicum passim communicent, & post coenam, vel alias non jejunos communicandos esse, pertinaciter asserant contra laudabilem Ecclesiae consuetudinem rationabiliter approbatam: Hinc est quod hos Generale Concilium declarat, decernit, & definit contra hunc errorem, quod licet Christus post coenam instituerit & suis discipulis administraverit sub utraque specie panis & vini hoc venerabile Sacramentum; tamen hoc non obstante sacrorum Canonum auctoritas & approbata consuetudo Ecclesiae servavit & servat, quod hujusmodi Sacramentum nec conficiatur post coenam, nec sumatur à non jejunis nisi in casu infirmitatis, aut alterius necessitatis à jure vel Ecclesia admissa vel concessa. Et similiter, quod licet in primitiva Ecclesia hujusmodi sacramentum reciperetur à fidelibus sub utraque specie; tamen*

*haec*

hac consuetudo ad evitandum aliqua pericula & scandala est rationabiliter introducta, quod à conscientibus sub utraque specie, & à laïcis tantummodo sub specie panis suscipiatur; cum firmissimè credendum sit, & nullatenus dubitandum, integrum Christi corpus & sanguinem tam sub specie panis quàm sub specie vini veraciter contineri. Quapropter dicere quod hanc consuetudinem & legem observare sit sacrilegium aut illicitum, censeri debet erroneum; & pertinaciter asserentes oppositum præmissorum, tanquam hæretici arcendi sunt & graviter puniendi per Dicesanos locorum, aut Inquisitores hæretica pravitatis. Item præcepimus sub pœna excommunicationis, quod nullus Presbyter communicet populum sub utraque specie panis & vini.

Extinctis illis erroribus, ex eorum cineribus enatus est Martinus Lutherus, qui licet initio in quodam sermone de sacramento Eucharistiæ alteram speciem sufficere affirmavit, in confusissimo tamen suo de captivitate Babylonica libro, vel potius tenebrione, scribere non erubuit, omnes esse impios, qui utriusque speciei Communionem laïcis denegant. Additque se provocatum & per vim in arēnam raptum liberè afferere, quod dicunt Papistæ, Ecclesiæ arbitrio relictum esse distribuere unam speciem, sine ratione dici, sine autoritatē produci, & eadem facilitate contemni quā probatur. Et tandem effrons hæresiarcha concludit, negare utramque speciem laïcis esse impium & tyrannicum, nec in manu ullius Angeli, necdum Pape & Concilii cujuscunque.

Sed omnibus suis decessoribus hæreticis impudentiæ palmam præripuit post hominum me-



moriam, audacissimus Joannes Calvinus, qui *lib. 4. Institut. cap. 17. §. 47.* effutiit ex officina diaboli prodiisse constitutionem illam, quæ dimidiam Cœnæ partem meliori populi Dei numero vel furata est, vel eripuit, nempe symbolum Sanguinis, quod laïcis & prophanis interdictum, paucis rasis & unctis (his scilicet titulis Episcopos & Sacerdotes, quos duplici honore dignos Apostolus pronuntiavit, quibus etiam improbis maledicere vetuit, excitatus ab erebo apostata insignit) in peculium cessit.

*Communio sub utraque specie non est  
præcepto divino omnibus imperata  
& necessaria.*

His prælibatis probanda est prima pars, quæ affirmat nullo fideles omnes & singulos divino præcepto ad communionem utriusque speciei astringi. Probatur autem tum exponendo loca illa, quibus duplicis speciei usus omnibus necessarius edici & præscribi videtur; tum ex variis Ecclesiæ primitivæ ritibus, quibus Legislatoris nostri Christi intentio, interprete sacra traditione dignosci potest.

In primis non habetur utriusque speciei mandatum ex verbis illis Joan. 6. *Nisi manducaveritis carnem filii hominis, & biberitis ejus sanguinem, non habebitis vitam in vobis.* Tam quia Calvinistæ non consentiunt verba Salvatoris, quæ *Joan. 6.* leguntur, de Eucharistia intelligi oportere: formidant enim, & meritò illi quidem, ne micantissimâ verborum illorum luce præsentia figurativæ aut virtualis corporis Christi,



Christi, quam solam, repudiatâ, præsentia reali  
 comminiscuntur, tenebræ dispellantur. Tum  
 quia juxta consuetudinem Scripturarum parti-  
 cula &, non semper copulativè, sed sæpe  
 disjunctivè usurpatur. Exodi 21. *Qui percussio-  
 patrem & matrem, moriatur.* I. Corinth. II. *Qui  
 manducat & bibit indignè, judicium sibi man-  
 ducat & bibit.* Id est, qui manducat aut bibit  
 indignè, judicium sibi manducat & bibit; ille  
 enim sibi condemnationem judicis accerset, qui  
 alteram speciem indignè præsumit accipere,  
 tametsi utramque speciem non sumat. Unde  
 satis clarus ejus testimonii sensus esse potest, si  
 particula *Et*, pro particula *Vel*, accipiatur; &  
 particula *Nisi*, seu ut habetur in Græco, *Si non*,  
 cadat supra particulam *Et*, seu *Vel*, in hunc  
 modum: *Si neque manducaveritis carnem Filii  
 hominis, vel neque biberitis ejus sanguinem, non  
 habebitis vitam in vobis.* Quo sensu dicitur  
 Actor. 3. *Argentum & aurum non est mihi*, id  
 est neque argentum est mihi, neque aurum.  
 Quod & aliis Scripturæ locis illustrari confir-  
 marique in promptu esset. Hanc fuisse Salva-  
 toris intentionem rectè colligit ex ipso Joannis  
 capituli 6. contextu Concilium Tridentinum  
 sess. 21. cap. 1. his verbis: *Sed neque ex sermone  
 illo, apud Joannem sexto, rectè colligitur utrius-  
 que speciei communionem à Domino præceptam  
 esse, utcumque juxta varias sanctorum Patrum  
 & Doctorum interpretationes intelligatur.* Nam-  
 que qui dixit: *Nisi manducaveritis carnem filii  
 hominis, & biberitis ejus sanguinem, non habe-  
 bitis vitam in vobis;* dixit quoque: *Si quis man-  
 ducaverit ex hoc pane, vivet in æternum.* Et qui  
 dixit: *Qui manducat meam carnem, & bibit*

*meum sanguinem, habet vitam aternam; dixit etiam: Panis quem ego dabo, caro mea est pro mundi vita. Is denique qui dixit: Qui manducet meam carnem, & bibit meum sanguinem, in me manet, & ego in illo, dixit nihilominus: Qui manducat hunc panem, vivet in aeternum. Ergo ex mente Servatoris vis præcepti non tam ad sumendi modum, quàm ad rem ipsam sumendam collimat. Quod ex eo ampliùs confirmatur, quòd Christus verba illa protulerit adversùm litigantes Capharnaïtas, & inter se dicentes: Quomodo potest hic nobis carnem suam dare ad manducandum? At Judæi non de modo sumendi sub una specie vel duabus, sed re sumenda, scilicet carne Christi litigabant. Ergo non mo lum sumendi, sed rei sumendæ necessitatem verbis illis inculcare sibi Veritas proposuit.*

Secundò non continetur utriusque speciei ab omnibus & singulis sumendæ præceptum in ipsa Christi institutione, quæ sub utraque specie facta est. Tum quia Christus non solùm Sacramentum instituit, sed & sacrificium obtulit. Unde illi morem Catholica gerit Ecclesia, dum sacrificantes ad utriusque speciei usum indispensabiliter astringit. Tum quia satis est id quod Christus fecit, in Ecclesia regulariter fieri, tametsi non ab omnibus & singulis fiat: factum autem Christi Ecclesia in Sacerdotibus suis, & in singulis Missis religiosissimè observat. Tum quia non omnia quæ Christus fecit, omnibus facienda præcepit. Neque enim ad Eucharistiam post cœnam conficiendam, vel ad eam duodecim tantùm viris, nullisque mulieribus dispensandam, vel ad eam in cœnaculo, non

in.

In templo celebrandam, vel ad eam etiam in azymo duntaxat ubique terrarum, & nullibi in fermentato peragendam, propterea quod Christus ritus illos omnes observavit, obligamur. Ergo neque ex præcisa Christi Domini institutione, neque ex simplici ejus facto utriusque speciei usus intelligitur imperatus.

Tertiò utriusque speciei à laïcis etiam necessario usurpandæ præceptum nequaquam colligitur ex verbis illis Matth. 5. 26. *Bibite ex hoc omnes.* Quia verba illa ad Apostolos præsentis Christus direxit. Unde Marcus cap: 14. dicit: *Et biberunt ex illo omnes;* significans præceptum Christi ad Apostolos pro eo tempore spectans, eodem etiam tempore fuisse impletum. Et sane mira est hæreticorum solertia, & in Scripturis exponendis sibi arrogata licentia. Cum Christus Apostolis remittendorum, retinendorumque peccatorum facultatem fecit, cum eisdem ligandi & solvendi auctoritatem contulit, cum Petri singulariter arbitrio claves æterni aditus tradidit, ut ejus terrestre judicium præjudicata sit auctoritas in cælo, & quæ in terris ab eo aut ligata sint aut soluta, statuti ejusdem conditionem obtineant & in cælo: illa omnia ita ad solos Apostolos dicta intelligi oportere volunt, ut nec ad Presbyteros eorum sacerdotii successores, nec ad Episcopos eorumdem jurisdictionis hæredes, nec ad Romanum Antistitem Petri sedem continenti serie occupantem pertinere contendant. Cum verò Apostolis præsentibus ex calice bibere imperavit, edictum illud non ad solos Ministros sacra facientes, sed ad omnes & singulos utriusque sexus Christianos de suo arbitrato dila-

rant. Scio equidem multa Apostolis dixisse Christum, quæ omnibus dicta intelligi voluit, ea potissimum quæ ad Christianæ vitæ castimoniam, & Evangelicæ legis observantiam attingunt, ad omnes attinere fideles edixit Marc. 13. *Quod vobis dico, omnibus dico: Vigilate.* Ubi Christianæ legis professores omnes vigilare, seu in negotium salutis mente & animo insistere, & in omnes declinandi à malo & faciendi boni occasiones intendere præcepit. Attamen quæ Christus dixit Apostolis, omnia singulis Christianis dicta intelligi oportere, absurdissimum, & juxta falsissimum est. Neque enim prædicandi in mundo universo Evangelii, fundandi Ecclesias, Sacramenta conficiendi dispensandique, pascendi oves, aliaque id genus exercendi potestas omnibus indiscriminatim fidelibus facta est; alioquin nullo ordine, sed perpetuo horrore omnia in Ecclesia turbarentur, & fusdeque miscerentur. Sed hæretici nostrates vel Ecclesiæ hierarchiam divinitus constitutam perire malint, quàm Ecclesiæ cedere potestati. Neque veritatem illi in proferendis interpretandisque Scripturis tantoperè cupiunt, quantoperè quam averfuntur Catholicam Ecclesiam infamare.

Quartò ad utriusque speciei communionem omnes & singulos non astringunt verba illa Christi, *Hoc facite in meam commemorationem*, quæ apud Lucam c. 22. & apud Paulum 1. Cor. 11. habentur. Observandum enim est, verba illa Lucam semel duntaxat referre post consecrationem panis, & ante consecrationem calicis; Apostolum verò ea referre absolutè post consecratum panem: *Accipite, inquit, & manducate:*



cate : Hoc est corpus meum , quod pro vobis tradetur : Hoc facite in meam commemorationem. Eadem verò verba repetere Paulum post consecratum calicem , non absolutè , sed hypotheticè , his verbis : *Similiter & calicem postquam cœnavit , dicens : Hic calix novum testamentum est in meo sanguine : Hoc facite quotiescumque bibetis in meam commemorationem.* Quare præceptum bibendi Calicis ex illis verbis colligi nequit ut prolatis ante consecratum Calicem , cùm una tunc esset tantùm species ; neque ex eisdem post consecratum Calicem prolatis , cùm tunc non usus Calicis absolutè præcipiatur , sed mandetur , ut bibens Calicem , quotiescumque id facere contigerit , in Christi memoriam faciat , & mortem Domini annuntiet. Ergo ex verbis illis haberi quidem potest usum Calicis in Ecclesia perpetuò retinendum esse , ut memoria passionis dominicæ jugiter repræsentetur ; sed ab omnibus & singulis calicem usurpandum esse minimè colligitur. Sanè sicut præcepto illi *Geneseos cap. 1.* denunciato , *Crescite , & multiplicamini , & replete terram* , satisfacit Respublica , tamen si non omnes & singuli matrimonium ineant , nec procreandis liberis operam dent : ita præcepto bibendi in memoriam Passionis Christi calicis morem gerit Ecclesia , quanvis non omnes , sed soli Sacerdotes de sacro Calice bibant. Adde omnia quæ tunc præsentibus Apostolis Christus præcepit , omnes & singulos , fatente ipso hæretarcha Calvino *lib. 4. Instit. cap. 17. §. 43.* minime obstringere. *In manu , inquit , accipiant fideles , necne ; inter se dividant* ( quod tamen Christus expressè verbis istis Apostolis impe-

ravit: *Accipite, & dividite inter vos*) an singuli quod sibi datum fuerit edant; calicem in manu Diaconi reponant, an proximo tradant; panis sit fermentatus, an azymus; vinum num rubrum, an album, nihil refert. Hæc indifferentia sunt, & in Ecclesia libertate posita. Quasi ex Calvini cerebro, & non ex Ecclesiæ iudicio, quæ indifferentia, quæve necessaria iudicanda sint pendeat.

Ex quibus etiam planus habetur aliorum ejusdem Apostoli in eodem capite verborum sensus: *Probet autem se ipsum homo, & sic de pane illo edat, & de calice bibat.* Non enim inibi omnibus & singulis de calice bibere absolute jubet, sed modum & animi apparatus præscribit, quo illum oportet esse instructum, qui de pane illo edendo, vel de calice bibendo cogitaverit; & tum demum sive cœlestem panem, sive sacrum calicem esse sumendum, cum seipsum accurate probaverit.

*Eadem veritas ex variis primitivæ Ecclesiæ ritibus comprobatur.*

Usum etiam alterius, vel utriusque speciei fuisse priscis temporibus indifferentem, & Ecclesiæ arbitrio permissum, argumento sunt varii Ecclesiæ antiquitus probati ritus, ex quibus unam duntaxat speciem fuisse usurpatam liquido constat.

Primum antiquissimo ritu sacra Eucharistia domum à fidelibus deferrebat: cujus praxis testes sunt Tertullianus *lib. 2. ad uxorem, cap. 5.* Cyprianus, Basilii, & alii testes locupletes supra dum de Ministro Eucharistiæ memorati,

ex quibus etiam constat Eucharistiam & à Monachis in deserto & solitudine diu servandam, & ab itinerantibus ad loca remotissima proficiscentibus fuisse deportatam. Atqui incredibile est duplicem speciem semper fuisse domum, in Monasteriorum secellus, in navem pelago committendam, atque in longinquas & remotissimas regiones deportatam; tum quia nunquam dicitur sanguinem Christi, sed semper corpus fuisse delatum; quo loquendi modo una species panis, qui vi verborum in corpus Christi convertitur, significatur. Tum quia Eucharistia sic delata aliquando, per annum integrum, ut habetur in Prato spiritali, cap. 49. in solitudine, saviente præsertim persecutione servabatur. Quod tamen à natura liquidorum, vinæ præcipuè, quod facilè acescit & corrumpitur, abhorret. Tum quia sacratus Calix nunquam in manus laïcorum dari, & multò minùs aliorum deferri solitus erat, sed per manus Diaconorum ministrabatur. Tum demùm quia loco citato Tertullianus loquens de muliere quæ gentili nupta sit: *Non sciet, inquit, maritus, quid secreti ante omnem cibum gustes; & si sciverit, parem non illum esse credit qui dicitur.* Ubi & unius panis speciei mentionem facit, & illam fuisse tantùm adhibitam, clare significat, alioquin ex odore vini quid mulier gustasset, facilè vir scire potuisset. Ergo unius tunc temporis speciei usus frequentabatur.

Nec valet responsio Kemnitii aientis non esse quæstionem de communione domestica, sed de ea quæ in Ecclesia sub duplici semper specie dispensabatur; & ideo privata illa communio quæ sensim inreperat, antiquata & ab-

rogata fuit, atque etiam severius prohibita in Conciliis Toletano & Casaraugustano. Nihil, inquam, valet hujusmodi effugium. Tum quia si quid probant quæ nobis hæretici obijciunt Scripturæ testimonia, suadent etiam nunquam unicam speciem sive in templo, sive domi, in qua Eucharistiam Christus ipse consecravir, esse usurpandam. Quæ proferunt etiam ad utriusque speciei necessitatem stabiliendam rationum momenta adversarii, peræquè adversus unicam speciem domi atque in Ecclesia perceptam militant. Ergo nihil probant hoc ipso quod nimis probant quæcumque motiva producant. Tum quia Eucharistiam in deserta loca prisci deferrebant Christiani, ut divino de sumenda Eucharistia præcepto satisfacerent. Ergo per unius speciei usum illi morem se gerere præcepto arbitrabantur. Falsum porro est quod Kemnitius de abrogandæ domesticæ communionis motivo subjicit. Non enim idcirco interdicta est, quòd ejus usu divinum præceptum non impleretur, sed quia cessante persecutionis procellâ, & necessitate sublata, judicaverunt Ecclesiæ Proceres rem tam sacram non in prophano, sed in sacro duntaxat loco esse frequentandam, & in domesticis communionibus populi incuriâ, ignorantia, vel etiam malitiâ plura tum indecora, cum etiam scandalosa facile irrepere proclive esse.

Confirmari autem hæc omnia validè possunt, quia ut docet S. Augustinus *lib. 2. cont. litter. Petiliani, cap. 23.* & *serm. 152. de tempore*, viris Eucharistia in manus, mulieribus verò in lintaminibus nitidissimis dabatur, corpus ut Domini acciperent. Ad quem morem alludit Ca-



non 36. Concilii Antisiodorensis : *Non liceat mulieri nudâ manu Eucharistiam sumere, nec manum suam ad pallas dominicas mittere.* Et can. 32. *Unaquaque mulier, quando communicat, dominicalem suum* ( id est mundissimum linteum ad excipiendum Domini corpus idoneum ) *habeat. Quod si non habuerit, usque in alium diem Dominicum non communicet.* Cùm ergo aliunde constet sacrum calicem non nisi per manus Diaconorum fuisse dispensatum, relinquitur unam tantùm speciem cùm viris, tum mulieribus domum deferendam, ibique percipiendam fuisse traditam.

Secundò infantibus olim Eucharistia sub unica specie porrigebatur; & cùm non possent cibum aliquem solidum sumere, aliquid sanguinis Domini in os eorum per Presbyterum, aut Diaconum instillabatur. Hujus moris meminit Hugo à S. Victore lib. 1. de sacram. cap. 20. eumque vocat *primariam Ecclesiæ institutionem.* Narrat etiam S. Cyprianus tract. de lapsis, quod cùm puella nutrici relicta, insciâ matre quæ ob persecutionem fugerat, de idolothytiis gustasset, & in Ecclesiam tempore sacrificii à matre allata fuisset; ubi, inquit, solennibus adimpletis, calicem Diaconus offerre præsentibus cœpit, & accipientibus cæteris locus ejus advenit, faciem suam parvula instinctu divinæ Majestatis avertere, os labiis obfurantibus premere, calicem recusare. Perstitit autem Diaconus, & reluctanti licet, de Sacramento sanguinis infudit: tunc sequitur singultus & vomitus in corpore, atque in ore violato permanere non potuit Eucharistia, utique sub una vini specie porrecta: si enim sub specie panis Eucharistiam

ristiam absque difficultate puella suscepisset, in ore violato permansisset Eucharistia; illeque vomitus non tam miraculo, quàm vini horrore vel alteri causæ naturali absque negotio ascriberetur. Si autem sub unius specie vini Eucharistia etiam in Ecclesia priscis temporibus, iisque erroris labisque puris ministrata fuit, profectò docti ab Apostolis Patres existimarent, unius speciei usu divino de sumenda Eucharistia præcepto fideles satisfacere.

Tertiò Eucharistia, sicut modò in Ecclesia Catholica solet, ita priscis temporibus servabatur pro infirmis sacro Viatico muniendis. *De his qui recedunt ex corpore*, inquit Concilium Nicænum I. can. 12. *antiqua legis regula observabitur etiam nunc; ita ut si fortè quis recedat ex corpore, necessario vitæ suæ viatico non defraudetur.* Quod & antea Concilium Ancyranum can. 6. decreverat. Quam gratiam non esse hominibus in pœnitentia positis imminente extremo vitæ discrimine denegandam sancivit Concilium Arelatense II. can. 12. *De his*, inquit, *qui in pœnitentia positi vitam excesserunt, placuit nullum communionem vacuum debere dimitti, sed pro eo quod honoravit pœnitentiam, oblatio recipiatur.* Narrat etiam Eusebius lib. 6. *histor. Ecclesiast. cap. 44.* ex epistola Dionysii Alexandrini, Presbyterum dedisse puero particulam Eucharistiæ deferendam cui-dam seni nomine Serapioni ægroto, atque iussisse ut eam prius madefactam seni porrigeret; quia nimirum species illæ panis diu asservatæ duruerant, nec poterant nisi madefactæ à sene eoque infirmo deglutiiri. Quem ritum usque in hodiernum diem Græcos observare testatur oculatus

oculatus testis Arcudius lib. 4. c. 53. & 55. Solent enim feria quinta Majoris Hebdomadæ Eucharistiam in memoriam cœnæ Domini consecrare, quam per annum integrum in usum & gratiam infirmorum in sacrarium reponunt & reservant. Atqui ex eo ritu unius speciei usus manifestè convincitur; tum quia vini species non deferrebat, tandiu servanda ob certum corruptionis periculum: tum quia species vini non nisi per Presbyteros & Diaconos dispensabatur: tum quia speciem vini ad Serapionem Presbyterum misisse non legitur, imò præcipiendo ut puer eam madefaceret quò facilius deglutiretur, supponebat solam illam speciem percipi, alioquin eam ipse sanguine Domini intrinxisset & madefecisset; non enim contrectandi Dominici sanguinis facultas omnibus indiscriminatim fiebat. Vidit hujus argumenti efficaciam hæreticus ipse Calvinus, & veritate coactus lib. 4. Instit. cap. 17. §. 39. scripsit: *Sed enim qui sic faciunt (id est Eucharistiam pro infirmis sub specie panis asservant) habent veteris Ecclesiæ exemplum, fateor: verum in re tanta, & in qua non sine magno periculo erratur, nihil tutius est quàm ipsam veritatem sequi. Quasi veritas Ecclesiæ veteri ejusque sequaci novæ ignota; uni se Calvino conspicuam ostenderit? Quasi in re tanta Ecclesiæ columna & firmamentum veritatis veritate despectâ amplexata fuerit falsitatem? Quasi periculum sit veteris Ecclesiæ vestigiis insistere, & periculum potius non sit diverticula flexionesque persequi, huc se & illuc, atque in omnem doctrinæ ventum versare; denique vetustatem novitate jactellere non desinere. Semper quidem cavendum,*

dum, & maximè cum periculum imminet; sed incautus ille vehementer est, animique impotens, qui trepidat timore ubi non est timor; facit nam ille periculum timendo, ut in certum erroris barathrum incurrat. Sed hæreticis Ecclesiæ securitas pro periculo; novitatis periculum pro securitate; & iusamandæ Matris Ecclesiæ non data, sed accepta occasio pro deliciis est.

Quartò ex omni christianæ ætatis memoria servatur ritus communicandi ex præsanctificatis, qui tam antiquæ originis est, ut principium ignoretur. Neque enim sola Ecclesia Latina in Parasceve Majoris Hebdomadæ solam speciem panis die antecedenti consecratam usurpat, sed ipsa etiam Ecclesia Orientalis morem illum ab antiquo retinet & servat per totam quadragesimam, solis Sabbathis, Dominicis, & festi Annuntiationis diebus exceptis, quibus integrum sacrificium facit & conficit. Qua de re sic olim constituerunt Trullani Patres can. 52. *In omnibus sanctæ Quadragesimæ jejunii diebus, præterquam Sabbatho & Dominica, & Annuntiationis die fiat sacrum præsanctificationum sacrificium.* Dicitur autem sacrificium non strictè acceptum quod in consecratione situm est, vel eam certè omnino exigit; sed quia est oblatio sacrificii jam peracti & perfecti, & mysteriorum consumptio. Ex hoc autem ritu unius speciei usus quàm probatus, quànve antiquus sit, manifestissimum est.

Nec refert si respondeas, Græcos Eucharistiam sive pro infirmis asservatam, sive in Missa Præsanctificationum perceptam sanguine Domini intingere solere, ac proinde etiam tunc  
utramque



utramque speciem & distribuere morientibus, & in Præsanctificatorum Liturgiis usurpare. Non refert, inquam: tum quia hæc intinctio alicubi usurpata nunquam fuit universim probata, sed potius in Concilio Bracarenfi III. *can. 1.* reprobata. Tum quia, ut suprâ vidimus, mulieres Eucharistiam in nitidissimo linteolo excipiebant, quæ si fuisset sanguine madens, sacrum liquorem linteolum exfluxisset, vel non paucæ guttæ in terram defluxissent, quod sine grandi irreverentia non contigisset: quod periculum quantum præcavere Patres solliciti fuerint, patet ex homilia 13. Origenis in Exodum, sic aientis: *Nostis qui divinis Mysteriis interesse consuevistis, quomodo cum suscipitis corpus Domini, cum omni cautela & veneratione servatis, ne ex eo parum quid decadat, ne consecrati muneris aliquid dilabatur. Reos enim vos creditis, & recte creditis, si quid inde per negligentiam decadat.* Quod & observat Augustinus, & ad mores pie reflectit libro quinquaginta homiliarum, homil. 26. *Quantâ, inquit, sollicitudine observamus, quando nobis corpus Christi ministratur, ut nihil ex ipso de nostris manibus in terram cadat: tantâ sollicitudine observemus, ne verbum Dei quod nobis erogatur, dum aliquid aut rogamus aut loquimur, de corde nostro pereat.* Tum quia idem apparet ex historia quam Sozomenus lib. 8. *histor. cap. 5.* & Nicephorus lib. 13. *cap. 7.* referunt de muliere hæresis Macedonianæ veneno infecta, quæ suam cum vellet hæresim occultare, seque Catholicam simulare in gratiam mariti concionibus Chrysostomi ad fidem catholicam conversi, qui vitæ

comm.

communione uxori negare minatus fuerat, nisi sacrorum mysteriorum confors fieret, panem Eucharisticum à Chrysostomo sacra faciente tanquam paulò post manducatura accepit, quem tamen fidæ ancillæ clam dedit, ab eaque panem prophanum domo delatum Eucharistiæ loco propalam comedendum sumpsit, qui continuo in lapidem iusti Judicis potentiâ conversus est. Quem lapidem suo tempore, id est circa annum 440. in thesauro Ecclesiæ Constantinopolitanæ asservatum haberi Sozomenus testatur. Ex quo facto liquet arbitrarium fuisse alterius speciei etiam in Ecclesia Christiana usum; si enim indispensabiliter ad sumendum sacrum Sanguinem omnes adacti fuissent, non potuisset impia illa scœmina errorem tegere & dissimulare suum, nec vinum prophanum loco sacri bibere & supponere potuisset, quia species vini non in manus alicujus sumenda porrigebatur, sed ab uno Diacono distribuebatur, tempore præsertim Chrysostomi, qui Diacono suo præceperat, ut vel ipsum Imperatorem coërceret, si indignè accedere præsumpsisset. Unde in modernos Græcos mos ille manavit ambas species commixtas populo, fraus ulla ut ne accidat, cochleari dispensandi. Idem etiam ex simulatione Manichæorum tempore S. Leonis magni postea referenda perspicuum est. Tum demùm quia illa intinctio ad rem nostram nihil prorsus facit: ideo enim Sectarii volunt utramque speciem necessariam esse, quia bibere sanguinem præcipimur: at panis in pyxide per annum retentus, & olim in deserto diutissimè servatus omninò exsiccat: unde qui illum edit, bibere nequaquam dici potest,

potest, cum nullum liquorem sorbeat.

Quintò sacra Eucharistia abstemiis olim sumenda porrigebatur; cuius moris meminit S. Hieronymus *epist. 22. ad Eustoch.* ubi quarundam Catholicarum virginum abstemiarum meminit, quæ Romæ in sacris mysteriis præ nativo vini horrore à specie vini abstinebant; ibidemque increpat & redarguit lascivas quasdam mulieres, quæ adversus usum illum obloquentes, sacras illas Virgines miseras & Manichæas dictitabant. Et certè abstemios non solum Catholica Ecclesia, sed nec vel ipsi etiam Lutherani & Calviniani ad usum calicis unquam astrinxerunt. Ergo utriusque speciei usus non est omnibus & singulis ad salutem necessarius.

Sextò solennis erat per universas Galliæ Ecclesias decimo sæculo ritus, quo Episcopus Presbytero recens ordinato Eucharistiam in una specie panis per quadraginta dies in memoriam quadraginta dierum quibus Christus cum Apostolis conversatus est, sumendam porrigebat, quem refert Fulbertus Carnotensis *epist. ad Picardum*; ubi & asserit, suos Provinciales Episcopos in huiusmodi ritum omnes consentire; ut dum ordinati Sacerdotes quotidie celestis panis alimentum reficiuntur, tempus illud in mentem habeant, quo per quadraginta dies Dominus discipulis apparens & convescens desiderata visionis societate refecit. Ergo unius speciei usus nedum toleratus, sed commendatus etiam præcædis temporibus fuit.

Denique idem convincitur ex ritu illo quo aliquando usus calicis ad internoscendos Manichæos, vinum absque sacrilegio bibi non posse:

posse effutientes præceptus est à S. Leone & Gelasio Pontificibus. Sic enim habet Magnus Leo sermone 4. de Quadragesima: *Cùm ( Manichæi ) ad regendam infidelitatem suam nostris audeant interesse mysteriis , ita in Sacramento- rum communione se temperant , ut interdum tutius lateant : ore indigno Christi corpus acci- piunt , sanguinem autem redemptionis nostra om- ninò haurire declinant. Quod ideo vestram vo- luimus scire Sanctitatem , ut vobis ejusmodi ho- mines & his manifestentur indiciis ; & quorum deprehensa fuerit sacrilega simulatio , notati & proditi à Sanctorum societate sacerdotali authori- tate pellantur. Cùm autem Manicæorum er- ror tempore Gelasii nondum esset extinctus , præceptum Pontifex renovavit , cujus decreti verba referuntur canone Comperimus , de con- secrat. dist. 2. Comperimus quod quidam sumptiâ tantummodò corporis sacri portione à calice sa- crati cruoris abstineant , qui procul dubio , quo- niam nescio qua superstitione docentur astringi , aut integra Sacramenta percipiant , aut ab in- tegris arceantur. Ubi vides occasione supersti- tionis eorum , qui vinum tanquam fel princi- pis tenebrarum repudiabant , utramque spe- ciem percipi Gelasium imperasse , quam inte- grum Sacramentum appellat , non quòd una- quæque species quoad rem contentam non sit integrum Sacramentum , sed quia tota sacra- mentalis significatio non nisi in utraque specie invenitur. Ex hoc autem ritu claret usum unius speciei fuisse olim licitum , & à Catholi- cis indifferenter frequentatum. Si enim Ca- tholici utramque semper speciem usurpassent , latere tutò Manichæi sub una specie commu- nicantes*



nicantes minimè potuissent, sed insolito participandi sacris mysteriis ritu resecti citò deprehensique fuissent; tantùmque abest ut se Catholicos simulare potuissent, ut potius seipsum apertissimè prodidissent.

Sicut ergo in Manichæorum impietatis execrationem unius speciei usu per se licito, & suo tempore frequentato fidelibus Magnus Leo prudenter interdixit, ambas species imperavit: ita posteriores Pontifices & sacra Concilia extinctâ Manichæorum perfidiâ unius speciei liberum usum permiserunt, quin propter hæreticos realem corporis Christi præsentiam, & omnium quæ in Christo sunt concomitantiam in Eucharistia inficientes, accedentibus etiam aliis rationum & utilitatum momentis longè gravissimis, utriusque speciei usum laicis prohibuerunt. Solet enim à Deo gubernata Ecclesia non solum hæreticorum errores, sed & quos sibi asciscunt mores proprios, tamen in speciem innoxios averfari; ne si vel ad latum unguem eis cesserit, amplius illi insolescant. Sic si referentibus nonnullis credimus, emergente de necessitate indispensabili panis azymi ad materiam Eucharistiæ usurpandi hæresi, abdicatis azymis fermentatum Latina Ecclesia adhibuit, azymum panem deinde extinctâ hæresi, revocavit. Sic Beatus Gregorius trinam baptismorumersionem per se irreprehensibilem, ob hæreticos divisionem Divinitatis hanc ceremoniâ significare volentes, Magnus Gregorius lib. 1. Regist. cap. 41. improbavit: *Reprehensibile, inquit, esse nullatenus potest, infantem in Baptismo vel ter, vel semel immergere, quando & in tribus personibus Personarum Trinitas, & in una*

*una potest Divinitatis singularitas designari. Sed quia nunc hucusque ab hæreticis infans in Baptismate tertio mergebatur, faciendum apud nos non censet, ne dum mersiones numerant, Divinitatem dividant; dumque quod faciebant faciunt, se morem nostrum vicisse glorientur.*

*Alia pro una specie probatio ex Scripturis, accedente Patrum interpretatione depromitur.*

Eandem de unica specie licet usurpanda Catholicam veritatem confirmare aggredimur, fin evidenter & invictè, certè probabiliter ex quibusdam Scripturæ testimoniis, quæ de sacra Eucharistia Patres intelligenda tradiderunt.

In primis *Luca 24.* dicitur, quod postquam Dominus intravit cum discipulis in castellum quò ibant, eisdem panem Eucharisticum præbuit, in cujus fractione Salvatorem agnoverunt. Verba enim illa, *Cognoverunt eum in fractione panis*, de Eucharistia intellexerunt Hieronymus, Author operis imperfecti in *Matth.* Venerabilis Beda, & Theophilactus in illum locum, atque etiam Augustinus *lib. 3. de consensu Evangelist. cap. 25.* Atqui tunc Christus unicam speciem dispensavit; sacer namque textus ita benedictionem, & fractionem, & præfectionem cum Christi recessu conjungit, ut aliquam moram, in qua calicem illis dederit, minimè intercessisse videatur: *Dum recumberet cum eis, accepit panem, & benedixit, ac fregit, & porrigebat illis: & aperti sunt oculi eorum, &*  
*cognove*

*cognoverunt eum: & ipse evanuit ex oculis eorum.*  
 Qui locus magis urget nostrates Calvinianos, qui Puritanos audire ab omnibus volunt, quia purum putum sacrarum litterarum abdicatâ traditione textum recognoscunt. At enim quod Christus illis calicem præbuerit propinandum nunquam probabunt. Ergo sola fracti panis communio ab ipsis discipulis Christo ipsomet ministrante adhibita est. Nunquam enim ex Scripturis probabunt verba illa per synecdochen esse intelligenda, & fracti panis appellatione utramque speciem comprehendendi.

Nec dicant Calvinistæ, non constare fractionem illam panis fuisse eucharisticam, cum de hoc quidam etiam magni nominis Theologi dubitent. Non itaque id dicant, quia etiam varia sit loci illius intelligentia, id tamen nobis sufficit, quamplures utriusque Ecclesiæ Patres fractionem illam panis de Communione Eucharistica exposuisse, in qua tamen sola discipuli Dominum absque usu calicis cognoverunt. Ergo Patres illi unam duntaxat speciem tunc distributam esse, ac proinde distribui licite exemplo Christi posse crediderunt. Unde signanter in titulo monui Ecclesiæ Catholicæ ritus traditionem ex Scripturis, accedente Patrum expositione erui.

Nec dicant rursus Sectarii, sequi unam duntaxat speciem fuisse à Christo Domino consecratam; quem tamen usum nunquam ipsa Catholica sequitur Ecclesia. Frustra enim id dicent; quidquid enim tandem illud sit quod Christus tunc consecravit, de quo in superioribus egimus, id nobis constat tamen, Christum solum panem porrexisse, in soliusque fractione



Etione panis ipsum Apostolos cognovisse. Cur ergo in Ecclesia damnant, quod in Christo revereri tenentur.

Secundus locus habetur *Actorum 2.* ubi de primis fidelibus legitur: *Erant autem perseverantes unanimiter in doctrina Apostolorum, & communicatione fractionis panis, & orationibus.* Quæ communicatio fractionis panis non solum à Patribus & sacris Interpretibus, sed ab ipsis etiam Sectariis de communione Eucharistica intelligitur, cum in commendationem pietatis & fervoris primorum Christianorum id S. Lucas referat. Quæ verba de unius speciei usu intelligenda esse colligitur: tum quia solius fractionis panis meminit sacer Textus, cui quidquam de nostro etiam ex traditione depromptum addere, juxta Puritanorum principia, piaculum est. Tum quia fractionem panis à consecratione & dispensatione calicis accurate, ubi opus est, Scriptura distinguit, ut patet tum ex institutione à tribus Evangelistis, atque à Paulo memorata; tum ex illo *1. Cor. 10. Calix benedictionis cui benedicimus, nonne communicatio sanguinis Christi est? Et panis quem frangimus, nonne participatio corporis Domini est?* Ubi non sine causa doctus à Domino & Ecclesiam docens Doctor Gentium in veritæ benedictionem calicis à fractione panis distinguit, innuens calicem quidem in omni consecratione benedici, sed non omnibus semper distribui, quia omnes & singuli sicuti panem, non ita calicem participabant tamen: panis verò semper in omni sacrificio, pro illorum temporum fervore, astantibus frangebatur. Tum demùm quia inter illos nascentis Ecclesiæ fideles in oratione



oratione & fractione panis perseverantes nonnulli erant Nazaræi ad fidem conversi, qui permittentibus Apostolis ad tempus legalia servabant. Nazaræi porro ex præscripto legis Moisaicæ à vino, ab eoque omni quod inebriare potest ita abstinebant, ut nec uvas etiam passas comedere sibi indulgerent. Ergo unius speciei usus tunc temporis, approbantibus ipsis Apostolis, fractio nimirum solius panis frequentabatur.

Neque dicas id per synecdochen à S. Luca utramque speciem sub unius nomine complectente scriptum esse. Cujus fundamentum esse potest, quia quemadmodum ibi dicitur fideles in fractionis panis communicatione perseverasse; ita *Actuum* 20. dicitur: *Vna sabbati cum convenissemus ad frangendum panem, Paulus disputabat cum eis, profecturus in crastinum, protraxitque sermonem usque in mediam noctem.* Cum autem inter illas inoras adolescens Eutychus cadens à tertio cœnaculo mortuus esset, & à Paulo resuscitatus, subdit sacer Textus: *Ascendens autem (Paulus) frangensque panem gustans, &c.* Quæ verba de Eucharistia sacri Interpretes communiter exponunt post Augustinum *epist.* 86. Porro illa per synecochen intelligi oportere, ut consecratio Calicis subintelligatur, hinc colligitur, quia alioquin in unica specie Eucharistiam Apostoli consecrassent: quod & absurdum per se videtur, & ab ipso Catholicæ Ecclesiæ sensu alienum.

Non, inquam, id dicas. Priora enim verba optimè exponi possunt ut sonant. *Cum convenissemus ad frangendum panem*, significat eodice fuisse communionem non domesticam &

privatam hic temporibus ob persecutiones frequentatam, sed generalem & Ecclesiasticam. Communio porrò usitatâ appellatione & ad occultandum infidelibus tanti Sacramenti arcum peridoneâ dicebatur fractio panis, quia solius species panis ordinariè sumebatur, juxta illud Actor. 2. *Quotidie quoque perdurantes unanimiter in templo, & frangentes circa domum panem*; nimirum Eucharisticum, quem & in itinere, & in solitudinem secessus, & in loca remotissima deferebant, ne à quotidiano cœlestis cibi usu abstinere qui vitam cœlestem ducebant. Ingentem autem vini copiam tunc, & deinde quandiu quotidianâ, vel saltem creberrimâ Communionis usus viguit consecratam fuisse, ut posset absentibus omnibus provideri & tanto fervori satisfieri, incredibile est: ægrè enim sacri liquoris abundantiam ad Sacerdotes consecrandam detulissent, ægrius diu eam asservassent, ægerrimè in dissitas regiones asportassent. Quare ordinariè sola sacratum panis species usurpabatur; unde Communio Eucharistica usuali nomenclaturâ fractio panis appellabatur. Quæ tamen fractio panis peractum sub utraque specie sacrificium supposebat: multæ enim in uno sacrificio particulæ, ut etiam apud Catholicos moris est, dispensandæ consecrabantur.

Paret ergo, ex priori testimonio non sequi Apostolos unam duntaxat speciem consecrasse; non enim eò loci dicitur quid Apostoli facerent, sed quid plebs Christiana facere in illa tanta concordia & morum castimonia soleret. Nihil inibi de consecratione, sed de uno duntaxat Eucharistiæ usu sermo instituitur. Unde

ex illa S. Lucæ historia non quid necessariò consecrandum sit, sed quid à fidelibus usurpandum confirmamus.

Majorem præ se fert difficultatem alter ex Act. 20. depromptus locus. Ea enim die quæ Dominica erat, celebrata fuisse tremenda incruenti sacrificii mysteria innuit Augustinus epistola citata. *Una etiam sabbati*, inquit, *tunc appellabatur dies qui nunc Dominicus appellatur*, quod in Evangeliiis apertius invenitur. Nam dies Resurrectionis Domini prima sabbati à Mattheo, à cæteris autem tribus una sabbati dicitur: quem constat eum esse qui Dominicus postea appellatus est. :: Et ita eadem nocte fracturus panem, sicut frangitur in Sacramento corporis Christi, produxit sermonem usque ad medium noctis, ut post Sacramenta celebrata, rursus usque ad diluculum alloqueretur congregatos, quoniam multum festinabat, ut luceſcente proficiſceretur Dominico die. Ex quibus obiter advertes, quàm antiqua & ab Apostolis derivata sit Ecclesiæ Catholicæ consuetudo, quâ fideles ad augusta mysteria singulis diebus Dominicis accedant, quo & diem illum religiosiùs sanctificent, & in illud religionis centrum coeùntes magis magisque mutuâ charitate colligentur. Advertes etiam in illo Christianorum sacro conventu Ecclesiasticas cæremonias sectariis nostratibus tantoperè exosas non defuisse. Nam sicut etiamnum cereis & lampadibus inter celebranda mysteria altaria nostra collucent: ita etiam tunc, ut versu 8. narratur: *Erant lampades copiosæ in cœna*, ubi eramus congregati; non solum ad pellendas tenebras, ad quod copiosis lampadi-

bus opus non erat, sed ad celebratæ Eucharistiæ mysteria decoranda.

Atque hinc difficultas instauratur : Paulus enim consecrans Eucharistiam utramque speciem adhibuit : & tamen fregisse panem, eumque gustasse tantummodò dicitur. Ergo in fractione panis accipitur pars pro toto, & sub illo nomine utraque species comprehenditur. Attamen nunquam mihi persuaserim Lucam tribus aut quatuor locis usum Eucharistiæ commemorantem semper improprie, semper metaphoricè, & synecdochicè fuisse in re tanti momenti loquutum. Certè si conjecturis indulgere liceat, & sub fracto pane semper vinum intelligere oporteat, eadem facilitate dicemus Christum in deserto, ubi panem fregit, cados etiam vini multiplicasse.

Litteræ ergo quidam Theologi, quos sequitur Becanus *libro de Communionem sub utraque specie, cap. 4.* insistentes censent Apostolum sub una tantum specie consecrassè, exemplum Christi in castello Emaüs sequuti : unde inferunt utriusque speciei consecrationem non jure divino, sed Ecclesiastico duntaxat imperari; quod & quibusdam factis confirmare nituntur. Sed quidquid ea supponat responsio, cum supra à nobis confutatum sit, aliter argumento faciendum est satis.

Verisimilior ergo responsio apparet, si dicamus ea quidem die sacrificium fuisse celebratum, at non à Paulo tamen. Cum enim Paulus in prædicandum totus incumberet, sermonemque in mediam noctem protraxisset, quem usque in lucem erat protracturus, ut patet ex ver-



ſu II. non poterat ille ingenti multitudini Euchariftiam diſpensare. Alius ergo Sacerdos Paulo jugiter prædicante Euchariftiam diſpensabat, & ille ſolus conſecraverat, atque utramque ſpeciem acceperat: alii verò aſtantes, quin & ipſe Paulus ſola panis fractione paſti ſunt. Quare ne à littera recedamus, dicendum Paulum prædicationem non interrupiſſe niſi ad excitandum mortuum è tertio cœnaculo lapſum, & ad frangendum panem, id eſt, ad ſacram Euchariftiam ab alio conſecratam percipiendam. Nec eſt inconſuetum Paulum citò diſceſſurum toto tempore diſtributæ populo Euchariftiæ prædiſſe; ſicut enim ſermone Chriſti corda fidelium in caſtellum Emaûs proficiſcentium charitate, quæ optima & una eſt ad cibum cœleſtem ſumendum & concoquendum diſpoſitio, inflammabantur; ita ignitis Pauli eloquiis fideles ad frangendum dignè panem Eucharifticum accendebantur. Unde, ut ait Chryſoſtomus, miræ erat aſtantium devotio, qui conveniant, *ut audirent tubam illam, & amabilem vultum intuerentur.*

*Ratione theologicâ idem Eccleſia Catholica uſus confirmatur.*

Ille uſus legitimus eſt atque probandus, quo & Sacramenti ſalvatur integritas, nec fideles fructu Euchariftiæ fraudantur, & ad quem inducendum graviffimis & in reverentiam tanti Sacramenti cedentibus rationibus Eccleſia Catholica permota eſt. Atqui hæc omnia in ritu Communionis ſub una ſpecie à fidelibus populis, & à Sacerdotibus non celebrantibus

frequentatæ inveniuntur & concurrunt : ergo ritus unius speciei licitus , honestus , & probandus est. Major propositio est manifesta ; supposito enim quod Deus ritum illum non prohibuerit , ut à principio hujus speculationis ostendimus , nihil aliud ad ejus securitatem & honestatem desiderari potest , ut consideranti patebit. Minoris ergo singulæ partes ordine suadendæ sunt.

In primis in unicæ speciei usu salvari substantiam integram Sacramenti ostendo ; quia in una specie totum Sacramentum , & quantum ad necessariam rationem signi , & quantum ad totum sub eo signo contentum reperitur. Etenim unica species significat Christum præsentem : significat etiam passionem & mortem Christi , cum repræsentet carnem veluti separatam à sanguine : significat etiam refectionem spiritalem animarum sanctarum , quæ per cibum peræquè atque per totum repræsentatur : nam Ecclesiastici 15. sapientia modò pani , modò aquæ comparatur. Et Matth. 5. justitia dicitur à Christo cibus & potus : *Beati* , inquit , *qui esuriunt & sitiunt justitiam.* Et Joan. 6. *Qui venit ad me non esuriet , & qui credit in me non sitiet unquam.* Apostolus etiam suam prædicationem nunc cibum , nunc potum appellat. Unde quia in refectione spirituali non differunt cibus & potus , per alterutrum illa sufficienter significatur. Denique unica species spiritalem fidelium unionem significat ; nam per panem ex multis granis confectum unitatem fidelium intelligi Patres docuerunt , & significat Apostolus dum ait : *Vnus panis unum corpus multi sumus.* Nihil aliud autem assignari potest

potest quod sacramentum Eucharistiæ significet. Ergo in unica specie tota sacramenti significatio subsistit. Quanvis enim per duplicem hæc expressius & diffusius significantur, satis expresse tamen per unam: sicut per totius corporis immersionem expressius & plenius animæ ablutio designatur; sufficienter tamen per asperersionem, quâ pars corporis intingitur, repræsentatur.

Rem etiam sub Sacramento contentam totam sub utraque specie contineri clarissimum est. Cum enim res illa contenta sit Christus Dominus, perfectus Deus, perfectus homo, qui integer sub utraque specie sine formaliter & vi verborum, certè concomitanter invenitur, ut ex dictis supra perspicuum est. Ergo in unica specie totum sub sacramento contentum reperitur, ac proinde integra sacramenti substantia in illa salvatur.

Per usum etiam unius speciei non fraudari fideles fructu Eucharistiæ, quæ est secunda minoris principalis pars, sic monstratur. Fructus specialis Eucharistiæ est augmentum & conservatio vitæ spiritualis; ad hoc enim carne Christi vescimur, ut spiritus de Deo saginetur. Atqui fructum illum æquè nobis parit una atque gemina species, quia fructum illum edit Eucharistia quatenus Christum continet, qui æquè integrè sub unaquaque habetur. Unde ipse Salvator unius speciei mentionem faciens, ait: *Qui manducat hunc panem, & qui manducaverit ex hoc pane, vivet in æternum. Panis quem ego dabo, caro mea est pro mundi vita.* Quare licet expressior & explicatior sit utriusque speciei significatio, majorem tamen gra-



tiam non significat , nec eam proinde ex opere operante producit : sicut licet expressius animæ abluitionem immersio totius corporis quàm unius partis aspersio repræsentet, & licet Christi cum Ecclesia unionem explicatiùs significant nubentium verba quàm nuptus ; majorem tamen & copiosorem gratiam non significant. Ergo laici unica specie resecti nullo Sacramenti fructu fraudantur , nulla illis proinde injuria irrogatur. Sanè cum species vini gratiam ratione sanguinis Christi, quem continet , producat ; non carebit illâ gratiâ qui sanguine Christi reficietur. At laicus unica panis specie resectus ipsum etiam Christi sanguinem sumit , qui sanguis sive vi verborem , sive per concomitantiam in sacramento acceptus, ejusdem virtutis & efficacitatis est , cum totam quantam habet , à Divinitate hypostaticè sibi unita derivet. Ergo fatendum est , quod ad fructum attinet , nullâ gratiâ necessariâ ad salutem eos defraudari , qui unam speciem solam accipiunt , inquit Tridentinum sess. 21. cap. 3.

Denique justissimæ , gravissimæ , & juxta piissimæ rationes sunt , quibus permota sancta Mater Ecclesia utens potestate sibi à Christo tradita Sacramentorum salvâ eorum substantiâ dispensandorum , ad majorem tanto Sacramento venerationem conciliandam , Fideliumque pietati consulendum , laicis atque ipsis Sacerdotibus non celebrantibus usu Calicis interdixit. Quæ multæ cum proferri in medium possint, selectiores producemus.

Primum enim postulat tam augusti mysterii reverentia , ut caveamus , ne sanguis Domini in terram fundatur : quanvis enim periculum effusionis



effusionis floccifaciant Calviniani, qui nihil in Calice præter vinum recognoscunt, illud tamen non formidare non possunt catholicæ sanguinis Christi præsentia adoratores, perpetuæque illius fidei professores: unde tot & tantæ in casu effusionis sanguinis Christi Sacerdotibus etiam citra malitiam contingentis poenæ à sacris Canonibus leguntur impositæ. Atqui illa effusio difficillimè vitari posse videtur, si sacrum calicem ingenti populi multitudini ministrare, & senibus tremulis, juvenibus inconsideratis & indiscretis porrigere, & ad infirmos omnes deferre oporteret. Ergo ingenuæ Catholicis erga Eucharistiam religionis observantia usum illum laicis prohiberi postulat.

Secundò eadem Eucharistiæ reverentia exigit, ut quoad fieri potest in hujus venerabilis Sacramenti usu quidpiam non incidat, quod munditiei & decori adversetur: patet autem, quod cum Eucharistia ægrotis præsto esse debeat, manifestum periculum est, ne species diu asservatæ coalescant, quod indecorum esset; néve hyeme in regionibus præsertim frigidis congelentur, quod valde incommodum foret.

Tertiò uniformitas in Sacramento unitatis maximè observanda videtur, ut idipsum omnes non solum dicant, sed & faciant, qui unum corpus multi sunt omnes de uno pane participant. At enim magna esset varietas, si usus Calicis laicis permitteretur, tum propter abstemios qui vini saporem ac ne odorem quidem perferre ullo modo possunt; tum propter infirmos quosdam, quibus vini usus & horrendus & noxius est: quanvis enim modica vini quantitas nocere per se non possit, imaginatio

men infirmi vini horrore occupata non parvum detrimentum parere nata est : judicavit verò prudens Mater Ecclesia , sumendam ab omnibus non esse illam speciem , quæ corporis valetudini nocumentum esset aliquod allatura. Tum denique propter vini penuriam , quâ in pluribus provinciis laboratur ; in quas etiam aliunde non nisi maximis impensis , difficillimisque itinerum longissimorum tractibus conveyi potest. Ergo & uniformitatis Ecclesiasticæ decor, & fidelium utilitas unius speciei usum justissime postularunt.

Quartò in hoc Sacramento pietatis & devotionis centro devotioni fidelium ac frequenti eorum communioni consulendum fuit. At si ab omnibus & singulis sumendus esset calix, multi à Communionis frequentia , à qua non mediocres fructus capiunt , retardarentur ; tum aliquando ob vini in quibusdam locis penuriam & caritatem ; tum propter vini conservandi difficultatem , hyeme ne gelu rigeret , æstate ne acresceret ; tum etiam propter vini horrorem ; tum propter pateræ communionem , de qua cum sordidis , graveolentibus , & nauseabundis bibere oporteret. Ergo tantùm abest ut fructu aliquo fideles populi in unius speciei usu fraudentur , quemadmodum hæretici garriunt, ut potius eorum eo ritu majoribus utilitatibus provideatur.

Quintò expedit ut in Sacramento , quod fidelibus familiare & quotidianum esse oportet, nullus error incidat, sed veritas Catholica pateat , & ante omnium oculos ponatur necessum est : proclive autem est rudem populum credere solum sine sanguine corpus sub specie panis,

panis existere, si utriusque sibi speciei usus esset necessario adhibendus; præsertim cum quidam hæretici totum Christum sub utraque specie esse inficiuntur, corpus ex sanguine sub specie panis, sanguinem purum & separatum sub specie vini comminiscuntur. Ergo tum ad convellendas hæreses, tum ad populorum præcavendos errores unius speciei usus salubri consilio institutus est.

Sexto hoc Ecclesiæ præcepto, & hæreticorum temeritati, & Catholicorum scrupulis provisum est. Cum enim ex una parte hæretici utriusque speciei usum indispensabiliter necessarium esse contendunt, nullamque indifferentiam in specierum delectu contra totius Ecclesiæ sensum & praxim ab initio frequentatam agnoscere velint, non solum verbis, sed etiam factis eorum hæresi resistendum fuit. Ex alia verò parte, cum ex varia Ecclesiæ pro temporum circumstantiis servatâ consuetudine dubitare possent Catholici, quisnam esset ad salutem rursus præferendus, æquum fuit consuetudinem sub unica specie communicandi dudum inventam stabili lege firmari, ut ne essemus sicut parvuli fluctuantes, omni doctrinæ vento agitati, omnisque schismatis & falsæ æmulationis occasio præcluderetur.

*Solutis Sectariorum objectis, quid sit  
Communio laïca explicatur.*

Quæ ab Scripturis argumenta desumunt Novatores, supra positivè confutavimus: ut iis quæ aliunde urgent occurramus, quædam scitu digna præmonenda sunt.

Sciendum ergo & fatendum est, Christum

sub utraque panis & vini specie sacrosanctam Eucharistiam instituisse : sed illud præ oculis habendum est, Christum nedum Sacramentum, sed etiam sacrificium instituisse ; ad cujus integritatem ita utramque speciem consecrari & consumi censet Ecclesia, ut nullum Sacerdotem conficientem à sumptione calicis dispensare posse se credat, præcipiatque in casu repentinæ ante consumptum sacrificium mortis alteram speciem ab alio Sacerdote, imò & à laïco accipi, si nullus adsit, vel expectari ob imminens corruptionis periculum possit, qui consumere queat Sacerdos.

Sciendum rursus utriusque speciei usum fuisse per plura sæcula indifferentem, ut ex variis Ecclesiæ receptissimis ritibus probavimus : imò, ut vidimus, aliquando Ecclesiastico Magni Leonis & Gelasii Pontificum præcepto uterque fuit usus imperatus, occasione nimirum Manichæorum, qui cùm magno errore sentirent, non posse absque sacrilegio vinum gustari, communionem sub specie vini tanquam nefariam execrabantur.

Sciendum tercio Ecclesiam Catholicam posterioribus sæculis supra recensitis rationum momentis aliisque experimentis permotam usu Calicis tum laïcis, tum Sacerdotibus non consecrantibus interdixisse, ut ex Conciliis Constantiensi, Basileensi, & Tridentino notissimum est. Verumtamen statim atque legem illam tulit Ecclesia, nonnullis permisit aut per-mitti posse pronuntiavit, quod tunc justis de causis prohibebat. Fertur enim Martin. in V. è Concilio Constantiensi Romam ingressum laïcis sub utraque specie Communionem dedisse.

Ubi



Ubi obiter notare te velim, Catholice Lector, quàm injusta, quàm à ratione aliena sit Lutheranorum & Calvinianorum adversus Romanos Pontifices, in quorum odio suum ultimum finem posuisse videntur, maledicentia; quâ illos tyrannidis & violentiæ insimulant, quòd Laïcos Calicis usu privarint: hinc ad Concilia appellandum esse protestantur. At enim si evacuare sua præjudicia, & capitale in Romanum Antistitem odium tantisper seponere passionis æstus siverit, citò advertent non à Romanis primùm Pontificibus, sed à Concilio Constantiensi usum Calicis fuisse Laïcis vetitum. Nec causari possunt ibi authoritatem Pontificiam fuisse dominatam, & Patres Concilii ad hoc decretum adegisse: nemo enim nescit Concilium illud tempore & occasione funesti schismatis tres Summos Pontifices invehentiis fuisse coactum, qui omnes eo in Concilio exauthorati sunt & ineligibiles declarati *sess.* 12. & Cardinalem Odonem de Columna die 11. Novembris fuisse in Romanum Pontificem electum, qui Martinus V. appellari voluit; quæ electio *sessione* 41. contigit. Manifestum est autem præceptum unius speciei à laïcis usurpandæ fuisse *sessione* 13. editum, in qua nullus Pontifex, nullus Summi Pontificis Legatus aderat, sed plena & sola erat Patrum Concilii libertas & potestas: ergo mendacissimè Romanis Pontificibus, ut illis populorum invidiam & odium accersant, prohibiti Calicis legem asserunt, cum tamen ante Concilium Constantiense Romani Antistites & usum Calicis Ecclesiarum optioni semper permiserint, & aliquando præceperint, & ipse Martinus V. etiam post Concilium

lium Constantiense, ut quorundam postulationi satisfaceret (quæ summa & innata est sanctæ & primæ Sedis clementia tota ad humanitatem & indulgentiam comparata) laïcis utramque speciem dispensaverit. Justis quidem de causis decretum illud Constantiense Concilium edidit, quod & Romana, & aliæ Catholicæ Ecclesiæ receperunt : sed ad id notandum & scribendum animum meum impulit modernorum iniquitas hæreticorum, qui quiescere, & à maledicendo Romano Pontifice desinere non possunt. Illis in præsentia respondere volui; laceßere non studui. At quomodo possem de illis finem facere dicendi mihi, peccandi adversus Ecclesiam Romanam cum ipsi finem non faciant, & rapere in pejorem partem quidquid sacre Ecclesiæ Hierarchæ agunt affectent? Enitendum ergo nobis est, ne plus iniquorum malevolentia possit, quàm æquorum hominum sincera existimatio. In animo nunquam fuit nostrates hæreticos inclementiùs lædere, quibus salvâ veritate placere peroptarem. Illos charitate complector, à quibus communione sejungor; & eosdem, ut rectè alicubi Salvianus, quos amor facit amare, amor interdum cogit offendere : hoc interdum ejusdem est animi ejusdemque pietatis; & cum specie dissentiat, ratione concordat : utrumque unum est, cum tamen aliud amoris habeat gratiam, aliud odii patiatur offensam. Nunquam laboribus & studiis meis pretium statui alios contemnere, sed hunc esse quæstum in animum induxi maximum, quàm maximè servire commodis veritatis. Denique, ut cum Terentio loquar, sic existiment adversarii : sciant respon-

sum, non dictum esse, quia ipsi laeserunt prius. Sed enim eò unde digressa est revertatur oratio.

Sciendum 4. ipsum Concilium Basileense post interdictam laicis Calicis sumptionem, at tamen sess. 30. pro bono pacis & unitatis concessisse Bohemis & Moravis sub utraque specie Eucharistiam usurpare: Concilium etiam Florentinum morem Græcorum sub utraque specie communicantium minimè improbasse. Denique Concilium Tridentinum sess. 22. in fine decretum super concessione calicis ita expressit: *Insuper cùm eadem sacrosancta Synodus superiori sessione ( immediate post canonem quartum ) duos articulos aliàs propositos ( scilicet sess. 13. in decreto prorogationis ) & tum nondum discussos, videlicet: An rationes, quibus sancta Catholica Ecclesia adducta fuit, ut communicaret laicos atque etiam non celebrantes Sacerdotes sub una panis specie, ita sint retinenda, ut nulla ratione Calicis usus cuiquam sit permittendus. &: An si honestis & Christiana charitatis consentaneis rationibus concedendus alicui vel nationi, vel regno Calicis usus videatur, sub aliquibus conditionibus concedendus sit, & quando illa sint, in aliud tempus, oblata sibi occasione, examinandos atque definiendos reservaverit: nunc eorum pro quibus petitur saluti optimè consultum volens, decrevit integrum negotium ad sanctissimum Dominum nostrum esse referendum, prout presenti decreto refert; qui pro sua singulari prudentia id efficiat, quod utile Reipublica Christiana, & salutare petentibus usum Calicis fore judicaverit.*

Ex quibus apparet Ecclesiam Catholicam in

in administratione & usu Eucharistiæ Christianorum paci & utilitati consulere studuisse, nec illam à permittenda sumptione Calicis ita esse alienam, ut de illo præcepto aliquid in gratiam & consolationem nationum & regnorum remittere parata non sit, si quoad dogmata veram fidem & sinceram obedientiam in petentibus inveniret. Sed cum videat Lutheranos & Calvinistas esse pertinaces, nec tam velle utriusque speciei usum ad consolationem spiritalem & majorem devotionem frequentare, quàm Ecclesiam Catholicam, quod omnes ad utramque speciem non adigat infamare, & altare contra altare erigere, nullum de permittenda quibusdam nationibus utraque specie consilium Christi Vicarii susceperunt, nullam in illis postulantibus humilitatem, nullam hæreseon suarum abjurationem advertentes. Pro sua illa singulari prudentia à Concilio Tridentino laudata cernunt non futuros Bohemis Lutheranos Calvinianosque in promissis implendis fideliores, quibus cum Ecclesia unitatis amans & cogitans cogitationes pacis usum Calicis ea spe ut ad Matrem suam redirent concessisset, eventus docuit remedium illud minimè profuisse, sed in errore de indispensabili utriusque speciei necessitate pertinacius remansisse.

Ut autem magis clareat, quantum Romanum Pontificem pulset & urgeat hæreticorum reducendorum zelus & amor paternus, pauca hic referre visum est huic materiei opportuna, & Lectori, nisi me mea fallat sententia, non injucunda. Postquam in colloquio Pisciaci rogatus esset Rex Christianissimus Carolus IX.



ut à Summo Pontifice postularet fieri Prælatiſ Galliæ facultatem ſuper uſum Calicis pro re præſenti, ſeu ut loquuntur, provisionaliter diſpenſandi, expectatâ interim ſuper hoc Concilii Tridentini determinatione; ad Oratorem ſuum Dominum de Liſle Carolus ſcripſit, eamque ei provinciam demandavit anno 1561. Negotium Summo Pontifici Orator propoſuit: Pontifex porrò (ut in litteris ad Regem ab eodem ſcriptis præfatus Dominus de Liſle teſtatur) exorari ſe ſinebat, & ab ea facultate concedenda, reclamantibus licet quibuſdam Prælatiſ, averſum animum non habebat, qui ut omnibus omnia fieret, rem totam ad Concilium generale Tridentinum remiſit.

Ex quibus patet, eum eſſe Sedis Apoſtolicæ characterem eximium, calamitoſis præſertim temporibus, unitatiſ & pacis amore ad multa connivere, nonnulla diſſimulare, & quædam de ſummo jure ita remittere, ut modò juris divini integritas, Eccleſiæ Catholiciæ unitas, & Sedis Apoſtolicæ dignitas & authoritaſ ſalva conſiſtat, nonnihil tamen hominum infirmitatiſ & imbecillitatiſ condonet. Quare ſi ea conſeſſione abalienatas hæreticorum voluntates conciliare, excitatoſ deſreligione tumultuſ pacare, noſtroſ ne laberentur retinere, exteroſ qui à nobiſ deſciverant revocare veriſimiliter credidiſſet, certiſſimè tenendum eſt Apoſtolicam Sedem facultatem illam dudum impertiviſſe.

Sed cum recenteſ hæretici cum duplici ſpecie cæteroſ erroreſ ſuoſ retinere obſtinate velint, nolintque treſ conditioneſ à Paulo III. in Bulla facultatum trium Legatorum, quos in Germaniam ad Carolum V. miſerat, ſubire, videlicet

videlicet iis posse usum Calicis concedi, qui sincerè profiterentur tantùm sub una quantum sub utraque specie contineri; non minus recipere unâ specie pastum quàm duabus; & in cæteris omnibus Ecclesiæ Catholicæ unitatem se retinere, & Sedi Apostolicæ filiale obsequium præstare velle: cùm, inquam, hæc ita sint, & unius vel duplicis speciei usus sit tantùm schismatis prætextus ab hæreticis conquisitus, manifestum est concessionem utriusque speciei inutile esse ad revocandos nostros hæreticos remedium; manifestum est sedere eos in cathedra pestilentiae, ut sub specie fidei, fidei scindant, rumpant, distrahant unitatem: manifestum est eloquia eos diuina contra Ecclesiæ sensum orthodoxum humanâ interpretatione corrumpere; & inde concipere suorum suffragia criminum, unde assumere debuerant documenta virtutum: manifestum est utriusque speciei postulationem non ab humilitate perfectam, quæ quidquid facit totum Deo assignat auctori, totum Ecclesiæ supponit arbitrio; sed ab inflato hypocrisis & superbiæ fermento prodire, in quo non est moles magnitudinis, sed tumoris; & conspersio tali specie inflata est, non ditata. Denique manifestum est, hanc Novatorum petitionem fuisse speciosum prætextum, subtilem speciem, subtilitatem arte compositam aliud re agentem, aliud prominentem in vultu; quin etiam secretum virus, venenum latens, virtutis fucum, tineam reformationis Novatores occultare voluisse: à fructibus enim eorum cognoscimus eos, qui veniunt in vestimentis ovium, intrinsecus autem sunt lupi rapaces.

Induant

Induant, quæso, tandem filialem animum Lutherani & Calviniani; errores exuant inveteratos, & à Patre Patrum Romano Antistite non solam vini speciem, sed quod caput est, ipsius Christi sanguinis obtinebunt veritatem. Perdiderunt illi quod est filii, ille quod Patris est non amisit. Credite mihi; & si non creditis, probate, tentate, experimini, periculum facite: plus vos ille diligit, & adversarii, quàm vos illum odio prosequamini. Pro vobis etiam maledicentibus Deum supplicat, sicut Christus cujus vices gerit pro crucifigentibus orabat. In vobis etiam, quia Christiani estis, ipse qui Pater est Christianorum, præ charitate patitur: nam sicut honor capitis ad membra protendit; ita membrorum, vel quæ membra esse debent, pœna ad dolorem capitis, ad capitis redundat injuriam. Si auditis Christum, audite Ecclesiam, ne sitis nobis sicut Ethnici & Publicani. Si amatis Christum, amate pacem, quia pax nomen Christi; ipse enim est pax nostra, qui fecit utraque unum. Perditis gratiæ largitatem, charitatis fraudamini bonis, unitatis vós benedictio non manebit, si præter Ecclesiam vitam quæritis, quam in ipsa tantum esse Propheta testatur: *Quoniam illic, inquit, mandavit Dominus benedictionem, & vitam usque in sæculum.* Si Christus non uni, sed omnibus legem suam dedit; si non pro uno, nec ad unum, sed pro omnibus & ad omnes venit, ut redintegraret omnes in unum; profectò malè corpus Christi dissipatis, malè membra disperditis, malè ad decorem unitatis suæ non patimini formam dominici habitus pervenire. Nunquam pervenietis ad vocabulum filii Dei, nisi

nisi per nomen Pacifici : *Beati enim pacifici, quoniam filii Dei vocabuntur.* Verè filii Dei sunt homines pacifici, utpote Deo pacis similes: nam *plantare pacem radicatus est Dei*, inquit Chrysologus *serm. 53. evellere penitus inimici, id est diaboli.*

Ex his sectariorum querimoniis & objectionibus ferè infinitis satisfactum manet. Nostram enim assertionem non solum consuetudine Ecclesiæ per orbem frequentatâ, contra quam disputare *insolentissima insania esse* docet Augustinus *epist. 118.* sed & iis eam rationum momentis munivimus, quibus nihil Ecclesiam contra Christi mandata agere, nihil primitivæ praxi adversari, nihil illam injuriæ vel incommodi Fidelibus inferre, sed potius speciei unius subtractionem quamplurimis emolumentorum compendiis compensare demonstravimus. Nec nobis adversantur aliqui Patres, qui usus utriusque speciei laicis porrectæ interdum meminerunt; tum quia usum suo tempore familiarem, etsi non indispensabilem referunt, quem per se licitum esse non semel confessi sumus. Tum quia Patres illi, de sumptione pretiosi sanguinis Christi loquuntur, quem sub specie etiam panis nos sumere certissimè credimus; de modo autem sumptionis nunquam illi fuere solliciti, sed salvâ Sacramenti substantiâ sumendæ Eucharistiæ ritum & disciplinam Ecclesiæ iudicio reliquerunt, atque etiam pro diversis enatis occasionibus & periculis varia ipsi circa hoc scripserunt, ut ex ritibus suprâ memoratis liquidum est.

Sed dices: Licet Christum calicis usum omnibus non præcepisse concedatur, eo tamen  
ipso



ipso quod illum instituit, jus fidelibus petendi illius dedit: ergo Ecclesia jure illo privare fideles nequaquam potest. Sicut licet Confirmationis sacramentum non sit absolutè tanquam medium indispensabiliter necessarium à Christo Domino imperatum, & multò minùs Sacramentum Matrimonii; neutro tamen fidelibus interdicare Ecclesia potest, sed modò nullum intercedat canonicum impedimentum, utrumque adire fideles possunt, hoc ipso quod pro ipsis institutum est.

Respondeo ex institutione Sacramenti Eucharistiæ sequi duntaxat Fideles omnes alioquin debitâ animi compositione instructos obtinere jus percipiendæ Eucharistiæ, & cœlesti cibo vescendi, quo eos spoliare jure Ecclesia nec potest, nec voluit unquam, quæ ad Communionem nedum hortatur, sed ad illam etiam variis, pœnis, gravibusque censuris obligat. Utamque quoque speciem, quia ad sacrificium integrum necessariam esse voluit, Sacerdotes Ecclesia nedum monet, sed seriò astringit, ut ipsi inter celebrandum & consecrent & consumant. At verò utriusque speciei usum non ita pro populo fideli Christus instituit, ut petendi illius jus habeat, sed arbitrio & prudentiæ Ecclesiæ à se continenter gubernatæ permisit, ut ea statueret vel mutaret quæ suscipientium utilitati, atque ipsius tremendi Sacramenti venerationi, pro rerum, temporum, & locorum varietate magis in Domino expedire judicaret. Quod Apostolus, inquit Tridentinum *sess. 21. cap. 1.* non obscurè visus est innuisse, cùm ait: *Sic nos existimet homines, ut ministros Christi, & dispensatores mysteriorum Dei.*

*Dei.* Atque ipsum quidem Apostolum hac potestate usum esse satis constat, cùm in multis aliis, tum in hoc ipso Sacramento, cùm ordinatis nonnullis circa usum hujus Sacramenti: *Cetera*, inquit 1. Cor. II. *cùm venero disponam.*

Nec est simile, sed toto cœlo discrepat, quod de Confirmatione & Matrimonio dicitur: quia si Fidelibus institutæ Confirmationis, institutæque Matrimonii usu Ecclesia interdiceret, orbarentur illi fructu & gratiâ Sacramenti, cujus non est duplex partialis materia, in cujus unius susceptione gratia sacramentali fruerentur. At verò dum Fidelibus alterius speciei usus gravissimis de causis interdicitur, nec Sacramento Eucharistiæ, nec gratiâ Sacramenti fideles defraudantur, uti superius multis demonstratum est.

Instabis: Atqui non possunt usu Calicis privari Fideles sine sacramenti & gratiæ sacramentalis jactura: Ergo responsio nulla. Probatur subsumptum: Species vini est speciale sacramentum ab specie panis independens, constansque speciali materiâ & formâ, significans, subindeque produciens specialem gratiam. Unde Clemens VI. dicitur Regi Angliæ concessisse, ut *ad gratia augmentum* quoties vellet, sub utraque specie communicaret. Et certè cùm species vini non sit superflua, aliquam specialem gratiam significare, subindeque efficere censenda est. Ergo non potest populus usu Calicis privari, quin sacramento & speciali gratiâ orbetur. Maximè quia Tridentinum *sess. 21. cap. 3.* pronuntiando communicantem sub altera tantum specie nullâ gratiâ ad salutem necessariâ

cessariâ fundari, satis significat aliis gratiarum additamenti privari.

Respondeo in una specie totum, etsi non omni modo, Eucharistiæ Sacramentum contineri, totam etiam Eucharistiæ sacramenti gratiam, quæ animarum refectio est, percipi; cum in illa totus Christus omnis gratiæ origo integer contineatur, ut suprâ satis superque expendimus. Itaque cum utraque species ad unam animæ refectionem referatur, eamque ratione Christi, qui est præcipua res significata, efficiat, sub distinctis illis materiis & formis unum est sacramentum. Unde nec sacramento, nec gratiâ sacramenti populos frustratur Ecclesia, nec jure illos ullo vel beneficio depellit.

Scio Vasquem aliôsque magni nominis Theologos contendere speciei vini specialem respondere gratiam, nec propterea populis Ecclesiam esse injuriam; tum quia nullâ eos necessariâ ad salutem gratiâ privat, sed solum additamento & auctario non necessario; tum quia subductionem illam facilitate frequentandi Eucharistiam sub una specie commodiorem compensat; tum quia bonum commune & veneratio Sacramenti populorum utilitatibus minimè necessariis præponderat: unde parvulis nulla creatur injuria, dum propter easdem rationes à bono communi, quod divinius est, & à veneratione Sacramenti petitas, eis ante discretionis annos Eucharistiam non dispensat Ecclesia, nec adultis his aut pluries in die Eucharistiam distribuit, ampliorem utique gratiam geminatis usibus parituram. Sed decor disciplinæ communis, & veneratio Sacramenti, quod fortè iteratis sumptionibus vilesceret, his  
sunt

sunt emolumentis anteponenda. Sed oppositum nobis & aliis probabilius videtur, quia utraque species, ut sæpe dictum est, & eundem gratiæ fontem Christum integrè continet, & ad eandem animi refectionem spiritusque pinguedinem refertur. Bis quidem Christum sumit qui utramque speciem usurpat, sed in ordine ad eandem cordis refectionem sumit: sicut qui unam post aliam panis particulam ederet, vel calicem discretis haustibus biberet, eandem operis operati gratiam participaret. Dico *operis operati*, quia si majus opus operantis, id est ferventior dispositio accedat, tunc major gratia conferetur: sed illam majorem dispositionem habere etiam potest qui unica specie reficitur, vel qui duas panis particulas successivè glutit.

Nec obest Clementis VI. indultum, indultique illius ratio. Tum quia valde dubia videtur hujusmodi Bulla, quæ ut Sylvius refert, data dicitur anno 1341. & tamen anno duntaxat sequenti ad summum Pontificatum Clemens evehctus est. Tum quia multi, quos Sylvius, aliique sequuntur, contendunt Bullam illam in favorem Regis Galliæ fuisse concessam: quod tamen incertum est. Constat autem ex historia Concilii Tridentini, post lectos quatuor canones sessionis 21. de Communionem sub utraque specie, anno 1552. mense Julio, probatis per omnia canonibus, Legatos Regis Christianissimi in hunc modum perorasse: Si in illis nonnulla mutantur, quemadmodum nonnullis visum est, postulamus id fieri absque eo quod præjudicium ullum fiat authoritati & prærogativæ Regis Christianissimi. Retinuerunt enim  
Galliæ



Galliæ Reges , & post mille & amplius annos quasi per manus acceperunt , ut quo die Regis insignibus ornantur & consecrantur , sanctissimi Eucharistiæ Sacramenti communionem sub utraque specie accipiant. Ubi & usum utriusque speciei non quoties voluerit , sed in die coronationis Regi Christianissimo vindicant ; & usum illum Clemente VI. longè antiquiorem esse testantur ; & concessionem illam Clementis , utique non prætermittendam si vera foret , missam faciunt.

Sed utut sit , dicendum usum illum Clementem ad majoris gratiæ ex opere operantis obtinendæ augmentum concessisse ; in usu enim calicis passionem Christi expressiùs significantis si accenditur charitatis affectus , augefcit & gratia. Sapienter autem Pontifex ille præsumebat opus illud operantis Regem habiturum , qui ex singulari devotionis sensu gratiam illam postularat. Denique cùm Clemens nihil ibi definiat , nec quid credendum sit determinet , nec totam Ecclesiam doceat , privatam ad summum sententiam producit Pontifex , quem cæteroquein eruditissimum fuisse narrant.

Nec propterea inutilis vel supervacanea est vini species , si nihil novi per se producat. Tum quia utilissima est hæc expressior significatio , sicut trina Baptismatis immersio frustra olim non usurpabatur , etsi deinde arbitraria fuerit ; quia per eam effectus Baptismi significantiùs exprimebatur. Tum quia vini species est ad integrum sacrificium necessaria. Tum quia utraque species pro temporum circumstantiis utilis fuit , jam commodis populorum opportuna est species panis , olim dum pueri En-

charistiâ reficiebantur , species vini illi ætati erat accommodatissima. Tum demùm , quia etsi probabilius sit gratiam Sacramenti in sumptione prioris speciei infundi , cùm subjecto disposito non est cur differatur effectus , Sacramentumque , quod causa necessaria est , cum primùm potest operetur ; non otiosè tamen sumitur secunda species , cùm ad perfectionem sacrificii desideretur , & accedente majori dispositione plus gratiæ conferatur.

Denique ad Tridentini testimonium respondeo sanctam Synodum nostræ sententiæ eò loci apertissimè favere. Cùm enim Concilium non loquatur de gratia simpliciter necessaria ad salutem , quæ per pœnitentiam sine Eucharistia re suscepta haberi potest , intelligitur Concilium de gratia necessaria ad meliùs esse : eâ ergo non fraudantur laïci , quæ necessaria sit ad melius faciliùsque obtinendam vitam æternam. At nullus est gratiæ gradus , qui non sit eo modo necessarius , quique non conferat ad meliùs faciliùsque ambulandum in via Dei. Ergo laïci nullo Sacramenti gratiæ gradu privantur. Veritas tamen est Tridentinum unius speciei sufficientiam adversus hæreticos stabilire voluisse , relictâ libertate Theologis , ut de quantitate gratiæ disputarent , modò gratiam necessariam ad salutem alteram speciem dignè usurpantibus dari omnes docerent.



*Quæres, quid sit communio laïca, de qua fit mentio in vetustissimis Patribus & Conciliis, Syricio Papa epist. 1. cap. 11. Cypriano lib. 4. epist. 2. Concilio Eliberino can. 76. Sardicensi can. 1. & 2. Agathensi can. 33. Toletano 1. cap. 4. Bracarense 1. cap. 31. aliisque.*

Respondeo varias esse sententias. Aliqui Communionem laïcam illam esse contendunt, quâ Eucharistia laïcis sub una panis specie distribuebatur, in hoc distinctam à Clericali, in qua utraque species usurpabatur. Cui communioni etiam Clerici in pœnam delictorum subiciebantur. Hincque argumentum pro ritu unius speciei depromunt.

Verùm hæc sententia videtur à veritate aliena, subindeque superstructum & innixum illi opinioni pro unicæ speciei usu argumentum infirmum est & inefficax. Etenim temporibus illis laïcis utramque speciem frequentare concessum erat, eamque de facto sæpe usurpabant. Contrà verò Clerici nulli pœnæ obnoxii sub una specie extra sacrificium à se celebratum communicabant, ut ex ritibus citatis claret. Ergo Communio laïca ea esse non potuit, quâ unius speciei panis usus concedebatur.

Secundò alii cum Bellarmino affirmant communionem laïcam esse usum Eucharistiæ sub una specie panis, quæ ideo dicebatur laïca, non quòd laïcis interdictus esset Calicis usus, vel è

Calice sibi à Diacono propinato sapiùs non biberent ; sed quia in domum solam speciem panis deferri licitum erat.

Difficilis est etiam illa interpretatio. Tum quia non solùm laïci , sed Sacerdotes etiam recens consecrati Eucharistiam sub unius specie panis domum deferrebant , ut Fulbertus suprà laudatus nos docuit. Tum quia canone 66. Concilii Eliberini statuitur ut communio laïca Clerico detur post quinquennium peractæ pœnitentiæ , quæ communio eis in Ecclesia more laïcorum dabatur. At laïcis in Ecclesia utraque species porrigebatur : ergo & Clericis, tametsi ad communionem laicam damnatis utraque species dispensabatur. Accedit quod si Clerici ad communionem laicam fuissent ob delicta damnati , id est ad unius speciei usum, secundùm illius sententiæ interpretationem potuissent , & sanè debuissent laici ad illam communionem, id est ad unam speciem ob crimina damnari , ut facinorosi & pœnitentes ab innocentibus discernerentur. At non leguntur laici ad illam damnati : ergo per communionem laicam difficilè unius speciei usus intelligitur.

Tertiò alii cum Jacobo Pamelio *in epist. 52. Cypriani* , notâ 37. eam fuisse communionem laicam censent , quæ extra cancellos & septa Altaris laïcis in Ecclesia dabatur. Nam juxta dispositionem Concilii Toletani IV. can. 17. *Sacerdotes & Levites ante altare communicare, in Choro Clerus , extra Chorum populus tenebantur.* Et in Bracarensi can. 31. sic statuitur : *Ingradi Sacrarium ad communicandum non liceat laïcis , sed tantùm Clericis.* Idem etiam perspicuum



spicuum est ex facto S. Ambrosii, quo Theodosium Imperatorem intra cancellos hærentem per Diaconum suum monuit, habere in Templo Dei Sacerdotes, habere & laicos locum suum. Quare juxta hanc sententiam Clerici ad laicam communionem redacti extra chorum in ordine laicorum communicare cogebantur.

Patitur etiam difficultatem hæc expositio. Nam Felix III. loco citato vult Clericos rebaptizatos in pœnam delicti ab omni communione usque ad diem obitus privari, & in ipsa morte non nisi laica eos communione donari. Quin Concilium Sardicense c. 2. in flagitiorum quorundam detestationem & pœnam vult Clericos nec vel in fine vitæ laicam communionem accipere. Atqui in communione laica privatim datâ, vel privatim etiam in morte denegatâ locum habere non potest distinctio communis in choro & extra chorum, cum illa in lecto decumbentibus & animam agentibus vel daretur, vel denegaretur. Ergo per communionem laicam sola illa intelligi commodè non potest, quæ extra Altaris cancellos & septa chori populo porrigebatur.

Quartò alii censent communionem laicam esse jus communicandi cum cæteris fidelibus more laicorum qui sunt in societate Christiana. Unde clericum ad communionem laicam redigi, est in omnibus quæ ad societatem Christianam spectant, putà perceptione Eucharistiæ, orationibus, aliisque muniis non pro Clerico ampliùs, sed pro laico haberi. Communio ergo laici opponitur functionibus Ecclesiasticis & privilegiis Clericalibus. Favere videtur ca-

non 15. inter Apostolicos , ubi sic statuitur : si quis Presbyter aut Diaconus , aut quilibet de numero Clericorum relinquens propriam parochiam pergat ad alienam , & omninò demigrans prater Episcopi sui conscientiam in aliena parochia commoretur , hunc ulterius ministrare non patimur ; præcipuè si vocatus ab Episcopo redire contempserit , in sua inquietudine perseverans. Verumtamen tanquam laïcus ibi communicet. Id est , ut videtur , jus solummodò cum cæteris communicandi more laïcorum , qui talis est , obtineat. Cyprianus etiam epist. 68. de Basilide sic scribit : Episcopatum pro sua conscientia vulnere ultrò deponens ad agendam pœnitentiam conversus est , Deum deprecans & satis gratulans , si sibi vel laïco communicare contingeret. Ubi per communionem laïcam intelligere videtur jus quod habent laïci ad communicandum. Et epist. 72. ad Stephanum Papam : Addimus planè & adjungimus consensu & auctoritate communi , ut etiam si qui Presbyteri aut Diaconi , qui vel in Ecclesia Catholica prius ordinati fuerint , & postmodum perfidi ac rebelles contra Ecclesiam steterint , vel apud hæreticos à Pseudoepiscopis & Antichristis contra Christi dispositionem profanâ ordinatione promoti sint , & contra altare unum atque divinum sacrificia foris falsa ac sacrilega offerre conati sint , eos quoque hac conditione suscipi , ut communicent laïci ; & satis habeant quod admittuntur ad pacem , qui hostes pacis extiterint : nec debere eos revertentes ea apud nos ordinationis & honoris arma retinere , quibus contra nos rebellaverint. Et paucis interjectis : Et idcirco satis talibus revertentibus veniam dari ; non tamen debet in domo Dei perfidia

dia promoveri. Nam quid bonis & innocentibus, atque ab Ecclesia non recedentibus reservamus, si eos qui à nobis recesserint, & contra Ecclesiam steterint, honoramus? Ubi per Clericos ad communionem laicam damnatos eos intelligit, qui clericalibus muniis & honoribus ob peccata privati, ad communem laicorum statum dejecti sunt. Quod & epistola 52. priùs significaverat his verbis: *Susceptus est Trophimus pro quo satisfaciebat fratrum reditus, & restituta multorum salus. Sic tamen admissus est Trophimus, ut laicus communice; non secundum quod ad te malignorum littera pertulerunt, quasi locum Sacerdotis usurpet. :: Si qui enim infirmitatibus occupantur, illis in periculo subvenitur. Posteaquam tamen subventum est, & periclitantibus pax data est, suffocari à nobis non possunt, aut opprimi, aut vi & manu nostra in exitum mortis urgeris; ut quoniam morientibus pax datur, necesse sit mori eos qui acceperint pacem; cum magis in hoc iudicium divina pietatis & paternæ lenitatis appareat, quod qui pignus vitæ in data pace percipiunt, hi quoque ad vitam perceptâ pace teneantur.* Ubi communionem laicam dare idem videtur ac pacem impertire, cujus pacis pignus & coronamentum divina Eucharistia est peccantibus in periculo mortis concessa. Denique in variis vetustissimorum Summorum Pontificum litteris significari videtur, communionem laicam functionibus Ecclesiasticis opponi. Videsis Innocentii I. epistolam ad Episcopos Macedoniae, necnon Syricii ad Episcopum Tarraconensem.

Verùm nonnullam etiam patitur hæc interpretatio difficultatem. Quavis enim com-

munionis nomen non rarò ejusdem societatis consortium, eorundem Sacramentorum participationem, cum eodem Ecclesiæ corpore membrorum colligationem significet, quæ in Symbolo Apostolorum *Sanctorum communio* nominatur, de qua fortassis in materia de Indulgentiis plura dicemus; attamen ut rectè notavit Catechismus Romanus *part. I.* in expositione illius articuli, nomen illud magis proprium est Eucharistiæ, quæ hanc efficit communionem; atque usui Eucharistiæ non solum multa superioris allata testimonia, sed & traditio, & Ecclesiæ consuetudo eximium illud nomen attribuant, ut ex dicendis capite sequenti evidenter clarebit. Accedit Canones velle Clericos lapsos post peractam magnæ humilitatis pœnitentiam communionem laica donari, & Eucharistiâ more laicorum vel post præfinitum aliquod tempus, vel certè in articulo mortis refici. Explicandum ergo restat illi sententiæ illud singulare discrimen, quod utramque inter communionem, Clericalem & Sacerdotalem in ipso communionis Eucharisticæ usu intercedebat; quod conspicuum erat & aspectabile, cum per eam pœnitentes ab innocentibus discernentur.

Quare verisimiliùs dicendum videtur, communionem laicam in usu Eucharistiæ à Sacerdotibus lapsis frequentatam, ampliorem habere significatum, & multas in sua latitudine includere ceremonias, quibus à communionem Sacerdotali extra sacrificium adhibitâ internoscebatur, sive quoad locum, sive quoad tempus, sive quoad modum recipiendæ Eucharistiæ. Quoad locum quidem communio laica non nisi in determi-

nato



nato Templi loco extra sacrarium & cancellos Altaris sæcularibus, Presbyterisque ac Clericis lapsis porrigebatur. Quoad tempus communio laica stans tantum diebus & horis, præsertim pœnitentibus ministrabatur: tempus autem communicandi nunquam Sacerdotibus præfixus est, quia quotidie celebrare; ministri verò Altaris, qui sacrificio Altaris intererant, quotidie juxta S. Anacleti decretum communicare solebant. Quoad modum tandem, quia credibile est aliis ceremoniis laicos, aliis Sacerdotes Eucharistiam accipere solitos fuisse etiam in articulo mortis: sicut etiam in præsentis Ecclesiæ more positum est, Sacerdotes feria quinta in Cœna Domini Eucharistiam cum stola adire, quæ innocentiam & singularem prærogativam significat. Ex quibus communio-  
nem laicam in articulo mortis lapsis & pœnitentibus datam facilius explicabis. Quanvis, ut verum fatear, magnus sit in præsentis conjecturis locus. Quas si meliores inveneris, non me repugnantem, sed pro libertate theologicâ consentientem habebis.

## REFLEXIO.

*Iste est panis, quem Dominus dedit vobis ad vescendum. Colligat ex eo unusquisque quantum sufficit ad vescendum. Et collegerunt alius plus, alius minus: nec qui plus collegerat, habuit amplius; nec qui minus paraverat, habuit minus.* Exodi 16. Verba illa ad literam de Manna Israëlitis cœlo divinitus pluvie concessa intelliguntur. Existimant multi verbis illis significari omnibus sive viris, sive fœminis, sive senibus, sive parvulis eandem mensuram edon-

di præstitutam, & æqualiter omnes comedisse, vel certè inæqualiter comedentibus æqualiter profuisse, Deo manna singulorum viribus nutritivis attemperante. Quibus sacrosancta Eucharistia adumbratur, in cujus unica specie, & minori ejusdem speciei particula æqualis à Fidelibus fructus percipitur: nihil minus habent singuli quàm universi; totum unus, totum duo, totum plures sine diminutione participant: quia sacramentum Christo realiter præsentì plenum distribui potest; majori distributione consumi, minori restringi non potest. *Vbi pars est corporis,* inquit B. Papa Hilarius in suis decretis quæ habentur 3. part. Conciliorum, *est & totum. Eadem ratio est in corpore Domini quæ in manna, quod in ejus figura præcessit; de quo dicitur, qui plus collegerat, non habuit amplius; neque qui minus paraverat, habuit minus.* Et Guitmundus lib. de verit. Eucharistiæ: *Possumus dicere, inquit, tantumdem esse in una quasi portiancula, quantum erat in hostia tota: sicut de manna legitur, quia nec qui plus collegerat, habuit amplius; nec qui minus collegerat, habuit minus. Singuli accipiunt Christum Dominum, & in singulis portionibus totus est; nec per singulos minuitur, sed integrum se prabet in singulis.*

Plura hominum millia paucis panibus, paucisque pisciculis satiavit olim Christus miserens super turbam triduo abstinentem, & sublata sunt quæ superfuerunt fragmenta ipso penu majora: quidni ergo sufficiet populis omnibus & nationibus unum Christi corpus divinitate unctum, & inhabitante deitatis plenitudine in exhaustum? Ipse dixit: *Qui manducat hunc panem, vivet in æternum.* Cælum & terra transibunt,

transibunt, verba autem illa non præteribunt. Ergo unam dum sumis speciem, noli timere, absit fides dubia, & stans in verbis illis spes firma non nutet: vives, & æternum beatè vives, si panem illum vitæ etiam sine specie vini vivâ charitate degustes. Æterni Dei verba referunt æternitatem nullâ temporis instabilitate mutabilem.

Æqualis est in una vel utraque specie refectis gratia ex opere operato, ut loquuntur; at pro opere operantis inæqualis est tamen. Plus retulit mulier illa Evangelica, quæ fimbriam vestimenti tetigit, premente illâ turbâ quæ in totum irruit corpus. Plus saginatur mulierculæ fervidæ animus octiduana communione roboratus, Sacerdotibus illis tepidis qui dum Christum devotionis inanes quotidie edunt, ab ipso Christo tepiditatis eorum impatiente, sicut Scriptura loquitur, evomuntur. Idcirco, ut rectè monet Abbas Paschasius lib. de corp. & sanguine Domini, cap. 17. *cogitandum à vobis est non quantum dente prematur, sed quantum fide & dilectione accipitur. Ideo filii hoc mysterium dum communicas, dilata sinum mentis tuæ, emunda conscientiam, & percipe non quantum mica exhibet, sed quantum fides capit: quia in Christo plenitudo divinitatis manet, in te autem de plenitudine, non quanta est, sed quantum idoneus fueris, præstat.*

Sicut ergo diviso Sacramento nulla rei, sed solius signi fit scissura, ita nec gratiæ ullius jactura. Hæc quatuor, inquit S. Thomas opusc. 58. cap. 29. corpus, sanguis, anima, & Deitas jam ultrà non possunt separari: unde sicut sumit Sacerdos sanguinem Christi sacramentaliter de calice,



*sic populus sumit eum intellectualiter sub specie panis de ipso corpore Christi : & est eis tam utilis, & tam dulcis , ut Sacerdotibus qui sumunt eum sub specie vini de calice. Canticorum I. Botrus Cypri dilectus meus mihi. Duo sumo in botro; uvam , scilicet corpus Domini in cibum , & ex uva sugo dulcem sanguinem in potum. Nequaquam defraudabere unicâ specie , & unicæ speciei particulâ pastus : solet Deus in minimis magnus esse , nec minùs potens est dum totum clausit in exiguo. In rebus sacris sanctitatis habetur ratio , non quantitatis. Atqui hoc Sacramentum non corporis satietati , sed animi sanctimonix institutum est. Si gemmæ , authore Chrysostomo hom. i. ad Popul. Antioch. non in corporis mole , sed natura pulchritudine pretium habent ; si res quævis non ab extima mole , sed ab intima virtute æstimanda est ; multò magis Eucharistia non , ab specierum pluralitate vel quantitate , sed ab eximiis quæ sub ea latent rebus pensanda est. Idem est virtute , inquit S. Basiliius epist. ad Cæsarium Patricium , sive unam particulam accipiet quisquam à Sacerdote , sive plures particulas simul. Quia nimirum tantus est Christus in exiguo fragmento , quantum esse constat in toto. Cùm in Ecclesia Fidelium sumitur , sicut plenus in universis , ita integer esse probatur in singulis. Unica sub specie Christus & explebit famem , & extinguet sitim , si castis te desideriis æstuantem , si viva charitate succensum , animam denique tuam si invenerit præparatam. Sed de his speculatione sequenti.*



SPECVLATIO III.

*Necessarius ad Eucharistiam percipiendam mentis, cordis, & corporis apparatus exponitur.*

Quia non homini præparanda habitatio est, sed Deo, nihil mirum si multiplicem dispositionum apparatus Catholica requirat Ecclesia. Quia enim sponsum suum Christum Jesum non verbo solum, sed opere etiam & veritate diligit, ideo filiis suis in Concilio Tridentino præcepit diligentem ad sacrum epulum dispositionem adhiberi oportere. Si non decet, inquit sacra Synodus sess. 13. cap. 7. ad *sacras ullas functiones quempiam accedere nisi sanctè; certè quo magis sanctitas & divinitas celestis hujus sacramenti viro Christiano comperta est, eo diligentius carere ille debet, ne absque magna reverentia & sanctitate ad id percipiendum accedat; præsertim cùm illa plena formidinis verba apud Apostolum legamus: Qui manducat & bibit indignè, judicium sibi manducat & bibit, non dijudicans corpus Domini. Et cap. 8. ait, illos spiritualiter & sacramentaliter divinum hoc Sacramentum recipere, qui ita se prius probant & instruunt, ut vestem nuptialem induci, ad divinam hanc mensam accedant. Ec can. 11. Si quis dixerit solam fidem esse sufficientem præparationem ad sumendum sanctissima Eucharistia sacramentum, anathema sit.*

At verò nostrates hæretici postquam plura sacramenta

sacramenta Christi ad nihilum redigere conati sunt, sacros ritus in honorem Sacramentorum, ad instillandamque Fidelibus in eorum usu reverentiam institutos de medio sustulerunt, quæ retinuerunt Sacramenta non honorificentius habuerunt. Etenim Lutherus *serm. de præparatione ad Eucharistiam*, ea de dispositionibus ad communionem scripsit, quæ non dico in Christianum, vel hominem honestum, vel in Turcam moderatum, vel in Atheum solius inficiandæ Deitatis studiosum, sed in solum Antitheum, solum Antichristum, id est apertum & juratum Christi hostem, in Christique mysteria certo consilio & deditâ operâ furentem cadere possunt. *Optima dispositio est*, inquit præclarissimus scilicet reformator, *non nisi ea quâ pessimè es dispositus; & ideo pœnitentia potius post, quàm ante sacramentum dignè peragitur.* Magnus & perniciosus error est, si quis accedat ad sacramentum eâ nixus fiducia, quod confessus est, quod non est sibi conscius mortalis peccati, quod orationes & preparatoria sua præmiserit: omnes hi iudicium sibi manducant & bibunt; quia his omnibus non sunt digni: neque puri; imò per eam fiduciam puritatis peius polluuntur: sunt autem puri per fidem. Et contra Regem Angliæ: *Furorem autem ejus*, inquit, *quo invehitur in me, quòd docuerim fidem sine operibus optimam præparationem ad sacramentum, & Christianos non oportere legibus adstringi ad percipiendum, contemno.* Si quis datâ operâ & meditatio vellet de præparatione ad Eucharistiam perditè & nefariè scribere, infeminatum Christianis omnibus in cœleste Epulum reverentiæ sensum extinguere, & iter ad

eversio

everfionem & ludibrium Christianismi munire, profectò non aliis regulis uteretur, quæ non nisi corruptissimis ingeniis placere possunt; illis verò in quibus aliqua religionis scintilla superest, non displicere non possunt.

Et si non ita petulanter, nihilo tamen veriùs & modestiùs Calvinus *lib. 4. Institut. cap. 17. §. 41.* requisitam à Catholicis dispositionem in conscientie indagine, peccatorum contritione, confessione, & satisfactione sitam non solum floccifacit, sed etiam conscientiarum torturam & divexationem appellat, concluditque §. sequenti, eam dignitatem unam & optimam asferre nos posse, si nostram vilitatem & indignitatem Deo offeramus. Quasi Ecclesia Catholica dum illa facienda præscribit, ista omit-  
tat, & communicantes etiam multiplici apparatu à se præscripto instructos iteratis vocibus non moneat, ut cum Centurione veraciter & humiliter profiteantur: *Domine non sum dignus ut intres sub tectum meum*, &c. Sed illos relinquamus, qui cum veris Sacramentis careant, nihil mirum si de necessaria ad Sacramentorum usum præparatione tam perversè opinentur.

### *Mentis ad Communionem præparatio.*

Tria desiderantur ut mens sit ad sacram communionem ritè composita; ætas discretionis, usus rationis, & pia attentio cogitationis. Singula expendimus.

In primis exigitur ætas discretionis; quia nimirum ea requiritur ætas, quæ cœlestem pacem à communi & prophano discernere valeat,  
ut



ut monet Apostolus, qui etiam vult communicantes eam pietatis & religionis affectionem afferre, quæ mortem Domini annuntiare queat. At parvuli ante ætatis discretionem id præstare nequaquam sciunt & possunt. Accedit multiplicis indignitatis & irreverentiæ periculum; proclive enim est puerulos à discretionem desertos sacrum cibum vel emovere, vel exspuere, vel aliis haud satis consentaneis modis tractare & sordidare. Nec obest antiquæ Ecclesiæ usus in quibusdam locis frequentatus, quo infantes Eucharistiâ saltem sub specie vini facilius in eorum ora instillandi reficiebantur. Non obest, inquam, quia ut suprâ dum de necessitate Eucharistiæ ex Tridentino satis diximus, aliæ fuerunt priscorum illorum temporum rationes, quæ impræsentiarum nequaquam urgent. Neque enim modò pueri adversus persecutiones divini panis saturitate armandi sunt: nec jam parentum teneritudini, sicut olim consulendum est, qui ut ab idololatria facilius suaviusque retraherentur, pueris eorum, quibus idolothyrtorum particulam impertire solebant, Sacramenti portionem Ecclesia omnibus omnia facta concedebat. Verùm ob graviores rationes pietati & tanto Sacramento debitæ reverentiæ consentaneas mos ille jam dudum auctoritate Ecclesiæ à Spiritu sancto continenter gubernatæ vigere desiit.

Si autem scire aveas, quâ ætate infantibus sacræ Eucharistiæ usus concedendus sit? Respondet Catechismus Romanus *part. 2. titulo de Eucharist. num. 67.* neminem melius convenientis discretionis annos constituere posse, quàm parentes & Sacerdotes: priores enim ex  
indole



indole & convictu, posteriores ex modo peragendæ confessionis internoscere faciliè possunt, num ad cibum illum discernendum sint satis idonei: nam pro corporis temperie, judicii maturitate, educationis culturâ & varietate, alii citiùs, alii tardiùs ad rationis discretionem perveniunt. Explorent ergo parentes & Parochi, & à pueris percunctentur, an hujus admirabilis Sacramenti notitiam acceperint, num erga tremenda mysteria reverentes sint, & eorum recipiendorum gustum aliquem spiritalem habeant? Monendi etiam seriò pueri sunt, ut ad primam communionem singularis pietatis & innocentia præparationem adhibeant, unde incredibiles ad vitam deinceps Christianè peragendam fructus percepturi sunt.

Secundò in adultis quavis tandem ætate pro-  
vectis necessarius est rationis usus; perpetua enim amentia non minùs quàm infantia recipiendæ Eucharistiæ obstat. Quod si amentes lucida habent rationis intervalla, inter illas bonæ mentis moras & veluti parentheses sacrâ Eucharistiâ dignandi sunt, si modò tanti sacramenti reverentiâ & gustu afficiantur. Observat etiam Catechismus Tridentini paulò antè laudatus, quod si amentes antequam in insaniam inciderent, piam & religiosam animi voluntatem, & suscipiendæ Eucharistiæ devotionem præ se tulerunt, licebit eis in fine vitæ Eucharistiam administrare, modò vomitionis, vel alterius indignitatis & incommodi periculum nullum timendum sit. Sic enim statuit Concilium Carthaginense IV. canone 76. *Is qui pœnitentiam in infirmitate petit, si casu dum ad eum Sacerdos invitatus venit, oppressus infirmitate*

*firmitate obmutuerit, vel in phrenesim versus fuerit, dent testimonium qui eum audierunt, & accipiat pœnitentiam. Et si continuò creditur moriturus, reconcilietur per manus impositionem, & infundatur ori ejus Eucharistia. Si supervixerit, admoneatur à supradictis testibus petitioni suæ satisfactum, & subdatur statutis pœnitentiæ legibus, quandiu Sacerdos qui pœnitentiam dederit probaverit.*

Major difficultas est de surdis ac mutis à nativitate, atque etiam de energumenis. De prioribus autem dicendum, quod si muti à nati-  
vitate nutibus significant se cognitionem, fidem, reverentiam & gustum Christi in Eucharistia præsentis habere, internumque animi habitum adoratione externâ, divinorum officiorum frequentatione, corporis vultusque modestiâ demonstrent, eis sine dubio, præmissâ per nutus sacramentali confessione, Eucharistia porrigenda est. Hæc namque indicia argumento sunt, eum qui jussit de tenebris lumen splendescere, corda eorum gratiæ cœlestis radiis illuminasse. Quod si nulla fidei, reverentiæ, ac illius Sacramenti famis vestigia apparent, denegandam esse Eucharistiam certissimum est. In dubio viri prudentes & docti, & præcipuè rectores animarum, & si opus est, Episcopi consulendi sunt.

Ad energumenos quod attinet, varia fuit Ecclesiæ disciplina. In primis canon 27. Concilii Eliberitani seu Eliberini, eis communione interdicere videtur: *Energumenum qui ab erratico spiritu exagitur, hujus nomen neque ad Altare cum oblatione esse recitandum, neque permittendum ut suâ manu in Ecclesia ministret.*

*Aret.* Verum canon ille facile explicari potest vel cum S. Thoma de energumenis non baptizatis, vel de illis qui ita erratico spiritu exagitantur, ut sui compotes esse non possint; vel certè de energumenis in extremo vitæ periculo non existentibus. Constat hæc expositio ex ejusdem Concilii canone 37. ubi sic statuitur: *Eos qui à Spiritibus immundis vexantur, si in fine mortis fuerint constituti, baptizari placet: si verò fideles fuerint, dandam eis esse communionem.* Porro alia est præsentis Ecclesiæ disciplina. Energumeni enim, si tamen sui compotes permanent, nec ullum subest irreverentiæ & indignitatis periculum, sacrâ communione reficiendi, & adversus cacodæmonis infestationes roborandi sunt. Imò si rationis lumen dæmonum possidentium, vel obsidentium offusis tenebris infusceretur, idem de illis ac de amentibus judicandum est, ut docet S. Thom. 3. p. 2. q. 80. art. 9. ad 2. Si enim lucida habent intermictantis rationis intervalla, concedi eis communio in illa rationis parenthesi debet. Quod si à rationis usu destituti sint, & antequam à maligno arriperentur, hujus Sacramenti devotionem præ se tulerint, non debet eis sacra Communio in exitu, citra vomitus vel irreverentiæ periculum denegari.

*Devota mentis attentio ad consequendum Eucharistia effectum necessaria.*

Tertiò præter rationis usum desideratur etiam mentis attentio; quæ non exigitur usus  
rationis

rationis, nisi ut animi adsit applicatio voluntarias & liberè susceptas evagantis cogitationis aberrationes & distractiones excludens. Unde qui in usu Eucharistiæ voluntariè mentem advocat suam, & de industria peccata venialia actu exercet, nullum profectò ex Eucharistiæ perceptione emolumentum reportat.

Præter Cardinalem Cajetanum, Paludanum Patriarcham Jerosolymitanum, Sylvestrum, Alensem, aliòsque primæ notæ Theologos hanc nostram sententiam clarissimis verbis docent duo Theologicæ Scholæ Coryphæi & facillè Principes pietate non minùs quàm eruditione spectabiles SS. Thomas & Bonaventura. Sic enim scribit Angelicus Doctor in 4. dist. 2. quæst. 2. art. 1. q. 3. *Cùm hoc Sacramentum perficiat conjungendo fini, ad hoc quod effectum suum plenè habeat in sumente, oportet quod adsit actualis devotio. Et quia interdum absque mortali peccato actualis devotio impediri potest, cùm distractiones varia ipsam impedian, & peccata venialia virtutum actus tollant, absque peccato mortali potest effectus hujus sacramenti impediri ita quod aliquis augmentum gratiæ non consequatur, nec tamen reatum peccati mortalis insurrat, sed fortè reatum venialis peccati ex hoc quod imparatus accedat. Ergo D. Thomas auctore augmentum gratiæ non consequitur, qui in actuali Eucharistiæ usu animo voluntariè peregrinatur. Quod si augmentum gratiæ animus voluntariè aberrans non consequitur, multò minùs mentis dulcedinem & spiritalem pinguedinem in sanctis cogitationibus, piisquæ affectionibus sitam percipere potest; subindeque nullum Eucharistiæ usu incuriosus homo*  
animum



animum liberè avocans suum fructum reportat.

Neque hanc doctrinam S. Thomas in Summa Theologica *quest. 79. art. 8.* retractavit, ut quidam neoterici arbitrati sunt, dum sic scripsit: *Effectus hujus sacramenti non solum est adeptio habitualis gratia vel charitatis, sed etiam quadam actualis refectio spiritalis, dulcedinis, quæ quidem impeditur, si aliquis accedat ad hoc Sacramentum per peccata venialia mente distractus: non autem tollitur augmentum habitualis gratia & charitatis.* Non, inquam, per hæc verba doctrinam in sententiis luculentissimè traditam S. Thomas senior, subindeque in Eucharistiæ venerationem propensior revocavit. Facile enim conciliantur duo hæc testimonia in speciem pugnancia distinctione quam indicat celebris Thomista Didacus Nugno. Distractionum quippe duplex vel triplex est genus: alia enim est merè naturalis sine culpa; alia venialis ex negligentia & tepiditate venialiter culpabili, voluntate tamen expressâ non suscepta; alia venialis quidem ex objecto, sed ultrò formaliter & de industria quæsita. Prima distractio saporem & spiritalem Eucharistiæ dulcedinem removeret, augmentum tamen habitualis gratiæ non impedit. Secunda refectio- nem etiam Eucharistiæ præcludit; an verò augmentum gratiæ saltem omne præpediat, etsi Cajetanus existimet, & nobis probabilissimum sit, non est ita certum: illud solum ex D. Thoma constans, illam distractionem, tametsi non expressè deliberatam, peccatum tamen veniale esse ratione illius à qua proficiscitur negligentia. At tertia distractio, etsi ex objecto præcisè sumpto venialis sit, tamen in  
illis

illis circumstantiis obicem ponit gratiæ, est quæ  
 gravis irreverentia. Unde præfatus Magister  
 Nugno, tametsi conclusione secunda subobscu-  
 rè loquutus videatur, in responsione tamen ad 2.  
 sic ait: *Si ex formali intentione vult illo tempore*  
*(nimirum sacre Communionis) esse cum di-*  
*stractione, credo quod peccat mortaliter, atque*  
*adeò nullum consequitur effectum sacramenti, quia*  
*irreverentia illa gravis est.*

Hac ergo distinctione plana est S. Thomæ  
 commemoratorum locorum concordia. In  
 summa enim dum ait distractionem & pecca-  
 ta venialia impedire dulcedinem gratiæ actua-  
 lis, non tamen augmentum gratiæ habitualis,  
 loquitur de distractione vel naturali, vel ex ne-  
 gligentia veniali profecta: loquitur etiam de  
 peccatis venialibus non actu & expressè exer-  
 citis, sed vel habitualiter animum afficientibus,  
 vel usum communionis ob hominis infirmita-  
 tem, sed non ex proposito comitantibus: in-  
 commodè enim humanæ infirmitati consultum  
 esset, si ad cœleste epulum accedentes ab omni  
 purgatos peccato veniali esse oporteret: nec  
 tam medicinæ quàm laquei Sacramenta forent.  
 In sententiis verò vult S. Doctor distractionem  
 venialem impedire augmentum gratiæ habitua-  
 lis, quia tunc *homo imparatus accedit*; non ta-  
 men peccatum mortale committi, si nimirum  
 distractio & indevotio ex negligentia veniali  
 proficiscatur.

Quare istud temperamentum tutum, nisi  
 fallor, piis omnibus videbitur, si dicamus pri-  
 mum distractionem merè naturalem, & omni-  
 no involuntariam non impedire præcipuum  
 Eucharistiæ fructum, sicut ut idem Sanctus  
 Thomas



Thomas 2.2. edocet, orationis lucrum non excludit. Secundò distractio venialiter culpabilis impedit quidem augmentum gratiæ, quod Eucharistia solis spiritualiter simul & sacramentaliter comedentibus confert; non est tamen peccatum mortale, quod deliberatum irreverentis comestionis actum per se requirit. Tertiò distractio sponte suscepta, & de industria intenta, qua quis prudens & volens cibum illum cœlestem cum eadem indifferentia & mentis evagatione atque cibos ordinarios edit, omni prorsus Eucharistiæ effectui obicem ponit, & meo quidem aliorumque me doctiorum iudicio grave & lethale peccatum est. Singula ex inferius dicendis probata monebunt.

In eodem planè sensu intelligendus venit Doctor Seraphicus in materia pietatis nulli postponendus. Sic autem habet in brevil. p.6. cap.9. tom. 1. *Quoniam capacitas nostra ad Christum efficaciter suscipiendum non est in carne, sed in spiritu; non in ventre, sed in mente: & mens Christum non attingit nisi per cognitionem & amorem, per fidem & charitatem; ita quod fides illuminat ad recognitionem vel recordationem, & charitas inflamat ad devotionem: ideo ad hoc quod aliquis dignè accedat, oportet quod spiritualiter comedat, ut sic Christum per recordationem fidei masticeat, & per devotionem amoris suscipiat, per qua non in se transformet Christum, sed ipse potius trajiciatur in ipsum mysticum corpus. Propter quod manifestè colligitur, quod qui tepidè, indèvote, & inconsideratè accedit, iudicium sibi manducat & bibit; quia tanto Sacramento contumeliam facit.*

Severiora, & paulò duriora tibi fortassis tan-

ti Doctoris verba videbuntur: verum ea superius productâ distinctione temperabis. Ibi namque loquitur Bonaventura de his qui deliberatâ & veluti affectatâ tepiditate, & mentis errabundâ evagatione prudentes simul & imprudentes in tremenda mysteria advertentes irruunt, qui quasi studio perversam languentis mentis inertiam negligentiamque alunt, nullum interim suæ calamitatis sensum habentes, vel sibi certè eripientes. Nam cæteroquin posse contingere citra peccatum mortale venialem distractæ mentis negligentiam, tradit ipsemet S. Doctor in Compendio Theologiæ, lib. 6. cap. 17. his verbis: *Abstineant quidam à Communione propter culpam propriam, & aliqui sine culpa mortali, sed propter sacramenti reverentiam; sicut qui sentiunt se minus mundos carne vel mente, vel etiam indevotos: & isti benè faciunt, dummodo possint justè, & sine aliorum scandalo supersedere. Ubi enim non instat necessitas, consulendum est talibus, ut de Communione expectent, quousque parati, & devoti, & circumspecti possint accedere. Nulla tamen necessitas debet compellere, ut aliquis in peccato mortali existens scienter communicet. Vides posse aliquem absque peccato mortali ad Eucharistiam accedere, tametsi sentiat mentem præ infirmitate divagationibus irrepentibus veluti aspersis pulveribus infici. Jam singula quæ distinximus ordine confirmemus.*

In primis distractæ mentis evagationes merè naturales augmentum gratiæ non impedire sic explico, & ostendo. Etsi in doctrina SS. Thomæ & Bonaventuræ ad quemcumque fructum Eucharistiæ percipiendum desideretur spirita-



lis mentis ( quæ os spirituale est , juxta illud Psalmographi , *Os justî meditabitur sapientiam* ) comestio , seu pia attentio : tamen si quis ante actualem communionis usum piis fidei , spei , amoris , humilitatis , aliisque affectibus mentem instruere & apparare satagit , si deinde dum actu divinum cibum accipit , animus aliò præter intentionem rapitur ( quæ magna est humanæ mentis & imaginationis debilitas ) ratione præcedentium actuum virtute remanentium effectum Eucharistiæ salutare percipiet , quo sine aliqua culpa sua carere non potest. Sacramenta enim quæ physicè sunt effectuum suorum causæ , suum illicò effectum in subiectum nullo obice præpeditum infundunt. Internam ergo spiritalis refectionis suavitatem non sapiet hujusmodi divagatione occupatus , quia solâ cogitatione & affectione percipitur : augmento tamen habitualis gratiæ , quo vegetior evadet , nequaquam fraudabitur.

Secundò diximus cum prædictis magni nominis Theologis , accedentem cum distractione ex negligentia & tepiditate veniali profectâ , nullum ex Eucharistia effectum capere , nec tamen mortaliter , sed venialiter duntaxat peccare. Primum laudatorum sanctorum Doctorum rationibus sic confirmo : Eucharistiæ sacramentum per modum cibi institutum est , unde sub specie panis porrigitur : at cibus nec nutrit , nec auget , nec comedentem reparat absque ullo vitali illius actu : Ergo nihil proderit panis vitæ & intellectus , panis vivus , lac rationale sine ulla vitæ spiritalis operatione. Et ideo suprâ dixit S. Thomas hoc sacramentum recipientem perficere *conjungendo ultimo finî* : non

conjungitur autem homo ultimo fini nisi per actus mentis & voluntatis, quibus cœlestes lauitias esurit, sitit, & sapit. Dixit etiam eadem de causa S. Bonaventura, Christum efficaciter suscipi non sola oris carne, sed spiritu; non ventre duntaxat, sed mente; attentione nimirum fidei, & ardore charitatis.

Deinde sic argumentor: Tametsi Sacramenta novæ legis gratiam ex opere operato, vi scilicet in ipsa ex passione Christi derivatâ efficiant; attamen ut eam influant in adultos aliquem exigunt piarum dispositionum apparatus; nunquam enim gratiam adultis infundi sine pio liberi arbitrii motu constans est Sancti Thomæ doctrina, & habetur in Tridentino sess. 6. cap. 7. *Iustitiam, inquit, in nobis recipientes unusquisque suam, secundum mensuram quam Spiritus sanctus partitur singulis prout vult, secundum propriam cujusque dispositionem & cooperationem.* Neque dici potest id de prima infusione gratiæ, non autem de augmento illius, verum esse. Nam augmentum gratiæ primam infusionem ejusque condiciones sapit, sicut in naturalibus forma iisdem dispositionibus intenditur, quibus effecta est; & in humanis sicut non efficitur, ita nec augetur habitus absque voluntatis conatu, ut in materia de augmento charitatis fusè exposuimus. Atqui ille qui cum distractione vel tepiditate, vel alio affectu actuali veniali, absque formali tamen reflexione, quæ ut jam dicimus, Sacramenti majestati injuria est, accedit; ille, inquam, nullo piæ cogitationis & affectionis motu præparatur, idque ex aliqua culpa sua obvenit: ergo in illum Eucharistia nihil producit, in illos

illos duntaxat effusa, qui ut Chrysostomus loquitur, fide respiciunt, honore mirantur, mente contingunt, cordis manu suscipiunt, & haustu interiori assumunt.

Denique S. Bonaventura, S. Franciscus Salesius, aliique Patres spiritales capite proximè futuro latè referendi tepidos & erga venialia actu affectos hortantur, ut à communione aliquantisper secedant, quò Eucharistiam reverentiùs deinde adeant atque paratiùs. Etsi enim dilatio quæ à negligentia & incuria salutis proficiscitur, animo interim de præparatione ad communionem digniùs obeundam nihil sollicito, sed liberiùs cupiditatibus indulgente; etsi, inquam, hujusmodi dilatio nihil ad communionem sanctiùs percipiendam adjuvet, sed potiùs ex adipe iniquitatis prodeat: attamen dilatio eo fine suscepta, ut consentaneum apparatus piorum operum studio & exercitatione quis assequatur, utilissima est, à Patribusque commendata, atque à Sanctis redacta ad praxim ob levissimas culpas, vel etiam sine actuali culpa, ut majorem pietatis & reverentiæ sensum paulisper remissum & tepefactum excitarent, atque ad communionem puriores postmodum ardentiorésque se referrent. Præclaras Patrum & D. Thomæ hac de re sententias capite sequenti producemus. Atqui si accedentes cum distractione & tepiditate actu noxiâ, gratiæ tamen habitualis incrementa susciperent, perperam Patres moram, intermissionemque Communionis salutarem esse contestarentur, perperam ad illam intercapedinem cohortarentur, ex qua non mediocris emolumentum, gratiæ scilicet sanctificantis augmentum

jaçtura consequeretur : Ergo censent tepidos illos & incuriosos ad Eucharistiam negligenter accedentes nullum ex Eucharistia spiritale lucrum reportare. Quod & multorum experimentis confirmare in promptu esset : sed de his in proxima reflexione, ubi rationem illam urgebimus.

Dices : Ergo in peccatum mortale incurrer, qui cum venialibus mentis divagantis culpis, citra contemptum tamen accederet, quod supra cum D. Thoma inficiati sumus. Probatur consequentia ; nam ponere obicem effectibus Sacramentorum, omnemque eorum fructum ad nihilum redigere peccatum mortale est, utpote finem propter quem instituta sunt irritum faciens, & quantum in ipso est fontes Salvatoris exsiccans. At hoc durissimum esse, & à veritate alienum, superiùs confessi sumus, quia alioquin à paucis etiam justis Eucharistia sine sacrilegio susciperetur, evaderetque laqueus & petra offensionis medicina salutis.

Respondeo tunc in Sacramentorum usu sacrilegium committi, quando obex positivus ex quadam irreverentiâ deliberatâ ponitur, quâ Sacramenti dignitati & sanctitati injuria, & veluti contumelia irrogatur : obex autem negativus ex venialibus specialem cum Sacramenti usu oppositionem non habentibus profectus, veniale quidem peccatum est, at sacrilegii tamen malitiâ non sordescit, modò ex contemptu Sacramenti, vel de industria non suscipiatur. Cùm verò dicitur peccatum mortale posse finem Sacramenti evacuare, fructumque ejus annullare, verum est illud quidem, si id ex proposito deliberato fiat, vel ex statu peccati  
**mortalis**



mortalis vel cognito, vel culpabili ignorantia incognito oriatur; secus si obex ille concomitanter solum ex humana infirmitate, quæ venialia & facile admittit, & sæpe præ tepiditate & incogitantia negligit, communionem inficiat. Præsertim quia non eo animo qui sic comparatus est accedit, ut negligenter tepidéque communicet, etsi tepor & venialis negligentia subrepant.

Instabis: Concilium Tridentinum *sess. 13. c. 7.* tradens dispositiones ad dignam communionem necessarias, exigit solum ut accedens nullius mortalis peccati conscius sit: *Communicare volenti*, inquit, *revocandum est in memoriam hoc Apostoli præceptum: Probet seipsum homo. Ecclesiastica autem consuetudo declarat, eam probationem necessariam esse, ut nullus sibi conscius peccati mortalis, quantumvis sibi contritus videatur, absque præmissa sacramentali confessione ad sacram Eucharistiam accedere debeat.* Ergo ad percipiendum Eucharistiæ fructum unus sufficit gratiæ status peccati mortalis conscientiam excludens.

Respondco eò loci velle duntaxat docere sanctam Synodum contra Lutheranos & Calvinianos, solam fidem non esse ad Eucharistiam dignè percipiendam necessariam, ut canone postea undecimo definit, sed desiderari insuper conscientiæ puritatem & gratiæ statum, quo sine indignè manducat, subindeque iudicium sibi manducat & bibit, qui se cordis munditiæ ac pœnitentiæ exercitationibus probare neglexerit. Cæterùm nec illo eodem loco pios reverentiæ & sanctitatis motus ad dignam communionem desiderari sacrum Concilium præ-

termisit : *Si non decet*, inquit, *ad sacras ullas functiones quempiam accedere, nisi sanctè ; certè quò magis sanctitas & divinitas cœlestis hujus Sacramenti vero Christiano comperta est, eo diligentius cavere ille debet ne absque magna reverentia & sanctitate ad id percipiendum accedat.*

Hinc Catechismus Romanus fidus sacri Concilii interpret *part. 2. tit. de Eucharistia, num. 59.* ad præparationem Eucharisticam requirit primum, ut fideles discernant mensam à mensa, sacram à prophanis, cœlestem panem à communi, mysterii profunditatem inscrutabilem non curiosis disputationibus hæreticorum more perquirentes, sed humili & inconcussa fide venerantes. *Hoc nimirum*, inquit, *est judicare corpus Domini.* Secundò postulat ut unusquisque à seipso quærat, num pacem cum aliis habeat, num proximos verè atque ex animo diligat, paratus relinquere munus suum ad Altare, priùsque fratri læso reconciliari, quàm munus suum offerat, & tremenda mysteria adeat : hæc, inquit, est altera preparatio maxime necessaria. Tertiò exigit, ut conscientiam nostram diligenter scrutemur, ne fortè exitiali aliquo peccato contaminati simus, quod priùs sit contritionis & confessionis medicamento eluendum : *Definitum est enim*, inquit, *à sancta Tridentina Synodo, nemini licere, quem peccati mortalis conscientia stimulet, si Sacerdotis facultas data sit, antequam se sacramentali confessione purgarit, quantumvis sibi contritus esse videatur, sacram Eucharistiam accipere.* Quartò reverentis animi humilitatem, indignitatem suam profitentis, & cum Centurione à Christo tam  
impensè

impensè laudato de corde puro dicentis, *Domine non sum dignus, &c.* desiderat. Taciti, inquit, cum animis nostris cogitemus, quàm indigni simus, quibus divinum hoc beneficium à Domino tribuatur. Quintò castum petit sinceræ charitatis ignem, quo panis ille divinus spiritaliter concoquatur. *Exquiramus etiam à nobis* (verba sunt ejusdem Catechismi longè præclarissima) *an illud Petri usurpare nobis liceat: Domine tu scis, quia amo te.*

Ex quibus liquidum est, recentiorum nonnullorum laxitatem, affirmantium nullum peccatum ne veniale quidem admitti ab eo qui in Altaria cum distractione & tepiditate irruit, quia (inquiunt, pessimam assertionem pejori ratione confirmantes) susceptio Eucharistiæ non est loquutio cum Deo sicut oratio, sed manducatio; nec ulla injuria fiat cibo, si distractè sumatur: liquidum, inquam, est hanc doctrinam immensum ab Ecclesiæ sensu in Tridentino ejusque Catechismo abhorrere, nec ad hujusmodi novitatum flagitia ad indignas communionem iter sternentia confundenda exigere argumenta, sed unum sufficere communem Christianæ pietatis sensum, sufficere communissimas mysteriorum nostrorum notiones animis non omniò corruptis insemintas. Nulla quidem communi cibo irrogatur injuria, si distractè sumatur: ergòne idem de cœlesti cibo, qui Christus est, quemve in Altari Angeli sacro horrore perciti & contremiscentes, uti Chrysostomus tam ignitè inculcat, adorant, censendum est? Cur ergo nobis cibum illum discernere, corpúsque Domini dijudicare tradens quod à Domino Apostolus acceperat, impera-



vitæ? Quis in humano civilis urbanæque vitæ convictu rusticitatem illius toleraret, qui attentè quidem cum Rege loquendum affirmaret, contenderet tamen dona ab illo impertita errabundo, negligenti, & incurioso, citra ullam offensam animo suscipi posse, vel mensæ regali accumbere immodesto peregrinantique animo, Rege ipso intuentem, licitum esse? Quantò magis damnanda erit illius irreverentia, qui ad Regis Regum mensam sedens, ipsum Dominum, majestatis, qui ineffabili amoris miraculo conviva & convivium est, indevotè suscipere; quæ apponit, id est seipsum in cibum porrectum non attendere, illumque panem vitæ & intellectus otiosâ & scurrili cogitatione manducare non reformidat? Sed de his statim in tertio dicto ampliùs. Ergo attentum animi meditatio & reverentia adhibenda est, eademque præsertim à Sacerdotibus, ut omni mentis acie perpendant, quemadmodum ipsam Christi personam induti elementa in Christi corpus & sanguinem convertant, offerantque Deo hostiam pretii infiniti. Quid porro indignius, iniquius, & ingratius, quàm ut munus, cujus Angeli digni habiti non sunt, tanta cum incuria oscitantes homines exequantur? Atque inde elice Eucharistiæ se fructibus illos privare, qui neglectâ interiorum actuum præparatione ad Eucharistiam haud satis reverenter accedunt. Illos verò in fortitudine cibi illius ire de virtute in virtutem, qui castorum desideriorum fervore cibum illum appetunt; venientem fide adorant, charitate amplectuntur; susceptum denique hospitem virtutum omnium officiis pro modulo honorare, pro virili colere, atque omnibus



omnibus lætitiæ & amoris significationibus demulcere, ac demereri conantur.

Denique diximus cum S. Bonaventura, Magistro Nugno, Cabezudo, aliisque, cum qui deditâ operâ prudens & volens, atque ut Scripturæ phrasi utar, *erecto collo* cibum Eucharisticum invadit cum mentis evagatione aliisque peccatis venialibus usum Eucharistiæ concernentibus actuque exercitis, tremendo mysterio contumeliâ gravem inferre, subindeque in peccatum mortale incurrere. Tum quia hæc affectata temerarii animi impudentia divinissimarum rerum tremenda mysteria contemnit & floccifacit. Tum quia ista temeritas ex adipe iniquitatis prodit, nec aliunde ortum habet, quàm ex vitiorum & cupiditatum consuetudine inolita, quâ ita obducitur atque obruitur animus, ut jam non solum nihil in ipso loci divinarum rerum cogitationi relinquatur, sed etiam in profundum demersus atque defixus sacra quæque contemnit: denique qui præcepto recitandi divini officii & audiendæ diebus festis missæ non satisfacit, qui toto lecti Breviarii vel celebrati Sacrificii tempore vanis & otiosis advertenter vacat, atque adeo peccati mortalis reatu afficitur. At divinum & naturale præceptum est Eucharistiam attentè & devotè recipere, ut per se patet, & innumeris locis Patres ostendunt, quorum testimonia capite sequenti referemus: Ergo qui meditatè Eucharistiam distractè & indevotè recipit, in grave peccatum incurrit, & longè satius utiliusque foret à Communionem abstinere, quàm sancta & ipsum Sacramentum sanctorum non sanctè tractare.

*Cordis ad Eucharistiam præparatio.*

De cordis dispositionibus tum omninò necessariis , tum de proficiis . & tanto cibo consentaneis ordine agendum est.

In primis ad dignam hujus Sacramenti susceptionem omninò requiritur cordis mundities & innocentia , sin baptismalis ( quæ tamen convenientissima foret , unde olim baptizatis & confirmatis Eucharistia filiorum cibus porrigebatur ) certè per pœnitentiam reparata. Hinc tam seriò Apostolus I. Cor. II. *Probet seipsum homo , & sic de pane illo edat , & de calice bibat. Qui enim manducat & bibit indignè , judicium sibi manducat & bibit , non dijudicans corpus Domini.* Quot verba totidem fulmina, quibus indignè communicantes conteruntur. *Probet seipsum homo ;* scrutetur nimirum vitam, statum, propensiones , dispositiones , & antea actæ vitæ rationem excutiat & recognoscat. *Probet ,* inquam , id est argumentis pœnitentiæ suæ , fidelitatis , firmitatis animi in peccata carnalis concupiscentia non relabentis confirmet , & ostendat cor se habere ad sacram Synaxim paratum. *Probet ,* inquam , & persuadeat Confessario non verbis sonantibus , sed factis pronuntiantibus, se mutasse vitam dum vult accipere vitam; quæ probatio dilectionis exhibitio est operis: & nihil profunt infinitarum pollicitationum folia , nisi veræ virtutis digni fructus edantur. *Probet igitur seipsum : Qui enim manducat & bibit indignè , judicium sibi manducat & bibit.* Ponderanda singularis loquendi formula. Manducare judicium , & non judicem dicitur indignè

nè communicans ; quasi diceret , temerarius ille jam judicatus, jam condemnatus est : ibunt impii in resurrectionem judicii, seu condemnationis, ut ait Scriptura, & iste dum Christum indignè edit, in antecessum prædamnatur ; nunc judicium est ejus , secum fert æternæ mortis sententiam. Impuri corporis obscœnitates damnat virginea Christi caro : occallentis cordis duritiem sanguis condemnat Salvatoris : sanguis ejus sicut olim supra Judæos , ita & modò super eum. Animam infamem & criminofam damnat anima quam posuit ille pro nobis , qui est Salvator omnium , maximè fidelium. Indignum hospitium , sedem foetidam & sordentem damnat majestas hospitis , præsentia Divinitatis. Denique judicium sibi manducat , qui manducat indignè , quia sicut Eucharistia dignè suscipientibus est pignus gloriæ , & arrha salutis ; ita certa est impiorum condemnatio , & præjudicata sententia.

*Irritam quis faciens legem Moysis , inquit idem Apostolus Hebr. 10. sine ulla miseratione duobus aut tribus testibus moritur : quanto magis putatis deteriora mereri supplicia , qui Filium Dei conculcaverit , & sanguinis Testamentum pollutum duxerit , in quo sanctificatus est , & spiritui gratia contumeliam fecerit. At per Communionem indignam Filium Dei conculcamus , pollutumque ducimus , qui conscientiae horrendæ for-  
dibus eum quantum in nobis est conspurcamus. Si hominibus Dei imaginibus intentatas injurias tam severè vindicat Deus picturæ suæ zelotes ; si Prælati vices suas gerentibus illata damna tam durè plectit ; si restante sacro eloquio Levit. 22. Omnis homo qui accesserit ad*



*ea qua consecrata sunt à filiis Israël Domino , in quo est immunditia , peribit coram Domino : quomodo in eos animadvertet , qui non imaginem , sed archetypum ; non Dei ministrum , sed Dominum majestatis ; non rem consecratam , sed principium totius sanctitatis , à cujus obsequio quidquid sacrum dicitur nomen habet , indigna communione floccifecerint , quibus & veridicè regeri potest , Molesti estis Deo meo ? Nulla , nulla planè inhumanior ingratitude hujusmodi sacrilegè accedentium præsumptione retribuendum mala pro nobis , sterilitatem animæ Christi Jesu.*

Infanda fuit Judæorum in Christum contumelia , cùm uti narrat *cap. 27. Matthæus , genuflexi ante eum ; illudebant ei dicentes : Ave Rex Judæorum ;* atque ut *cap. 22. addit Lucas , velaverunt eum , & percutiebant faciem ejus , & interrogabant eum dicentes : Prophetiza , quis est qui te percussit ?* Nonne indignitatem illam qui indignè accedunt æmulantur ? Corpore genuflectunt , cor autem eorum longè est ab eo : Christum non velant , sed speciebus velatum , quasi nihil videret , nec esset Propheta vilipendunt. Quasi idolum illum habent , oculos habens & non videns , aures habens , & non audiens ; putantque illum non intueri , qui videt tantò patientiùs quantò sapientiùs.

Horrenda fuit tyrannorum illorum sævitia , qui post nomina mille , mille tentatas nocendi artes , pro coronamento crudelitatis mortua quin etiam jungebant corpora vivis. Ecce imaginem sævitix tuæ & meæ , Lector Cristiane , si quod Deus avertat , in statu peccati in Altaria mensamque dominicam irruamus , panem  
vitæ



vitæ cordi peccato mortuo inserimus, Christum cum Belial copulamus. Quid ergo mirum, si Christum qui hujusmodi sunt, teste Apostolo, rursus crucifigunt in semetipsis? Crucifigunt, inquam, non Judæi quid faciant nescientes, quique si cognovissent, nunquam Dominum gloriæ crucifixissent; sed Christiani, quos fides irradiat, doctrina imbuat, frequens admonitio terret. Crucifigunt non clavo triplici, sed triplici funiculo iniquitatis, nimirum antea actæ vitæ sordibus, confessionis vel pœnitentiæ simulatione, & sacrilegæ communionis temeritate. Crucifigunt non corpus immortale realiter præsens, sed corporis divinitate uncti efficacitatem impediunt, alligantque virtutem. Affixum cruci corpus distillabat salutis medicinam, & inter dolores parturientis formabatur interim Ecclesia, fluebant Sacramenta, in lymbos Patrum, in Latronem pœnitentem virtus Crucifixi derivabatur. At in sacrilegum sacræ mensæ invasorem nihil vivifica Christi caro operatur, nihil agit actus purus: Ergo quantum in te est moritur Christus, nisi foret alioquin immortalis. Incarnationem, ejusque extensionem Eucharistiam, *insitionem* Tertullianus aliique appellant, favetque Jacobus *insitum Verbum* Christum appellans. Dum ramus caudici vel trunco inseritur mortuo, mori ipsum & recipientis sterilitate arefcere necesse est. Ergo insitus cordi tuo per Eucharistiam Christus morte tua moreretur, nisi foret cæteroquin immortalis. Vah perfidum, qui amantissimum Salvatorem osculo & amplexu prodit! Vah crudelem, qui de corde suo patibulum erigit Redemptori; de corde, inquam, quod

quod Christus sibi elegerat majestatis & clementiæ thronum, & reclinatorium aureum mediâ charitate stratum. *Utinam vel rebus istis* (verba sunt Bernardi serm. 3. de Resurrect. in indignè communicantes meritò vibranda) *esset contenta voluntas, nec in ipsum, horribile dictu, desaviret authorem. Nunc autem & ipsum, quantum in ipsa est, Deum perimit voluntas propria. Omnino enim vellet Deum peccata sua aut vindicare non posse, aut non videre: vult ergo non esse Deum, quem vult aut impotentem, aut nescientem. Crudelis planè & omnino execranda malitia, qua Dei potentiam, justitiam, sapientiam perire desiderat.*

Eadem veritas rationibus S. Thomæ confirmatur: Sacramentum Eucharistiæ est vinculum unionis, quo tota Ecclesia copulatur: unde qui hoc Sacramentum suscipit, ex hoc ipso significat se esse Christo unitum, & membris ejus incorporatum. Quæ unio fidè charitate formatâ, subindeque cum peccato mortali insociabili initur: *Et ideo manifestum est, inquit S. Thomas quæst. 80. art. 4. quod quicumque cum peccato mortali hoc Sacramentum sumit, falsitatem in hoc Sacramento committit; & ideo incurrit sacrilegium tanquam Sacramenti violator, & propter hoc mortaliter peccat.* Pulchrè S. Doctor ait indignum illum susceptorem falsitatem in hoc Sacramento committere. Falsidicus enim & falsificus est, qui sacramentum pacis usurpat, reverà cùm sit pietatis hostis, Christi quem suscipit inimicus. Nec fallere solùm contentus est, sed falsa etiam, si posset, efficeret verba Veritatis. Veridicè dixit Salvator: *Qui manducat me, vivet propter me: qui manducat me,*  
*habet*

*habet vitam æternam.* At promissiones illas longè verissimas indignâ communione irritas facit & nullas; qui mortem haurit de fonte vitæ, & panem vivum transfert in venenum.

Illustrat hanc doctrinam S. Præceptor in responsione ad primum argumentum, ex discrimine quod communicantes inter & conversantes cum Christo, quandiu in terris versatus est, intercedit. Non submovebat à se Christus dum viveret peccatores; nec isti peccabant; quia Christus in propria specie apparens non exhibebat se contrectandum hominibus in signum spiritualis unionis cum ipsis, sicut exhibetur sumendus in hoc Sacramento. Et ideò peccatores cum Christo propria in specie conviventes in crimen falsitatis circa divina non incurrebant; secus tamen est de peccatoribus indignè Sacramentum unitatis & pacis usurpantibus. Maximè quia Christus vitam mortalem degens similitudinem gerebat carnis peccati, nec peccatores à se arcebat qui venerat peccatores salvos facere; sed omnes ad se alliciebat, & congregare optabat, sicut congregat gallina pullos suos sub alis. At in Eucharistia corpus Christi gloriosum est, ibique mensam parat non hostibus, sed amicis; non extraneis, sed filiis: unde non habentes vestem nuptialem repellit, litigatosque manibus & pedibus in tenebras projicit exteriores.

Si Petrus viso insolitæ capturæ piscium miraculo, tremens ac stupens ad genua se illius projecit: *Exi*, inquiens, *Luc. 5. à me Domine, quia homo peccator sum.* Si Centurio ad Christum adire ipse non audet, sed amicos mittit qui rogent pro servulo sanitatem; nec loqui audet,



audet, nisi ut indignum se profiteatur, qui domo suâ illum excipiat, ut Matth. 8. & Luc. 7. claret: si mulier illa sanguinis fluxu laborans Christo coram sistere se non audet, sed retro accedens fimbriam vestis tremebunda attigit, ut Matth. 9. & Luc. 8. videre est: si mulier illa peccatrix post extinctam cœlestis incendio amoris cupiditatis flammam, retro secus pedes Domini stetit, non se illi coram obtulit, non arripere manum, sed pedes tantum osculari ac lacrymis rigare contenta: quâ fronte ad Christum jam à Patre claritate quam habuit antequam mundus fieret clarificatum, æternaque gloria circumfluentem accedent impœnitentes peccatores; nec accedent modò, sed fument, sed osculabuntur, sed manducabunt, eo procaciùs & petulantiùs, quo se fœdiores flagitiis, omnique pietatis sensu alieniores senserint.

Illustrat rursus hanc ipsam doctrinam S. Præceptor in responsione ad secundum, observando Eucharistiam quidem, utpote Sacramentum medicinam esse, sed tamen non omnem medicinam cuique ægroto secundum quemlibet infirmitatis statum esse opportunam & salutarem. Nam medicina, quæ daretur jam liberatis à febre ad confortationem, noceret si daretur adhuc febricitantibus. Ita etiam Baptismus & Pœnitentia sunt quædam medicinæ purgativæ, quæ dantur ad tollendam febrem peccati. Hoc autem Sacramentum est medicina confortativa, quæ non debet dari nisi liberatis à peccato. Maxime quia hoc Sacramentum non medicina tantum, sed cibus etiam est: sicut autem cibi ore accepti in stomachum benè affectum illabentes



bentes corpora alunt & sustentant, qui verò in pectora vitiosis humoribus occupata infunduntur, graves morbos efficiunt: sic cœlestis iste cibus dum animo ritè composito suscipitur, ad perfectam animi sanitatem & sanctitatem maximo adjumento est: at verò cùm ipso nos indignos præbemus, sempiternam mortem affert.

Quorum rationem radicalem in responsione ad 3. S. Doctor profundè tradit: Maximis & veris bonis nullus quidem malè utitur tanquam perversi usus principio; illis tamen perversi abutuntur tanquam objecto mali usus, ut in iis liquet qui de virtutibus superbiunt. Eucharistia ergo Sacramentorum maximum, Christumque unum & summum bonum nostrum realiter continens, mali usus principium esse non potest, at objectum tamen. Nihil ergo mirum, si malum invehat indignè sumentibus tanti boni susceptio. Ut enim præclare Catechismus Romanus *part. 2. titulo de Eucharistia, num. 58.* dixit, optimis rebus & maximè salutaribus hoc proprium est, ut si in tempore iis utamur, vehementer prosint; sin alieno tempore adhibeantur, perniciem & exitium allatura sit intempestiva susceptio. Ita optimè affecti & præparati animi amplissimis cœlestis gratiæ muneribus in usu Eucharistiæ donantur; imparati verò non solum nihil commodi, sed maxima etiam incommoda & detrimenta accipiunt.

*Corollaria derivata.*

Ex quibus omnibus concludit S. Doctor *art. 5.* quod etsi peccatum indignè communicantium non sit omnium gravissimum ( quia peccata divinitatem ipsam immediatè inhonorantia, putà infidelitas, blasphemia, odium Dei deteriora sunt ) sacrilega tamen communio gravioribus criminibus accensetur, & à Doctoribus peccato occidentium Christum confertur, quod contra corpus Christi patratum est. Comparatur etiam peccato Iscariotis Christum osculo mortem illaturis tradentis. Sed de his jam antè satis diximus, quando locum illum Apostolicum exponebamus, ubi indignè communicantes rei corporis & sanguinis Domini dicuntur.

Nota tamen ex eodem S. Doctore peccatum indignè sumentium augeri posse vel minui ratione circumstantiarum; peccatum enim ex ignorantia vel infirmitate levius eo est, quod ex contemptu certaue scientia proficiscitur: & sic longè graviùs peccant qui ex contemptu cum conscientia peccati mortalis sacramentam invadunt, quàm qui ex timore vel aliqua inconsideratione in statu peccati mortalis accedunt. Unde docet S. Thomas *ad 3.* quod ille qui projiceret hoc Sacramentum in lutum, longè graviùs indignè communicante peccaret, utpote de industria conculcationem, injuriam, & contemptum adorandi Sacramenti intendere, ad quod indignè corpus Christi accipiens per se non attendit.

Infert. 2. S. Præceptor, peccatum fornicationis

nis & luxuriæ hominem ad susceptionem purissimi Sacramenti magis ineptum efficere, quia nimirum obscœna peccati carnalis libido spiritum carni dum subijcit, mentem hebetat, pietatem extinguit, & fervorem dilectionis ad concoquendum cœlestem cibum tantoperè necessarium maximè impedit.

Hinc sancta mater Ecclesia castissimi sponsi sui amore flagrans, & zelo zelata pro decore domus Dei, per plura sæcula peccati mortalis, luxuriæ potissimum sorde commaculatis cœlesti cibo interdicebat, Diaconos verò & Sacerdotes gradu in perpetuum dejiciebat. *Neque enim fas est, ut ait Joannes II. in epistola 1. ad Cæsarium Arelatensem, pollutum criminibus sacris mysteriis deservire.* Et ut addit Gregorius Magnus lib. 4. epistolarum, epistol. 16. *si lapsis ad suum ordinem revertendi licentia concedatur, rigor canonica precul dubio frangitur disciplina, dum pro reversionis spe prava actionis desideria quis concipere non formidat.* Idque præclare confirmat S. Martinus I. ad Amandum Trajectensem Episcopum, his verbis: *Nullatenus in hujusmodi peccato delinquentibus ad destructionem Canonum compassionem exhibeat. Nam qui semel post suam ordinationem in lapsum ceciderit, deinceps jam depositus erit, nullumque gradum Sacerdotii poterit adipisci: sed sufficiat ei lamentationibus fletibusque assiduus, quoad usque vixerit, in eadem poenitentia addurare, ut commissum delictum divinâ gratiâ extinguere valeat.* Si enim tales, quarimus ad sacros Ordines promovendos, quibus nulla ruga, nullumque vita contagium prapediat; quanto magis si post ordinationem suam quispiam in lapsum ceciderit,

*rit , & pravaricationis peccato deprehendatur obnoxius , omninò prohibendus est cum manibus lulentis atque pollutis mysterium nostra salutis tractare?*

Infert 3. S. Thomas responsione ad quintum argumentum , indignè illos etiam ad communionem adire , qui ex ignorantia juris naturalis se esse in statu gratiæ opinantur. Placet verba S. Præceptoris longè pulcherrima producere , quibus præter specialem circa Eucharistici doctrinam , stabilitam olim à nobis de ignorantia juris naturalis ( quam semper culpabilem , semper invincibilem diximus ) sententiam egregiè confirmat. *Hoc quod non habet aliquis conscientiam sui peccati potest contingere dupliciter : uno modo per culpam suam , vel quia per ignorantiam juris qua non excusat , reputat non esse peccatum quod est peccatum , putà si aliquis fornicator reputaret simplicem fornicationem non esse peccatum mortale ; vel quia negligens est in examinatione sui ipsius , contra id quod Apostolus dicit 1. Cor. 11. Probet autem seipsum homo , & sic de pane illo edat , & de calice bibat. Et sic nihilominus peccat peccator sumens corpus Christi , licèt non habeat conscientiam peccati ; quia ipsa ignorantia est ei peccatum. Alio modo potest contingere sine culpa ipsius , putà cum doluit de peccato , sed non est sufficienter contritus. Et in tali casu non peccat sumendo corpus Christi , quia homo per certitudinem scire non potest , utrum sit verè contritus. Sufficit enim si in se signa contritionis inveniat , putà si doleat de præterito , & proponat cavere de futuris. Si verò ignorat hoc quod fecit , esse actum peccati ; propter ignorantiam facti qua excusat , putà si accessit*  
ad



*ad non suam quam credebat esse suam, non est ex hoc dicendus peccator. Similiter etiam si totaliter est peccatum oblitus, sufficit ad ejus deletionem generalis contritio, unde jam non est dicendus peccator.*

Vide Angelici Doctoris semper sibi similis constantiam & consonantiam in damnanda peccati juris naturalis ignorantia, putà fornicationis; quam tamen quidam Probabilistæ non solum bonam, sed (quod horribile dictu est) meritoriam etiam posse esse effutierunt. Vides etiam certas & incorruptas regulas, quibus dignoscere est, an & quando ignorantia peccati excusat vel accusat divinæ Eucharistiæ susceptores. Frustra ergo colores quærunt ad excusandas excusationes in peccatis, qui in mediis flagitiis nihil in se flagitiosum censentes liberos se peccatis mortiferis arbitrantur: pœnales enim cæcitates sparsæ super illicitas cupiditates, boni malique discrimen eripientes majora sunt depravatæ mentis argumenta. Perperam etiam se juxta Apostolicum mandatum probasse censendi sunt, qui solâ peccatorum recensione contenti, seridè non excutiunt aut scrutantur, num Deo se sincerè dedant, num vitam mutent, num à peccati servitute se expediant, ut in posterum ex Evangelii lege, ex Baptismi pacto mores suos componant. Quia nimirum falsis & inanibus cogitationibus Deus non capitur, non superficie voluntatis, sed internis cordis affectibus, qui in emendatiorem vitæ frugem funduntur. Nulla sanè indignæ communionis pœna terribilior stupore illo, quo quis non intelligit vitio suo post tot communioniones eandem mortaliter peccandi infirmitatem,

mitatem, eandemque proclivitatem experiri.

Infertur 4. præter contritionem sinceram insuper desiderari confessionem sacræ Communioni præmittendam. Etsi enim jus naturale exigit tantum ut sancta sanctè tractentur, quod fieri posse videtur ab eo qui vero peccatorum dolore ex amore Dei concepto permotus fuerit: Confessionem tamen postulat jus tum Ecclesiasticum, cum divinum positivum. Ecclesiasticum quidem in Tridentino *sess. 13. can. 11.* expressum pronuntiante, nemini peccato mortali contaminato licere ad Eucharistiam accedere, modò Confessoris copia non desit, antequam sacramentali confessione culpas eluerit. Idem etiam præcipere videtur jus Divinum verbis illis Apostolicis denuntiatur, *Probet seipsum homo*; quod mandatum à Deo acceperat Paulus: *Ego enim, inquit, accepi à Domino, quod & tradidi vobis.* Hoc autem præceptum de confessione tum Ecclesiastica consuetudo, tum sacra Tridentinæ Synodi authoritas interpretantur. *Ecclesiastica consuetudo*, ait Tridentinum *sess. 13. cap. 7. declarat eam probationem necessariam esse, ut nullus sibi conscius mortalis peccati, quantumvis sibi contritus videatur, absque præmissa sacramentali confessione ad sacram Eucharistiam accedere debeat.* Patres etiam Eucharistiæ susceptioni præmittendam sacramentalem Confessionem asseverantes, id ex Evangelica lege esse declarant. Videatur B. Cyprianus *epist. 10. 11. & 12.* ubi Presbyteros reprehendit, quòd Eucharistiam darent lapsis, qui nondum egissent pœnitentiam, nec peccatorum exomologesin, id est confessionem, contra Evangelii legem fecissent. *Christus Jesus,* inquit

inquit S. Leo epist. 91. *Præpositis Ecclesia hanc tradidit potestatem, ut & pœnitentibus actionem pœnitentia darent, & eosdem salubri satisfactione purgatos ad communionem Sacramentorum per januam reconciliationis admitterent.* Ubi reconciliationem Communioni ex institutione Christi præmittendam esse affirmat. Hinc in Concilio Ancyrano *can. 4.* & sequentibus, & Nicæno *can. 11. & 12.* lapsis non solum pœnitentia injungitur, sed etiam quandonam eis Communio sit concédenda, Sacerdotum eorum culpas & pœnitentiam dignoscentium arbitrio permittitur. Unde confessionem necessario præmitti oportere semper Ecclesia judicavit. Sanè si juxta Ambrosium in cap. 9. *Lucæ, Nemo cibum accipit Christi, nisi fuerit antè sanatus;* si Eucharistia sit vivorum alimonia, necessario illud Sacramentum præmittendum est, quo innocentia perdita reparatur, adeundique Sacerdotes sunt, quibus remittendorum eorum peccatorum Christus contulit potestatem.

Consultò autem dixit Concilium, *si desit copia Confessoris, & Communionis necessitas urgeat,* ne in necessitate positos, & Confessoris penuriâ laborantes tam necessariâ alimoniâ privaret. Tunc porrò non est copia Confessoris, cum nec Sacerdos adest, nec moraliter adesse potest; vel si adest, surdus est, vel linguam pœnitentis non intelligit, nisi fortè per signa & nutus totum suppleri possit. Tunc vero communicandi necessitas urget, quando ad communionem præcepto divino vel Ecclesiastico tenemur, putà in articulo mortis, in Paschate, vel quum debet Parochus celebrare, nec  
per



per alium ullo prorsus modo supplere potest. Præcipit tamen sacrum Concilium Sacerdotibus, ut si necessitate urgente absque prævia confessione celebraverint, quamprimùm confiteantur, ut omissum propter circumstantiarum angustias remedium ampliùs non differatur, foveatúrque ministrorum socordia, contra id quod scriptum est : *Maledictus qui facit opus Dei negligenter.* Specialiter autem ad promptam confessionem Sacerdotes, non laicos divinitus inspirata Synodus obstrinxit; tum quia Sacerdotes tales optat, qui quotidie, vel certè frequenter celebrare possint : ut ergo ad sacra facienda idonei reddantur & permaneant, quantociùs illos sacramentali confessione purgari imperavit. Hinc facilè judicatu est, quibus in casibus licet non præmissâ confessione tremenda adire mysteria.

Ex quibus etiam intelliges quàm damnanda sit Græcorum Sacerdotum cæcitas, qui ut refert Arcudius *lib. 3. cap. 60.* Liturgiam, celebraturi nunquam fermè etiam post patrata crimina confitentur : quem abusum Russorum Presbyteros imitari refert *lib. 4. cap. 2.* Tanti abusus, tantique sacrilegii causa hæc est, quod cùm Canones antiqui Clericos in peccatum ad mortem, & nominatim in fornicationem lapsos perpetuò ab exequutione Ordinum suspendant, eosque in sortem laïcorum redigant; ne ab officio cessent, de graduque deficiantur Græci Sacerdotes, nève scelera sua ob interdictum ministerium aliis patefaciant, ideo sacramentalem refugiunt confessionem; quasi verò idcirco magis digni magisque ad divina conficienda, tractanda, sumendaque idonei sint, quòd



quod culpas occultent suas : cum non peccata fateri , sed peccata admittere pudendum sit , & Deo occultorum scrutatori & vindici horrendum ? Nec advertunt veterem illam disciplinam præ fervore priorum temporum institutam his posse temporibus aliquâ , justâ tamen & rationabili indulgentiâ temperari. Nam idem Basilius , qui lapsos ministros à gradu & executione ministerii primitivorum Conciliorum vestigia insistentes dejicit , utraque scire monet canone 3. *Et quæ sunt summi juris , Et quæ sunt consuetudinis : sequi autem in iis , quæ summum jus non admittunt , formam traditam , hoc est consuetudinem.* Canon etiam 73. vel juxta distinctionem Græcorum 74. Si quis eorum , ait , qui peccatis à nobis supra expositis impliciti fuerunt , adhibita exomologesi probus evaserit , is cui à Dei benignitate ligandi atque solvendi potestas est credita , si ejus qui peccavit præstantiam Confessionis intuens in diminuendo pœnarum tempore clementior fuerit , non utique reprehensione dignus censebitur. Cujus moderationis causam affert can. 84. *Hac enim omnia scribimus , ut tamen fructus probentur pœnitentia.* Non enim omninò hujusmodi res tempore judicamus , sed modum pœnitentia attendimus. Longè etiam mitius erga peccatores seipsos accusantes , & mutationis signa ostendentes , quàm erga reos in malo deprehensos , vel invitos convictos se gerere Ecclesiam testatur Sanctus Gregorius Nyssenus epistola ad Lectoium Episcopum Melitensem. Quia nimirum Prælati pœnas & augere possunt & minuire , eisque potestas inest nedum pœnarum tempora pro pœnitentium contritione

minuendi, sed & pœnas etiam mutandi.

Infertur 5. quod licet in foro interiori Confessarius hos arcere debeat ab Altaribus, in quibus vera non cernit dignæ pœnitentiæ signa; attamen in foro externo non occultis, sed publicis duntaxat notoriisque peccatoribus sacra Communio deneganda est. Cum enim quilibet Christianus, inquit S. Thomas quæst. 80. art. 6. ex hoc ipso quod est baptizatus, sit admissus ad Dominicam mensam, non potest ei jus suum tolli nisi pro aliqua causa manifesta. Occulta, addit ad 1. non possunt publicè puniri, sed sunt divino iudicio reservanda. Idque confirmat quæst. 81. sequenti, art. 2. exemplo Judæ, cui Dominus corpus suum porrexit, nec à Communione repulit, quem totius impietatis extremum effecerat indignissimum. Quia Christus (verba sunt ejus) nobis debuit esse exemplum justitiæ, non conveniebat ejus magisterio, ut Iudam oculum peccatorem sine accusatore & evidenti probatione ab aliorum communione separaret, ne per hoc daretur exemplum Prælati Ecclesiæ similia faciendi. Christo (addit ad 2.) nota erat Iudæ iniquitas, sicut Deo; non autem erat sibi nota per modum quo hominibus innotescit. Et ideo Christus Iudam non repulit à Communione, ut daret exemplum tales peccatores non esse ab aliis Sacerdotibus expellendos. Soli ergo peccatores publici publicè ab Altaribus arcendi sunt.

Porro per publicos peccatores intelligendi sunt illi quorum vitia notorietate facti explorata sunt, quales sunt manifesti usurarii, concubinari, raptores, &c. vel qui tales per iudicium Ecclesiasticum vel sæculare juridicè declarati sunt.

sunt. Neque enim, ut Cyprianus *epist.* 71. ait, vel Majestati divinæ, vel Evangelicæ disciplinæ congruit, ut pudor & honor Ecclesiæ tam turpi & infami contagione fœdetur. Quare ante pœnitentiam publicam & manifestam, quæ ita sit nota ut notum est crimen, non est hujusmodi criminosis Eucharistia concedenda. Monet tamen S. Doctor publicis peccatoribus præcipuè in articulo mortis Communionem non esse denegandam. Quod & antea Concilium Carthaginense III. *can.* 35. statuerat his verbis: *Scenicis atque histrionibus, ceterisque ejusmodi personis, vel apostatis conversis ad Deum reconciliatio non negetur.*

Dices: Peccator occultus non habet jus petendi Eucharistiam. Ergo non tenetur Sacerdos peccatori occulto sibi noto Eucharistiam impartire. Sanè qui habet enssem apud se depositum, furioso illum repetenti ad occidendum restituere non tenetur, sed ei potius denegare, ne homicidii reus sit, omnino debet: quidni corpus Domini in condemnationem suam petenti Sacerdos recusabit?

Respondeo peccatorem peccato suo jus quidem ad Eucharistiam in foro interiori amisisse; at in externo, juxta quod Ministri in functionibus secundùm allegata & probata operantur, jus illud amisisse non constat. Unde Sacerdos qui ut publicus Christianæ Reipublicæ Minister, & bonorum ejus œconomus agit, secundùm publicam, non verò secundùm privatam scientiam se gerere tenetur. Exemplum autem gladii occulto sicario denegati multifariam dispar est. Tum quia custos ensis non est minister publicus, potestque juxta privatæ scien-

tiae lumina boni communis intuitu operari. Tum quia retinendo gladium nullam petenti, cui denegat, creat infamiam: Sacerdos verò occultum peccatorem ad sacram mensam publicè accedentem suâ repulsâ infamaret. At nemo potest occultum peccatorem propalare: & licet gravius sit indignè Communionem usurpare, quàm peccatorem occultum dedecorare; nullum tamen malum faciendum est ut veniant bona, vel ut majora mala impediantur. Tum demùm, quia denegato gladio vitatur homicidium: at subtractione Communionis etsi externum sacrilegium impediatur, internum tamen, in quo tota malitia sita est, non vitatur. Ergo grandis interest inter utrumque casum differentia. Illud tamen facilè probaverim, quod si aliqua ita honesta & speciosa excusatio prætexi posset, ut nullum infamandi peccatoris, ejusque occulti criminis prodendi periculum subesset, Communionem posset prudens Sacerdos peccatori occulto publicè petenti denegare. Sed rarissimus est casus, in quo prudentia & discretio superemineat necesse est.

Cavendus autem hîc diligenter est quorundam ignorantium error, qui ad evitandum indignè communicantium sacrilegium hostiam non consecratam porrigendam opinantur. Sed hæc existimatio etsi fortè à pietate profecta, tolerari non debet. Tum quia sumentis & præsentibus hostiam proponere adorandam, cui nullus cultus debetur, nefarium est, & idolatriam veræ Religioni sufficere sacrilegium. Tum quia corpus Christi se præbere verbis factisque Sacerdos significat: quod mendacium intrinsecè malum cum sit, nullâ potest intentione



tionem honestari. Tum quia non vitatur sacrilegium suscipientis ; qui enim credit se hostiam consecratam indignè accipere , profectò corporis & sanguinis Domini reus efficitur ; malà quippe voluntate reus quisque efficitur , nec à sacrilegii scelere eximitur , qui sacrilegium voluit , licèt rem sacram per accidens non inveni-  
nerit. *Licèt is , ut habetur extra de celebratione Missarum , qui pro sui criminis conscientia reputat se indignum , peccet graviter si se ingerat ; gravius tamen videtur offendere , qui illud præsumpsit simulare.*

Infertur 6. occulto peccatori occultè petenti negari posse Eucharistiam , ut docet S. Thomas in 4. dist. 9. quæst. 1. art. 5. quæst. 1. Quia nimirum tunc non propalatur delictum , nec ulla petenti accersitur infamia : non iniustitiæ ergo , sed magnæ charitatis est Eucharistiam sacrilego illi denegare. Quod verum esse ait ibidem S. Doctor , *etiamsi. Sacerdos sciat peccatum alicujus per confessionem.* Nec propterea sigillum confessionis aperiet , nec exprobrabit delictum in confessione cognitum , sed merè negativè se habebit : neque hoc fiet crudeliter , sed misericorditer , ne perire volenti auxilium mortis conferat : sicut denegare illi gladium potest , quo ad mortem inferendam uti velle ex confessione novit. Sed de his magis dum de sigillo confessionis.

Infertur 7. reos morti adjudicatos Eucharistiæ esse capaces , si modò verè pœniteant , & peccata confessione sacramentali eluerint. Ita enim sacri Canones declararunt , ut habetur cap. quæsitum, 13. q. 2. *Quæsitum est ab aliquibus fratribus , de his qui in patibulis suspenduntur*

*pro suis sceleribus post confessionem Deo peractam, utrum cadauera eorum ad Ecclesias deferenda sint, & Missa celebranda, an non? Quibus respondemus, si de omnibus peccatis suis puram confessionem agentibus & dignè pœnitentibus Communio in fine secundùm præcepta Canonum danda est, cur Canones communionem vel sepulturam eis interdiciunt, qui pro peccatis suis pœnam extremam persolvunt, & confitentur vel confiteri desiderant? Hinc in pluribus Christiani orbis regnis reis capitali sententiâ damnatis Eucharistia porrigitur. In Italia quidem, ut patet ex diplomate Beati Pii V. quo Confraternitas de Misericordia confirmatur; atque ex Concilio V. Mediolanensi sub Sancto Carolo celebrato, in quo etiam Christiani Iudices & Magistratus laudantur curantes, ut ne eo die capite damnati supplicio afficiantur, quo ad modum viatici cœlesti corporis Christi cibo refectioni sunt. In Hispania etiam morem illum vigere testatur Sylvius *quæst. 80. art. 6. quæsito 1.* & Marcus Serra in suis in hanc quæstionem commentariis.*

At verò in Ecclesia Gallicana consuetudo illa dudum desit. Credibile etiam est Patres nostros piis rationibus permotos morem illum abrogasse: tum ut Eucharistiæ subtractione aliis criminosis timor incuteretur, & eâ pœnâ, quæ Christianis maxima est, à peccandi facilitatè cohiberentur. Tum quia experienciâ rerum magistrâ compererunt, rarissimè huiusmodi sceleratos ad dignam Communionem satis esse compositos, qui de salute animi parùm solliciti, & crimen inficiari, & actores odisse, & testes infamare, & iudices detestari usque ad locum supplicii

supplicii sæpius solent. Dedeceret autem in infami supplicii theatro, in quo duntaxat odia & simultates deponunt, adorandum Christi corpus circumgestare & ministrare: & præter quod in illis repentinæ mortis terroribus nec animus satis est sibi compos, corpus etiam torturis debilitatum mortisque metu oppressum ad manducandum sacrum epulum haud idoneum est. Nec expediret corpus à carnifice ignominiosè tractandum, avibus, canibus, lupis, aliisque feris quamprimùm exponendum, Christi Domini receptaculum & tabernaculum fieri: redundaret quippe in hospitem divinum hospitio illata injuria; & Domini præsentiam consecratam arcam discerpere, & inhonorare, sine Sacramenti contumelia non contingeret. Canones ergo suprà laudati intelliguntur, quando inter supplicii & confessionis dies tanta intercapedo interest, ut rei & pœnitentiæ fructus edere, & mortem patienti animo subire, & ad Communionem necessariis virtutum christianarum exercitationibus se apparare facile possint. Tunc enim nihil causæ erit, cur Canones præfati non observentur.

Ex quibus obiter intelliges vulgi sententiæ periculum, existimantis securam & tutam esse hominum ultimo supplicio adjudicatorum mortem, utpote minimè inopinatam, & ad extremum usque spiritum rationis & judicii facultate gaudentem. Unde ortum est commune adagium: *Sicut nunquam difficilius quàm ex aquis submergentibus; ita nunquam facilius quàm è patibulo in cœlum conscenditur.* Et aliud ei affine: *Submersorum vix unus non perit; suspensorum vix unus æternum perit.* Nescio



ubinam Scripturarum, Patrum, vel Conciliorum securitatem istam legerint.

Ego contra apud Augustinum homil. 4. legi: *Non præsumo, non vos fallo. Fidelis benè vivens securus hinc exit: baptizatus ad horam securus hinc exit: agens pœnitentiam, & reconciliatus cum sanus est, & postea benè vivens, securus hinc exit. Agens pœnitentiam ad ultimum, & reconciliatus, si securus hinc exit, ego non sum securus. Unde securus sum, securus sum, & do securitatem: unde non sum securus, pœnitentiam dare possum, securitatem dare non possum. Vis te de dubio liberare? Vis quod incertum est evadere? Age pœnitentiam dum sanus es. Tene certum, dimitte incertum.*

Legi apud eundem Augustinum serm. 57. de tempore: *Nec illud servet quis ex vobis conscius criminum suorum, ut in extremo vita sua tunc pœnitentiam petat, quando jam agere non possit: inutilis est enim, dilectissimi, ista persuasio. Parum est peccatorem pœnitere, nisi pœnitentiam peregerit. Datur quidem etiam in extremis pœnitentia, quia non potest denegari: sed authores tamen esse non possumus, quod qui sic petierit, mereatur absolvi. Quomodo enim agit pœnitentiam lapsus? Quomodo agit pœnitentiam in extremis vita finibus constitutus? Quomodo pœnitentiam agere possit, qui nulla jam pro se opera satisfactionis operari potest? Et ideo pœnitentia, qua ab infirmo petitur, infirma est. Pœnitentia que à moriente tantum petitur, timeo ne ipsa moriatur. Et ideo, dilectissimi, quicumque invenire vult misericordiam Dei, sanus agat pœnitentiam in hoc saculo, si sanus esse vult in futuro.*

Legi etiam apud Augustinum singularem casum



sum nostrum tractantem, ideò Episcopos pro-  
reis damnatisque deprecari, ut vitâ iis produ-  
ctâ pœnitendi spatium non deesset. Nullo modo,  
inquit epist. 54. *culpas quas corrigi volumus ap-  
probamus; nec quod perperam committitur, ideo  
volumus impunitum esse, quia placet: sed homi-  
nem miserantes, facinus autem seu flagitium de-  
testantes, quando magis nobis ipsis displicet vi-  
tium, tantò minùs volumus inemendatum perire  
vitiosum.* Morum porrò corrigendorum nullus  
alius quàm in hac vita locus est; nam post hanc  
vitam quisque id habebit, quod in hac sibi met  
conquisierit. Ideo compellimur humani generis  
charitate intervenire pro reis, ne istam vitam sic  
finiant per supplicium, ut non possint finire sup-  
plicium.

Si tantularum horarum spatio ad mortem  
sanctè obeundam possint vel nocentissimi post  
flagitiosæ totius vitæ curriculum comparari, si  
à supplicii ignominia tam facilis & secura sit ad  
æternam gloriam via & profectio, cur de vita  
reis producenda, ut protracto vitæ spatio, pœ-  
nitendi, Deique placandi tempus suppeteret,  
tantoperè Patres fuere solliciti? Cur rem esse  
plenam periculi arbitrati sunt, conversionem  
in extremum vitæ diem dilatare? Cur eam  
sic peractam suspectant parumque tutam ha-  
buerunt; eamque securam dixerunt, quæ *juxta*  
*tempore*, ut Cyprianus ait, diuturnarum la-  
rymarum vi diuturna flagitia elugente & eluente  
agitur? Cur paucula momenta multorum an-  
norum debitis exsolvenda vix satis esse saltem  
de viâ ordinaria crediderunt; & subitanæ  
pœnitentiæ abundantiam quæ Deo pauculo  
tempore satisfaciat, inusitatâ divinæ misericordi-

cordiæ miraculis accensuerunt? Sed de his iterum dum de pœnitentia.

*Corporis ad Eucharistiam preparatio.*

Corpus etiam, quod animatum Christi tabernaculum futurum est, congruis atque ab Ecclesia Deo afflante institutis dispositionibus apparari oportet.

In primis corpus non debet eâ infirmitate laborare, ex qua tanti Sacramenti irreverentia meritò timeatur: putà si infirmî tanta esset stomachi vel pectoris ægritudo, ut præ vomitus, tussisque frequentia Sacramentum nec deglutire, nec retinere posset. Eucharistiæ enim suscipiendæ præceptum solos manducare valentes astringit: manducare autem non posse jure merito ille censetur, qui porrectum cibum nec sorbere valet, nec sorptum retinere. Affirmativum etiam recipiendi Viatici præceptum negativo de nunquam irreverenter tractanda Eucharistia cedit.

Præterea talis desideratur corporis munditia & nitor, talisque totius externi habitûs modestia, ut in omnibus motibus nihil fiat quod cujusquam offendar aspectum, sed quod christianam sanctitatem, & tanti mysteriorum reverentiam deceat. Etsi autem rationabile & quodammodo religiosum videatur per diem Communionis in vestitu nitidiore prodire, & habitu corporis cultiore & ornatiore hilaritatem mentis ostendere; sicut etiam vasa sacra & altaria in honorem Sacramenti propensiore curâ mundantur: duo tamen sunt quæ probari nequaquam possunt. Primam enim tolerari non potest

potest effœminatus mollisque quorundam vel quarundam ornatus, meretrici aut saltatrici magis congruus quàm Christiano aut Christianæ. Sanè nihil turpius quàm corpus nostrum Christi sumptione consecrandum his prophanis nugis dehonestare, quæ mentem Deo vacuum mundoque plenam, & cor inanissimum demon-  
strant. Alterum non minùs cavendum corrigendumque per grandem abusum irrepere interdum solet; cùm nimirum die susceptæ Eucharistiæ nonnulli carnali otio vacantes, totum tempus, quod piis exercitationibus transigendum erat, in ludis, aleis, spectaculis, choreis, conviviis, accepti doni obliti consumunt. Et tamen, si Superis placet, devotos haberi & audire volunt.

Tertiò mundi corporis dispositio exigit, ut accedens ad Eucharistiam non fuerit nocturnâ pollutione, exceptis quibusdam casibus citra culpam contingentibus tœdatus. Postulat hæc dispositio, ut exponamus doctrinam S. Thom. q. 80. art. 7. ubi præclaras in hanc rē regulas præscribit.

Prima regula: *Quotiescunque pollutio nocturna est peccatum mortale, Communionis usum ex necessitate impedit.* Tunc autem pollutio est peccatum mortale, quando adest voluntatis consensus, vel quando ex cogitationibus, imaginationibus, vel sermonibus impudicis ultrò susceptis proficiscitur. Si enim peccatum mortale usum Eucharistiæ impedit, à fortiori pollutio ex peccato lethali consequuta, quæ culpæ corporis immunditiam, & mentis hebetudinem superaddit.

Secunda regula: *Quoties pollutio nocturna sine peccato contingit, sacram Communionem*



*non impedit ex necessitate.* Tunc verò peccatum non intervenit, quando lascivæ cogitationes prorsus involuntariæ & in se & in sua causa sunt; quando etiam aliquis causâ lectionis, disputationis, ministerii Confessionis ea revolvere cogitur, unde imaginatio, & deinde corpus repugnante voluntate fœdatur; quando demùm pollutio ex causa merè naturali, putà infirmitate, jejunio & vigilia accendente sanguinem, vel naturæ superflua ejiciente expultrice facultate ortum habet.

Tertia regula: *Pollutio quæ ex sola. demonum justos à Communione ejusque fructibus arcere volentium nequitia oritur, nullatenus suscipienda Eucharistia impedimento est.* Unde in collationibus Patrum, collat. 22. legitur Fratrem quendam arte & factiosâ ludificatione demonum diebus festis, quibus usurpanda de more monasterii Communio erat, obscœnis illusionibus divexari, & pollutione inquinari solitum, de seniorum & divino lumine perfusorum Patrum consilio ab Eucharistia statis diebus frequentanda minimè, uti trepidus cœperat, abstinuisse, & maligni spiritus insidias in sumum evanuisse.

Quarta regula: *Pollutio per se & naturâ suâ ex quadam congruitate impedit pro illa die Communionem, nisi necessitas, vel obedientia, vel magna utilitas, aliâve pia causa aliud suadeant.* Ratio est, tum quia reverentiam Sacramenti non decet fœditas illa corporalis ex immundo fluxu consequuta; si enim lavare manus præcipiuntur qui sacra tractaturi sunt, quantò magis à pane Angelorum recedere debet non nominandis fordibus infectus? Excipe  
nisi



nisi fluxus esset præ infirmitate vel continuus, vel certè frequentissimus. Tum quia pollutio nocturna ordinariè ex immundis cogitationibus nascitur, sive inter dormiendum excitatis, sive in vigilia immisissis. Unde mentis evagatio, cordis dissipatio, orationis ariditas, fervoris imminutio interdum sequuntur. Quæ omnia sponsi veturi lectulum virtutibus floridum nonnihil deturpant. Unde D. Thomas in 4. dist. 9. quest. 1. art. 4. quasiunc. 2. docet quod quando nullus pollutionis consensus præcessit, potest quis urgente necessitate aut ratione potiore suadente celebrare: *Aliàs, inquit, si necessitas non incumbat, videtur non exhibere debitam reverentiam Sacramento; non tamen si celebrat, mortaliter peccat, sed venialiter.*

Excepimus tamen casus non solum malitiæ dæmonum insidiantium, sed etiam necessitatis, utilitatis, præcipuè obedientiæ, devotionis publicæ, aliarumve causarum, quæ viris piis non rarò accidunt. Exceptio hæc traditur à B. Gregorio epistola ad Augustinum Anglorum Episcopum, responsione ad undecimam interrogationem, ubi sic habet: *Cum ex natura superfluitate vel infirmitate evenerit, omni modo hæc illusio non est timenda; quia hanc animus nesciens pertulisse magis dolendus est, quam fecisse. Cum verò ultra modum appetitus gula in sumendis alimentis rapitur, atque idcirco humorum receptacula gravantur, habet exinde animus aliquem reatum, non tamen usque ad prohibitionem percipiendi sacri mysterii, vel Missarum solennia celebrandi, cum fortasse aut festus dies exigat, aut exhibetur mysterium pro eo quod Sacerdos alius in loco deesse ipsa necessi-*

tat

*tas compellit. Nam si adsunt alii, qui implere mysterium valent, illusio per crapulam facta à perceptione sacri mysterii prohibere non debet; sed ab immolatione sacri mysterii abstinere, ut arbitrator, humiliter debet, si tamen dormientis mentem turpis imaginatio non concusserit.*

*Quinta regula: Post pollutionem mortalem nullus etiam confessus & absolutus eodem die sacram mensam adire debet. Ita expressè D. Thomas in 4. dist. 9. citata, in responsione ad secundum argumentum, ubi crimine pollutis, tamen contritis, intervallum aliquod præscribit anteaquàm ad Eucharistiam accedant. Non esset consulendum alicui, inquit, quod statim post peccatum mortale etiam contritus & confessus ad Eucharistiam accederet, sed deberet, nisi magna necessitas urgeret, per aliquod tempus propter reverentiam abstinere. Sed de his capite sequenti, ubi de frequenti communione, operosius disputabitur.*

*Quartò corporis mundities ad altare apportanda petit, ut copula conjugalis, sive illa debitum reddendo; sive illa, & multò magis, debitum petendo contingat, toto Communione die intermittatur. Etenim ex illa non minus, sed longè magis quàm ex pollutione involuntaria fœditas corporalis & mentis divagatio consequuntur. Sanè, ut optimè post Hieronymum D. Thomas *quest. 80. art. 7. ad 2.* argumentatur, si panes propositionis ab his qui uxores tetigerant, comedi non poterant, quantò magis panis, qui de cœlo descendit, non potest ab his qui conjugalibus paulò antè vacavere amplexibus, violari atque contingi? Neque propterea nuptias condemnamus, sed in tanti*

*revera*

reverentiam Sacramenti à Christianis petimus, ut eo die Agni immaculati carnes non comedant, quò à carnalibus operibus non desistunt. Congruit ergo hujusmodi hominibus dilationem aliquam suadere, quanvis si copula procreandæ tantùm gratiâ prolis acciderit, post datum pietatis consilium tales, ut Gregorius ait, suo sunt judicio relinquendi.

Si verò copulæ non generandæ prolis vel debiti reddendi causâ quis operam dederit, sed una eò in opere voluptas dominata fuerit, tunc eo die sacram mensam invadere non debet, alioquin in peccatum veniale incurret; causa enim voluptatis, quæ per se peccatum saltem veniale est, non est illis causis potioribus annumeranda, quæ ut loquitur S. Thomas *in 4. dist. 9. relata*, æctum reformare seu purgare possunt. Itaque conjugati omni industriâ, quantum in illis est, studere debent, ut immaculatam castimonix puritatem illo vel maxime tempore teneant, quo venerandæ assistere mensæ, & sacrosanctam ac salutarem escam percipere optant, ut ad gratiam cibi salutaris confidenter accedant, & corporis Christi realiter præsentis, realemque munditiam postulantis participes facti, medicinâ tam divini remediû non fraudentur.

*Jejunium ad sacram Communionem, exceptis paucis extrema necessitatis articulis, semper necessarium.*

Hæc est ultima corporis dispositio, quam irrident hujus temporis hæretici Lutherani, omnium quidem Catholicæ Christi Ecclesiæ rituum hostes, sed jejuniū potissimum inimici, cui post ablegatum cœlibatum consequenter quidem, sed impiè tamen bellum indixerunt. Approbant quidem Calvinistæ Eucharistiam à jejunis sumi: nolunt tamen de hac circumstantia, sicut & de aliis jure divino non institutis nos esse sollicitos, rati nullum nisi à Deo præceptum Christianis posse imponi. At ve! Lutherus hæreticorum omnium impudentiam procacitate sua vincens *lib. de abroganda Missa privata*, consuetudinem Ecclesiæ jejunium ad Communionem requirentis, & non jejunos velut indignos ab Altaribus arcentis, *furorem* *furore furosiorem* ipse furibundus appellat; laudatque cibum moderatum ante Eucharistiam acceptum, quo os mundetur, caput sublevetur, halitus fortassis graveolentior purgetur, rheuma temperetur, fiatque homo corpore & animo compositissimus. Hi sunt novī Galeni aut Hippocratis, vel potiùs Nabuzardami aphorismi, si Superis placet, apparando ad Eucharistiam Christiano peridonei.

At enim jejunos ad sacram mensam nos accedere oportere Ecclesia Catholica docet, ita ut saltem à dimidia antecedentis diei nocte usque ad illud temporis punctum, quo Eucharistiam



rístiam accipimus , nihil omninò comederimus , aut biberimus. Hæc enim perpetua fuit Ecclesiæ praxis , cujus luculentissimus testis est Augustinus epistola 118. ad Janvarium : *Liquidò apparet , inquit , quando primùm acceperunt discipuli corpus & sanguinem Domini , non eos accepisse jejunos. Nunquid tamen propterea calumniandum est universa Ecclesia , quòd à jejunis semper accipitur ? Et hoc verò placuit Spiritui sancto , ut in honorem tanti sacramenti prius in os Christiani corpus dominicum iatraret , quàm ceteri cibi ; nam ideo per totum orbem mos isto servatur. Vides , Augustino attestante , Eucharistiam à jejunis semper , per totum orbem , ab universa Ecclesia accipi. Irridet hæresiarcha Lutherus hanc rationem libro superiùs memorato. Festiva , inquit , ratio. Fortè nec nebulam , nec aërem prius intrare licet os Christiani , ut Sacerdotibus respiratione & vita interdicaretur ? Verùm hanc non festivam , sed insanam responsionem & inscitiam stupendam , nebulam & aërem à cibo non discernentem occupaverat & præfocarat cā epistola Augustinus hac duplici regulâ orthodoxâ : Illa qua non scripta , sed tradita custodimus , qua quidem toto terrarum orbe observantur , dantur intelligi vel ab ipsis Apostolis , vel plenariis Conciliis , quorum est in Ecclesia saluberrima auctoritas , commendata atque statuta retineri. Alteram Augustinus regulam sic statuit : Si quid tota per orbem frequentat Ecclesia , quin ita faciendum sit disputare insolentissima insania est. Qua duplici regulâ totus Lutheranismus ad nihilum prorsus redigitur. Hujus etiam moris meminit Tertullianus lib. 2. ad uxorem , cap. 5. Cyprianus epist. 63.*

*epist. 53. Chrysostomus homil. 27. in priorem ad Corinthios, ubi: Tu autem, inquit, priusquam quidem communices jejunas, ut quomodocumque dignus appareas. Hinc Concilium Constantiense sess. 13. Licet, inquit, Christus post cœnam instituerit hoc venerabile Sacramentum, tamen sacrorum Canonum autoritas & approbata consuetudo Ecclesia servavit & servat, quod hujusmodi Sacramentum nec conficiatur post cœnam, nec sumatur à non jejunis nisi in casu infirmitatis aut alterius necessitatis à jure vel Ecclesia concessio vel admissio.*

Triplicem porrò hujus Ecclesiastici præcepti congruentem rationem affert Angelicus Præceptor *quæst. 80. art. 8.* Primùm id postulat honor cœlesti cibo debitus; etsi enim quod intrat in os non coinquinat hominem interiore, corpus tamen quadantenus commaculat cibus corruptibilis: ut ergo os mundum & labia puri pani Angelorum offeramus, consentaneum & decorum est ab omni nos cibo potuque vacuos ad sacram mensam accedere. Secundò voluit eo jejunii instituto Ecclesia significare illis vel maximè abstinendum esse ab iniquitatibus, illicitisque cupiditatibus, quibus cibus per se licitus interdicitur, ut sicut divinus hic cibus primò in os stomachumque trajicitur, ita primum in corde locum amor Christi obtineat, ut in charitate radicati & fundati regnum Dei primùm quæramus, & unum necessarium præcipuo studio sectemur. Tertiò si ante Communionem edendi bibendique licentia omnibus fieret, immineret non semel vomitus, ebrietasque, vel certe dissolutionis, aut vanæ lætitiæ ex ciborum usu sponte flantis periculum, non

non sine tantarum rerum tractandarum majestatis injuria vel irreverentia à piis manibus tum maximè præcavenda, cum Sanctum sanctorum, in cujus conspectu columnæ cœli tremunt, adeundum est. Quartam rationem subindicat B. Thomas in responsione ad 6. Quia maxima devotio in hujus sumptione Sacramenti desideratur, quâ effectus hujus Sacramenti, spiritualis nimirum refectio mentisque pinguedo percipiatur. Quæ sanè spiritus suavis tenerrimusque divinorum sensus à jejunis potissimum capitur: jejunium enim, uti Patres docent, & experienciâ compertum est, multiloquium pietatis hostem fugit, silentium devotionis fomentum ambit, mentem elevat, sensum purgat, concupiscentiæ nebulas dispellit, libidines extinguit, castitatis & orationis lumen accendit. Unde illud à Bernardo alicubi scriptum: *Jejunium orationem, devotionem, & fiduciam donat. Oratio virtutem impetrat jejunandi, & jejunium gratiam meretur orandi. Jejunium orationem roborat, oratio sanctificat jejunium, & Domino repræsentat.*

Sed dices: Christus institutam post cœnam Eucharistiam discipulis utique non jejunis distribuit; Apostolos etiam primis Christianis Eucharistiam post cœnam porrexisse indicat Paulus 1. Cor. II. *Cùm convenitis, inquit, ad manducandum* (scilicet corpus Domini) *invicem expectate. Si quis esurit, domi manducet. Convenientibus vobis in unum, jam non est Dominicam mensam manducare. Unusquisque enim suam cœnam præsumit ad manducandum. Et alius quidem esurit, alius autem ebrius est. Nunquid domos non habetis ad manducandum*

&



*Et bibendum ?* Quibus verbis docere videtur Apostolus , quod postquam aliquis domi manducaverit , possit in Ecclesia corpus Christi manducare ; vel certè commune charitatis convivium Eucharistiæ participationem tum temporis antecessisse , subindeque eam à jejunis non fuisse perceptam.

Respondeo Christum specialibus de causis, atque loci, temporis, & rerum circumstantiis id ita exigentibus Eucharistiam non jejunis distribuisse. Tum quia , ut Augustinus epistolâ citatâ ad Janvarium , & post eum S. Thomas docet , quæ ab amicis recedentibus ultimò dantur , vehementiùs commendantur : ut ergo magnitudo immensi beneficii , quo Christus discipulos in finem dilexit , discipulorum cordibus & memoriæ altiùs infingeretur , profundiusque impressum infiniti amoris pignus magis in veneratione haberetur , eo opere cætera quæque coronare , subindeque post ultimam cœnam instituire & porrigere voluit. Tum quia Eucharistiam per modum testamenti, quod in extremis fieri solet , Christus instituit. Tum quia ut *libro de corpore Domini, cap. 20.* Paschasius tradit , Apostoli ideò jejuni jam non erant, quia necesse erat ut pascha typicum priùs compleretur , & deinde ad verum paschæ Sacramentum transirent. Quæ rationes singulares non probant resectis vel cœnatis Eucharistiam modò esse porrigendam. Unde , ut ibidem ait Augustinus , id nobis Christus minimè imperavit , sed iudicio Apostolorum , per quos Ecclesias dispositurus erat , totum permisit. Num si hoc Christus instituisset , ut post cibos alios semper Eucharistia acciperetur , profectò

morem.



morem illum tota Ecclesia à Spiritu sancto continenter gubernata non variasset.

Ad locum Apostoli dicendum in primitiva Ecclesia ad exemplum ultimæ Domini cœnæ commune charitatis convivium, quod Agape dicebatur, solenni more celebrari solitum fuisse, in quo pauperes æquè ac divites dapibus, personarum discrimine abdicato reficiebantur. In eam autem communem refectionem charitate suggerente inchoatam reprehensâ à Paulo abusus irreperant, quod nimirum pauperes à divitibus non expectarentur, aliisque ebriis alii esurirent. Quo autem ordine celebraretur Eucharistia cum agapis, varii variè exponunt. Opinantur nonnulli Eucharistiam medio in convivio inter epularum lautitias fuisse usurpatam. Verùm sicut irreligiosa fuisset hæc prophanorum cum sacris commixtio, ita ab omni verisimilitudinis specie deserta est illa sententia. Græci post S. Chrysostomum arbitrantur Eucharistiæ usum convivarum epulas antevertisse. Quo supposito nulla superest in argumento difficultas. S. Augustinus epistolâ memoratâ docet post commune convivium sacram Communionem fuisse celebratam: si enim Eucharistiæ usus præcessisset, non dixisset Apostolus fideles se invicem non expectare, & unumquemque suam cœnam, id est asportata in Ecclesiam edulia præsumere, id est aliis non expectatis manducare; quia si omnes sacræ Communioni convivium antecedenti interfuissent, nullus fuisset absentium expectandorum locus, vel propter aliquos non expectatos culpa admitta. Accedit, docere Apostolum indignè eos communicare, qui præter & contra modum convivio

convivia illa usurpabant : indignam autem communionem non sequentia, sed antecedentia peccata faciunt.

Hoc supposito duo respondere possumus: Primum, Christianos Christi exempli imitandi prætextu convivium sacrae Communioni à Pseudoapostolis, vel proprio errore deceptos præmisisse. Quem errorem correcturus Apostolus ait : *Qui esurit, domi manducet* ; id est, si expectare præ esurie jejunos non potest, domi cibos suos manducet, nec postea Eucharistiam sumat tamen. Secundò dici potest, nondum tunc ab Apostolis institutam fuisse jejunii Communioni præmittendi legem, ac proinde Christianos licitè post cœnam sacrum panem fregisse & accepisse : ex quo cum plures abusus etiam in illis primitivi Christianismi fervoribus ortum habuissent, ejusmodi abusus corrigit Apostolus ; cætera, ut ipse eodem capite ait, cum venerit dispositurus ; cætera, inquam, ad dignam, honestam, & consentaneam tractandorum & usurpandorum sacrorum mysteriorum praxim & methodum spectantia, ex quibus unum, ut Augustinus tradit, erat jejunium sacrae communioni præmittendum, quod universa per orbem servat Ecclesia, quodve nullâ morum diversitate variatur.

Verum quidem est, alicubi à nonnullis aliquando observatum, ut ad Dominicæ cœnæ repræsentandam memoriam in illius diei festo anniversario Eucharistiam cœnati reciperent : unde in Concilio Carthaginensi III. *can. 29.* sic legitur : *Ut Sacramenta Altaris non nisi à jejunis hominibus celebrentur, excepto uno die anniversario, quo cœna Domini celebratur.* Cujus consuetu

consuetudinis meminit Augustinus epistola ad Janvarium sæpe relata, ejusque probabilem fuisse rationem ait. Meminit etiam Cyprianus *epist.* 63. Viguisse etiam morem illum apud Ægyptios, authores sunt Socrates *lib. 5. cap. 21.* Sozomenus *lib. 7. cap. 19.* & Nicephorus *lib. 11. cap. 34.* Nihilominus tamen mos ille particularis fuit abrogatus nedum contrariâ & universaliori consuetudine prævalente, sed etiam expressè revocatus in sexta Synodo in Trullo celebrata, *can. 29.* & Bracarenfi I. *can. 10.* *Si quis feria paschali, quæ vocatur Cæna Domini, hora legitima post nonam jejunus Missas non tenet, sed secundum sectam Priscilliani, festivitatem ipsius ab hora tertia per Missas defunctorum soluto jejunio colit, anathema sit.* Solebant enim nonnulli occasione Missarum pro defunctis gustato cibo & potu Eucharistiam conficere, cujus abusus meminit Concilium Bracarense II. *can. 10.* *Cognovimus quosdam Presbyteros in hujus presumptionis audacia retineri, ut Missas mortuorum etiam post acceptum merum vel oblationem ausi sint consecrare. :: Si quis Presbyter post hoc edictum nostrum amplius in hac vesania fuerit deprehensus, hoc est non jejunus, sed quocumque cibo presumpto oblationem consecraverit in Altari, continuo ab officio suo privatus à proprio deponatur Episcopo.* Et in Concilio Toletano VII. *can. 1.* postquam statutum est in eventu languoris Presbyteri ministrantis & consecrantis, posse alium consecrationem exequi officii cœpti; additur tamen: *Ne tamen quod natura languoris causâ consulitur, in presumptionis perniciem convertatur, nullus post cibum potumque quâlibet minimum sumptum*

*Missus facere præsumat. Qui contra fecerit, excommunicetur.* Hinc generaliter agapes in Synodo VII. citata universim *can. 74.* interdictæ sunt: *Non oportet in Dominicis locis vel Ecclesiis charitates quas vocant facere, & intus in ade comedere, & accubitus sternere. Qui hoc fecerint, cessent, vel excommunicentur.*

Dices iterum: Tota, vel certè præcipua imperandi ante Communionem jejunii ratio à Sacramenti debita reverentia depromitur. At moderatus cibus in minima præsertim quantitate sumptus exhibendæ sanctissimo Sacramento reverentiæ non adversatur: tum quia cibus modicissimus sobrietatem non lædit, nec jejunium Ecclesiasticum frangit. Tum quia modico cibo recreatis viribus communicantium & celebrantium, validior esset interior anima sacra meditantis conatus. Tum demùm quia non minor reverentia sumpto quàm sumendo Sacramento debetur, quam potius ex reali Christi præsentia augeri oportet. Ergo sicut post sumptum licet comedere Sacramentum, ita & ante sumendum.

Respondeo præter reverentiam interiorem, quâ corpus Christi tenemur excipere, desiderari etiam exteriorem, quæ internæ signum est & incentivum: modus porrò exterioris reverentiæ ille potissimus, cæterisque omnibus anteponendus est, quem sancta Ecclesia divinitus inspirata, & Patrum traditioni innixa præscribit. Cùm ergo jejunium sacrae communioni Ecclesia præmitti imperet in significationem reverentiæ Christo à se exhibitæ, contra venerationis Christo debitæ officium peccat, qui Eucharistiam post aliquid comestum, vel  
potatum



potatum accipere præsumit. Iis enim Christus gaudet obsequiis honorari, non quæ de proprio arbitrari quispiam confingit, sed quæ vel ipse præcipit, vel Ecclesia sponsa sua gratissimis filiis suis injungit. Quare licet modico cibo non violetur jejuniū Ecclesiasticum, quod ad macerandam carnem institutum cum sit, micâ panis vel haustu aquæ corpori nihil nutrimenti præbentibus nequaquam frangitur: attamen Eucharistiæ præmittendum esse jejuniū naturale, quidquid trajicitur per modum cibi aut potus excludens, Ecclesia in honorem hujus Sacramenti, aliisque de causis sapientissimè imperavit.

Robur autem corporale ex modico præsumpto cibo proficiscens, aliis longè majoribus utilitatibus ex jejuniō sponte manantibus concedit ( ut secundæ instantiæ fiat satis. ) Carnis enim mundities & afflictio ex jejuniō consequuta vitiorum morbos aufert, carnis passiones amputat, criminum causas & concupiscentiæ nebulas propellit. Denique vacuato ventre moderatione jejunii, exoneratus animus ad alta pertendit; conscendit ad virtutes, & ad ipsum nititur pietatis authorem totus aliger pervolare. Hinc Chrysologus *serm. 31.* explicans quomodo ad communionem jejuniū disponat, sic egregiè habet: *Sicut utres pellium ab omni squallore purgantur, & pigmentis liniuntur odoratis, ut saporem vini possint inviolabilem custodire; ita jejuniis corpora humana ab omni carnalium delictorum squallore purgantur, & sunt utres divinis torcularibus apti, ut de prælo crucis accipiant vinum novum, & incorruptam novitatem conservent.*

Ad id quod ultimò obijcitur de jejunio post Eucharistiam peræquè atque antè servando, responderetur cum S. Thoma *ad 6.* quod maxima devotio requiritur in ipsa sumptione tanti Sacramenti, quia tunc percipitur Sacramenti effectus. Quæ quidem devotio magis impeditur per præcedentia, quàm per sequentia: & ideo potius ante sumendam quàm post sumptam Eucharistiam jejunium institutum est. *Debet tamen*, inquit Doctor piissimus, *esse aliqua mora inter sumptionem hujus Sacramenti & reliquos cibos.* Vnde & in Missa oratio gratiarum actionis post Communionem dicitur, & communicantes etiam suas privatas orationes dicunt. Secundùm tamen antiquos canones statutum est à Papa Clemente, ut habetur de consecratione distinctione 2. Si mane Dominica portio editur, usque ad sextam jejunent ministri, qui eam sumserunt: & si tertia vel quarta hora acceperint, jejunent usque ad vespèrum. Antiquitus enim rariùs Missarum solennia celebrabantur, & cum majori præparatione. Nunc autem quia oportet frequentius sacra mysteria celebrare, non posset de facili observari. Et ideo per contrariam consuetudinem est abrogatum.

Et si autem peractâ Missâ possit quis alios cibos urgente præsertim infirmitate, vel debilitate accipere, dedecet tamen ab Altari ad mensam statim convolare; expedit verò accepto dono frui, divinum hospitem omnibus pietatis officiis demereri, & in eo fide & charitate manere, qui realiter in nobis manet. Tunc anima veluti speculum mundum Soli se debet justitiæ exhibere, ut sicut ipse promisit, claritatem quam dedit ei Pater, det & ipsi.

**Monet**



Monet Spiritus sanctus Proverb. 23. juxta lectionem Septuaginta: *Cum sederis ad mensam Principis, diligenter attende quæ apponuntur tibi, & statue cultrum in gutture tuo, sciens quod talia oportet te parare.* Totidem verba totidem documenta. *Cum sederis.* Sedeat oportet anima cœlesti cibo pasta, id est à negotiorum & multiplicium cogitationum importuna turbâ quiescat solitaria, & tacens levet se supra se concupito bono jam possessio fruitura. *Sedeat,* ut in illa felici hora, sed brevi cœlestis suavitatis mora gustet quoniam suavis est Dominus, & bonus his qui recto sunt corde. *Perpendat se sedere ad mensam Principis,* sibi que disponi à Christo sicut disposuit ei Pater regnum, ut edat & bibat super mensam ejus in regno ejus quod est Ecclesia. *Ad mensam Principis.* Exclamet ergo: Unde hoc mihi, ut Rex Regum & Dominus dominantium veniat ad me? Maria post incarnatum Verbum ascendit in montana, salutavit Elizabeth, Deum magnificavit. Eucharistiam extensionem Incarnationis Patres appellant: ergo post incarnatum in te Verbum ascende in montana, montem perfectionis conscende, ardua Christianæ sanctitatis proposita concipe, olimque concepta instaura. Saluta Elizabeth, pro fratribus vivis & defunctis preces eò temporis pretiosissimi Deo per unionem ad Christum acceptissimas funde. Deum magnifica, & dicito: Exulta, & lauda habitatio Sion, quia magnus in medio tui sanctus Israël.

*Diligenter attende quæ apponuntur tibi.* Domini magnificentia, donantis amor, Pastoris ovem proprio cruore pascentis pietas, Medici

ad infirmitates curandas comparati præsentia, Doctoris veritatis radios affundentis familiaritas mentis tuæ oculis jugiter obversetur. *Et statue cultrum gutturi tuo.* Circuncide nimirum concupiscentiæ motus, & parvulos tuos, ut loquitur Propheta, allide ad petram. Scandalizantis te oculi tui vanos illicitosque conjectus amputa, illumque imitare qui pepigerat fœdus cum oculis suis, ne cogitaret de virgine. Denique margaritifera conchilium imitare, post acceptum de cœlo pluyente rorem illum fœcundum unde unio concrescit, testam naturâ dulce obrurat, ne ulla amaris & falsis maris undis vel rima patescat. Ad altare dum sedes rorant cœli desuper, pluunt justum, & in te germinant Salvatorem: ergo maris hujus magni & spatiosi, mundi scilicet impuris aquis ostium cordis occlude; quia amicitia mundi, Dei inimicitia est, atque inimicus Dei constituitur quicumque amicus mundi esse voluerit. *Sciens quod talia oportet te parare.* Quis enim nescit retribuenda esse bona pro bonis, & ingrati esse, amorem si nolebat impendere, nolle rependere? Quis nescit cum Seneca, sapientis esse benè debere, beneficia benèolvere, vel siolvere non datur, benè fateri? Quis nescit cum Chrysostomo, Bernardo, aliisque Patribus, optimam beneficiorum custodem esse ipsam memoriam beneficiorum, & perpetuam confessionem gratiarum: danti rependi quidquam gratius ab accipiente non posse, quàm si gratum habuerit quod gratis accepit; nam spiritui gratiæ contumeliâ facit, qui beneficium dantis gratâ mente non suscipit: & jugiter sibi subvenire facere, cui collatum beneficium ante oculos



los semper assistit ; quia meliora meretur suscipere , qui collata beneficia de corde non probatur amittere ? Talia ergo paremus ; amor amori , charitas respondeat charitati , & sollicitos inveniat qui nos sollicitè tam quæsit. Talia oportet parare , quia si referre gratias non possumus , agere certè debemus. Quid autem melius , ut alibi ex August. diximus , & animo geramus , & ore promamus , & calamo explanemus , quàm Deo gratias ? Hoc nihil dici brevius , nec audiri lætius , nec intelligi gratius , nec agi fructuosius potest. Ante Communionem mente purgatus summum bonum Christum totis cordis inedullis , totis præcordiorum affectibus concupisce , dicaque cum Augustino lib. i. confess. cap. 5. *Quis mihi det , ut venias in cor meum , & obliviscar mala mea , & tu sis plus bonum meum , & inebries illud ?* Post Communionem illud ejusdem Augustini , vel aliud simile cructa verbum bonum : *Angusta est domus anima mea , quò venias ad eam , dilatetur à te ; ruïnosa est , refice eam. Habeo quæ offendant oculos tuos , fateor ; sed cui alteri præter te clamabo , ab oculis meis munda me.* Hæc & alia suggeret unctio docens omnia , & spiritus precum qui facit quæ Deo sunt placita postulare.

*Nonnulla consecraria paucis derivantur.*

Ex dictis sequitur i. jejunium ad Eucharistiam necessarium esse jejunium naturale , importans privationem cujuscumque præassumpti per modum cibi aut potus. Et ideo , inquit S. Thomas , neque post sumptionem aquæ , vel alterius cibi , aut potus , vel etiam medicinæ

in quantumcunque parua quantitate licet hoc Sacramentum accipere. Nec refert utrum aliquid huiusmodi nutriat, vel non nutriat, aut per se, aut cum aliis, dummodo sumatur per modum cibi, vel potus. Illud porrò per modum cibi vel potus accipitur, quod ore sumitur comedendo & bibendo, ita ut glutitur, & in stomachum haustu orali transmittatur. Unde quod per modum salivæ, vel halitus sumitur, jejunium naturale non solvit. Ac proinde, ut idem B. Thomas ait, reliquiæ cibi remanentes in ore per modum salivæ trajectæ huius Sacramenti sumptionem non impediunt. Et eadem ratio est de reliquiis aquæ vel vini, quibus os abluitur; quæ in parva quantitate salivæ permixtæ, non ponunt in numero cum saliva. Idem dicendum est de re quavis ad percipiendum saporem gustata & statim exspuita. Idem facilè cum viris piis, quos consilii causâ adivi, de foliis plantarum vel fragmentis arborum vel radicum crediderim, quæ cum ad exciendam pituitam mox excreandam assumantur, nihil ibi apparet quod per modum cibi recipiatur, tametsi fortassis, & ut D. Thomas ait, *casualiter* aliquid admixtum salivæ trajiciatur: *Quæ interius ingerantur* (regula est à S. Thoma in 4. dist. 8. quest. 1. art. 4. tradita) *sine exterioris cibi sumptione non videntur solvere jejunium naturale, nec impedire Eucharistia perceptionem.* Non est tamen idem iudicium ferendum de saccharo vel salgamo ad epiphoram & asperi humoris acrimoniam leniendam assumpto; quia cum distillantis pituitæ vim non temperet, nisi glutitur, profectò per modum cibi accipi jure merito censetur.

Sequitur

Sequitur 2. illos qui post cœnam noctem ducunt insomnem, si manè Eucharistiam adeant, contra præceptum jejunii minimè peccare, nec generali Ecclesiæ consuetudini jejunium naturæ strictè observanti adversari, quanvis alioquin sint præ cruditate, vel nimia vigilia indispositi. In hoc tamen tertiæ partis articulo sæpe laudato observat Angelicus Doctor totus in hujus divinissimi Sacramenti reverentiam profusus, quod si præ indigestione vel vigilia mens admodum perturbetur, *homo redditur ineptus ad sumptionem Sacramenti.* Et sic interpretandum venit caput *Si constiterit*, de accusationibus. Ubi Sacerdos, quia in caupona pernoctaverat, nullaque præmissâ dormitione Missam celebrarat, Ecclesiæ administratione privatus fuit. Non enim quia post cibum potumque non dormierat plexus fuit, sed propter acceptum post medium noctis cibum, vel certè præcipuè ob comestationis & vinolentiæ turpitudinem; quanvis, uti dictum est, mentis perturbatio ex insomni nocte profecta percipiendæ cœlestis alimonie suavitati impedimento sit. Quia nimirum cœlestis Eucharistiæ cibus dum ore sumitur, cogitatione & amore concoquendus est: unde si præ mentis languore & inertia, undecumque tandem proficiscatur, divinas res cogitare, Christum spiritualiter manducare, & ut loquitur S. Bonavenura, fide & charitate masticare & ruminare non possumus, tutius est & utilius paululùm à sacra mensa secedere, quoad Spiritus sancti fervore concepto munda efficiamus venientis in nos Christi receptacula. *Nemo nau-  
seans*, inquit Chrysostomus hom. 83. in Matth.

*ad hanc mensam adeat, nemo remissus: sed alacres, accensi, & ferventes omnes accedant. Nam si Iudæi stantes, calceati, ac baculos in manibus habentes cum festinatione paschalem Agnum comedebant; quanto magis vigilare nos decet, vividosque & inflammatos ad Sacramentum istud animos afferre.*

Excipio justos illos qui corde sincero Deo intimè cum adhærescant, vel malitiâ dæmonis interioris hominis habitum perturbantis, vel Deo ipso justis de causis teneriorem pietatis sensum & gratiæ cœlestis uberem suavitatem subducente, ariditate interdum & quadam sterilitate afficiuntur. Tunc enim animus in Dei nutu & providentia prorsus conquiescens, ut se in his difficultatibus & spinis, quandiu libuerit, exerceat pietatis munia fortiter interim prosequens, humilis & de misericordia Dei confusus accedat: modò tamen orationi firmius incumbat, gemat, quærat, pulset, neque ab incepto antè desistat, quàm exprimere à Deo nonnullos gratiæ radios mereatur. Nam ut Thomas à Kempis *lib. 4. de Imit. Christi*, ait: *Oportet te devotionis gratiam instanter quærere, desideranter petere, patienter & fiducialiter expectare, gratanter recipere, humiliter conservare, studiosè cum ea operari, ac Deo terminum & modum superne visitationis, donec veniat committere. Humiliare præcipuè te debes, cum parum aut nihil devotionis interiùs sentis: sed non nimium deprecari, nec inordinatè contristari: Dat sæpe Deus in uno momento, quod longo negavit tempore. Dat quandoque in fine, quod in principio orationis distulit dare. :: Dat Dominus ibi benedictionem suam, ubi vasa vacua invenerit:*



invenerit : & quanto perfectius infirmus quis renuntiat , & magis sibi ipsi per contemptum sui moritur , tanto gratia celerius venit , copiosius intrat , & altius liberum cor elevat.

De iisdem fastidiis & languoribus , quibus interdum pii subjecti sunt , & à Deo probandum eorum animorum , vel purgandorum defectuum causâ exercentur , quæque in optimum quemque cadunt , Patres spirituales intelligendi sunt , dum aiunt ob immissum quendam torporem non debere se iustos ab hoc Sacramento summovere. Rem hanc præclare exponit S. Bonaventura lib. de profectu Religiosorum , cap. 77. ubi ait eos qui student magis innocenter vivere , & studio devotionis frequentius intendere , confidentes de misericordia Dei fiducialiter accedere oportere , licet quandoque tepide se habeant , nec sentiant specialem devotionis gratiam , cum se ad illam preparare student.

Sequitur 3. à generali regulâ & præcepto jejunii Eucharistiæ præmittendi homines in extremæ necessitatis articulis positos excusari. Patet ex dictis ; cum enim hoc præceptum sit Ecclesiasticum , illos non obligat quos ipsa Ecclesia excipit. At Ecclesia in multis casibus ab hac sua lege dispensat , nihil quidem de sua in tantum Sacramentum reverentia remittens , sed extremis filiorum suorum necessitatibus ( quæ materna ejus pietas est ) consultura.

In primis ab hac lege , ut ait D. Thomas in fine corporis articuli octavi sæpius memorati , excipiuntur infirmi periculose ægrotantes , qui ne sine Communionem decedant , statim post acceptum etiam cibum communicandi sunt , quia necessitas legem non habet. Unde de consuetudine

*eratione dist. 2. ex Concilio Wormatiensi dicitur : Presbyter infirmum statim communicet , ne sine communione moriatur.* Nec expectandi sunt extremi mortis agones , tum ut ne repentina morte ægrotus opprimatur , tum ut vigentibus adhuc animi sensibus , nondumque fractis corporis animique viribus , homo sit ad cœlestem edendum cibum , ejusque percipiendam suavitatem paratior. Neque etiam ad servandam illam Ecclesiasticam jejunii legem debet Eucharistia aliqua post mediam noctem hora porrigi , quod infirmus per alicujus horæ intervallum possit jejunus permanere : non , inquam , opus est illas scrupulosè horas aucupari ; quia consuetudo Ecclesiæ , quæ optima est legum interpretes , non habet ut intempestiva importunæ noctis hora Eucharistia , nisi aliquin urgens necessitas exigat , deferatur. Hora ergo cum infirmo , tum Sacerdotibus commoda expectanda est , nec interim ægrotus à necessariis cibis , medicinis , aliisque se debet solatiis abstinere. Id verò non una tantum vice in gravi morbo licitum est , quia periculo durante , aut recrudescente , aut post aliquod sanitatis intervallum redeunte , potest infirmus Christi corpore iteratis vicibus refici , aliquot modò dierum interstitium servetur , ut in plerisque ritualibus determinatum est. Alioquin si præ devotione Communionem usurpare frequentius aveat , lex jejunii servanda est , horaque ad id opportuna , ut in sacris cœtibus fieri assolet , seligenda.

Secundò solvi jejunium oportet , si aliquin inceptum sacrificium percipi , consummarique non potest : verbi gratia si Sacerdos post consecratam

secratam alteram speciem, secundam consecrare; vel post consecratam utramque, consummare eam infirmitate correptus non valet, potest Sacerdos non jejunos (si jejunos præsto non sit) sacrificium peragere & perficere. Similiter si post sumptam panis speciem, solam aquam in calice (quam vinum esse inter proferenda consecrationis verba putaverat) reperit & bibit, vinum debet iterum consecrare, incipiendo ab illis verbis Canonis: *Simili modo postquam cœnatum est*, &c. quia ut habetur in rubrica Missalis omninò legenda, divinum de perfectione incepti sacrificii præceptum majoris est ponderis quàm quod à jejunis Ecclesiæ jubente sumatur. Idem dicendum est, si Sacerdos post unam aut utramque speciem consecratam recorderetur se non esse jejunum; non enim debet à perficiendo sacrificio ob allatam rationem desinere. Quod idem dicendum putant Doctores, si fracti jejunii ante consecrationem meminerit, aliquod si scandalum, vel astantis populi perturbatio timeatur. Secus est, si sublato scandali vel infamiae periculo violati jejunii recorderetur; tunc enim tutius est ab incepta Missa desistere, & ab Altari se arcere. Eadem de causa consecratarum hostiarum reliquiae possunt à celebrante, antequam ab Altari discesserit, post ablutionem accipi, cum ad ejusdem pertineant sacrificii integritatem. Quod idem dici debet de reliquiis Communionis Fidelium ab ipso Sacerdote consecratis. Si autem Sacerdos ab Altari recesserit, tutius foret eas reservari; si tamen irreverentiae, vel amissionis periculum ullum imminuat, sumi eas satius est, quàm perire.

Tertiò potest & debet instante sanctissimi Sacramenti conculcandi, inhonorandi, vel ab infidelibus comburendi periculo Eucharistia à non jejuno Sacerdote vel laïco accipi, ne sanctum detur canibus, & cœlestis margarita ante infandos porcos projiciatur. Jejunium enim in reverentiam hujus Sacramenti institutum est: ergo ad evitandam majorem Sacramenti irreverentiam & indignissimam sceleratorum hominum profanationem, Eucharistiam sumi nullus debet præassumptus cibus impedire. Laudatur eximia cujusdam Sacerdotis Ordinis nostri pietas, qui ut Eucharistiam ab adventantium militum copiis profana quæque & sacra vastantibus tueretur, jejunus toto die & excubias agens permansit, ut ad Ecclesiam se admovente appropinquantium hostium exercitu Eucharistiam sumeret, & Sanctum sanctorum pectoris asylo vallatum protegeret. Sed ad tantum tantæ pietatis officium nullo præcepto astringebatur: sed quid debeat, quid possit aut non possit, non respicit vis amoris. Sanitatis severo jejunio frangendæ discrimen humanæ prudentia piissimo Sacerdoti objiciebat: at amor ignorat judicium, ratione caret, consilium nescit: amor non accipit de difficultate solatium, nec de impossibilitate remedium: amor impenetrabilis est lorica, periculis insultrat; si amor est, vincit omnia. Amore Christi succendi heroicum illum Sacerdotem, & vota religiosissimæ ejus vitæ series, & ejusdem mors, quam in conspectu Domini pretiosam omnes qui norunt piè credunt, & suavissimus ejus quæ in benedictione est memoriæ odor persuadent,

*Quartum*



Quartum casum profert Major affirmans licere Presbytero, ne sine Viatico infirmus moriatur, post prandium hostiam, vel etiam fermentati panis particulam clam & absque solennitate per sola consecrationis verba conficere, confectamque moribundo porrigere, ratus accipiendi è tanto Sacramento præsidii necessitatem legi esse jejunii anteponendam. Verùm hæc sententia & à consuetudine Ecclesiæ, & à veritate abhorret. Etenim multa involvit & invehit hæc sententia, quæ Christi institutioni & Ecclesiæ moribus repugnant. Nam Eucharistiam dimidiato sacrificio conficere nefarium est; buccella autem panis absque calice consecrata pars sacrificii est, non integritas. Non potest etiam Sacramentum hoc à Sacerdote confici, nisi ab eodem sumatur: ergo unicum panis frustulum infirmo mox deferendum consecrare sacrilegium est. Denique in fermentato quavis de causa consecrare Romana & Occidentalis Ecclesia nunquam permittit. Præceptum autem Viatici sub articulum mortis recipiendi momentosiori de non dimidiando sacrificio legi concedit: præsertim cum priori votis & Communione spiritali satisfieri in illis angustiiis possit. Unde si contingat, ut dum infirmo imminetis mortis periculum ingruit, nulla sit in pyxide hostia, sitque jam dies progressus, quando nullus Sacerdotum jejunus est, non debet Eucharistia violatis Dei præceptis & Ecclesiæ ritibus consecrari. Consuli etiam oportet tanti Sacramenti reverentiæ, ne indecenter & perfunctoriè celebretur.

## REFLEXIO.

*Quis tetigit vestimenta mea? Et dicebant ei discipuli sui: Vides turbam comprimentum te, & dicis, Quis me tetigit? Marci 5. Quærit Jesus sollicitè mulierem illam ab annis duodecim profluvio sanguinis laborantem; miratur fidem, suspicit pietatem, restituit sanitatem. Sed cur illam circumspicit tangentem fimbriam; & turbam circumfluentem & comprimentem oculatissimus Dominus non attendit? Multi premunt, inquit Augustinus, sed pauci tangunt. Multi Eucharistiam frequentant, pauci uberes Eucharistiæ fructus capiunt, quia accedunt imparati. Juxta mensuram vasculorum, inquit alicubi S. Hieronymus, infundit Deus liquorem, tantum muneris largiens, quantum potest ille cui donatur, accipere. Ingrediens Salvator in patriam suam, non poterat ibi, ut habetur Marci 6. virtutem ullam facere. Quomodo non poterat? Nunquid alligari possunt Omnipotentis manus? Nunquid ei non omnis data est in cælo, terraque potestas? Absit. Sed divinæ potestati sapientia & providentia prælucent, quæ in dispensandis cœlestium munerum munificentis hominis cum Dei auxilio se præparantis dispositiones attendunt. Cum Sanctis sanctus est Deus: Quidni, inquit Bernardus serm. 69. in Cantica, & cum amante amans, & cum vacante vacans, & cum intento intentus, & sollicitus cum sollicito? Sacramenta novæ legis, eorumque fecundissimum Eucharistia cause sunt gratiæ naturales: at illud causam physicam inter & liberam interest discrimen, quod*

*ita*

ista pro suo arbitratu bona sua profundit, spre-  
tisque persæpe recipientium dignitatibus bene-  
ficia largâ manu pronâque in immeritos ingra-  
tôsque confert & congerit, etiamsi in irritum  
dare se noverit. At illa toto virtutis conatu  
juxta recipientis capacitatem se exserit: tantum  
enim caloris ignis, tantum lucis Sol influit,  
quantum subjecta sibi materia capere potest.  
Ergo si nihil ex Eucharistia utilitatis reportes,  
id uni tuæ inanitati recipiendis divinis favori-  
bus impari ascribe.

Quis deplorandam tot Altariâ frequentan-  
tium post plura quotidie celebratarum Missa-  
rum lustra egestatem ab omni gratia & sancti-  
tate desertam non desleat? Scio equidem cha-  
ritatis augmentum occultissimum ipsum latere  
habentem, & sub cineribus foveri ignis scin-  
tillas, & arbores quas crevisse non vidimus,  
incrementum adeptas apparere. Sed à fructibus  
cognoscimus ea. At quomodo tot Commu-  
nionibus usurpatis crescit amor, qui nunquam  
factis egregiis prodit foras? Et tamen verus  
amor, Gregorio authore, non est otiosus, sed  
operatur magna, si est; & si non operatur,  
non est.

Ne mirare. Ab Eucharistia charitatîs aug-  
mentum non accipit, qui amoris præparatio-  
nem non affert; quia ejus vis & efficientia  
suscipientis dispositione continetur. Non pro-  
dest panis vitæ & intellectus, nisi dum ore su-  
mitur, unâ mentis attenti & cordis amantis ar-  
dore coquatur. De frequentanda Eucharistia so-  
licitos multos cernimus; de excolendo com-  
ponendoque animo paucos videmus curiosos.  
Hinc peccata venialia pro nihilo ducunt, nihil  
ab

ab eis metuunt, ne quidem cum ad mysteriorum omnium maximè terrible accedunt. Peccata illa, sine quibus hîc non vivitur, pœnitentiæ remediis, piorumque operum exercitationibus mundare non satagunt. Non curant desidiam occupatione, loquacitatem silentio & in privatas domûs latebras secessu, maleloquentiæ pruritum laude & commendatione, suspiciones iniquas interpretandi benignitate, nimiam parsimoniam & in egenos duritiem liberalitate ac munificentia, superbiam humilitate & modestiâ, voluntatis alienationem blandâ appellatione & charitatis significationibus, segnitiam vigiliâ & orationis instantiâ, voluptatum amorem sensuum castigatione & continentiâ, temperamenti stomachosi acerbitatem mansuetudine ac morum commoditate sarcire & compensare. Hinc est, ut notat Augustinus homilia 50. *quod omnia illa peccata simul congregata velut scabies nostrum decus ita exterminant, ut ab illius sponsi speciosi formæ præ filiis hominum castissimis amplexibus separent.*



## CAPVT II.

*De frequenti Communione : ubi  
de Eucharistia usurpanda tra-  
dita à Patribus regula præscri-  
buntur.*

**H**Æretici nostrates omnem carpendæ, infamandæque Catholicæ Ecclesiæ occasionem quaritantes { occasionem enim querit, qui vult recedere ab amico } Ecclesiasticum de Communionem annua præceptum ut accusent, contendunt cum Calvino *lib. 4. instit. cap. 17. §. 44. & 46.* legem illam Christi instituentis intentioni & munificentia repugnare; quippe qui Eucharistiam Ecclesiæ reliquit, quo frequenti in usu Christianis omnibus esset, crebrâque memoriâ passio Christi repeteretur. Unde pro sua impietate concludit, consuetudinem quæ semel quotannis communicare jubet, certissimum esse diaboli inventum, cujuscuque tandem ministerio inductum fuerit. Sed non advertit vir hærescos tenebris occæcatus, Catholicam Ecclesiam non hanc sanxisse legem, ut à sacrae Communionis frequenti usu dignos arceret, quæ omnes stimulat & hortatur, ut eam vitam agant, quæ tantum cibum quotidie mereatur

reatur accipere, quæ in omnibus & singulis sacrificiis altantium aliquos sacrorum mysteriorum optaret esse participes, quæ ignavorum torporem objurgat, quæve omnes gregatim invitat, ut animum sic excolant, sic componant, ut fiant ad divinas lauitias frequenter degustandas idonei. Sategit ergo duntaxat eâ lege Ecclesia, ut cum eò frigiditatis & teporis res adducta esset, ut in plures annos Eucharistiæ Communio differretur, semel ad minus singulis annis in Pascha Fideles omnes sacrum Domini corpus acciperent. Non intendit tamen sancta Ecclesia, ut qui semel communicaverunt, quasi in reliquum anni tempus pulchrè defuncti, & in utramque aurem securè dormientes, de iterando cœlestis cibi usu nunquam cogitent; sed cum omnes ad frequentem Communionem aptos velit, & hortetur, regulas tamen præscribit ad quas Communionis frequentia & raritas exigantur. Quas in sequentibus proponere & stabilire operæpretum est, quas prætermissa triplicis speculationis solita sectione, dearticulatè ante Lectorum oculos expandemus.

## PRIMA REGULA.

*Innocentes Eucharistiam frequenter  
usurpare oportet.*

Toti dissertationi una distinctio præmittenda omninò est veluti fundamentum, cui veram sententiam superstruere oportet; quâ  
ignoratâ

ignoratâ innumeris datur æquivocationibus & sophismatis locus. Considerandum ergo ante omnia est diligenter, Ecclesiam ex duplici hominum genere constare; alii enim innocentes sunt, alii peccatores. Innocentes dico, qui tamen peccatis venialibus obnoxii sint, Baptismi tamen gratiam inviolatam, & incolumen tenent. Peccatores verò illi dicuntur, qui Baptismi gratiam peccato aliquo lethali violarunt, & extinxerunt. Porro sicut innocentibus accenseri meritò possunt rei postquam criminum maculas longâ & accuratâ pœnitentiâ elnerunt, atque ad laudabilis Christianæ vitæ institutum sese retulerunt; ita à fortiori peccatoribus annumerandi sunt, qui acceptam in tribunali pœnitentiæ indulgentiam & gratiam novis prolapsonibus violant. Hoc prælibato;

Diximus certum esse innocentes, qui Baptismi gratiam ac sancti Spiritus plenitudinem Baptismo & Confirmatione acceptam inviolatâ puritate observant, vel post dignos pœnitentiæ fructus à peccatis se abstinere, frequenter Communionem sacram adire oportere. Patet id ex libro Actuum Apostolorum, cap. 2. ubi fideles dicuntur perseverasse in doctrina Apostolorum, in orationibus, & in communicatione fractionis panis; quæ fractio à Catholicis Doctoribus de sacra Communionem intelligitur. Porro illi Ecclesiæ primigeniæ fideles à Baptismi fonte recedentes veterem hominem cum actibus suis exuerant, novumque induerant; fide grandes miraculis signisque clarebant; spe sublimes terrena calcabant, cœlestia consecrabantur, ita ab omnibus affectibus expediti, ut suas res omnes ad Apostolorum pedes projicerent;

cerent; charitate verò, quæ vinculum perfectionis est, ita ferventes, ut eorum omnium cor esset unum & anima una. Unde signanter de eis dicitur quod perseverabant in doctrina Apostolorum, hoc est, divinas institutiones, quas Apostoli à Christo didicerant, præcipuâ religione custodiebant. Illud etiam non omit- tendum, illam fractionis panis communicatio- nem primos illos fideles frequentasse dici, cum Spiritus sancti plenitudinem sacro die Pente- costes recepissent, quo intelligeremus Spiritus sancti illapsu homines ad illum Angelorum pa- nem edendum idoneos fieri; ut sicut ad Incar- nationis opus immensum superveniens Spiri- tus sanctus virginalem Deiparæ Mariæ sinum suis muneribus præmunivit, ita ad Eucharistiæ, quæ secundum Patres Incarnationis extensio est, usum idem Spiritus gratiæ suæ donis in- struat & paret.

Hinc in primitiva Ecclesia, quando sanctior disciplina vigebar, tremendo sacrificio circun- stantes fideles, quos fervere adhuc & quasi ebulliens Christi sanguis illius amore impleve- rat, & flagrantes igne illo divino, quem in ter- ram mittere Christus venerat, venerandis sese- sistebant Altaribus divino ac cœlesti pane refi- ciendi, ut ex canonibus Apostolorum, atque ex Beatorum Clementis & Dionysii scriptis li- quet. Id sibi vult B. Martyr Ignatius *in epist. ad Ephesos*, dum ad frequentem eos Commu- nionem ( si tamen de sacramentali Commu- nione, & non potius de Christianorum con- ventibus, quibus ad Dei laudes & gratiarum actiones celebrandas Christiani cœuntes con- sentiunt, loquitur, ut docti nonnulli ex contex-



tu interpretantur) hac ratione hortatur; quia eo usu frangitur dissipaturque omnis impugnatio immundorum spirituum, labefactantur vires sathanæ, & ignita illius ad peccandum jacula irrita resiliunt. Illos namque alloquitur vir sanctus, *qui in Christi gratia permanserunt*, quique *miser ricordiam* consequuti, *in Christo Jesu confirmati sunt*.

Eodem sensu B. Ambrosius *lib. 4. de Sacramentis, cap. 6. & lib. 5. cap. 6.* ait quotiescumque effunditur sanguis in remissionem peccatorum, debere illum accipi ut semper peccata remittantur, & semper peccantes semper medicinam accipere oportere. Ibi enim loquitur de venialiter peccantibus, cum neophytos alloquatur è Baptismi aquis puros & innocentes emersos, & Confirmationis gratiæ plenitudine cumulos. Leges enim alias pœnitentibus præscribit, ut postea patebit. Unde etiam *libro 5. cap. 3.* sic ait: *Accipe quotidie, quod quotidie tibi prodest: sic vive, ut quotidie merearis accipere.* Quibus verbis quotidianum Eucharistiæ esum non omnibus generatim sine ulla exceptione permittit, sed iis duntaxat, qui sic vivunt, ut quotidie mereantur accipere; quive licet quotidie peccent quia homines sunt, lethaliter tamen non peccant, quia filii Dei sunt, quibus proinde jus est pasci corpore Christi, cum *ipsi*, teste Augustino *lib. 22. de Civit. cap. 30. sint Corpus Christi*.

Eodem modo loquutus est S. Justinus Martyr *in apolog. 2.* ubi scribit temporibus suis fideles tum ruri, tum in urbibus degentes in Ecclesiam convenisse, ibique Eucharistiam præsentibus datam, ad absentes verò missam. Cæte-  
rum

rùm ibidem observat illos solum fideles Eucharistiæ participes fieri debere, qui susceptâ Christianæ fidei veritate & regenerationis lavacro, *consentaneam Christi præceptionibus vitam agunt.* Quod utique non præstant qui repetitis peccatis mortalibus Baptismi innocentiam commaculant. Unde illud observandum est, quod dum Concilia & Patres ad Eucharistiam frequentandam hortantur, ea potissimum ratione utuntur, ut fideles in accepta gratia proficiant, & in via Dei progrediantur, non regrediantur; non verò ut per cibum illum in viam Dei ingrediamur: supponunt enim Eucharistiâ sæpe utentes jam perfectionis viam ingressos ad Evangelicæ sanctitatis perfectionem anhelare.

Unde mos iste communicandi ab Apostolis primisque Christianis inchoatus S. Cypriani temporibus in Africa viguit, ut *lib. de oratione*, verbis istis significat: *Hunc autem panem dari nobis quotidie postulamus, ne qui in Christo sumus, & Eucharistiam quotidie ad cibum salutis accipimus, &c.* Ætate etiam Augustini perseverasse morem illum indicat Doctor sanctus epist. 118. cap. 3. Quem locum infra referemus. Ubi supponit bonum Christianum, id est à peccatis mortalibus liberum, & ad Evangelii leges vitam suam librantem, si saluberrimum Sacramentum honorare contendit, posse quotidie, vel cerrè frequenter cœlestem Eucharistiæ cibum accipere. Testatur etiam B. Hieronymus *epist.* 28. ad Lucinium, Romæ & in Hispania quotidianæ Communionis usum sua ætate viguisse. S. quoque Ambrosius ultimis libri quarti de Sacramentis capitibus eandem consuetudinem

ſuetudinem Mediolani fuiſſe retentam affirmat, quam tamen in Oriente dudum deſuiſſe ſignificat *lib. 5. cap. ultimo*, his verbis: *Si quotidianus eſt panis, quare poſt annum illum ſumis, quemadmodum Graci facere conſueverunt?* Denique S. Gregorius *hom. 27. in Evangelia*, laudat Caſſium Narnienſem Episcopum, quod penè nullus vitæ ejus dies abſcederet, quo non omnipotenti Deo hoſtiam placationis immolaret. Sed ſtatim obſervat Episcopi illius vitam cum ſacrificio concordare; nam cuncta qua habebat in eleemoſynas tribuens, cum ad horam ſacrificii veniſſet, totus in lacrymis deſluens, ſemetipſum cum magna cordis contritione macerabat.

Ex quo autem deſierunt Fideles diebus ſingulis Chriſti menſam adire, alii rariùs, frequentius alii Communionem uſurparunt. Nam ut Baſilius *epiſt. 289.* author eſt, quater ſingulis ſeptimanis nonnulli communicabant, Dominico die, feria quarta, in paſceve, & Sabbatho; ſed & per dies etiam alios, ſi Martyris alicujus memoria celebraretur. Chryſoſtomus etiam *hom. 61. ad populum Antioch. & hom. 3. in epiſt. ad Hebræos*, quorundam mentionem facit, qui in Epiphania, Quadrageſima, aliſque diebus ad Dominicam menſam cœleſti cibo reſcindi accedebant; quanvis, ut ibidem ait, tempus dignos accedere non faciat, ſed anima ſinceritas & puritas. Multi, addit *hom. 47. in epiſt. ad Hebr.* hujus ſacrificii ſemel toto anno ſunt participes, alii autem bis, alii verò ſæpe. Omnes tamen monet ſolos illos eſſe in Euchariſtiam recipiendam idoneos, qui cum munda conſcientia, cum mundo corde, cum vita qua nulli affinis eſt reprehenſioni accedunt. Qui ſunt hujusmodi,  
ſemper



*semper accedant ; qui non sunt ejusmodi , nec semel quidem. Sed de hoc illustri testimonio inferius.*

Hinc Patres Christianos legitimè dispositos ad frequentem Communionem hortati sunt, minùs verò dispositos ut sese ad Eucharistiam crebrò percipiendam dignè pararent. Patet ex verbis Ambrosii suprà memoratis , quibus adde Chrysostomum hom. 61. ad populum Antiochenum : *In aliis quidem temporibus , inquit , cùm pueri frequenter sitis , non acceditis : in Pascha verò licèt sit aliquid à vobis patratum , acceditis. O consuetudinem ! ô presumptionem ! Sacrificium frustra quotidianum , in cassum assistimus Altari , nullus cui hoc communicetur. Et non ut temerè communicemini dico , sed ut vos dignos reddatis.*

Eadem fuit sequentibus sæculis Ecclesiæ sententia. *Admonendus est populus , inquit , circa nonum sæculum Theodulphus Aurelianensis in sua epistola , cap. 44. ut ad sacrosanctum Sacramentum corporis & sanguinis Domini nequaquam indifferenter accedat , nec ab hoc nimium abstineat , sed cum omni diligentia eligat tempus , quando aliquandiu ab opere conjugali abstineat , ut vitiis se purget , virtutibus exornet , eleemosynis & orationibus insistas , & sic ad tantum Sacramentum accedat ; quia sicut periculosum est impurum quemquem ad tantum Sacramentum accedere : ita etiam periculosum est prolixo tempore abstinere. Idem clarebit ex Petro Blesensi , S. Thoma , aliisque deinde Theologis postea referendis. Unde Concilium Tridentinum sess. 22. cap. 6. sic habet : Optaret quidem sancta Synodus , ut in singulis Missis fideles*  
*astantes*



*astantes, non solum spirituali affectu, sed Sacramentali etiam Eucharistiæ perceptione communicare. Optaret, inquam, modò fideles eâ essent dispositione instructi, quæ tantâ mysteria decet, ut ex capite præcedenti satis claret, magisque ex dicendis clarebit.*

Itaque nullus pius est, nullusque Catholicus, qui Communione dignos à Communione deterreat, quique ad Communionis celebritatem non omnes stimulet & accendat, qui eâ puritate animi, eâ virtutis constantiâ, vitæque ad Evangelium exactæ laude præditi sint, ut ad tantam Christi consuetudinem aspirare meritò possint.

## REGULA II.

*Christiani post amissam Baptismatis innocentiam, ii præsertim qui in peccata mortalia iteratis lapsibus recidunt, non debent ante actos dignos laboriosa pœnitentiæ fructus ad Communionem accedere.*

**D**icimus itaque peccatores à sanctitate Christianæ vitæ lapsos, peccata præsertim mortalia frequentantes, non continuò ad frequentem Communionem recipiendos esse, ut inolita sua vitia & crimina penè fragrantia & adhuc fumantia in Sacerdotis sinum confessio-

ne effuderint. Ita enim perpetua Sanctorum Patrum, constansque traditio docet.

*Mens Dionysii, Basilii, & Cypriani  
aperitur.*

In primis S. Dionysius *lib. de Ecclesiast. hierarch. cap. 3.* tradit hunc suæ ætate fuisse Ecclesiæ morem, ut Evangelio pronuntiato, lectisque Scripturis, qui ad Eucharistiam percipiendam non erant idonei foras pellerentur: quinam autem essent illi minùs idonei, his verbis declarat: *Excluduntur à templo Dei & sacrificio, à cujus sublimi & divina excelsitate nimium absunt, primùm qui mysteriis nondum initiati eorum omninò expertes sunt.* Id est catechumeni, qui Baptismum Sacramentorum omnium januam non receperunt. Deinde qui à sanctitate vite desciverunt. Postquam verò idem dixit de energumenis ad diaboli terribilia faciliè commoveri solitis, & ab invicta animi ad res divinas sese applicandi virtute desertos, addit: *Præterea qui à deteriore quidem vita jam discesserunt, sed animos à pristina impuritatis phantasmatis nondum satis expurgatos gerunt habitu amoreque Dei purissimo ac simplici.* Denique qui nondum soli Deo unicè adhærent, quique, ut Scripturæ more loquar, *nondum omninò irreprehensibiles sunt, atque immaculati.* Si Magno Dionysio autore & teste tremendorum mysteriorum ne quidem inspectione dignandi sunt, qui vel baptismalem integritatem lethali vulnere corruerunt, vel qui à deteriore quidem vita discedentes, nondum animos à pristina impuritatis phantasmatis expurgarunt, nondum-  
que

que soli Deo irreprehensibiles omninò & immaculati adherent ; profectò haud probasset Dionysius peccata immortalia frequentantes ad frequentem Communionem propelli.

Viguit quidem in Ecclesia primitiva Eucharistiæ frequentandæ mos ; sed usus ille præclarum compositi & expurgati, vel labis puri animi apparatus in frequentius adcuntibus supponebat : alii verò ad cœlestem mensam non solum non accersebantur, sed ne quidem eis mysteriorum celebrationi interesse concedebatur. Unde eâ sanctissimâ disciplinâ abuti non licet, ad eos Altaribus passim admovendos, qui beatis illis temporibus nec templi ingressu, nec mysteriorum aspectu dignati fuissent. Frequentem Communionem semper probavit, semper suasit Ecclesia : at promiscuè & indiscriminatim ad cibum illum divinum omnes seu nocentes, seu innocentes non admisit tamen. Veris Christianæ vitæ cultoribus & animabus puris frequentiore Communionem multùm afferre fructus Ecclesia semper credidit ; sanctum verò dandum canibus, margaritas ante porcos projiciendas, & sanctissimum Sacramentum in peccata mortifera relapsis statim ut è cœno emergunt donandum nunquam existimavit.

Idem etiam Magnus Basilius verbis luculentissimis docuit. Etenim *lib. 7. de Baptismo, cap. 3.* eo sensu ait Christum Dominum nobis corpus suum manducandum præcepisse in perpetuam mortis suæ commemorationem : *Quia scilicet nunquam verius mortis Christi memoriam recolimus, quàm cùm juxta eundem Apostolum recogitamus illum unum pro nobis omnibus mor-*

tuum, ut qui vivunt jam non sibi vivant, sed ei qui pro ipsis mortuus est: atque adeo nos erga mortem ipsius religiosos ac memores præstandos vita nostra castitate ac sanctimoniam, quam qui non habet, & ad sancta nihilominus accedit, horrendam sibi damnationem acquirit. Et postea subdit, eum contristare Spiritum sanctum, qui charitatem non habens qua urget nos ut illi soli vivamus qui pro nobis mortuus est, ad Eucharistiam tamen accedere non veretur.

Denique sic concludit: Oportet ut quisquis accedit ad corpus & sanguinem Domini in commemorationem ejus qui pro nobis mortuus est ac resurrexit, non solùm purus sit ab omni inquinamento carnis & spiritus, ne judicium sibi manducet & bibat; verùm etiam aperte palamque ostendat se memoriam ejus recolere, qui pro nobis mortuus est ac resurrexit, exhibendo se mortuum quidem peccato, mundo, ac sibi, viventem autem Deo in Christo Iesu Domino nostro. Ergo S. Basilio teste peccatores etiam post nudam peccatorum confessionem non sunt evestigio ad cœlestem mensam accersendi, si nondum ab omni carnis & spiritus inquinamento mundati sint; si peccato se mortuos manifestis indiciis & bonorum operum testimoniis non demonstrant, sique peccandi radices diu inolitas etiamnum viventes ac vigentes habent. Idem repetit in Moralibus, regulâ 80. cap. 22. ubi ait manducantem corpus Christi, & sanguinem bibentem debere ab omni inquinamento carnis & spiritus mundari, perficere sanctimoniam in timore Dei & charitate Christi, neque habere maculam aut rugam, aut aliquid ejusmodi, sed esse sanctum & immaculatum.

Eandem



Eandem doctrinam perspicuè expressit Gloriosus Martyr Cyprianus, incitata & vehementi in eos oratione in tractatu de lapsis invehens, qui sæviante persecutione lapsi nondum per asperam & diuturnam pœnitentiam justitiâ Dei pacatâ ad Sacramentorum usum admitti postulabant: *Emergit*, inquit, *Fratres dilectissimi*, *novum genus cladis*; & quasi parum procella persecutionis sævierit, accessit ad cumulum sub misericordia titulo malum fallens & blanda perniciēs. Contra Evangelii vigorem, contra Domini ac Dei legem temeritate quorundam laxatur incautis Communicatio. Irrita & falsa pax, periculosa dantibus, & nihil accipientibus profutura. Non querunt sanitatis patientiam, nec veram de satisfactione medicinam. Operiuntur morientium vulnera, & plaga lethalis altis & profundis visceribus infixâ dissimulato dolore contegitur. Persecutio est hæc alia, & alia tentatio, per quam subtilis inimicus impugnandis adhuc lapsis occultâ populatione grassatur, ut lamentatio conquiescat, ut dolor sileat, ut delicti memoria evanescat, ut comprimatur pectorum gemitus, statuatur fletus oculorum, nec Dominum graviter offensum longâ & plenâ pœnitentiâ depreceatur, cum scriptum sit: *Memento unde cecideris*, & age pœnitentiam.

Hinc idem sanctus pane cœlesti, quotidiano & supersubstantiali frequenter pascendos tract. de oration. Dominica ait, qui in Christo sunt, vivunt, ac manent, quive mortiferis peccatis à Christo non separantur; ideoque petunt panem illum quotidianum, ne aliquo delicto à cœlesti pane prohibeantur. Cui consonans Augustinus homilia 42. *Ergo panem nostrum quo-*

*tidianum da nobis hodie , inquit , quid est ? Sic vivamus , ut ab Altari tuo non separemur. Et immediate antè : Pro se rogant , ut bona faciant , ut in bonitate & fide , & vita bona perseverent : hoc optant , hoc orant ; quia qui non perseverant in bona vita , separabuntur ab illo pane.*

*Ambrosii , Augustini , & Chrysostomi  
luculenta proferuntur testimonia.*

Idem docet Ambrosius in libris de pœnitentia adversùs Novatianorum lapsis omnem veniæ & sumendæ unquam Eucharistiæ spem intercludentium crudelitatem conscriptis, in quibus licet magis in benignitatem quàm severitatem à dura illorum hæreticorum inhumanitate deflexurus propendeat , nihilominus tamen Ecclesiasticæ disciplinæ rigorem ullâ falsâ indulgentiâ & verâ crudelitate , quâ vitia foveantur , infringi non sinit his verbis lib. 2. cap. 9. *Nonnulli ideo pœnitentiam , ut statim sibi reddi Communionem velint. Hi non tam se solvere cupiunt , quàm Sacerdotem ligare ; suam enim conscientiam non exuunt , Sacerdotis induunt. Ne verò dicatur S. Patrem de peccatoribus publicis duntaxat sermonem habere , accipe verba clarissima , quibus lib. 1. cap. 16. hoc effugium præcludit : Si quis igitur occulta crimina habens , propter Christum tamen studiosè pœnitentiam egerit , quomodo istic recipit , si ei Communio non refunditur ? Volo veniam reus speret , petat eam lacrymis , petat gemitibus , petat populi potius fletibus ; ut ignoscatur obsecret , & cum secundo & tertio fuerit dilata ejus Communio , credat remissius se supplicasse , fletus au-*  
geat.

geat, miserabilior postea revertatur, teneat pedes brachiis, osculetur osculis, lavet fletibus, nea dimittat, ut de ipso dicat Dominus Iesus: *Dimissa sunt ei peccata multa, quoniam dilexit multum.* Idem præclare docet serm. Dominicæ 4. Adventus: *Mutet ergo vitam, qui vult accipere vitam; nam si non mutat vitam ad iudicium, accipiet vitam, & magis ex ipsa corrumpitur, quam sanetur; magis occiditur, quam vivificetur.* Sed apertissimè, & juxta pulcherrimè in Psalmum 128. idem docet & probat his verbis: *In ipsa Ecclesia, ubi maximè misereri decet, teneri quam maximè debet forma justitiæ, ne quis à Communionis consortio abstentus brevi lacrymulâ atque ad tempus paratâ, vel etiam uberioribus fletibus Communionem, quam plurimis debet postulare temporibus, facilitate Sacerdotis extorqueat. Nonne. cum uni indulget indigno, plurimos facit ad prolapsionis contagium provocari? Facilitas enim venia incentivum tribuit delinquendi.*

Id ipsum docuit Augustinus *epist. 118.* ubi duorum piè viventium hominum de Eucharistiæ usu controversiam refert; ubi licet duas de percipienda frequenter Eucharistia dissidentes sententias in medium adducat, supponit tamen totam illam controversiam controversiæque concordiam illos solùm attingere, ad eosque duntaxat pertinere, qui religionem vitâ factisque decorantes fidem spe roborant, spem charitate alunt, qui vel Zacchæi sacrâ fame ad Eucharistiam accedere avent, vel religioso Centurionis pavore ad eam se sistere verentur. Neuter, inquit, eorum exhonorat corpus & sanguinem Domini, si saluberrimum Sacra-



mentum certatim honorare contendunt. Neque enim litigaverunt inter se, aut quisquam eorum se alteri proposuit, Zacchæus & ille Centurio; cum alter eorum gaudens in domum suam suscepit Dominum, alter dixerit: Non sum dignus, ut intres sub tectum meum. Ambo Salvatorem honorificantes diverso & quasi contrario modo; ambo peccatis miseri, ambo misericordiam consequuti. Supponit etiam tanquam rem inter fideles suo tempore exploratissimam, & à nemine in dubium revocatam, Eucharistiæ usum ob peccata lethifera, quæ uno ictu animam perimunt, esse differendum. *Quasieris, quare?* inquit cum prima sententia. *Quoniam eligendi sunt dies, quibus purius homo continentiusque accedat, quo aut tantum Sacramentum dignius accedat:* qui enim manducaverit indignè, iudicium sibi manducat & bibit. :: *Hoc est enim indignè accipere,* inquit cum secunda sententia ex principio utriusque communi, & ab omnibus indubitanter admissio, *si eo tempore accipiat, quo debet agere poenitentiam, non ut arbitrio suo, cum libet, vel auferat se Communioni, vel reddat.*

Nec obest, quod ibidem ait, quod si peccata tanta non sunt, ut excommunicandus quisquam homo iudicetur, non se debet à quotidiana medicina Dominici corporis separare. Non obest, inquam, quia non eo modo excommunicationem accepit, quo eam eo tempore accipimus pro censura illa solenni, quæ ab Ecclesia per longas formularum moras gravioribus peccatoribus infligitur. Nam apud Augustinum excommunicare idem sonat ac à sacra Communionem & Altaribus prohibere; quæ poena omnibus & singulis mortalibus sceleribus, quæ contra se claudi



claudi faciunt regnum Dei, imponebatur, ut hoc temporario à sacra mensa ( quæ est imago cœli, à quo per peccatum mortale homo excluditur ) exilio æternum illud à cœlo exilium, quod peccator promeritus est, sibi proponat ac repræsentet, ratus dignissimum se esse qui à cœlesti cibo submoveatur, quique etiam tremendorum mysteriorum aspectu Christi realiter præsentis majestate deterritus recedat.

Idem tradit vir ille divinus *serm. 252. de tempore*, verbis luculentis, quæ inter officium Dedicationis consecravit Ecclesia, & in lectionibus cantanda præcepit: [ Ideo fratres charissimi, unusquisque consideret conscientiam suam; & quando se aliquo crimine ( per crimen verò peccatum mortale semper intellexit August. ) vulneratum esse cognoverit, prius orationibus, jejuniis vel eleemosynis studeat mundare conscientiam suam, & sic Eucharistiam præsumat accipere. Si enim agnoscens reatum suum, ipse se à divino Altari subtraxerit, citò ad indulgentiam divinæ misericordiæ perveniet. Quia sicut qui se exultat humiliabitur, ita è contrario qui se humiliat exaltabitur. Qui enim, sicut dixi, cognoscens reatum suum ipse se humiliter ab altari Ecclesiæ pro emendatione vitæ remove voluerit, ab æterno illo & cœlesti convivio excommunicari penitus non timebit. ] Sed nihil verbis illis apertius, quæ habet tractatu 26. in Joan. [ O Sacramentum pietatis! ô signum unitatis! ô vinculum charitatis! Qui vult vivere, habet ubi vivat, habet unde vivat. Accedat, credat, incorporetur ut vivificetur. Non abhorreat à compage membrorum: non sit putre mem-

„brum quod refecari mereatur ; non sit distortum , de quo erubescatur. Sit pulchrum , sit aptum , sit sanum. Hæreat corpori , vivat Deo , de Deo , nunc laboret in terra , ut postea regnet in cœlo. ] Quod & infrà verbis luculentissimis confirmat , quæ inter publicas lectiones Octavæ Sanctissimi Sacramenti Ecclesia inseruit.

Idem docuit Joannes Chrysostomus variis locis , qua affectione animi sacra adeunda Communio sit explanans ; homilia enim 24. in c. 10. 1. ad Cor. postquam aurea sua eloquentia dixit , *famem esse ac mortem mystici illius convivii communicatione non frui , mensam illam esse animæ nostræ robur , mentis cum Deo vinculum , fiducia nostræ firmamentum , spem , salutem , lucem denique ac vitam nostram : nos si sacrificii hujus participes è vita exceßerimus , magna cum fiducia cœli atria sacra ingressuros , quibusdam quasi aureis armis septos undequaque ac communitos : quin tanti mysteriorum virtute terram in cœlum converti ; siquidem quod in cœlis pretiosissimum est , maximèque venerandum , Angelorum scilicet omnium Regis ac Domini corpus nobis videndum exhibeat ; neque videndum modò , sed etiam contrectandum ac degustandum : subdit tamen adeundam esse Eucharistiam non sine fervore & inflammata atque ignita charitate ; ne in supplicium incurramus. Ut sacro quodam horrore perfundamur , & reverentiam multò majorem hic exhibeamus , quàm cum Magi procidentes Christum adoraverunt : ne si temerè & inconsideratè accesserimus , carbones ignis super caput nostrum congeramus. Hinc monet , ne nobis ipsis per impudentiam mortem consciscamus,*

consciscamus, atque ut non nisi tremebundi ac purissimi cœlesti illi mense accumbamus. Et rationem subjungit: *Christus aquilas vocat eos qui ad corpus suum conveniunt*, juxta illud Evangelii oraculum, *ubi corpus, ibi congregabuntur & aquila*: ut ostendatur hujusmodi animas sublimes & in cœlum erectas esse oportere, quæ nullum cum terra commercium habeant, neque deorsum trahantur aut repant rerum creatarum cupiditate illectæ; sed quæ indefinenter sursum evolent, ipsumque justitiæ Solem acutis ac perspicacibus mentis oculis intueantur. *Hæc enim mensa aquilarum est, non gracculorum.*

Præclara etiam in hanc rem verba habet *homil. 3. in cap. 1. epist. ad Ephes.* ubi postquam S. Doctor pravam ac perversam eorum negligentiam coarguit, qui mysteriorum contemptu & incuria salutis perarant & ferè nunquam ad sacram mensam accederent, dicatque: *Frustra est quotidianum sacrificium, frustra adstamus altari, nemo est qui participet*; non omnes tamen passim, promiscuè, & sine delectu in sacram mensam propellit: [Hæc non eò dico, (subdit S. Archiepiscopus post verba relata) ut participetis quocumque modo, sed ut vos dignos præstetis. :: Audis Diaconum stantem & proclamantem: Exeant quotquot sunt in penitentia. Si ex iis es, non debes participare. Multos video (prosequitur idem S. Doctor in eadem homilia) qui corpus Christi accipiunt, temerè & perfunctoriè, ideoque eo potius quod in usum ac legem quandam videatur abuisse, quàm quod judicio & ratione ducantur. Si Quadragesimæ tempus instet, aut

Min. 6.



„ Epiphaniæ celebritas , qualescumque tandem  
 „ illi fuerint , Sacramentorum participes fieri  
 „ volunt : at certè temporis ratio tempestivum  
 „ ad ea accessum non facit. Neque enim Qua-  
 „ dragessimæ , neque Epiphaniæ dies nobis con-  
 „ ferunt ut dignè accedamus ; sed animæ inte-  
 „ gritas , atque innocentia. Hæc si adsit , semper  
 „ accedito ; si absit , nunquam. Cogita quan-  
 „ tam adhibebant diligentiam ac reverentiam,  
 „ qui ad veteris sacrificii victimas participan-  
 „ das se accingebant ; quanto conatu ac studio  
 „ omnia agebant , ut omni ex parte puri ac mun-  
 „ di accederent. Tu verò qui hostiam attingis ,  
 „ quam vel ipsi tremebundi ac stupentes Angeli  
 „ venerantur , nihil aliud curas , nihil aliud ob-  
 „ servas , quàm stata temporum festorumque  
 „ recurrentium intervalla. Intuere vasa ipsa lo-  
 „ ta & tersa quanto nitore fulgeant. Atqui his  
 „ longè nitidiores oportet esse animas nostras ,  
 „ longè sanctiores & splendidiores. Illa enim  
 „ nonnisi nostrâ causâ tanto studio ador-  
 „ nantur. ]

Sed nihil illustrius , nihil expressius afferri  
 potest iis , quæ idem Pater divinitus sibi tradita  
 illâ cœlesti eloquentiâ fundit homilia 17. in  
 „ epistolam ad Hebr. [ Sed quoniam sacrificii  
 „ mentio incidit ( verba sunt ejus ) vobis qui  
 „ initiari estis pauca dicere cupio ; pauca qui-  
 „ dem , si verba numerentur , sed præclara ac  
 „ maxima , si utilitas ac pondus attendatur. Ne-  
 „ que enim dicta nostra , sed Spiritus sancti di-  
 „ ctata sunt. Quid igitur illud est ? Multi semel  
 „ in anno sacrificii hujus participes fiunt , alii  
 „ bis , alii sæpius. Ad hos ergo omnes mea  
 „ convertitur oratio ; nec solum ad eos qui hîc  
 „ adstant



„ adstant , sed ad eos etiam , qui in eremo de-  
„ gunt ; quippe qui semel tantum in anno , ple-  
„ rumque etiam post duos annos sacra Com-  
„ munionem impartiuntur. Quos, igitur potissi-  
„ mum laudabimus ? An qui semel , an qui fre-  
„ quentiùs , an qui rariùs Communionem  
„ adeunt ? Neque hos , neque illos ; sed eos de-  
„ mum qui cum puræ mentis conscientia , qui  
„ mundo corde , ac vitâ integrâ atque inculpa-  
„ tâ Christi corpore reficiuntur. Tales semper  
„ accedant ; cæteri nec semel accedant. Quid  
„ ita ? Quia iudicium sibi sumunt , & condem-  
„ nationem , & poenam , & supplicium. Quod  
„ sanè mirum videri non debet : nam quemad-  
„ modum alimentum quod naturâ suâ nutrien-  
„ di vim obtinet , si in ventriculum nauseantem  
„ atque impurum ingestum fuerit , ipsum gra-  
„ vat , damnis auget , atque adeo invecsta mul-  
„ tiplici corruptela morbos creat : idem quo-  
„ que iis accidit , qui malè affecto animo tre-  
„ menda illa perinde ac veneranda Sacramenta  
„ manducant. ]

Quid illis verbis planius , quid luculentius  
ad eos arcendos ab Altaribus qui non se arcant  
à criminibus , quique cordis puritatem & in-  
culpata vitæ integritatem sacræ mensæ non af-  
ferunt ? Quid illis porrò vocibus vel peccato-  
ribus terribilius , vel cœlesti cibo atque ipsa  
Chrysostomi sanctitate dignius ? Quid demum  
illis magis retinendum , quæ non tanquam dicta  
sua , sed tanquam Spiritus sancti dictata pro-  
nuntiat ? Hinc homilia de filio Prodigio , quæ  
habetur tomo 6. peccatores Christi sanguinis  
per peccata mortalia conculcati sibi conscios  
temporariâ ab Eucharistia secessione , & sacræ  
Commu

Communione dilatione, ut interim pœnitentia laboribus peccata eluant sua, sese ad cœlestem cibum præparare vult; expendens enim illam filii Prodigii pœnitentis & revertentis vocem, *Iam non sum dignus vocari filius tuus, fac me sicut unum de mercenariis tuis*; sic peccatorem conversum loquentem inducit: [ Ne me  
„ abigas ab aula tua, Domine, ut ne rursus  
„ me inventum hostis errantem velut captivum abducatur. Neque me ad tremendam &  
„ mysticam mensam accedere compellas. Non enim ausim impuris oculis Sancta Sanctorum  
„ intueri. Patere me tantum cum catechumenis in ima Ecclesiæ parte ad fores consistere,  
„ ut mysteria contemplans quæ in ea celebrantur, eorum rursus particeps sensim fieri concupiscam; ut sacris verbi divini laticibus perfusus sordes abstergam, quas aures meæ spurcarum cantilenarum auditâ turpitudine contraxerunt; ut cum margaritas tuas à sanctis viris piè rapi videro, ego quoque tantum muneris susceptione dignas manus habere studeam. ]

*Celebris Gennadii locus producitur.*

Idem quoque tradit author libri de dogmatibus Ecclesiasticis, Augustino perperam attributi, & Gennadio verè asserti. Sic enim habet cap. 53. [ Quotidie Eucharistiam percipere nec laudo, nec reprehendo. Omnibus tamen Dominicis diebus communicandum suadeo, & hortor; si tamen mens sine affectu peccandi sit. Nam habentem adhuc voluntatem peccandi, gravari magis dico Eucharistiæ percceptione

ceptione , quàm purificari. Et ideo quan-  
vis peccator mordeatur , peccandi de cæte-  
ro non habeat voluntatem , & communica-  
turus satisfaciatur lacrymis , & orationi-  
bus , & confidens de Domini miseratione ,  
qui peccata piæ confessioni donare consue-  
vit , accedat ad Eucharistiam întrepidus & se-  
curus. Sed hoc de illo dico , quem capitalia  
& mortalia peccata non gravant. Nam quem  
mortalia crimina post Baptismum commissa  
premunt , hortor prius publicâ pœnitentiâ  
satisfacere , & ita Sacerdotis iudicio reconci-  
liatum Communioni sociari , si vult non ad  
iudicium & condemnationem sui Euchi-  
ristiam percipere. Sed & secretâ satisfactione  
solvi crimina non negamus , sed mutato prius  
sæculari habitu , confesso religionis studio  
per vitæ correctionem , & jugi , imò perpe-  
tuo luctu , miserante Deo ; ita duntaxat ut  
contraria pro his quæ pœnitet agat , & Eu-  
charistiam omnibus Dominicis diebus sup-  
plex & submissus usque ad mortem perci-  
piat. ]

Quo in testimonio ponderandum est pri-  
mum , Gennadium quotidianam iustorum  
Communionem nec laudare , nec reprehende-  
re ; quia etsi aliquibus pietate & charitate rarâ  
præditis , putà B. Theresiæ profit quotidianus  
usus , multis tamen alijs divinorum reveren-  
tiam minuit , & in vita spiritali sæpe illud ex-  
periri est , quod apud Philosophos pervulgatum  
est : *Ab assuetis non fit passio*. Maxima etiam  
Dei benignitatis & potentiae opera , teste Au-  
gustino , usu vilescere solent. Unde nec lauda-  
tur ille mos non omnibus utilis , nec reprehен-  
ditur ,



nadio datae, & peccatoribus factæ consimile omnino est consilium & præceptum Stephani Papæ ad Aistulphum virum nobilem, qui nono sæculo vivebat. Cum enim vir ille uxorem zelotypiâ percitus occidisset, imposuit illi supremus Antistes, vel ut in Monasterium sub Abbatibus obedientia totâ vitâ subjiciendus secederet, vel in jejuniis, vigiliis, orationibus & elemosynis omni tempore perseverans, in Ecclesia segregatus ab aliis Christianis post ostium & postes humiliter se reponeret, & ingredientium & egredientium orationibus se suppliciter commendaret, Communionem corporis Domini totâ vitâ privandus, & in die duntaxat exitus per veniam & indulgentiam rescindendus, addens se remissiùs cum eo agere, ut refert Gratianus 33. *quest. 2. cap. 8.* & Burch. *lib. 6. cap. 40.* & Ivo *part. 8. cap. 126.* Ex quo decreto in Sanctorum Canonum corpus inserto videant Rectores animarum & discant, non peccatores, crudeli negligentia occidere, sed clementi severitate curare.

Ponderandum 4. illos solùm ad sacram Communionem octavo quoque die adeundam hortari oportere, qui & commissa peccata venialia lacrymis & orationibus abstergunt, & quorum voluntas peccatis venialibus affectu non adhæret; quia licet peccatis venialibus justiciam carere prorsus non possint, ipso tamen affectu & amore carere omnino possunt. Quo affectu si implicentur accedentes ad Eucharistiam, tum *Eucharistia perceptione*, inquit, *mens gravatur magis quàm purificatur.* Quod & S. Franciscus Salesius suo postea loco referendus disertissimè docuit & ex professo explicuit.

*Eadem*



*Eadem regula Hieronymi , Theodoretii,  
& Magni Gregorii testimoniis  
communitur.*

Hieronymus explicans illud Zachariæ cap. 9.  
*Frumentum electorum , & vinum germinans vir-  
gines* , sic ait : *Hunc panem iis comedendum* ,  
*qui in Christo robusti sunt ; bibendumque hunc*  
*vinum ab his virginibus , quæ sunt sanctæ & cor-  
pore & spiritu , ut inebriata atque gaudentes*  
*sequantur Ecclesiam , & dicatur eis : Adducen-  
tur Regi virgines post eam.* Quin non solum  
docet vitæ innocentiam Eucharistiæ sumptio-  
nem antecedere , sed etiam subsequi oportere.  
Interpretatus enim hæc Psalmi 77. verba, *Adhuc*  
*esca eorum erant in ore ipsorum , & ira Dei ascen-*  
*dit super eos* , sic fatur : *Hac de his , qui Deum post*  
*acceptum manna dereliquerunt.* Nam & nunc  
in Ecclesia si quis carne & sanguine Christi refi-  
citur & declinat ad vitia , noverit Dei iudicium  
imminere , sicut Paulus Apostolus ait : *Qui acce-*  
*perit corpus & sanguinem Christi indignè , judi-*  
*cium sibi sumit & bibit.*

Eiusdem sententiæ fuit Theodoretus variis  
in locis , sed nominatim in cap. 5. *Canticorum* ,  
ubi expendens hæc verba , *Comedite propinqui*  
*mei , & bibite , & inebriamini fratres mei* , sic  
habet : *Illius propinqui perfecti sunt , qui ejus*  
*imaginem inviolatam & incorruptam servant* ,  
*quique ipsi uniri summopere exoptant.* *Iis verò non*  
*ut bibant modo , verum etiam ut inebrientur*  
*imperat.* Quibus verbis inviolatam vitæ san-  
ctimoniam in Baptismate infusam , vel con-  
stanti

stanti pœnitentis vitæ infirmitate reparatam unam esse ad Eucharistiam dignè suscipiendam dispositionem attestatur.

Magnus etiam Gregorius *lib. 2. in cap. 1. lib. 1. Regum*, ejusdem est doctrinæ his verbis assertor ; exponens namque illud Cantici Annæ, *Repleti prius pro panibus se locaverunt, & famelici saturati sunt*, sic inquit : [ Non saturantur nisi famelici ; quia à vitiis perfectè jejunantes divina Sacramenta percipiunt in plenitudine virtutis. Et quia sine peccato electi etiam viri esse non possunt, quid restat, nisi ut à peccatis, quibus eos humana fragilitas maculare non desinit, evacuari quotidie co-  
nentur ? Nam qui quotidie non exhaurit quod delinquit, etsi minima sunt peccata quæ congerit, paulatim anima repletur, atque ei meritò auferunt fructum internæ saturitatis. Hac repletionem nos evacuare Paulus insinuans ait : Probet seipsum homo, & sic de pane illo edat, & de calice bibat. Quid enim est hoc loco probare, nisi evacuatâ peccatorum nequitiam, se probatum ad Dominicam mensam & purum exhibere ? De repletis etiam subdit : Qui enim manducat & bibit indignè, judicium sibi manducat & bibit. Qui ergo quotidie delinquimus, quotidie ad pœnitentiæ lamenta curramus ; quia ipsa sola virtus est quæ evacuat quod in ventre animæ culpa coadunat. Et tunc verè famelici saturantur, quia quod studiosius mundamur lamento pœnitentiæ, eo uberiores divinæ gratiæ fructum recipimus in spiritali refectione. ] Vides qualem quotidianæ pœnitentiæ fervorem etiam in justis sola duntaxat venialia admittentibus peccata  
ad

836 *Lib. XI. Pars II. Dissert. IV. Cap. II.*  
ad Eucharistiam suscipiendam desideret Magnus Gregorius, quia ei auferetur fructus internæ saturitatis, qui quotidie non exhaurit quod delinquit, etsi minima sunt peccata quæ congerit.

*Beati, Bernardi autoritate eadem regula firmatur.*

Idem tanquam certum & exploratum tradit D. Bernardus, vel quisquis alius est author libri de modo vivendi, *cap. 28.* his verbis: [ Qui  
„ Christi corpus vult accipere, prius studeat  
„ in Christi fide & dilectione manere. Hinc est  
„ quod ait Dominus in Evangelio: Qui man-  
„ ducat carnem meam, & bibit sanguinem  
„ meum, in me manet, & ego in eo. Ac si dice-  
„ ret: Ille in me manet, qui in bonis operibus  
„ voluntatem meam adimplet. Alioquin nisi  
„ prius maneat in me per fidem & bonam ope-  
„ rationem, & ego in eo, carnem meam man-  
„ ducare ( citra peccatum & sacrilegium scili-  
„ cet ) non potest, nec sanguinem bibere. ] At  
quomodo in Christo manet, vel in ipso per-  
manet Christus, qui nullam habet in solida  
pietate stabilitatem? Vox illa, *Manet*, firmi-  
tatem & constantiam in Scripturis significat.  
Unde Paulus *Hebr. 13.* peregrinationis nostræ  
fluxum expositurus ait: *Non habemus hic ma-  
nentem civitatem, sed futuram inquirimus.* Et  
divinus Præcursor *Ioan. 3.* iram Dei incredulis  
perpetuò adhæsuram comminatus, ait: *Qui  
incredulus est Filio, non videbit vitam, sed ira  
Dei manet super eum.* Ergo illi duntaxat dignè  
communicant, qui bonorum operum exercita-  
tione

tione stabilem & firmam in Christo perman-  
 tionem assequuti sunt. *signum*, inquit Augustinus  
 tract. 27. in Joan. *quod quis tunc panem man-*  
*ducavit* (quo nimirum modo manducare Chri-  
 stus voluit, & est manducantibus proficuum)  
*hoc esse, si manet, & manetur; si habitat, &*  
*inhabitatur; si haret, & non deseratur.* Ergo  
 vice versa, *signum* quod quis tunc panem di-  
 gnè non manducavit, hoc est, si temporaria &  
 momentanea sit in Christo commoratio, si ina-  
 nis conversio, si levis & volatica pœnitentia,  
 ex qua nihil solidi perpetuique fructus redun-  
 det, quàmve susceptæ Christianæ vitæ desertio  
 comitetur.

Rursum in aliis suis indubitatis operibus  
 eandem veritatem tradit, ut egregiè illustrat  
 Doctor Mellifluus. Etenim, *serm. 28. de diver-*  
*sis*, sic fatur. [ Quid istos agere dixerim, qui  
 „ scurrilitates, detractiones, jactantiæ & impa-  
 „ tientia verba non reputant; & cum his quasi  
 „ gens quæ fecerit justitiam accedunt libere ad  
 „ Ecclesiam, & ne ipso quidem tremendo An-  
 „ gelis participare verentur Dominici corporis  
 „ Sacramento? Quid, inquam, istos aliud age-  
 „ re dixerim, quàm securos jam de gratia Do-  
 „ mini sui fiducialiter de ea, quam longo tem-  
 „ pore promeruerint, familiaritate præsume-  
 „ re? ] Vides peccata frequentantes sacram fre-  
 quentare mensam non oportere, eosque qui  
 piam & Christianam vitam agere non student,  
 sed scurrilitati, jactantiæ, detractioni, aliisque  
 peccatis liberè indulgent, Communionum cre-  
 britate magis magisque cæcari atque obdurari.  
 Quod author operis de imitatione Christi *lib. 4.*  
*cap. 1.* his verbis deplorat: *Heu cecitas & duritia*  
*cordis*



*cordis humani ! tam ineffabile donum non semper attendere , & ex quotidiano esu etiam ad inadvertentiam defluere. Ergo explorandæ sunt, factisque pronuntiantibus probandæ vires nostræ, ne frequentior quàm par sit Communio nos refrigeret, non incendat igne illo divino, quem Christus mittere in terram venit.*

Sed longè præclarissimus ejusdem Bernardi locus habetur *serm. de B. Magdalena*, ubi duplex quo à Magdalena perfusus est Christus unguentum expendens, & ad mores inflectens, sic ait : [ Est unguentum bonum, quod Maria pedibus Salvatoris infudit. Est & melius quod eadem ( si tamen eadem ) super caput recumbentis effudit. Notanda utriusque differentia, & secundi sublimitas attendenda : quoniam illud ( scilicet unguentum pœnitentiæ ) est sacrificium Deo spiritus contribulatus : & illud ( scilicet Eucharistia, ut ex contextu liquet ) sacrificium laudis quod honorificat Deum. Pedes igitur ungimus Salvatoris, cùm de peccatis compungimur. Ungimus caput, cùm de collatis virtutibus virtutum largitori gratias cumulamur. Interstitii tamen morositas inter pedes debet esse & caput, quia profectò difficillimus & præsumptuosus saltus est à vestigiis ad verticem Domini transvolare. Neque enim eadem quæ unxit pedes, unxit & caput; cùm illa meretrix nihil horum fecisse legatur, secundùm illud : Verte impios, & non erunt. Unxit ergo Maria sanctum Domini verticem, profectò jam electa, jam familiaris effecta, longèque à peccatricis illius obvoluta vestigiis, quam infelix ille septenarius confundebat.

Cernis

Cernis ex hac præclarâ Bernardi oratione, *interstitii morositatem inter, sacrificium cordis contribulati, & sacrificium laudis esse debere;* nec post nudam gravium peccatorum confessionem satis quempiam esse paratum, nisi conversionis motum morum emendatio, & digni pœnitentiæ fructus, quibus peccator jam non idem permanet, sed alter evadit, consequantur.

*Eandem regulam Sanctus Bonaventura clarissimè docuit & probavit.*

Patres SS. Thomas & Bonaventura sequuti sunt. Prioris testimonia nitentissima producemus, ab eoque rationum momenta derivabimus. Posterior verò, nimirum Doct̃or Seraphicus D. Bonaventura pietate magis & eruditione quàm ætate Sancto Thomæ conterminus sic in *Brevil. part. 6. cap. 9.* luculentissimè scribit:

„ [ Quoniam capacitas nostra ad Christum sus-  
„ cipiendum non est in carne, sed in spiritu;  
„ non in ventre, sed in mente; & mens Chri-  
„ stum non attingit, nisi per cognitionem &  
„ amorem, per fidem & charitatem; ita quod  
„ fides illuminat ad recognitionem vel recor-  
„ dationem, & charitas inflammat ad devotio-  
„ nem : ideo ad hoc quod aliquis dignè acce-  
„ dat, oportet quod spiritualiter comedat, ut sic  
„ Christum per recordationem fidei masticer,  
„ & per devotionem amoris suscipiat, per quæ  
„ non in se transformet Christum, sed ipse po-  
„ tiùs trajiciatur in ejus mysticum corpus.  
„ Propter quod manifestè colligitur, quod qui  
„ tepide

„ tepidè , indevotè , & inconsideratè accedit,  
 „ judicium sibi manducat & bibit , quia tanto  
 „ Sacramento contumeliam facit. Et ideo con-  
 „ silium est his qui se sentiunt minùs mundos  
 „ mente vel carne , vel etiam indevotos , ut  
 „ differant quousque parati ad esum veri Agni,  
 „ mundi , devoti , & circumspecti accedant. ]

Sed longè præclarissimè in hanc rem scripsit  
 S. Bonaventura in 4. dist. 12. part. 2. art. 1. quæst. 2.  
 his verbis : *Si quaritur , utrum expediat frequen-*  
*tare ( Communionem ) alicui ? Dicendum,*  
*quod si videat se esse in statu Ecclesiæ primitivæ,*  
*laudandum est quotidie communicare ; si autem*  
*in statu Ecclesiæ finalis , utpote frigidum & tar-*  
*dum , laudandum est quod rarò ; si autem in*  
*medio modo , medio modo debet se habere : & ali-*  
*quando debet cessare , ut addiscat revereri ; ali-*  
*quando accedere , ut inflammetur amore ; quia*  
*tali hospiti debetur honor , debetur & amor ; &*  
*tunc secundum illam partem , quâ viderit se*  
*magis proficere , ad illud magis declinet , quod*  
*homo solum experienciâ discit. Omnes ergo ra-*  
*tiones ( in utramque partem à se initio produ-*  
*ctæ ) intelliguntur salvâ debitâ preparatione , qua*  
*est in paucissimis ut semper. Quibus unis verbis*  
*& nostram sententiam , & quidquid à multis*  
*copiosè disputari solet , brevissimè & solidissi-*  
*mè complexus est.*

*Sacri Tridentini Concilii doctrina eidem  
regulæ apertissimè favet.*

Eandem sententiam non obscurè tradit sacrum Concilium Tridentinum *sess. 13. cap. 8.*  
 „ his piissimis verbis : [ Paterno affectu admo-  
 „ net S. Synodus , hortatur , rogat , & obsecrat  
 „ per viscera misericordiæ Dei nostri , ut om-  
 „ nes , & singuli , qui Christiano nomine cen-  
 „ sentur , in hoc unitatis signo , in hoc vincu-  
 „ lo charitatis , in hoc concordix symbolo  
 „ jam tandem aliquando conveniant & con-  
 „ cordent , memoresque tantæ majestatis , &  
 „ tam eximii amoris Jesu Christi Domini no-  
 „ stri , qui dilectam animam suam in nostræ sa-  
 „ lutis pretium , & carnem suam nobis dedit ad  
 „ manducandum , hæc sacra mysteria Corporis  
 „ & Sanguinis ejus eâ fidei constantiâ & firmi-  
 „ tate , eâ animi devotione ac pietate & cul-  
 „ tu credant , & venerentur , ut panem illum  
 „ supersubstantialem frequenter suscipere pos-  
 „ sint. ] Quibus verbis optat quidem sacro-  
 sancta Synodus , ut fideles frequenter panem  
 illum suscipere possint ; verùm ad frèquentem  
 illam susceptionem fidei constantiam & firmi-  
 tatem , animi devotionem ac pietatem omninò  
 præcedere oportere constituit.

Simile votum fundit sancta Synodus *sess. 22.  
 cap. 6.* his verbis : Optaret quidem sacrosancta  
 Synodus , ut in singulis Missis fideles adstantes  
 non solum spiritali affectu , sed sacramentali  
 etiam Eucharistia perceptione communicarent ,  
 quò ad eos sanctissimi hujus Sacrificii fructus ubi-



*rior perveniret. Sed illis ipsis verbis quinam sacramentali Eucharistiæ perceptione communicare debeant, satis declarat, cum ait illos ea sacramentali perceptione esse dignandos, qui spirituali affectu Communionis participes esse possint. Explicaverat autem S. Synodus sessione paulò antè citata, quid sit spiritualis ille affectus, his verbis: Quoad usum autem rectè & sapienter Patres nostri tres rationes hoc sanctum Sacramentum accipiendi distinxerunt: quosdam enim docuerunt sacramentaliter duntaxat id sumere, ut peccatores; alios tantum spiritualiter, illos nimirum, qui voto propositum illum cœlestem panem edentes, fide viva qua per dilectionem operatur, fructum ejus & utilitatem sentiunt.*

Ergo ad Communionem frequentandam fidem vivam quæ per dilectionem operatur, quæque in bonorum frequentia fructum & utilitatem sanctissimi Sacramenti efficit, omnino desiderat. Quod & capite 7. antecedenti sacrum Concilium apertè significaverat: [ Si „ non docet, inquit, ad sacras ullas functiones „ quempiam accedere, nisi sanctè; certè quo „ magis sanctitas & divinitas cœlestis hujus Sacramenti viro Christiano comperta est, eo „ diligentius cavere ille debet, ne absque mag- „ na reverentia & sanctitate ad id percipien- „ dum accedat; præsertim cum illa plena for- „ midinis verba apud Apostolum legamus: Qui „ manducat & bibit indignè, judicium sibi „ manducat & bibit, non dijudicans corpus „ Domini. ] Ergo non omnes ex sacri Concilii mente ad Eucharistiam frequentandam propellendi

pellendi sunt, nec canibus ad vomitum peccati mortalis sæpe redeuntibus, & oculis Dei horribilibus filiorum panis sine ullo est delectu prodendus.

Quantum fuerit hujus doctrinæ æmulator viva antiquæ pietatis imago & nostræ forma S. Carolus Borromæus, luce clarius apparebit dum de Pœnitentia inferius differemus.

*Sancti Francisci Salesii, & Magistri  
Avila apertis testificationibus eadem  
regula stabilitur.*

Eandem veritatem vir Dei, dilectus Deo & hominibus S. Franciscus Salesius luculentissime docuit, & ex professo exposuit ac confirmavit in Philothea sua, *part. 2. c. 20.* his verbis:  
„ [ Quotidie Eucharistiam percipere nec lau-  
„ do, nec reprehendo. Omnibus tamen Do-  
„ minicis diebus communicandum suadeo &  
„ hortor; si tamen mens sine affectu peccandi  
„ sit. Utor ipsis B. Augustini verbis ( è libro  
„ nimirum de Ecclesiasticis dogmatibus, qui  
„ sub Augustini nomine passim circumfertur )  
„ quem sequens quotidianam Communionem  
„ omnino nec laudo, nec vitupero. At cernis  
„ Philothea D. Augustinum vehementer sua-  
„ dere atque hortari, ut die quoque Dominico  
„ Eucharistia percipiatur. Hoc ergo quoad po-  
„ teris facito. Cum enim te ab omni tum mor-  
„ talis, tum venialis peccati studio ac volunta-  
„ te alienam existimem, eam planè quam re-  
„ quirat Augustinus animi affectionem & præ-  
„ parationem es adepta, ] Et in fine capitis hæc

regulam statuit omnibus adversariorum effugiis imperviam : *Ut quis octavo quoque die Eucharistia Communionem percipiat, ab omni eum mortalis peccati labe, ab omni venialium peccatorum studio ac voluntate immunem esse, ac præterea sacra Eucharistia vehementi desiderio flagrare oportet.* Ergo ex mente sanctissimi illius Episcopi ad frequentem Communionem non solum exigitur immunitas ab omni peccato mortali, sed etiam ab affectu peccatorum venialium. Dico ab affectu ; nam ut rectè exponit idem Sanctus ejusdem libri *part. 1. cap. 22.* longè differunt peccatum veniale, & affectus peccati venialis. Venialia peccata omninò vitare nunquam possumus ; ipsorum verò affectu & amore carere omninò possumus, si nulli quantumvis levi peccato inhærendi voluntatem foveamus. Exigitur etiam, *ut quis percipienda Eucharistia vehementi amore flagret, seu ut ait Divus Bonaventura de profectu Religiosorum cap. 77. ut adsit inusitata devotionis fervor, & intemperata desiderii sitis pro illius susceptione, qui solus sufficit amanti animæ ardorem refrigerare.* Ex quibus patet quàm falsò, quàm immeritò, quàm indignè sanctissimi illius Præsulis purissimâ doctrinâ abutantur, qui consiliû ejus de Eucharistia singulis hebdomadis usurpanda à necessaria præparatione ab eodem indicta divellunt & distrahunt, atque ad quosvis promiscuè homines virtute vacuos, & in lethalia sæpe relabentes cibo illo grandium obruendos potius quàm fovendos detorquent.

Id ipsum antè docuerat eximix sanctitatis Sacerdos à Beato Francisco Salesio, & ab Alfonso Rodriguez non semel laudatus Joannes Avila,

Avila, qui i. *part. epist. 65.* hætenus stabilitam  
de frequenti Eucharistiæ usu doctrinam sic  
„ egregiè confirmat: [ Multùm errant qui so-  
„ lam Communionis cupiditatem à consuetu-  
„ dine potiùs quàm ratione veriore natam, pro  
„ idonea ad Eucharistiam præparatione ha-  
„ bent. Quod si præterea dum Christi corpus  
„ accipiunt lacrymulam exstillent, magnoperè  
„ se profecisse arbitrantur. Verùm eo falluntur,  
„ quòd Communionis fructum, quem nullum  
„ capiunt, non satis attendunt; neque intelli-  
„ gunt unicum probæ Communionis signum  
„ animi profectum esse, atque ad pietatem pro-  
„ gressionem, quam si assequantur, rectè ad  
„ Eucharistiam sæpiùs recurrunt: sin minùs, ab  
„ ea debent abscedere. Commonefaciendi sunt,  
„ quanti periculi sit ignem divinum sinu colli-  
„ gentem non incallescere, panem cœlesti vescen-  
„ tem ejus suavitate non imbui, præsentissimâ  
„ medicinâ utentem in summa nihilominus  
„ ægritudine jacere. Eripiendus illis cibus  
„ tanquam inertibus & ignavis, ut tanti boni  
„ penuriâ miseros se agnoscentes pluris illud  
„ faciant, sibi que laboris aliquid & sudoris sub-  
„ cundum intelligant, quo ad sacras epulas san-  
„ ctiùs se præparent, culpas in quas identidem  
„ incurrunt acriùs ulciscantur, earum medici-  
„ nam ardentius appetant, orationi ac bonis  
„ operibus toto pectore instent, ut ita instructi  
„ ac præculi cum interiori esurie ad cœlestem  
„ panem edendum properent: hic enim cibus,  
„ ut ait Augustinus, interioris hominis famem  
„ postulat. ]



*Senonensis & Bituricensis Synodi decretis  
eadem regula consentanea est.*

Eandem purissimam doctrinam variæ Synodi Provinciales docuerunt. Concilium enim Senonense anno 1528. contra nascentem Lutheri hæresim coactum erroribus illius Hæresiarchæ hunc accenset : *Nihil conducit ad susceptionem Eucharistia se præparare per contritionem, confessionem, satisfactionem, & alia bona opera.* Synodus etiam Augustensis anno 1548. celebrata quamplures affert causas in quibus Communio-  
nem vel negari prorsus, vel certè differri, quoad peracta fuerit pœnitentia, jubet : & post enumeratos varios illos casus, hanc generalem  
„ clausulam adjungit : [ Potest denique unus  
„ quilibet Confessor, cui curæ sunt animæ sibi  
„ confitentium, pro peccatorum magnitudine  
„ & gravitate, eisdem sibi confitentibus, seu  
„ filiis confessionis suæ, ex causa quæ sibi  
„ justa videbitur, ad tempus sacra Communio-  
„ ne interdicare, eique tales confitentes mo-  
„ rem gerere debent, nisi à superiori Ecclesia-  
„ stica potestate aliud impetraverint. Quod si  
„ peccatum occultum sit, & talis quispiam ad  
„ altare accedens, venerabile Sacramentum  
„ sibi porrigi publicè petat, non id illi Sacer-  
„ dos negare debet : quanquam hoc ipso quod  
„ contra sui Confessoris prohibitionem accedit,  
„ peccatum admittit. ]

Synodus etiam Bituricensis anno 1584. co-  
acta, titulo 22. cap. 15. *Nemo, inquit, sine con-  
tritione, confessione, & satisfactoriis operibus dig-  
nè*

nè pramunitus, ad Eucharistiam sumendam accedat. Ergo censebant Patres illi necessarium esse, & maxime salutiferum, lapsos ad accipiendum Christi corpus bonis operibus sese componere, eisque temporis aliquid ante Communionem tribuere. Titulo etiam 21. cap. 2. Sacerdotibus præcipit, ut *Canones pœnitentiales discant, ut modum & rationem pœnitentiæ injungenda melius intelligant*. Patet autem Canonibus pœnitentialibus addicere homines lapsos ad pœnitentiæ tempus, priusquam Communioni ipsis adjudicetur.

### *Testimonium Mariani Victorii adducitur.*

Eandem doctrinam exerte tradidit Marianus Victorius Episcopus Amerinus lib. de pœnit. cap. 7. *Vetus est institutio Ecclesiæ, inquit, ratione & veterum Sanctorum auctoritate firmata, ut quis ad Eucharistiam non accedat, nisi factâ prius peccatorum exomologesi, & pœnitentiâ illi à Sacerdote imposta ad finem usque perducta*. Pœnitentiam porro ante Communionem peragendam eam intelligit quæ peccatorum gravitati respondeat, ut ipsemet monet in commentario de pœnitentiis antiquis, quem libro de  
 „ pœnitentiâ adjunxit : [ Libet, inquit, in fine  
 „ hujus operis, omnes Christianos Sacerdotes  
 „ admonere, ne nimis remissi indulgentesque  
 „ in imponendis pœnitentiis sint. Ex hoc enim  
 „ non solum Ecclesiasticæ regulæ disciplina  
 „ omnis resolvitur, verum etiam nullâ injectâ  
 „ ex facinoribus præteritis verecundiâ homini-  
 „ bus rursus redeundi ad scelera non parva re-

„ linquitur occasio. Et hæc una, ut equidem  
 „ reor, præcipua causa est deploratæ propemo-  
 „ dum nunc prolapsæque religionis; & quod  
 „ hodie tam perfriktâ fronte, omnique Chri-  
 „ stiano pudore seposita crimina perpetrantur,  
 „ & Ecclesiastica vivendi regula passim contem-  
 „ nitur. Nam etsi arbitrariæ pœnitentiæ hodie  
 „ sint, Sacerdotis tamen arbitrium iudicio,  
 „ iustitia, & veritate inniti debet. Et quanvis  
 „ in tam corrupto & vitiatò sæculo severitas  
 „ ista, quam ex veteribus collectam in hoc  
 „ opere ante oculos Lectorum posuimus, ser-  
 „ vari modo aliquo non possit, propterea ve  
 „ remissa etiam sit; videat tamen Sacerdos, &  
 „ secundum quod expedire pœnitenti & Ec-  
 „ clesiæ ex qualitate perpetratorum criminum  
 „ adverterit, ex istis saltem Canonibus discat,  
 „ quantâ cura & diligentia pœnitentias seu pu-  
 „ blicas, seu privatas imponere debeat.]

*Egregiis Sancti Thomæ testimoniis, ejus-  
 demque rationibus eadem regula  
 confirmatur.*

A tam sanctæ regula omnium Patrum calcu-  
 lo probata desciscere non potuit fides Patrum  
 discipulus & interpretes Doctor Angelicus San-  
 ctus Thomas. In primis in hac quæstione 80.  
 art. 10. ubi quærit, *utrum liceat quotidie hoc*  
*Sacramentum suscipere*, postquam ostendit quod  
 etsi considerata hujus Sacramenti virtute, utile  
 sit ipsum quotidie sumere, subjungit tamen:  
 „ [Alio modo potest considerari ex parte su-  
 „ mentis, in quo requiritur ut cum magna de-  
 votione



„votione & reverentia ad hoc Sacramentum  
 „accedat : & ideo si aliquis se quotidie ad hoc  
 „paratum inveniat, laudabile est quod quotidie  
 „sumat. Unde Augustinus cum dixisset, Accipe  
 „quotidie, ut quotidie tibi profit, subjungit : Sic  
 „vive ut quotidie merearis accipere. Sed quia  
 „multoties in pluribus hominum multa impe-  
 „dimenta hujus devotionis occurrunt propter  
 „corporis indispositionem ( ex pollutione &  
 „actu conjugali, uti superius explicuerat pro-  
 „fectam, ) vel animæ, non est utile omnibus  
 „hominibus quotidie ad hoc Sacramentum  
 „accedere, sed quotiescumque se ad illud ho-  
 „mo invenerit præparatum. Unde in libro de  
 „Ecclesiasticis dogmatibus dicitur : Quotidie  
 „Eucharistiæ communionem accipere, nec  
 „laudo, nec vituperò. ] Atqui ille qui è pecca-  
 „torum cœno emergens, nullâ pœnitentiæ di-  
 „gnis fructibus probatæ præparatione purgatus  
 „in Dominicam mensam irrumpit, ille nec *cum ma-*  
 „*gna devotione & reverentia accedit.* Devotus  
 enim quomodo dicitur tanto qui torpore gra-  
 vatur, ut in eadem semper flagitia recidat ; cum  
 devotio, auctore S. Thoma, in animi ad divina  
 propensi prompta facilitate sita sit ? Quomodo  
 reverens, qui fumantibus adhuc vitiis tremen-  
 da mysteria invadit, qui difficillimo & præsum-  
 ptuoso saltu à vestigiis ad verticem Domini  
 transvolat, qui Sanctum Sanctorum squalido  
 ore, & nondum expurgatâ conscientia haurit,  
 & quasi gens quæ fecerit justitiam, ut supra  
 Bernardus aiebat, ipsi quidem verendo Angelis  
 participare non veretur Domini corporis Sa-  
 cramento.

Atqui rursus qui in peccata lethalia fre-



quenter relabitur, non se quotidie ad hoc Sacramentum paratum invenit, nec sic vivit ut quotidie mereatur accipere, sed multa habet devotionis impedimenta: cum contaminatissimam ac prorsus ethnicam vitam conterat; cum ex Confessionibus & Communionibus frequentatis nihil aliud fructus capiat, nisi improvidam Divinae misericordiae fiduciam, quâ nullum Evangelii præceptum exequens, viaque latâ ad interitum ducente securissimè grassans, salutem sibi nihilominus, felicitatemque despondet. Ergo ex S. Thoma, qui hujusmodi est, Eucharistiam frequentare non debet, nisi prius mente mutatus, vitam emendet, Deumque iudicem gemitibus & lacrymis, orationibus, jejuniis, eleemosynis, voluptatum contemptu, secessione, supervacaneorum conventuum fugâ, & omni demùm piorum operum genere placare studeat; ut idoneis captatis temporibus conversionem suam probet, mentemque suam per pœnitentiæ subsidia ita componat, ut ad mysteriorum omnium maximè terribile ac venerandum aditum muniat.

Quo autem modo peccatoris animum in illis præparationis interstitiis instrui oporteat, tradit idem Doctor Angelicus opusculo de Sacramento Altaris, cap. 15. his compendiosis, & succo plenissimis verbis: Si quis, inquit, ad suscipiendum Dominum benè mundus vult fieri, primò debet per aquam lacrymarum mundari: secundò per opera pœnitentiæ ( id est per jejunia, orationes, aliâque id genus, ut paulò inferius docet ) torqueri: tertio per fervorem amoris Dei à carnalium desideriorum humore seccari. Ergo non continuò quis frequentandæ Eucharistiae

ristiæ sit idoneus, quod eadem peccata Confessario exposuerit, retentis iisdem non minùs quàm olim moribus depravatis. Nec eam ille mundiciam à S. Thoma desideratam assequutus est, cujus tota mutatio in eo posita est, quod octavo quoque die ea narret Sacerdoti, quæ singulis antea mensibus aut annis enarrabat.

Ejusdem necessariæ moræ doctrinam apertissimè tradit idem S. Thomas, eamque Augustini autoritate confirmat in illud 1. Cor. II. Si nosmetipsos dijudicavimus, &c. ait namque: *Dicit Augustinus, Ab ipsa mente pœnitentis talis sententia proferatur, ut se indignum judicet participatione corporis & sanguinis Domini, ut ad tempus per Ecclesiasticam disciplinam à Sacramento cœlestis panis separetur.* Quibus verbis nihil planius. Et sanè si juxta veridicam ejusdem S. Doctoris sententiam, quam in 4. dist. 12. quest. 3. art. 1. quest. 3. nobis reliquit, à quotidiana communione abstinere debet is, qui sentiat per quotidianam frequentationem reverentiam minui, & fervorem non multùm augeri: quid sanè de iis dixisset, in quibus nedum fervor non multùm augetur, sed quorum etiam non minùs, sed quandoque magis peccandi consuetudine firmatæ avaritia, ambitio, cupiditas fervent; qui non minùs voluptati, impuditiæ, vinolentiæ, fallaciæ, perfidiæ, maledicentiæ, juramenti & blasphemii student; denique qui non minùs sæculi pomparum, quibus in Baptismo renuntiaverunt, nec minùs sui amantes sunt?

Ex his patet quantum à S. Thomæ doctrinæ castimonia quorundam recentiorum corruptela abhorreat, qui nedum laicis, sed & Sacerdotibus

tibus ( quorum status , character , & tessera sanctitas est ) post patrata nefandissima carnis peccata nedum Communionem , sed & sacramentissimorum mysteriorum tractationem & celebrationem concedunt , eosque à lupanaribus ( horribile dictu ) adhuc recentes , adhuc calentes ad tremenda altaria immittunt , inferunt , & quadantenus suis assertionibus propellunt. Si ita sit , frustra Doctor sanctus post Patres magnam animi sanctimoniam ad sacrum hoc epulum vescendum requirit , & magnam diligentiam , curam , & reverentiam in parando ad Eucharistiæ susceptionem animo postulat. Ergo sententia illa recenter invec̃ta , quæ quoslibet etiam gratiæ inanissimos , sæculo prodigaliter addictos , sui & mundi amore tumentes , & iteratis flagitiis cordis corrupti depravationem significantes ad tremendum mysterium post nudam confessionem admittit : tantum longè est à S. Thoma , quantum lux à tenebris , à die nox , & ortus distat ab occidente.

Si juxta D. Thomam quæst. 80. artic. 3. ad 2. *Peccatum fornicationis reddit hominem ineptum ad perceptionem hujus Sacramenti , in quantum scilicet per hoc peccatum spiritus maxime carni subicitur , & ita impeditur fervor dilectionis , qui requiritur in hoc Sacramento : quomodo ad frequentem Communionis usum non erit ineptus , qui nedum uno fornicationis simplicis actu vitam commaculavit , sed etiam fornicationis culpa leviori existimata , in adulteriis , stupris , aliisque infandis luxuriæ & libidinum monstris vitam consumpsit?*

Si juxta eundem doctum à Domino Præceptorem nocturna pollutio etiam citra peccatum



tum contingens ex quadam congruentia hujus  
 „ Sacramenti sumptionem impedit, [ quantum  
 „ ad duo, inquit quæst. 80. art. 7. quorum unum  
 „ semper accidit, scilicet fœditas corporalis,  
 „ cum qua propter reverentiam sacramenti non  
 „ decet ad altare accedere: aliud autem est  
 „ evagatio mentis, quæ sequitur pollutionem  
 „ nocturnam, præsertim quando cum turpi  
 „ imaginatione contingit. Et tunc, addit ad 3.  
 „ impedit sumptionem hujus Sacramenti per  
 „ illum diem, quo hoc accidit. ] Quid dixisset,  
 amabò, de pollutione voluntaria, de sacrile-  
 gio, de adulterio, de aliisque libidinum furiis  
 magis quàm lapsibus, contra naturam, ultra  
 jura naturæ patratis? Quid, inquam, dixisset  
 nisi quod scriptum inibi reliquit? *Si verò pollu-  
 tio, inquit, sit cum peccato mortali, impedit ex  
 necessitate. Et ad 1. Dicendum quod ex necessitate  
 quidem non impeditur homo à sumptione hujus Sa-  
 cramenti, nisi propter peccatum mortale.*

Sed fortè D. Thomas, inquires, loquitur de  
 peccato mortali, quod non eluerit præmissa  
 Confessio. Nihil minus. Nam il lam ipsam dif-  
 ficultatem versat in responsione ad 5. quod erat  
 „ hujusmodi: [ Peccatum veniale non impedit  
 „ hominem à sumptione hujus Sacramenti,  
 „ sed nec etiam peccatum mortale post pœni-  
 „ tentiam. Sed dato quod nocturna pollutio  
 „ provenerit ex aliquo peccato præcedenti, sive  
 „ crapulæ, sive turpium cogitationum, ple-  
 „ rumque tale peccatum est veniale; & si est  
 „ mortale, potest contingere quod de mane  
 „ pœnitet, & peccatum suum confitetur. Ergo  
 „ videtur quod non debet impediri à sumptio-  
 „ ne hujus Sacramenti. ]

Ecce



Ecce unum Recentiorum fulcrum, ecce quam totam ad Eucharistiæ esum requirunt etiam à pluries lapsis necessariam animi compositionem. Sed quid D. Thomas? Dicendum, inquit, *quod licet per contritionem & confessionem auferatur reatus culpe, non tamen auferatur corporalis immunditia, & distractio mentis ex pollutione consequuta.* Quid ergo de illis dicendum credidisset, non qui semel nocte præcedenti ceciderint, sed qui frequentibus & iteratis post tot sponfiones lapsibus pœnitentiam suam vel irrisoriam, vel certè inanem demonstrant? Utique non dixisset tremendam mensam extemplo esse adeundam, postquam scripsit & post pollutionem involuntariam eodem die esse abstinendum, & ordinariam impii frequentibus maximè lapsibus indurati justificationem non esse unius horæ, vel momenti opus. Est communis & consuetus cursus justificationis, ut Deo movente interius animam homo convertatur ad Deum: primò quidem conversione imperfecta, ut postmodum ad perfectam deveniat; quia charitas inchoata meretur augeri, ut aucta mereatur perfici, inquit 1. 2. quæst. 113. art. 10.

Si juxta Ecclesiæ præceptum à D. Thoma egregiis convenientiis illustratum, non solum animi, sed corporis etiam præparatione opus est: nam jejuni ad sacram mensam accedere debemus, nullo accepto cibo vel potu à dimidia antecedentis diei nocte ad illud usque temporis punctum, quo Eucharistiâ cibamur, ut nimirum Christus in os & stomachum hominis intret nullo terreno epulo occupatum: quomodo vel qua ratione Ecclesiæ sensibus consentaneum erit, peccatores amore mundi plenos & ebrios, adhuc

adhuc fumigantes, & à lupanari prodeuntes, quovis tempore, quovis modo, post quævis flagitia pane illo cœlesti pascere, & ad reverendum Christi corpus sine ulla dubitatione invadendum exstimulare, quod jejunum à vitiis animum potissimè requirit?

Si juxta æquissimum ejusdem Ecclesiæ sensum, qui matrimonio juncti sunt, aliquot dies à legitimo concubitu abstinere expedit, Davidis exemplo admoniti, qui paucis propositionis à Sacerdote accepturus purum se ab uxoris consuetudine servavit, ut *1. Reg. 21.* liquet: si teste Beato Gregorio à S. Thoma laudato, actus conjugalis non amore procreandæ sobolis, vel reddendî debiti causâ, sed solo voluptatis per se non prohibita illicio exerceatur, itaut voluptas dominetur in opere, homo vel mulier *tunc prohiberi debet; ne accedat ad hoc Sacramentum*, quam doctrinæ puritatem ex Hieronymo hauserit, qui in apologia pro libris adversus Jovinianum vehementer insectatur eos, qui post matrimonii usum, cùm in Ecclesiam ingredi præ justo pudore non auderent, eo exuto, sacrum cibum domi asportatum privatim sumebant; & cùm ad fubeundas basilicas Martyrum minùs puri sibi viderentur, ad Regem ipsum Martyrum in se recipiendum satis puros & integros esse censebant: si, inquam, ita sit, à fortiori iniquum & indignum est, ut qui recenter animum & corpus nefandâ luxuriâ polluit, Sanctum Sanctorum impuro & adhuc fœtenti ore & corde suscipiat, & quod horribile dictu est, si Sacerdos sit, pro Ecclesia solenniter oret, pro peccatoribus sacrificet, qui alienarum precum & lacrymarum misericordiâ eget.

Denique

Denique si authore Basilio *epist. 1. ad Amphiloc. can. 13.* qui in bello hostem interfecissent, ab Eucharistia temporario saltem Ecclesiæ interdicto removebantur: unde Theodosius post reportatam de Eugenio tyranno victoriam, quâ Christiani orbis tranquillitatem stabiliverat, cœlestem mensam attingere, & ad Altare manus justo licet cruore perfusas & resperfas afferre non ausus est tamen; & ut ait Ambrosius de obitu Theodosii, præclaram adeptus victoriam, tamen quia hostes in acie strati sunt, abstinuit à consortio Sacramentorum, donec Domini circa se gratiam filiorum experiretur adventu: qua fronte Christianus, non victor, sed prostratus, non triumphans de hostibus, sed innumeris vicibus victus, nec tam victus quàm à diabolo quieto jure possessus Dominum majestatis familiari frequentis Communionis usu contrectare, & in sinum qui hactenus fuit cloaca vitiorum, trajicere præsumeret?

*Fundamentalis hujus regulæ ratio.*

Non esset opus in præsentiarum Theologiæ ope vel rationum momentis: ipse communissimus pietatis sensus omnibus omninò Christianis inditus, ipse communis reverentiæ erga sanctissimum Sacramentum instinctus Catholicis omnibus inseminatus, ipsa sola præsentiae realis corporis Christi fides statutam regulam satis superque confirmat.

Etenim quibus fides Catholica persuasa est, quâ certissimè credimus Christum sub speciebus Eucharisticis realiter contineri, ægrè profectò ferent, mensam Christi peccatorum in eadem  
peccata



peccata relabentium, & è turpissimo flagitiorum cœno redeuntium frequentia pollui, tantique Sacramenti sanctitatem violari; sed ad fidem realis Christi præsentiæ omninò consonè, & per modum connaturalis corollarii consequenter inferent, removendos esse ad tempus è sacris Altaribus, qui cùm iisdem semper hæreant flagitiis, nullam futuræ emendationis spem ostendunt. Ergo priùs salutaribus pœnitentiæ officiis purgandi sunt, quàm ut panem Angelorum comedere liceat. Ergo priùs faciendum privatim, quod olim palam & publicè in Ecclesia factitabatur; id est, in dolore & labore pœnitentiæ ad virium rationem accommodato aliqua hebdomada aut mense faciendum, quod olim pœnites plures annos, in sacco, cinere, cilicio, jejuniis, vigiliis, omnimoda victus & cultus asperitate, assiduisque lacrymis & lamentis agebant. Ergo priùs evacuandum est pectus infandis cupiditatibus eructantibus ex hoc in illud, quàm ut tanti hospitatis receptaculum & reclinatorium fiat. Ergo ab immaculato Christi corpore ad tempus recedendum est, ut peccator interim sincera veriorque pœnitentia paratus, ad cœlestem cibum cum fiducia accedat; & ut Augustinus *serm. 50. & 52. de tempore* ait, à temporario sanctuario paulisper ultrò cedendum, ne ab æterno supremi Judicis sententia invitum abigat. Ergo priùs Publicanus Evangelicus imitandus, qui ne quidem eam templi partem, quam Sanctuarium dicebant, aspicere fas duxit. Priùs consecranda prædicata à Christo Chananeæ humilitas, quæ se pane filiorum indignam putans, solis micis è mensa decidentibus, hoc est, Patribus interpretantibus



pretantibus, verbi cœlestis pabulo refici interim contenta erat, quoad pane illo divino potiri digna fieret: ut nimirum salutari intermissæ Communionis intercapedine, mens sanctis actionibus & pœnitentiæ exercitationibus aptior & ornatiores evadat. Et tunc à sacra Communionem veluti indigni se abstinentes, hoc ipso se digniores efficiunt; à mensaque Christi recedentes, ad Christum accedunt, & reversi accipere Salvatorem, salutem consequuntur, juxta præclarum illud de Centurione *serm. 26. in Dedicat.* ab Ambrosio dictum: *O fides Christiana, qua totum cum humilitate impetrare consuevisi! Ecce religiosus Centurio ad accipiendam salutem dignior fit, dum se profitetur indignum. Ergo contradicente Centurione non pergit ad domum Dominus; non pergit Dominus, sed pergit Domini medicina. Non visitat agrum Salvator, sed visitat sanitas Salvatoris.*

Confirmatur: Ad frequentem Communionem requiritur magna devotio & reverentia; & ad ipsam Communionem desideratur sincera contriti cordis conversio, ut ex Divo Thoma, perpetua traditione, & lumine naturali, suppositâ fide, evidentissimum est. At qui in peccata mortalia iteratis lapsibus recidit, nec vera devotione, nec humili reverentiâ cietur, nec cor habet in Deum verè conversum. Etenim devotio est in justitiam cogitandam, amandam, operandamque proclivitas à dilectione Dei proficiens, cum sit charitatis flos, fructus, odor, & splendor, ut ex D. Thoma initio suæ Philothææ S. Franciscus Salesius egregiè exponit: homo verò à peccatis abstinere lethiferis non valens, utique non ad spiritualia, sed ad carnalia,

carnalia, terrenaque gravi pondere impellitur. Reverentia etiam in illo, seu sacer justitiæ Dei toties læsæ timor & tremor non invenitur, qui scelerum oblitus familiarem Christi consuetudinem ambit, & quasi esset sponsa sacri epithalamii, dicere non veretur: *Osculetur me osculo oris sui.* Quod osculum de Eucharistiæ esu Patres interpretantur. Certè si peccatorum suorum horrore & Christi præsentis majestatis timore commoveretur, utique cum Petro tremens & stupens diceret, *Exi à me Domine, quia homo peccator sum*: cum Centurione, *Domine non sum dignus, ut intres sub tectum meum*: cum muliere sanguinis fluxu laborante vestis tantum simbriam tangeret: cum muliere peccatrice stans retrò secus pedes Domini, non se illi coram offerret, pedes tantum osculari ac lacrymis rigare contentus.

Denique, quantum humanâ & christianâ prudentiâ conjicere licet, non est in illo sincera conversio, nec vera, sed falsa pœnitentia, seu ut aiunt Patres, pœnitentiæ larva. Nam pro converso habendus non est, qui nunquam facit quod semper promittit, qui ab infandis iteratiliisque sine emendatione spurcitiis adhuc libidinum igne flagrans, & fumo sordens, & fœtore graveolens emergit; ut propterea solâ interpositâ Confessionis morâ & veluti parenthesi, ad divina admittatur Sacramenta. Næ illi verò pœnitentiæ spiritu hoc ipso non agi credendi sunt, quod post flagitia ad tremendam mensam sine intermissione accedere non verentur? Nam nec Sacramenti dignitatem, nec sacrificii sanctitatem, nec Christi realiter præ-

sentis

sentis majestatem, nec turpitudinis suæ fœditatem apprehendunt.

Ergo hominibus hujusmodi in peccata mortalia relabentibus differenda communio est, quoad, ut ait Anselmus, per sacrificium spiritus contribulati, cordisque contriti Deum placantes, ad virtutum profectum studiosè contendunt, pro aliisque supplicet humilitas, suggerat contritio, intercedat mutatio.

*Solvitur objectio à Patrum autoritate  
petita.*

Dices: SS. Patres non semel eos reprehendunt qui ab Eucharistia diu se abstinere: ergo omnes ad Communionem frequentandam hortandi sunt.

Respondeo SS. Patres illud genus hominum æquissimis ac verissimis reprehensionibus exagitare, qui per desidiam & salutis incuriam à sacra Eucharistia se removere, nec interim de animo ad sacram mensam præparando ac componendo laborant: unde illi non ex reverentia ab amore & humilitate profecta, sed ex contemptu & fastidio cœlestis cibi (quod summam vituperationem meretur) à Christi corpore abstinere. Cæterum Patres eos non damnant, sed laudant, imitandosque proponunt & præcipiunt, qui mysteriorum augustâ majestate percussi, post patrata flagitia ab Eucharistia secedunt, eam ut purius postmodum ac sanctius suscipiant, eaque humilitate illam à qua prolapsi sunt morum integritatem sensim ac pedetentim redintegrent.

Hinc

Hinc recolendæ memoriæ S. Franciscus Salesius cohortationes Patrum octiduanam Communionem collaudantium ad pias mentes refert, quæ non modò à criminosis cupiditatibus, sed & à minimarum ac tenuissimarum offensiuncularum studio atque affectu liberæ sint. Unde lib. 2. epist. 38. ad primariam fœminam scribens: *Nolim*, inquit, *filiam tuam ad frequentem adeo Communionem adducas, nisi antea quid sit communio frequens rectè perpendere noverit. Aliud est Communionem ab aliarum rerum perceptione; aliud frequentem communionem à rariori communionem secernere. Si tenella illa anima satis perspicit, ad hoc mysterium crebrius adeundum magna mentis puritate, magnaue flagrantia opus esse; si ad eam enitatur, si eâ sese ornare studeat; tum verò sapius, hoc est decimoquinto quoque die eam ad illud admovendam assentior. Sin communionis tantum percipiendæ, non levium puerilis ætatis macularum eluendarum studio tenetur, confiteri eam octavo quoque die, & mensura tantum communionem uti commodius censeo. Sacra communio, charissima filia, summo, ut mihi quidem videtur, ad perfectionem comparandam adjumento est. Sed eam ita à nobis adiri oportet, ut quidquid Deo, quem recipere volumus, displicet, evellendi atque amovendi studium acre ac diligens asseramus. Quid ergo sensisset B. Episcopus de hominibus sæculo immerlis, variisque sceleribus obnoxiiis, postquam puerilis ætatis offensiunculas octiduanæ Communioni impedimento esse definivit.*

Idem antè docuerat Venerabilis Presbyter Avila 1. parte, epist. 64. *Noli sinere*, inquit alloquens



quens nonnullum animarum rectorem, eos ad Dei mensam accedere quoties cupient. Multi enim animi levitate potius, quàm intimo pietatis ac venerationis sensu Eucharistiam adeunt. Unde accidit, ut ex ea nihil fructus capiant, nec meliores efficiantur. Quod quidem damnum animæ permagnum est, & quoad fieri potest summo- perè vitandum. Fac ut mysterii hujus sublimitati profunda ac religiosa animi dejectione se substernant. Quod si quem secus se habere deprehenderis, argue illum, cœlestemque panem ei subtrahere, quoad illum vehementer concupiscat, sequæ eo indignum fateatur. Vulgus fidelium ter quaterve per annum; alios novies, aut decies; Religiosos decimoquinto die Communionem percipere satis fuerit. Conjuges tertia quaque hebdomada, vel singulis mensibus idem præstare commodè poterunt. In quibus autem eximium quemdam Dei zelum atque amorem sic fervere perspexeris, ut eorum in vita sanctitate incrementum atque progressus quasi ad oculum pateat, iis octavo quoque die sacra Communionem vesci licebit. Nisi fortè aliud suadere videatur aut fames ardentior, aut reverentia insignior, aut tentatio acrior, aut necessitas manifestior. Quæ quidem animadvertenda in nonnullis, & prudenter gubernanda sunt. Rarum autem eorum genus existimo, quibus sæpius quàm octavo quoque die Communionem adire conveniât.

Id ipsum antè docuerat S. Bonaventura, non solum locis suprâ memoratis, sed etiam *lib. 2. de profectu Religiosorum*, c. 77. ubi de Religiosis conditione sua ad sacram Eucharistiam utique „ paratioribus instituendis agens, sic habet: [ Si „ aliquis desiderat experiri, utrum sit melius sæpius

„ sæpius an rarius Corporis Christi suscipere  
„ Sacramentum, videtur mihi quod non possit  
„ super hoc omnibus dari regula uniformis.  
„ Varia sunt hominum merita, & diversa ope-  
„ rum studia, & differentia desideria, & multi-  
„ plices Spiritus sancti operationes in singulis,  
„ & diversæ etiam status in Religione. Et ideo  
„ sicut ægrotantibus non potest una forma ser-  
„ vari in dandis medicinis corporis, propter  
„ diversitates complexionum aut loci, aut tem-  
„ poris, aut dietæ, aut aliarum consideratio-  
„ num, pro quibus aut rarius aut sæpius, aut  
„ majori aut minori quantitate eadem medici-  
„ na datur: ita de medicina spirituali, quæ est  
„ Corpus Christi, intelligendum. Mundanis  
„ enim curis occupati rarius possunt se ad illud  
„ recipiendum expedire, quàm illi qui tantum  
„ spiritualibus studiis sunt intenti. Præterea alii  
„ magis, alii minùs sunt circumspecti in custo-  
„ dia vitæ suæ, & morum, & conscientiæ suæ  
„ puritate. Vix tamen aliquis ita religiosus esse  
„ videtur & sanctus, exceptis Sacerdotibus, quin  
„ semel in septimana sufficiat ei ex consuetudi-  
„ ne communicare, nisi specialis causa quan-  
„ doque vel ratio plus suadeat. Infirmitas su-  
„ perveniens, vel singulariter festivitas solen-  
„ nis, vel inusitatæ devotionis fervor, & in-  
„ temperata desiderii sitis sit pro illius suscep-  
„ tione, qui solus sufficit amanti animæ ardo-  
„ rem refrigerare. Et quia talis ardoris impetus  
„ non nisi à Spiritu sancto est, ut creditur, ideo  
„ legibus humanæ consuetudinis & statutis  
„ mortalium non arctatur.] Verbis tam per-  
„ spicuis, tam splendidis, tanta rationum mole  
„ vallatis,

§64 *Lib. XI. Pars II. Dissert. IV. Cap. II.*  
vallatis, tam spiritali discretione conditis nihil attinet adjicere.

### TERTIA REGULA.

*Negotiorum honestorum multitudo  
bonos Christianos à frequenti Com-  
munionem non submovet.*

SI talis ac tanta, qualem descripsimus, ad Communionem animi compositio & præparatio desideraretur, nullus (dicer aliquis) penè sacram Eucharistiam adire deberet, aut posset; cùm omnes fermè negotiis aut occupationibus distenti sint, quibus impediuntur quominus tam accuratè se præparent. Id autem absurdum est & durum. Quomodo igitur quæ de frequentis Communionis usu stabilivimus, sunt veritati consentanea?

Verùm nequaquam id sequitur, si quæ diximus rectè intelligantur. In primis licet in Communionem præfinienda, ejusque temporibus constituendis aliqua cujusque occupationum habenda sit ratio; illud tamen certissimum est, Christianos piè sanctèque viventes, & Christi in Eucharistia latentis amore casto flagrantès à cœlesti cibo recipiendo occupationum & negotiorum honestorum multitudine minimè esse prohibendos. Occupationes enim honestæ & Reipublicæ utiles, Dei vocatione susceptæ, & ex charitate absolutæ, orationis



is & diligentioris ad Eucharistiam præparationis locum & vicem implent, cum qui eas sanctè obeunt, illud Scripturæ mandatum juxta Patres impleant, *Sine intermissione orate.*

Sine intermissione enim orat, qui sine intermissione in illis functionibus, quibus à Deo alligatus est, propter Deum operatur. Sine intermissione orant Sacerdotes, Parochi, & Episcopi occupatissimi suis muneribus incessanter addicti, id est sacris studiis, pauperum causis, litibus componendis, casibus conscientiarum resolvendis, ignaris erudiendis, concionibus parandis pronuntiandisque, Ecclesiis visitandis jugiter incumbentes, ob quæ à sacra quotidie faciendo ( nisi interdum præ reverentia secedant ) abstinere nequaquam debent. Sine intermissione enim orabant nascentis Ecclesiæ Christiani in rerum domesticarum cura, familiarum administratione, manuum etiam juxta Apostoli præceptum labore continenter versantes.

Itaque nec Magistratûs officia, nec familiæ negotia, nec laboris instantia christiano animo peracta impedimento, sed potius adjumento sunt Eucharistiæ usurpandæ. Sicut è contra qui levibus vel nullis occupationibus detinentur, sed totam hebdomadam in voluptatum, ambitionis, & avaritiæ studiis otiosi conterunt, ad Eucharistiam proximo Dominico suscipiendam ideo idonei censendi non sunt, quod aliquod tempus in evolvendis nonnullis precationibus impendunt. Temporis enim & spatii, ut dixi, ad sacram Communionem sese accingendi nonnulla ratio habenda est, sed longè major meritorum cujusque, animi affectuum.



866 *Lib. XI. Pars II. Dissert. IV. Cap. II.*  
morum, probitatis, vitæ integritatis, sancti Spi-  
ritus munerum ac donorum, quæ in viris etiam  
occupatissimis sæpe non desunt.

## QVARTA REGVLA.

*Peccata venialia justorum frequen-  
tem Communionem non prohi-  
bent : eorum tamen affectus  
Communionis dilationem exi-  
git.*

**A**ccuratè cum B. Francisco Salesio pecca-  
ta venialia ab affectu & studio peccatorum  
venialium distinguenda sunt. Peccata venialia  
à sacræ Communionis usu non prohibent : pec-  
catorum venialium amor & affectus ( qui ope-  
ribus utique dignoscitur & occasionum fugien-  
darum incuriâ & voluntario neglectu innotes-  
cit ) prohibet. In peccatis etiam venialibus at-  
tendenda , non confundenda ac permiscenda  
diversitas est. Alia enim insidiosè obrepunt, alia  
à volentibus & scientibus suscipiuntur ; & lon-  
gè alia eorum habenda ratio est, quæ ignoran-  
tia vel fragilitas parit , atque eorum quorum  
malitia, & usus mater est ; & studiosius redi-  
menda sunt quæ charitatem lædunt , vel scan-  
dalo sunt , vel quæ multitudine animi cando-  
rem infuscant, quàm in quæ naturæ imbecilli-  
tate assidue incurrimus aut impingimus.

Hinc præclare Augustinus serm. 244. *Noli,  
inquit, despicere peccata tua, quia parva sunt.*  
Nam

Nam & pluviarum guttae sunt, sed flumina implent, & moles trahunt, & arbores cum suis radicibus tollunt. Tu qui dicis, quia parvum peccatum est, velim scire quoties tale peccatum admittis, si tot parvulas plagas in corpore, & tot maculas aut scissuras in vestibus tuis fieri velis? Cum ergo in corpore tuo plagas, nec in veste tua scissuras vel maculas fieri acquiescis, quam conscientia tot facere in anima tua non erubescis? Ac sic quicumque hoc fecerit, plus amat vestiem aut carnem suam quam animam. Cum enim ad imaginem Dei facti simus, quoties aliquid turpe aut loquimur aut facimus, toties Dei imaginem sordidamus. Etiam videte, si hoc deceat vos, aut oporteat. Verè dico vobis, Fratres charissimi, quia non hoc Deus de nobis meretur, ut in nobis imago ipsius per malas concupiscentias injuriam patiatur. Et cum nullus homo velit cum tunica sordibus plena ad Ecclesiam convenire, nescio quam conscientia cum anima per luxuriam (non utique lethiferam, sed venialem, qualis est in iis qui in matrimonio per se licito intemperanter ac extra liberorum procreandorum iustissimum finem utuntur; de illis enim inibi sermonem habet Doctor sanctissimus) sit inquinata, presumit ad altare accedere, non timens illud quod Apostolus dixit: Qui enim manducac corpus, & sumit sanguinem Domini indigne, reus erit corporis & sanguinis Domini. Si erubescimus ac timemus Eucharistiam manibus sordidis tangere, plus debemus ipsam Eucharistiam intus in anima polluta suscipere.

Augustinum sequutus est Magnus Gregorius lib. 2. in 1. Reg. cap. 1. his notandissimis verbis;

*Qui quotidie non exhaurit quod delinquit, eisi minima sint peccata qua congerit, paulatim anima repletur, atque ei merito auferunt fructum interna saturitatis. Hac repletionem nos evacuare Paulus insinuans ait: Probet seipsum homo, & sic de pane illo edat, & de calice bibat. Quid est enim hoc loco probare, nisi evacuata peccatorum nequitia se probatum ad Dominicam mensam & purum exhibere?*

Patribus consentiunt S. Bonaventura, & S. Franciscus Salesius. Posterioris verba retulimus. Prior verò *lib. de preparat. ad Missam*, his præclaris verbis mentem suam aperuit: [ Proba  
 „ teipsum ex quanta charitate, & quali fervore  
 „ accedis. Non solum enim mortalia vitanda  
 „ sunt, sed etiam venialia peccata per negligenti-  
 „ am & otium multiplicata, & etiam per in-  
 „ considerationem ac per distractionem disso-  
 „ lutæ vitæ & malæ consuetudinis, licet non  
 „ occidant animam, tamen reddunt hominem  
 „ tepidum, gravem & obnubilatum, & indispo-  
 „ situm, & ineptum ad celebrandum, nisi dicti  
 „ pulveres & stipulæ venialium per afflatum  
 „ Spiritus & flammam charitatis ventilentur &  
 „ consumantur, exardescente igne cordis, &  
 „ ex consideratione propriæ vilitatis. Ideo ca-  
 „ ve ne nimis tepidus & inordinatus accedas;  
 „ quia indignè sumis, si non accedis reveren-  
 „ ter, circumspectè, & consideratè. Unde Apo-  
 „ stolus: Judicium sibi manducat & bibit. Quod  
 „ apertiùs insinuat dicens: Ideo inter vos im-  
 „ becilles multi, scilicet per fidei inconstan-  
 „ tiam; & infirmi, id est gravi peccato saucia-  
 „ ti; & dormiunt multi, scilicet per torporem  
 „ & desidiam. O quàm graves angustiae me  
 „ undique

„ undique affligentes ! Accedere indignè , hor-  
 „ rendum ; non accedere ex notabili negligèn-  
 „ tia vel contemptu , damnabilis est culpa. ]  
 Quam doctrinam factis suis vir sanctus , &  
 Deus miraculo comprobavit : cùm enim tanti  
 mysterii reverentia & sacro horrore perculsus  
 aliquot dies ab Altari secessisset , ut humiliati  
 cordis sacrificio Deum honoraret , viri Sera-  
 phici humilitate Christus delectatus particulam  
 hostiæ in os ejus immisit.

Hanc sanctissimam doctrinam non solum  
 verborum suorum autoritate , sed & vitæ suæ  
 exemplis factisque Sancti docuerunt. Hinc vir  
 divinus Joannes Chrysostomus , quod animum  
 suum nonnihil semel commotiorem senserit,  
 alium Episcopum ut sacrum faceret rogavit ; &  
 referente Palladio vitæ ipsius oculato teste , *Sa-*  
*criticium offerre noluit* , sed altæ reverentiæ sensu  
 perfusus è templo venerabundus excessit. Hinc  
 sanctissimus vir & Doctor à Deo Ecclesiæ pro-  
 visus Hieronymus , ipsomet in opere contra  
 Vigilantium attestante , quando subiratus fue-  
 rat , vel aliquid mali in animo cogitavit , vel  
 nocturno fuerat phantasmate delusus , *Basilicæ*  
*Martyrum* , inquit , *intrare non audeo , ita totus*  
*& corpore & animo contremisco. Rideas forsitan* ,  
*addit , & muliercularum deliramenta subsannes.*  
*Non erubesco earum fidem , quæ primæ viderunt*  
*Dominum resurgentem , quæ mittuntur ad Aposto-*  
*los , quæ in multis à Domini Salvatoris sanctis*  
*Apostolis commendantur.*

Si ob iracundiæ motum , ob cogitationem  
 intemperatiorem , ob nocturnam illusionem  
 sæpe & ferè semper in Sanctis culpa vacantem ,  
 ne in Basilicas quidem Martyrum ingredi , &



Sanctorum reliquiis adstare audebat Hieronymus, quomodo ad altare tremendum aspirare, Dominumque majestatis, cujus præsentia & gloria Angelos ipsos sacro horrore percellit, sustinere potuisset?

Hinc Magnus Gregorius metuens ne suâ culpâ pauperculus in vico urbi vicino fame & egestate interiisset, per aliquot dies à sacris Altaribus secessit, & cœlestium sibi ipsi mysteriorum celebratione interdixit. Hinc S. Romualdus Religiosos, qui orationis tempore somni obrepentis illecebris aliquantulum cessissent, ne sacrum facerent prohibebat. Hinc S. Bernardus laudat S. Malachiam, quòd Diaconum nocte præcedenti humanum aliquid passum, & die sequenti ad altare ministrantem his verbis castigaverit: *Non debueras hodie ministrasse, sed verecundè te subtrahere sacris, & deferre tantis tamque divinis mysteriis, ut hac humilitate purgatus digniùs deinde ministrares.* Hinc S. Thomas Catuariensis, quòd Regis leniendi, ac Cleri à vexatione vindicandi causâ nonnihil de solita propugnandæ Ecclesiasticæ libertatis firmitate remisisset, seipsum à sacrificio exclusit, nec ad Altare nisi obtentâ Summi Pontificis absolutione regressus est. Hinc S. Carolus cum in Ecclesiæ ritibus nonnihil peccasset, pluribus diebus à tremendo sacrificio recessit, pluribus recessurus, nisi populi studiis & devotioni cedendum existimasset. Hinc Beatus Franciscus Salesius *libra secundo, epist. 39.* illustrem fœminam ob vocolas acerbiores, quæ ipsi per impatientiam excidere solebant, à Confessario frequentioris Communionis solatio rectè multatam existimat; tum ut ex maculæ humilitate absterge

abstergerentur; tum ut ad eas fugiendas diligentior in posterum evaderet; tum ut illius obedientiæ periculum fieret, & in ea pœnitentiâ quoad Confessarius jussu, perstandum existimavit. *Nunquam enim, addit dicta sua ratione confirmans, salubrior cibus est, quàm cum ab exercitato & esuriēte percipitur. Intervallo autem esuries atque appetentiā crescet: comprimendâ verò impatientiâ exercitatione stomachi spiritualis vis ac firmitas redintegrabitur.* Hinc sanctæ memoriæ Bartholomæus à Martyribus Bracharensis Archiepiscopus, ut refertur in ejus vitæ tam eleganter & juxta piè annis superioribus gallicè scriptæ *lib. 4. cap. 27.* tametsi singulis fermè diebus divina mysteria faceret, quò gravissimarum functionum labores levaret; & interruptum negotiorum mole charitatis ardorem instauraret: unum tamen cujusvis hebdomadis diem seligebat, quo à Communionē se abstinens & reverentiæ suæ sensum significaret, & majorem cœlestis cibi appetentiā concitaret. Desideriis enim humilitate temperatis, & cum vitæ integritate conjunctis mirum in modum animus apparatus. Nam ut ait Sanctus Anselmus tract. de Sacramento Altaris: *Hunc cibum plus manducat, qui amplius amat; & plus amando rursus, qui plus manducat & plus amat.*

### *Solvuntur objectiones à ratione depromptæ.*

Dices 1. Nunquam Ecclesiā postulavit ante Communionem plures dies agendæ pœnitentiæ tribui; nec unquam talem usum aut praxim

tenuere Patres : illi solùm à sacra Communion-  
ne abstinebant, qui ob atrociam crimina publicæ  
pœnitentiæ subiciebantur, quoad reconciliati  
essent. Ergo Ecclesiæ sensibus nostra doctrina  
non congruit.

Respondeo falsissimum esse hujus argumenti  
antecedens ; cùm contrà certissimum sit, prio-  
ribus Ecclesiæ sæculis morem doctrinæ nostræ  
consentaneum in Ecclesia viguisse. Etenim cùm  
sancti Patres recensiti in ea sententia fuerint, ut  
post commissa mortifera peccata, qualiacumque  
tandem essent, plurimis diebus pœnitentiam  
agi oportere existimarint antequam ad Eucha-  
ristiam accederetur, manifestum est Sanctos il-  
los eam doctrinam à se traditam, à se prædi-  
cando scribendoque inculcatam ad mores pra-  
ximque semper & ubique reduxisse : alioquin  
similes Phariseis dixissent & non fecissent, con-  
tradixisset doctrina moribus, & simulatâ pietate  
veraque hypocrisis in duplicem iniquitatem in-  
currissent. Absit à Sanctis, absit ab Ecclesiæ Pa-  
tribus hæc fallax fraudulentaque ars aliud do-  
cens, aliud efficiens ; cùm de unoquoque eorum  
verè illud intelligatur : *Qui fecerit & docuerit,*  
*hic magnus erit in regno cælorum;* omnesque &  
singuli illius discipuli fuerint, qui *cœpit facere &*  
*docere.* Factis etiam & exemplis doctrinam con-  
firmasse suam, in fine responsionis ad proximè  
superiorem objectionem clarissimè monstravi-  
mus.

Hinc S. Cæsarius Arelatensis Præsul sexti  
sæculi, in quo floruit, Ecclesiæ sensum expri-  
mens, *homil. 8.* ait peccata quidem venialia &  
minuta esse quotidie redimenda infirmos visi-  
tando, in carcere positos requirendo, discordes  
ad

ad concordiam revocando, indicto ab Ecclesia jejunio jejunando, hospitibus pedes abluendo, ad vigiliis frequentius conveniendo, elemosynas ante ostium prætereuntibus dando, inimicis nostris quoties petierint indulgendo. *Pro capitalibus verò criminibus* ( addit loquens de sacrilegio, adulterio, homicidio, falso testimonio, furto, rapina, superbia, invidia, avaritia, diuturna iracundia, ebrietate assidua, ut patet ex contextu ) *non hoc solum sufficit, sed addenda sunt lacryma, & rugitus, & gemitus, continuata & longè protracta jejunia, largiores elemosynæ, etiam plus quàm nos ipsi valere possumus eroganda, ultrà nos ipsos à Communione Ecclesia removens, in luctu & tristitia multo tempore permanentes.* Quibus verbis nihil planius, nihil luculentius, nihil apertius dici potest.

Dices 2. Eucharistiæ interdictio excommunicatorum pœna est, qua & ab Ecclesia, & à Sacramentis arcentur: Ergo non cujusque modi peccatorum mortalium hæc pœna est, nec arcendi sunt ab Altaribus qui in peccata lethalia, quibus excommunicationis pœna annexa non est, prolapsi sunt.

Respondeo quod licet his temporibus excommunicatio certis tantum peccatis, gravibus illis quidem per longas formularum observationumque moras insigatur, qua desperati & insanabiles peccatores, ne per plures serpent dira contagia, pastoralis necessitate tanquam oves morbidæ à sanis separantur, quæ est veluti ultimum Ecclesiæ in contumaces fulmen; nihilominus tamen antiquitus verbum *Excommunicare*, idem sonabat ac *pœnitentes*



§74 *Lib. XI. Pars II. Dissert. IV. Cap. II.*

anteacta scelera ex animo averſantes à Communionē & Altaribus arcere & prohibere ; quæ quidem pœna omnibus peccatis mortalibus irrogabatur , quamve pœnitentes ultrò ſibi imponebant , ſemetipſos à Communionē pro ſuo reatu ſuspendentes , ne ab altari quod in cœlo eſt removerentur , ut *hom. 13.* docet S. Cæſarius ,  
 „ Arelatenſis : [ Ut qui ſeparari , inquit S. Au-  
 „ guſtinus *homil. 50.* à regno cœlorum timet  
 „ per ultimam ſententiā ſummi Judicis , per  
 „ Eccleſiaſticam diſciplinā à Sacramento cœ-  
 „ leſtis panis interim ſeparetur. Verſetur ante  
 „ oculos imago futuri judicii , ut cū alii ac-  
 „ cedunt ad altare Dei , quò ipſe non accedit,  
 „ cogitet quā ſit contremiſcenda illa pœna,  
 „ quā percipientibus aliis vitam æternā , alii  
 „ in mortem præcipitantur æternā. ]

Hinc authore S. Eligio *hom. 8.* pœnitentes veſtibus ex hœdorum pilis contextis in ſiniſtra Eccleſiæ parte ſe collocabant , ut ſe peccatis factos dignos agnoſcerent & profiterentur , qui ad ſiniſtram inter hœdos in die judicii collocarentur. Unde huic damnationis imagini & formæ ultrò ſe ſubjiciebant , ut ab æterno convivio non arcerentur , illa Apoſtoli voce freti :  
*Si nosmetipſos dijudicavimus , non utique judicavimus.*

Hinc B. Cyprianus quartam orationis Dominicæ poſtulationem explanans : [ Hinc panem , inquit , dari nobis quotidie poſtulamus , ne qui in Chriſto ſumus , & Euchariſtiam quotidie ad cibum ſalutis accipimus , intercedente aliquo graviore delicto , dum abſtenti & non communicantes à cœleſti pane prohibemur , à Chriſti corpore ſeparemur. ] Ad quem locum

Iocum alludens Augustinus lib. de dono perse-  
 ,, ver. cap. 4. [Hæc verba sancti hominis Dei, in-  
 ,, quit, perseverantiam à Domino Sanctos indi-  
 ,, cant poscere, quando hac intentione dicunt,  
 ,, Panem nostrum quotidianum da nobis hodie,  
 ,, ne à Christi corpore separentur, sed in ea  
 ,, sanctitate permaneant, quâ nullum, quo inde  
 ,, separari mereantur, crimen admittant.]

Hinc Concilium Turonense III. canon. 22.  
*Episcopis, inquit, & Presbyteris diligenti cautela  
 pertractandum, qualiter hominibus sua sibi deli-  
 cta confitentibus tempus abstinendi præscribant, ut  
 juxta modum peccati poenitentibus abstinencia (à  
 sacra Communione) indicatur.*

Hinc Ivo Carnotensis epist. 230. testatur mo-  
 ris fuisse, ut crimina sua confitentes aliquandiu  
 à corporis & sanguinis Christi Communione Ec-  
 clesia suspenderet. Hinc denique Augustinus sæ-  
 pe testatur pro quolibet crimine poenitentes  
 excommunicatione, id est à cœlesti pane se-  
 cessu plecti; & hunc morem in omnibus Eccle-  
 siis sua ætate viguisse, ut refert epist. 108. *Quia  
 hoc est indignè corpus Christi accipere, si eo illud  
 tempore quis accipiat, quo debet agere poeniten-  
 tiam.* Illis ergo frequens Eucharistiæ usus per-  
 mittebatur, quorum moribus sanctitas chri-  
 stiana non dedecorabatur, quorum fides spe-  
 roborabatur, spes charitate alebatur; qui quo-  
 tidie peccabant, quia homines erant; sed gravi-  
 ter non peccabant, quia veri Christiani erant.  
 Veri enim Christiani tessera est lethalia vitare  
 peccata. Cùm cœperit ea non habere homo, de-  
 bet autem non habere omnis Christianus homo,  
 incipit caput erigere ad libertatem, inquit idem  
 Augustinus.

Dices 3. per pœnitentiam verè delentur peccata, restituitur gratia, reviviscunt virtutes, fit homo Deo gratus, & infusis cœlestis gratiæ muneribus mundatur: Ergo non debet statim post pœnitentiam impediri, quominus sic per Sacramentum instructus ad Eucharistiæ Sacramentum homo convolet.

Respondeo pœnitentiam à Patribus, & deinceps à Theologis trifariam dividi: alia enim est quæ Baptismum antecedit, qua peccatorem de peccatis à se nondum regenerato patris pœnitebat; alia est quotidiana peccatorum venialium, quæ omni ex parte effugere justî non possunt; alia est pœnitentia pro peccatis mortalibus, quæ sine Ecclesiasticarum clavium autoritate remitti nequaquam possunt. Hujus divisionis sæpe meminit Augustinus, ex quo eam desumpsit Angelicus noster Doctor ultimo Summæ Theologicæ articulo, his verbis: *Pertinet ad pœnitentiam ut detestetur peccata præterita cum proposito vitam immutandi in melius, quod est quasi pœnitentia finis. Et quia moralia recipiunt speciem secundum finem, conveniens est quod diversa species pœnitentia accipiantur secundum diversas immutationes quas pœnitens intendit. Est autem triplex immutatio à pœnitente intenta. Prima quidem per regenerationem in novam vitam, & hac pertinet ad pœnitentiam, qua est ante Baptismum. Secunda autem immutatio est per reformationem vita præterita jam corrupta, & hac pertinet ad pœnitentiam mortalium post Baptismum. Tertia autem immutatio est in perfectiorem operationem vita, & hac pertinet ad pœnitentiam venialium, qua remittuntur per aliquem ferventem actum charitatis.*  
 Porro

Porro huic tertiæ pœnitentiæ separatio à sacra Communione semper adjungebatur, ut peccator post violatam Baptismi innocentiam, & offensam Dei majestatem interim concussus debitam flagitiis suis pœnam agnosceret, hacque humilitate, aliisque pœnitentiæ exercitationibus dignum se præstaret, cui ad sacram Communionem rursus aditus pateret. *Restat ergo tertium pœnitentia genus*, inquit Augustinus *hom. 27. cap. 3.* sermonem habens de pœnitentia, quæ ad delicta mortifera pertinet; unde aliquid breviter dicam, ut adjuvante Domino proposita & promissa persolvam. Est pœnitentia gravior atque luctuosior, in qua propriè vocantur in Ecclesia pœnitentes, remoti etiam à Sacramento altaris participando, ne accipiendo indignè, judicium sibi manducent & bibant.

Hac ratione nihil limpidius, nisi forè hæc ejusdem Augustini verba *hom. 50. cap. 2. & 3.* ubi  
 „ expositâ præfatâ divisione sic habet. [ Tertia  
 „ est actio pœnitentiæ, quæ pro illis peccatis  
 „ subeunda est, quæ legis Decalogus conti-  
 „ net, & de quibus Apostolus ait, Quoniam qui  
 „ talia agunt, regnum Dei non possidebunt. In  
 „ hac ergo pœnitentia majorem quisque in se  
 „ severitatem debet exercere, ut à seipso judi-  
 „ catus non dijudicetur à Deo, sicut idem Apo-  
 „ stolus ait: Si enim nos judicaremus, à Domi-  
 „ no non judicaremur. Ascendat itaque homo  
 „ adversum se tribunal mentis suæ, si timet il-  
 „ lud quod oportet nos exhiberi ante tribunal  
 „ Christi, ut illud recipiat unusquisque quod  
 „ per corpus gessit, sive bonum, sive malum.  
 „ Constituat se ante faciem suam, ne hoc ei po-  
 „ stea fiat, nam minatur hoc Deus peccatori: Ar-



„ quam te , & statuiam contra faciem tuam. At-  
 „ que ita constituto in corde iudicio , adsit ac-  
 „ cusatrix cogitatio , testis conscientia , carni-  
 „ fex timor. Inde quidam sanguis animi con-  
 „ fitentis per lacrymas profluat. Postremò ab  
 „ ipsa mente talis sententia proferatur , ut se in-  
 „ dignum homo iudicet participatione Corpo-  
 „ ris & Sanguinis Domini : ut qui separari à  
 „ Regno Cœlorum timet per ultimam senten-  
 „ tiam summi Iudicis , per Ecclesiasticam dis-  
 „ ciplinam à Sacramento cœlestis Panis interim  
 „ separetur. :: Quomodo ergo in interiora  
 „ veli , & in illa invisibilia Sancta Sanctorum  
 „ introire audebit aut poterit , qui medicinam  
 „ cœlestis disciplinæ contemnens , noluit pau-  
 „ lisper à visibilibus separari ? Qui enim voluit  
 „ humiliari ut exaltaretur , cum exaltari volue-  
 „ rit deicietur , & in æternum sejungetur ab  
 „ æternis Sanctis. ]

Quin passim supponit Augustinus , hanc  
 Communionis privationem fuisse semper pec-  
 „ cati mortalis reo annexam : [ Qui violavit  
 „ Sacramentum ( Baptismi ) inquit homil. 41.  
 „ malè & perditè vivendo , & ideo remotus est  
 „ ab Altari , ne iudicium sibi manducet & bi-  
 „ bat , mutet vitam , corrigat se , & reconcilie-  
 „ tur cum vivit , dum sanus est. :: Ergo quæ  
 „ veraciter egerit pœnitentiam , & solutus fue-  
 „ rit à ligamento quo erat obstrictus & à Chri-  
 „ sti corpore separatus , quandocumque de-  
 „ functus fuerit ad Deum vadit. ] Hinc pecca-  
 „ tores post Baptismum in peccatum mortale  
 sponte sua labentes comparat Adamo , quate-  
 „ nus sicut iste constitutum Deum inter & ipsum  
 fœdus violavit , ideoque ligno vitæ orbatus est ,

ita

ita peccator ictum cum Christo in Baptismate  
foedus dirumpit, ideoque ab Eucharistia ar-  
cendus: *Alienandus Adam fuerat à ligno vite,*  
inquit lib. II. de Genes. ad litt. cap. 40. *vel jam*  
*moriturus, vel etiam tanquam excommunicatus:*  
*sicut etiam in hoc Paradiso, id est Ecclesia, so-*  
*lent à Sacramentis altaris visibilibus homines dis-*  
*ciplinâ Ecclesiasticâ removeri.*

Dices 4. longas illas, & laboriosas satisfa-  
ctiones ante absolutionem & Communionem  
præmitti solitas, ipsam etiam ab Eucharistia se-  
parationem publicis tantum peccatis eluendis  
institutas fuisse: Ergo privatis arcanisque pec-  
catoribus non est idem pœnitentiæ rigor im-  
ponendus, neque ullum à Communionem abscen-  
dendi tempus præscribendum.

Respondeo prorsus esse à veritate alienum,  
hanc religiosam abstinenciam & dilationem  
peccatoribus duntaxat publicis ad populi exem-  
plum, sarcindum Ecclesiæ honorem, & quæ  
in ipsam redundaverat ex Christianorum sce-  
leribus infamiam eluendam duntaxat fuisse im-  
positam. Veritas enim est, ob occulta arcana-  
que peccata, quibus pernotis damnum pœni-  
tenti potuisset obvenire, putà ob adulterium  
mulieris publicâ pœnitentiâ pervulgatum, vel  
in suspicionem vocatum, unde mulieri incom-  
moda, vel etiam mors imminerent, peccatores  
impositam pœnitenciam, & ad Eucharistia se-  
cessum statuto Canonibus tempore, authore Ba-  
silio *epist. 2. ad Amphiloeh. can. 34.* observasse.  
Quæ quidem pœna non ob sola publica, sed  
ob occulta quoque; non in aliorum duntaxat  
exemplum, sed in lapsorum potissimum salu-  
tem indicebatur.

Id etiam evidentissimè vel ex eo apparet, quod Clerici sacris ministeriis addicti, etsi publicæ pœnitentiæ ob peccata secreta, quàmlibet gravia obnoxii non essent, ob mortiferum tamen peccatum ab altari depulsi pœnitentiæ clam diuque vacare jubebantur. *Alienum est à consuetudine Ecclesiastica* ( inquit Magnus Leo epist. 82. ) *ut qui in Presbyterali honore, aut qui in Diaconi gradu fuerint consecrati, ii pro crimine aliquo per manus impositionem remedium accipiant pœnitendi* ( scilicet publicè. ) Unde hujusmodi lapsis ad promerendam misericordiam Dei privata est expetenda secessio, ubi illis satisfactio, si fuerit digna, sit etiam fructuosa. Refert etiam Sozomenus lib. 8. cap. 6. Gerontium Diaconum ob admissum crimen, S. Ambrosii imperio, prescripto tempore manere domi, & pœnitentia expiari fuisse jussu, ut precibus, lacrymis, variisque castigationibus ultrò susceptis Deo satisfaceret. Refert etiam Gratian. dist. 92. cap. *Presbyter*, decretum Concilii Hibernici, quo jubetur ut Presbyter in fornicationem lapsus annos decem pœniteat, & tribus quidem mensibus privato loco à ceteris remotus pane & aqua à vespera in vesperam utatur, sacco indutus humi adhæreat, die ac nocte jugiter misericordiam Dei omnipotentis imploret; finitis tribus mensibus exeat, tamen in publicum non procedat, ne grex fidelis in eo scandalum patiatur. Nec enim debet Sacerdos publicè pœnitere sicut laicus. Unde patet Sacerdotes ab Eucharistia fuisse prohibitos, tamen pœnitentiæ publicæ jugo colla non submitterent. Unde S. Prosper seu Julianus Pomerius lib. 2. de vita contempl. cap. 7. in eos Sacerdotes acriter invehitur, qui

peccati

peccati lethalis conscii, abstinere se ab altari propter homines erubescunt, nec ipsi in se voluntaria excommunicationis sententiam ferunt. Quos interim monet, ut ab altari, cui ministrabant, non animo, sed officio separati, vitam tanquam mortuam plangant, certi quod reconciliato sibi efficacis pœnitentia fructibus Deo non solum amissa recipiant, sed etiam cives superna civitatis effecti, ad gaudia sempiterna perveniant. Certum ergo est, cuilibet peccato mortali, quo Baptismi sanitas deperit, verecundum à Communionem secessum semper fuisse annexum, ut interim variis pœnitentiæ exercitationibus & sanitatem peccator recuperaret, & ad reconciliationem atque Communionem sibi aditum faceret; atque expiatis salutari satisfactione criminibus, & animo in Christiana pietate obfirmato, absolutionis & Communionis beneficio viam sterneret ac muniret.

Dices 5. Peccatoribus trimum suorum indulgentiam plenariam Ecclesia sæpe indulget: Illi autem plenariè non indulgetur, cui Communionis dilatio imponitur: Ergo doctrina nostra non videtur indulgentiarum assertioni consentanea.

Respondeo quod sicut verum non est vero contrarium; ita potestas clavium, à qua indulgentiæ proficiscuntur, Ecclesiæ collata non est necessitati pœnitentiæ & peccatorum probationi in Scripturis, Patribus, & ab Ecclesia per suos Concionatores tantoperè inculcatæ adversa. Ecclesiæ misericordiam demonstrant Episcoporum, & Romani præsertim Antistitis indulgentiæ, quia ut præclarè scripsit Cyprianus epistol. 55. ad Cornelium fratrem: [Nec Ecclesia



„clesia cuiquam clauditur , nec Episcopus  
 „alicui denegatur , patientia , facilitas , & hu-  
 „manitas nostra venientibus præsto est. Opto  
 „omnes in Ecclesiam regredi , opto univer-  
 „sos commolitiones nostros intra Christi ca-  
 „stra concludi. Remitto omnia , multa dissi-  
 „mulo , studio & voto colligendæ fraterni-  
 „tatis etiam quæ in Deum commissa sunt,  
 „non pleno iudicio religionis examino , deli-  
 „ctis plus quàm oportet remittendis penè  
 „ipse delinquo : amplector promptâ & plenâ  
 „dilectione cum pœnitentia revertentes , pec-  
 „catum suum satisfactione humili & simplici  
 „confitentes. ] Sed tanta , omnibusque oblata  
 indulgentis Matris Ecclesiæ clementia pœni-  
 tentiæ ad expurgandum componendumque  
 animum tantoperè necessariæ non repugnat:  
 sed sicut nefarium est iustitiam Dei à miseri-  
 cordia sejungere , ita & pœnitentiam per in-  
 dulgentias ad nihilum redigere. Et magnæ ter-  
 ribilis Dei vindictæ argumentum est , cum quis  
 misericordiâ Dei & Ecclesiæ indulgentiis abu-  
 tens , dignos non satagit facere fructus pœ-  
 „nitentiæ. [ Ira Dei est , ait ibidem Cypria-  
 „nus , non intelligere delicta , ne sequatur  
 „pœnitentia. Primus felicitatis gradus est non  
 „delinquere : secundus delicta cognoscere.  
 „Illic currit innocentia integra & illibata,  
 „quæ servet : hîc succedit medicina , quæ sanet.  
 „Unde concludit , quod honor Deo non red-  
 „ditur , quando sic Dei maiestas & censura  
 „contemnitur , ut cùm se ille indignari &  
 „irasci sacrificantibus dicat , & cùm pœnas  
 „æternas & supplicia perpetua comminetur ,  
 „proponatur à sacrilegis atque dicatur : Ne ita  
 cogitetur

„ cogitetur Dei , ne timeatur iudicium Domi-  
„ ni , ne pulsetur ad Ecclesiam Christi : sed  
„ sublatâ pœnitentiâ pax à Presbyteris verbis  
„ fallacibus prædicetur. ]

„ Et libro de lapsis : [ Cùm scriptum sit , Qui  
„ vos felices dicunt , in errorem vos mittunt,  
„ & semitas pedum vestrorum turbant : qui  
„ peccantem blandimentis adulantibus palpat,  
„ peccandi fomitem subministrat ; nec compri-  
„ mit delicta ille , sed nutrit. At qui consiliis  
„ fortioribus redarguit , simul atque instruit  
„ fratrem , promovet ad salutem. Quos diligo,  
„ inquit Dominus , arguo, & castigo. Sic opor-  
„ tet & Dei Sacerdotem non obsequiis deci-  
„ pientibus fallere , sed remediis salutaribus  
„ providere. Imperitus est Medicus , qui tu-  
„ mentes vulnerum sinus manu parcente con-  
„ trectat , & in altis recessibus viscerum virus  
„ inclusum dum servat exaggerat. Aperendum  
„ vulnus & secandum , & putaminibus ( alii le-  
„ gunt putraminibus , id est putredinibus ) am-  
„ putatis medelâ fortiore curandum. Vocifere-  
„ tur & clamat licet & conqueratur æger impa-  
„ tiens per dolorem ; gratias agat postmodum  
„ cùm senserit sanitatem. Emerfit enim , fra-  
„ tres dilectissimi , novum genus cladis ; & quasi  
„ parùm procella persecutionis sævierit , ac-  
„ cessit ad cumulum sub misericordiæ titulo ma-  
„ lum fallens, & blanda pernicies. Contra Evan-  
„ gelii vigorem , contra Domini & Dei legem  
„ temeritate quorundam laxatur incautis com-  
„ municatio ; irrita & falsa pax , periculosa  
„ dantibus , & nihil accipientibus profutura.  
„ Non quærunt sanitatis patientiam , nec veram  
„ de satisfactione medicinam. Pœnitentia de  
peccato

„ peccatoribus excussa est, gravissimi, extre-  
 „ mique delicti memoria sublata est. Operiun-  
 „ tur morientium vulnera, & plaga lethalis al-  
 „ tis & profundis visceribus infixæ dissimulato  
 „ dolore contegitur. A diaboli aris revertentes  
 „ ad sanctum Domini sordidis & infectis nido-  
 „ re manibus accedunt. ]

Itaque nunquam intendit indulgentiis Ec-  
 clesiæ misericordia ut peccatores exhalantibus  
 adhuc scelus suum faucibus, & contagia fune-  
 sta corporibus dolentibus, Domini corpus in-  
 vadant. Quia alioquin, ut ibidem gloriosus An-  
 tistes & Martyr ait, *vis infertur corpori ejus &*  
*sanguini.* Nec est pax, quam verbis fallacibus  
 venditant, sed bellum. Unde in omnibus Ponti-  
 ficiis diplomatibus illis indulgentia etiam in  
 Jubilæo conceditur, qui *pœnitentia saluari* se  
 supposuerint. At salutaris non est, sed fallax &  
 illusoria est, quæ in verba sonantia, non in  
 facta pronuntiantia erumpit. Certè sicut annua  
 Communio capite *Omnis utriusque sexus*, tam  
 rigidè sub interminatione anathematis impera-  
 ta, judicio tamen Sacerdotis eodem capite per-  
 mittitur Communione dilatio, si ad salutem  
 pœnitentis noverit expedire: ita Indulgentiæ,  
 & Jubilæi gratia Sacerdotem ad citò peccatores  
 absolvendum, & ad altaria permovendum non  
 astringit, nisi quem satis invenerit ad sacras  
 epulas comparatum: ineptum verò summovere  
 à Dominica mensa tenetur, quoad tanto Sacra-  
 mento & Indulgentiarum beneficio recipiendo  
 fiat idoneus.

Et præclaram horum omnium rationem af-  
 fert laudato loco Cyprianus, quia ea sola pec-  
 cata absolvit divinitus sibi traditis clavibus Ec-  
 clesia,

clesia, quæ Deus condonat; quia solus Deus principaliter miseretur, & veniam peccatis solus ille largitur, qui peccata nostra portavit, qui pro nobis doluit, quem Deus tradidit pro peccatis nostris Christus Jesus. At Deus sine veris pœnitentiæ exercitationibus; lacrymis, orationibus, aliisque id genus virtutum officiis gravia delicta non remittit: Ergo ea opera evacuare indulgentiis nunquam cogitavit Ecclesia. *Homo Deo non potest esse major*, inquit Cyprianus, *nec remittere, aut donare indulgentiâ suâ servus potest, quod in Dominum delicto graviore commissum est. Credimus quidem posse apud Judicem plurimum Martyrum merita, & opera Justorum: sed cùm judicii dies venerit, cùm post occasum sæculi hujus, & mundi, ante tribunal Christi populus ejus adstiterit. Caterùm si quis prapropere festinatione temerarius remissionem peccatorum dare se cunctis putat posse, aut audeat Domini præcepta rescindere, non tantùm nihil prodest, sed obest lapsis. Provocasse est iram, non servasse sententiam; nec misericordiam prius Dei deprecandam putare, sed contempto Domino de sua facultate presumere.* Catholica est de utilitate indulgentiarum doctrina, at non minùs Catholica est de necessitate pœnitentiæ sententia: utraque ab Evangelio tradita, utraque religiosè retinenda, quia ut ait ibidem Cyprianus: *Non potest Evangelium in parte consistere, & in parte nutare. Aut utrumque oportet valeat, aut utrumque vim veritatis amittat.*



*Regulas hætenus constitutas illustriores  
Sancti Thomæ discipuli religiosè se-  
ctati sunt. Illustria P. Granatensis  
testimonia.*

Cùm ea quæ diximus hætenus è sacra tra-  
ditione Sole ipso splendidiora hauserimus, ma-  
gna cum fiducia modum loquendi Hilarii *lib. 6.  
de Trinitate*, imitatus dixerim: *Hæc ita didici,  
ita credidi, & ita confirmata mentis fide teneo,  
ne aut possim credere aliter, aut velim. A Pa-  
tribus, ab Apostolicis viris, à Summis Ponti-  
ficibus, quatenus edoctus sum, his immedicabili-  
ter imbutus sum: & ignosce omnipotens Deus*  
(suspecte Lector in Hilario traditioni adhæren-  
te exemplum fiduciæ ad miraculum intrepidæ)  
*quia in his nec emendari possum, sed commori  
possum. Tardè mihi Doctores atas nunc ejus sæcu-  
li protulit. Serò hos habuit fides mea; quâ tu  
erudisti Magistros. Sit sanè fides, sit pœnitentia  
alia, si alia claves regni cælorum sunt. Sit pœ-  
nitentia alia, si erit alius Apostolatus ligata &  
soluta per se in terra ligans in cælo atque sol-  
vens. Sit pœnitentia alia, si Christus Filius Dei  
alius præterquàm quod est, prædicatur. Addide-  
rim etiam, quod si non est modò alius Spiritus  
sanctus ac qui in Apostolos est illapsus, qui in  
Ecclesia Catholica ministranda Summis Ponti-  
ficibus adfuit, qui Conciliis plenariis & regio-  
nalibus præfuit, qui innumeros Sanctos & Pa-  
tres omnes spirituales, quotquot de pietate  
cum laude his etiam temporibus scripserunt,*  
instruxit

instruxit & permovit, ea quæ toto hoc capite è Patribus non tam scripsi quàm exscripsi, tutissimam esse & procurandæ peccatorum salutis, & permovendæ solidæ pietatis, & frequentandæ etiam cum ingentibus utilitatibus Eucharistiæ viam, sine dubitatione credendum est. Ut tamen confirmandæ hujusce veritatis causa nihil omittamus, operæpretium visum est selecta celebriorum S. Thomæ discipulorum testimonia proferre, ut appareat quinam semper fuerit verorum Thomistarum in Eucharistiam pietatis & reverentiæ sensus. Duos aut tres in aciem duntaxat producam, tum ne dissertationem satis prolixam cum cruce Lectoris plus justo protendam; tum quia in ore duorum aut trium testium, & quidem omni exceptione majorum, stat omne verbum.

Primus occurrit Cardinalis Cajetanus in „ commentario art. 10. q. 80. [ Circa quotidiana-  
„ nam, inquit, celebrationem nota Augustini  
„ ( Ambrosius est ) verbum : Sic vive, ut quoti-  
„ die merearis accipere. Quoniam per sic vive-  
„ re intelligendum est, spirituales vitam sic  
„ vivere, ut quotidiana Communionem semper  
„ augeatur. Alioquin non sic vivitur, ut quoti-  
„ die mereamur accipere. Nam qui quotidie  
„ meretur accipere, debet quotidie sic esse  
„ dispositus, ut fructum Eucharistiæ percipiat:  
„ fructus autem spiritualis hujus cibi non est  
„ solùm actualis refectio, sed augmentum gra-  
„ tiæ: quoniam per totum tempus præsentis  
„ vitæ sumus in statu augmenti. Propter quod  
„ crebrò, vel quotidie celebrantes discutiant in  
„ seipsis fructum præteritæ celebrationis; &  
„ secundùm profectum, vel defectum prosequantur,

quantur, vel à prosecutione desistant. Qui  
 ,, verò multis celebrationibus peractis ad actus  
 ,, virtutum non melius se habet quàm antè, pa-  
 ,, rum aut nihil proficit. ] Si de viris justis, in  
 quibus gratia & virtutes, sed in quibus virtu-  
 tum post multas Communiones augmentum  
 nullum relucet, scripsit doctissimus Cardinalis,  
 oportere eos à multitudine Communionum de-  
 sistere, quid de eis quæso sentiebat, in quibus  
 non modò nullum virtutum augmentum, nullus  
 profectus, sed continuus cernitur in eadem le-  
 thifera flagitia relapsus? Easdem consequutio-  
 nes ex illis Cajetani verbis derivare est, quas  
 ex suprà ponderatis S. Thomæ testimoniis in-  
 tulimus; quæ quia sponte sua fluunt, eas eru-  
 dito Lectori deducendas relinquo.

Secundus occurrit Dominicus Soto *in 4.  
 dist. 12. quest. 1. artic. 10.* ubi quærens quennam  
 oporteat esse frequentis Communionis usum,  
 ait quæstionem excitari de viris, qui à tumultu  
 sæculari semoti divinis vacant; vel de illis, qui  
 à peccatis omninò mortalibus abstinentes, so-  
 liciti sunt quomodo placeant uxoribus, & sæ-  
 culi negotiis implicantur; vel de illis, qui cum  
 passionibus luctantes tentationibus interdum  
 cedunt; nunc lapsi, sed mox resurgentes. Illos  
 namque, ait, *qui peccatis mortalibus sordent,*  
*jam à presenti questione tanquam ineptos ex-*  
*clusimus.*

Hoc posito asserit primò, immunes à peccato  
 mortali laudabiliter Eucharistiam frequentare,  
 licèt laudabile etiam sit illos præ reverentia ab  
 Eucharistia aliquando abstinere. Affirmat se-  
 cundò, per se loquendo laudabilius esse justos  
 frequenter accedere quàm abstinere, quia amor

& fiducia præstantiores virtutes sunt quàm timor qui est causa cessandi : *Quamquam*, inquit, contingere possit, ut quandoque abstinens devotius postmodum accedat, & qui ob reverentiam abstinet, merito suo per favorem divinum gratiam assequatur. Attamen ab eo qui ex charitate frequentat, & gratia sacramentalis, & devotio in Eucharistia crebrius gustatur, & avidius concupiscitur. Tertiò concludit : [ Illis qui corruptis, affectibus fluctuant, licèt quotidie resurgant, non est sanum consilium quotidie ad Sacramentum accedere, etiamsi sint Sacerdotes. Tum quia timendum illis est, ne non sit eorum legitima pœnitentia : tum quia neque sinceram & castam reverentiam asserre possunt, ut Sacramentum pro dignitate æstiment.

, Aliis verò sæcularibus conjugatis, ait in calce articuli, qui rei familiari intervium, licèt à peccatis mortalibus sint liberi, non consulerem frequentius quàm à quindena in quindenam ad Sacramentum accedere. Nam, quanvis curam habeant expurgandæ conscientiæ; nihilominus, uti ait Paulus, non possunt non curare quomodo placeant uxoribus, & quomodo rei familiari prospiciant; quod frequentiori sumptioni non est adeo congruens. :: Quocirca si inter sæculares esset aliqua persona & probitate & modestia insignis, nulla esset irreverentia, imò deceret forè semel in hebdomada communicare; crebrius autem, nullatenus approbare possem. ]

Tertiùs occurrit magnus ille pietatis Magister toti orbi notissimus Pater Ludovicus Granatensis, qui concione secunda in festo Corporis



ris Christi Fideles quidem ad frequentio-  
 rem divini hujus Sacramenti usum præcipuâ animi  
 puritate & aviditate accedere hortatur, ut sit in  
 nobis fructus vitæ qui semper repararet quod  
 corruptæ naturæ morbus semper absorbet; &  
 quod ardor concupiscentiæ ad carnalia semper  
 sollicitans assiduâ infestatione devastat, virtute  
 gratiæ quam nobis confert redintegret atque  
 instauret. Quia Medicorum dogma est, ubi  
 morbi causæ permanentes sunt, remedia quo-  
 que permanentia esse oportere: & cum peccati  
 fomes malorum omnium seminarium ad ma-  
 lum nos jugiter & juxta potenter inclinet, assi-  
 duâ & frequenti reparatione instaurandum est,  
 quod assiduâ impugnatione impetitur atque la-  
 ceratur. Ex quo meritò illos esse accusandos in-  
 fert, tum qui se ad saluberrimum hoc infirmi-  
 tatis humanæ remedium piè & religiosè fre-  
 quentandum præparare negligunt; tum etiam  
 illos qui vivificum cibum piè & frequenter  
 usurpantes objurgant, mordent, & vel temeri-  
 tatis & audaciæ; & hypocrisis vel vanitatis in-  
 simulant, quo à tantis divinæ gratiæ opibus &  
 auxiliis, à tam multis infirmitatis & imbecilli-  
 tatis humanæ remediis, atque adeo ab ipsa  
 æterna vita pios homines avocent, quibus cum  
 antiquo serpente, cum mundo, cum pravis ho-  
 minibus, cum ipsa carne & cunctis ejus plus-  
 quam tyrannicis cupiditatibus certare queant.  
*Cum enim, inquit, ex Catholica fidei doctrina  
 certò sciamus, innumeros esse hujus divini Sacra-  
 menti effectus atque virtutes, quibus animarum  
 salus constituitur; nihil esse constat, quod magis  
 ad hanc salutem retinendam & conservandam  
 expediat, quàm ad illud puro & religioso corde  
 frequenter*

frequenter accedere. Verè enim ut corpora cibo, ita mentes nostra hac cœlesti alimoniâ vivunt nec modò vivunt, sed omnibus etiam virtutum & gratiarum opibus in dies augentur & cumulantur.

Advertens tamen religiosissimus Pater, multos esse qui hoc cœlesti cibo pascantur, & multos item ex Sacerdotibus qui ad hanc quotidie mensam accedant, cùm tamen nihilo meliores ac sanctiores evadant; quia sicut idem ignis & ceram mollescit, & lutum durat, ita hoc Sacramentum idem in se manens, aliis salutis & vitæ author, aliis mortis occasio fit; post multa in hanc rem prolata sic concludit: [ Fratres, nemo credat, me ita ad frequentiore hujus Sacramenti sumptionem adhortari, ut non etiam illos perterrefaciendos putem, qui ad illud minùs piè & religiosè accedunt, sive illi Sacerdotes sint, sive non sint. Video enim esse nonnullos, qui partim ex præscripta legum suarum necessitate, partim ex sola consuetudine, aliorum videlicet communicantium exempla, dissimili tamen affectu atque devotione, sectari volentes, ad illud frequenter accedunt. Ut quidam ergo excitandi sunt, ne immodico timore correpti ab hac sacra mensa recedant; ita alii perterrefaciendi ne indignè accedant. Quibus verbis nihil luculentius. Et concione 1. Cæterùm, inquit, non ita fideles ad frequentiore hujus Sacramenti usum adhortamur, ut non etiam illos officii sui admoneamus, hoc est quæ cordis & corporis puritate ad illud accedere debeant. Meminisse enim oportet scriptum esse: Dominum tuam decet sanctitudo, Domine, in

„ longitudinem dierum. Et, Justitia & iudicium  
 „ præparatio sedis ejus. His namque justitiæ  
 „ opibus domus ac sedes Dei ornanda est, &  
 „ omnes ab ea vitiorum sordes eluendæ, quo  
 „ dignum illi habitaculum præbeat. ]

Et concione quarta explicans contra quos  
 stylo suo invehat, qui à frequenti Commu-  
 nione dehortantur, declarat se adversum illos  
 „ perorare, [ qui non contenti socordiâ suâ,  
 „ pios homines, & ad hujus divini Sacramen-  
 „ ti medicinam confugientes socordiæ suæ par-  
 „ ticipes efficere nituntur, dum eos malignis  
 „ verbis ac detractionibus ab hoc pio & salu-  
 „ tari instituto revocant. Quorsum, inquit,  
 „ toties confiteri? Toties Sacramentum Eu-  
 „ charistiæ sumere? Toties templa frequenta-  
 „ re; cum satis esse duxerit Ecclesia, semel  
 „ quotannis confiteri? Indignum enim esse  
 „ dicunt, tam familiari confidentia viles opifi-  
 „ ces & homunciones ad hæc tremenda my-  
 „ steria accedere. Quæ cum dicunt, non eo ani-  
 „ mo dicunt, quod divinæ Majestatis injuriam  
 „ dolenter ferant; sed quod piorum religio,  
 „ illorum impietatem magis conspicuam red-  
 „ dat. Ut enim D. Gregorius ait: Mos pravo-  
 „ rum est invidere aliis virtutis bonum, quod  
 „ ipsi habere non appetunt. ] Ergo contrà, qui  
 præ divinæ Majestatis injuriæ sensu peccatores  
 eadem flagitia repetentes, & nullum solidæ  
 emendationis argumentum præbentes hortan-  
 tur, ut opportuna alicujus interstitii mora  
 animum instruant, ut postea Domini mensam  
 ritè compositi frequenter adeant; & simul  
 christianè viventes, etiam plebeios & simpli-  
 ces, eosque potissimum ad frequentem Com-  
 munionis

munionis usum exstimulant; illi, inquam, Religiosissimi Patris sensibus prorsus consentanei sunt. Is autem unus fuit nostræ dissertationis scopus. Concionem autem illam sic concludit:  
„ [ Hæc autem non eo consilio à me dicta sunt,  
„ Fratres, ut omnes ad quotidianam hujus Sa-  
„ cramenti perceptionem adhortari velim. Hoc  
„ enim cum Divo Augustino nec laudare, quia  
„ non rectè fieri potest; nec vituperare, quia  
„ rectè etiam fieri potest, debemus. Nimum  
„ autem sibi tribuit qui quod ille damnare non  
„ est ausus, damnare ipse, præsertim indictâ at-  
„ que incognitâ causâ audet. Hujus namque  
„ rei definitio prudentis Sacerdotis judicio re-  
„ linquenda est. Is enim quid cuique pro ra-  
„ tione status & conditionis, & virtutis suæ pro-  
„ fectu expediat, discernere prudenter debet.  
„ Aliis enim rariùs, aliis frequentius sacra  
„ Communio concedenda erit. ] Additque illos  
demùm esse frequenti Communione dignan-  
dos, qui eximiâ puritate & præcipuâ reveren-  
tiâ præditi sunt. [ Neque enim, ait, quia tan-  
tam sui conveniendi atque sumendi copiam  
Dominus Fidelibus concessit, ideò minùs re-  
verenter ad illum accedere debent: quando-  
quidem ipse Dominus, qui in lege olim tan-  
tam à filiis Israël Sanctuario atque Arcæ re-  
verentiam exhiberi præcipiebat, nos in illis  
monebat, nos erudiebat, ut intelligeremus,  
quâ animi submissione atque devotione ad  
illum accedere, illique assistere deberemus,  
qui tantam soli umbræ atque figuræ reveren-  
tiam tribui volebat. ]

Et quidem singulari prudentiâ & majori pie-  
tate illos arguit Pater Granatensis, qui *ex so-*



*cordia* nec ad Eucharistiam accedunt, nec alios accedere ferunt. Meritò enim reprehendendi sunt, qui cum præ amore mundi & voluptatum quo tument, ad Eucharistiam mundi contemptu, aliisque virtutum officiis se componere negligunt, hunc interim colorem & fucum prætexentes, se Communionem defugere, & à Domini mensa motu reverentiæ discedere. At enim nostra doctrina socordiam non ingerit aut teporem. Eatenus enim à sacra Communionem interdum & aliquandiu pro ratione flagitiorum secedendum diximus, non ut homo per hanc temporis intercapedinem otio & mundanis voluptatibus indulgens, eam sibi asciscat duritiem, quæ totius est pietatis exterminium, & religionis etiam interitus; sed ut ad sacrum epulum dignè percipiendunt dignis pœnitentiæ fructibus & cæterarum virtutum exercitationibus peccator se paret & instruat. Recessus ille, quem astruimus, à religione & humilitate profectus, non otiosa, sed laboriosa mora est, quâ non sistit animus, sed viam mandatorum Dei currit, ut ad Eucharistiam deinde & frequentius accedat, & sanctius; non secus ac flumina à mari, unde exeunt, dum recedunt, ad ipsum concitatiùs properant, ut uno tempore & recedere, & accedere videantur.

Si quis ergo Communionis consilium in longum differt, ut interea terrena tranquillius sapiat, & lauciori vitæ securius se dedat, procul dubio & à nostra doctrina abhorret immensum, & in damnum illum teporem, cui Scriptura Apocalip. 3. summi supplicii terrorem intentat, incurrit. Si quis autem humilitatis & sacræ verecundiæ piè animum suffundentis  
sensu

sensu differt, ut animum piis omne genus operibus instruat, paret, ornet, ut vehementem hujus cibi famem excitet, & charitatis calorem ad concoquendam divinam illam alimoniam necessarium succendat & foveat, intimum interim doloris sensum capiens, quod è cibo illo, in cujus usu christiana felicitas sita est, peccatis suis segregetur, unusque sit ei dolor hac escâ privari, talem nemo nisi pietatis hostis reprehenderit. Pacis cibique solidi usum frequentem Medicus non damnat, tametsi eo ad tempus infirmo interdicit, amaras interim potiones, venæ sectiones, cauteriorum ustiones morbi fontem exhaurientes præscribens. Non ergo à frequenti Communione pias animas avocamus, sed peccatores monemus, ne si impuri accedant, divinißimum medicamentum in venenum sua iniquitate convertant. Fugam Communionum non intendimus, qui quotidianam eam optamus; nec interstitiorum moras peccatoribus præfinimus, nisi ut purgati & sani ad Eucharistiam deinceps frequentius adeundam puriores redeant & aptiores.

Merito ergo Pater Granatensis, merito omnes pii in eos invehuntur, qui flagitiosâ salutis incuriâ plus æquo à sancta Communione se subtrahunt, & deplorando stupore & quasi lethargo ac divinorum contemptu ad cœleste epulum non anhelant, atque ad Communionem paschalem non pietatis sensu, sed consuetudine & unis Ecclesiæ anathematis perculsi ducuntur. Hanc doctrinam à Patribus hauserat vir Dei Ludovicus Granatensis, qui socordiam non communicantium dum reprehendunt, eos simul ad morum conversionem & piæ vitæ cul-

tum prius instituendum cohortantur , quàm sacris altaribus sese admoveant. [ Sciant baptizati homines , inquit Cyrillus lib. 3. in cap. 6. Joannis , si longo temporis spatio propter simulatam religionem mysticè communicare Christo recusent , ab aeterna se vita procul depellere. Quippe recusatio hujusmodi , quavis ex religione proficisci videatur , & scandalum facit , & laqueos instruit. Quare oportet omnibus viribus à peccato mundari , & rectè vivendi jactis fundamentis magna cum fiducia ad sumendam vitam concurrere. Sed varia sunt diaboli , multiplicesque ad decipiendum insidiæ. Quare demus operam modò , ut vinculis ejus abruptis , & jugo servitutis peccatorum excusso , in timore Domini serviamus , & carnis voluptate per continentiam superata , ad cœlestem gratiam accedamus , & ad sanctam Christi participationem ascendamus. ]

Vides eò loci , ubi fideles ad frequentem Communionem adducere S. Pater vel maxime nititur , præcipere tamen ut prius peccatorum sordibus absterfis , christianam vitam ingrediantur , quibus implicantur diaboli vincula abrumpan , temperantiæ & castitati operam dent , sicque parati ad Christi participationem accedant. Quod compendio lib. 4. sic expressit: *Piam studiosamque vitam agere institue , atque ita Eucharistiam sumito.*

Itaque nec innocentes , nec sincerè conversos ab Eucharistia avocamus. Quin cum Isidoro lib. 1. de offic. Eccles. libenter dicimus : *Qui peccare jam quievit , communicare non desinat. At peccare non quievit , qui à pristinis peccatis continere*

continere se non valens, in eadem assidue flagitia relabitur. Audiat qui ejusmodi est, eundem Isidorum aientem: Si talia sunt peccata quasi mortuum removeant ab Altari, prius agenda pœnitentia est, ac sic deinde hoc salutiferum medicamentum suscipiendum. Qui enim manducat & bibit indignè, iudicium sibi manducat & bibit. Hoc est autem indignè accipere, si eo tempore quis accipiat, quo debet pœnitentiam agere.

Eandem non communicantium socordiam reprehendit Augustinus serm. 57. de tempore: Sape advertimus, dilectissimi fratres, inquit, nonnullos ex vobis Communionem Ecclesiasticam declinare, & hoc intelligo fieri ex conscientia gravium atque ingentium peccatorum. Inde admoneo vos, dilectissimi, quod pravum hoc insalubri consilio duplicatur; quia homines ista facientes & delictorum sarcinam cumulant, & munus æternæ salutis amittunt. Hoc est reatum congregare, & remedium devitare.

Sed quia probè noverat Doctor sanctissimus, nihil attinere vulnus aperire, nisi ad curandum manus & opera adhibeatur, detectum abusum tollere atque sanare sic aggreditur: [ Ergo vos, dilectissimi fratres, hortor atque commoneo, ut si quis ex vobis conscius criminum suorum indignum se Communione Ecclesiastica putat, dignum se esse faciat. Dicitis: Quomodo aliquis dignum se Communionem facere possit? Quomodo? Nisi ut errores pristinos relinquat, & pœnitentiam petat; ut qui criminum suorum sorde pollutus est, exomologesis satisfactione mundaetur. Nec illud seruet, ut in extremo vitæ suæ tempore tunc pœ-



„nitentiam petat, quando jam agere non pos-  
 „sit. Inutilis est enim, dilectissimi, ipsa persua-  
 „sio. Parum est peccatorem pœnitere, nisi pœ-  
 „nitentiam peregerit. Ad emendanda enim  
 „crimina vox pœnitentis sola non sufficit; nam  
 „in satisfactione ingentium criminum non  
 „verba tantum, sed opera requiruntur.] Ecce  
 quid ab illis præ socordia Eucharistiam non  
 adeuntibus exigat Augustinus; non ut statim  
 Domini mensam invadant, sed ut vitæ pravita-  
 te emendatâ, emendationeque factis magis  
 quàm verbis probatâ, eam puritatem animi, eam  
 virtutis firmitatem, eam denique vitæ verè chri-  
 stianæ seriem assequantur, quâ ad frequentem  
 divinissimi Sacramenti usum meritò aspirent.

Plura alia ex aliis producere in promptu es-  
 set. Præclara nobis testimonia suppeditaret Hie-  
 ronymus Baptista de Lanuza Concionator Or-  
 dinis nostri insignis, & ad Episcopatum prove-  
 ctus, alique Theologi tum domestici, cum ex-  
 tranei. Ipsa etiam Beata Theresia huic nostræ  
 doctrinæ egregium testimonium perhibet. Sed  
 hæc satis obvia, prolixior disputatio ne sit,  
 missa facio. Plura etiam in tractatu de Pœni-  
 tentia in hanc rem dicturi sumus. Cum enim  
 ostenderimus, peccatoribus in eadem flagitia  
 relabentibus differendam esse sacramentalem  
 absolutionem, quò sinceram cordis immuta-  
 tionem fructibus operum, non foliis verborum  
 attestentur; utique palam erit eos non cœ-  
 lesti cibo dignandos, qui nec absolutione di-  
 gni sunt. Sed his omissis, vel in alium locum  
 rejectis, unus Patris Emerici de Bonis, pii &  
 eruditi è Societate Jesu Theologi locus pro  
 nullo compatitur.

*P. Emerici de Bonis longè præclarissima profertur sententia, de abusibus qui in usu sacrae Communionis admittuntur.*

Sacrae traditionis & rationum hætenus producta momenta confirmabit & veluti coronabit egregia P. Emerici de Bonis è Societate Jesu oratio, quam in tractatu de Sacramento Altaris nobis reliquit immortale pietatis & eruditionis suæ monimentum. Verba ejus ex Italico in Gallicum idioma translata summa fide latine sic reddimus.

„ Duos magnos abusus, inquit, in frequentisumptione sacrosanctæ Eucharistiæ, qui faxit Deus ut citò tollantur, invenio.

„ Primum est quorundam hominum, quibus nulla hebdomada præterit, quin semel aut sæpiùs luxuriæ spurcitiis se contaminent, qui tamen octonis quibusque diebus sanctissimo Christi corpore pasci postulent.

„ Sunt & alii, qui etsi rariùs peccent, iis tamen diebus quibus consuevère, ad epulum Eucharisticum, quanvis recenter in peccatum lapsi, accedere velint.

„ Illorum abusus errorque maximus est, quòd non satis cogitent quàm infame & turpe vitium carnis illius virginæ, humanitatis sanctissimæ, Divinitatis augustissimæ, quam hoc Sacramento suscipimus, munditiæ atque puritati adversetur. Cujus si verè dignitatem & excellentiam pernoscerent, aut in viam redirent & mutarent mores; aut non tam sæpe

imò nunquam tremendum-Sacramentum sumere ( nisi fortè aliquà Ecclesiæ lege obstricti, quæ tamen neminem sacrosancta illa mysteria nisi Paschate percipere adigit, quæque semper ritè paratos poscit ) auderent.

Et tamen sunt homines adeò audaces, seu potius tam perfrictæ frontis, ut sæpe sine ulla vitæ emendatione carne Christi vesci nihil horreant; quos si Confessarius à Communionē, ut decet, summovere velit, irascuntur & religiosum vocant, nec verentur cum illo contendere, causati alios esse Confessarios. contrà sentientes & ad sanctam synaxim accedere permittentes: si quo sunt animi statu ad cœlestem mensam accumbere piaculum esset, futurum esse ut non afficerentur illâ suavitatē, illaque lætitiâ quam sentiunt. Denique nisi cœlesti illo pane alerentur, fore ut crebrius in peccata labantur; ut si fides illis sit adhibenda, id saltem molumenti à Communionē percipiant, quod rariùs peccent.

Ego verò etsi nemini legem præfinire velim, non mihi videor pravè sentire, qui tales homines ad sacram synaxim malè præparatos putem; cum ipsi tam citò, tamque frequenter ad suas impuras libidines redeant: timendumque valde esse, ne indignæ Communionis & infandi sacrilegii periculo se exponant; quia crebri in easdem culpas relapsus debitam præparationem defuisse testantur. Nam si nullum adversus vim & efficaciam Sacramenti obicem ponerent, effectus ejus procul dubio sequerentur; quorum unus est, ut eos qui dignè sumunt castos faciat, quoniam multum cupiditatem minuit, quæ sic fracta

„ & coërcita, facile vinci superarique potest.  
„ Quod nunc in multis cernitur, qui cum antè  
„ luxuriæ vitio deditissimi essent, postea cœ-  
„ lesti cibo sæpe refecti castitatem coluere; qui  
„ si pravam in meliorem vitam mutavere, quid-  
„ ni illi quoque idem possunt? Sed vultis scire  
„ quid sit quamobrem non faciant? Nolunt.  
„ Quapropter arcendi à Communione sunt,  
„ unde qui secus facit, panem filiorum dat ca-  
„ nibus, & margaritas projicit ante porcos;  
„ quod à Christo Domino prohibetur.

„ Quamobrem Confessarii & Directores di-  
„ ligentiùs attendere sibi debent, ut ne judi-  
„ ciorum Dei experiantur acerbiter, qui  
„ dispensati tam pretiosi thesauri accuratam ab  
„ eis rationem reposcet. Ipsi secum reputent, in-  
„ dulgentiâ illâ & nimîâ facilitate indignos ad  
„ Communionem admittendi, multos eâ duri-  
„ tie, eoque animi stupore erga res divinas  
„ obriguissè, ut ne quidem status illius miserrî-  
„ mi, in quo torpent, sensum habeant salutarem.  
„ Quo fit ut cum priùs venientes & venera-  
„ bundi ad augustissimum Sacramentum acce-  
„ derent, jam id absque timore, veneratione  
„ & pietate suscipiant: quod inde manifestissi-  
„ mè patet, quod nonnunquam eodem die  
„ (horrendum dictu & Angelis ipsis detestabile,  
„ quodve valeat Soli tenebras offundere, terram  
„ tremefacere, elementa permiscere) ad suas  
„ sordes revertantur.

„ De his quoque idem sentio, qui postero,  
„ tertio aut quarto die quàm Eucharistiam sum-  
„ pserunt, idem quod antea peccant; aut qui  
„ pridie, nudius tertius aut quartus antè pec-  
„ caverant. Ita ut vix à noxa uno die, biduo vel  
„ triduo



„ triduo per hebdomadam se abstineant ; qui  
 „ tamen die Dominico ad sacram synaxim ad-  
 „ mitti flagitent.

„ Quod dicunt , alios Confessarios esse qui  
 „ eos sic affectos à Communionem non arceant ,  
 „ sat erit respondere , nolle mihi Deo talium  
 „ Confessariorum agendi rationem esse præ-  
 „ standam.

„ Non quidem ignoro fuisse præteritis sæ-  
 „ culis , & etiamnum esse viros & piissimos &  
 „ doctissimos , qui utile sæpe esse , & aliquan-  
 „ do necessarium censeant talibus absolutionem  
 „ denegare , hoc freti , quòd veræ contritionis ,  
 „ nequidem attritionis ( sine qua nemo absolvi  
 „ potest , & absolvi sacrilegium est ) signa nulla  
 „ ostendant : qui etiam sanctæ Resurrectionis  
 „ tempore eos qui ante paucos dies crimen ali-  
 „ quod admiserint , à Communionem suspen-  
 „ dant ; continentiam aliquandiu ante servare  
 „ jubentes quàm tremenda adire mysteria si-  
 „ nantur ; tam crebris , tam facilibus in peccata  
 „ lapsibus meritò suspicionem ingerentibus  
 „ Confessario , deesse illis veram attritionem  
 „ sine qua non solùm possunt , sed etiam debent  
 „ suorum peccatorum vinculis obstrictos re-  
 „ mittere.

„ Utilissimum ergo relapsuum remedium est ,  
 „ & frequenti experientiâ confirmatum , ut in  
 „ aliquod tempus iis hominibus absolutio dif-  
 „ feratur , quo victu cultuque asperiori , ante-  
 „ quam ad Communionem accedant , se præpa-  
 „ rent. Est enim qui postquam innumera cri-  
 „ mina & horrenda scelera sacerdoti patefecit ,  
 „ perendino aut tertio die carne & sanguine  
 „ Christi refici non timeat. Quod sanè non est

permit

„ permittendum ; quoniam qui habitum peccati,  
„ contraxit , non nisi magno nisu resipiscere,  
„ magnaue animi contentione excitare in se.  
„ salutiferum peccatorum dolorem valet.

„ Quemadmodum arbor annosa non unico  
„ ictu dejicitur , nec vas aliquo tetro liquore  
„ imbutum , si semel frigida abluitur , odorem  
„ amittit , sed opus est ut diu in cinere & lexi-  
„ vio fervescat ; eadem quoque agendi ratione  
„ erga illos omnes utendum est , qui tam sæ-  
„ pe ad sua peccata recurrunt : subeant post ex-  
„ posita expansaque flagitia pœnarum & labo-  
„ rum genera , quibus sentiant , doleant & de-  
„ testentur præteritas culpas : quod quia ab illis  
„ non exigitur , citò suum vomitum resorbent.

„ Multi Confessarii pii prudentesque testan-  
„ tur , innumeros homines , qui peccatis priùs  
„ obstricti erant , quòd eam rationem tenuis-  
„ sent , dilataque absolutione sæpiùs ad tribu-  
„ nal , ut animi statum identidem aperirent , illis  
„ redire iussissent , impositâ interim delictorum  
„ pœna , pristinos mores in melius mutavisse ,  
„ & magno gaudio , magnoque deinceps in vir-  
„ tute progressu infandam peccati consuetudi-  
„ nem abjecisse.

„ Durum equidem & grave primò ipsis vi-  
„ debitur toties sine absolutione & piacularibus  
„ pœnis oneratos remitti ; verùm multi postea  
„ severitatis illius fructum & utilitatem exper-  
„ ti , gaudentes , & ut de se optimè meritis gra-  
„ tulantes rediere , futurumque fatentes fuisse ,  
„ nisi ejusmodi austeritate essent cohibiti , lau-  
„ dabiliorem vitam ut nunquam instituerent.  
„ Magno dolore procul dubio dum Chirurgus  
„ humorem pungit ægrotus afficitur , sed sanata

„tus gratias agit, mercedemque pro beneficio  
 „rependit.

„Si Confessarii majorem severitatem adhibe-  
 „rent, multò major frequentiorque pravorum  
 „hominum emendatio consequeretur; non iis-  
 „dem semper criminibus obnoxios homines  
 „cerneremus, neque subinde, ut faciunt, Con-  
 „fessarios mutarent, ut aliquem tandem inve-  
 „niant mollem facilemque, qui leves imponat  
 „pœnas, qui sinat quoties libuerit, etiam mo-  
 „ribus immutatis ad Eucharisticam mensam ac-  
 „cedere; quem deinde inventum tanquam peri-  
 „tissimum prædicant. Cæteros qui perversorum  
 „morum institutorumque mutationem exigunt,  
 „tanquam incommodos, scrupulosos, huma-  
 „næque fragilitati nimium duos reprobant.

„Sed miseri illi animarum rectores non cer-  
 „nunt pravos homines in vitiis suis propterea  
 „suâ indulgentiâ detineri, atque in pristina  
 „peccata relabi. Medicus qui ne molestus sit  
 „ægroto, vulnus gangræna vitari sinit,  
 „quod si validum unguentum, ignem etiam,  
 „aut scalpellum maturè adhibuisset, sanari po-  
 „tuerat, non misericors, sed crudelis haberi  
 „debet. Idipsum tam multis peccatorum reis  
 „ob nimiam Confessariorum lenitatem & in-  
 „dulgentiam accidit. Offeret se aliquis cujus  
 „ad expiandas noxas multis diebus jejunia &  
 „cilicia essent imponenda; huic semel Rosariū  
 „preces aut septem pœnitentiæ Psalmi recitan-  
 „di imponentur. Et quoniam illæ pœnæ non  
 „sunt molestæ, fit ut illi citò suis se rursus cri-  
 „minibus inquinent. Quod si illi Confessarii  
 „rationem Deo de illis hominibus sibi reddenda  
 „esse etiam atque etiam apud se cogitarent,  
 „multò

„multò impensius sibi cauturos esse existimo.

„Quod isti dicunt, se gaudia suavitatemque

„cùm Eucharistiam sumunt experiri, ausim af-

„firmare id valde suspectum, & errori esse ob-

„noxium, illosque animi motus ab alia causa

„quàm à sumptio corpore Christi proficisci, aut

„aliquam dæmonis fraudem subesse, non au-

„tem ciere illos veram pietatem. Turcæ nam-

„que cùm suum Mahumetem colunt, aut de

„eo sermonem audiunt, tam magno, tamque

„suavi animi affectu commoventur, ut etiam

„erumpant in lacrymas; quod tamen vel divi-

„nitus immissum gaudium, aut veræ pietatis

„affectum nemo dixerit.

„Sancti Patres Eremicolæ eum qui per som-

„num mali dæmonis fraude, quanvis non

„suâ culpâ quid impuræ libidinis passus fuisset,

„ad sacram synaxim accedere non sine-

„bant: quomodo putatis arcituros fuisse eos

„qui tam libenter ac tam sæpè in peccatum qua

„data porta ruunt? Non est dubitandum, quin

„à sancta Communione eos penitus fuissent

„exclusuri.

„Id modò expendendum restat, quod di-

„cunt, nisi cœlesti carne crebrò reficerentur,

„se frequentius in peccata lapsuros. Quibus

„respondendum est, ad id Eucharistiæ Sacra-

„mentum non fuisse institutum, ne tam sæpe

„homines peccata committerent, quanvis id

„quoque, vel etiam quid præstantius dignè su-

„mentibus præstet; sed ut sit illis esca cœlestis,

„quâ ad virtutis culmen promoveantur. Ipsi

„autem divino cibo non aluntur; quandoqui-

„dem vitæ cœlesti nihil cum carne commune

„est, cui ita serviunt, ut aliter vitam se insti-

tuere



„ tuere non posse ipsimet affirmant.

„ Venio jam ad eorum errorem qui non heb-  
 „ domadibus singulis quidem , sed semel aut  
 „ bis quibusque mensibus ad sacras epulas vo-  
 „ lunt accumbere , eo quòd sodalitio aut socie-  
 „ tati alicui nomen dederunt , quæ diebus qui-  
 „ busdam sacrosanctam Eucharistiam percipe-  
 „ re statuit ; qui licet non ita frequenter in pec-  
 „ cata libidinis incidant , si pridie tamen , aut  
 „ nudius tertius eo se turpi crimine polluerint ,  
 „ abstinere à sacra mensâ nolunt ; ne , inquiunt ,  
 „ si non faciamus , aliis malo exemplo simus  
 „ & offensioni. Quod est humanis rationibus  
 „ potius quàm veræ pietatis affectu convivii  
 „ Eucharistici adeundi tempora definire.

„ Idem quoque aulicis nonnullis familiare  
 „ est , qui diebus quibusdam festis , cùm alioquin  
 „ non sumerent Panem Eucharisticum , cum  
 „ tota familia illum usurpare solent ; quippe  
 „ ideo faciunt ut spectentur , ne ab heris suis  
 „ ejiciantur minitantibus eos quos vident ad  
 „ sacram synaxim rarò accedere domo suâ eje-  
 „ cturos. Quid ? Istis non permittenda Com-  
 „ munio est ?

„ Re sicut diximus positâ , multis diebus post  
 „ patrata scelera , ob reverentiam sacrosancto  
 „ mysterio debitam , censeo illos esse à Com-  
 „ munione summovendos , præsertim cùm nul-  
 „ lo ad id faciendum præcepto astringantur.

„ Sed quid de offensione & prætenso scanda-  
 „ lo ? Ei rei possunt aliquâ verisimili excusatio-  
 „ ne mederi. Cæterùm prudenti alicui Confes-  
 „ sario se permittant , qui quod factò opus sit  
 „ solerter dignoscat , utrùm satius fuerit eum  
 „ ad Eucharistiam admittere , an offensioni lo-

„ cum dare, quæ utut res fuerit, pœnitentis  
„ culpæ offensio non vertetur.

„ Quoniam autem soladitii Præfectus inqui-  
„ rere solet à sodalibus, cur ad sacram Eucha-  
„ ristiam non accesserint, dicit aliquâ animi  
„ anxietate imparatum abstinuisse, aut non  
„ visum Confessario. At si id causæ afferam,  
„ inquires, illi suspicionem movebo. Immeritò.  
„ Quod si quid mali suspicetur, temerarii judi-  
„ cii culpâ se astringit. Potest enim Confessà-  
„ rius cuilibet non modò ob lethalem noxam,  
„ sed nonnunquam ob levem, aut ut cum du-  
„ riùs exercendæ patientiæ causâ habeat, aut  
„ ut leve aliquod vitium corrigat, aut ut eo-  
„ rum quæ ad Dei cultum pertinent magis soli-  
„ citum faciat, aut quibusdam aliis de causis  
„ Communionem denegare.

„ Si roges me, quandiu ille homo remove-  
„ dus sit & Communionem privandus? Respon-  
„ deo cùm varia sint hominum genera, variæ  
„ occasiones, varia ad peccandum proclivitas  
„ atque facilitas, varius admissarum noxarum  
„ dolor, diversa præteritæ vitæ emendatio, cæ-  
„ teraque id genus, nullam certam & accuratam  
„ ea de re statui regulam posse. Nam exempli  
„ causâ non est tandiu removendus qui rarò  
„ peccat, quàm qui frequenter, æquo utriusque  
„ dolore & emendationis proposito.

„ Dicam tamen in universum, multò satius  
„ esse fræna cohibere quàm laxare; quoniam  
„ semper causa nimia illa facilitas fuit & etiam  
„ nunc est, cur multi libentiùs in peccatum ca-  
„ dant, & corrigere se negligant.

„ Hortantur Canones, quanvis non adigant  
„ conjuges, ut quinque, sex, aut octo dies an-  
„ tequam

„ tequam ad Sacramentum Altaris accedant usu  
 „ conjugii abstineant sese ; cùm tamen culpâ  
 „ vacare possint , si non abstineant. Quomodo  
 „ ergo poterit is qui se libidinis spurciâ octo  
 „ dies ante inquinaverit , ad sacrosanctam men-  
 „ sam admitti ? Multi sunt quos plusquam duo-  
 „ decim arcere oporteat , adeò jam ægritudo  
 „ increbuit & increbescet in dies , nisi Confes-  
 „ sarii medeantur , coërceant , & sibi diligentius  
 „ caveant. Pronum est cœlestibus dapibus sæpe  
 „ refici , si benè fiat ; at si malè , nocet. Quare at-  
 „ tendat unusquisque sibi ; quærat Confessa-  
 „ rium prudentem , qui se libenter ducem præ-  
 „ beat ; huic , cùm invenerit , totum se permit-  
 „ tat , non præscribendo quæ imperet , neque  
 „ cum eo contendendo : nam vel id unum sat  
 „ gravis causa est , cur à sacrosancto cibo depel-  
 „ latur ; quanto potiori jure id faciet , si videat  
 „ eum sæpè in sua peccata recidentem ?

„ Quicumque ergo frequentius Eucharistiam  
 „ sumere cupit , cesset peccare , vitet occasiones  
 „ omnes , castè deinceps vivere constituat. Ita  
 „ demùm eam animi puritatem poterit adipisci ,  
 „ quæ opus est , ut cum fructu sanctam Eu-  
 „ charistiam percipiat.

„ Peregrino ex regione aliqua peste laboran-  
 „ te advenienti quadraginta statuuntur dies , ut  
 „ exploratum fiat an sanus sit antequam sibi ad  
 „ urbem aditus pateat : cur non eodem pacto  
 „ explorabitur , qui tam fragiliter peccat , qui  
 „ tam incontinens est , qui tam sæpè labitur ?  
 „ Non habitat cubiculum in quo quis morbo  
 „ interit statim atque cadaver elatum est , sed  
 „ aër infectus aliquandiu purgari sinitur. Idem  
 „ etiam hic faciendum est.



## REFLEXIO.

*Sancta Sanctis. Nolite sanctum dare canibus, neque projiciatis margaritas vestras ante porcos. Sumunt boni, sumunt mali, sorte tamen inaequali vita vel interitus. Mors est malis, vita bonis. Vide paris sumptionis quàm sit dispar, exitus. Ad Sacramentum amoris præcipua quidem dispositio amor est; sed sicut oportet non amat, qui è peccatorum cœno vix egressus, Dominum majestatis uestigiò suscipere non veretur. Audi non me, sed Chrysostomum hom. 17. in epist. ad Hebr. celebratum illud ab Ecclesia inter Missarum solennia carmen, Sancta sanctis, explanantem. Non potes dicere, Nesciebam, ignorabam hanc rem plenam esse periculi. Ne hoc possis uti prætextu, ea de causa magna voce, terribili clamore, tanquam praco, manum tollens in altum, stans excelsus & omnibus manifestus, & in tremendo illo silentio vehementer vociferans alios quidem vocat, alios verò arcet Sacerdos, non hoc manu faciens, sed lingua clariùs, & apertius eundem manu. Nam vox illa in nostras aures incurrens tanquam manus, alios quidem repellit & ejicit, alios autem introducit & sistit. Nam quando dicit: Sancta sanctis, hoc dicit: Si quis non est sanctus, non accedat. Non solum inquit, à peccatis purus, sed etiam sanctus. Sanctum enim non facit solum liberatio à peccatis, sed etiam præsentia Spiritus, & bonorum operum abundantia. Non solum, inquit, volo vos à cœno esse liberatos, sed albos esse & speciosos. Nam si Rex Babylonis juvenes eligens ex captivitate, elegit pulchros specie & vultu decoros; multò magis*



*eos qui adstant mensa regia formosos esse oportet, mentisque pulchritudine praditos, auro fulgentes, pura mente amictos, regalibus calceis indutos, formosum animæ vultum, splendideque ornatum circumferentes, ac veritatis zonâ pracinctos. Qui talis est, accedat, & pocula tangat regia. Si quis autem pannis oblitus, sordidus & squallidus ad mensam regiam velit ingredi, vide quanta patietur, cum non sufficiant quadraginta dies (id est suacrum Quadragesimæ tempus ab Ecclesia ad Communionem adorandam divinitus inspirata destinatum) ad abluenda quæ omni tempore sunt admissa delicta. Nam si non sufficit gehenna, licet sit æterna, idcirco enim est æterna; multò minùs hoc breve tempus. Non enim validam, sed imbecillam suscepimus pœnitentiam.*

Si ad Eucharistiam frequentandam non solum liberatio à peccatis, sed etiam sanctitas, & præsentia sancti Spiritus cor inflammantis, & bonorum operum abundantia, authore Chrysostomo, & contestante universâ Patrum traditione desideratur: satis mirari nequeo eorum Sacerdotum non secundum scientiam zelum, qui nullâ sanctitatis supellectile instructi satis credunt se esse paratos ut tremenda quotidie mysteria adeant. Sed illud magis deplorandum, in cœtibus seu communitatibus etiam numerosissimis Sacerdotes omnes ad sacra singulis diebus facienda durâ necessitate pietatis colore oblita promiscuè propelli. Itane verisimile est omnibus & singulis solidum illum panis cœlestis cibum esse accommodatum, ut nullus sit æger, nullus convalescens, nullus imbecillis, ut nullum opus sit à sacris Altaribus in aliquod tempus summovere? Itane omnes nascentis Eccle-

fiæ Fidelium sanctitatem ac divinæ pietatis ardorem imitantur, ut eorum instar quotidie sacra participare aut facere satis sint idonei & comparati. Itæ omnes aquilæ sunt, id est animæ sublimes, & in cælum erectæ, nullum cum terra commercium habentes, nec deorsum tractæ, nec repentes cupiditate illectæ, sed assiduè sursum evolantes, ipsumque justitiæ Solem acutis intrepidæ & puræ mentis oculis intuentes? Nullæne est anima tarda, tepida, ac frigida, & ut suprà aiebat S. Bonaventura, *in statu finalis Ecclesia constituta*, cujus charitas refrigescens divino illo Pane quotidie refici non mereatur.

Sed ita sit, omnes ad sublimem perfectionis gradum ascendisse, nullumque in sacris cœtibus esse ignavum ac desidem, quod manifestæ tamen experientiæ adversatur; honor certè & reverentia in adorandum Christi corpus realiter præsens exigit, ut ab eo nonnunquam humilitatis & majoris desiderii excitandi causâ secedamus, atque amoris ac venerationis vices alternantes tremenda mysteria tum religiosâ abstinentiâ, tum sanctâ aviditate revereamur. Sapè hæc praxis, quâ ad Missam quotidie celebrandam omnes & singuli Sacerdotes indiscriminatim astringuntur, quacumque specie palliata, cum omnium Patrum doctrina velut adversa fronte confligit; ipsis etiam, ut mihi quidem videtur, communissimæ pietatis notionibus adversatur, quæ omnibus inspirat ac præcipit, ut non nisi sacro horrore perfusi ad tantæ Majestatis mensam, quam nec Angeli sine religioso quodam metu contuentur, accedant.

Non sum nescius Christum Dominum  
rius

tius suavitatis fontem omnes laborantes & oneratos ad se invitare & allectare; sed eos simul monet ut tollant suum ipsius jugum super se, ut discant à seipso, quia mitis est, & humilis corde: hoc est, ut legis & perfectionis Evangelicæ suavissimam sarcinam alacres suscipiant, ut fodiant fundamentum humilitatis, quò perveniant ad fastigium charitatis, ut Augustinus interpretatus est. Vitam non habituros in se qui non manducaverint hunc panem, Veritas interminatur; victuros verò in æternum qui hunc panem de cœlo descendentem comederint. Sed illud etiam probè scio quod ab Augustino dictum est tract. 26. in Joan. *Aliud est Sacramentum; aliud est virtus Sacramenti. Quàm multi de altari accipiunt, & moriuntur! Nonne buccella Dominica venenum fuit Juda? Et tamen accepit, & cum accepit, in eum inimicus intravit: non quia malum accepit, sed quia bonum malè malus accepit. Videte ergo, Fratres; panem cœlestem spiritualiter manducate, innocentiam ad altare portate.*

Si Beatus Franciscus Salesius omnium animarum Rectorum mitissimus quotidianam Communionem suadere minimè ausus est ipsis Fidelibus piè viventibus, lethaliū vulnerum expertibus, & in leviores tantum plagas, ob quas quotidie sanctissimus quisque pectus tundit, incurrentibus; satisque habuit illos ad Eucharistiam octavo quoque die percipiendam hortari, modò tamen priusquam sacra illa mensa attingatur, leviores maculæ lacrymis & orationibus abstergantur, ut ne voluntas peccatis levioribus illis affectu adhæreat: si, tunc eodem sanctissimo Antistite, sacram Eucharistiam

ristiam frequentantes nullum erga peccata venialia affectum fovere debent, quia affectus ille, tametsi animam lethali ictu non conficiat, gravissimè sauciat tamen. *Musca morientes*, inquit *Sapiens*, *perdunt suavitatem unguenti* ( verba sunt S. Genevensis Præfulis hoc exemplo doctrinam suam egregiè illustrantis. ) *Hoc est, musca si in unguento minùs hareant, illudque obiter stritumque delibent, nihil ferè ex illo nisi quod abstulerunt inficiunt. Si verò in unguento ipso immoriantur, præstantiam ejus & dignitatem extinguunt, atque id in contemptum adducunt. Ita leviores culpa cum in animam piam inciderint, si in illa diutius non hareant, haud magnoperè laedent; quod si in ea studio quodam & affectu permanserint, unguenti, hoc est sacra devotionis suavitatem procul dubio extinguunt.*

Si, inquam, hæc ita sint, quis facilè sibi persuadeat, omnes numerosi cœtus alumnos nullo titillantis peccati venialis affectu esse implicitos, nihilque noxii humoris cordi quasi stomacho insidere, qui quominus cœlestis Eucharistiæ cibus concoquatur impediatur, ut non solùm octavo quovis die, sed & quotidie sacram Communionem obire promiscuè & indiscriminatim possint? Quis in animum inducet suum, eximiam & optandam illam quidem omnibus Sacerdotibus & Religiosis cordis castimoniam, & à plerisque servatam, adeò esse vulgarem & obviam, ut omnes & singuli ingentis familiæ incolæ Sacerdotes mentem à peccati venialis studio ita reverà liberam & expeditam semper custodiant, ut factis & operibus attestantibus ( quæ veri sunt interiorum animi studiorum tanquam radicum



fructus) declarent & ostendant, se leves omnes offensusunculas animo deliberato non suscipere oblatas, latentes & obrepentes pro viribus fugere, quidquid ad eas inducit sedulò declinare; quidquid ab eis avertit accuratè studiosèque sectari: id est, solitudine & secessu maximè delectari, continentibus orationibus & sacris studiis pasci, negotiis omnibus non necessariis. se subducere, denique omnes peccandi occasiones declinando, ac necessarias vitæ emendandæ & perficiendæ rationes & vias sequendo demonstrare se tacitam peccati repetendi voluntatem non alere. Si ita sit, ostdidianam communionem laudant Sancti, quotidianam in laïcis nec reprehendunt, nec laudant.

Et quanvis longè alia sit Sacerdotum & Laïcorum ratio; nihilominus tamen ad has rutissimas leges se exigant & exeutiant qui quotidie sacra faciunt, necesse est. Cogitent etiam atque etiam, sintne à peccatorum venialium libidine & visco & quasi glutine soluti; num germanam & non fallacem & adumbratam sentiant cibi Eucharistici appetentiam & famem ex divini amoris fervore; non ex pravo humore superfuso profluentem. Conscientiam testem veracem & iudicem sincerum interrogent, quæ non alium fallit, quàm qui se ipse fallere vult. Imos interioris animi recessus explorent, speculentur, scrutentur: & in lumine Dei perspiciant, num omnis peccati venialis amore & permanenti gustu defuncti sint? Num ab omnibus quæ Deo offensionis esse possint abhorreant? Num ad omnem vitæ suæ rationem ex Evangelio moderandam toto pectore intenti sint? Num Spiritus sancti fervore

fervore sacro concepto, puro illius cibi desiderio flagrent? Et tunc post jacta solidæ pietatis fundamenta, post adeptam diuturnis virtutum exercitationibus integritatem ac puritatem, ad Communionem frequenter accedant. Caveant verò Superiores, caveant Parochi, ne subditos sibi Sacerdotes ad quotidiana Sacra inconsultâ facilitate propellant, in quibus nullum tot Communionibus dignum emolumentum, nullus fructus apparet: ne dum sacristias suas pinguiore, & Ecclesias suas populorum frequentia celebriores reddere satagunt, sibi commissas animas languidiore, ac in dies importabilis cibi usu debiliores reddant. Itaque sæpius hoc Salvatoris mandatum revolvamus: *Nolite sanctum dare canibus*; id est, ut exponit Ambrosius lib. 2. de pœnit. cap. 9. *Immundis spiritibus sacra Communionis non faciliè impartienda commercia*. Vel ut interpretatur Clerus Romanus epist. 30. ad Cyprianum: *Ne subministrare pro salutaribus dilationum remediis exitiosa properata Communionis venena*.

Dicam, & liberè dicam quod sentio, nec ullus, nisi mea me fallat sententia, pietatis veritatisque amans contradicet. Si qua est in Clericis relaxatio, si qua est in Monasteriis disciplinæ regularis jactura (& magnam esse in plurimis nemo inficias ibit, qui vel canones non ignoraverit, vel non fuerit ipse cum dissolutis dissolutus) tota quanta est à sacra Communionis quam sine præparatione frequentant, abusu proficiscitur. Indurat Sol lapides qui ceram liquefacit infirmum stomachum panis opprimit, qui sanum vegetat & confirmat. Similiter igitur mor-

tuis mortem , tepidis teporem auget frequen-  
tata communio , & iterata Missarum celebratio.  
Habenti devotionem datur major , & abundat;  
ab eo autem qui non habet , & quod habet au-  
feretur ab eo.

Qui ergo nec sacra lectione , nec piâ medita-  
tione , nec instanti oratione , nec ullis interioris  
hominis exercitationibus alternatim animum  
suum pascit , quomodo fructus ex Eucharistia  
reportaret , quomodo cœlestes aquas hauriret è  
fontibus Salvatoris , cujus morbus eo insanibi-  
lior est quo insensibilior , nec ipsum spiritualis  
vel religiosi hominis nomen meretur ? Non pro-  
feram Patres toto capitis decursu satis produ-  
ctos. Audi , Lector , eximii Theologi Joannis à  
S. Thoma , Regis Catholici à Confessionibus  
sententiam in suo erudito Catechismo , part. 2.  
cap. 12. *Non meretur* , inquit , *nomen spiritualis*  
*persona vel religiosa* , qui ad minus singulis die-  
bus in aliquo horum non se exercet. Nulla est  
occupatio adeò necessaria , qua semper & conti-  
nuò impediatur , praesertim quoad exercitiâ interio-  
ris spiritus , in iis qui vitam spiritalem profiten-  
tur , nisi fuerit acedia & indotio. Et certè  
terribilia & notatu digna sunt verba quae Ma-  
gister Avila cuidam Religioso scribit hoc modo:  
Religiosi qui ambulant sine consideratione finis  
proprii , efficiuntur tepidi , inquieti , murmurato-  
res , ambitiosi , iracundi , loquaces , sensuales , hi-  
striones , & duriores quàm seculares : & nisi Deus  
per suam misericordiam ad poenitentiam eos re-  
vocet aut conservet , in mala labuntur praecipitia ,  
quibus nunquam postea liberantur. Haëtenus  
Magister Avila. Unde omnis dissolutio Religioso-  
rum.

*rum ( & idem de omnibus omnino Sacerdotibus peræquè judicandum est ) nascitur ex defectu considerationis sui finis : & reverà idipsum ex effectibus enumeratis faciliè colligi potest. Si non meretur nomen spiritualis & religiosæ personæ , quomodo Sanctum Sanctorum , tremendum mysterium , puritatis authorem , impuritatis omnis impatientem quotidie præsumet accipere ?*

*B I N D I S.*









Handwritten text in Devanagari script, likely a header or introductory section of a document. The text is faint and mostly illegible due to fading and bleed-through.

Handwritten text in Devanagari script, continuing the document. The text is faint and mostly illegible due to fading and bleed-through.

Handwritten text in Devanagari script, continuing the document. The text is faint and mostly illegible due to fading and bleed-through.

Handwritten text in Devanagari script, continuing the document. The text is faint and mostly illegible due to fading and bleed-through.





